


Xela wezria cube nen  
salmo ca'



New Testament and Psalms in Zapotec, Tabaa (MX:zat:Zapotec,  
Tabaa)

# Xela wezria cube nen salmo ca' New Testament and Psalms in Zapotec, Tabaa (MX:zat:Zapotec, Tabaa)

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

## Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament and Psalms**

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
80626b72-93df-58ae-9f5e-9d86733fab46

## Contents

Salmos . . . . .	1
San Mateo . . . . .	136
San Marcos . . . . .	201
San Lucas . . . . .	242
San Juan . . . . .	309
Los Hechos . . . . .	359
Romanos . . . . .	419
1 Corintios . . . . .	445
2 Corintios . . . . .	470
Gálatas . . . . .	486
Efesios . . . . .	495
Filipenses . . . . .	504
Colosenses . . . . .	510
1 Tesalonicenses . . . . .	516
2 Tesalonicenses . . . . .	521
1 Timoteo . . . . .	524
2 Timoteo . . . . .	532
Tito . . . . .	537
Filemón . . . . .	541
Hebreos . . . . .	543
Santiago . . . . .	562
1 San Pedro . . . . .	569
2 San Pedro . . . . .	576
1 Juan . . . . .	580
2 Juan . . . . .	587
2 Juan . . . . .	588
Judas . . . . .	589
Apocalipsis . . . . .	591

## SALMO CA'

### 1

1 Ba neza zrentę naca na chee bėnnea'  
quebe dxezi'e da dxuluzėajni'i benne' wən da caleła ca' le',  
ne quebe dxunę tuze benne' dul-la ca',  
ne quebe dxunę tu zren benne' ca' dxelún le' chee Dios.

2 Zue' xel-la' dxebe lawe' da dxuzúe' dizra'  
da nadxixruj bea Xránadxu,  
ne ca naca da nadxixruj bea na,  
te zra ne chizrela dxelaba lazre' na.

3 Benne' nigá naque' ca tu xaga zua na dxu'a xegu nisa,  
da dxunna na da zixre chee na lu beu' cheęqueze na,  
ne xrlegue na quebe dxase na.

Ca naca da dxun benne' nigá, dxępe ban na.

4 Quegá caní zaj naca benne' wən da caleła ca'.  
Zaj naque' ca tu xizre laga' da dxua be' bđunu'.

5 Quebe xelexegá'ana chawe' benne' wən da caleła ca'  
gate guchi'a Dios chee',  
ne quebe xelú'u benne' dul-la ca' naga zaj nazraga  
benne' xrlátaje ca'.

6 Dxezaca ba lazre' Dios ca da dxelún benne' xrlátaje ca'.  
Da dxelún benne' wən da caleła ca'  
che na le' naga xelebía xi'e.

### 2

1 ¿Bizr chee na' dxeledábaga benne' xęzr la xu ca' neda'?  
¿Bizr chee na' dxululaba lázrequeze bėnneache  
da guzúa na neda' chalá'ala?

2 Dxeledábagaqueze benne' wenná bea ca',  
ne dxelún tuze dizra' benne' ca' dxelenná bea ca xelunę'  
chee Xránadxu Dios, ne chee Bėnnea' gucá'a Le'.

3 Dxelennę': "Guselá cuínadxu lu xel-la' dxenná bea chee',  
ne guzúadxu chalá'ala da zaj nadxixruj bé'ene' dxi'u."

4 Naga dxe' Xránadxu xabáa dxuzrizre'.  
Quebe dxezi' lenę' chee da dxelegú'u lazre' xelunę'.

5 Lu xel-la' dxezrá'a chee' dxedil-le' le',  
ne lu xel-la' snia chee' dxuchebe' le'.

6 Dxennę': "Lu xi'a lá'azxa chia', xi'a Sión  
ba nuzúa' benne' gaque' Wenná Bea waláz chia' neda'."

7 Dxenná Wenná Bea na': "Guzenda' le'e da  
guzre Xránadxu neda'."

Guzre' neda': "Lue' nacu' Zri'ina'. Ná'aqueze naca' Xrau'.

8 Gunabe neda', na' gunna' Lue' xúgute' cue' xęzr la xu ca',  
na' gaca chiu' dute' ca naca xęzr la xu.

9 Guzízxenu' bėnneache xęzr la xu ca' nen vara xia,  
ne ca tu dxe'e xu guzuzru' le'."

10 Na'a, le'e, wenná bea, le xene da nigá dxuzėajni'ida' le'e.  
Le guşęde da nigá dxusízreda' le'e,

benne' dxelenná bea lu xezr la xu.

11 Le gun zrin cheę Xránadxu Dios, dutę xel-la' dxezrebe cheęle.  
Nen xel-la' dxezrize cheęle, le be lau Le'.

12 Le gapa ba lá'ana Zrí'ine' cheę quebe zře'e,  
checa' cuía xile la neza cheęle, lawe' da la zra'ate Le'.  
Da ba neza zrentę naca na cheę xúgute benne'  
dxuluxrén lazre' Le'.

### 3

1 Xrana' Dios, ba naxánle'e benne' dxeledábague' neda'.

Benne' zantę dxeledíl-lalęne' neda'.

2 Benne' zantę dxelenné' chia': "Quebe guselá Dios le'."

3 Lue', Xrana' Dios, dxucú'uju' neda'.

Nacu' Benne' dxebélena', ne Benne' dxuzę chawe' neda'.

4 Gudxezre xa'a, bláwizra' Xrana' Dios,  
na' Le' bechebe' chia' naga zue' lu xi'a lá'azxa cheę'.

5 Guta', ne gusia',  
na' bebana' lawe' da nuxru Xrana' neda'.

6 Quebe zreba' gaxúa gaxúa bėnneache,  
benne' zaj naxéchaje' neda'.

7 Guzé, Xrana' Dios.

Bselá neda', Dios chia'.

Ben we' xraga benne' ca' dxeledíl-lalęne' neda',  
ne guzuzruj lazxa benne' xriwe' ca'.

8 Xel-la' weselá za' lu na'u, Xrana' Dios.

Ben da chawe' cheę bėnneache chiu'.

### 4

1 Bechebe chia' gate dxuláwizra' Lue', Dios.

Nacu' Benne' dxuchi'e ca da dxuna'.

Gate guzúa' lu da stebe, Lue' btipu' lazra'.

Bexache lazre' neda', ne bene ca da dxuchálajlena' Lue'.

2 Le'e, bėnneache, ¿ájatęscha' gucá'ana dítjale neda'?

¿Ájatęscha' zri'ile da quebe zaca, ne chėjle da wen lazre'?

3 Le xexúnbea ba gucá'a Xránadxu  
nu benne' dxape' Le' ba lá'ana.

Xrana' Dios xenne' gate dxuláwizra' Le'.

4 Le zrebe lau Dios, ne quebe gunle dul-la.

Le gulaba lazre' cheę naga dxásale, ne le sua zrize.

5 Le gute lau Le' bėadu ca' lu da naca du lazre',  
ne le guxrén lázre' Xránadxu Dios.

6 Benne' zantę dxelenné': "¿Nuzra gun gá'anatu' chawe'?"

Dutę xel-la' zri'i lazre' chiu' bxue netu', Xran.

7 Lue' bzu' xel-la' dxebe lu xichaj lázrdawa',

da naca na zrendxa ca da zaj napa benne' zaj nápalę'e zrua',  
ne xrise uva wal-la.

8 Dutę xel-la' dxebeza zri lazre' gata', ne gasia',  
lawe' da dxunu' Lue', Xran, zua' zri'a chawe'.

## 5

- 1 Bze naga dizra' chia', Xran.  
 Bde lazre' ca dxebezre lazra'.
- 2 Bene ca guchálajlena' Lue', Wenná Bea chia', ne Dios chia', q lawe' da guláwizraja' Lue', Dios.
- 3 Xran, che zílala xennu' chi'a.  
 Che zílala xídaqueza' lau Lue', ne wabeza lazra' Lue'.
- 4 Nacu' Dios quebe dzezaca ba lazru' da calela.  
 Benne' wen da calela quebe súaqueze' naga zu' Lue'.
- 5 Quebe dxu'u lataj xelezrín benne' wen da calela lau'.  
 Dxecuidenu' xúgute benne' dxelune' da zrinnaj.
- 6 Guzríá xí'quezu' benne' ca' dxelezí xē'ē.  
 Guzú' chalá'ala benne' wete benne', ne benne' guzrí xē'.
- 7 Neda' waca chu'a lizru' lawe' da nazrí'ile'enu' neda'.  
 Güe lá'ana' Lue' lu xudau' lá'azxa chiu' dutē xel-la' dxezrebe.
- 8 Bsi neda' chee guna' da xrlátaje chiu', Xran,  
 lawe' da zrále'ē benne' dxeledábague' neda'.  
 Gulú'u neda' neza chawe' chiu'.
- 9 Benne' caní quebe dxelenné' da li.  
 Lu xichaj lázrdawe' xu'u da calela.  
 Xedxu lbe'ē zaj naca na ca tu ba chee benne' gate da naxalaj na.  
 Zaj nupé'ē dizra' chawe' chee' da zaj naca na da wen lazre'.
- 10 Bde benne' ca' lu da ba xa', Xrana' Dios.  
 Ben cheajlecházie' cáteze zaj naca xrtízaqueze'.
- Lawe' da naxánle'ē da calela da dxelune'  
 ne lawe' da guledábague' Lue', bebéaje' chalá'ala.
- 11 Welebéle'ē benne' ca' dxuluxrén lazre' Lue'.  
 Welebézre xá'aqueze' dutē xel-la' dxelebe  
 lawe' da dxucú'uju' le'.
- Lau Lue' welebéle'ē benne' ca' zaj nazrí'ine' Lue'.
- 12 Gúnquezu' da chawe' chee benne' xrlátaje, Xran.  
 Gucu'uju' bēne'a' lawe' da dzezaca ba lázre'enu' le'.

## 6

- 1 Lue', Xran, quebe til-lu' neda' lu xel-la' snia chiu',  
 ne quebe gudéu' neda' ba xa' lu xel-la' dxezrá'a chiu'.
- 2 Bexache lazre' neda', Xran, lawe' da quebe chawe' zua'.  
 Bexún neda', Xran, lawe' da dxedéa' xel-la' zi'.
- 3 Stébele'ē zua xichaj lázrdawa'.  
 Xran, ¿bátala gácalenu' neda'?
- 4 Gudá, Xran, bselá bēne'du xu'a.  
 Bselá neda' dutē xel-la' zrí'í lazre' chiu'.
- 5 Naga zaj zra' benne' gate ca', quebe nu dxeajsá lazre' Lue'.  
 Lu lataj ba xa' ¿núzraqueze güe lá'ana Lue'?
- 6 Ba dxexedú lazra' lawe' da dxebezre lazra'.  
 Tu zre' tu zre' dxebísane ga dxásia' nisa da dxebezra'.  
 Dxusebisa' xrcugua' nisa da dxebezra'.
- 7 Ba dxane xiaj lawa' xel-la' dxebezre.  
 Ba bebízraqueze nisa xuzru xiaj lawa' lawe' da zrále'ē  
 benne' dxulusaca zi'ē neda'.
- 8 Le cuasa naga zua', xúgutele dxunle da zrinnaj

lawe' da ba ben Dios dxebézrele'a.

<sup>9</sup> Xrana' Dios ba benne' da dxata' xueda' Le'.

Ba guzí' Xrana' Dios da dxuchálajlëna' Le'.

<sup>10</sup> Dxelexedué'e, ne zaj zua lu da stébele'e xúgute  
benne' dxeledábague' neda'.

Chaditë xelexebigue' naga zua', ne xelexedué'ene'.

## 7

<sup>1</sup> Xrana' Dios, dxuxrén lazra' Lue'.

Gúcale neda' ne bselá neda' lu na' benne' ca' dxulusaca zi'e  
neda',

<sup>2</sup> cheë quebe xelexe'le' neda' ca dxun beẏre xixre',

na' xuluzúruje' neda' naga quebe nu chilá' nu guselá neda'.

<sup>3</sup> Xrana' Dios, che bëna' neda' caní:

Che bi da zrinnaj bën ni'a na'a.

<sup>4</sup> Che bi da calela bëna' cheë benne' zue' chawe' nen neda'.

(Bselá' bënnea' dxedábague' neda' lácala quebe bi nuna' cheë'.)

<sup>5</sup> Che caní bëna',

bë lataj benne' dxedábague' neda' gau zi' ne xezrúnene' neda'.

Bë lataj bënnea' guchuchu guléaje' neda' lu xu,

ne xusunitië' xel-la' ba lá'ana chia'.

<sup>6</sup> Xran, dutë xel-la' dxezrá'a chiu', guzé.

Bexechaj benne' ca' dxulusaca zi'e neda' lu xel-la' dxelezrá'a cheë'.

Gusel-la da gácale na neda' gate guchi'u da dxaca chia'

ca da gunná be'u.

<sup>7</sup> Xúgute benne' zaj zre'e xezr la xu xelexrague' lau'.

Gunná be'e benne' ca' dutë xel-la' szren chiu'.

<sup>8</sup> Lue', Xran, guchi'u cheë benne' xúgute xezre.

Bchi'a ca da nuna' lu da naca xrlátaje,

ne lu da naca du lazre' chia'.

<sup>9</sup> Bën cheajsé naze da zrinnaj da dxelún benne' wën da calela ca',

san bzua chawe' benne' xrlátaje,

lawe' da nacu' xrlátaje, Dios, ne dxenná'u da xu'u

xichaj lázrdau bënneache.

<sup>10</sup> Diósqueze dxucu'uje' neda'.

Dxuselé' benne' zaj naque' du lazre'.

<sup>11</sup> Xlátaje dxuchi'a Dios cheë da dxelún bënneache.

Tu dxezrá'azqueze Dios da dxelún benne' wën da zrinnaj ca'.

<sup>12</sup> Che quebe xelexíaje lazre' Dios gulé' xia cheë'.

Ba nuzúa cuásatë' xaga nalá xéche'ze cheë'.

<sup>13</sup> Ba naxrúa cuásatë' xia cheë' ca' cheë wedil-la.

Ba nuzúa cuásatë' xaga nalá xéche'ze da dxelala.

<sup>14</sup> Benne' wën da zrinnaj dxugú'u lazre' ca da calela gunë'.

Xu'u lázrdawe' da zrinnaj da gunë', na' dxebéájé' da wën lazre'.

<sup>15</sup> Ba gudëne' tu xëdxu situj naga cheajlechaze bënneache,

na' lézqueze' xeajcházie' lu xëdxu na'.

<sup>16</sup> Da zrinnaj da bënë' dxebugue na léqueze',

na' da bsaque' bënneache xezrizre na xíchajë'.

<sup>17</sup> Güe lá'anaqueza' Xrana' Dios ca da xrlátaje da dxunge',

ne gúl-laqueza' cheë La Xrana' Dios, Bënnea' naque' szrente.

## 8

1 Lue' Dios, Xránantu', zrentę naca Lau' du gabí'i xęzr la xu.

Zrendxa naca xel-la' szren chiu' ca xabáa.

2 Bidu ca', ne bidu dxe'ene ca' dxelúl-labe' ca naca na.

Zúaquezu' lataj chawe' naga quebe xelezrín benne' ca'  
dxeledábague' lue'.

Dxuzúa zriu' benne' dxeledábague' lue',

ne benne' dxelecuídenę' Lue'.

3 Gate dxenná'a xabáa da nunu' Lue',

ne beu', ne belaj ca', da ca' nuzú' cha cheę na,

4 na' dxucheęba': "¿Ájazra naca bėnneache, dxulaba lazru' cheę le'?"

¿Ájazra naca bėnneache, dxe'u gunne xue le'?"

5 Bėnu' le' látezdxá szren ca' nacu' Lué'queze,

ne bzu' cheę' xel-la' szren, ne xel-la' ba lá'ana.

6 Bėnu' dxenná bė'eng' xúgute' da ca' nunu'.

Xúgute' na bdeu' lu ne'e,

7 zrila' ca', ne bęzre ca',

ne xúgute' bę xixre' ca',

8 bę zaj zua xrila, ne bela ca',

ne xúgute' da zaj zua na lu nísadau'.

9 Xránantu', Dios,

szrentę naca Lau' du gabí'i xęzr la xu.

## 9

1 Xran, dutę lázrdawa' güe lá'ana' Lue'.

Guzenda' bėnneache ca' zaj naca da zrentę da bėnu'.

2 Wabėquezda', ne gúl-laqueza' ca' naca chiu'.

Gul-la' cheę lau' Lue', nacu' Dios zrentę.

3 Buluzrunnuj benne' dxeledábague' neda'.

Xeajlechazię', ne belexenitię' lau Lue'

4 lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

5 Gudil-lu' benne' xęzr la xu ca',

ne bzria xi'u benne' węn da calęla ca'.

Bsulu' la benne' ca' chadía chacanna.

6 Ba gulebía xi' benne' dxeledábague' neda'.

Chadía chacanna zaj nazrinna' lataj cheę benne' ca',

ne xęzre cheę' ca', da ca' bchínnuju' Lue'.

Netú benne' cheajsá lazre' benne' ca'.

7 Xránadxu Dios súatequezę' chadía chacanna.

Ba nucuezę' lataj blau cheę' naga guchi'e cheę bėnneache.

8 Lu da xrlátaje guchi'e cheę bėnneache dutę xęzr la xu,

ne cheę benne' xúgute' xęzre ca' lu da naca li lazre'.

9 Xránadxu Dios gaque' ca' tu lataj ga xelezrá chawe' benne' xache',

naga xelezrę'e chawe' gate zrin zra cheę da zi' da xa'.

10 Benne' ca' zaj núnbe'e Lue', Xran, xuluxrén lazre' Lue',

lawe' da quebe bsan lazru' benne' ca' belexilaję' Lue'.

11 Le gul-la cheę Xránadxu, Bėnnea' zue' xęzre Sión.



Le guzén benne' xezre ca' ca zaj naca da ca' nune',  
 12 lawe' da dxeajsá lazre' chee benne' ca',  
 ne dxexebéaj lazre' chee benne' wete benne'.  
 Quebe gul-la lazre' ca da dxululáwizra benne' ba xache' ca' Le'.  
 13 Bexache lazre' neda', Xran.  
 Gunná' da dxezaca' lu ni'a na' benne' ca' dxelecuídene' neda'.  
 Dxecá'u neda' lu na' xel-la' gute,  
 14 chee guzenda' bénneache da dxue lá'ana' Lue',  
 naga dxu'untu' xezre Sión,  
 ne chee beda' lawe' da bseláu' neda'.  
 15 Xeajlechaze benne' xezr la xu ca' lu xedxu da gulene'.  
 Xeajlechu'e lu xralaj da bulucueze'.  
 16 Xránadxu Dios blé'ene' ca da zaj naque' ne chee  
 da zi' da xa' da gudichaj be'e chee benne' ca' dxelune' da calela.  
 Xeajchaze benne' wen da calela na' lu da nun ni'a ná'queze'.  
 17 Benne' wen da calela ca' xeledéqueze' lu lataj ba xa'.  
 Xúgute' benne' ca' dxelal-la lazre' Xránadxu Dios.  
 18 Quegá chadía chacanna gal-la lazre' Dios benne' xache' ca',  
 ne quegá tu chi'ize xenite da dxelebeza lazre' le'.

19 Guxasa, Xrana' Dios.  
 Quebe gu'u lataj xelexegá'ana szrénqueze bénneache.  
 Xelelá' lau' benne' xezr la xu ca' chee guchi'u chee'.  
 20 Xran, beñ xelezrebe benne' ca' Lue'.  
 Beñ xelexúnbea benne' xezr la xu ca' zaj naque' bénneacheze.

## 10

1 ¿Bizr chee na' zu' zitu', Xran?  
 ¿Bizr chee na' dxucache cuinu' gate dxeledé xel-la' zi'  
 bénneache chiu'?

2 Benne' wen da calela dxenáu zi' xuzre' benne' xache'  
 lu xel-la' dxucá'ana szren cuine',  
 na' xeajchaze benne' xache' na' lu da ba nucuéza bénnea'.

3 Dxucá'ana szren cuine' ca naca da dxezá lazre'.  
 Nupé'e dizra' da dxenné' chee benne' dxucude',  
 na' dxucá'ana dítajé' Xránadxu Dios.

4 Benne' wen da calela na' lu xel-la' dxucá'ana szren cuine'  
 quebe dxape' Dios ba lá'ana,  
 ne quebe dxéquene' che zua Dios.

5 Tu dxúnzqueze' da calela,  
 ne quebe dxéquene' guchi'u Lue' ca da dxunge'.  
 Dxuzúe' chala'ala xúgute' benne' dxeledábague' le'.

6 Lu xichaj lázrdawe' dxenné': "Quebe bi seque' guzaga na neda'.  
 Cabata' bi gaca chia' da calela."

7 Tu dxennézqueze' dizra' schanni',  
 ne da wen lazre', ne ca naca da calela da gune'.  
 Dxeledxúaj dxu'e dizra' calela, ne dizra' xálaze.

8 Dxu'a xezre ca' dxucache cuine' chee quele' bénneache.  
 Bagácheze dxutie' benne' dxeledeze' na'.

Bagácheze dxenné'e chee bi guné' chee benne' xache' ca'.

<sup>9</sup> Bagácheze dxebeze' ca dxun beze xixre'.

Dxebeze' ga séquene' quel-le' benne' xache' ca'.

Dxel-le' benne' xache' lu xralaj chee', ne dxexu'e le'.

<sup>10</sup> Dxiñe' xu bénnea' gudel-le'.

Dxusaca zie' benne' zan nen ne'e wal-la.

<sup>11</sup> Lu xichaj lázrdawe' dxenné': "Nal-la lazre' Dios benne' caní. Nucache lawe', ne quebe lé'ene' da dxuna'."

<sup>12</sup> Guxasa, Xrana' Dios, ne bze na'u.

Quebe gal-la lazru'u benne' xache' ca'.

<sup>13</sup> ¿Ájazra chen' benne' ca' dxelune' da calela dxuluzúe' Dios chalá'ala?

Lu xichaj lázrdawe' dxelenné': "Quebe xebéaj lazre' Dios."

<sup>14</sup> Dios, Lue' blé'equeznu' da nigá,

lawe' da dxenná'u benne' wen da calela,

ne da ca' dxune' quebe naca na xrlátaje,

na' xebéaj lázrequezu' bénnea'.

Dxuluzúa cuina benne' xache' ca' lu na'u.

Lue' dxácalequezu' bi wezébedu ca'.

<sup>15</sup> Dxugú' xel-la' wal-la chee benne' wen da calela.

Guleaj lávela da calela da nune', da na' bene' lu da bagache'.

<sup>16</sup> Chadía chacanna naca Xránadxu Wenná Bea cheedxu.

Lu xezr la xu chee' ba gulebía xi' benne' dxelecuídené' Le'.

<sup>17</sup> Bnézruju' ca da bululáwizra benne' dxexruj lázre'du ca' Lue', Xran.

Lue' dxupa'u lázxdau bénne'du ca' chee xuluzé nague' xrtizru',

<sup>18</sup> chee guchi'u chee bi wezébedu ca',

ne chee benne' dxeledé' xel-la' zi',

chee québedxa bi da calela xelún benne' ca'

dxelune' da calela chee bénne'du caní.

## 11

<sup>1</sup> Dxuxrén lazra' Xrana' Dios.

Ájazra chen' dxi'u bénne'du xu'a:

"Bzrunnuj, guxiáj lu xí'ala ca tu bxinne?"

<sup>2</sup> Le na' xque, dxulucuéza benne' ca' dxelune' da calela xaga nalá xéche'ze.

Ba zaj naxrúe' xaga nalá xéche'ze chee' lu du chee na, chee xelútié' bagácheze benne' xrlátaje ca'.

<sup>3</sup> Chete ca' xelexinnaj da dxulusé chuchu da xrlátaje,

¿ájazra xelún benne' xrlátaje ca'?

<sup>4</sup> Xránadxu Dios zúaqueze' lataj lá'azxa chee'.

Xabáaqueze zua lataj blau naga dxe' Dios.

Dxelenná' xanne xiaj lawe'.

Dxelé'ene' ca da dxelún bénneache.

<sup>5</sup> Xránadxu Dios dxudé' chawe' benne' xrlátaje ca' lu da stebe.

Dxelecuídené' benne' ca' dxelune' da calela,

ne benne' dxelunę' da zrinnaj.

<sup>6</sup> Gudéę' benne' ca' dxelunę' da caleła lu da zi' da xa',  
da zaj naca na xi', ne da dxuzézrele'ę da dxala na ca xedxe,  
ne tu be' lálę'e, da ca' sel-le' lawe' benne' ca'.

<sup>7</sup> Cani gunę' lawe' da naca xrlátaje Xránadxu Dios,  
ne nazrí'ine' da naca na xrlátaje.

Benne' li lazre' ca' xelexé'ene' lawe'.

## 12

<sup>1</sup> Xrana' Dios, bselá bėnneache chiu' lawe' da québedxa  
dxape' benne' xezica Lue' ba lá'ana.

Quebe nu chilá' benne' li lazre' ládujla bėnneache ca'.

<sup>2</sup> Xúgute bėnneache ca' dxelezí xę'e le sa' ljwezre'.

Lu da wen lazre' ba zaj nupę'e dizra' cheę xelezí xę'e le'.

<sup>3</sup> Xránadxu Dios guzría xi'e xúgute benne'

quebe dxuluchálaje' du lazre',

ne benne' ca' dxuluchálaje' da dxucá'ana szren cuine'.

<sup>4</sup> Benne' ca' gulenné': "Nę cheę dizra' cheentu'

zrué'entu' da chawe'.

Ca dxezá lázrentu' guchálajntu', ¿nuzra nna be'e netu', xca?"

<sup>5</sup> Dxenná Xránadxu Dios: "Na'a xídaqueza' lawe' da

dxulusaca zi'e benne' xache' ca',

na' dxelebezre lazre' benne' baxache' ca'.

Guselá' benne' ca' dxelánene' da guna'."

<sup>6</sup> Xrtizra' Xránadxu Dios zaj naca na du lazre'.

Zaj naca na ca xiaj plata da ba gudé na lu xi',

da ba gudé na lu xi' gazre lasa.

<sup>7</sup> Xran, guxúquezu' Lue' bėnneache chiu' ca'.

Chadía chacanna gucu'uju' le' lu na' benne' zaj zre'e  
lu zra na'a zra.

<sup>8</sup> Gáteteze na' dxaca da caleła

gate dxulucá'ana szren bėnneache da naca sban.

## 13

<sup>1</sup> ¿Ájatequeze gal-la lazru' neda', Xran?

¿Gal-la lázrtequezu' neda'?

¿Ájatequeze quebe le'enu' da dxaca chia'?

<sup>2</sup> ¿Ájatequeze gun na ba xen guchaga lawa' da dxezaca'?

¿Ájatequeze gaca wi'ine lazra' te zra, ne chizrela?

¿Ájatequeze nna be'e benne' dxedábague' Lue' neda'?

<sup>3</sup> Gunná' da dxaca chia', Xran, ne bechebe chia'.

Btipa lazra' cheę quebe gatia',

<sup>4</sup> ne cheę quebe nna benne' dxedábague' neda':

"Ba bętia' ni'a ne'e."

Benne' ca' dxeledábague' neda' xelebene'

che cheajcházia' lu da caleła.

<sup>5</sup> Neda' dxuxrén lazra' Lue' xexache lazru' neda'.

Dutę lázrdawa' dxebeda' lawe' da dxuseláu' neda'.

<sup>6</sup> Gúl-laqueza' cheę Xrana' Dios  
lawe' da ba nune' chia' da xrlátaje.

## 14

<sup>1</sup> Benne' lázxdau zide' dxezá' lazre', dxenné': "Quebe zua Dios."  
Benne' caní zaj nazrinnaj xichaj lázrdawe'.

Dxelune' da sban ca'.  
Quebe nu chilá' benne' dxune' da xrlátaje.

<sup>2</sup> Xránadxu Dios zuę' xabáa dxenné'ę bėnneache  
cheę lé'ene' che zua nu benne' dxėjni'ine',  
bėnnea' dxape' ba lá'ana Dios.

<sup>3</sup> Xúgute' zaj xu'ę neza xuca'.

Xúgute' zaj nazrinnaj xichaj lázrdawe'.

Quebe nu chilá' benne' dxune' da xrlátaje, netúęe'.

<sup>4</sup> ¿Quebe dxelėjni'i benne' ca' dxelune' da sban?  
Dxulusunítie' bėnneache chia' ca dxuzuzruj tu benne'  
xeta da dxawe',

ne quebe dxeléquebe'ene' zua Xrane' Dios.

<sup>5</sup> Dute' xel-la' dxelezrebe dxelezrize benne' ca'  
lawe' da dxácale' Dios benne' xrlátaje ca'.

<sup>6</sup> Belún le' cheę da gulenná benne' xache' ca',  
sua benne' caní xelebeza lazre' Xránadxu Dios.

<sup>7</sup> Xídatega Bėnnea' guselé' benne' Israel ca'.

Gate gun Xránadxu xelexezrín benne' cheę' ca',  
benne' ca' zaj nada'u zítu'la,  
na' welebé zri'ine zre sua Jacob,  
ne welebéle'ęquezne' benne' Israel ca'.

## 15

<sup>1</sup> Xran, ¿núzraqueze benne' sue' naga zu' Lue'?  
¿Núzraqueze benne' sue' naga naca lá'azxa chiu'?

<sup>2</sup> Waca bėnnea' naque' du lazre', ne dxune' da xrlátaje,  
bėnnea' zua da líqueze lu xichaj lázrdawe',

<sup>3</sup> bėnnea' quebe dxenné' cheę le sa' ljwezre',  
ne quebe bi da calela dxune' cheę le sa' ljwezre',  
ne quebe dxu'ę lataj nu benne' si' tizre' le sa' ljwezre'.

<sup>4</sup> Waca bėnnea' quebe dxape' ba lá'ana  
nu benne' dxune' da sban.

Dxape' ba lá'ana benne' ca' dxelape' ba lá'ana Xránadxu Dios,  
bėnnea' quebe dxuché'ę dizra' da ba gunné' lácala bi da' gunítie'.

<sup>5</sup> Waca bėnnea' dxusanę' dumí cheę' ne quebe dxenabe' xíchajen,  
ne quebe dxezi' lu ne'ę dumí cheę nnie' cheę  
nu benne' quebe bi zria nabague'.

Nu benne' dxune' caní cabata' cheajchazie' lu da calela.

## 16

<sup>1</sup> Bxue neda', Dios, lawe' da dxuxrén lazra' Lue'.

<sup>2</sup> Lu xichaj lázrdawa' gucha' Xrana' Dios:

"Lue' nacu' Xrana'.

Quebe bi xetú da xrlátaje de' chia' da quebe naca na chiu'."

<sup>3</sup> Tuze benne' ca' zaj naqueḡ' cheḡ Dios lu xęzr la xu,  
ne benne' ca' zaj naqueḡ' du lazre' dxezaca ba lázrelena'.

<sup>4</sup> Waxánqueze da dxelezaca benne' ca' dxelapeḡ' ba lá'ana  
tu dios quebe bi zaca.

Quebe guna' leḡ' tu zren gate dxuluzríḡ' zren lau dios na',  
ne quebe guchíneda' la dios na'.

<sup>5</sup> Xránadxu Dios dxugaweḡ' neda', ne naqueḡ' da ba neza chia'.

Lue', Dios, nuxru' ca da naca chia'.

<sup>6</sup> Ca da nuzú' chia' zaj naca na da dxezi'a ba neza,  
ne xrtantę zaj naca da nunnu' chia'.

<sup>7</sup> Tu gucá'ana szrénzqueza' Xránadxu Dios,  
Bénnea' dxusédeneḡ' neda'.

Chizrela gate ne dxasia' dxuzéajni'ineḡ' neda' lu xichaj lázrdawa'.

<sup>8</sup> Xránadxu Dios nuxrén lazra' gusi'ę neda'.

Lawe' da zuḡ' cuita', quebe bi seque' guchebe na neda'.

<sup>9</sup> Cheḡ leḡ' na' gubé lázrdawa', ne gubéleḡ'ęquezda',  
na' zra gacha' lu xędxu ba cueza lazra'

<sup>10</sup> lawe' da quebe gucá'anu' bėnne'du xu'a lu lataj ba xa',  
ne quebe gu'u lataj guzru nu benne' nácaquezeḡ' chiu'.

<sup>11</sup> Gulé'enu' neda' da guna' cheḡ gata' chia' xel-la' nabán.

Naga zu' Lue' wabéleḡ'ęquezda',  
na' cuitu' Lue' súatequeze da ba neza chia'.

## 17

<sup>1</sup> Bze naga chi'a, Xran.

Ben xanne' da dxuláwizra' Lue'.

Guzi' da dxenaba' Lue', naca' du lazra'.

<sup>2</sup> Benna lataj xelá'a lau' cheḡ guchi'u chia',  
lawe' da dxelé'enu' xúgutę cáteze zaj naca na.

<sup>3</sup> Lue' dxenná' xánniu' xichaj lázrdawa'  
ne dxelé'enu' neda' chizrela.

Gunná' xánniu' da dxuna', na' quebe bi da caleḡa blé'enu'.

Ba nuna' quebe bi dizra' caleḡa nnia'.

<sup>4</sup> Dxuzú'a' dizra' ca naca da dxennáu',  
na' quebe dxuna' ca da dxelún benne' węn da zrinnaj ca'.

<sup>5</sup> Bxue neda' lu neza chawe' chiu',  
cheḡ quebe cheajházia' lu da caleḡa.

<sup>6</sup> Dxuláwizra' Lue', Dios, lawe' da dxennu' chi'a.  
Bze naga chi'a, na' bene da dxennía'.

<sup>7</sup> Ble'e ca dxexache lázreleḡ'u bėnneache.  
Bselá benne' ca' dxuluxrén lazreḡ' Lue' lu na' benne'  
dxeledábaguḡ' leḡ'.

<sup>8</sup> Bxue neda' ca dxun benne' dxuxúḡ' xiaj laweḡ'.  
Gudezre neda' ca dxun bedxuj dxézreba' zri'ineba' zran xrílaba'

<sup>9</sup> cheḡ quebe bi xelún chia' benne' ca' dxelunę da caleḡa,  
benne' dxeledábaguḡ' neda', ne dxelaca lazreḡ' xelútię' neda'.

<sup>10</sup> Quebe dxelexache lazreḡ' le sa' ljwezreḡ',

na' dute<sub>̄</sub> xel-la' dxulucá' ana szren cuine<sub>̄</sub> dxuluchálaje'.

<sup>11</sup> Gáteteze dxedá' dxeléchaje' neda'.

Dxelaca lazre' xeline' neda' xu.

<sup>12</sup> Zaj naque<sub>̄</sub>' ca tu bezre xixre'dau' dxaca lázreba' bi gáguba'.

Zaj naque<sub>̄</sub>' ca tu bezre xixre',

ba nucache cuínaba' chee<sub>̄</sub> quél-laba' béadu ca'.

<sup>13</sup> Gudá, Xran, gudábaga' benne' ca' dxelune<sub>̄</sub>' da calela,

na' bchiche' lu xu.

Bselá neda' lu na' benne' ca' dxelune<sub>̄</sub>' da calela,

guchínenu' xia chiu'.

<sup>14</sup> Bselá neda' lu na' benne' ca' nen ni'a ná'quezu', Xran.

Bselá neda' lu na' bénneache, benne' ca' zaj dxe'e<sub>̄</sub> gunne xue

chee<sub>̄</sub> xezr la xu nigaze,

benne' ca' dxeláguqueze<sub>̄</sub>' da zácale'e<sub>̄</sub> chiu'.

Da nigáqueze dxulugawe' zri'ine' ca',

ne dxexegá' anaqueze da dxelágu zri'ine zre sue'.

<sup>15</sup> Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xebana'.

## 18

<sup>1</sup> Nazrí'ida' Lue', Xran.

Lue' dxuzé<sub>̄</sub> chuchu' neda'.

<sup>2</sup> Lue', Xran, nacu' ca tu xiaj naga ze chúchua',

ne ca tu xu'u zren naga xu'u chawa', na' nacu' weselá chia'.

Dios chia', Lue' dxuzé<sub>̄</sub> chuchu' neda', na' guxrén lazra' Lue'.

Dxucu'uju' neda', ne dxuseláu' neda', ne dxucache chawu' neda'.

<sup>3</sup> Wannéqueza' Xránadxu Dios,

Bénnea' naca chee' güe lá'anadxu Le'.

Le' guselé' neda' lu na' benne' ca' dxeledábague' neda'.

<sup>4</sup> Guzúa' lu da štebe chee<sub>̄</sub> xel-la' gute,

na' guca da calela ca tu xegu nisa da bchebe na neda'.

<sup>5</sup> Guzúa' lu da štebe chu'a lataj ba xa'

lawe' da zua' lu da štebe chee<sub>̄</sub> xel-la' gute.

<sup>6</sup> Lu da zi' da xa' bláwizra' Xrana' Dios, ne gunnéqueza' Dios chia'.

Le' benne' chi'a naga zue' lataj lá'azxa chee',

ne bze<sub>̄</sub> nague<sub>̄</sub>' da bchálaja' lawe'.

<sup>7</sup> Nadxa guzrú' lu xezr la xu nigá.

Gulezrize lane xi'a ca'.

Gulezrízele'e<sub>̄</sub> na lawe' da bzra'a Le'.

<sup>8</sup> Bdxuaj zren chee<sub>̄</sub> xi' lu zrine',

ne bdxuaj xi' lu dxu'e<sub>̄</sub> da bzezze na da de lawe',

na' xi' na' gudel-la na bau ca'.

<sup>9</sup> Bzéxruje' da zria zran xabáa, na' bétaje',

na' guzúa da chul-la zran ni'e.

<sup>10</sup> Gudé' lu be' zrie' tu da nazí le na querubín.

Chadí gudé' lu be' bdunu'.

<sup>11</sup> Gúcu'e<sub>̄</sub> da chul-la, da bcache na Le',

da na' naca na beuj bza da xuzru na nisa.

<sup>12</sup> Lu da dxácatite legala chee' da xu'u lu beuj bza,

na' beledxúaj bau dxelala, ne xiaj bezxe'.

13 Zran xabáa gunné guziu' chee chi'i Xránadxu,  
na' ben chi'i Dios szrenté ládujla bau dxelala ca',  
ne xiaj bezxe' na'.

14 Bsané' xaga nalá xéche'ze chee' ca',  
na' bese dínnaje' benne' ca' dxeledábague' neda'.  
Bsané' xesa guziu' ca', ne bzria xi'e benne' ca'.

15 Nadxa belelá' da zaj de lu situj chee nísadau',  
ne ble'e lau lane xezr la xu da zua na zran nísadau',  
gate na' gudil-lu' benne' ca' dxeledábague' neda', Xran,  
ne lu xel-la' dxezrá'a chiu' bzagu' benne' ca'.

16 Bétaje' lu da sibe, ne beque'e neda'.  
Bebéaje' neda' lu da naca ca tu nisa zila.

17 Bselé' neda' lu na' benne' wal-la dxeledábague' neda',  
ne lu na' benne' ca' dxelecuídené' neda',  
benne' zaj nácadxe' wál-la ca neda'.

18 Buluzague' neda' gate na' zua' lu da stébele'e,  
san Xrana' Dios gúcalene' neda'.

19 Bebéaje' neda' naga xu'a, ne bzue' neda' tu lataj zren.  
Bselé' neda' lawe' da bezaca ba lazre' chia'.

20 Xránadxu Dios bexunne' chia' cáteze naca  
da xrlátaje da nuna'.

Cáteze naca da xrlátaje da nuna' bexunne' chia'

21 lawe' da dxuna' ca da dxusede Xrana' neda',  
ne quebe guleaj xíchaja' Dios chia'.

22 Dxuna' ca naca da dxenná bé'ene' neda',  
ne quebe bsana' da ca' nadxíxruj be'e.

23 Guca' li lazre' lau Le',  
ne bxue cuina' chee quebe guna' da caléla.

24 Chee le na' bexunna Xránadxu Dios chia'  
cáteze naca da xrlátaje da bēna',  
cáteze naca da xrlátaje da nuna' lau Le'.

25 Ddexache lazru' chee benne' dxexache lazre' le sa' ljwezre',  
ne nacu' li lazre' nen benne' naque' li lazre'.

26 Dxunu' da naca chawe' chee benne' naque' chawe',  
na' gacu' snia nen benne' wen da caléla.

27 Guseláu' benne' zaj zue' lu da zi' da xa',  
san guzérju' benne' dxulucá'ana szren cuine'.

28 Lué'queze guzalju' xi' chia'.  
Xrana' Dios, guzani'u chia' naga zua' lu da chul-la.

29 Nen xel-la' waca chiu' guzría xi'a benne' zante  
dxeledíl-lalene' neda'.

Che Lue', Dios, síalēnu' neda'  
waca guchínnaja' ze'e da zaj naxechaj xezre ca'.

30 Li lazre' zaj naca da dxun Dios, na' du lazre' naca xrtizre'.  
Dxucu'uje' xúgutē benne' ca' dxelebeza lazre' Le'.

31 Tuze Xránadxu naque' Dios.  
Tuze Dios cheedxu naque' Benne' dxucu'uje' dxi'u.

32 Dios naque' Bēnea' dxuné' neda' benne' wal-la,  
ne Benne' dxuné' li lazre' da dxuna' neda'.

33 Dxuné' ni'a ca zaj naca ni'a bzrina' xixre'

ne dxuzúa chúchue' neda' lu xi'a Sión chee'.

<sup>34</sup> Dxusédene' neda' chee gaca cha'a lu wedil-la,  
ne chee gaca guchínda' xaga nalá xéche'ze  
da naca na xia gache'.

<sup>35</sup> Lu xel-la' weselá chiu' bcu'uju' neda',  
ne nen na'u xabela gúcalenu' neda'.

Xel-la' zri'i lazre' chiu' ba nucá'ana szren na neda'.

<sup>36</sup> Ben chawu' neza naga tea',  
chee quebe cuila' lu neza na'.

<sup>37</sup> Blaga' benne' dxeledábage' neda', na' xeajzrena' le',  
na' quebe bebi'a cadxa bétetea' benne' ca'.

<sup>38</sup> Bena' benne' ca' we', na' quebe guca xelexase'.  
Xeajlecházie' zran ni'a.

<sup>39</sup> Btipu' lazra' chee cha'a lu wedil-la.

Bzéxruju' benne' dxeledábage' neda' zran ni'a.

<sup>40</sup> Benu' buluzrunnuj benne' dxeledábage' neda' lawa',  
chee bzria xi'a benne' ca' dxelecuídené' neda'.

<sup>41</sup> Gulenné' nu benne' gácalene' le' san quebe nu chilá'.  
Gulenné' Xránadxu Dios, san quebe benne' chee'.

<sup>42</sup> Bzúzruja' benne' ca' ca bxrte xu da dxua be'.

Bléaja' le' ca dxuléaja' guna' la neza ca'.

<sup>43</sup> Bseláu' neda' lu na' benne' ca' dxeledábage',  
na' benu' neda' benne' xíchaje xezr la xu ca',  
na' benne' ca' quebe núnbe'a dxelune' zrin chia'.

<sup>44</sup> Gate belenne' chia', na' buluzúe' xrtizra'.  
Benne' zaj zra' xezr la xu ca' belune' ca' gunná be'eda'.

<sup>45</sup> Benne' zitu' ca' gulate ni'a ne'e,  
na' beledxúaje' dxelezrízie' lu xezre zrentau' chee' ca'.

<sup>46</sup> Gaca ba lá'azxa Xránadxu Dios.  
Gaca ba Bénnea' dxucu'uje' neda'.

Xegá'ana szrénqueze Dios, Bénnea' dxuselé' neda'.

<sup>47</sup> Naca Dios Bénnea' dxebéaj lazre' benne' dxeledábage' neda',  
ne dxuzúe' benne' ca' zran ni'a.

<sup>48</sup> Naque' Bénnea' dxuselé' neda' lu na' benne' ca'  
dxeledábage' neda'.

Dxune' dxenná be'eda' benne' ca' guledábage' neda'.

Bselé' neda' lu na' benne' xichaj zra'a ca'.

<sup>49</sup> Chee le' na' xechéba' chiu', Xran, lau benne' xezr la xu ca',  
na' gúl-laqueza' chee Lau' Lue'.

<sup>50</sup> Dxun Dios dxenná bea bénnea' waláz chee',  
ne dxexache lazre' bénnea' guqu'é, bénnea' naque' David,  
ne zri'ine zre sue' chadía chacanna.

## 19

<sup>1</sup> Dxulé'e lau zran xabáa ca naca xel-la' szren chee Dios.  
Dxuchálajqueze na ca zaj naca da nung'.

<sup>2</sup> Tu zra tu zra dxuzén na zra xula da nigá,  
na' tu zre' tu zre' dxé na zre' xula da ná'queze.

<sup>3</sup> Quebe dxuluchine na xrtizra' bénneache,  
ne quebe nu dxen chí' na,



<sup>4</sup> san dxezriluj da dxeleenná na du gabí'i xęzr la xu,  
ne dxelezrín xrtizra' na dapa saca cheę xęzr la xu.  
Dios benę' xabáa ca tu xu'u naga zua gubizra.

<sup>5</sup> Che zílala dxalaj na ca tu benne' wechaga na'.  
Dxebé na ca tu benne' dxezá chégü'e lu witja.

<sup>6</sup> Dxedxuaj na chalá'a naga dxalaj na,  
na' dxezrín na chalá'a naga dxebía na.  
Dxuchá'a na xúgute da zaj de.

<sup>7</sup> Du lazre' naca da nadxixruj bea Xránadxu,  
ne dxuzé chacha na béenne' du xú'udxu.  
Li lazre' naca da dxexechebe Xránadxu,  
ne dxunezruj na xel-la' sína cheę benne' ca'  
quebe zaj nape' na.

<sup>8</sup> Da líqueze zaj naca da nadxixruj bea Xránadxu,  
na' dxelebélé'e benne' ca' dxelune' ca zaj naca na.  
Du lazre' zaj naca da dxuzéajni'i Xránadxu dxi'u,  
da dxuluzúa na dxi'u lu xel-la' naxaní'.

<sup>9</sup> Cháwedau' naca zrédexu Xránadxu,  
da gun na súadxu chadia chacanna.  
Da líqueze zaj naca da dxuchi'a Xránadxu cheędxu,  
ne zaj naca na chawe'.

<sup>10</sup> Zaj naca na da dxezá lázredxadxu ca oro,  
ne ca oro zrente da zácale'e na.  
Zaj naca na zírredxa ca bzrína'dau', da nácale'e na zixre.

<sup>11</sup> Dxulusizre na neda', wen zrin chiu'.  
Lawe' da dxuna' ca zaj naca na, da zrente dxezi'a.

<sup>12</sup> Netú benne' quebe gaca lé'ene' da calela da dxune'.  
Bselá neda', Xran, lu da calela da quebe dxéquebe'eda' dxuna'.

<sup>13</sup> Bucache chawe' neda', wen zrin chiu',  
cheę quebe bi dul-la guna' du lazra'.  
Quebe gu'u lataj nna be'e dul-la neda'.  
Nadxa gaca' du lazra', ne quebe бага' zria cheę dul-la na'.

<sup>14</sup> Gaca da dxuchálaja', ne da dxulaba lazra'  
da dxezaca ba lazru' Lue', Xran  
Nacu' Benne' dxuxúe' neda', ne Benne' dxexá'ue' neda'.

## 20

<sup>1</sup> Dxenaba' Xránadxu xenne' chi'u lu zra zu' lu da stębe,  
ne gucu'uj La Dios cheę Jacob lue'.

<sup>2</sup> Dxenaba' Le' naga zue' lataj lá'azxa cheę' sel-le'  
da gácale na lue',  
ne cheę xi'a Sión xide' guxre' lue'.

<sup>3</sup> Dxenaba' Le' cheajsá lazre' ca naca xúgute guna' bzu' cheę',  
ne si' lu ne'e béadu ca' dxuzezru' lawe'.

<sup>4</sup> Dxenaba' Le' gunne' lue' ca naca da dxezá lazru',  
ne gune' xúgute da dxéquenu' xrlátaje.

<sup>5</sup> Béle'entu' gate guselé' lue',  
na' chísantu' tu da gulé'e lawe na La Dios cheędxu.  
Dxenaba' Xránadxu gunne' lue' xúgute da dxenabu' lau Le'.

6 Na'a nezda' dxuselá Xránadxu bénnea' ba gucá'aqueze'.  
 Naga zué' xabáa lá'azxa chee' xenne' chí'i bénnea'.  
 Xel-la' waca zrente' chee' guselé' bénnea'.  
 7 Bal-la benne' dxuluxrén lazre' carro ca' chee' wedil-la,  
 na' xezícadxé' dxuluxrén lázre' bzrina' ca'.  
 Dxi'u dxuxrén lázredxu La Xránadxu Dios.  
 8 Benne' ca' gulate ni'a ne'e, ne xeajlechazie'.  
 Dxi'u bexásadxu, na' zedxu.  
 9 Bselá netu', Xran, nacu' Wenná Bea cheentu'.  
 Ben chí'intu' gate dxuláwizrantu' Lue'.

## 21

1 Benne' dxenná bea dxebéle'ene' nen xel-la' waca chiu', Xran,  
 na' ca naca xel-la' weselá chiu' dxebéle'ene'.  
 2 Bnézruju' le' da guzá lazre',  
 ne quebe bzagu' da gunabé' Lue'.  
 3 Guzí' lu na'u le', ne benú' dxaca chawe' chee'.  
 Nuzriu' xíchaje' tu da naca na oro.  
 4 Gunabé' Lue' gunnu' le' xel-la' nabán,  
 na' bnézruju' na le' chee' súaqueze' zane' iza.  
 5 Zrente' naca xabáa chee' lawe' da bseláu' le'.  
 Bennu' le' xel-la' ba lá'ana, ne xel-la' szren.  
 6 Lawe' da nunu' gaca chawe' chee' chadía chacanna  
 dxunu' dxebéle'ene' lau Lue'.  
 7 Lawe' da dxuxrén lazre' wenná bea na' Xránadxu,  
 xexache lazre' Dios szrente' le',  
 na' quebe sue' lu da stebe.  
 8 Xulétaju' xúgute' benne' dxeledábague' lue'.  
 Xel-la' waca chiu' xulétaju' benne' ca' dxelecuídené' lue'.  
 9 Lu zra na' zra'u le' gaca chee' benne' ca'  
 ca guzú' le' lu xí' ga dxulúzrie' bla'dau'.  
 Xránadxu guzúzruje' benne' ca' lu xel-la' dxezrá'a chee',  
 na' xi' na' guzezxe na le'.  
 10 Xúgute' da belune' lu xezr la xu níga guzria xi'u,  
 ne xegú' zri'ine zre sue' ládujla bénneache,  
 11 lawe' da gulaca lazre' xelune' da caléla chiu' Lue'.  
 Gulilaj lazre' ca da xelune', san quebe bi xelezéquene',  
 12 lawe' da gulagu' benne' ca'.  
 Nucuezu' xaga nalá xéche'ze chiu' chee' le'.  
 13 Begá'ana szrénqueze Lue', Xran, lu xel-la' wal-la chiu'.  
 Tu gúl-lazquezdxu, ne tu güe lá'anazquezdxu Lue'  
 ca naca xel-la' waca chiu'.

## 22

1 Dios chia', Dios chia', ¿bizr chee' na' nusán lazru' neda'?  
 ¿Bizr chee' na' quebe dxennu' da dxenaba' Lue'  
 chee' guseláu' neda'?  
 2 Dios chia', dxuláwizra' Lue' te zra, ne quebe dxexechebu' chia'.  
 Dxuláwizra' Lue' chizrela, ne quebe dxezí'i lazra'.

<sup>3</sup> Lá'azxa nacu' Lue'.

Nacu' Benne' dxebeze' naga dxelúe lá'ana benne' Israel Lue'.

<sup>4</sup> Xra xrtáuntu' gulebeza lazre' Lue'.

Gulebeza lazre', na' bseláu' le'.

<sup>5</sup> Bululáwizre' Lue', na' belelé'.

Buluxrén lazre' Lue', na' quebe belexedué'eng'.

<sup>6</sup> Neda' naca' ca tu bela' gúna'dau', ne quegá bènneache.

Dxelecuide bènneache neda', ne dxuluzúe' neda' chalá'ala.

<sup>7</sup> Xúgute' benne' dxelelé'e neda' dxelún le' chia'.

Lu da dxelún le' chia' dxelexrá dxu'e,

ne dxulutá xichaje', dxelenné':

<sup>8</sup> "Bzua cuine' lu na' Xránadxu chee guselé' le'.

Guselé' le' che dxezaca ba lázrele' le'."

<sup>9</sup> Lue' nacu' Bénnea' bexru' neda' gate gúlaja'.

Benú' bxren lazra' Lue' gate na' ne dxázretea'.

<sup>10</sup> Guxu'a lu na'u gate quebe ne gálajtea'.

Gate ne xu'a lu le'e xrna'a, báchequeze nacu' Dios chia'.

<sup>11</sup> Quebe xebigu' naga zua' lawe' da zua gágute  
da gusaca zi na neda',

ne quebe nu chilá' benne' gácalene' neda'.

<sup>12</sup> Zaj naxechaj benne' dxeledábague' neda' ca bezre ca'.

Zaj naxechaj benne' neda' zaj naque' ca bezre wal-la ca'  
chee Basán.

<sup>13</sup> Gulaca lazre' xuluzría xi'e neda'

ca tu bezre xixre' dxedunba', ne dxebezre xa'aba'.

<sup>14</sup> Bebizre lazra' ca nisa da nalalaj na lu xu,

na' ca naca zrita xu'a bulusán ljwezre na.

Lázdawa' guca na ca xina' da bxuna na lu le'a ca nisa.

<sup>15</sup> Bexaca xel-la' wal-la chia' ca tu xé'ena xu la'a,  
na' luzra' bedá' na chichja'.

Nuzú' neda' lu xu xrte chee xel-la' gute.

<sup>16</sup> Zaj naxéchaje' neda' ca becu' ca'.

Zaj naxechaj benne' wen da zrinnaj ca' neda'.

Gulídue' ni'a na'a.

<sup>17</sup> Waca gulaba' ca naca zrita xu'a,

na' benne' ca' dxelenné'e neda', ne dxelenná' xánnie' neda'.

<sup>18</sup> Belexelé'e zra lana' late' weaj,

na' lawe' zra lana' gulebeje' da gaca bea na.

<sup>19</sup> Quebe xebigu' naga zua', Xran.

Nacu' xel-la' wal-la chia'.

Gudázega gácalenu' neda', Xran.

<sup>20</sup> Bselá bènne'du xu'a lu na' benne' gu'e neda' xia.

Bènnea' guzría xi'e neda' gune' ca dxun becu'.

<sup>21</sup> Bselá neda' lu dxu'a bezre xixre'.

Bselá neda' lu luzu bezre wal-la ca'.

<sup>22</sup> Guzenda' bi bícha'dau' ca' lau' Lue'.

Güe lá'anaqueza' Lue' ladaj benne' zaj nazrague' lau'.

<sup>23</sup> Le'e, dxezrébele Xránadxu, le güe lá'ana Le'.

Le gucá'ana szrene', le'e, zri'ine zre sua Jacob.

Le zrebe Le', le'e, zri'ine zre sua Israel.

<sup>24</sup> Quebe bzua Dios chalá'ala, ne quebe gucúidene'

da zi' da xa' da guledé benne' xache' ca',  
ne quebe bcache lawe' lau benne' ca'  
san gate bululáwizre' Le', benne' chi'e.

<sup>25</sup> Güe lá'anaqueza' Lue' laduj benne' zan zaj nazrague' lau'.  
Ca da guchebe lazra' gúnqueza' lau benne' ca' dxelezrebe' Lue'.

<sup>26</sup> Xelagu benne' dxexruj lazre', ne welélaquezne'.  
Benne' ca' dxelebigue' lau Xránadxu xelúe lá'anaqueze' Le'.  
Tu gácazqueze da ba neza chee benne' ca'.

<sup>27</sup> Cheajlesá lazre' benne' duté xezr la xu Xránadxu,  
na' xelexebi'e lau Le'.  
Xúgutę cue' benne' chee xúgutę cue' xezr la xu  
xelúe lá'anaqueze' Le',

<sup>28</sup> lawe' da xu'u lu na' Xránadxu xel-la' dxenná bea,  
na' nna bé'ene' xúgutę benne' xezr la xu ca'.

<sup>29</sup> Xeláguqueze xúgutę benne' zren ca' chee xezr la xu nigá,  
ne xelúe lá'anaqueze' Dios.

Xuluzú zribe lau Le' xúgutę benne' ca' xelate,  
benne' ca' quebe xelezéquene' xelegú'u chawe'  
bénne'du zaj xu'e chee quebe xelatie'.

<sup>30</sup> Zri'ine zre sua benne' ca' xelunbe' zrin chee Xránadxu.  
Xuluzenne' zri'ine' ca' ca naca chee Xránadxu  
cadxa cheajsetę chee bénneache.

<sup>31</sup> Xelezrine', ne xuluzenne' bénneache ca naca  
da xrlátaje da dxun Dios.

Xuluzenne' benne' quebe ne xelálaje' ben Dios da caní.

## 23

<sup>1</sup> Xránadxu Dios dxuxúe' neda' ca tu benne' dxuxúe' zrila' chee'.  
Quebe bi dxexázrjeda'.

<sup>2</sup> Ca dxeleZRúa zrila'du ca' ba guláguba' xixre' xá'adau',  
caní dxune' chia' chee xezí' lazra'.  
Gune' chia' ca dxaca chee zrila' ca'  
dxeché'e-ba' dxu'a xegu nisa da de zrize.

<sup>3</sup> Dxuxuzúa chúchue' neda' lu xichaj lázrdawa'.  
Dxusi'e neda' lu da xrlátaje chee gaca li da guchebe lazre'.

<sup>4</sup> Láqueze tea' naga sua' lu da stebe chee xel-la' gute,  
quebe bi da calęla guchebe na neda',  
lawe' da zúalęnu' Lue' neda', Xran,  
na' dxelácale zrise', ne blazru chiu' neda'.

<sup>5</sup> Dxucuezu' da xi'aj gawa' lálala benne'  
dxeledábage' neda' zaj naxechaj neda'.

Dxugú'u da za xichja' da dxapa na neda' ba lá'ana,  
ne dxusezráteu' zriga' chia'.

<sup>6</sup> Da xrlátaje, ne xel-la' dxexache lazre' chiu'  
da lítegage xelezúale na neda' xúgutę zra naca bana',  
na' lizru', Dios, gaca na lizra' chadía chacanna.

## 24

<sup>1</sup> Chee Dios naca xezr la xu nigá ne xúgutę da zaj de lawe na.  
Naca chee' xezr la xu, ne xúgutę bénneache zaj zre'e ga na'.

<sup>2</sup> Bzue' na lawe' nísadau',  
ne bzale' lane na sítujla zran nísadau'.

<sup>3</sup> ¿Nu seque' cuen xi'a chee Xránadxu?  
¿Nu seque' chu'u xudau' lá'azxa chee'?

<sup>4</sup> Waca benne' ca' zaj naque' du lazre' ca naca da dxelune',  
ne ca naca da dxulaba lazre'.

Benne' ca' quebe ne xelechisa ne'e lau bedáu' xiaj xaga ca',  
ne quebe bi ne xechebe lazre' da naca wen lazre'.

<sup>5</sup> Xránadxu guné' da chawe' chee benne' caní.

Dios guchi'e chee benne' caní, ne guselé' le'.

<sup>6</sup> Caní zaj naca bénneache dxelebigue' lau le',  
benne' ca' dxelexu'e naga zua Dios chee Jacob.

<sup>7</sup> Le salaj dxa xu'u chee xudau'.

Le salaj dxa xu'u chawe' ca',  
na' chu'u Wenná Bea szrenté.

<sup>8</sup> ¿Nuzra na' Wenná Bea szrenté nigá?

Naque' Xránadxu, Benne' wal-la,  
Bénnea' nape' duté xel-la' waca.

Naque' Xránadxu, Bénnea' dxedxúaje' chawe' lu wedil-la.

<sup>9</sup> Le salaj dxa xu'u chee xudau'.

Le salaj dxa xu'u chawe' ca',  
na' chu'u Wenná Bea szrenté.

<sup>10</sup> ¿Nuzra na' Wenná Bea szrenté nigá?

Naque' Xránadxu, Benne' dxenná bé'ene' xúgute' da zaj zua.  
Le' naque' Wenná Bea szrenté na'.

## 25

<sup>1</sup> Xran, dxennía' Lue' duté lázrdawa'.

<sup>2</sup> Dxuxrén lazra' Lue', Dios chia'.  
Quebe gu'u lataj xedué'eda'.

Quebe gu'u lataj benne' dxeledábage' neda' xuluzétaje' neda'.

<sup>3</sup> Da líqueze, benne' ca' dxelebeza lazre' Lue'  
quebe xeque zréajene'.

Xeledué'e benne' ca' dxeledábage' xrtizru'.

<sup>4</sup> Xran, ble'e neda' da dxaca lazru' guna'.  
Ble'e neda' da dzezaca ba lazru' guna'.

<sup>5</sup> Bsede neda' guna' ca naca da li chiu'  
lawe' da nacu' Dios dxuseláu' neda'.

Tu dxebeza lázrezqueza' Lue'.

<sup>6</sup> Bsa lazre', Xran, gacu' zri'i lazre',  
ne xexache lazru' chia' cáteze da dxúntequezu'.

<sup>7</sup> Quebe chajsá lazru' dul-la da bena' gate ne naca'  
benne' cuide', ne ca gudábaga' xrtizru'.

Nen duté xel-la' dxexache lazre' chiu', bsa lazre' neda',  
ne nen duté xel-la' zri'i lazre' chiu', Xran.

<sup>8</sup> Xrlátaje, ne li lazre' naca Xránadxu Dios.

Chee le' na' gusédené' benne' dul-la ca' da dxal-la' xelune'.

<sup>9</sup> Gulé'eng' benne' dxexruj lazre' ca' da xrlátaje da xelune',  
ne gusédené' benne' zren lazre' ca' da xelune'.

10 Lu xel-la' dxexache lazre',  
ne lu da li dxeché Xránadxu benne' ca' dxelunę'  
ca naca xel-la' wezría cheę', ne ca da dxusede Le'.

11 Lawe' da dxunu' ca da ba gunnú', Xran,  
gunite lau' ca naca dul-la nuna', da naca na zren.

12 ¿Nu benne' dxezrebe' Xránadxu Dios?  
Le' gusedene' benne' nigá da dxal-la' gunę'.

13 Gaca cheę' tu da ba neza zrente,  
na' zri'ine zre suę' gaca cheębe' xęzr la xu.

14 Xránadxu Dios naque' tuze nen benne' ca' dxelezrebe' Le',  
na' gunę' xelúnbe'ę xel-la' wezría cheę'.

15 Tu dxennázqueza' Xránadxu Dios  
lawe' da guselę' neda' lu na' benne' ca' dxelaca lazre' xelel-le' neda'.

16 Gunná' neda', ne bexache lazre' neda'  
lawe' da zua' tuza', ne dxezaca zi'a.

17 Naxánle'ę da stebe da zaj zua lázrdawa'.  
Bselá neda' lu da stebe zua'.

18 Gunná' ca dxezaca zi'a, ne ca dxunle'a zrin,  
na' bnite lau xúgutę dul-la da nabaga'.

19 Gunná' benne' ca' dxeledábague' neda' ca naxánle'ęne',  
ne ca dxelecuídele'ęne' neda'.

20 Bxue bėnne' du xu'a, ne bselá neda'.  
Quebe gu'u lataj xedué'eda' lawe' da dxuxrén lazra' Lue'.

21 Zaj nuxru da xrlátaje, ne xel-la' li lazre' neda'  
lawe' da dxebeza lazra' Lue'.

22 Dios, bselá benne' Israel ca'  
lu xúgutę da dxelezaca zi'e.

## 26

1 Bchi'a chia', Xran, lawe' da nuna' da xrlátaje.  
Bxren lazra' Lue', Xrana' Dios, ne quebe ben chupa lazra'.

2 Gunná' xanne' lázrdawa', Xran, ne bxue ca da nuna'.  
Gunná' xanne' da xu'u lu xichaj lázrdawa'

3 lawe' da dxeque be'eda' dxexache lazru' neda',  
ne dxuna' ca naca da li chiu'.

4 Quebe ne guna' tu zren benne' ca' dxelunę' da xrlátaje cúzreze,  
ne quebe ne guna' tuze benne' ca' dxululę'e cuine' xrlátaje.

5 Dxequídeda' da dxelún benne' ca' dxelunę' da calela  
naga dxelezrague',

ne quebe ne chu'a tu zren benne' ca' dxuluzúę' Dios chalá'ala.

6 Dxelé'enu' quebe bi zria nabaga',  
na' waca biga' lu cugu chiu', Xran,

7 cheę cuezre xa'a, xapa' Lue': "Xcalenu'",

ne cheę guzenda' bėnneache ca naca da zren ca' da nunu'.

8 Xran, nazrí'ida' lizru' naga zu',  
ne lataj lá'azxa naga zua da xabáa chiu'.

9 Quebe guzría xi'u neda' tu zren nen benne' dul-la ca',  
ne quebe gutiu' neda' tu zren nen benne' ca' dxelútię' benneáche,

10 benne' ca' dxelunę' da caleła,  
ne tu dxulunęzrujzqueze' dumí cheę xełelę' lu da zaj nune'.

11 Neda' tu gúnzqueza' da naca li lazre'.

Bselá neda', ne bexache lazre' neda'.

12 Tu núnzqueza' da xrlátaje, na' güe lá'anaqueza'

Xránadxu Dios

lau benne' ca' zaj nazrague' cheę'.

## 27

1 Xránadxu Dios naque' xel-la' naxaní' chia',  
ne Benne' dxuselę' neda'.

¿Nu benne' gaca guchębe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúę' neda' lu da stębele'ę'?

2 Gate gulęchaj benne' ca' dxelunę' da caleła chia',

nen benne' ca' dxulusaca zi'ę neda',

ne benne' ca' dxeledábague' neda' cheę xuluzría xi'ę neda',

na' gulechęę', ne xeajlecházie'.

3 Láqueze xelęchaj tu cue' benne' dxjaque' wedil-la neda',

benne' ca' dxeledábague' neda', quebe zrébequeza'.

Láqueze xuluzúę' neda' lu wedil-la, neda' guxrén lázrequeza' Dios.

4 Tu da gunábeda' Xránadxu Dios.

Da nigáze sa lazra', da naca na cheę sua' lizre Xránadxu

xúgute zra gaca bana',

cheę gulaba lazra' ca naca da xrtantę cheę Xránadxu,

ne cheę guchálajłęna' Le' lu xudau' lá'azxa cheę'.

5 Le' gucache chawę' neda' lu lataj lá'azxa cheę'

lu zra dxaca da caleła.

Gucache chawę' neda' lu lataj cheęqueze' naga zúaqueze'.

Guzúę' neda' tu naga sę cháweda'.

6 Nadxa gune' guzętąja' benne' dxeledábague' neda',

ne zaj naxęchąę' neda',

na' nen dutę xel-la' dxebe' gutia' béadu ca' guzúa'-ba'

lu cugu cheę'.

Gúl-laqueza', ne tu güe lá'anazqueza' Xránadxu.

7 Xran, ben chi'a gate ne dxuláwizra' Lue'.

Bexache lazre' neda', ne bechębe chia'.

8 Lu xichaj lázrdawa' benda' chi'u, gunnú': "Bexilaj chia'."

Xexilaja' chiu', Xran.

9 Quebe gucache lau' chia' neda'.

Lu xel-la' dxezrá'a chiu' quebe xebigu' naga zua' neda',

węn zrin chiu'.

Nacu' Benne' dxácalęę' neda'.

Quebe gusanu' neda', ne quebe cueaj xichju' neda',

Dios, weselá chia'.

10 Lácala xulusán xra xrna'a neda',

tu xecá'azqueze Xránadxu Dios neda'.

11 Bśede neda' da dxaca lazru' guna', Xran,

ne bļe'e neda' da li lazre' da dxal-la' guna',

lawe' da zaj naxán benne' dxeledábague' neda'.

12 Quebe gu'u lataj benne' dxeledábague' neda'

xelunĕ' chia' da dxelaca lazrĕ'  
 lawe' da zaj naxechaj benne' wen lazre' neda'  
 nen benne' dxelaca lazrĕ' xulusaca zi'e neda'.  
 13 Xránadxu Dios guchebe lazre' le'eda' da xrlátaje cheĕ'  
 naga gaca bana'.

La quebe guxéajle'a da nigá, na' gute ni'a na'a.

14 Le cueza xelá' Xránadxu.

Le gutipa lázrele, na' Le' guzĕ' chúchue' le'e.

Awe', le cueza xelá' Xránadxu.

## 28

1 Xran, dxuláwizra' Lue'.

Nacu' Benne' dxucú'uju' neda'.

Bzĕ naga chi'a lawe' da che quebe xennu' neda'  
 gaca' ca tu benne' dxu'e lataj ba xa'.

2 Ben chi'a dxuláwizra' Lue',  
 ne dxechisa na'a lau' naga zu' lataj lá'azxa chiu'.

3 Quebe guzría xi'u neda' tu zren nen benne' wen da caleļa ca',  
 ne cá'anqueze nen benne' ca' dxelunĕ' da zrinnaĵ,  
 benne' ca' dxelennĕ' dizra' cháwedau' lau le sa' ljwezre',  
 san xu'u lázrdawe' da caleļa gunĕ' cheĕ'.

4 Bde benne' ca' lu da ba xa' cáteze naca cheĕ da belunĕ',  
 cáteze naca da caleļa da zaj nune'.

Bunezruĵ cheĕ benne' ca' cáteze da belunĕ', da na' dxal-la' xelezí'e.

5 Lawe' da quebe gulapĕ' ba lá'ana da ben Xránadxu,  
 ne quegá da bene' lu ni'a ná'queze',  
 guxrinnaje' benne' ca', ne gudĕe' le' lu da ba xa'.

6 ĵGaca ba Xránadxu Dios, Bénnea' benne' chi'a  
 gate bláwizra' Le'!

7 Xránadxu naque' Bénnea' dxuzĕ' chúchue' neda',  
 ne dxucu'uje' neda'.

Bxren lazra' Le', na' gúcalĕne' neda',  
 na' cheĕ le na' gubéle'ĕda', na' gul-laqueza',  
 ne güe lá'anaqueza' Le'.

8 Xránadxu naque' Bénnea' dxuzĕ' chúchue' benne' cheĕ' ca',  
 ne naque' Benne' dxucu'uje', ne dxuselĕ' bénnea' guquĕ'e.

9 Bselá benne' chiu' ca', ne ben gaca chawe' cheĕ da naca cheĕ'.  
 Bxue benne' ca', ne bexru le' chadía chacanna.

## 29

1 Le güe lá'ana Xránadxu, le'e, zr ale xabáa.

Le güe lá'ana xel-la' szren cheĕ', ne xel-la' waca cheĕ'.

2 ĵDa xabáa naca La Xránadxu!

ĵLe güe lá'ana na!

Le guzú zríbele lau Xránadxu lá'azxa gate xelĕ'e.

3 Chi'i Xránadxu dxen na lawe' nísadau'.

Dxen chi'i Dios xabáa ca guziu' da dxennĕ na.

Dxedá chi'e lawe' nísadau'.

4 Dxen chi'i Xránadxu ca naca xel-la' wal-la cheĕ na.

Dxen chi'i Xránadxu dute xel-la' szren cheĕ na.

5 Chi'i Xránadxu dxichaj na xaga cedro ca'.



Dxichaj na xaga cedro ca' zaj zę na xi'a Líbano.

<sup>6</sup> Dxuxrite na xi'a Líbano ca' ca dxelexrite bęzredu ca',  
na' dxuxrite xi'a Hermón ca tu bęzredau'.

<sup>7</sup> Chi'i Xránadxu dxun na chaze xesa.

<sup>8</sup> Chi'i Xránadxu dxuxrize na le'ę xixre' lawe' lataj.  
Dxuxrize na le'ę xixre' cheę xęzr la xu Cades.

<sup>9</sup> Chi'i Xránadxu dxuxrize na xaga wal-la ca'.

Dxuchibe na xrlęue xaga ca',

na' lu xudau' cheę' dxelenná xúgute bęnneache:

“¡Gaca ba Dios!”

<sup>10</sup> Dxenná be'e Xránadxu nísadau' ca'.

Chadía chacanna dxenná be'ę ca Wenná Bea.

<sup>11</sup> Xránadxu Dios dxuzé chachę' benne' cheę' ca'.

Dxuzúę' le' lu da ba neza cheę xel-la' dxebeza zri lazre'.

### 30

<sup>1</sup> Gucá'ana szrena' Lue', Xran, lawe' da bechisu' neda',  
ne quebe bnęzruju' lataj benne' ca' dxeledábague' neda'  
xelún le' chia'.

<sup>2</sup> Xrana' Dios, bláwizra' Lue', na' bexunu' neda'.

<sup>3</sup> Xran, bseláu' neda' lu lataj ba xa'.

Bexunu' neda' cheę quebe chu'a xędxu ba.

<sup>4</sup> Le gul-la cheę Xránadxu, le'e nácale benne' cheęqueze'.

Le xę Le': “Xcalenu’”, ne dxajsá lázrele naque' lá'azxa,

<sup>5</sup> lawe' da tu chí'idauze dxezré'ę

san chadía chacanna zua xel-la' zri'i lazre' cheę'.

Wabęzredxu tu zreze, san che zílala wabéle'ędxu.

<sup>6</sup> Gate guzúa chawa' gunnía': Quebe nu seque' gutá neda',

<sup>7</sup> lawe' da bzę chuchu' neda', Xran, ca tu xi'a zren,  
ne blé'enu' neda' cháwedau'.

Gate bcache lau', na' guzúa' stębe.

<sup>8</sup> Xran, guláwizra' Lue', ne gata' xueda' Lue'.

<sup>9</sup> ¿Bizra da ba neza gaca na chiu' che gatia',  
ne chu'a xędxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

<sup>10</sup> Bzę naga neda', Xran, ne bexache lazre' neda'.

Xran, gúcale neda'.

<sup>11</sup> Bęnu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebe'.

<sup>12</sup> Cheę le' na' tu gúl-lazqueza' chiu', lawe' da nacu'  
da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

### 31

<sup>1</sup> Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

<sup>2</sup> Bzę naga chí'a, ne bselá neda'.

Bzę chuchu neda', ne bucú'uj neda' cheę la'.

<sup>3</sup> Nacu' Benne' dxuzé chuchu' neda', ne dxucú'uju' neda'.  
lawe' da nacu' li lazre' gulé'enu' neda' neza,  
ne gusi'u neda' neza na'.

<sup>4</sup> Bebéaj neda' lu xralaj da ba zaj nucueze', chee xelēl-lē' neda'.  
Lue' nacu' Benne' dxuxúe' neda'.

<sup>5</sup> Lu na'u dxuzúa' bēnne'du xu'a, Xran.  
Lue' bexá'awenu' neda', Dios li lazre'.

<sup>6</sup> Dxecuídeda' benne' ca' dxelebeza lazre' dios ca'  
quebe bi zaj zaca.

Neda' dxebeza lazra' Xrana' Dios.

<sup>7</sup> Béle'eda', ne sua' lu da ba neza lawe' da dxexache lazru' neda'.  
Caní dxunu' lawe' da dxelé'eqeznu' ca da dxezaca zí'a.

Nézenu' ca dxedéa' lu da ba xa'.

<sup>8</sup> Quebe bdeu' neda' lu na' benne' ca' dxeledábage' neda'.  
Bze chuchu' neda' tu lataj chawe'.

<sup>9</sup> Bexache lazre' neda', Xrana' Dios, lawe' da zua' lu da ba xa'.  
Ba bebizre nisa xuzru xiaj lawa' lawe' da dxewí'ine lazra'  
duté bēnne'du xu'a, ne dutē bela' dxen chia'

<sup>10</sup> lawe' da dxedé xel-la' nabán chia' lu da ba xa',  
ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dxelelá zrita xu'a.

<sup>11</sup> Xúgute' benne' ca' dxeledábage' neda' dxelecuídenē' neda',  
na' benne' walízr chia' dxuluzúe' neda' chelá'ala,  
na' benne' zaj núnbe'e neda' dxelecuase' neda'.

Benne' ca' dxelelé'engē' neda' la neza dxuluzrúnnuje' naga zua'.

<sup>12</sup> Benne' caní ba gulal-la lazre' neda' ca dxelal-la lazre'  
tu benne' gate.

Naca' neda' ca tu xé'ena xu da nalá'a.

<sup>13</sup> Dxenda' dizra' schanni' da dxelenná benne' zantē chia',  
na' gáteteze zua da dxuchebe na neda'.

Dxacate' na' dxelunē' tuze dizra' bi xelunē' chia',  
ne zaj nunē' xelútiē' neda'.

<sup>14</sup> Neda' dxuxrén lazra' Lue', Xran.

Dxennía' nacu' Lue' Dios chia'.

<sup>15</sup> Lu na'u Lue' zaj xu'u zra chia' ca'.

Bselá neda' lu na' benne' ca' dxeledábage' neda',  
ne lu na' benne' ca' zaj nau zi' xuzre' neda'.

<sup>16</sup> Lu xel-la' szren chiu' bxue neda', wen zrin chiu'.

Lu xel-la' dxexache lazre' chiu' bselá neda'.

<sup>17</sup> Quebe gu'u lataj xedué'eda', Xran, lawe' da dxuláwizra' Lue'.

Bēn xelexedué'e benne' ca' dxelebéaj xíchaje' Lue'.

Bēn xelezúa zriē' lu lataj ba xa'.

<sup>18</sup> Bēn quebe gaca xelenné benne' ca' dxelezí xē'e,  
benne' ca' dxelenné' da calēla chee benne' xrlátaje ca',  
da dxelenné' lu xel-la' dxulucá'ana szren cuina,  
ne lu xel-la' dxulucá'ana ditaj benne' caní.

<sup>19</sup> Da zrentē naca xel-la' zri'i lazre' chiu' da napu'  
chee bi gunu' chee benne' ca' dxelape' Lue' ba lá'ana,  
da na' dxunu' lau xúgute' bēnneache  
ne chee benne' ca' dxelebeza lazre' Lue'.

<sup>20</sup> Lu da bagácheze naga zu' Lue' dxucachu' benne' ca'

chee quebe bi xelún bénneache chee'.  
 Dxuzú' benne' ca' tu lu xu'u nagache  
 chee quebe bi gun chee' xel-la' wetil-la dizra' chee bénneache.

21 ¡Gaca ba Xránadxu Dios!

Lu xel-la' dxexache lazre' chee' bene' da zrente  
 chee gúcalene' neda' tu lu xezre naga guca wedil-la.

22 Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chi'a da guta' xueda' Lue' gate na' bláwizra' Lue'.

23 ¡Le zri'i Xránadxu, xúgutele le'e nácale benne' chee Léqueze'!

Xránadxu dxuxúe' benne' ca' quebe dxulusane' Le',

na' dxuxunézrujle' chee benne' ca' dxulucá'ana szrene' Le'.

24 Le gutipa lázrele, xúgutele le'e dxebeza lázrele Xránadxu Dios,  
 na' Le' guzé chúchue' le'e.

## 32

1 ¡Ba neza zrente naca na chee bénnea'  
 Dios ba bnite lawe' dul-la da gubágue',  
 ne ba gudúe' zria da guzúa chee'!

2 ¡Ba neza zrente naca na chee bénnea'  
 Dios quebe dxusebague' le' zria,  
 bénnea' quebe dxezi xé'e!

3 Gate quebe guxrúalepa' dul-la gubaga',  
 bedú lazra' lawe' da gudxezra' bedú zra.

4 Te zra ne chizrela bdeu' neda' xel-la' zi', Xran.

Bedú lazra' ca dxebizre beaj nisa beu' la.

5 Nadxa guxrúalepa' dul-la gubaga',  
 ne quebe bcacha' zria da guzúa chia'.

Bechugu lazra' guxrúalepa' na lau Lue', Xran,  
 na' Lue' bnite lau' chee dul-la gubaga'.

6 Xúgute bénneache chiu' dxal-la' xuluchálajlene' Lue'  
 gate de lataj xelexezrelne' Lue', na' gate zrin da zi' da xa'  
 da xelezaque',

da gaca na ca tu xegu nisa zren da dxedxuaj na,  
 na' quebe bi gune na benne' ca'.

7 Lue' nacu' ca tu lataj naga gaca gucache cuina',  
 na' gucache chawu' neda' chee quebe bi da saca'.

Tu gul-lazqueza' zizraj ca bseláu' neda' lawe' da dxuxú' neda'.

8 Dxenná Xránadxu: "Gulé'eda' lue' neza naga dxal-la' tau'.

Gusédeda' lue', ne guzéajni'ida' lue' ca dxal-la' gunu'.

9 Quebe gacu' ca tu bzrina' u tu bea, be quebe bi dxeléajni'iba',  
 bea ca' dxun na ba xen nna be'enu'-ba', na' cu'u xia dxú'aba',  
 chee gunu' xelunba' ca dxaca lazru'."

10 Benne' wen da calela ca' dxun na ba xen  
 xeledé' lu da zi' da xa'.

Benne' ca' dxuluxrén lazre' Xránadxu,  
 tu dxuxúezqueze' le' nen duté xel-la' zri'i lazre' chee'.

11 Le'e, benne' xrlátaje, le be, ne le sua lu da ba neza,  
 ne chee da ben Xránadxu, gúcalene' le'e.

Nen dutę xel-la' dxebé le gul-la, le'e, nácale li lazre' lau Le'.

### 33

1 Le be le'e, benne' xrlátaje, lau Xránadxu Dios.

Xrtante naca lau Dios da dxelúe lá'ana benne' xrlátaje ca' Le'.

2 Le gucá'ana szren Dios nen da zríadi'i na du da dxínnele.

Le gúl-laqueze chee' nen da dxúl-lalenle,  
ne nen tu da nua na chi du.

3 Le gul-la chee' Le' tu da cube.

Le gul-la cháwedau', quínnele dutę xel-la' dxebé.

4 Li lazre' naca xrtizra' Xránadxu Dios,  
na' nune' dutę lu xel-la' li lazre' chee'.

5 Le' nazrí'ine' da naca xrlátaje, ne da naca du lazre'.

Zaj núnbea bėnneache xel-la' dxexache lazre' chee' Xránadxu  
du gabí'i xęzr la xu.

6 Ne chee' xrtizra' Xránadxu Dios, bene' xabáa,  
na' xúgute' belaj da zaj nalá' zran xabáa bene'  
nen be' dxedxuaj dxu'e.

7 Le' dxuxutube' nísadau', ne dxexune' na ca tu xi'a nisa.  
Dxegá'a chawe' nisa lu da situj ca' naga nucueze' chee' na.

8 Le zrebe Xránadxu Dios, xúgutele' zrale xęzr la xu nigá.

Le zrebe lau Le', xúgutele' le'e zrale lu xęzr la xu

9 lawe' da gunneze', na' guca xęzr la xu.

Gunná be'ene' na, na' zúaqueze na.

10 Xránadxu Dios dxune' dxexaca dácheze dizra' zaj nun  
bėnneache xęzr la xu ca',  
ne dxune' dxelaca níteze da ca' zaj nune' xelune'.

11 Dizra' ba nun Xránadxu Dios tu súazqueze  
na chadía chacanna.

Da dxegú'u be'ę lu lázrdawe' tu wadíazqueze na  
lau xúgute' bėnneache.

12 Ba neza zrente naca na chee' benne' xęzr la xu ca'  
Xránadxu naque' Dios chee' le',

benne' xęzr la xu ca' gucá'a Dios chee' xelaque' benne' chee'.

13 Naga zue' xabáa chee' dxenná' Xránadxu Dios,  
na' dxelé'ene' xúgute' cuen bėnneache.

14 Naga zue' lataj lá'azxa chee' dxenné'ę,  
na' dxelé'ene' ca' zaj zra' bėnneache lu xęzr la xu.

15 Le' bene' xichaj lázxdau' xúgute' benne' ca',  
na' dxenné'ę xúgute' da dxelune'.

16 Quebe la benne' wenná bea ne chee' benne'  
dxjaque' wedil-la zante' chee',  
ne quebe la benne' wal-la ne chee' xel-la' wal-la da nape'.

17 Quebe nu benne' le' ne chee' bzrina',  
ne quebe nu la ne chee' xel-la' wal-la zren chee'.

18 Le na' xque, dxuxúe Xránadxu Dios benne' ca' dxelezrebe' Le'.  
Dxuxúe' benne' ca' dxelebeza lazre' Le' xexache lazre' le'

19 chee' guselé' le' lu xel-la' gute,  
ne chee' gugawe' le' gate dxaca gubina'.

20 Dxebeza lázredxu Xránadxu Dios.

Lē' naque' Bénnea' dxácalēne' dxi'u, ne dxucu'uje' dxi'u.

<sup>21</sup> Chee lē na' du lázredxu béle'ēquezdXu lau Lē',  
lawe' da tu dxuxrén lázrezquezdXu La lá'azxa chee'.

<sup>22</sup> Bexache lazre' netu', Xránantu',  
lawe' da dxebeza lázrentu' Lue'.

## 34

<sup>1</sup> Tu güe lá'anazqueza' XránadXu Dios te zra chizrela.

Tu gúl-lazqueza' da güe lá'ana na Lē'.

<sup>2</sup> Xezaca ba lázrelena' XránadXu Dios.

Xelén benne' dxexruj lazre' da caní, na' welebélē'ēne'.

<sup>3</sup> Le gucá'ana szren XránadXu Dios tu zren nen neda',  
na' tu zren gucá'ana szrendxu La lá'azxa chie'.

<sup>4</sup> Bláwizra' XránadXu Dios, na' Lē' benne' chia',  
ne bselé' neda' lu xúgutē da buluchebe na neda'.

<sup>5</sup> Benne' ca' gulebeza lazre' Lē' beledé'ēne' da xabáa chee',  
ne quebe belexedué'ēne'.

<sup>6</sup> Neda', benne' xache', bláwizra',  
na' ben XránadXu Dios chia',  
ne bselé' neda' lu xúgutē da dxezaca zi'a.

<sup>7</sup> Gubáz chee' XránadXu zue' cuita benne' ca' dxelezrebe' Lē',  
na' dxucu'uje' benne' ca'.

<sup>8</sup> Le guxúe xque, na' lé'ele naca xrlátaje XránadXu Dios.  
Ba neza zrente naca na chee' bénnea' dxuxrén lazre' Lē'.

<sup>9</sup> Le zrebe XránadXu Dios, le'e, nácale benne' chee' Lē'queze',  
lawe' da quee bi dxelexazrje benne' ca' dxelezrebe' Lē'.

<sup>10</sup> Bezre xixre' du ca' dxelexázrjeba', ne dxeledunba'.

Benne' ca' dxelebeza lazre' XránadXu Dios  
quebe bi da chawe' xelexázrjene'.

<sup>11</sup> Le da, bidau', ne le xen chia'.

Gusédeda' le'e chee' zrēbele XránadXu Dios.

<sup>12</sup> Nu benne' ládujla le'e dxaca lazre' xegá'ane'  
lu xel-la' nabán,

bénnea' dxaca lazre' sue' zane' iza chee' lé'ēne' da chawe'?

<sup>13</sup> Bxue xanne' ca' dxuchálaju' chee' quebe nneu' da calela,  
ne chee' quebe guchálaju' da wen lazre'.

<sup>14</sup> Bsan da calela da dxunu', na' ben da xrlátaje.

Ben ba xuzre gapu' xel-la' dxebeza zri lazre',  
ne ben ca naca chee' na.

<sup>15</sup> Dxuxúe XránadXu Dios benne' ca' zaj naque' xrlátaje,  
ne dxuzé nague' da dxululáwizre' Lē'.

<sup>16</sup> Dxezrá'a XránadXu Dios benne' ca' dxelunē' da calela,  
chee' quebe sua nu benne' chajsá lazre'  
benne' wen da calela ca'.

<sup>17</sup> Benne' xrlátaje ca' dxululáwizre' XránadXu Dios,  
na' Lē' dxenne' chee',  
ne dxuselé' benne' ca' lu xúgutē da dxelezaca zi'ē.

<sup>18</sup> Gágutē zua XránadXu Dios naga zaj zra' benne' ca'  
dxelexewi'ine lazre',  
ne dxuselé' benne' ca' dxelexewi'ine lazre'.

<sup>19</sup> Da zantē da dxezaca zi' benne' xrlátaje.

Dxuselá Xránadxu Dios bënnea' lu xúgute da ca'.

<sup>20</sup> Le' dxuxúequeze' xúgute zrita xu'e,  
na' netú zrita chee' quebe gachaj na.

<sup>21</sup> Dul-la da dxun benne' wen da calela gute na le',  
na' xelebía xi' benne' ca' dxelecuídenē' benne' xrlátaje.

<sup>22</sup> Xránadxu Dios dxexá'awe' bënne'du xu'u  
benne' wen zrin chee' ca',  
na' xúgute benne' ca' dxuluxrén lazre' Le'  
québequeze xelebía xi'e.

## 35

<sup>1</sup> Xran, bsizre benne' ca' dxeleenné' chia'.  
Gudíl-lalē benne' ca' dxeledíl-lalēnē' neda'.

<sup>2</sup> Gudá gucu'uju' neda' lu wedil-la,  
ne gúcale neda'.

<sup>3</sup> Gudēl-la xia chee' wedil-la chee' guzagu' benne' ca'  
dxululague' neda'.

Guzre neda' nacu' Benne' dxuselé' neda'.

<sup>4</sup> Bēn xelexedué'e, ne xeleque zrēaje benne' ca'  
dxelaca lazre' xelútiē' neda'.

Bēn xuluzrunnuj, ne xelexedué'e benne' ca' dxelaca lazre'  
xelunē' chia' da calela.

<sup>5</sup> Bēn xelaque' ca tu xizre bebe da dxua be',  
ne gusel-la gubáz chee' xabáa chiu' chee' gulague' benne' ca'.

<sup>6</sup> Bēn chul-la neza naga xeledé'e, na' gaca na naga xelebilē',  
ne gusel-la gubáz chee' xabáa chiu' chee' gulague' benne' ca'.

<sup>7</sup> Bulucache' tu xralaj chee' queła na neda',  
ne quegá bi nuna' chee'.

Gulēnē' tu xēdxu naga cheajcházia' neda',  
ne quegá bi dē da dxagu na zria chia'.

<sup>8</sup> Gusel-la da guzría xi na benne' ca', ne quebe xeleque be'ene'.  
Bēn queła xralaj chee' na' léqueze',

ne cheajlecházie' naga xelebía xi'e.

<sup>9</sup> Nadxa béle'equezda' ca naca da nun Xránadxu Dios.  
Sua' lu da ba neza lawe' da bselé' neda'.

<sup>10</sup> Xúgute zrita xu'a xelenná na: Xran, ¿núzraqueze naca  
ca nacu' Lue'?

Dxuseláu' benne' xache' lu na' benne' wál-ladxu ca le',  
ne benne' dxexazrje lu na' benne' dxebane' da du dē chee'.

<sup>11</sup> Belasa benne' dxelexechebe' da wen lazre'.  
Gulawē' zria neda' chee' tu da quebe dxaca be'eda'.

<sup>12</sup> Belexebi'e neda' da calela chee' tu da xrlátaje da bēna',  
chee' xuluzúē' neda' lu da ba xa'.

<sup>13</sup> Neda', gate quebe chawe' gulezúē', bewi'ine lazra'.  
Bēna' gubasa da bsaca zi na neda',

nē du lazra' bláwizra' Dios chee' xexunē' benne' ca'.

<sup>14</sup> Bewi'ine lazra' chee' benne' ca' ca dxuna' chee'  
le sa' ljwezra', u chee' bi bíchequeza'.

Guzúa' lu da baxache' ca dxun benne' chee' xrñe'e gate dxatie'.

<sup>15</sup> Gulebé benne' ca' gate zua' lu da ba xa', ne belezrague'.

Belezraga benne' dxeledábague' neda',

benne' wen da caleła, na' chadiṭe gulel-le' neda'.

Tu belúezqueze' neda', ne quebe gulezúa zrie'.

<sup>16</sup> Bulusaca zi'e neda', ne belún le' chia',  
ne gulagu lazxe' lu xel-la' dxelezzá'a chee' neda'.

<sup>17</sup> Xran, zájate scha' gu'u latja da dxelune'?

Bselá neda' lu na' benne' caní dxuluzría xi'e neda',  
benne' zaj naque' ca bezre xixre' ca'.

<sup>18</sup> Xapa' Lue': Xcalenu', lávela benne' zan ca' zaj  
nadupe' chiu' Lue'.

Tu güe lá'anazqueza' Lue' ládujla benne' zan ca'.

<sup>19</sup> Quebe gu'u lataj xelebé benne' ca' dxeledábage' neda',  
ne quebe bi nuna' chee'.

Quebe gu'u lataj xelún la benne' ca' chia',  
benne' dxelecuídené' neda',

ne quebe bi de da dxagu na zria chia'.

<sup>20</sup> Benne' caní quebe dxelaca lazre' xelezúe' lu  
xel-la' dxebeza zri lazre',

na' lu xel-la' dxelezi xe chee' dxelenné' chee' benne' ca'  
dxelebeza zri lazre' lu xezr la xu nigá.

<sup>21</sup> Belún le' chia'.

Gulenné': "¡E! ¡E! ¡Ba blé'entu' da nune'!"

<sup>22</sup> ¡Xran, ba blé'equenzu' da dxelune'!

¡Quebe sua zriu'!

¡Xran, quebe gusanu' neda'!

<sup>23</sup> ¡Guxasa, guzúa guchi'u chia'!

¡Gudá, Xrana' Dios, chee' gácalenu' neda'!

<sup>24</sup> ¡Bchi'a chia' lu da xrlátaje chiu', Xrana' Dios!

¡Quebe gu'u benne' ca' lataj xuluzrizre' chia'!

<sup>25</sup> ¡Quebe gu'u lataj xelenné': "Ba guca da dxezá lázredxu!"

¡Quebe xelenné': "Ba bendxu chie'!"

<sup>26</sup> Ben xelxedué'e, ne xeleque zréaje xúguté benne' ca'  
dxelebene' gate bi dxaca chia'.

Bsi'e xel-la' stu', ne ben xelaca xala benne' ca'  
dxeledábage' neda'.

<sup>27</sup> Ben xelúl-la, ne xelebé benne' ca' zaj de'e neda',  
chee' xelennáqueze': "Tu xegá'ana szrénzqueze Xránadxu,

Bénnea' dxezá lazre' sua lu xel-la' dxebeza zri lazre'  
benne' wen zrin chee'!"

<sup>28</sup> Tu guchálajzqueza' chee' da xrlátaje chiu',

ne chee' da dxue lá'anaqueze na Lue' te zra chizrela.

## 36

<sup>1</sup> Da zrinnaj da dxun benne' dxuzúa chalá'ala Dios  
dxuchálajle na le' lu xichaj lázrdawe'.

Quebe dxezá lázrequeze' gape' Dios ba lá'ana.

<sup>2</sup> Chee' le' na' dxulé'e cuine' ca' tu benne' zrente'.

Dxéquene' quebe dxele'é Dios da zrinnaj da dxune',  
ne quebe dxecuide Dios le'.

<sup>3</sup> Da tu dxuchálajzqueze' naca na da zrinnaj, ne da wen lazre'.

Québedxa dxéajni'ine', ne québedxa dxune' da xrlátaje.

<sup>4</sup> Dxulaba lazre' ca naca da caleļa gunę' gate de' naga dxate'.  
Xu'e neza da quebe naca neza chawe'.

Quebe dxecuidęę' da caleļa.

<sup>5</sup> Xrana' Dios, zrente naca xel-la' dxexache lazre' chiu'  
da dxezrintę na xabaa,  
na' dxezrintę lu beuj xel-la' li lazre' chiu'.

<sup>6</sup> Da xrlátaje chiu' naca na ca tu xi'a zren chiu',  
na' ca dxuchi'u naca na ca tu nísadau' sítuje.  
Xrana' Dios, tu dxuxúezquezu' bėnneache, ne bę xixre' ca'.

<sup>7</sup> Xrdante naca xel-la' dxexache lazre' chiu', Dios.  
Cheę le na' dxuluxrėn lazre' bėnneache Lue' ca dxelún  
bedxuj dxė'enedu ca' dxelexezraba' zran xrila bedxuj.

<sup>8</sup> Welėlajquezne' cheę da dęlę'e lizru',  
na' Lue' gunėzruju' xelė'aje' da naca ca tu xęgu da  
naca na da dxezaca ba lazru' Lue'.

<sup>9</sup> Naga zu' Lue' zua beaj naga dxalaj nisa da dxunna na  
xel-la' nabán.

Lu xel-la' naxanı' chiu' walė'entu' da naca lenı'.

<sup>10</sup> Bexache lazre' benne' ca' zaj núnbe'e Lue',  
ne bzua cheę benne' li lazre' ca' da xrlátaje chiu'.

<sup>11</sup> Quebe gu'u lataj tábaga benne' dxucá'ana szren cuina neda',  
ne quebe gutá benne' dxun da caleļa neda'.

<sup>12</sup> Xeaļlechaze benne' ca' dxelunę' da zrinnaj.  
Lue' bėnu' xeaļlechaze benne' ca', na' quebe gaca xelexase'.

## 37

<sup>1</sup> Quebe su' stębe ne cheę da dxelún benne' ca'  
dxelunę' da caleļa,

ne quebe sę lazru' da zaj nápalę'e benne' dxelunę' da zrinnaj,

<sup>2</sup> lawe' da xeledė cheę benne' ca' ca dxaca cheę xixre'du ca',  
na' gaca cheę benne' ca' ca dxaca cheę xixre' da nadxugu,  
dxebizre na.

<sup>3</sup> Bxren lazre' Xránadxu Dios, ne bęn da xrlátaje,  
na' súaquezu' lu xęzr la xu, ne sí'quezu' ba neza da li.

<sup>4</sup> Bezaca ba lazre' nen Xránadxu,  
na' Lę' gúnnaquezę' chiu' da dxezá lazru'.

<sup>5</sup> Bzua cuinu' lu na' Xránadxu,  
ne bxren lazre' Lę', na' Lę' gunę' ca da dxenabu'.

<sup>6</sup> Gulė'eng' da xrlátaje chiu' ca tu xel-la' naxanı',  
ne da li lazre' chiu' ca lawe' zra.

<sup>7</sup> Guzúa zrize lau Xránadxu, ne guleza lazre Lę'.  
Quebe su' stębe ne cheę benne' dxezi'e ba neza,  
bėnnea' dxúnquezę' da caleļa.

<sup>8</sup> Bsan xel-la' xichaj zra'a, ne quebe cuıdenu'.  
Quebe sa lazru' bi xusacu' benne' ca' dxelunę' da caleļa,

<sup>9</sup> lawe' da guzría xi' Dios benne' ca' dxelunę' da caleļa.  
Benne' ca' dxelebeza lazre' Xránadxu, gaca cheę' xęzr la xu.

<sup>10</sup> Chadite te cheę benne' ca' dxelunę' da caleļa.  
Le'enu' lizre lataj benne' ca', san quėbedxa zaj zrę'e na'.

<sup>11</sup> Benne' dxexruj lazre' ca' gaca cheę' xęzr la xu,  
na' xelexezaca ba lazre' lu xel-la' dxebeza zri lazre' zrente.



- 12 Benne' dxelún da calela dxelilaj lazre' bi xelune'  
chee benne' xrlátaje,  
ne lu xel-la' dxelezzá'a chee' xelagu lazxa benne' ca'.  
13 Xránadxu Dios guzrízrequeze' chee benne' ca' dxelune'  
da calela  
lawe' da nézene' ba za zra cheajsé chee benne' ca'.  
14 Benne' dxelune' da zrinnaj dxelebéaje' xia chee',  
ne dxuluzé' xaga nalá xéche'ze chee',  
chee xuluzría xi'e benne' xache' ca', ne benne' dxelexazrje',  
chee xelútie' benne' ca' dxelune' da li lazre'.  
15 Xia nalá chee benne' ca' chaze na lu lazrdáuqueze',  
na' gáchajqueze xaga nalá xéche'ze chee'.  
16 Cháwedxa naca da du da de chee benne' xrlátaje  
ca da gunní'a da zaj napa zánete benne' dul-la ca',  
17 lawe' da welátequeze ni'a na' benne' dxelúne' da zrinnaj.  
Xránadxu ná'queze dxuxúe' benne' xrlátaje ca'.  
18 Nunbea Xránadxu ca zaj naca zra xelezúa benne'  
du lazre' ca',  
na' da zaj napa benne' ca' xelezúa na chadía chacanna.  
19 Quebe xelexedué'eng' gate quebe dxaca chawe' chee  
bénneache,  
na' lu zra chee gubina' gata' da xelawe'.  
20 Xelebía xi' benne' dxelúne' da zrinnaj,  
na' benne' ca' dxeledábaga' Xránadxu,  
ca dxaca chee xiaj xixre' ca'.  
Xeledé chee', ne xelexenitie' ca zren chee xi'.  
21 Benne' ca' dxelún da calela tu da dxelenabe' tu chí'idauze,  
ne quebe dxuluxunézruje' na,  
na' benne' xrlátaje dxexache lazre' le', ne dxunézruje' chee'.  
22 Benne' ca' dxelé'e Xránadxu le' chawe', gaca chee  
benne' ca' xezr la xu,  
na' benne' ca' quebe dxelé'eng' chawe', xelebía xi' queze'.  
23 Da dxelún benne' xrlátaje ca' zaj naca na da ble'e  
Xránadxu le', na' dxelé'eng' cháwedau' ca da dxelune'.  
24 Gate dxelejchaze benne' xrlátaje ca' quebe cheajlechaze'  
tu chí'ize lawe' da nuxru Xránadxu na' benne' ca'.  
25 Benne' cuide' guca', ne na'a ba gúxrúa',  
ne cabata' ble'eda' tu benne' xrlátaje gusán Dios le',  
na' quebe xeledá zri'ine zre sué' xelebéaje' guna'.  
26 Benne' xrlátaje nigá tu dxexache lázrezqueze',  
ne dxunézruje' bi dxexazrje nu benne',  
na' zri'ine zre sué' zaj naque' da ba neza chee bénneache.  
27 Québedxa gunu' da calela, san ben da xrlátaje,  
na' gaca bánquezu' chadía chacanna,  
28 lawe' da nazrí'i Xránadxu da naca li lazre',  
ne quebe dxusane' benne' zaj de'e Le'.  
Chadía chacanna tu guxúezqueze' benne' ca',  
san guzría xi'e xrtia ljwezre benne' ca' dxelune' da calela.  
29 Benne' xrlátaje ca' gaca chee' xezr la xu nigá,  
na' xelezzá'queze' chadía chacanna lu xezr la xu.

- 30 Benne' xrlátaje dxuchálajqueze' da naca sina,  
na' ca dxuchi'e naca na xrlátaje.
- 31 Da nadxixruj bea Dios tu xú'uzqueze na xichaj lázrdawe'.  
Chee le na' quebe cheajchaze bénnea'.
- 32 Benne' wen da zrinnaj dxenné'e benne' xrlátaje,  
ne dxuné' ba xuzre gutié' le'.
- 33 Quebe gusán Xránadxu le' lu na' benne' wen da calela na',  
ne quebe guzría xi'e le' gate dxuchi'e chee'.
- 34 Guleza lazre' Xránadxu, ne ben ca da ba gunné',  
na' Le' chísaqueze' Lue' chee gaca chiu' xezr la xu nigá.  
Gate xelebía xi' benne' dul-la ca', na' lé'enu' na.
- 35 Ble'eda' tu benne' wen da zrinnaj, nagá'ane' szrente,  
na' guxánle'e da de chee' ca dxegula tu xaga zrente'.
- 36 Na' gudé chee', na' québedxa zue' na'a.  
Bexílaja' le', san quebe nu bezrelda'.
- 37 Blaba lazre' ca naca chee benne' li lazre',  
ne gunná' benne' xrlátaje  
lawe' da naga cheajsé gaca tu da ba neza chee benne'  
dxebeze' zri lazre'.
- 38 Benne' dxeluné' da calela xelebía xí'queze'.  
Quebe nu cha' xrtia ljwezre benne' dxeluné' da zrinnaj.
- 39 Xránadxu Dios guseláquezé' benne' xrlátaje ca',  
na' Le' gutipe' lazre' benne' ca' lu zra chee da stébe.
- 40 Xránadxu Dios gácalené' le', ne guselé' le'.  
Guselé' le' lu na' benne' ca' dxeluné' da calela,  
na' guné' gaca chawe' chee' lawe' da buluxrén lazre' Le'.

## 38

- 1 Xrana' Dios, quebe til-lu' neda' lu xel-la' dxezrá'a chiu'.  
Quebe gudéu' neda' da ba xa' lu xel-la' snia chiu',  
2 lawe' da belúe xaga nalá xéche'ze chiu' neda',  
na' be na'u neda'.
- 3 Quebe bi chawe' zua belá' dxen chia' lawe' da dxezra'u neda',  
ne quebe zaj zua zrita xu'a cháwedau' lawe' da nuna' dul-la.
- 4 Ca naca da zrinnaj da nuna' ba zria cháqueze na xíchaja'.  
Zaj naca na chia' ca tu xua' zí'ile'e.
- 5 We' da zaj zria bel-la' dxen chia' ba dxelelá na,  
ne ba dxeluzru na,  
da na' dxaca chia' lawe' da bena' da calela.
- 6 Nucache lawa', ne dxexedué' ele'eda',  
ne dxebezre xacha' te zra chizrela,
- 7 lawe' da ca naca bel-la' dxen chia' dxelá na,  
ne quebe bi chawe' zua belá' dxen chia'.
- 8 Nate ni'a na'a, ne dxéqueda' ba naxúzrujne zrita xu'a.  
Dxebezre lazra' lawe' da zua stébe lázrdawa'.
- 9 Xran, ca naca da dxezá' lazra' zaj zua na nen Lue',  
na' da dxebezre lazra' dxelé'equeznu' Lue'.
- 10 Dxate' lázrdawa', ne ba bedú lazra',  
ne québedxa dxelé'eda' cháwedau'.
- 11 Dxelexebiga ljwezra', ne le sa' ljwezra' ca' zítu'la  
ne chee xízrawe' chia',

na' benne' walíZR chia' ba belexecuase' zítu'la.

<sup>12</sup> Benne' ca' dxelaca lazre' xelútíe' neda' dxuluzale' xralaj,  
na' benne' ca' dxelúe lazre' bi gaca chia' dxelenné' chia'  
wabía xi'a, ne tu zaj zúaze' bi xulusaque' neda'.

<sup>13</sup> Neda' quebe dxenda' ca dxaca chee' tu benne' cuezru,  
ne naca' ca tu benne' quebe dxaca nne',  
benne' quebe dxexrá dxu'e.

<sup>14</sup> Naca' ca tu benne' quebe dxenne',  
bénnea' quebe dxexechebe',

<sup>15</sup> lawe' da dxebeza lazra' Lue', Xrana' Dios.

Lue' xechebu' waláz chia', Xrana' Dios.

<sup>16</sup> Gunnia': Quebe gu'u lataj xelebene' ne chee' da dxaca chia'.  
Gate dxeajchazia', quebe gu'u le' lataj xulucá'ana szren cuine'  
lawe' da zua' lu da baxache'.

<sup>17</sup> Ba zua' cheajcházia',

ne tu dxelázqueze duté bel-la' dxen chia'.

<sup>18</sup> Chee le' na' xrúalepequeza' da calela da bēna',  
ne xewine lazra' ca naca dul-la da nabaga'.

<sup>19</sup> Benne' ca' dxeledábague' neda' zaj zúaqueze' chawe',  
ne zaj naque' benne' wal-la.

Zaj naxánle'e benne' ca' dxelecuídenē' neda',  
ne quebe bi de' da dxagu na zria chia' lau le'.

<sup>20</sup> Benne' ca' dxelune' da calela chee' benne' ca'  
dxelune' da xrlátaje

zaj naque' benne' dxeledábague' neda' lawe' da  
tu dxúnzqueza' da xrlátaje.

<sup>21</sup> Quebe gusanu' neda', Xrana' Dios.

Dios chia', quebe su' zitu' naga zua'.

<sup>22</sup> Ben ba xuzre gácalenu' neda', Xran.

Nacu' Benne' dxuselé' neda'.

## 39

<sup>1</sup> Neda' gunnía': Guxúe xanne' cuina' chee' quebe guna' dul-la  
lu da guchálaja'.

Tu guxúe xánnezqueza' ca da guchálaja' dxácate' na'  
zua benne' wen da calela naga zua'.

<sup>2</sup> Guzúa' zrize ca tu benne' quebe dxaca nnie',  
ne québequeze bchálaja' da xrlátaje,  
na' bzáladxa xel-la' dxudía chia'.

<sup>3</sup> Guca lázrdawa' ca tu da dxala,  
na' lu da dxulaba lazra' guca na ca tu xi'.

Na' gunaba' lau Xránadxu, gunnía':

<sup>4</sup> Xran, ble'e neda' da gaca chia',  
ne ájate zra gaca bana'.

Bzéajni'i neda' chadite nazruzre gatia'.

<sup>5</sup> Nunu' chia' sua' bábaze zra,

na' iza chia' québequeze bi naca na lau Lue'.

¡Da líqueze quebe bi zaj naca zra chee' xúgutē' bénneache!

<sup>6</sup> ¡Da líqueze zaj naca bénneache ca tu zrúl-laze!

¡Da líqueze dácheze naca zaj dxe' bénneache gunne xue

chee xel-la' nabán chee!  
 ¡Dxulucúdie' xel-la' gunní'a, ne quebe zaj nézene'  
 nu chee gaca na!

7 Na'a, Xran, ¿bízraqueze cueza lazra'?

Tuzu' Lue' dxal-la' cueza lazra'.

8 Bselá neda' lu xúgute da zrinnaj da bena'.

Quebe gu'u lataj benne' xala ca' xelún le' chia'.

9 Guzúa' zrize, ne quebe bi bchálaja'

lawe' da Lué'queze benu' guca caní chia'.

10 Becá'a xízrawe' da bzu' lu bela' dxen chia'.

Bache gatia' lu da dxusacu' neda'.

11 Dxudéu' ba xa' tu benne' ba nun dul-la

chee dxuzéajni'inu' le',

ne ca dxun béadu dxuteba' ladxe' dxuzría xi'u

da nazrí'idxe bénnea'.

¡Da líqueze quebe bi zaj naca zra chee xúgute bénneache!

12 Bene da dxenaba' lau Lue', Xran,

ne bze naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe de lize',

ne naca' ca tu benne' quebe de xezr la xu chee'

ca gulaca xra xrtawa' ca'.

13 Bsan neda' chee gata' lataj xezi' le dipa'

nédxula ca xexá'a xenitia'.

## 40

1 Nen duté xel-la' zren lazre' chia' guleza lazra' Xrana' Dios,  
 na' bze nague' chia', ne benne' da gunábeda' Le'.

2 Bebéaje' neda' ca tu lu xedxu situj, ne lu da naca  
 ca guna' guzra'.

Bzue' ni'a ca tu lu xiaj xre, ne begu'e neda' neza li.

3 Bene' dxul-la' tu da cube da naca na da dxue lá'ana'  
 Xránadxu.

Benne' zante xeledé'ene' da nigá dxune', na' xelezrebe' Le',  
 ne xuluxrén lazre' Xránadxu Dios.

4 Ba neza zrente naca na chee bénnea' dxuxrén lazre'  
 Xránadxu Dios,

ne quebe dxuné' ca dxelún benne' ca' dxulucá'ana szrene'  
 bedáu' xiaj xaga ca',

ne quegá ca dxelún benne' ca' dxelún lazre'.

5 Da zante benu', Xrana' Dios, da dxebánentu',

ne ca zaj naca da dxezá lazru' gunu' cheentu'

quebe gaca gulábantu' lau Lue'.

Chelá nu guzenda' ca zaj naca na,

ne che guchálaja' chee na, quebe baben tu na.

6 Quebe dxezaca ba lazru' béadu ca' gutia' lau',  
 u da gunna' Lue',

ne quebe gunabu' béadu ca' guzézxea' lau', u dxen chee

béadu ca' da guzúa' lau' ne chee dula nabaga',

san gusalaju' naga' chee xenda' chi'u.

7 Nadxa gunní'a: Guná' xque, za'a neda'.

Lu xiche lá'azxa naxúaj na ca naca chia'.

<sup>8</sup> Dhezaca ba lazra' guna' ca da dxaca lazru' Lue', Dios chia',  
na' da nadxixruj be'u zua na lu xichaj lázrdawa'.

<sup>9</sup> Ca naca da xrlátaje chiu' ba bzenda' bénneache  
naga zaj nazraga chiu' bénneache zante.

Gunná' xque, quebe guzúa zria',  
ca nézqueznu' Lue', Xrana' Dios.

<sup>10</sup> Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',  
ne ca dxuseláu' bénneache.

Quebe guzúa' zri ca naca xel-la' dxexache lazre' chiu',  
ne ca naca da li chiu' ládujla benne' zante zaj nazrague' chiu'.

<sup>11</sup> Xran, quebe chenu' xexache lazru' neda'.

Xel-la' dxexache lazre' chiu', ne da li chiu'  
tu dxelácalezqueze na neda'.

<sup>12</sup> Lawe' da ba guléchajle'e da calela ca' neda',  
da calela ca' da ba nuna' zaj zria na neda',  
na' quebe gaca nna'a naga zu'.

Zaj naxándxa na ca zaj naca xicha xíchaja', na' dxedú lazra'.

<sup>13</sup> Dxenaba' lau', Xran, guseláu' neda'.

Xran, ben ba xuzre gácalenu' neda'.

<sup>14</sup> Ben xelexedué'e, ne xeleque zrêaje  
xúgute benne' ca' dxelaca lazre' xelútie' neda'.

Ben xeajxaca bzêbela, ne xelexedué'e  
benne' ca' dxelezá lazre' xelune' chia' da calela.

<sup>15</sup> Ben xeleque zrêaje' lawe' da belún zrêaje' neda'  
benne' ca' gulé'e neda': "E, e."

<sup>16</sup> Ben xelebé, ne xelezúe lu da ba neza xúgute benne' ca'  
dxelebeze' Lue',

ne ben xelemnáqueze benne' ca' zaj nazrí'ine' Lue',  
weselá chee'.

Xelenné': "Xegá'ana szrénqueze Xránadxu."

<sup>17</sup> Láqueze sua' neda' lu da ba xa', ne lu da baxache',  
guxúequeze Xrana' Dios ájala guné' chia'.

Nacu' Benne' dxácaleñe' neda', ne Benne' weselá chia'.  
Dios chia', quebe chenu' gácalenu' neda'.

## 41

<sup>1</sup> Ba neza zrente naca na chee' bénnea' dxe'e gunne xue  
chee' benne' xache'.

Lu zra gate zue' lu da stebe, guselá Xránadxu bénnea'.

<sup>2</sup> Xránadxu guxúequeze' le', ne gunézruje' le' xel-la' nabán.  
Gaca na tu da ba neza zrente chee' bénnea' lu xezr la xu nigá,  
na' quebe gudé Xránadxu le' lu na' benne' ca' dxeledábage' Le'.

<sup>3</sup> Xránadxu Dios gúxruqueze' le' gate zúe' lu xel-la' dxudía.  
Gun chawe' duté da naque' gate na' quebe chawe' zue'.

<sup>4</sup> Gunnía': Xrana' Dios, bexache lazre' neda'.

Bexún benne'du xu'a lawe' da bēna' dul-la gate gudábaga' Lue'.

<sup>5</sup> Benne' ca' dxeledábage' neda' dxelenné' chia' da calela.

Dxelenné': "¿Bátala gate benne' nigá, ne xenite le'?"

- 6 Che xedajlenné'ē neda', dxelún lazre'.  
 Dxelebáje' neda' dizra' chee bi da calela gaca xelenné' chia',  
 na' gate dxelexedxúaje', na' dxelexrúe' dizra' na'.
- 7 Gate dxelezraga benne' dxelecuídene' neda',  
 na' tu dxelennézqueze' chia'.  
 Tu dxuluchálajlezqueze' ljwezre' chia' neda' da naca  
 da calela, dxelenné':
- 8 “Ba guxú'ē tu xízrawe' da gute na le',  
 ne québedxa xexásaqueze' ga na' de'.”
- 9 Cá'anqueze bénnea' guleza zri lazre' nen neda',  
 bénnea' bxren lazra', na' gudágulequeze' neda',  
 benne' nigá dxedábagazegue' neda'.
- 10 Lue', Xrana' Dios, bexache lazre' neda',  
 ne ben xexasa' neda',  
 na' xunézruja' benne' ca' ca da dxal-la' xelezí'ē.
- 11 Caníqueze nezda' ba bēna' da dxezaca ba lazru' Lue',  
 chee quebe bi xebebéle benne' ca' dxeledábague' neda'.
- 12 Ca naca chia' neda', ba bēxruquezu' neda' lawe' da  
 naca' du lazre',  
 ne ba bzu' neda' lau Lue' chadía chacanna.
- 13 ¡Gaca ba Xránadxu, Dios chee benne' Israel ca'  
 gaxuane iza, ne chadía chacanna!  
 ¡Ca'an naca na, ne ca'an gaca na!

## 42

- 1 Ca dxun bzrina' xixre' dxebezre xa'aba' lawe' da  
 dxebíleba' nisa,  
 ca' dxuláwizra bēnne' du xu'a da naca chiu', Dios.
- 2 Dxebile bēnne' du xu'a da naca chiu', Dios ban.
- ¿Bata gaca xida' chee guzúa cuina' lau Dios?
- 3 Nisa xuzru xiaj lawa' guca na ca xeta dxawa'  
 te zra chizrela,  
 dxácatē na' gulé'ē neda' xúgutē zra: “¿Ga na' Dios chiu'?”
- 4 Dxajsá lazra' chee da caní, ne dxebezre lazra'.  
 Dxajsá lazra' ca guxá'alēna' benne' zan ca',  
 ne nuzúa' lawe' le' lizre Dios.  
 Tu dxúl-lazquezdxu lu xel-la' dxebé,  
 ne dxue lá'anaquezdxu Dios lu laní.
- 5 ¿Bizr chee na' dxate ní'a na'u, bēnne' du xu'a?  
 ¿Bizr chee na' zu' stebe lu xichaj lázrdawa'?
- Guleza lazre' Dios lawe' da güe lá'anaqueza' Le' da xula.  
 Naque' Benne' dxuselé' neda', ne Dios chia'.
- 6 Dios chia', ba nate ní'a na' bēnne' du xu'a  
 lu xichaj lázrdawa'.
- Chee le' na' dxajsá lazra' chiu' nigá zua' lu xezr la xu  
 xechalá'a xegu Jordán,  
 ne lu xezr la xu chee benne' Hermón naga zua xi'a Mizar.
- 7 Ca schaga da dxun nísadau', ne da dxun tu bdua nisa  
 zren chiu', Dios,

ca' dxeque bénne'du xu'a lawe' da dxusaca zi' na'u neda'.

<sup>8</sup> Te zra xexache lazre' Xránadxu neda',  
na' chizrela tu gúl-lazqueza' da güe lá'ana' Le',  
ne tu guchálajlezqueza' Dios,

Bénnea' dxunne' xel-la' nabán chia'.

<sup>9</sup> Xapa' Dios: Lué'queze dxucu'uju' neda'.

¿Bizr chee na' nal-la lazru' neda'?

¿Bizr chee na' dxewí'ine lazra' lawe' da dxusaca zi'  
benne' dxedábague' neda'?

<sup>10</sup> Ca tu benne' dxelé'e zrita xu'a, ca' dxelún benne' ca'  
chia', dxelún le' chia'.

Tu zra tu zra dxelenné' chia': "¿Ga na' Dios chiu'?"

<sup>11</sup> ¿Bizr chee na' dxate ni'a na'u, bénne'du xu'a?

¿Bizr chee na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

## 43

<sup>1</sup> Bchi'a chia', Dios, ne ble'e lau naca' xrlátaje.

Bselá neda' lu na' benne' ca' dxuluzú'e Lue' chalá'ala,  
ne lu na' benne' ca' dxelezí xē'e, ne dxelune' da zrinnaj.

<sup>2</sup> Nacu' Lue' Dios chia', ne dxuzé chuchu' neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da dxusaca zi' neda'  
benne' ca' dxeledábague' neda'?

<sup>3</sup> Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga zúaquezu' Lue'.

<sup>4</sup> Chu'a naga zua lucugu chee Dios.

Chu'a lau Dios, Bénnea' dxunne' dxebeda', na' zua' lu da ba neza.

Güe lá'ana' Lue' nen da zríadi'i na du, Dios chia'.

<sup>5</sup> ¿Bizr chee na' dxate ni'a na'u, bénne'du xu'a?

¿Bizr chee na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

## 44

<sup>1</sup> Dios, bache bémentu' lawe' da buluzén Xra xrtáuntu' netu'  
ca naca da beñu' lu zra chee', da naca na iza ba guledé na.

<sup>2</sup> Bzria xi'u bénneache xezr la xu xezícadxa ca' lau  
xra xrtauntu' ca', na' bzu' le' xлатаj benne' ca'.

Bsaca zi'u benne' xezr la xu ca', san bzua chachu'  
bénneache chiu' lu xezr la xu nigá.

<sup>3</sup> Xra xrtáuntu' ca' quebe gulezi'e xezr la xu nigá

nen xia nalá cheéqueze',

Ne quebe buluselá cuíne' nen xel-la' wal-la da zaj nape'.

Lue' bseláuquezu' le' nen xel-la' waca chiu',

ne nen xel-la' wal-la chiu',

ne nen xel-la' naxaní' chiu', lawe' da bezaca ba lazru' nen le'.

<sup>4</sup> Dios, nacu' wenná bea chia'.

Bselá zri'ine zre sua Jacob.

<sup>5</sup> Nen xel-la' waca chiu' xebéajntu' benne' ca'  
dxeledábague' netu'.

Lu Lau' Lue' guchuchuj guléajntu' benne' ca'  
dxeledábague' netu'.

<sup>6</sup> Quebe guxrén lazra' xaga nalá xéche'ze chia',  
ne quebe guselá xia chia' neda'.

<sup>7</sup> Lue' bcu'uju' netu' lau benne' ca' dxeledábague' netu',  
ne beñu' belexedué'e benne' ca' belecuidene' netu'.

<sup>8</sup> Ne chee Dios tu súazquezentu' lu da ba neza,  
na' chadía chacanna güe lá'anantu' Lau' Lue'.

<sup>9</sup> Nusán lazru' netu', ne nunu' dxexedué'entu',  
ne quebe dxéajlenu' benne' cheentu' ca' dxjaque' wedil-la.

<sup>10</sup> Beñu' buzrúnnujntu' lau benne' ca' dxeledábague' netu',  
na' benne' ca' dxelecuidene' netu' gulegüe' ca naca  
da nápantu'.

<sup>11</sup> Bdeu' netu' ca zrila' ca' lu na' benne' xelútié' netu',  
ne ba bese dínnaju' netu' ládujla benne' xezr la xu ca'.

<sup>12</sup> Bdéu' netu', benne' chiu' ca' cá'aze, ne quebe bi guzi'u.

<sup>13</sup> Dxunu' dxelún la benne' walízre cheentu'.

Benne' zaj naxéchajé' netu' dxelún le', ne dxuluzrizre' cheentu'.

<sup>14</sup> Nuzú' netu' ca tu da dxelenná benne' xezr la xu ca'  
naca na da baxáchele'g'e.

Xúguté benne' dxelelé'ene' netu' dxulutá xíchajé',  
ne dxelexebánene' ca da baxache' nácantu'.

<sup>15</sup> Tu zra tu zra tu dxexedué'ezquezda',

ne tu zúazqueza' lu da stébele'g'e

<sup>16</sup> lawe' da dxelenné' schanni' chia', ne dxuluzúé'  
neda' chalá'ala,

ne dxulutíl-lalé neda' benne' ca' dxeledábague' neda',

nen benne' ca' dxelexebeaj lazre' neda'.

<sup>17</sup> Xúguté da caní dxaca cheentu', ne quebe ne  
gal-la lazrentu' Lue',

ne quebe ne guzúantu' chalá'ala xel-la' wezría chiu'.

<sup>18</sup> Quebe ne gusán lázrentu' Lue',

ne quebe ne xecuásantu' lu da gunná be'enu' netu'.

<sup>19</sup> ¿Bizr chee na' nuzú' netu' chalá'ala tu lataj chee be' snia ca',  
ne nuzú' netu' naga xelaze gátentu'?

<sup>20</sup> La gul-la lázrentu' La Dios cheedxu,

ne bca'ana szrentu' tu dios da quebe bi zaca,

<sup>21</sup> ¿quebe dxal-la' zra'a Dios netu' ne chee da nigá?

Le' nézquezne' da zaj zua lu xichaj lázxdau bénneache.

<sup>22</sup> Lawe' da nácantu' chiu', tu zra tu zra ba

zaj zúatequeze' xelútié' netu'.

Zaj nune' netu' ca zrila' ca' ba zua xelútié'-ba'.

<sup>23</sup> ¡Bebán, Xran!

¿Bizr chee na' dxasiu'?

¡Bebán!



¡Quebe su' zitu' tu chi'ize!

<sup>24</sup> ¡Bizr chee na' nucache cuinu',  
ne quebe dxeque be'enu' ca dxezaca zí'antu',  
ne ca dxuluchine benne' ca' netu'?

<sup>25</sup> Ba nate ni'a na' bénne'du xú'untu', ne dxeajcházet<sub>ent</sub>'u' lu xu,  
na' ba déte<sub>nt</sub>'u' sudxú'ala lu xezr la xu.

<sup>26</sup> ¡Guxasa, gúcale netu',  
ne dute xel-la' dxexache lazre' chiu', bselá netu'!

## 45

<sup>1</sup> Xu'u lázrdawa' tu dizra' xrtante,  
na' gúl-laqueza' tu da naca chee Wenná Bea.  
Gúl-laqueza' tu da bzuj tu benne' dxuchálajle'g cháwedau'.

<sup>2</sup> Nacu' xrtánle'edxa ca xúgute bénneache.  
Dxezile'entu' ba neza chee dizra' dxuchálaju',  
lawe' da nucá'anaqueze Dios Lue' cháwedau' tu chí'izqueze.

<sup>3</sup> Bda' xia chiu' dxu'a le'u, Lue', benne' wal-la,  
lu dute xel-la' szren chiu', ne xel-la' dxenná bea chiu'.

<sup>4</sup> Lu xel-la' szren chiu' chepe bánquezu'.  
Bchine dizra' li, ne xel-la' dxexruj lazre', ne da xrlátaje,  
na' guzėjani'i Cuinu' da zri'a ca'.

<sup>5</sup> Zaj nalále'g xaga nalá xéche'ze chiu' ca',  
da xelute na benne' xezr la xu ca' lau Lue',  
ne cheajlechaze na lu lázrdau benne' ca' dxeledábage' Lue'.

<sup>6</sup> Lataj blau naga dxe'u, Dios, naca na da chadía chacanna,  
ne súatequeze na.

¡Xrlátaje naca ca dxenná be'u!

<sup>7</sup> Nazri'inu' da naca xrlátaje, ne dxecuídenu' da calela.  
Chee le na' ba nuzúa Dios chiu' Lue' xlátaju',  
naga dxebéle'edxenu' ca le sa' ljwezru' ca'.

<sup>8</sup> Dxelá zixre zra lanu' nen xala da naca na nizre xaga,  
ne xiaj, da ca' dxelelá na zixre.

Lu xu'u lizru' da zácale'g na dxuluzúe' Lue' lu da ba neza.

<sup>9</sup> Bi nu'ula chee wenná bea ca' zaj zúabe' ládujla nu'ula  
chiu' ca' zaj naque' blaudxa.

Chalá'a xabęla chiu' dxe' nu'ula gácabe' zru'ulu' nácube' oro  
da za na xezre Ofir.

<sup>10</sup> Bene, nú'uladau', ne gunná' xque, ne bze naga da nnia':  
Bzala lazru' lazriu' ne lizre xrau',

<sup>11</sup> na' benne' wenná bea sa lazre' xel-la' xrtan chiu'.  
Bzexruj lazru' lau le' lawe' da naca le' xranu'.

<sup>12</sup> Xelelá' nu'ula xezre Tiro lau lue', zaj nu'e da xelunne' chiu',  
na' xelenaba benne' gunní'a ca' gunu' tu culuén chee'.

<sup>13</sup> Xrtanle'g naca bi nu'ula chee wenná bea lu xu'u naga zue'.  
Zra lánabe' nazí' lechítaje na oro.

<sup>14</sup> Xeleché'g-be' lau wenná bea, nácube' zra lánabe'  
da núale'g lechítaje na.

Nu'ula węgu'du ca' chjácabe' cuzru lebe'.

Nu'ula caní, nu'ula ljwézrebe' xuluzúabe' lawe' lue'.

<sup>15</sup> Lu dutę xel-la' dxebé, ne lu da ba neza xeleché'e-be', na' xelú'ube' lu xu'u lizru', wenna' bea.

<sup>16</sup> Waláz cheę xra xrna'u xelexezúa zri'inu', bi ca' gunu' xelenná beabe' du gabí'i xęzr la xu.

<sup>17</sup> Guna' cheajlesá lazre' xúgute bėnneache lau' lue'.

Cheę lę na' xelúe lá'ana bėnneache lue' chadía chacanna, ne gaxuane iza.

## 46

<sup>1</sup> Dios naque' Benne' dxuxúe' dxi'u, ne dxunę' dxi'u benne' wal-la.

Zúatequeze' gácalęne' dxi'u gate dxededxu xel-la' zi'.

<sup>2</sup> Cheę lę na', quebe zrėbedxu lácala xru' xęzr la xu nigá na' cheajlechaze xi'a ca' lu nísadau',

<sup>3</sup> ne lácala xeajxruza zren cheę nísadau' xuluninne na, ne dxelúnle'e na schaga,

na' welezrízequeze xi'a ca' ne cheę da dxezrú'.

<sup>4</sup> De tu xęgu da dxunna na xel-la' dxebé lu xęzre cheę Dios, ne lu xu'u lá'azxa cheę Dios, Benne' nape' dutę xel-la' szren.

<sup>5</sup> Dios zue' xęzre na', ne cabata' cuía xi na.

Dxaní'sise' xídę' gácalęne' bėnneache zaj zre'e xęzre na'.

<sup>6</sup> Dxelezrėbele'e benne' xęzr la xu ca',

na' dxelezríze benne' cheę wenna' bea ca'.

Dxennę Dios ca dxennę guziu', na' dxexuna xęzr la xu.

<sup>7</sup> Dios, Bėnnea' nape' dutę xel-la' waca, zúalęne' dxi'u.

Dios na' cheę Jacob dxucache chawe' dxi'u.

<sup>8</sup> Le da lé'ele da ca' nun Xránadxu.

Le nna' ca naca da dxebánedxu da nune' lu xęzr la xu.

<sup>9</sup> Dxebeque zrie' wedil-la da dxelaca du gabí'i xęzr la xu.

Dxuzúzruje' da dxuzala na xaga nalá xėche'ze ca',

ne dxíchuję' xaga tuče' ca' cheę wedil-la,

na' dxuzezxe' da ca' zaj nachę' benne' wedil-la ca'.

<sup>10</sup> Dxenná Dios: "Le sua zríze, ne le xúnbea naca' Dios.

Naca' szrendxa ca zaj naca xúgute cue' xęzr la xu.

Naca' szrendxa ca dutę xęzr la xu."

<sup>11</sup> Dios, Bėnnea' nape' dutę xel-la' waca, zúalęne' dxi'u.

Dios na' cheę Jacob dxucache chawe' dxi'u.

## 47

<sup>1</sup> ¡Le capa na'le, le'e, xúgute bėnneache!

¡Le güe lá'ana Dios nen dutę xel-la' dxebé!

<sup>2</sup> Dxał-la' zrėbedxu Xránadxu, nape' dutę xel-la' szren.

Naque' Wenna' Bea zren dxenná bé'ęne' dutę xęzr la xu.

<sup>3</sup> Bzue' benne' xęzr ca' zran ní'adxu.

Bzue' dxi'u cheę nna be'edxu zánete cue' xęzr la xu ca'.

<sup>4</sup> Beque'e tu xęzr la xu da gaca na cheędxu,

Da naca tu xezr la xu xrtante chee zri'ine zre sua Jacob,  
 benne' ca' nazri'ine'.  
 5 Dxe'güén Dios naga dxe'e dxenná be'e.  
 Dxelebezre luzu da dxulucuezre' gate dxe'güén Xránadxu ga na'.  
 6 ¡Le gul-la da gaca ba Dios!  
 ¡Le gul-la!  
 ¡Le gul-la da gaca ba Wenná Bea cheedxu!  
 ¡Le gul-la!  
 7 ¡Dios naque' Wenná Bea dutę lu xezr la xu nigá!  
 ¡Le gul-la chee' nen dutę xel-la' dxéajni'i chee!  
 8 Dxe' Dios naga dxenná be'e, lu lataj na' naca na lá'azxa.  
 Dxenná bé'ene' xúgutę cue' xezr la xu ca'.  
 9 Dxelezraga benne' dxelenná bé'ene' xúgutę cue' xezr la xu  
 tu zren nen bėnneache chee Dios chee Abraham.  
 10 Benne' ca' dxelenná be'e du gabí'i xezr la xu  
 buludé' xel-la' dxenná bea chee' lu na' Dios.  
 Le' dxenná bé'ene' xúgutę benne' wenná bea ca'.

## 48

1 ¡Zrente naca Xránadxu!  
 ¡Naca chee' güe lá'anale'edxu Le'  
 ga naca lu xezre chee Dios cheedxu,  
 da dxe' na lu xi'a lá'azxa chee'!  
 2 Sión, da naca na xi'a chee Dios, naca na sibe, ne xrtante.  
 Naca na xezre chee Wenná Bea zrente,  
 da dxunna na xel-la' dxebé dutę xezr la xu nigá.  
 3 Dios ba blé'ene' dxucache chawe' dxi'u,  
 lu xu'u zaca ca' chee xezre chee' na'.  
 4 Belezraga benne' wenná bea ca',  
 na' belelé'e chee xeledíl-lalene' xezre nigá,  
 5 na' gate belelé'ene' na, na' belexebáne'.  
 Belezrébe', na' buluzrúnnuje'.  
 6 Gulezré'e lu da štebe,  
 ne gulezúe' xel-la' dxudía ca dxaca chee tu nu'ula  
 ba zua sane' bidau'.  
 7 Gulaque' ca da ca' dxeledá lawe' nísadau' dxexrite na  
 gate dxácale'e be' bdunu' lu nísadau'.  
 8 Bendxu ca da ben Dios, na' na'a ba ble'edxu na,  
 ga naca lu xezre chee Xránadxu, nape' dutę xel-la' waca,  
 da naca na xezre chee Xránadxu Dios.  
 Le' guzúa chawe' xezre nigá chadía chacanna.  
 9 Ga naca lu xudau' chiu' Lue', Dios  
 dxajsá lázredxu ca naca xel-la' zri'i lazre' zren chiu'.  
 10 Gáteteze na' dxelúe lá'ana bėnneache Lue',  
 na' ca naca xel-la' szren chiu' dxezrín na  
 du gabí'i xezr la xu.  
 Ca naca da xrlátaje dxenná be'u.  
 11 Xelebé'e bėnneache zaj zre'e Sión.  
 Xelebé'e bėnneache zaj zre'e xezre ca' chee Judá  
 ne chee da dxuchi'u chee'.  
 12 Le'e, bėnneache chee Dios, le chechaj dxu'a xezre na',

ne le gulaba ca zaj naca xu'u sibe ca',  
da dxuluzé chacha na xezre na'.

<sup>13</sup> Le nna' xque ca naca ze'e zren naxechaj na xezre na'.  
Le nna' xanne' ca zaj naca xu'u wal-la chee na,  
chee guzenle bi cheele ca naca xezre na'.

<sup>14</sup> Dios nigá nácaqueze' Dios cheedxu chadía chacanna.  
Le' tu gulé'ezquezne' dxi'u neza.

## 49

<sup>1</sup> Le xen da nigá, le'e, benne' xúgute cue' xezr la xu.

Le guzé nágale, le'e, benne' duté xezr la xu,

<sup>2</sup> le'e, benne' blau, ne le'e, benne' xezícadxa,  
le'e, benne' gunní'a, ne le'e, benne' xache'.

<sup>3</sup> Guchálajqueza' xel-la' sina,  
ne guzéajni'ida' le'e da xu'u lázrdawa'.

<sup>4</sup> Guzé naga' tu dizra' sina.

Gúl-laqueza' chee tu da nagache,  
ne quinnia' da zriadi'i na du chēn.

<sup>5</sup> ¿Bizr chee na' dxun na ba xen zreba' lu zra chee da stebe,  
gate naxechaj da calela neda' da dxelún benne'  
dxeledábague' neda'?

<sup>6</sup> Benne' ca' dxuluxrén lazre' da zaj de chee',  
ne dxulucá'ana szren cuine' lawe' da zaj nápalé'e.

<sup>7</sup> Quebe xelezéquene' xelexá'awe' le sa' ljwezre',  
ne quebe gaca xulunézruje' Dios da guselá na le'

<sup>8-9</sup> chee tu xelaca bánzqueze',  
ne chee cabata' xeluzru bel-la' dxen chee'  
lawe' da zrente naca da dxexa'u na xel-la' nabán chee bēneache,  
ne cabata' seque' nu benne' quízruje' na.

<sup>10</sup> Xelelé'ene' dxelátequeze benne' sina ca',  
ne xelúzrué' cáteze dxaca chee benne' xala ca',  
ne chee benne' lázrdau zide' ca',  
na' dxulucá'ane' xel-la' gunní'a chee' lu na' benne' xula ca'.

<sup>11</sup> Dxeléquene' wazráqueze zri'ine zre sue' chadía chacanna,  
na' xelexegá'ana lizre' chee xelaca na chee xúgute cuen  
xrtia ljwezre',

na' dxelu'e la xezr la xu chee' ca' ca zaj nazí láqueze'.

<sup>12</sup> Quebe xelexegá'anatequeze bēneache lu da ba lá'ana.  
Zaj naque' ca be xixre' ca', be dxeláteba'.

<sup>13</sup> Ca da dxelune' naca na da xálaze,  
na' dxelexezaca ba lazre' xrtia ljwezre' ca' nen da dxelennaze'.

<sup>14</sup> Zaj naque' ca tu cue' zrila' zjácaba' lataj ba xa',  
naga guxúe xel-la' gute leba'.

Benne' xrlátaje ca' xelenná bé'ene' benne' gunní'a ca'  
gate za' chaní',

na' xelebía xi' da ca' guta' chee',

na' lataj ba xa' gaca na naga tu xelezúazqueze'.

<sup>15</sup> Dios xexá'awe' xel-la' nabán chia' lu lataj ba xa'  
lawe' da xeché'e neda' naga zúaqueze' Le'.

<sup>16</sup> Quebe su' stebe gate nu benne' dxezrué'ene' xel-la' gunní'a,

ne gate dxunę' lizrę' da zácale'ędxa,  
 17 lawe' da gate gatię' quebe bi xexu'ę,  
 ne quebe chéaję xel-la' gunnía' cheę' lę'.  
 18 Lácala dxácate naca banę' dxę cuine' zue'  
 lu da ba neza zrente,  
 na' dxelúe lá'ana bėnneache lę' gate dxępe banę',  
 19 san chu'ę naga zaj zra xra xrtawę' ca',  
 ne cabátadxa lé'ene' xel-la' naxaní'.  
 20 Bėnnea' dxelapa bėnneache lę' ba lá'ana san quebe  
 bi dxéajni'ine'  
 naque' ca bę xixre' ca', bę dxeláteba'.

## 50

1 Ba gunné Xránadxu Dios, ne ba nutubę' bėnneache  
 cheę dute xęzr la xu,  
 benne' zaj zrę'ę naga dxalaj gubizra,  
 ne benne' zaj zrę'ę naga dxebía na.  
 2 Lu xi'a Sión, da naca na xrtánle'ę ba bzani' Dios.  
 3 Xelá' Dios cheędxu, ne quebe sua zrię'.  
 Gálajqueze xi' lau Lę',  
 ne gácale'ę be' bdunu' da chechaj na Lę'.  
 4 Xutúbequeze' benne' zaj zrę'ę xabáa na'ala,  
 ne benne' zaj zrę'ę xęzr la xu,  
 cheę guchi'ę cheę bėnneache cheę'.  
 5 Dxenné': "Le xutube benne' chia' ca',  
 benne' ca' belunę' tu xel-la' wezría nen neda'  
 da buluzúa chúchue' nen dxen cheę béadu ca'."  
 6 Da zua xabáala gulé'e lau na naque' xrlátaje,  
 lawe' da naca Dios Benne' guchi'ę cheę bėnneache.  
 7 Dxenné': "Le xen, bėnneache chia', na' guchálaja'.  
 Le guzé nágale, benne' Israel, na' nnia'  
 da gagu na zria cheele.  
 Neda', Dios, naca' Dios cheele.  
 8 Quebe til-la' le'e ca naca béadu ca' bėtele lawa',  
 ne ca naca béadu ca' bzézele,  
 da zaj zúaqueze na lawa' neda'.  
 9 Quebe ca'a lu na'ale među ca',  
 ne chivo biu ca', bę nápaquezle  
 10 lawe' da zaj naca chia' xúgute bę xixre' ca',  
 ne zane gaxúa bę xixre' zaj zra'ba' lu xí'adu ca'.  
 11 Xu'u lu na'a xúgute bę zua xrila,  
 ne naca chia' xúgute bę zaj naca banba'.  
 12 Chela neda' dxeduna', quebe xapa' le'e ca'  
 lawe' da naca chia' xęzr la xu, ne xúgute da de lawe na.  
 13 ¿Dxun na ba xen gawa' bęla' bęzre ca'?'  
 ¿Xí'aja' dxen cheę chivo biu ca'?'  
 14 Le guzúa lau Dios da güe lá'anale Lę'  
 ne le gunezruj ca da guchebe lázrele lau Dios szrente.  
 15 Bláwizra neda' lu zra zu' lu da zi' da xa',  
 na' guselá' lue', na' lue' gapu' neda' ba lá'ana."  
 16 Dios guzre' benne' wen da calela:

“¿Bi dxéquenu' lue', dxuchálaju' ca nadxixruij bi'a,  
ne dxenníu' ca naca chee xel-la' wezría chia'?

<sup>17</sup> Lue' dxecuídenu' neda' che dxusízreda' lue',  
ne dxuzú' chalá'ala dizra' chia'.

<sup>18</sup> Gate dxelé'enu' gubán, na' dxunu' le' tu zren,  
ne nacu' tu zren benne' ca' dxeledálgene' nu'ula  
quebe zaj naca zru'ule'.

<sup>19</sup> Dxuchálajquezu' da calela,  
ne tu dxúnzquezu' da wen lazre'.

<sup>20</sup> Tu dxennézquezu' da calela chee bi bíchequezu',  
Ne dxagu' zria chee bi chee xrná'aquezu'.

<sup>21</sup> Da caní benu', na' neda' guzúa' zrize.

Gúquenu' naca' tu benne' ca nacu' lue'.  
Na'a wadíl-laqueza' lue', ne gulé'eda' lue' ca ba benu'."

<sup>22</sup> Le chéajni'i da nigá na'a, le'e dxal-la lázrele Dios.

Ga gaze guzuzruij Dios le'e, ne québedxa sua nu guselá le'e.

<sup>23</sup> Bénnea' guzúg' lawa' da güe lá'ang' neda' gape'  
neda' ba lá'ana,

na' bénnea' dxuxuchá cuine' chee guné' da xrlátaje,  
gulé'eda' le' ca guselá' le', naca' Dios chee'.

## 51

<sup>1</sup> Gúcale neda', Dios, lu duté xel-la' dxexache lazre' chiu'.  
Duté xel-la' dxexache lazre' chiu' bsula zria da nabaga'.

<sup>2</sup> Gudibe neda' ca naca da calela da nuna',  
ne bca'ana chawe' neda' chee dul-la da bena',

<sup>3</sup> lawe' da dxexúnbe'a ca bena' gudábaga' Lue',  
ne ca naca dul-la chia' tu dxáguze na zria neda'.

<sup>4</sup> Lau' Lue' bena' dul-la.

Awe', lau' Lué'queze, ne ba bena' da calela lau' Lue'.

Caní dxaca na chia' chee gaca bea nacu' xrlátaje lu da dxenníu',  
ne nacu' du lazre' ca da dxuchi'u chee bénneache.

<sup>5</sup> Gunná' xque, báchequeze nabaga' dul-la gate gúlajtea',  
ne lu dul-la zúaqueza' gate guzrán xrna'a neda'.

<sup>6</sup> Lue' dxezá lazru' sua da li lu xichaj lázrdawa',  
ne lu xichaj lázrdawa' ba bzéajni'inu' neda' da naca sina.

<sup>7</sup> Bca'ana chawe' neda' nen da na' dxuchínenu',  
na' xegá'ana' xrlátaje.

Gudibe neda', na' gaca' chíchedxa ca tu bezxe'.

<sup>8</sup> Ben xenda' xel-la' dxebé, ne da ba neza,  
na' xelexezí' le dipa zrita xu'a, da ba gudichaju'.

<sup>9</sup> Quebe gusá lazru' ca naca dul-la da bena',  
na' bsula xúgute da calela da nuna'.

<sup>10</sup> Dios, bzua neda' tu lázrdawa' xrlátaje,  
ne bzua tu be' li lazre' lu xichaj lázrdawa'.

<sup>11</sup> Quebe gucusu' neda' lau' Lue',  
ne quebe xeca'u lu xichaj lázrdawa' be' lá'azxa chiu'.

<sup>12</sup> Bexunna neda' xel-la' dxebé chee xel-la' weselá chiu',  
ne bzua chuchu be' chawe' da xu'a.

<sup>13</sup> Nadxa gusédeda' benne' ca' dxelune' da zrinnaj

ca dxaca lazru' xelune',  
 na' benne' dul-la ca' xelexexaque' chiu' Lue'.  
 14 Bselá neda' lu zria da nabaga', beŋtia' benne'.  
 Lue' Dios, nacu' Dios dxuseláu' neda',  
 na' gúl-laqueza' chee da xrlátaje nacu' Lue'.  
 15 Xran, gusalaj dxu'a,  
 na' guzenda' bénneache da dxue lá'ana' Lue'.  
 16 Quebe dxaca lazru' béadu ca' gutia'-ba' lau',  
 ne quebe dxaca lazru' béadu ca' guzézxea' lau'.  
 17 Da guzúadxu lau Dios da dxaca lazre' naca na  
 tu lázxdau dxexruj lazre'.  
 Tu lázxdau dxexruj lazre', ne da dxexíaje lazre'  
 quebe guzú' chalá'ala, Dios.  
 18 Dute' xel-la' zri'i lazre' chiu', beŋ gaca chawe' chee  
 xezre Sión.  
 Bsegula ze'e da nazečaj na xezre Jerusalén.  
 19 Nadxa xezaca ba lazru' nen béadu ca' gútentu' lau'  
 dute' da naca xrlátaje cheentu',  
 ne béadu ca', ne da du ca' guzézxentu' lau'.  
 Nadxa xelútie' béadu ca' lu cugu chiu'.

## 52

1 ¿Bizr chee na' dxucá'ana szren cuinu' chee da calela  
 da nunu', lue', benne' wal-la?  
 Tu zúazqueze xel-la' dxexache lazre' chee Dios.  
 2 Tu dxuchálajzquezu' chee da calela da gunu' chee le sa' ljwezru'.  
 Da dxenníu' naca na ca tu xia da nalále'e, dxezí xe'u ljwezru'.  
 3 Nazrí'idxenu' da calela quézcala da xrlátaje,  
 ne dxedánnedxenu' da wen lazre' quézcala da li.  
 4 Nazri'inu' xúgute' dizra' da dxulucá'ana ditaj na bénneache,  
 lue', benne' dxezí xe'u.  
 5 Chee le na' guzrí'a xi' Dios lue' tu chí'izqueze.  
 Waxele' lue', ne xequé'e lue' naga zúaquezu',  
 ne gucuase' lue' naga zaj zra' benne' ban ca'.  
 6 Xelele'e benne' xrlátaje ca' da nigá, na' xelezrébequeze'.  
 Xuluzrízrqueze' chiu' lue', xelenné':  
 7 "Le na' xque, benne' nigá quebe bxren lazre' Dios  
 chee gucu'uje' le'.  
 Bxren lázrequeze' ca naca xel-la' gunnía' zrente' chee',  
 ne guzúaqueze' lu da calela da dxune'."  
 8 Neda' naca' ca tu xaga olivo xa'a lu xu'u lizre Dios.  
 Tu dxuxrén lázrequeza' xel-la' dxexache lazre' chee  
 Dios chadía chacanna.  
 9 Güe lá'anaqueza' Lue' chadía chacanna lawe' da beŋu' da caní,  
 ne cueza lazra' lau Lue' lawe' da naca na xrlátaje lau xúgute'  
 benne' chiu' Lue'.

## 53

1 Benne' xala ca' dxelenná lu lázrdawe': Quebe zua Dios.  
 Xúgute' zaj naque' sban, ne zaj nuné' da calela.

Quebe nu chilá' benne' dxunę' da xrlátaje.

<sup>2</sup> Dios zuę' xabáa dxenné'ę bėnneache  
cheę lé'eng' che zua tu benne' sina,  
bėnnea' dxape' Dios ba lá'ana.

<sup>3</sup> Xúgute benne' zaj nabéaj xíchaje' Dios.

Xúgute' zaj naque' sban.

Quebe nu chilá' benne' dxunę' da xrlátaje, netú guę'.

<sup>4</sup> Dxenná Dios: "¿Quebe dxeléajni'i benne' caní  
dxelunę' da caleļa?

Dxele'aj dxelawe' da dxelebanę' cheę bėnneache chia',  
ne quebe dxelexílaje' neda'."

<sup>5</sup> Za zrin zra xelexruse' ca da quebe ne xelezaque',  
lawe' da gusedinnaj Dios zrita ca' cheę benne'  
guledábage' bėnneache cheę'.

Dios na' nuzúę' chalá'ala benne' ca',  
na' bėnneache cheę' xuluzría xi'ę benne' ca'.

<sup>6</sup> Dxenaba' Dios gunę' dxuaj Sión da gácale' na  
benne' Israel ca'.

Gate ba nun Dios xelezrín bėnneache cheę' lu xęzr la xu  
cheęqueze',

xelebé zrí'ine zre sua Jacob,

ne xelezúa lu da ba neza benne' Israel ca'.

## 54

<sup>1</sup> Bselá neda', Dios, nen xel-la' waca chiu'.

Gúcale' neda', Dios, nen xel-la' wal-la chiu'.

<sup>2</sup> Bene da dxenaba' lau', Dios, ne bechebe chia'.

Bęę naga da guchálajęna' Lue'.

<sup>3</sup> Za'aca benne' snia ca' xeledíl-lalęę' neda'.

Benne' xichaj zra'a ca' dxelaca lazre' xelútię' neda',  
benne' ca' quebe dxelape' ba lá'ana Lue', Dios.

<sup>4</sup> Dios naque' Benne' dxácaleęę' neda'.

Xránadxu Dios zúalęę' benne' ca' dxuluxúę' neda'.

<sup>5</sup> Ca naca da caleļa dxelún benne' dxeledábage' neda',  
xuzrí'i Dios na cheę benne' ca'.

Guzría xi'ę benne' ca' lawe' da naque' li lazre'.

<sup>6</sup> Du lazra' cu'a da gudéa' lau Lue', Xran.

Güe lá'anaqueza' Lau' lawe' da nácale'ę na xrlátaje.

<sup>7</sup> Bseláu' neda' lu xúgute' da stębe guzúa'.

Ble'eda' gulebía xi' benne' ca' dxeledábage' neda'.

## 55

<sup>1</sup> Bęę naga, Xran, ca da dxuchálajęna' Lue',

ne quebe guzú' chalá'ala ca da dxenaba' lau'.

<sup>2</sup> Guzúa ban lazre', ne bechebe chia'.

Dxuláwizra' Lue' lu da dxuchálaja', ne zua' stębe,

<sup>3</sup> lawe' da benne' dxeledábage' neda' dxelenné' chia',

ne lawe' da dxelún la benne' węn da caleļa neda'.

Bulusebage' neda' da zrinnaj,

ne dutę xel-la' dxelezrá'a zaj nau zi' xuzre' neda'.



4 Dxe' gunne xue lázrdawa' lu be'la' dxen chia',  
ne dxuchebe xel-la' gute neda'.

5 Zua' lu xel-la' dxezrebe, ne dxezrízqueza',  
na' zúale neda' da dxuchebe na neda'.

6 Na' gunnía': ¿Nuzra gunna neda' xrila tu bsia  
chee cha'a lu be'la naga xezí' lazra'?

7 Da líqueze guzrúnnuja' zítu'la,  
na' súaqueza' le'e xixre' lawe' lataj.

8 Guna' ba xuzre la' lu be' bduu', ne lu be' wal-la.

9 Bzria xi' benne' ca' dxelune' da cale'la, Xran.

Bzaga naze da dxelune',  
lawe' da ble'eda' da zrinnaj, ne da cale'la da dxelune'  
lu xezre.

10 Te zra chizrela dxeledé' lawe' ze'e da naxechaj na xezre,  
ne dxelune' da zrinnaj, ne da cale'la lu xezre nigá.

11 Nazrate xezre nigá da cale'la da dxelune',  
ne tu dxelúnzqueze' da wen lazre', ne xel-la' dxezí xe  
lu neza chee na.

12 La guca tu benne' bénnea' dxedábage' neda',  
bénnea' ben le' chia',

na' bchaga lawa' da na'.

La guca tu benne' dxecuídene' neda' bénnea' gudábage' neda',  
na' bcache cuina' lau le'.

13 Lue', bénnea', gucu' ca tu le sa' ljwezra'.

Bsi'u neda', ne gucu' tuze neda'.

14 Tu zren bchálajdxu du lázredxu,  
ne lu xel-la' zri'i lazre' gudadxu lu xu'u lizre Dios.

15 Dios, ben que'la xel-la' gute benne' ca' dxelune'  
da cale'la chadite.

Ben xelexú'e lu lataj ba xa' zaj naca bane',  
lawe' da nazrate xu'u lizre' da cale'la da dxelune'.

16 Ca naca chia' neda', bláwizra' Dios,  
na' Xrana' Dios bselé' neda'.

17 Che zílala, ne wagubizra, ne ca dxebía gubizra  
guchálajlequeza' Dios, ne guláwizra' Le',  
na' Le' xenne' chia'.

18 Xexá'awé' bénnea' du xu'a lu wedil-la da dxaca chia' neda',  
ne gune' cueza' zri lazra',

lácala zaj zra' zánete benne' dxeledábage' neda'.

19 Wene Dios, na' guzría xi'queze' benne' ca'.

Naque' Bénnea' zúatequeze' dxenná be'e nédxute'.

Caní gune' chee benne' ca' lawe' da quebe dxuluché'e  
ca dxelune', ne quebe dxelezrebe' Dios.

20 Guchisa na' benne' wen da zrinnaj chee gu'e benne' ca'  
dxelebeza zri lazre' nen le'.

Gudíchajé' xrba chee xel-la' wezría da bene' nen benne' ca'.

21 Dizra' bchálajé' zaj naca na dizra' zren lazre',

san xu'u lázrdawe' xel-la' dxezrá'a.

Dxune' xrtante dizra' dxuchálajé',

san zaj naca na ca xia da zaj nalále'e.

22 Bda xua chiu' cuzru Xránadxu, na' Le' gutipe' lazru'.

Québequeze gu'ę lataj cheajchaze benne' chawe' tu chi'ize.

<sup>23</sup> Lue', Dios, gunu' xelexú'u benne' ca' dxelunę'  
da caleła lataj ba xa',  
benne' dxelute benne', ne benne' dxelezí xe'e,  
gate quebe ne xelezrine' gachaj catite dxal-la' xelaca banę',  
san neda' guxrén lazra' Lue'.

## 56

<sup>1</sup> Bexache lazre' neda', Dios, cheę quebe xuluzría xi'  
bénneache neda'.

Tu zra tu zra dxulusaca zi' bénneache neda', benne' ca'  
dxeledíl-lalęne' neda'.

<sup>2</sup> Te zra chizrela benne' ca' dxeledábage' neda'  
dxulucá'ana dítaje' neda',

lawe' da zaj zra' benne' zante, benne' dxeledíl-lalęne' neda'  
lu xel-la' dxulucá'ana szren cuine'.

<sup>3</sup> Lu zra dxezreba', dxuxrén lazra' Lue'.

<sup>4</sup> ¡Dxuxrén lazra' Dios, na' güe lá'ana' xrtizre'!

¿Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

<sup>5</sup> Xúgutę zra dxuluchuque' xrtizra'.

Ca naca da dxelegú'u be'ę zaj naca na cheę xelunę' chia'  
da caleła.

<sup>6</sup> Dxelezrague', ne dxulucache cuine'.

Dxeleenná' xánnie' ca da dxuna'.

Dxelilaj lazre' ca xelunę' xelútie' neda'.

<sup>7</sup> Dios, bxue ca da dxelunę',

na' dutę xel-la' dxezrá'a chiu' bzria xi' benne' ca'.

<sup>8</sup> Nézqueznu' Lue' ca dxuzrúnnuja' lau benne' ca'.

Bsa lazre' nisa da ba gudxezra'.

¿Quebe zaj naxúaj na lu xiche chiu'?

<sup>9</sup> Gate dxuláwizra' Dios, lu zra ná'queze xuluxuzrunnuj  
benne' ca' dxeledábage' neda'.

Nézquezda' zúalę Dios neda'.

<sup>10</sup> ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Xránadxu, na' güe lá'ana' xrtizre'!

<sup>11</sup> ¡Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

<sup>12</sup> Nabaga' ca da nachebe lazra' chiu', Dios.

Gúl-laqueza' da güe lá'ana' Lue'.

<sup>13</sup> Ba bseláu' bénne'du xu'a lu xel-la' gute,

ne bebéaju' ni'a naga zaj zua cheajlechaze na,

cheę gaca chu'a lau Dios lu xel-la' naxaní' da dxunę'

cheę benne' ca' zaj naca banę'.

## 57

<sup>1</sup> Bexache lazre' neda', Dios.

Bexache lazre' neda', lawe' da dxuxrén lazra' Lue'  
dute lázrdawa'.

Quezru' neda' ca dxun bedxuj dxézreba' zrí'ineba'

- zran xrlába', cadxa te chee da štebe caní.  
<sup>2</sup> Guláwizra' Dios, Benne' zrenté.  
 Guláwizra' Dios chee gácaléne' neda'.  
<sup>3</sup> Naga zúate' xabáa chee' sel-le' nu guselá neda' lu na'  
 bénnea' dxáca lazre' guzríá xi'e neda'.  
 Gusel-la Dios xel-la' dxexache lazre', ne da li chee'.  
<sup>4</sup> Zua' lu da štebe ca tu benne' zue' ládujla bežre xixre' ca'.  
 Xu'a ládujla bénneache zaj naque' ca bežre xixre' ca'  
 dxeláguba' bénneache.  
 Dizra' da dxeleonné' chia' zaj naca na ca tu xia natuche',  
 ne xaga nalá xéche'ze ca',  
 na' xrtizre' zaj naca na ca tu xia da nalále'e.  
<sup>5</sup> Xega'ana szrénquezu' lu xabáa, Dios.  
 Xel-la' szren chiu' sua na lawe' duté xezr la xu.  
<sup>6</sup> Ba zaj nabeche' xralaj chee xelél-le' neda'.  
 Ba dxedú lazra' lu da dxaca chia'.  
 Ba zaj naxene' tu xedxu chee cheajcházia' lu'ule na.  
 Lu'ule da na' ba xeajlecházqueze le'.  
<sup>7</sup> Ba zúatequeze lázrdawa', Dios.  
 Ba zúatequeze lázrdawa' chee gúl-laqueza' da güe lá'ana' Lue'.  
<sup>8</sup> Bebán lazre', bénne'du xu'a, ne le xebán lázrele,  
 le'e dxínnele da dxúl-lalenle, ne da zríadi'i na du.  
 Che zílala chásaqueza'.  
<sup>9</sup> Güe lá'anaqueza' Lue' ládujla bénneache chiu', Xran.  
 Gúl-laqueza' chiu' lau benne' xúguté cue' xezr la xu,  
<sup>10</sup> lawe' da naca xel-la' dxexache lazre' chiu' zrendxa ca xabáa,  
 na' da li chiu' naca na zrendxa ca beuj bza ca'.  
<sup>11</sup> Xega'ana szrénquezu' lu xabáa, Dios.  
 Xel-la' szren chiu' sua na lawe' duté xezr la xu.

## 58

- <sup>1</sup> Le'e dxenná beale ¿da li dxuchálajle da naca xrlátaje?  
 ¿Dxuchi'ale ca naca da li chee bénneache chia'?
- <sup>2</sup> ¡Cabíze'!  
 ¡Lu lázrdaule dxugú'u beale da zrinnaj!  
 ¡Stébele'e dxuzúale bénneache lu xezr la xu chia'!
- <sup>3</sup> Zaj nazrinnaj lázxdau benne' ca' zaj nabéaj xíchaje' neda'  
 gate gulálajte'.  
 Belexase dínnaže' dxelún lazre' gate gulezanté xrne'e le'.  
<sup>4</sup> Dizra' da dxeleonné' zaj naca na da dxelute bénneache  
 ca da zria zran lazxa bela'.  
 Zaj naca na ca bela' snia, be nácaba' be cuezru.  
<sup>5</sup> Quebe dxenba' chi'i benne' dxunné' leba'  
 lácala dxennéle'e xrtandau'.  
<sup>6</sup> Dios, gudichaj lázxa benne' ca'.  
 Gudichaj, Xran, lazxa benne' ca' zaj naque' ca bežre xixre' ca'.  
<sup>7</sup> Ben xelexenítie' ca nisa da dxelalaj na lu xu.  
 Gate dxulusane' xaga nalá xéche'ze chee',  
 ben xeledé na chalá'ala.  
<sup>8</sup> Ben xeledé chee' ca dxaca chee be zaga dxelexexúnaba'.  
 Ben québedxa xelélé'ene' gubizra ca tu bidau' dxálajbe'

ba nátebe'.

<sup>9</sup> Nédxula gate quebe ne la xesu' lu xi' xecá'a Dios benne' ca' tu lu be' bduunu', benne' zaj naca bang', ne benne' ca' zaj zua xelatié'.

<sup>10</sup> Wabé benne' xrlátaje gate lé'eng' xebéaj lazre' Dios benne' ca' dxeluné' da caléla.

Guchuchu guléajé' dxen cheé benne' zaj nabéaj xíchajé' Dios.

<sup>11</sup> Nadxa nñé bénnea': "Da líqueze de lazruj cheé benne' xrlátaje.

Da líqueze zua Dios, Bénnea' dxuchi'e cheé bénneache zaj zré'e lu xezr la xu."

## 59

<sup>1</sup> Bselá neda' lu na' benne' ca' dxeledábague' neda', Dios chia'.

Bselá neda' lu na' benne' ca' dxeluné' chia' da caléla.

<sup>2</sup> Bselá neda' lu na' benne' ca' dxeluné' da zrinnaj.

Bselá neda' lu na' benne' ca' dxelutié' benne',

<sup>3</sup> lawe' da dxelilaj lazre' xelútié' neda'.

Zaj nazraga benne' wal-la ca' cheé xeledíl-lalene' neda',

quegá lawe' da bi zria nabaga', ne quegá ne cheé dul-la nuna' neda', Xran.

<sup>4</sup> Lácala quebe bi bēna' cheé benne' ca',

zá'aca chégüé', ne dxulucueze' bi xeluné' chia'.

Bebán cheé xidu' naga zua', na' le'enu' da dxeluné'.

<sup>5</sup> Lue', Xran, Dios cheé benne' zan dxjaque' wedil-la, ne Dios cheé benne' Israel ca',

bebán cheé gudéu' ba xa' benne' xúgute' cue' xezr la xu.

Quebe xexache lazru' xúgute' benne' ca' dxeledábague' Lue', ne dxeluné' da zrinnaj.

<sup>6</sup> Xelelé'e gate cuía gubizra, ne xelebezre xé'e ca dxelún becu', na' xeléchajé' xezre.

<sup>7</sup> Gunná' xque, da dxuluchálajé' naca na ca da dxelexexébe'.

Dizra' dxelenné' zaj naca na ca xia zaj nalá na,

lawe' da dxelenné': "¿Nuzra xene?"

<sup>8</sup> Lue', Xran, guzrizru' cheé benne' ca'.

Gun lau' cheé benne' xúgute' cue' xezr la xu ca'.

<sup>9</sup> Zaj naca wal-la benne' ca' dxeledábague' neda'.

Cueza lazra' Lue' lawe' da dxucu'uju' neda', Dios.

<sup>10</sup> Dios, Bénnea' dxexache lazre' neda', cuía lawe' lawa' neda'.

Dios guné' le'eda' gaca cheé benne' ca' dxeledábague' neda' ca da dxezá lazra'.

<sup>11</sup> Quebe gutiu' benne' ca', cheé quebe xelal-la lazre'

bénneache chia' ca da gunu'.

Bese dinnaj benne' ca' nen xel-la' waca chiu'.

Lue', Xran, Benne' dxucu'uj netu', ben cheajlecházíe'.

<sup>12</sup> Ben xeledulé' lu xel-la' dxulucá'ana szren cuine', ne cheé dul-la dxeluné' lu da dxuluchálajé',

ne ne cheé dizra' schanni', ne da wēn lazre' da dxelenné'.

13 Bzria xi'e lu xel-la' dxezrá'a chiu'.  
 Bzria xi'e chee québedxa xelezúe'.  
 Dios, bñn xeleque be'ene' dxenná be'enu' zri'ine zre sua Jacob.  
 Dxenná be'u du ca naca xęzr la xu.

14 Dxelelé'e gate dxebía gubizra, ne dxelebezre xęe  
 ca dxelún becu', ne dxeléchaje' xęze.  
 15 Dxeledé' ca benne' dxeledaze', dxelílaje' da xelawe',  
 na' che quebe dxeléljane', na' du xęla dxelawe' zria tue' xetúe'.

16 Neda' gúl-laqueza' chee xel-la' waca chiu',  
 na' che zílala güe lá'ana' xel-la' dxexache lazre' chiu',  
 lawe' da gúcaleñu' Lué'queze neda',  
 ne bcu'uju' neda' gate guzúa' lu da stébele'e.  
 17 Lue' dxutipu' lazra', na' gúl-laqueza' chiu',  
 lawe' da nacu' Lue', Dios, Bénnea' dxucu'uje' neda',  
 ne Dios, dxexache lazru' neda'.

## 60

1 Dios, Lue' ba bzu' netu' chalá'ala, ne bñnu' xeajcházentu'.  
 Bzrá'ale'ñnu' netu'.  
 Na'a bedá gácaleñu' netu'.  
 2 Bñnu' guzrú' xęzr la xu, ne bñnu' bخالaj na.  
 Bexún na naga bخالaj na lawe' da dxebía xi na.  
 3 Bñnu' blé'entu' netu', benne' chiu', da naca stébele'e.  
 Bñnu' guca cheñtu' ca güé'entu' tu da bñ na xeajcházentu'.  
 4 Bnézruju' tu da dxulé'e lau chee benne' dxelezrebe' Lue',  
 Da xeluxre' chee gulé'e lau da naca li.  
 5 Chee xeledá benne' ca' nazrí'iqueznu' Lue',  
 bsel-la le' dute xel-la' waca chiu', ne bene chia'.  
 6 Dios gunné' lu lataj lá'azxa chee': "Wabéquezda' neda'.  
 Gunna' late weaj cheele xęzr la xu chee benne' Siquem,  
 ne gudxixra' cheele xęzr la xu de cuita xęgu Sucot.  
 7 Chia' naca xęzr la xu Galaad, ne chia' naca xęzr la xu  
 chee zri'ine zre sua Manasés.  
 Xęzr la xu chee zri'ine zre sua Efraín naca na ca  
 tu da napa chí'i na xíchaja'.  
 Xęzr la xu chee zri'ine zre sua Judá naca na naga dxenná be'a.  
 8 Xęzr la xu chee benne' Moab naca na ca tu  
 zriga' da xuzru nisa guná'a,  
 na' xęzr la xu chee benne' Edom guchichan' nen zrela'.  
 Si'a ba neza xęzr la xu chee benne' Filistea."  
 9 ¿Nuzra che' neda' chee guzétaja' xęzre da naxechaj na  
 ze'e sibe?  
 ¿Nuzra che' neda' chee guzétaja' benne' Edom ca'?  
 10 ¿Quegá Lue' na' che' u neda', Dios, nacu' Bénnea'  
 bzue' netu' chalá'ala,  
 ne quebe guxeájñu' benne' cheñtu' ca', benne' dxjaque'  
 wedil-la?  
 11 Gúcale netu' chee séquentu' tíl-lalęntu' benne' ca'  
 dxeledíl-lalęne' netu',

lawe' da naca dácheze xelácale bénneache netu'.  
 12 Tu zren nen Dios gundxu tu da zrente,  
 na' Le' gulague' benne' ca' dxeledil-lalene' dxi'u.

## 61

1 Bene, Dios, da dxuláwizra' Lue'.  
 Bze naga da dxuchálajlena' Lue'.  
 2 Zitu' naga zua lazria' dxuláwizra' Lue', lawe' da dxedú lazra'.  
 Guché' neda' naga zua Bénnea' naque' ca tu xi'a xiaj,  
 Bénnea' nácadxe' szren ca neda',  
 3 Nacu' Lue' Benne' nuxrue' neda',  
 ne nacu' ca tu ze'e xiaj da dxucu'uj na neda' lau benne' ca'  
 dxeledábage' neda'.  
 4 Tu súazqueza' lu xu'u lá'azxa chiu'.  
 Sua chawa'a cuitu' Lue' ca zaj zua chawe' bedxuj dxé'enedu ca'  
 zran xrila bedxuj.  
 5 Lawe' da bennu' Lue', Dios, ca da guchebe lazra' chiu',  
 benu' napá' ca da dxelapa benne' ca' dxelezrebe' Lue'.  
 6 Gunu' gaca bana' neda', wenna' bea, zánete' zra.  
 Iza chia' xelaca na ca da zaj naca chee' chupa cuen bénneache.  
 7 Tu súazqueza' lau', Dios.  
 Bcuezza xel-la' dxexache lazre' chiu', ne da li  
 chee' xulucá'ana chawe' na neda', wenna' bea.  
 8 Caníqueze gúl-laqueza' chee' lau' tu chí'izqueze,  
 ne gúnqueza' tu zra tu zra ca da guchebe lazra'.

## 62

1 Tuze nen Dios dxebeza zri lazre' bénne'du xu'a.  
 Léqueze' dxuselé' neda'.  
 2 Tuze Le' dxucu'uje' neda', ne dxuselé' neda'.  
 Naque' Bénnea' dxuxre' neda', na' quebe negue lazra'.  
 3 ¿Ajatezcha' gucuézale da gunle chee' tu benne',  
 na' dxunle ba xen xúgutele guzría xile le',  
 ca dxun tu benne' dxuchínnaje' tu ze'e da ba de' chalá'ala,  
 u tu le'aj da ba guzru'?  
 4 Dxunle tuze dizra' ájazra xebéajle neda' lu xel-la' szren chia'.  
 Nazrí'ile da wen lazre'.  
 Nen dxú'ale dxennele da xrlátaje, san xu'u lárdaule da calela.  
 5 Lue', bénne'du xu'a, guleza lazre' tuze Dios,  
 lawe' da naca Le' Bénnea' dxebeza lazra'.  
 6 Tuze Le' dxucu'uje' neda', ne dxuselé' neda'.  
 Naque' Bénnea' dxuxre' neda', na' quebe negue lazra'.  
 7 Naca Dios Bénnea' dxuselé' neda', ne naque' da ba neza chia'.  
 Naca Dios Bénnea' dxucu'uje' neda', ne Benne' dxuxre' neda'.  
 8 Le cueza lazre' Le' tu chí'izqueze, le'e, bénneache.  
 Le xe'e ca da dxezá lázrele.  
 Naca Dios Bénnea' dxuxre' dxi'u.  
 9 Da líqueze, da dácheze zaj naca bénneache,  
 ne ca tu da wen lazre' benne' zren ca'.  
 Quebe bi dxelé'e tu lu zrgú'unsá.

Zaj nácadxę' zraze ca tu be' da dxecá'a lázredxu.

<sup>10</sup> Quebe guxrén lázrele da sile gate dxexúbele,  
ne quebe gucá'ana szren cuínale cheę da ca' dxebanle.  
Che dxeğula xel-la' gunní'a cheęle, quebe xezaca ba lázrele  
cheę da na'.

<sup>11</sup> Tu lászaze gunná Dios:  
na' chupa lasa benda' da nigá:  
Cheę Dios naca xel-la' waca.

<sup>12</sup> Chiu' Lue', Xran, naca xel-la' dxexache lazre'  
lawe' da dxunézruju' lazruj cheę tu tu bėnneache  
cátęze da zaj nune'.

## 63

<sup>1-2</sup> Dios, Lue' nacu' Dios chia'.

Dxebile bėnne'du xu'a da naca chiu',  
na' bėla' dxen chia' dxezá lazre' na da naca chiu'.  
Naca chia' ca zúaqueza' tu xęzr la xu bizre naga  
quebe bi nisa de.

Dxani'siseze xida' lau Lue' cheę le'eda' xel-la' waca chiu',  
ne xel-la' szren chiu',  
cátęze ba ble'eda' da naca chiu' lu lataj lá'azxa chiu'.

<sup>3</sup> Cháwedxa naca xel-la' dxexache lazre' chiu'  
ca xel-la' nabánqueze.

Cheę le na' güe lá'anaqueza' Lue'.

<sup>4</sup> Caníqueze nnia' chiu' da xrlátaje dxácatę naca bana'.

Cheę gucá'ana szrena' Lau' chísaqueza' na'a.

<sup>5</sup> Xélaje bėnne'du xu'a da naca na ca bęse zrita,  
ne bėla' da dxánnele'e,

na' dutę xel-la' dxebé güe lá'anaqueza' Lue'

<sup>6</sup> gate dxajsá lazra' chiu', ne dea' ga dxata',  
ne gate dxulaba lazra' ca naca chiu' gate dxennaza' chizrela.

<sup>7</sup> Lawe' da dxácalenu' neda', bėle'ęda' cuitu'  
ca dxelún bedxuj dxé'enedu ca' zran xrila bedzuj.

<sup>8</sup> Naca bėnne'du xu'a Lue' tuze.

Nen na'u wal-la nuxru' neda'.

<sup>9</sup> Benne' ca' gulezá lazre' xuluzría xi'e neda'  
cheajlecházie' lataj ba xa'.

<sup>10</sup> Xelebía xi'e lu xia nalá.

Xelaque' da xelagu becu' xixre' ca'.

<sup>11</sup> Neda', wenná bea, beda' lu da naca cheę Dios.

Xegá'ana ba lá'ana nútęteze benne' dxuluchínene' la',  
lawe' da xelexxuj dxu'a benne' ca' dxelennę' da węn lazre'.

## 64

<sup>1</sup> Dios, bęe naga chi'a lawe' da zua' stębe dxuláwizra' Lue'.

Bxue xel-la' nabán chia' lawe' da dxezreba' bi xelún benne' ca'  
dxeledábage' neda'.

<sup>2</sup> Bcache chawe' neda' cheę quebe xelún benne' węn  
da calęla chia' ca da dxelezá lazre',  
ne cheę quebe xelún benne' dxelún da zrinnağ chia'  
ca da zaj nune' xelune' chia'.

- 3 Dizra' dxuluchálaję' zaj naca na ca xia zaj nalálę'e na,  
ne dxeleńńę' schanni' ca dxun tu benne' dxusanę'  
xaga nalá xęche'ze cheę'.
- 4 Caní dxeleńńę' bagácheze cheę xelunę' cheajlechaze  
benne' zaj naque' li lazre'.  
Chaditę dxelunę' na, ne quebe bi dxelezrebe'.
- 5 Dxelunę' ba xuzre xelunę' da zrinnaj da zaj nunę' xelunę',  
na' dxuluzúę' xralaj ca' cheę xełełę' bęńneache,  
dxeleńńę': "¿Nuzra le'e da dxundxu?"
- 6 Dxelílaję' ca zaj naca da zrinnaj xelunę',  
ne dxeleńńá' xáńńię' ca zaj naca na.  
Ca da zaj xu'u xichaj lázrdawę' zaj naca na stębełę'e  
ca zaj naca lázrdauqueze'.
- 7 Dios gunę' benne' ca' wę' nen tu xaga nalá xęche'ze cheę'.  
Chaditę xelu'e xizrawę' zren ca'.
- 8 Dizra' buluchalaj benne' ca' xelún na cheajlecházię',  
na' xelezrebe xúgutę bęńneache gate xełełę'ęńę' benne' ca'.
- 9 Nadxa xelezrebe xúgutę bęńneache, ne xuluzenne'  
ca da nun Dios,  
na' xuluxúnbe'e ca zaj naca da bęńę' Le'.
- 10 Bęqueze benne' xrlátaje lau Xránadxu, ne guxrén lazre' Le',  
na' xelezúa lu da ba neza xúgutę benne' zaj naque' li lazre'.

## 65

- 1 Naca chiu' Lue', Dios, güe lá'anantu' Lue' lu xęzre Sión,  
na' guntu' da guchebe lázrentu' chiu'.
- 2 Lue' dxénqueznu' da dxuchálajęntu' Lue',  
na' xełelá' lau Lue' xúgutę bęńneache.
- 3 Nabágale'a da zrinnaj da bęna',  
san Lue' dxunite lau' ca da gudábagantu' Lue'.
- 4 Ba neza zrentę naca na cheę bęńnea' dxeca'u Lue',  
ne dxenníu' le' gaque' chiu', cheę súaqueze' lataj lá'azxa chiu'.  
Xélajquezentu' da xrlátaje da de lizru', da ca' da zaj de  
xudau' lá'azxa chiu'.
- 5 Lu da xrlátaje chiu' gunu' da zaj naca zrentę gate gunu'  
ca da dxenábantu' Lue', Dios, Benne' dxuselę' netu'.  
Xúgutę bęńneache zaj zra' dutę xęzr la xu dxelebeza lazre' Lue',  
ne cá'aqueze dxelebeza lazre' benne' dxeledęę'  
zítu'la lawe' nísadau'.
- 6 Lué'queze dxuzúa chuchu' xi'a zren ca' nen xel-la' waca chiu'.  
Nácaquezu' Benne' wal-la.
- 7 Dxebeche zriiu' nísadau' gate dxelucu na,  
ne schaga da dxelún xęajxruza cheę na.  
Dxebeche zriiu' benne' xęzr la xu gate dxeledábague' Lue'.
- 8 Cheę le' na' benne' zaj zre'e dutę xęzr la xu  
xelezrebe' ca naca da zrentę da dxunu'.
- Dxuzú' lu da ba neza bęńneache zaj zra' du gab'í xęzr la xu.
- 9 Dxenna'u xęzr la xu, ne dxesel-lu' nisa xiuj.  
Dxunu' dxúńnale'e na lina cheę na.  
Nuzúaquezu' lu xęzr la xu xęgu ca' da zaj dełę'e na nisa.



Dxucuezu' zrua' za da xelagu bėnneache,  
ca ba núnquezu' gaca na.

<sup>10</sup> Dxesel-lu' nisa xiuj naga ba zaj nuneġ' na'.

Dxunu' dxexaca na xu xa'a.

Dxuculu na nen nisa xiuj na'.

Dxunu' dxelegula chawe' da du ca' ba zaj naxaza na.

<sup>11</sup> Dxunu' dxelexezi' bėnneache ba neza tu iza tu iza  
neġ' cheġ da dxunėzruju',

na' ca zaj naca beuj bza chiu' dxelunna na xiuj

da dxun na dxelegula chawe' da zaj naza bėnneache.

<sup>12</sup> Dxelunna na xiuj naga dxeledá be xixre' du ca' da dxeláguba',  
na' dxelebé bėnneache dxelelé' eng' ca bane zaj zua xí'adu ca'.

<sup>13</sup> Lache' ca' zaj zra' zřila' ca',

na' dxu'a xėgudu ca' zaj naxaza zrua' xřila,

na' dxelebezre xa'a bėnneache chiu' dutė xel-la' dxelebé,

ne dxelúl-laqueze' chiu'.

## 66

<sup>1</sup> Le gucá'ana szren Dios dutė xel-la' dxebé,  
le'e zrale dutė xėzr la xu.

<sup>2</sup> Le gul-la ca naca xel-la' szren cheġ le'.

Le gucá'ana szreneġ' gate dxue lá'anale Le'.

<sup>3</sup> Le xė Dios: "Dxebáneleġ'equezentu' ca zaj naca da nunu'."

Neġ' cheġ xel-la' szren cheġ xel-la' waca chiu' xuluzúa  
xřtızru' benne' ca' dxeledábague' lue'.

<sup>4</sup> Xúgute bėnneache zaj zra' dutė xėzr la xu xelúe  
lá'anaqueze' Lue', ne xelúl-laqueze' chiu'.

Tu xelúl-lazqueze' cheġ Láquezu'.

<sup>5</sup> Le da, lé'ele ca zaj naca da nun Dios.

Da zřébedxu zaj naca da beġe' cheġ benne' ca'  
beluneġ' da calela.

<sup>6</sup> Beġe' bexaca nısadau' xu bizre.

Guledé bėnneache cheġ' ní'aze' naga nedxu de tu xėgu situj.

Dxu'a nısadau' na' gubéleġ'edxu lau Dios.

<sup>7</sup> Dutė xel-la' waca cheġ' nna be'e chadıa chacanna.

Dxuxúequeze' ca da dxelún bėnneache dutė xėzr la xu.

Bxunu' dxeledábague' Le' quebe xelezrué'equezne' xel-la' szren.

<sup>8</sup> Le'e, bėnneache, le gucá'ana szren Dios cheġdxu,

ne le guzén bėnneache ca da dxue lá'anale Le'.

<sup>9</sup> Léqueze' bxue' dxi'u cheġ naca bandxu,

ne quebe be'e lataj cheajcházedxu.

<sup>10</sup> Lué'queze bxu' netu' ca da beġtu', Dios.

Bdeu' netu' xel-la' zi' ca dxelún bėnneache dxuludé'  
xia plata lu xi' cheġ xegá'ana chawe na.

<sup>11</sup> Beġu' xeajchú'untu' tu lu xralaj.

Bda'u cúzruntu' tu xua zí'ile'e.

<sup>12</sup> Beġu' guledé xıchajntu' benne' zaj zřie' bzřina' cheġ' ca'.

Gudentu' tu lu xi', ne tu lu nisa situj,

na' bebéaju' netu', ne bzu' netu' tu lataj naga zúantu'  
lu da ba neza.

13 Chú'unqueza' lu xu'u lizru' cheę guzézxea' béadu ca',  
ne gunna' chiu' ca da guchebe lazra' guna',

14 da na' guchebe lazra' ca da gunnia'  
gate guzúa' lu da stébele'e.

15 Guzézxea' béadu ca', be dxelanne lau' Lue',  
ne guna' cuen zren cheę zríla'du ca' lau',  
ne gutia' bezre ca', ne chívo biu ca' lau'.

16 Le da, xénele, xúgutęle dxezrébele Dios,  
na' guzenda' le'e ca da bene' gúcalene' neda'.

17 Du lazra' bláwizra' Le',  
ne bca'ana szrénqueza' Le'.

18 La guzé lazra' tu da calęla,  
quebe ben Xránadxu chia'.

19 Da líqueze bene Dios chí'a.  
Bze nague' ca da gunábeda' Le'.

20 ¡Gaca báqueze Dios!  
¡Quebe bzuę' chalá'ala da bchálajęna' Le',  
san bexache lazre' neda'!

## 67

1 Dios, bexache lazre' netu', ne ben da chawe' cheętu'.  
Dutę xel-la' zri'i lazre' chiu' guzúale netu',

2 cheę xelúnbea bėnneache du gab'i xęzr la xu  
ca naca da dxaca lazru',  
ne cheę xeleneze bėnneache dutę xęzr la xu  
ca dxuseláu' bėnneache.

3 Xúgutę bėnneache dxelúe lá'ane' Lue', Dios.  
Dxelúe lá'ana xúgutę bėnneache Lue'.

4 Le be, ne le sua lu da ba neza, le'e, bėnneache dutę xęzr la xu,  
lawe' da guchi'a Dios cheęle ca naca da xrlátaje,  
ne guxúqueze' xúgutę bėnneache.

5 Xúgutę bėnneache dxelúe lá'ane' Lue', Dios.  
Dxelúe lá'ana xúgutę bėnneache Lue'.

6 Xęzr la xu nigá ba zria na lina cheę na,  
lawe' da ben Dios cheędxu da chawe' cheędxu.

7 Dios ba bene' chawe' cheędxu,  
na' gáteteze dxal-la' xelapa bėnneache Le' ba lá'ana.

## 68

1 Guzé, Dios, ne beše dinnaj benne' ca' dxeledábage' Lue',  
ne ben xuluzrunnuj benne' ca' dxelecuídene' Lue'.

2 Ca dxun tu be', dxulaga na zren cheę xi',  
ca' gulagu' benne' ca'.

Ca dxuna xina' lu xi', ca' xelexenite benne' ca' lau Dios,  
benne' ca' dxelune' da zrinnaj.

3 Xelebé benne' xrlátaje ca', ne xelezúe' lu da ba neza lau Dios,  
ne xelexrítequeze' lu xel-la' dxelebé cheę'.

4 ¡Le gul-la cheę Dios!

¡Le gul-la da du ca' chee Láqueze'!

¡Le gucá'ana szren Bénnea' dx'e' xabáa, nazí le' Jah!

¡Le be lau Le'!

<sup>5</sup> Ca xra bi dx'é'enedu ca', ne ca benne' dxuxúe  
nu'ula ca' zaj zue' tuze,

naca Dios lu lataj lá'azxa naga zúaqueze'.

<sup>6</sup> Dxun Dios xelezúa xrtia ljwezre bénneache quebe nu  
xrtia ljwezre' zaj zra'.

Dxebéaje' benne' zaj xu'e' lu na' benne' zitu' ca'  
chee xelezúe' lu da ba neza.

Benne' ca' dxeledábaga Dios zaj zue' tu lu xezr la xu bizre.

<sup>7</sup> Dios, gate bdxúaju' lau bénneache chiu',

ne gudáu' lu xezr la xu bizre na',

<sup>8</sup> na' guzrú' xezr la xu na'.

Cá'anqueze gúcale'e xiuj lau Dios.

Xi'a Sinaí guzrize na lau Dios,

Dios chee benne' Israel ca'.

<sup>9</sup> Gusel-lu' tu nisa xiuj zílale'e, Dios.

Gate belexedú lazre' bénneache chiu', Lue' btipu' lazre'.

<sup>10</sup> Bénneache zaj naca chiu' zaj zúaqueze' lu xezr la xu chiu'.

Dute da chawe' chiu', Dios, dxuxú' benne' xache' ca'.

<sup>11</sup> Xránadxu Dios gusel-le' tu dizra' chawe',

na' gulezrá' benne' zante, benne' buluzenne' bénneache  
ca naca dizra' chawe' na'.

<sup>12</sup> ¡Buluzrúnnuje'!

¡Buluzrúnnuj wenná bea ca' nen

ca naca benne' chee' dxjaque' wedil-la,

na' benne' ca' zaj nagá'ana lu xu'u lizre' belexequé'e

da bulucá'ana benne' ca' buluzrúnnuje'.

<sup>13</sup> Lácala bcache cuínale naga dxuxúele zrila' ca',

gacu zra lánale da naca na ca xrila bgúgudu ca' da

zaj nazí lechítaje na plata,

na' dube' chee xrílabá' ca' zaj nazí lechítaje na oro.

<sup>14</sup> Gate beşe dinnaj Dios zrente wenná bea ca' lataj na',

na' bexrui bezxe' da bgacu na xi'a Salmón.

<sup>15</sup> Tu xi'a zrente naca xi'a Basán.

Tu xi'a zri'a naca xi'a Basán na'.

<sup>16</sup> ¡Bizr chee na' dxenna'le, le'e, xi'a zri'a ca',

xi'a na' naga dxaca lazre' Dios súaqueze'?

Da líqueze súaqueze Xránadxu lu xi'a na' chadía chacanna.

<sup>17</sup> Da zaj naché' benne' ca' lu wedil-la da napa Dios

zánete cue' gaxúa zaj naca na.

Xránadxu Dios zezé'e xi'a Sinaí chee sue' lataj lá'azxa chee'.

<sup>18</sup> Begüénu' xabáa, zeché'u benne' ca' bebéaju'

lu na' xel-la' gute,

na' guzi'u da chawe' ca' da belunna bénneache,

ne cá'anqueze guzúa da bennu' chee benne' ca'  
 guledábague' Lue',  
 chee súaquezu' ládujla bénneache, Dios, leu' Jah.  
 19 ¡Gaca ba Xránadxu!  
 ¡Tu zra tu zra dxusezrate' dxi'u da chawe' chee'!  
 ¡Naque' Dios, dxuselé' dxi'u!

20 Dios, Bénnea' naque' Dios cheedxu guselé' dxi'u.  
 Léqueze Xránadxu Dios guselé' dxi'u lu na' xel-la' gute.

21 Da líqueze Dios gune' we' xichaj benne' ca'  
 dxeledábague' Le'.  
 Gune' we' xichaj benne' quebe dxulusane' ca zaj naca  
 dul-la da dxelune'.

22 Gunná Xránadxu: "Guna' xezrinle lázrele,  
 xeza'ale lu xi'a Basán.

Guna' xeza'ale lu da situj chee nísadau', xezrinle lázrele,

23 lawe' da guna' guchuchu guléajle dxen chee benne' ca'  
 dxeledábague' le'e,

na' xelelé'e becu' chee dxen chee benne' ca'."

24 Belelé'e bénneache ca guledá bénneache chiu' belúe  
 lá'ane' Lue', Dios.

Dute xel-la' dxelebé gulu'e lataj lá'azxa chiu', Dios,  
 Wenná Bea chia'.

25 Benne' ca' dxelul-la zeajzrie' láwe'la,

na' benne' zaj nu'e da dxulucuezre' zja'aque' bzébela.

Ládujla zjaca nu'ula cuíde'du ca' zaj núxrube'  
 da du ca' dxulusézxebe'.

26 Le güe lá'ana Dios naga zaj nazraga bénneache chee'.

Le güe lá'ana Xránadxu, le'e nácale zri'ine zre sua Israel.

27 Zaj zra' zri'ine zre sua Benjamín na', guque' benne'  
 cuídedxa, na' dxelenná be'e.

Zaj nazraga benne' xíchaje chee zri'ine zre sua Judá na',

ne benne' xíchaje chee zri'ine zre sua Zabulón,

ne benne' xíchaje chee zri'ine zre sua Neftalí.

28 Dios, ble'e lau xel-la' wal-la chiu'.

Bzua chacha, Dios, da na' benu' cheentu'.

29 Ne chee xel-la' szren chee xudau' chiu' da zua na  
 xezre Jerusalén,

xelegú'u benne' wenná bea ca' da xelunne' lau'.

30 Gudil-la benne' dxjaque' wedil-la chee dute xezr la xu

zaj nazrague' chee xeledíl-lalene' Lue',

benne' ca' zaj naque' ca bezre zan ca' nen biadu cheeba' ca',  
 cadxa xuluzúa xúgute' dizra' chiu',

na' xelunne' ca naca xia plata da zaj nape'.

Bese dinnaj benne' dute xezr la xu dxelexezaca ba lazre'  
 xelezúe' lu wedil-la.

31 Xelelá' benne' xíchaje chee xezr la xu Egipto.

Benne' xezr la xu Etiopía xeluné' ba xen xulucá'ana szrene' Dios.

32 ¡Le gul-la chee Dios, le'e zrale du gabí'i xezr la xu!

¡Le gul-la chee Xránadxu!

33 ¡Le gul-la chee Bénnea' dxe'e xabáa na'ala,

da zua na nédxutē!

¡Le nna' xque, wanné', ne zízrajle'ē nne'!

<sup>34</sup> ¡Le nne nápalē'ē Dios xel-la' waca!

¡Lu xel-la' szren chee' dxuxúequeze' benne' Israel ca',

na' zran xabáa nalá' xel-la' waca chee'!

<sup>35</sup> Benne' zrébentu' nacu' Lue', Dios,

naga zu' lataj lá'azxa chiu'.

Dios chee' benne' Israel ca', Léqueze' dxutipe' lazre'

bénneache chee'.

¡Gaca ba Dios!

## 69

<sup>1</sup> Bselá neda', Dios.

Naca' ca tu benne' dxepē' lu nisa.

<sup>2</sup> Naca' ca tu benne' xu'ē lu guzra' situj, ne quebe dxaca se'ē.

Naca' ca tu benne' xu'ē lu nisa sítujle'ē,

na' nisa na' ba dxacu na xíchajē'.

<sup>3</sup> Ba dxajxréqueda' lawe' da ba gunnéle'a, ne ba da lba'a.

Ba dxelátetē lawa' dxenná'a gácalē Dios neda'.

<sup>4</sup> Ba naxándxa benne' dxelecuídenē' neda' ca naxán

xícha xíchaja', ne quebe bi dē bi nuna'.

Zaj naca benne' wál-lalē'ē benne' dxeledábage' neda',

benne' ca' dxuluzría xi'ē neda', ne quebe bi dē bizr chee' na'.

¿Dxal-la' quízruja' da quebe gulana'?

<sup>5</sup> Dios, nézqueznu' Lue' naca da xálaze da nuna',

ne dxelé'equeznu' dul-la da bēna'.

<sup>6</sup> Quebe gu'u lataj xelexedué'e ne chia' neda' benne' ca'

dxuluxrén lazre' Lue', Xrana' Dios szrente.

Quebe gu'u lataj xeleque zréaje ne chia' neda' benne' ca'

dxelebeza lazre' Lue', Dios chee' benne' Israel ca'.

<sup>7</sup> Lawe' da nazrí'ida' Lue' bulucháchalēnē' neda',

na' lu xel-la' stu' zúaqueza'.

<sup>8</sup> Ca tu benne' zitu' naca' lau bi bícha'dau' ca',

ne quebe zaj núnbea bi chee' xrna'a neda'.

<sup>9</sup> Lawe' da dxé'le'a gunne xue chee' lizru' dxal-la na

lu lázrdawa'.

Gate dxelenné' benne' ca' schanni' chiu' Lue', Dios,

naca ca dxelenné' schanni' chia' neda'.

<sup>10</sup> Gudxezra', ne bēna' gubasa, na' bde cuina' xel-la' zi',

na' chee' le na' bulucháchalēnē' neda'.

<sup>11</sup> Cá'anqueze bgacu cuina' zra lana' tuzruj.

Buluzúe' neda' ca tu da dxulé'e na da baxache' zrente.

<sup>12</sup> Gulenné' chia' benne' ca' zaj xu'ē xu'u lawe',

na' benne' ca' dxelezuzre' belún le' chia' lu da belul-le'.

<sup>13</sup> Neda' bláwizra' Lue', Xrana' Dios, lu zra

dxezaca ba lazru' Lue'.

Dios, lu xel-la' dxexache lazre' zren chiu', ne lawe' da

líqueze nacu' weselá cheentu', bene chia'.

<sup>14</sup> Bebéaj neda' lu da stebe zua', naca' ca tu benne'

xu'ë lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuídenë' neda'.

Naca' ca tu benne' xu'ë lu nisa situj.

<sup>15</sup> Quebe gu'u lataj gatia' ca tu benne' xegache' lu nisa situj,  
ne quebe gaca' ca tu benne' chu'ë lu da situj,  
ne quebe gaca' ca tu benne' cheajchazie' tu lu xedxu situj.

<sup>16</sup> Bechebe chia', Xrana' Dios, lawe' da chawe' naca  
xel-la' dxexache lazre' chiu'.

Gudá, gúcale neda', lawe' da zrente naca xel-la'  
dxexache lazre' chiu'.

<sup>17</sup> Gunná' xque ca da dxaca chia' neda', wen zrin chiu'.  
lawe' da zua' lu da stébele'ë, ben ba xuzre xennu' chia'.

<sup>18</sup> Gudá naga zua', ne bselá neda'.

Bselá neda' lawe' da zaj naxánle'ë benne' ca'  
dxeledábage' neda'.

<sup>19</sup> Lue' nézqueznu' ca dxulucháchalëne' neda', ne ca zua'  
lu da stébele'ë, ne ca dxulucá'ana dítaje' neda'.

Dxelé'eqeznu' xúgutë benne' ca' dxelecuídenë' neda'.

<sup>20</sup> Lawe' da dxelún le' chia' dxedú lazra', ne zua' lu da stébe.  
Guleza' nu benne' xexache lazre' neda', san quebe nu chilá'.  
Guleza' nu benne' xelexúe zrene' neda', san quebe nu chilá'.

<sup>21</sup> Bulugawe' neda' da sla',  
na' gate gubíleda', buluxí'aje' neda' da zichaj.

<sup>22</sup> Ca naca laní cheë benne' ca' ben gaca na ca tu  
xralaj naga cheajlecházie',

ne ben xexaca da ba neza cheë' tu da gun na cheajlecházie'.

<sup>23</sup> Ben xelexchul-la xiaj lawe' cheë québedxa xeledé'engë',  
ne ben tu xelexrízrezqueze benne' ca'.

<sup>24</sup> Dute xel-la' dxezrá'a chiu' ble'e benne' ca',  
ne dutë xel-la' xichaj zra'a chiu' be' benne' ca'.

<sup>25</sup> Ben quebe nu chilá' lu xu'u lizre benne' ca',  
ne quebe nu sua lu xëzr la xu cheë',

<sup>26</sup> lawe' da guláu zi' xuzre' bénnea' benu' Lue' we',  
ne dxuluzrízre' ca naca xel-la' zi' dxedé bénnea' be'u Lue'.

<sup>27</sup> Ble'e dul-la da zaj nabaga benne' ca',  
ne quebe gu'u le' lataj xelaque' tuze benne' xrlátaje chiu'.

<sup>28</sup> Busula la benne' ca' lu xiche cheë benne' ca'  
zaj nape' xel-la' nabán,

ne quebe guzúaju' le' naga zaj naxúaj la benne' xrlátaje ca'.

<sup>29</sup> Neda' zua' lu da ba xa', ne lu da stébele'ë.

Bselá neda', Dios, ne bechisa neda'.

<sup>30</sup> Gúl-laqueza' da güe lá'ana' La Dios chia'.

Gucá'ana szrena' Le' nen da dxue lá'ana' Le'.

<sup>31</sup> Da nigá xezaca ba lázredxa Dios ca tu bezre, be gutia' lawe',  
u ca tu me', béadu zaj zua lúzuba', ne xrúguba'.

<sup>32</sup> Xelelé'eqeze benne' baxache' ca' da nigá, na' xelebeng'.

Le biga lau Dios, na' gaca bánquezle,

<sup>33</sup> lawe' da dxene Xránadxu benne' ca' dxelexárzjengë',  
ne quebe dxuzúë' chalá'ala benne' cheë' ca', benne'  
zaj xu'ë lizre xia.

<sup>34</sup> Le güe lá'ana Le', le'e zrale xabáa, ne le'e, zrale lu xęzr la xu,  
ne le'e zrale lawe' nísadau', ne cá'anqueze xúgute  
da zaj naca ban xúgute lataj caní.

<sup>35</sup> Dios guselé' benne' zaj zře'e xęzre Sión,  
ne xexunę' xęzre ca' zaj zra na lu xęzr la xu chee  
benne' Judá ca',  
na' tu xelezúazqueze' na', ne gata' chee' xęzr la xu na'.

<sup>36</sup> Zri'ine zre sua benne' wen zrin chiu' ca', gaca  
chee' xęzr la xu na',  
na' benne' ca' zaj nazri'ine' Lau' Lue' xelezúe' na'.

## 70

<sup>1</sup> Bselá neda', Dios.

Gúcaleche neda', Xran.

<sup>2</sup> Ben xelexedué'e, ne xelezúa lu da stebe benne' ca'  
dxelaca lazre' xelútie' neda'.

Ben xelexebigue', ne xelexala benne' ca' dxelebene'  
lawe' da zua' lu da stebe.

<sup>3</sup> Ben xelexegá'ana xala benne' ca' dxelún le' chia'.

<sup>4</sup> Benne' ca' zá'aque' lau Lue' xelebene',  
ne xelezúe' lu da ba neza.

Benne' ca' dxelé'e Lue': "Xcalenu" lawe' da bseláu' le',  
tu dxelennázqueze': "jZrente naca Dios!"

<sup>5</sup> Zua' lu da stebe, ne nate ni'a na'a.

Gudázega gácalenu' neda', Dios.

Nacu' Weselá chia', ne Xrana'.

Quebe chenu', Xran.

## 71

<sup>1</sup> Za'a lau' Lue', Xran, chee guxrú' neda'.

Ben québedxa xedué'eda'.

<sup>2</sup> Gúcale neda', ne bselá neda' nen dutę da naca xrlátaje chiu'.

Bzę naga chí'a, ne bselá neda'.

<sup>3</sup> Nacu' ca tu xiaj xre naga sua' chawe', na' waca xida'  
naga zu' te zra chizrela.

Gunná be'enu' nu guselá neda', lawe' da nacu' Lue'  
ca tu xiaj xre naga dxaca dipa lazra'.

<sup>4</sup> Dios chia', bselá neda' lu na' benne' ca' zaj nabéaj xíchaje' Lue',  
ne lu na' benne' ca' dxelunę' da calęla ne zaj naque' xichaj zra'a,

<sup>5</sup> lawe' da dxebeza lazra' Lue', Xrana' Dios.

Nacu' Bénnea' dxuxúe' neda' gate nácatea' bídau'tę.

<sup>6</sup> Lue' núxruquezu' neda' gate gúlajtea'.

Lue' bęnu' bdxuaja' lu le'e xrna'a.

jTu güe lá'anazqueza' Lue'!

<sup>7</sup> Belexebane benne' zantę ca naca chia',  
ne ca naca chiu', dxuxúe xánniu' neda'.

<sup>8</sup> Ben tu gul-lazqueza' da güe lá'ana' Lue',  
ne gucá'ana szrena' Lue' du zra.

<sup>9</sup> Quebe guzú' neda' chalá'ala gate ba guxrúa'.

Gate ba bedú lazra', quebe gusanu' neda'.

10 Benne' dxeledábage' neda' dxelenné' chia',  
na' benne' ca' dxelezá lazre' xelútié' neda' belune' tuze dizra',

11 dxelenné': "Ba bsan Dios le'.

Chéajdxu cheajtéladxu le' lawe' da québedxa nu zua  
nu guselá le'."

12 ¡Dios, quebe su' zitu' naga zua'!

¡Dios chia', gudázega gácalenu' neda'!

13 ¡Ben xelexedué'eng'!

"Ben xelexenite benne' ca' dxeledábage' neda'."

"Ben xelezúa xel-la' stu', ne xelege zréaje benne' ca'  
dxelezá lazre' xelune' chia' da calela."

14 Neda' tu cueza lázrezqueza' Lue',

ne tu güe lá'anazqueza' Lue'.

15 Guzenda' bénneache nacu' xrlátaje,

ne tu guzénzqueza' le' ca da beñu' bseláu' neda',

láqueze quebe nezda' bal-la lasa bseláu' neda'.

16 Tu guchálajzqueza' chee da zrente da beñu' Lue',

Xrana' Dios,

ne gusá'a lazre' bénneache chee da xrlátaje cheéquezu'.

17 Dios, Lue' bsédenu' neda' gate nácatea' bidau'te.

Dxulé'eda' bénneache ca naca da zrente da beñu'.

18 Dios, quebe gusán lazru' neda' gate bache guxrúa',

ne ba bgucha'.

Be' neda' lataj guzenda' zri'ine zre sua' ca naca

xel-la' waca chiu',

ne guzenda' bi za xelalaj ca naca xel-la' wal-la chiu',

19 ne ca naca da xrlátaje chiu', da naca na da zrente, Dios.

Lue' ba beñu' da zaj nácale'e na zrente.

Dios, ¿Núzraqueze ca Lue'?

20 Lue' beñu' gudéa' lu da stebe zante, ne lu da calela ca',

na' gunu' xexaca bana', na' da xula xechisu' neda' lu xedxu ba.

21 ¡Gucá'ana szrendxu' neda',

ne xue zrénquezu' neda'!

22 ¡Cá'anqueze güe lá'anaqueza' Lue', quínnia' da gul-lalena'!

¡Dios chia', gúl-laqueza' chee da li chiu', quínnia'

da du' zriád'i na du'!

¡Nacu' Benne' Lá'azxa chee benne' Israel ca'!

23 ¡Sua' lu da ba neza gate gúl-laqueza' chiu' Lue',

ne béqueze bénne'du xu'a, bénne'du' bexa'u!

24 ¡Tu guchálajzqueza' chee da xrlátaje chiu' te zra chizrela,

lawe' da beñu' belexedué'e, ne guleque zréaje

benne' ca' belune' ba xuzre xelune' chia' da calela!

## 72

1 ¡Dios, ben guchi'a wenná bea da dxaca cheentu'

ca dxuchi'aquezu' Lue',

ne ben xelaca xrlátaje zri'ine wenná bea na'!

2 Nadxa le' guchi'a chee bénneache chiu' ca naca

da naca xrlátaje,

ne ca naca da li guchi'e chee benne' chiu' ca' zaj zue'

lu da ba xa'.



- <sup>3</sup> Lu xi'a ca' xebeza zri lazre' bènneache chiu',  
 ne lu xí'adu ca' xelezúe' lu da naca chawe'.  
<sup>4</sup> Guchi'e chee benne' ca' zaj zu'e' lu da ba xa'  
 lu xezre cheentu',  
 ne guselé' bidu ca' chee benne' ca' dxelexázejene',  
 ne guzría xi'e benne' ca' dxulusaca zi'e bènneache.  
<sup>5</sup> Xelezrebe' Lue' dxácatę ne zua gubizra,  
 ne beu' lawe' tu cuen tu cuen bènneache.  
<sup>6</sup> Gaca wenná bea na' ca nisa xiuj da dxaca naga ba nadín,  
 ne ca xrlę'ęla da dxaca dxęla lu xęzr la xu.  
<sup>7</sup> Lu zra chee wenná bea na' gaca da xrlátaje,  
 ne xebeza zri lazre' bènneache dxácatę ne zua beu'.  
<sup>8</sup> Nna be'e dutę xęzr la xu,  
 ne dxu'a xęgu Eufates, ga zrintę dxu'a nísadau'.  
<sup>9</sup> Lau lę' xuluzú zribe benne' ca' zaj zre'e xęzr la xu,  
 na' guzęxruje' lazre' benne' guledábague' Lę'.  
<sup>10</sup> Benne' wenná bea chee xęzr la xu Tarsis,  
 ne wenná bea ca' chee tu tu cue' xęzr la xu zitu' ca'  
 xeledé'e zaj nu'e da xulunézruje' chee',  
 na' benne' wenná bea chee xęzr la xu Sabá,  
 ne wenná bea chee Seba xulunézruje' chee' da gunnía'.  
<sup>11</sup> Xúgutę benne' wenná bea ca' xuluzú zribe' lau lę',  
 na' benne' xúgutę cue' xęzr la xu xelunę' zrin chee'.  
<sup>12</sup> Lę' guselé' benne' ca' dxelexázejene',  
 benne' dxululáwizre' lę',  
 ne guselé' benne' ca' zaj zu'e' lu da ba xa',  
 ne quebe sua nu benne' gácalęne' lę'.  
<sup>13</sup> Xexache lazre' benne' xache' ca', ne benne' ca'  
 dxelexázejene',  
 na' guselé' benne' xache' ca' chee xelaca banę'.  
<sup>14</sup> Xexá'awę' benne' xache' ca' lu na' benne' wen lazre' ca',  
 ne benne' snia ca'.  
 Gunę' ba xuzre guselé' benne' ca' lu na' benne' ca'  
 dxelutię' benne'.  
<sup>15</sup> Gaca ban wenná bea nigá,  
 na' xulunézruje' chee' oro chee xęzr la xu Sabá,  
 na' tu xelenábazqueze bènneache Dios gácalęne' lę',  
 ne te zra chizrela xelenabe' Dios gunę' gaca chawe'  
 chee wenná bea na'.  
<sup>16</sup> Tu zrigadauze zrua' xtila xelaze' lu xęzr la xu,  
 ne lu xí'adu ca',  
 da cuialę'e na ca da dxebia lu xi'a Líbano,  
 na' benne' zaj zre'e lu xęzre ca' xelane' ca xixre' ze lu xęzr la xu.  
<sup>17</sup> Tu súazqueze la benne' wenná bea na'.  
 Tu xuluchálajzqueze' chee la lę' dxácatę ne zua gubizra.  
 Ne chee lę' gaca da ba neza chee bènneache xúgutę  
 cue' xęzr la xu,  
 na' xelenné' chee' naca chee' da ba neza zrente'.  
<sup>18</sup> Xrlátaje naca Xránadxu Dios, Dios chee benne' Israel ca',  
 na' tuze Lę' dxunę' da dxexebánedxu.  
<sup>19</sup> Xrlátaje naca La Lę' da naca na da xabáa chadía chacanna,

na' dutę xęzr la xu nigá xeledé'ene' da xabáa chee'.  
jCa'an naca na, ne ca'an gaca na!

<sup>20</sup> Nigá dxexuzre xrtizra' David, da dxuchálajlene' Dios.  
David nigá naque' zri'ine Isaí.

## 73

<sup>1</sup> Da líqueze ba ben Dios da chawe' chee benne' Israel ca',  
benne' ca' zaj naque' du lazre' lau Dios.

<sup>2</sup> Neda' ba guzúa cheajcházia' lu dul-la.  
Ba guzúa guna' tu da zrinnaj,

<sup>3</sup> lawe' da guca' zre'e lazre' ne chee benne' gunní'a ca',  
gate ble'eda' ca dxelepe ban benne' ca' zaj nabéaj xíchaje' Dios.

<sup>4</sup> Benne' caní quebe zaj zuę' stębe chee xel-la' gute,  
lawe' da zaj zúale'ę chawe'.

<sup>5</sup> Quebe dxeledé' lu da ba xa' ca da dxeledé xúgute benne' ca',  
ne quebe dxelezaca zi'ę ca da dxaca chee xezícadxa bęnneache.

<sup>6</sup> Chee le' na' dxulucá'ana szren cuine'.  
Tu dxelexúbequezne' dxelune' da caleła.

<sup>7</sup> Dxelánnie' lawe' da dxelagu cháwele'ę.  
Dxelezíle'ę ca naca da dxelezá lazre'.

<sup>8</sup> Dxelún le' chee Dios, ne dxelenné' caleła ca da zrinnaj  
da xelune'.

Dute xel-la' dxulucá'ana szren cuina dxuluchálaje' da zrente'.

<sup>9</sup> Dxelenné' chee da ca' zaj zua xabáa,  
ne dxuluchálaje' ca benne' zaj nape' dute xęzr la xu.

<sup>10</sup> Chee le' na' xúgute bęnneache dxelune' le' tu zren,  
ne dxelezi'ę ca da dxelenná benne' gunní'a ca'.

<sup>11</sup> Dxelenná benne' ca' dxelune' da caleła:

“¿Ájazra gaca neze Dios?

¿Dxelé'equeze Bęnnea' zuę' na'ala?”

<sup>12</sup> Benne' caní zaj naque' benne' zaj nabéaj xíchaje' Dios,  
na' dxelepe banę' lu xęzr la xu, ne dxelaque' gunní'a.

<sup>13</sup> Da líqueze, dácheze naca guca' du lazre',  
ne quebe bi da caleła nuna'.

<sup>14</sup> Gudéa' lu da ba xa' tu zra tu zra,  
ne gudéa' xel-la' zi' xúgute zra.

<sup>15</sup> La nnia' neda': Guchálaja' ca dxuluchalaj benne' ca',  
na' si xę'a bęnneachedu ca' chiu', Dios.

<sup>16</sup> Gate blaba lazra' chee chéajni'ida' da nigá,  
guca na stębele'ę chia' neda'.

<sup>17</sup> Gate guxu'a lu lataj lá'azxa chee Dios,  
na' guque be'eda' da gaca chee benne' ca' gate cheajsé.

<sup>18</sup> Da líqueze nunu' chee benne' ca' cheajlecházie',  
ne gunu' xelebía xí'queze'.

<sup>19</sup> Chadite gulebía xí'queze'.  
Belexenite' lu xel-la' gulezrébele'ę.

<sup>20</sup> Zaj naque' ca tu da ble'edxu lu xęla da dxexenite na  
gate dxexebandxu.

Ca'an gaca, Xran, gate chasu', guzú' chalá'ala ca da

gulaca benne' ca'.

21 Gate guca' zre'e lazre' chee benne' ca',  
guzúa lázrdawa' lu da štebe.

22 Lawe' da guca' xichaj zide', na' quebe guxéajni'ida'  
guca' ca tu be xixre' lau Lue'.

23 Tu guzúazqueza' nen Lue', na' guca'u na'a xabela.

24 Bsi'u neda' chee guna' da dxulé'enu' neda',  
na' te nigá xezí' lu na'u neda' lu xabáa chiu'.

25 Quebe nu xetú zua chia' xabáa san tuzu' Lue',  
ne quebe nu xetú dxezá lazra' lu xezr la xu, san tuzu' Lue'.

26 Dxelexedú lazre' bela' dxen chia', ne lázrdawa'.

Dios naque' Benne' dxutipe' lazra',  
ne naque' da ba neza chia' chadía chacanna.

27 Benne' ca' dxelexecuase' naga zu' xelexenítie'.

Guzría xi'u xúgute benne' ca' xelexebeaj xíchajé' Lue'.

28 Ca naca chia' neda', dxaca chawe' chia' lawe' da gubiga'  
lau Dios.

Tu dxebeza lázrezqueza' Xránadxu Dios,  
chee guchálajqueza' ca naca da zrente da nune'.

## 74

1 Dios, ¿tu chí'izqueze nuzú' netu' chalá'ala?

¿Dxezra'u netu', nácantu' ca zrila' chiu' ca'?

2 Bsá lazre' bénneache chiu', benne' ca' guzi'u nédxudaute.  
Benne' ca' bexa'u chee gunu' xelaque' benne' cheéquezu',  
benne' ca' zaj zře'ę lu xi'a Sión nigá, naga zúaquezu' Lue'.

3 Gudá xedajnná'u ca nabía xi' xezre nigá,

ne ca naca da calela da belún benne' ca'  
dxeledábage' netu', lu lataj lá'azxa chiu'.

4 Dxelebezre xa'a benne' ca' dxeledábage' Lue'

laduj naga zaj nazraga bénneache chiu'.

Zaj nuzúę' nigá da dxululé'e na xu'untu' lu na' benne' ca'.

5 Buluzría xi'e xezre nigá,

ca dxun tu benne' dxine' ca naca xaga zaj ze tu xi'a.

6 Na'a nen xa waga chee' ca', ne nen xaga chee' ca',  
ba buluzría xi'e ca naca lechítaje chee xudau' chiu'.

7 Ba buluzézxie' lataj lá'azxa chiu'.

Bulucá'ana dítaje' xu'u lizru'.

Buluchínnaje' na.

8 Lu lázrdawę' gulenné': "Guzría xí'tegadxu na tu chi'ize."

Ba buluzézxie' xúgute xu'u naga bezrágantu' chiu'  
lu xezr la xu chiu'.

9 Québedxa dxelé'entu' da la'azxa ca' da dxululé'e na  
da guchísantu' lu xezr la xu cheentu'.

Québedxa nu chilá' benne' guchálaje' waláz chiu',  
ne quebe nu zua ládujla netu', benne' nézene' bátaqueze lantu'.

10 Dios, ¿Báta cueza na xulucháchalę benne' ca' netu',  
benne' ca' dxulusaca zi'e netu'?

¿Chadía chacanna welenné benne' dxeledábage' lue'

schanni' cheę Lau'?

- 11 ¿Bizr cheę na' quebe dxebéaj lazru' benne' ca'?  
 ¿Bizr cheę na' quebe dxuzríá xi'u benne' ca' dxelune' da caleļa?
- 12 Lue', Dios, nacu' Wenná Bea chia' nédxudaute.  
 Lué'queze dxuseláu' bėnneache dutę xęzr la xu.
- 13 Xel-la' waca chiu' bėnu' nısadau' chupa la'a.  
 Gula'u xichaj bę schanni' ca' lu nısadau'.
- 14 Bzúzruju' xichaj bę schanni' lęba' leviatán,  
 Na' bėnu' gulagu bę xixre' lęba', bea ca' zaj zraba' lu xu bizre.
- 15 Bėnu' gulaj nisa beaj, ne nisa xęgu ca'.  
 Bsebızru' xęgu zri'a ca'.
- 16 Chiu' Lue' naca te zra, ne cá'anqueze chiu' naca dxęla.  
 Lue' bzu' beu', ne gubizra naga dxeledé na.
- 17 Lue' bzu' tu chí'ize ca naca da zaj dę xęzr la xu nigá.  
 Lue' bėnu' beu' la ca', ne beu' zaga ca'.
- 18 Bsa lazre' da nigá: Benne' ca' dxeledábaguę' lue'  
 ba zaj nun lę' chiu' Lue', Xran.  
 Benne' xala ca' ba gulenné' schanni' cheę Lau'.
- 19 Quebe gusanu' lu na' benne' zaj naquę' ca bę snia ca'  
 benne' ca' nazrí'iquezu',  
 ne quebe gal-la lazru' tu chí'ize bėnneache chiu' zaj  
 zue' lu da ba xa'.
- 20 Gunná' ca naca xel-la' wezríá da bėnu',  
 lawe' da gátetęze naca chul-la lu xęzr la xu,  
 na' zaj zra' benne' ca' dxelune' da zrinnaj.
- 21 Quebe gu'u lataj xelegá'ana lu xel-la' stu' benne'  
 ca' zaj zue' lu da baxache'.
- Benne' dxelezaca zi'ę, ne benne' dxelexázrjenę'  
 xelúe lá'ane' Lau'.
- 22 ¡Guzé, Dios!  
 ¡Bėn ca ba gunnáu'!
- ¡Bsa lazre' ca dxelún benne' xala ca', dxelún lę' chiu'  
 te zra te zra!
- 23 Quebe gal-la lazru' ca da gulenná benne' ca'  
 dxeledábaguę' lue'.
- Da schaga dxelún benne' ca' dxeledábaguę' Lue'  
 tu dxėnzqueze na.

## 75

- 1 "Xcalenu'", dxęntu' Lue', Dios: "Xcalenu'."  
 Dxųzentu' bėnneache zúalęnu' netu', ne ba nunu' da ca'  
 dxexebánequezentu'.
- 2 Dxenná Dios: "Ba nuzúa' zra guchi'a cheę bėnneache.  
 Guchi'a ca naca da xrlátaje.
- 3 Lácala xru' dutę xęzr la xu, ne xelezrize xúgute  
 da zaj naca ban na,  
 neda' gúxruqueza' ca naca lane xęzr la xu na'.
- 4 Dxapa' benne' xala ca': Quebe gáwele.  
 Dxapa' benne' ca' dxelune' da caleļa:  
 Quebe gucá'ana szren cuínale.
- 5 Quebe guxrén lázrele xel-la' wal-la cheęle.

Quebe gácale benne' lázxdau zide'."

<sup>6</sup> Quebe za xel-la' szren naga dxalaj gubizra,  
ne naga dxebía na,  
ne quebe za na le'e xixre' lawe' lataj.

<sup>7</sup> Dios naque' Bénnea' guchi'e chee bénneache.

Dxucá'ane' cá'aze tu benne', ne dxucá'ane' szren xetú benne'.

<sup>8</sup> Dios nuxre' tu zriga', da nazrate na xrise uva wal-la,  
da zeaje na xel-la' dxezrá'a chee'.

Dxulálaje' na chee xele'aj benne' ca' dxelune' da calela.  
Xelé'aje' na xebizrtę na.

<sup>9</sup> Neda' guzénquezda' bénneache,  
ne gul-la' da güe lá'ana' Dios chee Jacob.

<sup>10</sup> Le' guchínnajqueze' xel-la' waca chee benne'  
węn da calela ca'.

Gusezrendxe' xel-la' waca chee benne' xrlátaje ca'.

## 76

<sup>1</sup> Zaj núnbea benne' Judá ca' Dios,  
na' ládujla benne' Israel zrentę nácaqueze La Le'.

<sup>2</sup> Lu xęzre Salem zua lataj lá'azxa chee'.  
Lu xęzre Sión zua naga zúaqueze'.

<sup>3</sup> Lataj na' gudíchaje' xaga nalá xéche'ze ca',  
ne xia da dxucu'uj na benne' lu wedil-la,  
ne ca naca da dxuluchíneng' lu wedil-la.

<sup>4</sup> Benne' xabáa nacu' Lue',  
ne Benne' wál-ladxa ca xi'a zri'a ca'.

<sup>5</sup> Xeajlechaze benne' wal-la ca', ne guláse dínnaje'.  
Netú benne' wal-la ca' quebe belexechisa ne'e chee  
xelune' wedil-la.

<sup>6</sup> Dios chee benne' Israel ca', gate gudil-lu' benne' ca',  
guláse dinnaj bzrina' ca', ne benne' gulebię'-ba'.

<sup>7</sup> Nacu' Lue' Benne' zrébedxu.  
<sup>8</sup> Nu benne' gaca se' lau Lue' gate dxezra'u?

<sup>8</sup> Xabáate gunná'u, na' guchi'u chee bénneache.  
Dxelezrebe bénneache lu xęzr la xu, na' dxelebeze'

<sup>9</sup> zra seu' Lue', Dios, chee guchi'u chee bénneache,  
ne chee guseláu' xúgute benne' dxexruj lazre' zaj  
zre'e lu xęzr la xu.

<sup>10</sup> Da líqueze xel-la' dxelezrá'a chee bénneache  
gaca na tu da gucá'ana szren na Lue'.  
Guzúa zriu' xel-la' dxelezrá'a chee bénneache zaj nagá'ane'.

<sup>11</sup> Le chebe lázrele da gunle chee Dios,  
na' le gun da na' chee Xránadxu, Dios chee.  
Xúgute benne' zaj zre'e du gabi'ila xelélé'e,  
na' xulunézruje' da zaj nu'e chee Dios,  
Bénnea' dxezrébedxu.

<sup>12</sup> Guzague' da xu'u lu xichaj lázxdau benne' blau ca'.  
Le' dxuchebe' benne' wenná bea ca' zaj zre'e lu xęzr la xu.

## 77

- 1 Nen chi'a bláwizra' Dios.  
Bláwizra' Dios, na' Lẹ' buzé nague' chi'a.
- 2 Guxu'a lau Xránadxu lu zra guzúa' lu da ba xa'.  
Chizrela guchisa na'a lau Lẹ', ne quebe guzúa' zria'.  
Quebe be'a lataj nu benne' xue zrene' neda'.
- 3 Bsa lazra' chee Dios, ne guzúa' stębe.  
Gudawa' zria lawe', ne bedú lazra'.
- 4 Begúe' bchigala chia'.  
Guzúa' stébele'e, ne quebe guca guchálaja'.
- 5 Blaba lazra' ca naca zra nédxute.  
Ca naca iza zan ca' da ba guledé chee na.
- 6 Bsa lazra' ca naca da bil-la' chizrélala,  
ne blaba lázrequeza' ca zaj naca na, na' gunaba be' xu'a:
- 7 ¿Guzúa Xránadxu dxi'u chalá'ala tu chi'ize  
ne québedxa gácalene' dxi'u?
- 8 ¿Cabátadxu xexache lazre' dxi'u?  
¿Cabátadxu gune' ca da guchebe lazre'?
- 9 ¿Gul-la lázrequeze Dios xexache lazre' dxi'u?  
¿Dxezré'e dxi'u, na' québedxa xexache lazre' dxi'u?
- 10 Nadxa gunnía': Caní dxuna' lawe' da quebe chawe' zua'.  
Chee le na' cheajsá lazra' chee xúgute da zrente  
da ben Dios zrente lu iza ba guledé chee na.
- 11 Cheajsá lazra' chee da zrente ca' da ben Jah.
- Awe', cheajsá lazra' chee da benu' nédxudaute da ca'  
dxexebánentu'.
- 12 Gulaba lazra' ca naca xúgute da ba benu',  
ne guchálaja' ca zaj naca da nunu'.
- 13 Dios, lá'azxa naca da dxusédenu' netu' ca guntu'.  
¿Zua xetú Dios naque' benne' zren ca naca Dios cheentu'?
- 14 Lue' nacu' Dios, dxunu' da ca' dxexebánentu'.  
Blé'enu' xúgute bénneache lu xęzr la xu ca zrente  
naca xel-la' waca chiu'.
- 15 Nen xel-la' waca chiu' bexa'u bénneache chiu',  
zri'ine zre sua Jacob, ne zri'ine zre sua José.
- 16 Xegu nisa ca' belelé'en Lue', Dios.  
Belelé'e xegu nisa ca' Lue', na' belezrébele'e na.  
Cá'anqueze gulezúa stębe nísadau' situj ca'.
- 17 Nisa xiuj zila bdxuaj na lu beuj bza ca',  
ne gulennéle'e guziu', ne gulépele'e xesa.
- 18 Lu be' bđunu' ben guziu' chiu' da gunnéle'e na.  
Bulusaní' xesa guziu' ca naca xęzr la xu.  
Guzúa stębe, ne guzrize xęzr la xu.
- 19 Lawe' nísadau' guza'u,  
ne lawe' nisa zila ca' gudéquezu',  
ne quebe naca bea naga bléaju'.
- 20 Guche'u bénneache chiu' ca zrila' ca'  
lu na' Moisés, ne lu na' Aarón.

## 78

- 1 Le xen, le'e, bénneache chia', ca da dxusédeda'.  
Le xen xanne' ca da dxuchálaja'.
- 2 Guchíneda' dizra' ca da dxuluchalaj benne' sina ca',  
na' guzéajni'ida' le'e da ca' gulezúa na bagácheze gate nate,  
3 da ca' bendxu, ne bénbeadxu na,  
da ca' belixru be'e xra xrtáudxu ca' dxi'u.
- 4 Quebe gucáchedxu na lau zrí'inedxu ca'.  
Guzénquezdxu zrí'inedxu ca' ca naca xel-la' szren  
cheę Xránadxu,  
ne ca naca xel-la' waca cheę', ne ca zaj naca da zren ca'  
da bene'.
- 5 Bzue' tu da nadxixruij bea na da xelún benne' Israel ca',  
ne da bdxixruij be'ene' ca' da xelún zrí'ine zre sua Jacob.  
Gunná bé'ene' xra xrtáudxu ca' xuluzenne' bi cheę' ca'  
ca naca da gunná bé'ene',
- 6 cheę xelúnbea zrí'ine' bidu ca' za xelálajbe' ca naca na,  
na' bi caní xuluzenbe' zrí'inebe' da na',  
7 cheę xuluxrén lázrebe' Dios,  
ne quebe xelal-la lázrebe' da ca' ben Dios,  
ne cheę xuluzúabe' dizra' da ca' gunná be'e.
- 8 Quebe xelácabe' ca gulaca xra xrtáube' ca'.  
Benne' ca' quebe buluzúe' dizra' cheę', ne guledábage' Le',  
ne quebe buluzúa chúchue' ca buluxrén lazre' Dios,  
ne quebe gulaque' li lazre' lu da naca cheę Dios lu  
be' zaj nácaqueze'.
- 9 Benne' zrí'ine zre sua Efraín, benne' zaj nu'e  
da dxuluchínene' lu wedil-la  
buluzrúnnuje' naga dxaca wedil-la.
- 10 Quebe belune' ca naca xel-la' wezría da ben Dios,  
ne quebe buluzúe' dizra' da gunná bé'ene'.
- 11 Gulal-la lazre' da ca' ben Dios,  
ne xel-la' waca ca' blé'ene' Le'.
- 12 Lau xra xrtawe' ca' bene' xel-la' waca ca'  
lu xezr la xu Egipto, ne lu xezr la xu Zoán.
- 13 Gusalje' neza lu nísadau' naga guledé benne' ca'.  
Bene' nísadau' na' ca xi'a ca' chalá'a weaj.
- 14 Te zra blé'ene' benne' ca' neza nen tu beuj bza da xjácálene',  
ne chizrela nen beuj bza da naca na ca tu xi'.
- 15 Gulé'e xiaj ca' naga naca xu bizre,  
na' bxí'aje' benne' ca' nisa da gulaj na le'e xiaj ca'  
ca tu xegu nisa.
- 16 Bene' gulaj tu xegu nisa le'e xiaj na',  
na' bzriluj na ca tu xegu zren.
- 17 Lácala bene' caní belúndxaqueze' dul-la lau Dios  
le'e xixre' lawe' lataj,  
ne guledábage' Dios nape' dutę xel-la' szren.
- 18 Gulegú'u lazre' xulu'zúa zrie' Dios.  
Gulenabę' xelawe' ca da dxelezá lazre' le'.
- 19 Gulenné' cheę Dios, gulenné':  
¿Wazeque Dios na' gunne' da gágudxu le'e xixre' nigá?

- 20 Da líqueze gulé'e xiaj na', na' gulaj nisa na',  
na' bzriluj na ca tu xegu zren.  
¿Wazéquequezne' gunne' dxi'u xeta, ne gunne' belá'  
da gágudxu?
- 21 Chee le' na' bzra'a Xránadxu gate benne' da na',  
ne gusel-le' xi' da bzezxe na bal-la bèneache chee',  
na' bsdexí'ule'e xel-la' dxezrá'a chee' nen benne' Israel ca',  
22 lawe' da quebe guléajle'e chee' Dios,  
ne quebe buluxrén lazre' Le' guselé' le'.
- 23 Gunná bé'ene' beuj zran xabáa,  
ne gusalaje' dxa xu'u chee' xabáa,  
24 na' bene' bxinnaj xeta maná ca dxinnaj xiuj chee'  
gulagu benne' chee' na.  
Bnézruje' le' da naca ca zrua' chee' xabáa.
- 25 Gulawe' da dxelagu gubáz chee' xabáa ca'.  
Gusél-lalé'e da gulawe', na' gulélajtequezene'.
- 26 Bene' guca be' da za' chalá'ala naga dxalaj gubizra,  
ne xel-la' waca chee' bene' guca be' za' chalá'ala  
naga dxedé gubizra beu' zaga,  
27 na' gusel-le' chee' benne' ca' belá' ca ze' bxrte xu,  
béadu zaj zua xrila naxanba' ca xuzre' da dxe' dxu'a  
tu xegu zren.
- 28 Bene' guléxrujba' chale'aj chee' benne' ca'.  
Guléxrujba' dutequeze naga zaj zua xu'u xide chee'.
- 29 Gulawe'-ba', ne gulélajquezene'.
- Dios bnézruje' chie' ca naca da gulaca lazre'.
- 30 Gate quebe ne xelélajene', ne ne dxelawe'-ba',  
31 bzra'a Dios benne' ca',  
na' betie' benne' zaj nácadxe' benne' wal-la,  
ne benne' Israel ca' zaj nácadxe' benne' waca.
- 32 Láqueze bene' caní, na' belúndxaqueze' dul-la,  
ne láqueze belelé'ene' xel-la' waca ca' da bene',  
quebe buluxrén lazre' Le'.
- 33 Chee le' na' guchugue' zra chee' benne' ca' ca  
tu be' dxecá'adxu,  
ne ca zaj naca iza da gulezúe', bdee' le' lu da zi' da xa'.
- 34 Gate betie' bal-la benne' ca', na' xezícadxe'  
belexaque' chee' Dios.  
Belexebí'i lazre', ne du lazre' buluchálajlene' Le'.
- 35 Xeaulesá lazre' naca Dios Benne' dxuxúe' le',  
ne Dios na' nape' dute' xel-la' szren naque' Bénnea'  
bxá'awene' le',
- 36 san quebe guca li lazre' da gulenné'  
lawe' da belún lazre' lau Dios.
- 37 Quebe gulaque' li lazre' nen Le',  
ne quebe beluné' du lazre' ca naca xel-la' wezría chee'.
- 38 Dios hexache lazre' chee' benne' ca',  
ne bnite lawe' dul-la beluné', ne quebe bzria xi'e le'.  
Zane' lásate' bzue' chalá'ala xel-la' dxezrá'a chee',  
ne quebe bzre'e le' dute' ca da dxéquene'.



- 39 Xeajsá lazre' Dios zaj naque' be'la' dxen.  
 Zaj naque' ca tu be' da dxedé na, ne quebe xezrín na.
- 40 Zane' lasa guledábage' Le' le'e xixre' lawe' lataj na,  
 ne zane' lasa buluzúe' Le' baxache'.
- 41 Zane' lasa buluzúe' Dios chalá'ala,  
 ne buluché'e Dios lá'azxa chee' benne' Israel ca'.
- 42 Gulal-la lazre' ca naca xel-la' waca zren chee',  
 ne ca bene' lu zra na' bxá'aweng' le' lu da zi' da xa',
- 43 gate bene' xel-la' waca ca' lu xezr la xu Egipto,  
 ne blé'ene' da ca' da dxebánedxu lu xezr la xu Zoán.
- 44 Bexuné' xegu chee' ca' dxen,  
 na' québedxa guca da xele'aj benne' Egipto ca'.
- 45 Gusel-le' be'a ládujla benne' ca', be buludeba' le' xel-la' zi'.  
 Gusel-le' bluzru ca' buluzría xiba' xezr la xu chee'.
- 46 Gusel-le' biche zu ca' guláguba' lina chee',  
 ne buluzría xiba' da zaj zua lu xezr la xu chee'.
- 47 Gusel-le' xiaj bezxe' zri'a da bzria xi na lba uva chee' ca',  
 ne gusel-le' da zaga da bsebizre na xaga higo chee' ca'.
- 48 Gusel-le' xiaj bezxe' zri'a da bete na be xixre' chee' ca',  
 ne gusel-le' xesa da bete na zrila' chee' ca'.
- 49 Bdee' benne' Egipto ca' lu xel-la' zi' zren,  
 lawe' da bzrá'ale'e benne' ca',  
 na' guca da ca' ca zánete' gubáz ca' chee' xel-la' gute.
- 50 Quebe bzague' xel-la' dxezrá'a chee',  
 ne quebe bnite lawe' chee' chee' quebe xelátie',  
 san betie' le' nen tu xizrawe' wal-la.
- 51 Betie' bi biu nedxu chee' benne' ca',  
 bi biu nedxu ca' chee' benne' Egipto ca'.
- 52 Nadxa beche'e benne' chee' ca' ca tu benne'  
 dxeche'e zrila' ca',  
 ne bsi'e le' le'e xixre' lawe' lataj.
- 53 Bsi'e le' zri'a chawe', ne quebe bi belezrebe',  
 san gulate benne' guledábage' Le' lu nísadau'.
- 54 Beche'e le' lu xezr la xu lá'azxa chee',  
 naga zua xi'a nigá da guca cheéqueze'.
- 55 Bebéaje' benne' zaj zre'e lu xezr la xu na' lau  
 benne' chie' ca',  
 na' gulé'e xezr la xu chee' cha chee' benne' Israel ca',  
 ne bzre'e le' lizre benne' ca' bebéaje'.
- 56 Da xula buluzúe' Dios chalá'ala, ne buluché'e  
 Dios, nape' duté xel-la' szren.  
 Quebe buluzúe' dizra' da ca' gunná be'ene' le'.
- 57 Da xula guledábage' Dios ca belún xra xrtawe' ca'.  
 Gulaque' ca tu bdxequé' xala chee' xaga nalá xéche'ze.
- 58 Buluché'e Le' ne chee' lataj ca' naga bulucá'ana  
 szrene' bedáu' xiaj xaga ca',  
 ne ne chee' bedáu' xiaj xaga chee' ca' bzrá'ale'e Dios.
- 59 Bzra'a Dios gate blé'ene' na,  
 na' gucuídele'ene' benne' chee' ca', benne' Israel.
- 60 Guleaj xíchaje' xu'u xide lá'azxa chee' zua na xezre Silo,

xu'u xide na' guzuáqueze' ládujla benne' ca'.

<sup>61</sup> Be'e lataj belecá'a benne' ca' dxeledábague' dxi'u  
xi'ina lá'azxa chee',

da na' dxulé'e na xel-la' waca, ne xel-la' szren chee'.

<sup>62</sup> Bzre'e benne' chee' ca',  
na' bde'e' le' lu na' benne' ca' belútie' le'.

<sup>63</sup> Benne' wal-la ca' gulátie' lu wedil-la.

Quebe nu zra' benne' wegu', benne' xelezúalene'  
nu'ula wegu' ca'.

<sup>64</sup> Cá'anqueze gulate bxruze ca' lu wedil-la,  
na' nu'ula chee' bxruze ca' quebe gulebezre xache'  
chee' bxruze ca'.

<sup>65</sup> Nadxa guca Xránadxu ca tu benne' dxexeban'e' lu bchigala.

Guque' ca tu benne' wal-la dxebezre xe'e gate ba né'aje'  
xrise uva wal-la.

<sup>66</sup> Na' blague' benne' guledábague' Le',  
ne bca'ane' le' cá'aze chadía chacanna.

<sup>67</sup> Bzue' chalá'ala zri'ine zre sua José,  
ne quebe beque'e' zri'ine zre sua Efraín,

<sup>68</sup> san beque'e' zri'ine zre sua Judá,  
ne xi'a Sión, da na' nazrí'ile'ene'.

<sup>69</sup> Lu xi'a na' bene' xudau' lá'azxa chee',  
da guca na ca naca da zua na xabáa.

Bzua chúchue' na chadía chacanna,  
ca nácaqueze xezr la xu nigá.

<sup>70</sup> Beque'e' David, benne' wen zrin chee'.

Bebéaje' le' naga zaj zra' zrila' ca'.

<sup>71</sup> Beche'e' le' naga zue' dxuxúe' zrila' ca' zaj nache'eba' bedau',  
chee' gague' wenná bea, benne' guxúe' bèneache chee',  
zri'ine zre sua Jacob, benne' zaj naque' benne' Israel ca'.

<sup>72</sup> Dute' xel-la' du lazre' chee' bxue' benne' ca'.

Bxue' le' dute' xel-la' waca zren chee'.

## 79

<sup>1</sup> Dios, ba gulú'u benne' xezr la xu zitu' ca' lu xezr la xu  
chee' bèneache chiu'.

Bulucá'ana dítaje' xudau' lá'azxa chiu'.

Buluzría xi'e xezre Jerusalén.

<sup>2</sup> Bulucá'ane' belá' dxen chee' wen zrin chiu' ca' naga  
gulagu be' zua xrila le'.

Be' xixre' ca' guláguba' belá' dxen chee' benne' ca'  
zaj naque' chiu'.

<sup>3</sup> Ca nisa bululálaje' dxen chee' benne' ca' xúgute' lu neza  
chee' xezre Jerusalén,

ne quebe nu chilá' benne' gucache' benne' ca'.

<sup>4</sup> Benne' xezr la xu walizre' cheentu' ca'  
dxulucháchalene' netu'.

Benne' zaj zre'e' xezre walizr ca' dxulucá'ana dítaje' netu',  
ne dxelún le' cheentu'.

<sup>5</sup> ¿Bata cuézaqueze gaca caní cheentu', Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezrá'a chiu' ca tu xi'?

<sup>6</sup> Bzra'a benne' xęzr la xu ca' quebe zaj núnbe'e Lue',  
na' benne' xęzr la xu ca' quebe dxululáwizre' Lue',

<sup>7</sup> lawe' da ba buluzría xi'e zri'ine zre sua Jacob,  
ne bulucá'ana dítaję' xu'u lizre benne' ca'.

<sup>8</sup> Quebe gusebagu' netu' ca naca da zrinnaĵ da belún  
xra xrtauntu' ca'.

Gudázega xexache lazru' netu', lawe' da dxezraga láule'entu'.

<sup>9</sup> Gúcale' netu', Dios, nacu' Bénnea' dxuselę' netu',  
cheę gaca ba Lau'.

Bselá netu', ne bnite lau dul-la nuntu' cheę xegá'ana szren Lau',

<sup>10</sup> lawe' da xelenna bénneache: "¿Ga na Dios cheę benne' ca'?"  
Bebéaj lazre' benne' ca' belútię' węn zrin chiu' ca'.

<sup>11</sup> Caní bęn cheę xeledé'e xúgute' benne' chiu' ca' zaj xu'e  
lu na' benne' ca' dxeledábague' netu'.

Dutę xel-la' waca zren chiu' bselá benne' ca' ba zaj nachugue'  
cheę' xelatię'.

<sup>12</sup> Bunezruĵ cheę benne' xęzr la xu walizre' cheęntu'  
ca' xegazre cue'

ca da calęla da belune', bulucá'ana dítaję' Lue', Xran.

<sup>13</sup> Netu', bénneache chiu', nácantu' ca zrila' chiu' ca',  
güe lá'anaquezentu' Lue' chadía chacanna.

Tu cuen tu zri'ine zre suantu' gúl-laquezentu' da  
güe lá'anantu' Lue'.

## 80

<sup>1</sup> Bene cheęntu', Lue' dxuxú' benne' Israe' ca',  
Lue' na', dxuxú' zri'ine zre sua José ca zrila'du ca',  
ne dxe'u lataĵ blau chiu' da zua na lávela querubín ca'.

<sup>2</sup> Ble'e xel-la' szren chiu' lau zri'ine zre sua Efraín,  
ne Benjamín, ne Manasés.

Ble'e xel-la' waca chiu', ne gudá guseláu' netu'.

<sup>3</sup> Beché' netu', Dios.

Bexache lazre' netu', na' lantu'.

<sup>4</sup> Xránantu' Dios, napu' dutę xel-la' waca,

¿bata chájsequeze zra'u netu',

ne quebe xennu' ca da nábantu' Lue'?

<sup>5</sup> Bzúale'u netu' lu xel-la' dxewí'ine lazre',  
ne bzílale'u nisa dxebézrentu'.

<sup>6</sup> Be'u lataĵ xęzr la xu walizre ca' bulucá'ana dítaję' netu',  
na' benne' ca' dxeledábague' netu' belún le' cheęntu'.

<sup>7</sup> Beché' netu', Dios, napu' dutę xel-la' waca.

Bexache lazre' netu', na' lantu'.

<sup>8</sup> Bebéaju' tu zrigu' lba uva lu xęzr la xu Egipto da naca na  
bénneache chiu'.

Blagu' benne' xęzr la xu gulezré'e nigá, na' guzu' nigá  
zrigu' lba uva na'.

<sup>9</sup> Gú'unu' lba uva na' cheę gula na.

Bdéle'e lue zrigu' lba uva na', na' gucu na xęzr la xu na'.

<sup>10</sup> Gulú'u na zrul-la xúgute' xi'a ca',

na' zruze na ca' gulegú'u na zrul-la xaga cedro zren ca'.

- 11 Gulechiluj zruze na, belezrinte na dxu'a nísadau',  
ne belezrinte na dxu'a xegu Eufrates.
- 12 ¿Bizr chee na' gucá'u le'aj da naxechaj na le na?  
Na'a xúgute benne' dxeledé na' dxelebané' da zixre chee na.
- 13 Dxuluchuchu dxululéaj cuche xixre' ca' lba uva na',  
na' be xixre' ca' dxeláguba' na.
- 14 Bedá cheentu', Dios, napu' dute xel-la' waca.  
Gunná' netu' ga na' zu' xabáa, ne gudá xedajnná'u lba uva chiu'.
- 15 Gudá, guseláu' lba uva nigá, da gúzaquezu'.
- Bechuj chee lba uva na', ba bzua chuchu' gaca na chiu'.
- 16 Benne' ca' dxeledábague' netu' ba gulechúgue' lba na',  
ne ba guládué' na xi'.
- Gunná' benne' ca' lu xel-la' dxezrá'a chiu',  
ne bzria xi' benne' ca'.
- 17 Bzua chuchu, ne bxue benne' ca' ba guca'u,  
benne' xezr la xu na' ba nuzúa chuchu'.
- 18 Cabátadxa cueaj xíchajntu' Lue' xecha lasa.  
Bache chawe' netu', naca bantu', na' güe lá'anantu' Lau'.
- 19 Xránantu' Dios, napu' dute xel-la' waca, beché' netu'.
- Bexache lazre' netu', na' lantu'.

## 81

- 1 Lu dute xel-la' dxebé le gul-la chee Dios, Bénnea' dxutipe'  
lázredxu.  
Lu da ba neza chee le cuezre xa'a lau Dios chee  
zri'ine zre sua Jacob.
- 2 Le gul-la, ne le capa xídedau'.
- Le quinne xrtan da con zríadi'i na du, ne da dxúl-lalénle.
- 3 Le gucuezre luzu da dxulucuezre' gate naca beu' dxe'ene,  
da naca na zra nuzúadxu gundxu laní lá'azxa.
- 4 Naca na tu da dxun na ba xen xelún benne' Israel ca',  
da bdxixruj bea Dios xelún zri'ine zre sua Jacob.
- 5 Bzue' na ca tu da gulé'e lau na zri'ine zre sua José  
gate beledxúaje' lu xezr la xu Egipto,  
naga benda' tu xrtizra' bénneache da quebe guxéajni'ida'.
- 6 Gunná Dios: "Begúa' xua' da buludé'e' benne' chia' ca'.  
Bsezrá'a benne' chia' ca' da zi'i."
- 7 Lu da ba xa' da guzúale, bláwizrale neda', na' bselá' le'e.  
Bechéba' chee le naga nagacha' lu beuj bza gate na'  
gunnéle'e' guziu',  
na' bxua' ájala gunle naga zaj de beaj nisa zaj nazí le Meriba.
- 8 Le xene, bénneache chia', na' gusízreda' le'e.  
Le'e, benne' Israel, che dxaca lázrele sile da dxennía',
- 9 quebe gápale tu díos chee benne' xula,  
ne quebe guzú zríbele lau tu díos chee benne' zitu'.
- 10 Neda', Xránale, naca' Dios chee le.  
Bebéaja' le'e lu xezr la xu Egipto.  
Le salaj dxú'ale, na' gunna' da gágule.
- 11 Bénneache chia' quebe belúe lazre' da gunnía'.  
Benne' Israel ca' quebe gulaca lazre' xelezi' lu ne'e neda'.

12 Chee le na' bsana' benne' ca' lawe' da gulaque'  
láxzdau zide'.

Belune' ca da guléquene' xrlátaje.

13 Che la gulebé' gunne xue bénneache chia' chee da gunnía',  
ne che la belún benne' Israel ca da ble'eda' le'.

14 na' chadite bzria xi'a benne' guledábague' le',  
ne gudíl-lalena' benne' guledíl-lalene' le'.

15 Che la belún benne' Israel caní,  
na' benne' ca' dxelecuídené' Xránadxu buluzúe' xrtizre',  
(san chadía chacanna zaj nabague' zria),

16 na' Dios gune' xelawe' zrua' xtila cháwedau',  
ne gune' xelélajquezne' nen bzrína'dau'.

## 82

1 Zua Dios naga zaj nazraga benne' dxuluchi'e chee bénneache chee'.  
Dios dxuchi'e chee benne' ca' dxuluchi'e chee bénneache.

2 Dxenná Dios: "¿Bátadxa guchí'ale chee bénneache chia' da quebe naca  
xrlátaje,

ne gápale ba lá'ana benne' ca' zaj nabéaj xíchaje' Dios?"

3 Le gácale benne' xache' ca', ne bidau' wezebe ca'.

Le gun da xrlátaje chee benne' baxache' ca'  
ne chee benne' ca' dxelexázejene'.

4 Le guselá benne' ca' dxeledéé' lu da ba xa',  
ne benne' ca' quebe bi zaj napé'.

Le guselá benne' ca' lu na' benne' ca' zaj nabéaj xíchaje' Dios.

5 Quebe bi zaj nézene', ne quebe dxeléajni'ine',  
na' dxeledéé' lu da chul-la.

Dxuluzrizre' ca naca da zaj de lu xezr la xu.

6 Neda' gunnía': Le'e nácaquezle ca dios ca',  
ne nácale xúgutele ca zrí'inequeze Dios szrente,

7 Wátele ca dxelate xezícadxa bénneache,  
na' cheajcházele ca cheajchaze núteteze benne' dxenná be'e.

8 ¡Guxasa, Dios!

¡Bchi'a chee bénneache zaj zra' lu xezr la xu,  
lawe' da naca duté xezr la xu chiu' Lue'!

## 83

1 ¡Dios, quebe sua zriu'!

Quebe su' zrize, Dios, ne quebe gusezxuj dxu'u,

2 lawe' da dxelebezre xa'a benne' ca' dxeledábague' Lue',  
ne dxulucá'ana szren cuina benne' ca' dxelecuídené' Lue'.

3 Bagácheze ba zaj nune' tuze dizra' bi xelune' chee bénneache chiu',  
ne ba zaj nune' bi xelune' chee benne' ca' dxuxúequezu' Lue'.

4 Gulenné': "Le chu'u, guzría xidxu benne' ca'  
chee québedxa xelaque' tu cue' xezr la xu,  
ne québedxa nu sua benne' cheajsá lazre' la Israel."

5 Ba belune' tuze dizra'.

Zaj nune' tuze dizra' xeledábague' Lue'

6 benne' Edom ca', ne benne' Ismael ca',  
ne benne' Moab ca', ne benne' zri'ine zre sua ca' Agar,

7 ne benne' Gebal ca', ne benne' Amón ca', ne benne' Amalec ca',  
ne benne' Filistea ca', ne benne' zaj zre'e xezre Tiro.

8 Cá'anqueze benne' Asiria ca' zaj nune' le' tuze.

Xúgute benne' caní dxelune' zrin chee zri'ine zre sua Lot.

9 Ben chee benne' caní ca benu' chee benne' Madián ca',  
ne ca benu' chee Sísara, ne ca benu' chee Jabín dxu'a xegu Cisón,

10 benne' ca' gulátie' lu xezr la xu Endor,  
na' belexaque' ca xrche'e bezre da gun na bebe lu xezr la xu.

11 Ben gaca chee benne' blau ca' chee benne' caní  
ca guca chee Oreb, ne chee Zeeb,

ne ben gaca chee benne' dxelenná bé'ene' benne' caní  
ca guca chee Zeba, ne chee Zalmuna,

12 lawe' da gulenná benne' caní: "Gaca cheedxu xezr la xu  
naga zaj zra' bèneache chee Dios."

13 Dios chia', ben xelaque' ca xizre bebe da dxua be' gate dxedube na.  
Ben xelaque' ca xrlácue xia xéladu ca' da dxua be' bdunu'.

14 Ca dxun tu xi' da dxuzezxe na tu xi'a zren,

ne ca dxun xi' da dxuzezxe na tu din zren,

15 ca'an gudáu zi' xuzre benne' caní tu lu be' bdunu',  
ne bchebe le' nen tu be' bdunu' chiu'.

16 Ben xelexedué' ele' ene',  
ne ben xelape' Lue' ba lá'ana, Xran.

17 Ben xelexeque zréajene' ne xelezúa stébele'e tu chí'izqueze.  
Ben xelexegá'ana dítajé', ne xelexenítie'.

18 Ben xelexúnbe'e nacu' Lue' Xránantu' Dios.

Tuzu' Lue' nacu' Dios zrente lawe' duté xezr la xu.

## 84

1 Nazrí'ile'eda' xudau' chiu' Lue', Dios, napu' duté xel-la' waca.

2 Dxaca lázrele'eda' sua' ga na',  
ne dxezá lazra' sua' lu xudau' chiu', Xran.

Duté da naca', ne duté lázrdawa' dxul-la' chiu' Lue', Dios ban.

3 Ba belún chjegu ca' xrú'uneba',  
na' buchuj ca' zaj de lataj naga dxuluzríaba' biadu cheeba' ca'  
naga zua lu cugu chiu' Lue', Dios, napu' duté xel-la' waca.

Nacu' Lue' Wenná Bea chia', ne Dios chia'.

4 Ba neza zrente naca na chee benne' ca' zaj zre'e xudau' chiu'.  
Chadía chacanna xelúe lá'anaqueze' Lue'.

5 Ba neza zrente naca na chee benne' ca',  
Lue' dxuzúa chuchu' le',  
benne' ca' dxelezá lazre' chjaque' xi'a lá'azxa chiu', xi'a Sión.

6 Gate dxeledé' lache' bizre nazí le na

Lache' Nisa Dxebézredxu,  
dxexaca na lataj naga dxalaj nisa,  
na' gusezrá nisa xiuj ca zaj naca beaj ca'.

7 Dxelácadxé' benne' wal-la dxácaté ne zaj xu'e neza  
lawe' da xelexé'ene' Dios lu xi'a lá'azxa chee', xi'a Sión.

8 Bene, Xran, ca naca da dxenaba' Lue', Dios, napu' duté xel-la' waca.  
Bene, Dios, nacu' Dios chee Jacob.

9 Ben da xrlátaje chee benne' wenná bea cheentu', Dios,  
benne' wenná bea na' guca'u Lue'.

10 Cháwedxa naca sua' tu zraze lu xudau' chiu'  
 quézcala sua' chi gaxúa iza naga xula.  
 Dxaca lazredxa' sua' dxa xu'a xudau' cheę Dios chia'  
 ca tu benne' nada'u,  
 quézcala súaqueza' tu lizra' zaca naga quebe zua Dios.  
 11 Xránadxu Dios naque' Benne' dxuxúę' dxi'u,  
 ne Benne' Wenná Bea xabáa cheędxu.  
 Dxunę' dxi'u da chawe' dutę xel-la' zri'i lazre' cheę',  
 ne dxunę' dxelapa bénneache dxi'u ba lá'ana.  
 Quebe xezúene' zi' gunę' da chawe' cheę benne' ca' zaj naque' du lazre'.  
 12 ¡Dios, napu' dutę xel-la' waca!  
 ¡Ba neza zrentę naca na cheę benne' ca' dxuluxrén lazre' Lue'!

## 85

1 Benu' da xrlátaje cheę bénneache chiu', Xrana' Dios.  
 Benu' belexelá zri'ine zre sua Jacob,  
 benne' ca' guluę lu na' benne' zitu' ca'.  
 2 Bnite lau' da zrinnaj da belún bénneache chiu'.  
 Bdeu' chalá'ala ca zaj naca dul-la cheę benne' ca'.  
 3 Bzua zriu' xel-la dxezrá'a chiu',  
 ne bsanu' xel-la' xichaj zra'a chiu'.  
 4 Ben xezúantu' lu da ba neza cheę xel-la' weselá chiu', Dios,  
 ne québedxa zra'u netu'.  
 5 ¿Tu chí'izqueze zra'u netu'?  
 ¿Wazrá'aquezu' tu cuen tu cuen zri'ine zre suantu'?  
 6 ¿Québedxa gunu' xexaca bantu',  
 cheę súantu' lu da ba neza lau Lue'?  
 7 ¡Xran, bexache lazre' netu', ne bselá netu'!  
 8 Guzé naga' da nne Xrana' Dios.  
 Nne' da guzúa na bénneache cheę'  
 lu xel-la' dxebeza zri lazre',  
 cheę québedxa xelún benne' lá'azxa cheę' da xálaze.  
 9 Da líqueze Le' zúatequeze' guselé' benne' ca' dxelezrebe' Le',  
 cheę sua da xabáa cheę' lu xęzr la xu cheędxu.  
 10 Zaj nazraga xel-la dxexache lazre', ne da li cheę Dios.  
 Zaj naca tuze da xrlátaje, ne xel-la' dxebeza zri lazre'.  
 11 Da li cheę' gusezrá na xęzr la xu nigá,  
 na' sel-le' da xrlátaje cheę' da za xabáa.  
 12 Xránadxu gúnnaqueze' dxi'u da cháwedau',  
 na' gúnnałę'ę xęzr la xu cheędxu.  
 13 Nu benne' naque' xrlátaje waca xezrine' lau Dios,  
 na' gunę' gundxu ca da ba blé'ene' gundxu.

## 86

1 Bze naga, Xran, ne bene chia',  
 lawe' da zua' lu da ba xa', ne dxexázrjeda'.  
 2 Bxue neda' lawe' da naca' chiu'.  
 Bselá neda', Dios chia', naca' wen zrin chiu',  
 ne dxuxrén lazra' Lue'.  
 3 Bexache lazre' neda', Xrana' Dios,  
 lawe' da dxuláwizra' Lue' te zra chizrela.

- 4 Ben béle'eda neda', wen zrin chiu',  
lawe' da dxuzúa cuina' lau Lue', Xran,  
5 na' Lue', Xran, nacu' xrlátaje, ne dxunite lau' cheętu'.  
Zúatequezu' xexache lazru' benne' ca' dxululáwizre' Lue'.  
6 Xrana' Dios, bene da dxuchálajęna' Lue',  
ne bęę naga ca da dxenaba' lau'.  
7 Lu zra sua' lu da stébele'ę wannéqueza' Lue',  
lawe' da dxexechébequezu' Lue' chia'.  
8 Xran, quebe nu chilá' Dios ca Lue',  
ne quebe nu dxun ca da dxunu' Lue'.  
9 Xelelá' bėneache dutę xęzr la xu da bėnu' Lue',  
na' xelúe lá'anaqueze' Lue', Xran,  
ne xulucá'ana szreńę' Lau' Lue',  
10 lawe' da nacu' Lue' szren, ne dxunu' da dxexebánentu'.  
Tuzu' Lue' nacu' Dios.  
11 Bseđe neda' da dxaca lazru' guna', Xrana' Dios,  
na' guna' ca naca da li chiu'.  
Gunná be'e lázrdawa' cheę zreba' La cuinu'.  
12 Dutę lázrdawa' güe lá'anaqueza' Lue', Xrana' Dios,  
ne gucá'ana szrėnqueza' Lau' chadía chacanna,  
13 lawe' da zúatequezu' xexache lazru' neda',  
ne bseláu' bėnne'du xu'a lu lataj ba xa'.  
14 Dios, belasa benne' dxulucá'ana szren cuinę',  
ne dxeledábague' neda',  
na' benne' xichaj zra'a ca' belunę' tuze dizra' xelútię' neda',  
ne quebe dxelezrebe benne' ca' Lue'.  
15 Lue', Xrana', nacu' Dios dxexache lazru' netu',  
ne nacu' zren lazre',  
ne quebe dxezrá'azeu', san zúatequezu' xexache lazru' netu',  
ne nacu' li lazre'.  
16 Gunná' ca naca chia', ne bexache lazre' neda'.  
Benna chia' neda', wen zrin chiu', xel-la' waca chiu',  
nā' bxue neda', zri'ine nu'ula wen zrin chiu'.  
17 Ble'e neda' tu da gaca bea na gaca chawe' chia',  
ne bėn xelelé'e benne' ca' dxelecuídenę' neda' da na',  
ne bėn xellexedué'ene',  
lawe' da nacu' Lue', Xrana' Dios, Bėnnea' gúcalenę' neda',  
ne bexúe zreńę' neda'.

## 87

- 1 Lane xęzre Sión zria na lu xi'a lá'azxa.  
2 Nazrí'idxa Xránadxu Dios lataj naga dxuluchi'a benne' zaj zre'ę xęzre Sión,  
ca nazrí'ine' xúgutę xu'u lizre zri'ine zre sua Jacob.  
3 Da xrtante' ca' dxelenná bėnneache ca naca xęzre cheę Dios.  
4 Cheajsá lazra' lu xęzr la xu Egipto, ne lu xęzr la xu Babilonia  
ga na' zaj zra' bėnneache zaj núnbe'ę neda'.  
Le nna' xque, lu xęzr la xu Filistea, ne lu xęzre Tiro, ne lu  
xęzr la xu Etiópia gulalaj benne' caní zaj naque' chia'.  
5 Ca naca cheę xęzre Sión nnia':  
Benne' nigá, ne bėnnea' gulálaje' ga na', na' neda',  
Dios zrente, guzúa chúčhua' xęzre na'.



6 Gate gulaba Xránadxu Dios benne' ca' zaj naque' chee',  
nne': "Benne' nigá gúlaje' lu xezre na'."

7 Benne' ca' dxelul-le', ne benne' ca' dxeline' xide xelenné':  
Ca naca da ba neza zúantu' lu xezre na'.

## 88

1 Xran, nacu' Dios dxuseláu' neda'.  
Te zra, ne chizrela dxuláwizra' Lue'.

2 Bene da dxuchálajlena' Lue',  
ne bze naga da dxuláwizra' Lue'.

3 Dxedú lazra' lu da calela ca' da dxaca na chia',  
ne ba zua' gatia'.

4 Dxeleque bèneache neda' ca tu benne' gate,  
lawe' da dxátele'e ni'a na'a.

5 Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj de' xedxu ba ca',  
benne' ca' québedxa dxajsá lazru', Dios,  
ne québedxa zaj xu'e lu na'u Lue'.

6 Dxaca chia' cáteze ba nuzú' neda' tu xedxu zren  
naga naca chul-la, ne nácale'e situj.

7 Dxequeda' dxezrá'le'u neda'.

Da dxaca chia' naca na ca dxazia' zran xeajxruza zri'a  
chee' nísadau'.

8 Benu' belexebiga bi ljwezra' ca' naga zua'.  
Benu' neda' ca tu da dxusegute na benne' ca'.

Naca' ca tu benne' xu'e lizre xia ne quebe gaca xedxúaje'.

9 Dxelechul-la xiaj lawa' ne chee' da dxezi dzezaca'.

Xúgutę zra dxuláwizra' Lue', Xrana' Dios.

Dxechisa na'a lau Lue'.

10 ¿Dxúnquezu' xel-la' waca chee' xabáa dxácalęnu'  
benne' gate ca'?

¿Dxelexasa benne' gate ca' dxelúe lá'ane' Lue'?

11 ¿Dxuluchalaj benne' zaj nagache' lu xedxu ba chee'  
xel-la zri'i lazre' chiu',

na' dxuluchalaj chee' da li lazre' chiu' benne' zaj xu'e  
lataj chul-la chee' benne' gate ca'?

12 ¿Welexúnbea benne' zaj xu'e lataj chul-la na' ca  
naca da zrente' da dxunu',

na' welexúnbea benne' zaj xu'e naga quebe nu dxajsá lazre' le'  
ca nacu' xrlátaje?

13 Neda' dxuláwizra' Lue', Xrana' Dios.

Xúgutę zila dxezrín lau' da dxenaba' Lue'.

14 ¿Bizr chee' na' dxebéaj xíchaju' neda', Xran?

¿Bizr chee' na' quebe dxenná'u neda' chee' gácalęnu' neda'?

15 Dxezi dzezaca', ne ba zua' gatia'.

Nácatea' bi cúde'tę dxedéa' xel-la' zi' da dxudeu' neda',  
na' dxedú lazra'.

16 Dxequeda' dxezrá'le'u neda'.

Da dxuchebu' neda' ba bsedú na lazra'.

17 Zaj naxečaj da caní neda' du zra.

Dxulusaca zi na neda' gáteteze na'.

18 Benu' belexebiga bi ljwezra' ca' naga zua',  
na' tuze da naca chul-la dxedále na neda'.

## 89

1 Tu gúl-lazqueza' cheę xel-la' zri'i lazre' chiu', Xran.  
Guzenda' tu cuen tu cuen zri'ine zre súantu' nacu' li lazre'.

2 Nezda' tu súazqueze xel-la' zri'i lazre' chiu',  
ne chadía chacanna zua xel-la li lazre' chiu',  
cáteze zúaqueze xabáa.

3 Lue' gunnáu': "Bena' xel-la wezría nen bénnea' ba gucá'a.  
Guchebe lazra' cheę David, wen zrin chia',

4 gunnia': Guna' tu cháazqueze zri'ine zre su'.  
Guna' xelenná be'ę tu chí'izqueze lu waláz chiu'."

5 Benne' zaj zra' xabáa dxelúe lá'ang' Lue',  
ne cheę da zrente' ca' da dxunu', Xran,  
ne ne cheę xel-la' li lazre' chiu', naga zaj nazrague'.

6 Quebe nu zua xabáa, benne' naque' ca Lue', Xran.  
Quebe nu zua benne' szrente', benne' naque' ca Lue'.

7 Benne' zaj zra' xabáa dxelape' Dios ba lá'ana,  
na' xúgute' benne' ca' zaj nazraga cheę' dxelezrebe' Le'.

8 Xran, nacu' Dios cheę benne' zante', benne' zaj zra' xabáa.

Quebe nu zua, benne' naque' ca Lue', Xran.  
Nacu' Benne' wál-late, ne tu nácazquezu' li lazre'.

9 Xu'u lu na'u xeajxruza zren cheę nísadau'.  
Gate dxelasa xeajxruza ca' Lue' dxebeque zriu' na.

10 Bchúchuju' benne' Egipto ca', na' belexegá'ang'  
ca tu da gate.

Bese dínnaju' benne' ca' dxeledábage' lue' nen na'u wál-late.

11 Chiu' Lue' naca xabáa, ne chiu' Lué'queze naca xęzr la xu.  
Benu' xęzr la xu nigá, ne da ca' zaj nnita lawe na.

12 Benu' da de chalá'a naga za' be' zaga,  
ne da de chalá'a naga dxedé gubizra beu' zaga ca'.  
Xel-la dxelebé dxelul-la chiu' xi'a Tabor, ne xi'a Hermón.

13 Benne' wál-late' nacu' Lue'.  
Da zrente' naca xel-la waca chiu', ne nagá'ana szren na.

14 Lu da xrlátaje, ne lu da li lazre' dxenná be'u.  
Lu xel-la zri'i lazre', ne lu da li lazre' zaj zua ca da dxunu'.

15 Ba neza zrente' naca na cheę benne' ca' dxelul-ę'  
da dxue lá'ana na Lue',  
ne zaj zuę' lu xel-la naxaní' chiu', Xran.

16 Ne chiu' Lue' dxelebé'ęne' du zra,  
ne dxulucá'ana szrene' Lue' ca naca da xrlátaje chiu'.

17 Lué'queze nacu' xel-la wal-la cheę benne' ca',  
ne xel-la xrtan cheę'.  
Dxúnnadxu' netu' xel-la' waca lawe' da ca' dxéquenu' xrlátaje.

18 Xránadxu Dios dxucu'uje' dxi'u,  
na' Dios lá'azxa cheę benne' Israel ca' naque'  
Wenná Bea cheędxu.

- 19 Nédxudaṭe bchálaju' lu da blé'enu' benne'  
 wən zrin chiu' ca', benne' zaj naque' li lazre', gunnáu':  
 Ba gucá'a tu benne' wal-la ládujla bēnneache chia',  
 ne ba bzua' le' gaque' wenná bea, ne dxácalēna' le'.
- 20 Ba gucá'a David, wən zrin chia'.  
 Bzúaqueza' le' gaque' wenná bea.
- 21 Neda' tu gácalezqueza' le'.  
 Xel-la waca chia' gutípaqueza' lazre'.
- 22 Benne' ca' guledábage' Le' quebe xezezéquene'  
 bi xelune' chee',  
 na' benne' ca' dxelune' da calēla quebe xezezéquene'  
 xuluchúchuje' le'.
- 23 Guchúchujqueza' benne' dxeledábage' Le', ne gucuasa'  
 benne' ca' lau le'.  
 Guna' we' benne' ca' dxelecuídenē' le'.
- 24 Tu zrí'izqueza' le', ne gaca' li lazre' nen le',  
 na' ne chia' neda' gápadxē' xel-la' wal-la.
- 25 Guna' nna be'e dutē dxu'a nísadau' zren,  
 ne dutē dxu'a xēgu Eufrates.
- 26 Le' xe'e neda': "Lue' nacu' Xra'.  
 Nacu' Dios chia', dxucu'uju' neda', ne dxuseláu' neda'."
- 27 Neda' guzúa' le' ca zrí'ina' blau,  
 na' nna bé'ene' xúgutē benne' wenná bea zaj zre'e  
 lu xezr la xu.
- 28 Tu chí'izqueze nuzúa' chee' xel-la' zrí'i lazre' chia',  
 na' ca naca xel-la' wezría chia' gaca líqueze na nen le'.
- 29 Guna' tu cházqueze zrí'ine zre suē',  
 na' xelenná be'e lu waláz chee' dxácatē ne zua xabáa.
- 30 Che xulusán zrí'ine zre sua David da nadxixruj be'a,  
 ne che quebe xelune' ca da nuchi'a chee',
- 31 ne che xelecuae' lu da dxenná be'a,  
 ne che quebe xelune' ca da dxapa' le',
- 32 na' gu'a le' zrise lawe' da dxeledábage' neda',  
 ne quina' le' xide lawe' da dxelune' da calēla.
- 33 Quebe gusana' ca nazrí'ida' David,  
 ne quebe gusana' gaca' li lazre' nen le',
- 34 ne quebe gal-la lazra' xel-la' wezría da nuna',  
 ne quebe guchá'a ca da ba gunnía'.
- 35 Tu lásaze bzetaj cuina' guchebe lazra',  
 na' cabata' gun lazra' chee' David,
- 36 gunnia': Tu cházqueze zrí'ine zre suē',  
 na' xelenná be'e lu waláz chee' lawa' neda'  
 dxácatē ne zua gubizra.
- 37 Xel-la' dxenná bea chee' tu sua chúchuzqueze na  
 ca zua beu' zran xabáa.  
 Tu sua chúchuzqueze na dxácatē ne zua xabáa.
- 38 Lue', Dios, guleaj xíchaju', ne bzu' chalá'ala bēnnea' guca'u,  
 ne dxezrá'le'u le'.
- 39 Nuzú' chalá'ala xel-la' wezría bēnlēnu' David,  
 wən zrin chiu',

ne nucá'ana dítaju' xel-la' dxenná bea chee'.

<sup>40</sup> Nuxrínajaju' ze'e da naxechaj na xezre zréntau' chee',  
ne nuzríá xi'u ca naca lataj wal-la chee' chee wedil-la.

<sup>41</sup> Xúgute bénneache, benne' dxeledaze ga na' dxelebane'  
chee da zaj de chee',

na' benne' xezre walíZR chee' dxelún le' chee'.

<sup>42</sup> Ba benu' bedxúaj chawe' benne' guledábage' Le',  
na' dxelebéle'ene'.

<sup>43</sup> Ben dítaju' da ca' dxuchínene' lu wedil-la,  
ne quebe gúcalenu' le' lu wedil-la na'.

<sup>44</sup> Ba gudú' ca naca da xrtante chee',

ne nucá'ana dítaju' xel-la' dxenná bea chee'.

<sup>45</sup> Benu' naque' ca tu benne' gula gate ne zue' iza cuide' chee',  
ne bsi'u le' xel-la' stu'.

<sup>46</sup> Xrana' Dios, ¿bátaqueze quebe xennu' cheentu'?

¿Tu chí'izqueze dxezrá'aquezu' netu'?

<sup>47</sup> Bsa lazre' látega sua' lu xezr la xu.

Látega nunu' xel-la' nabán chee xúgute bénneache.

<sup>48</sup> Quebe zua nu benne' gaca bane' tu chí'izqueze.

Xúgute' xelatie'.

Quebe zua nu benne' le' lu na' xel-la' gute.

<sup>49</sup> Xran, ¿ba bsanu' David, ne québedxa nazrí'inu' le',

ca bzetaj cuinu' guchebe lazru' zrí'iquezenu' le'?

<sup>50</sup> Gunná' xque, Xran, ca dxelún le' chia' neda',  
wen zrin chiu',

ne ca dxuchaga lawa' da dxelún lala benne' xúgute xezr la xu  
chia' neda'.

<sup>51</sup> Benne' ca' dxeledábage' lue' dxulucá'ana dítaje'

bénnea' guca'u Lue', Xran.

Dxulucá'ana dítaje' le' gáteteze zéaje'.

<sup>52</sup> Ba neza zrentę gaca Xránadxu Dios chadía chacanna.

Ca' naca na, ne ca' gaca na.

## 90

<sup>1</sup> Xránantu' Dios, ba cua ba cua,  
Lue' nacu' ca tu xu'u naga zra cháwentu'.

<sup>2</sup> Nédxudate ca za gunu' xi'a zri'a ca',  
ne ca za sua xezr la xu, ne bénneache,  
na' nédxudate, ne lu da za za' nácaquezu' Lue' Dios.

<sup>3</sup> Dxu'u bénneache xelexaque' da gulaque',  
dxelexaque' xu xrte.

<sup>4</sup> Chiu' Lue' chí'gaxúa iza zaj naca na ca neaje, da ba gudé na,  
ne ca tu chí'idau'ze chizrela.

<sup>5</sup> Dxejú' bénneache ca dxun guba'u,  
da dxua na xúgute xizre laga ca'.

Zaj naque' ca tu bchigala da dxexenite na gate dxexebandxu.

<sup>6</sup> Zaj naque' ca tu xixre' da dxegula na che zílala.

Dxegula na, ne dxelá'tę na xiaj,  
na' xelate' zua gubizra dxelechugue' na, na' dxebizre na.

<sup>7</sup> Dxebía xi'ntu' lawe' da dxezra'u netu'.

Stébele'e zúantu' lawe' da dxezrá'le'u netu'.

<sup>8</sup>Dxenna'u ca da calela da nuntu'.

Dxulé'enu' lówela zria da nabágantu'.

<sup>9</sup>Dxuzáchiu' iza cheentu' lawe' da dxezra'u netu'.

Dxelexedú iza cheentu' ca tu be' da dxecá'antu'.

<sup>10</sup>Ca zaj naca zra naca bantu', zaj naca na ga xun chi iza, na' che nácantu' benne' wal-la, waca bantu' du tápalalaj iza, san ca zaj naca iza ca', dxedentu' xel-la' zi', ne dxéquentu' zede.

Chadí dxeledé iza ca', na' xenítentu'.

<sup>11</sup>¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

<sup>12</sup>Ble'e netu' ca láteze zaj naca zra cheentu'

chee gácantu' benne' dxeléajni'ine'.

<sup>13</sup>Xran, bexaca netu' tuze.

¿Bátadxa chenu'?

Bexache lazre' netu', wen zrin chiu'.

<sup>14</sup>Tu tu zila bzua xichaj lárdauntu' xel-la' zri'i lazre' chiu',

na' dutę xel-la' dxebe' tu gul-lazquezentu' chiu'

xúgute zra naca bantu'.

<sup>15</sup>Benna netu' zane' iza chee bentu' ca zaj naca iza

bsaca zi'u netu',

ne ca zaj naca iza guzúantu' lu da stebe.

<sup>16</sup>Bę lataj netu', wen zrin chiu', le'entu' da zrentę da dxunu',

ne xeledé'e zri'ine zre suantu' da xabáa chiu'.

<sup>17</sup>Xránantu' Dios, ben gaca cheentu' da chawe' chiu'.

Ben chepe ban ca naca zrin dxuntu'.

Awe', Xran, ben chepe ban ca naca zrin dxuntu'.

## 91

<sup>1</sup>Bénnea' dxuxrén lazre' Xránadxu Dios chee guxúe' le',

ne dxuzúe' Dios, Bénnea' nape' dutę xel-la' waca,

chee gácalęne' le',

<sup>2</sup>waca xe'e Dios: Nacu' Bénnea' dxebeza lazra',

ne Bénnea' dxucache chawe' neda'.

Nacu' Dios chia', na' dxuxrén lazra' Lue'.

<sup>3</sup>Dios gucache chawe' lue' lu xúgute da stebe da quebe zaj nalá',

ne lu xúgute xízrawę' da dxelute na bénneache.

<sup>4</sup>Gucache chawe' lue' ca dxun tu bedxuj dxézreba' biadu cheęba' zran

xrílaba', na' chu'u chawu' lu na' Le'.

Xel-la' li lazre' chee' gácalę na lue', ne gucache chawe na lue'.

<sup>5</sup>Quebe bi guchebe lue' chizrela, ne quebe bi da stebe te zra,

<sup>6</sup>ne quebe bi xízrawę' chee da chul-la,

ne quebe bi da calela ca' da dxelute na bénneache te zra.

<sup>7</sup>Welate chi gaxúa bénneache cuitu' lue',

ne gaxúa gaxúa bénneache gáguze naga zu',

san quebe bi sacu' lue'.

<sup>8</sup>Wanna'u, na' walé'enu'

ca ba xa' xeledé benne' ca' dxelune' da calela.

<sup>9</sup>Nuzú' Xránadxu Dios ca Benne' dxebeza lazru', ne Dios,

Bénnea' nape' dutę xel-la' waca, chee gucache chawe' lue'.

- 10 Chee lę na' quebe bi da caleła gaca na chiu',  
ne quebe bi xızrawę' chu'u na lizru'.
- 11 Dios gusebage' gubáz chee xabáa chee' ca' chee xelácalęę' lue',  
na' xuluxúę' lue' gáteteze chéaju'.
- 12 Xeluxre' lue' lu ne'ę chee quebe ga'a xiaj ni'u.
- 13 Guléajquezu' bezre xixre' ca', ne bęla' ca',  
bezre xixre' schanní' ca', ne bę snia ca'.
- 14 Dxenná Dios: "Guselá' xúgute benne' ca' zaj  
nazrí'ine' neda',  
ne gucache chawa' benne' ca' dxelexechebę' naca' Xrane'.
- 15 Gate xelenné' neda', na' xecheba' chee'.  
Gate zaj xu'ę lu da stebe, súalequeza' le'.  
Guselá' le', ne guna' le' ba lá'ana.
- 16 Guna' xelaca banę' zánete iza, ne guselá' le'."

## 92

- 1 Chawe' naca dxue lá'anantu' Lue', Xrana' Dios,  
ne gúl-lantu' da dxucá'ana szren na Lue', Dios szrente.
- 2 Chawe' naca dxuzénetu' bėnneache tu zra tu zra  
ca dxexache lazru' netu',  
na' dxela dxulé'entu' nacu' li lazre'.
- 3 Dxúl-lantu' da caní, dxínnentu' da dxúl-lalęntu'  
da zę chi du chee na,  
ne dxínnentu' da con zríadi'i na du da dxennęle'ę xrtandau'.
- 4 Xrana' Dios, ne chee da dxunu' Lue', dxunu' dxebéle'ęda'.  
Ca zaj naca da nun na'u zua' lu da ba neza.
- 5 Da zrente zaj naca da nunu', Xrana' Dios.  
Da zréne'ę zaj naca da dxugú'u lazru' gunu'.
- 6 Québequeze neze benne' lázxdau zide',  
ne quebe dxéajni'i benne' xala ca naca da nigá.
- 7 Gate dxelegula benne' dxelebéaj xíchaje' Dios  
ca dxegula xixre',  
ne dxępe ban da dxelún benne' węn da zrinnaj,  
naca na chee xelebía xi'ę tu chí'izqueze.
- 8 Lue', Xrana' Dios, tu nácazquezu' Dios szrente.
- 9 Dxunna bea na ca gaca chee benne' dxedábage' Lue',  
Xrana' Dios.  
Dxunna bea na xelebía xi' benne' ca' dxeledábage' Lue'.  
Xelase dinnaj xúgute benne' ca' dxelunę' da zrinnaj.
- 10 Lue' dxunu' dxezrendxa xel-la' wal-la chia' ca naca  
xel-la' wal-la chee bezre.  
Dxugú'u da za xíchaja' da dxutipa na lazra'.
- 11 Dخال-la' le'ęda' xelezrá' zran ni'a benne'  
dxeledábage' neda',  
na' xenda' xelebezre xache' benne' ca' guledíl-lalęę' neda',  
benne' ca' dxelunę' da caleła.
- 12 Welexán benne' xrlátaje ca' ca dxun xaga zina'.  
Xelegule' ca dxun xaga cedro lu xi'a Líbano.
- 13 Zaj naque' ca tu xaga zę na lu xudau' chee Xránadxu Dios,  
da dxegúlalę'ę na lu chale'aj chee xu'u lizre Dios cheedxu.
- 14 Zaj naque' ca xaga ca' dxelebía da zixre chee na gate

ba zaj nagula na, ne zaj naca na xaga xa'a wal-la.

<sup>15</sup> Benne' caní xuluzenne' bénneache naca li lazre'  
Xrana' Dios, Bénnea' dxuzé chúchue' neda',  
ne quebe bí zúale Le' da quebe naca xrlátaje.

## 93

<sup>1</sup> Xránadxu Dios naque' Wenná Bea,  
ne nacue' zra lané' da zácale'e.

Nácue' zra lané', ne da nagú'u le'e naca na xel-la' waca zren.  
Nuzúa chúchue' xezr la xu nigá, na' quebe nu seque' gutá na.

<sup>2</sup> Lataj naga dxe'u dxenná be'u, Xran,  
zua chuchu na nédxudaute,  
na' Lue' zúaquezu' chadía chacanna.

<sup>3</sup> Dxelebezre xa'a xegu ca', Xran.

Dxelebezre xa'a na, ne dxelenné na zizraj.

<sup>4</sup> Xránadxu, Bénnea' zue' xabáa nápadxe' xel-la' waca  
ca da zaj napa xegu ca' dxelebezre xa'a na,  
ne ca da zaj napa xeajxruza chee nísadau'.

<sup>5</sup> Chúchule'e zaj naca da nadxixru be'u, Xran.

Lá'azxa nácaqueze xudau' chiu' chadía chacánnaqueze.

## 94

<sup>1</sup> Xrana' Dios, dxebéaj lazru' bénneache.  
Lue', Bénnea' dxebéaj lazre' bénneache, ble'e cuinu'.

<sup>2</sup> Dxuchi'u Lue' chee da dxelún xúgute bénneache.  
Guxasa, bexizruj da dxal-la' xezezi' benne'  
dxulucá'ana szren cuine'.

<sup>3</sup> Xrana' Dios, ¿Bátadxaqueze xelún benne' wen da calela caní?  
¿Bátadxaqueze xelebé benne' ca' dxelebéaj xíchaje' Dios?

<sup>4</sup> ¿Bátadxaqueze xulucá'ana szren cuine', ne xelenné' dizra' zi'?  
¿Bátadxaqueze xulucá'ana szren cuina benne' ca'  
dxelebéaj xíchaje' Dios?

<sup>5</sup> Benne' caní dxuluxrínnaje' bénneache chiu' Lue', Xran,  
ne dxulusaca zi'e bénneache guca'u Lue'.

<sup>6</sup> Dxelútie' nu'ula tuze ca', ne benne' zitu' ca',  
ne dxelune' xelátebe' bidau' wezebe ca'.

<sup>7</sup> Dxelenné': "Quebe bi dxelé'e Dios, Xrana benne' ca'.  
Dios chee benne' Israel ca' quebe dxue lazre' chee da na'."

<sup>8</sup> Le chéajni'i, le'e, benne' lázxdau zide'.

Le'e, benne' xala, ¿bátadxaqueze quebe chéajni'ile?

<sup>9</sup> Dios bene' nágadxu.

¿Québequeze dxénne' da dxennale?

Dios bene' xiaj laudxu.

¿Québequeze dxelé'eng' da dxunle?

<sup>10</sup> Díósqueze dxuzé' lu da ba xa' benne' xezr la xu ca'.

¿Québequeze til-le' le'e?

Díósqueze dxune' dxeléajni'i bénneache.

¿Québequeze gueque be'ene' da xu'u xichaj lázrdaule?

<sup>11</sup> Xránadxu Dios nézquezne' da xu'u xichaj lázxdau

xúgute bēnneache.

Nézene' zaj naca na da dácheze.

<sup>12</sup> Ba neza zrente naca na chee bēnnea' dxuzéajni'inu', Xran, ne dxusédenu' le' ca naca da nadxixruj be'u,

<sup>13</sup> chee cueza zri lazre' gate za zra dxaca da calela, ca zrin zra xelexú'u xedxu ba benne' dxelune' da zrinnaj.

<sup>14</sup> Québequeze cueaj xichaj Xránadxu Dios bēnneache chee', ne quebe gusán lazre' benne' ca' ba gucá'a Le'.

<sup>15</sup> Naca xrlátaje ca xuluchí'e chee bēnneache, na' xelúnqueze da xrlátaje xúgute benne' zaj naque' li lazre'.

<sup>16</sup> ¿Núzraqueze gácale neda' tíl-lalēdxu benne' wen da calela ca'?

¿Núzraqueze súale neda' tíl-lalēdxu benne' dxelune' da zrinnaj?

<sup>17</sup> Chela ca gúcale Xránadxu neda', bachelja xu'a xedxu ba.

<sup>18</sup> Gate gunnía': Xran, ba zua cheajcházia', na' Lue', dute xel-la' zri'i lazre' chiu' gúcalenu' neda'.

<sup>19</sup> Gate dxe'a gunne xue, ne zua' lu da štebe, Lué'queze dxexúe zrenu' neda', na' dxebé'geda'.

<sup>20</sup> Québequeze nacu' tuze benne' ca' dxuluchi'e chee bēnneache da quebe naca xrlátaje, benne' ca' dxulucá'ang' ca xrlátaje da quebe naca na xrlátaje.

<sup>21</sup> Benne' caní dxelune' tuze dizra' da xelune' chee benne' xrlátaje,

na' dxelechugue' chee gate bēnnea' quebe bi zria nabague'.

<sup>22</sup> Xránadxu Dios naque' ca tu xu'u naga zua chawa'. Dios chia' naque' ca tu xiaj xre da dxuzé chacha na neda'.

<sup>23</sup> Le' xexízruje' benne' ca' dxelune' da calela cáteze naca da zrinnaj da belune'.

Guzría xi'e benne' ca' lu da calela da dxelune'. Xránadxu Dios guzría xi'e benne' ca' dxelune' da calela.

## 95

<sup>1</sup> Le da, güe lá'anadxu Xránadxu Dios dute xel-la' dxebé. Dute xel-la' dxebé gúl-ladxu chee Bēnnea' nuzúa chúchue' dxi'u naga ladxu.

<sup>2</sup> Cheajdxu lau Le', ne xedxu Le': Xcalenu'. Dute xel-la' dxebé gúl-ladxu da güe lá'anadxu Le'.

<sup>3</sup> Naca Xránadxu tu Dios szrente, ne naque' Wenná Bea szrente lawe' dios ca' chee bēnneache.

<sup>4</sup> Dxenná bé'ene' du gabí'i xezr la xu, naga naca situj, ne naga naca sibe chee xi'a ca'.

<sup>5</sup> Dxenná bé'ene' nísadau' da núnqueze Le', ne cá'anqueze xezr la xu da bene'.

<sup>6</sup> Le da, gucá'ana szrendxu Le', gátadxu sudxú'ala. Guzú zríbedxu lau Xránadxu, Bēnnea' nune' dxi'u.

<sup>7</sup> Le' naque' Dios cheedxu. Nácadxu benne' ca' dxuxúequeze', ne nácadxu ca zríla'du ca' cheéqueze'.

<sup>8</sup> Che dxenle chí'e na'a zra, quebe gun zide' lázrdaule



ca belún xra xrtáule ca' naga nazí le na Meriba,  
ne ca belunę' lu zra na' le'ę xixre' lawe' lataj naga  
nazí le na Masah,

<sup>9</sup> naga buluchá'a xra xrtáule neda', ne belunę' neda' da stebe  
lácala belelé'ene' xúgute da beña'.

<sup>10</sup> Lawe' chua iza beditaj lazra' cheę benne' ca',  
na' gunnía': Zaj naque' benne' dxelebéaj xíchaję' neda',  
ne quebe dxelunę' ca da dxulé'eda' le'.

<sup>11</sup> Cheę le na', dutę xel-la' dxezrá'a chia' bzetaj cuina' gunnía':  
Quebe xelexú'úqueze' naga xelexezi' lazre' nen neda'.

## 96

<sup>1</sup> Le gul-la cheę Xránadxu tu da cube.

Le gul-la cheę Xránadxu, le'e zrale du gabí'i xęzr la xu.

<sup>2</sup> Le gul-la cheę Xránadxu, ne le güe lá'ana La lá'azxa chie'.

Tu zra tu zra le guzén ca naca xel-la' weselá da dxunne'.

<sup>3</sup> Le guzén benne' xęzr la xu ca' ca naca xel-la' szren cheę',  
Ne benne' xúgute xęzre ca zaj naca xel-la' waca zren nune'.

<sup>4</sup> Szrente naca Xránadxu, ne naca cheę' güe lá'analę'ędxu Le'.

Naca cheę' gápadxę' xel-la' ba lá'ana ca dios ca'

cheę bėnneache,

<sup>5</sup> lawe' da zaj naca xúgute dios ca' bedáu' xiaj xaga ca'.

Xránadxu Dios bene' xabáa na'.

<sup>6</sup> Zúalę Le' da xabáa, ne xel-la' szren.

Nazrate xudau' cheę' xel-la' waca, ne da xrtante.

<sup>7</sup> Le güe lá'ana Xránadxu, le'e zrale du gabí'i xęzr la xu.

Le güe lá'ana xel-la' szren cheę', ne xel-la' waca cheę'.

<sup>8</sup> Le gapa ba lá'ana Xránadxu ca da naca cheę' si'e.

Le gua da gunézrujle, ne le da chale'aj cheę xudau' cheę'.

<sup>9</sup> Le gucá'ana szren Xránadxu lu xel-la' xrtante cheę

da naca lá'azxa cheę'.

Le zrebe lau Le', le'e zrale du gabí'i xęzr la xu.

<sup>10</sup> Le xę bėnneache xęzr la xu: Naca Xránadxu Wenná Bea.

Nuzúa chúchue' xęzr la xu nigá, na' quebe nu seque' gutá na.

Guchi'ę cheę bėnneache ca naca da xrlátaje.

<sup>11</sup> Le be, le'e, xabáa, ne xęzr la xu.

Le cuezre xa'a, le'e, nísadau', ne bea ca' zrale na'.

<sup>12</sup> Le be, le'e, le'ę xixre', ne bea ca' zrale na'.

Xaga ca' zaj dxe' xi'a ca' welunna schaga lu xel-la' dxebeb

<sup>13</sup> lau Xránadxu gate xidę'.

Xidę' guchi'ę cheę bėnneache zaj zre'ę xęzr la xu.

Nna bé'ene' bėnneache du gabí'i xęzr la xu.

Nna be'e Le' ca naca da xrlátaje, ne ca naca da li.

## 97

<sup>1</sup> Naca Xránadxu Benne' Wenná Bea.

Le be, le'e zrale xęzr la xu.

Le be, le'e zrale dxu'a nísadu ca'.

<sup>2</sup> Zaj naxečaj beuj, ne da chul-la Le'.

Ca naca da li, ne da xrlátaje dxenná be'ę.

<sup>3</sup> Cuía lau xi' lau Le',

ne guzezxe na benne' guledábage' Le'.

4 Ca naca xesa ca' chee' bulusení na xezr la xu.

Dxelé'e xezr la xu na, ne dxezrize na.

5 Dxelexuna xi'a ca' ca da zixre chee' bézudau' lau Xránadxu,

lau Xrana bénneache zaj zre'e du gabí'i xezr la xu.

6 Dxulé'e xabáa ca naca da xrlátaje chee',

na' dxelelé'e bénneache duté xezr la xu ca naca

xel-la' szren chee'.

7 Dخال-la' xelexedué'e xúgute benne' ca' dxulucá'ana szreng'

bedáu' xiaj xaga ca',

benne' ca' dxulucá'ana szren cuine' ca zaj naca bedáu' xiaj xaga ca'.

Xúgute dios chee' bénneache ca' dxal-la' xuluzú zribe na

lau Xránadxu Dios.

8 Belén benne' zaj zre'e Sión, na' gulebene'.

Gulebé benne' zaj zre'e Judá, ne chee' da guchi'u Lue', Xran.

9 Szrenté nacu' Lue', Xran, lawe' duté xezr la xu.

Szrendxa nacu' Lue' ca xúgute dios chee' bénneache.

10 Le'e, núlale nazrí'ile Xránadxu, le cuide da caléla.

Le' dxuxúe' bénne'du zaj xu'e bénneache chee'.

Dxuselé' le' lu na' benne' dxelebéaj xíchaje' Dios.

11 Zualé da dxusení na benne' xrlátaje ca',

na' xel-la' dxebé zualé na benne' li lazre' ca'.

12 Le be, le'e, benne' xrlátaje, lau Xránadxu.

Le gusá lázrele ca da nun Dios lá'azxa, ne le güe lá'ana Le'.

## 98

1 Le gul-la chee' Xránadxu tu da cube lawe' da nune' da ca'  
da dxebánedxu.

Ne chee' xel-la' wal-la chee', ne xel-la' waca lá'azxa chee'

ba bđinne'.

2 Ba nuzén Xránadxu ca dxunge' dxuselé' bénneache.

Ba bzenne' bénneache xezr la xu ca' ca naca da xrlátaje chee'.

3 Ba nune' ca da guchébe lazre' chee' benne' Israel ca'

ca naca xel-la' li lazre' chee', ne xel-la' nazrí'i zren chee'.

Bénneache du gabí'i xezr la xu ba belelé'ene' ca naca da ben

Dios cheedxu.

4 Le gul-la lu xel-la' dxebé lau Xránadxu, le'e zrle du gabí'i

xezr la xu.

Le güe lá'ana Le' nen da gúl-lale, ne lu xel-la' dxebé chee'

le cuezre xa'a.

5 Le gul-la da güe lá'anale Xránadxu.

Le gul-la nen da con zriadi'i na du ca' da quínele.

6 Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebé lau Xránadxu,

Wenná Bea cheedxu.

7 Le gun schaga nísadau', ne bea ca' zrle na'.

Le gul-la, le'e, xezr la xu, ne le'e zrle na'.

8 Le capa na'le, le'e xegu ca'.

Le gul-la lu xel-la' dxebé, le'e, xi'a ca', lau Xránadxu

9 lawe' da xide' xedajnná bé'ene' xezr la xu nigá.

Nna bé'ene' benne' zaj zre'e du gabí'i xezr la xu lu da xrlátaje,

ne b́enneache dutę xęzr la xu lu da naca li lazre'.

## 99

<sup>1</sup> Naca Xránadxu Dios Benne' Wenná Bea,  
na' dxelezrize xúgute b́enneache lau Le'.

Dxe'e lataj blau chee' da zua na lávela querubín ca',  
na' dxezrú' lu xęzr la xu.

<sup>2</sup> Szrentę naca Xránadxu lu xi'a Sión.  
Naque' szren lawe' xúgute cue' xęzr la xu ca'.

<sup>3</sup> Le güe lá'ana La Xránadxu da naca na szren,  
ne da dxal-la' zrębedxu.

¡Lá'azxa naca Le'!

<sup>4</sup> Lue', Wenná Bea szrentę, nazrí'inu' da naca xrlátaje.  
Nuzúa chachu' da naca li lazre'.

Ba nunu' da naca xrlátaje, ne da naca li lazre'  
ládujla zri'ine zre sua Jacob.

<sup>5</sup> Le gucá'ana szren Xránadxu Dios.  
Le guzú zríbele lau Le' naga dxe'e.

¡Lá'azxa naca Le'!

<sup>6</sup> Moisés, ne Aarón gulaque' bxruze chee' ca'.  
Samuel guque' tu benne' bchálajlene' Le'.

Gulenné' Xránadxu Dios, na' Le' bechebe'.  
<sup>7</sup> Tu lu beuj bza bchálajlene' benne' ca'.

Buluzúę' dizra' da gunná bé'ene',  
ne da ca' bdxixruj be'ene' le'.

<sup>8</sup> Xránantu' Dios, bechebu' lau benne' ca'.  
Blé'enu' le' nacu' Dios, dxunite lau' chee' b́enneache,  
lálaca dxudéu' le' xel-la' zi' ne chee' dul-la da zaj nabague'.

<sup>9</sup> Le gucá'ana szren Xránadxu Dios.  
Le guzú zríbele lau Le' lu xi'a lá'azxa chee',  
lawe' da lá'azxa naca Xránadxu Dios.

## 100

<sup>1</sup> ¡Le gul-la lau Xránadxu Dios, le'e zrale du gabí'i xęzr la xu!

<sup>2</sup> ¡Le gucá'ana szren Le' dutę xel-la' dxebé!

¡Le da lau Le', dxúl-lale dutę xel-la' dxebé!

<sup>3</sup> Cabata' gal-la lázrele naca Xránadxu Diósqueze.

Le' bene' dxi'u, na' nácadxu chee' Le'.

Nácadxu xęzre chee', ne zríla'du chee'.

<sup>4</sup> Le chu'u lataj naga zua xudau' chee', xeLe Le': Xcalenu',  
ne chale'aj chee' na, güe lá'anale Le'.

Le xę Le': Xcalenu', ne le güe lá'ana Le'.

<sup>5</sup> Chawe' naca Xránadxu, na' chadía chacanna zua  
xel-la' zri'i lazre' chee'.

Xel-la' li lazre' chee' tu súazqueze na chadía chacanna.

## 101

<sup>1</sup> Tu gúl-lazqueza' ca naca xel-la' zri'i lazre',  
ne xel-la' li lazre' chiu'.

Tu gúl-lazqueza' chiu' Lue', Xrana' Dios.

<sup>2</sup> Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'anqueze guna' caní  
lu xu'u lizra'.

<sup>3</sup> Québequeze cu'u lazra' guna' tu da zrinnaĵ.

Dxecuídeda' da dxelún benne' ca' dxelebéaj xíchajé Dios.

Québequeze gu'a lataĵ xelegue' naga zua' neda'.

<sup>4</sup> Gucuaasa' lu xichaj lázrdawa' da caleĵa,  
ne quebe cu'u lazra' cheĵ da caleĵa.

<sup>5</sup> Guzúa' chalá'ala benne' dxelenné' bagácheze  
cheĵ benne' xula.

Quebe gu'a lataĵ súale neda' tu benne' dxucá'ana szren cuine',  
u naque' benne' wenná be'e.

<sup>6</sup> Le'eda' chawe' benne' ca' zaj naque' li lazre' lau Dios,  
cheĵ xelezrē'ē lawa' neda'.

Tuze benne' ca' zaj naque' du lazre' xelunē' zrin chia'.

<sup>7</sup> Quebe gu'a lataĵ benne' wecache lan chu'ē lizra'.

Quebe gu'a lataĵ tu benne' wen lazre' xegá'ane' naga zua'.

<sup>8</sup> Tu zra tu zra guzría xi'a benne' ca' dxelunē' da caleĵa,  
benne' ca' zaj zre'ē lu xezr la xu chia'.

Gucuaasa' xúgute' benne' ca' dxelunē' da zrinnaĵ lu xezre cheĵ  
Xránadxu Dios.

## 102

<sup>1</sup> Xrana' Dios, bene da dxenaba' lau',  
ne bze naga da dxuláwizra' Lue'.

<sup>2</sup> Quebe gucache lau' lawa' neda', lawe' da lu da štebe zua'.

Bze naga neda', ne bechébeche chia' gate dxuláwizra' Lue'.

<sup>3</sup> Naca xel-la' nabán chia' ca zren cheĵ xi' da dxexenítete.  
Xu'u da la lu zrita chia' ca tu xi' da dxále'ē na.

<sup>4</sup> Dxedú lazra', ne naca lázrdawa' ca tu xixre' da dxecuade,  
na' québedxa dxenná na gudagu xeta.

<sup>5</sup> Lawe' da dxebezre wé'le'a ba nazritale'a.

<sup>6</sup> Naca' ca tu situgún dxedaba' tu lu xezr la xu bizre,  
ne ca tu bzriu zríaba' lawe' tu xu'u ze la'a.

<sup>7</sup> Dxíchaja' bchigala, ne naca' ca tu bxinne zríaba' túzeba'  
xrgu'u sibe.

<sup>8</sup> Tu zra tu zra tu dxuluchácalezqueze benne'  
dxeledábague' neda'.

Benne' ca' dxelecuídenē' neda' dxuluchínene' la' neda'  
gate nu benne' dxelegú'ē de'.

<sup>9</sup> Lu waláz cheĵ xeta dxawa' de,  
na' nisa dxebezra' dxechixre na da dxé'aja'.

<sup>10</sup> Caní dxaca chia' lawe' da dxezra'u neda',  
ne dxecuídenu' neda'.

Guca'u neda', na' gudxú'unu' neda'.

<sup>11</sup> Naca xel-la' nabán chia' ca tu zrul-la da dxedeze,  
na' naca' ca tu xixre' da ba nabizre.

<sup>12</sup> Lue', Xrana' Dios, tu chí'izqueze zu',

na' cheajlesá lazre' xúgute' cuen bēnneache Lau'.

<sup>13</sup> Chasu', ne xexache lazru' benne' zaj zre'ē xezre Sión,  
lawe' da ba bzrin zra xexache lazru' benne' ca'.

- 14 Netu', wən zrin chiu', nazrí'intu' xiaj ca' chee xezre na'.  
Dxéquentu' zi' lawe' da ba nabía xi na.
- 15 Nadxa benne' xezr la xu ca' xelezrebe' lau Lue', Xran.  
Xelezrebe xúgute benne' wenná bea chee xezr la xu nigá  
da xabáa chiu',
- 16 gate ba bechisu' xezre Sión, Xran,  
ne xeelé'equezne' ca naca da xabáa chee na,
- 17 gate na' guzé nagu' da dxelenaba benne' ca' guleaj xíchaju',  
ne québedxa guzú' chalá'ala da dxelata' xuene' Lue'.
- 18 Xuaj da nigá chee xululaba benne' ca' za zá'aca,  
na' benne' ca' za xelalaj xelúe lá'ané' Xránadxu Dios.
- 19 Naga zua Xránadxu xabáa gunné'e.  
Naga zue' xabáa blé'eng' lu xezr la xu nigá.
- 20 Dxelé'eng' benne' dxelebezre xache', benne' zaj xu'e  
lizre xia,  
na' gusané' benne' ca' ba zaj nachugue' chee' xelatig'.
- 21 Xuluzenne' benne' zaj zre'e xezre Sión ca szren naca  
La Xránadxu Dios,  
chee xelúe lá'ané' Lē' lu xezre Jerusalén,
- 22 gate xelezraga bēnneache chee xúgute xezre, ne xúgute cue'  
xezr la xu  
chee xulucá'ana szrene' Xránadxu Dios.
- 23 Xránadxu Dios bene' gute ni'a na'a gate ne naca' cuide'.  
Xeláteze ca betig' neda'.
- 24 Nadxa gunnía': Dios chia', quebe gutiu' neda',  
gate quebe ne guéxrua'.  
Lue' tu chí'izqueze zu'.
- 25 Nédxudaute Lue' bzu' xezr la xu nigá, na' nen na'u  
benu' xabáa.
- 26 Xelebía xi' da ca', san tu zúazquezu' Lue'.  
Welexru xúgute da ca' ca tu ladxe'.  
Ca dxuchadxu zra lánadxu tuzruj, ca' gucha'u da ca',  
na' xucúbeu' na.
- 27 Túzqueze ca nacu' Lue',  
ne québequeze te chiu' Lue'.
- 28 Zrí'inentu' netu', wən zrin chiu', xelezrabe' chawe',  
na' guzé chúchuquezu' zri'ine zre súantu' lau Lue'.

## 103

- 1 Bē lá'ana Xránadxu Dios, lue', bēnne'du xu'a.  
Bē lá'ana Lē' lá'azxa, dutē da naca'.
- 2 Bē lá'ana Xránadxu, lue', bēnne'du xu'a,  
ne quebe gal-la lazru' ca da chawe' da nune' chiu'.
- 3 Dxunite lawé' chee xúgute dul-la nabaga'a.  
Dxexuné' neda' ca naca xúgute xízrawé' da xu'a.
- 4 Dxuxúé' neda' chee quebe gatia'.  
Lu xel-la' zri'i lazre' chee', ne xel-la' dxexache lazre' chee'  
dxuné' chawe' chia'.
- 5 Dxuzánlē'e da chawe' da dxaca chia' chee xegá'ana'  
benne' cuide',  
ne benne' wal-la ca dxaca chee tu bsia.

- 6 Xránadxu Dios dxuchi'e chee da dxaca chee benne'  
dxeledé' da ba xa',  
ne dxucá'ana chawe' da dxaca chee'.
- 7 Blé'engé' Moisés da ca' gulú'u lazre' guné',  
ne be'e lataj benne' Israel ca' belelé'engé' da ca' bene'.
- 8 Naca Xránadxu Benne' dxexache lazre', ne Benne' zri'i lazre'.  
Quebe dxezrá'azie', san zrentę naca xel-la' zri'i lazre' chee'.
- 9 Quebe nniaqueze', ne quebe zrá'aqueze'.
- 10 Quebe dxudé' dxi'u lu da ba xa' ca naca zria  
da nabágadxu,  
ne quebe ne guzria xi'e dxi'u ne chee dul-la da nabágadxu.
- 11 Ca sibe naca xabáa lawe' xezr la xu,  
caníqueze naca xel-la' zri'i lazre' zren chee' nen benne' ca'  
dxelape' Le' ba lá'ana.
- 12 Ca zitu' naca naga dxalaj gubizra, ne naga dxebía na,  
caníqueze dxucuase' zitu' dul-la da nabágadxu.
- 13 Ca zri'i lazre' naca xra bidu ca' nen zri'inequeze',  
caníqueze naca zri'i lazre' Xránadxu nen benne' ca'  
dxelape' Le' ba lá'ana.
- 14 Le' nézené' ca nácadxu lu bęla' dxen cheedxu.  
Dxajsá lazre' nácadxu xu xrte.
- 15 Ca naca xel-la' nabán cheedxu, nácadxu ca tu xixre'.  
Dxegúladxu ca tu xiaj xixre',
- 16 na' dxedé be' dxua na le na, na' dxexenite na,  
na' québedxa nu dxelé'eqeaze le na.
- 17 Ca naca chee benne' ca' dxelape' ba lá'ana Xránadxu,  
zúale xel-la' zri'i lazre' chee' benne' ca' chadía chacanna,  
na' xel-la' xrlátaje chee' zúalequeze na xúgute zri'ine zre sua  
benne' ca',
- 18 benne' ca' dxelúnqueze' ca naca xel-la' wezria nune',  
ne benne' ca' dxelune' ca zaj naca da nadxixruj be'e.
- 19 Nuzúa Xránadxu lataj chee' xabáa naga dxe'e dxenná be'e.  
Nácaqueze' Wenná Bea lawe' xúgute da zaj zua.
- 20 Le güe lá'ana Xránadxu, le'e, gubáz chee xabáa ca',  
Nácale benne' wal-la, ne benne' chúchule'e,  
na' dxunle ca dxenná Le', ne dxuzé nágale ca dxę'e le'e.
- 21 Le güe lá'ana Xránadxu, le'e, dxenná beale xabáa.  
Nácale wen zrin chee', ne dxunle ca dxaca lazre' Le'.
- 22 Le güe lá'ana Xránadxu, xúgutele le'e ba nun Dios le'e,  
zrale xúgute lataj naga dxenná bea Le'.  
jBe lá'ana Xránadxu, lue', bęenne'du xu'a!

## 104

- 1 Bę lá'ana Xránadxu Dios, lue', bęenne'du xu'a.

jXrana' Dios, szrentę nacu' Lue'!

Nacu' zra lanu' da xabáa, ne da xrtante.

2 Dxugacu cuinu' xel-la' naxaní' ca zra lanu'.

Dxechilju' xabáa ca tu xu'u ladxe' chiu'.

3 Nunu' lizru' lawe' nisa da zę ná'ala.

Dxuchínenu' beuj ca' ca tu da dxudé xua naga dxe'u Lue',

da dxedá na lu be'.

<sup>4</sup> Dxuchínenu' be' ca' ca gubáz chiu' ca',  
ne xesa ca' ca wen zrin chiu' ca'.

<sup>5</sup> Bzua chuchu' xezr la xu nigá lu lane na,  
na' quebe nu gaca gutá le na.

<sup>6</sup> Bgacu' xezr la xu nigá nen nísadau' ca dxun tu benne'  
dxacue' zra lane',  
na' nisa na' bgacu na xi'a ca'.

<sup>7</sup> Gate gudil-lu' nisa na', na' bzrunnuj na.  
Bebiga na gate ben na chí'u zizraj.

<sup>8</sup> Nisa na' bgacu na xi'a ca' xajxedxé na dxu'a xegu ca',  
lataj ca' ba nunu' chee nisa na'.

<sup>9</sup> Bzu' naga ze lau cheajsé na, naga québedxa gaca te na,  
chee québedxa gacu na xezr la xu bizre na'.

<sup>10</sup> Dxunu' beaj ca' dxelalaj na dxu'a xégudu ca',  
ne xegu ca' dxeledé na ládujla xi'a ca'.

<sup>11</sup> Lu xegu ca' dxelé'aj be xixre' ca' nisa,  
na' dxegúa na xel-la' dxelebile chee burro xixre' ca'.

<sup>12</sup> Lu xaga zaj nnita dxu'a xegu ca' zaj zra' béadu ca'  
zaj zua xrila.

Dxelúl-laba' ládujla zruze na ca'.

<sup>13</sup> Zran xabáa dxesel-lu' xiuj da dxaca na lu xi'a ca',  
na' dxezrate xezr la xu na' ca naca da xrlátaje da dxunu'.

<sup>14</sup> Dxusegulu' xixre' da dxelagu bezure ca',  
ne xixre'du ca' da dxelagu bénneache,

ne da ca' dxuluchine bénneache dxeluné' xel-la' wagu,

<sup>15</sup> ne uva ca' da dxeluné' xrise uva wal-la da dxuzúa na  
bénneache ca' xel-la' dxelebé,

ne olivo ca' da dxeluné' da za da dxelegú'e xíchajé',  
ne zrua' da dxeluné' xeta chee xelaca bané'.

<sup>16</sup> Xaga cedro ca' da zaj zua na xi'a Líbano dxelezilé'e na nisa xiuj.  
Zaj naca na xaga chee Xránadxu Dios, da ca' guza Le'.

<sup>17</sup> Lu xaga ca' dxuluzría bxínnedu ca' xrú'uneba',  
na' lu zruze na ca' zaj zua lizre bxuze' ca'.

<sup>18</sup> Zaj zua chivo xi'a ca' lu xi'a zri'a ca',  
na' lu bluaj ca' chee xi'a ca' zaj zua bzrizru' ca'.

<sup>19</sup> Benu' beu' da dxulé'e na tu beu' tu beu' chee iza,  
na' gubizra núnbea na gate dxal-la' cuía na.

<sup>20</sup> Benu' dxela, na' gate bache nachul-la,  
na' dxeledxúaj be dxela ca'.

<sup>21</sup> Dxelebezre xa'a bezure xixre' ca', zaj nauba' be xeláguba'.  
Dxelíljaba' da nun Dios xeláguba'.

<sup>22</sup> Gate dxalaj gubizra, na' dxelexezrinba' lu bluaj cheeba',  
naga dxeláseba' te zra.

<sup>23</sup> Nadxa dxeledxúaj bénneache dxeluné' zrin,  
na' dxelúnqueze' zrin ca dxebíá gubizra.

<sup>24</sup> Xran, da zanté zaj naca da benu'.  
Dute xel-la' sina chiu' benu' da ca'.

Nazrate xezr la xu nigá da ca' benu'.

<sup>25</sup> Na' zua nísadau', da zri'a, ne da laga,

naga zaj xu'u zánete bea ca', béadu ca', ne be zri'a ca'.

<sup>26</sup> Lu nísadau' na' zaj zra' da dxeledá lawe' nísadau' ca'.

Zua be zri'a na' benu' Lue', nazí' laba' leviatán.

<sup>27</sup> Xúgute bea ca' dxuluxrén lázreba' Lue',

chee gunézruju' da xeláguba' ca zrin chee na.

<sup>28</sup> Dxunézruju' leba', na' dxelecá'aba' na.

Dxunézruju' da dxeláguba', na' dxeléljeba'.

<sup>29</sup> Gate quebe dxenná'u-ba', na' dxelegrébeba'.

Gate dxucuasú' be' dxelecá'aba', na' dxeláteba',

ne dxelexácaba' xu xrte.

<sup>30</sup> Gate dxesel-lu' be' chiu', na' xelexaca banba'.

Dxunézruju' xel-la' nabán cube chee da ca' zaj zua

xęzr la xu nigá.

<sup>31</sup> ¡Chadía chacanna gaca ba Xránadxu Dios!

Dxezaca ba lazre' Xránadxu chee da ca' ba núnqueze'.

<sup>32</sup> Dxenné'e xęzr la xu nigá, na' dxezrú' na.

Dxuté' xi'a ca', na' dxeledxúaj na zren.

<sup>33</sup> Gúl-laqueza' chee Xránadxu dxácatę na' naca bana'.

Xúgute zra zúaqueza' neda' gul-la' da güe lá'ana' Dios chia'.

<sup>34</sup> Chawe' naca chia' da ca' dxulaba lazra' ca naca chee',

na' dxebéle'eda' ne chee Xrana' Dios.

<sup>35</sup> Welebía xi' benne' dul-la ca' zaj zre'e lu xęzr la xu nigá,

Na' québedxa cha benne' ca' dxelebéaj xíchaje' Dios.

¡Be lá'ana Xránadxu Dios, lue', bėnne'du xu'a!

¡Le güe lá'ana Xránadxu!

## 105

<sup>1</sup> ¡Le güe lá'ana Xránadxu Dios!

¡Le gucá'ana szren La Le'!

¡Le guzén bėnneache dutę xęzr la xu ca naca da nune'!

<sup>2</sup> ¡Le gul-la chee'!

¡Le gul-la da güe lá'anale Le'!

¡Le guchalaj chee da zrentę ca' da nune'!

<sup>3</sup> ¡Le be lu da naca chee'!

Xúgute benne' ca' dxelapa ba lá'ana Xránadxu dxal-la'

xelébéle'ęne'.

<sup>4</sup> Le naba Xránadxu gácalęne' le'e.

Tu zra tu zra le guxrén lazre' Xránadxu Dios.

<sup>5-6</sup> Le'e, zri'ine zre sua Abraham, wen zrin chee Xránadxu.

Le'e, zri'ine zre sua Jacob, bėnnea' guqué'e,

Le gusá lazre' xel-la' waca ca', ne da zrentę ca' da beęe',

ne ca naca da bchi'e chee.

<sup>7</sup> Le' naque' Xránadxu, ne Dios cheedxu.

Le' dxenná bé'ęne' bėnneache zaj zre'e dutę xęzr la xu.

<sup>8</sup> Lácala te chee chi gaxúa cuen bėnneache,

québequeze gal-la lazre' da guchebe lazre'

lu xel-la' wezría chee',

<sup>9</sup> xel-la' wezría na' bėnleęe' Abraham,

da na' bzetaj cuine' guchebe lazre' chee Isaac,



- 10 na' bzua chúchug' na ca tu da nadxixruj bea na,  
da gun Jacob,  
da gaca na tu xel-la' wezría da zeajlí canna nen  
benne' Israel ca',
- 11 da bene' gate na' gunné': "Chiu' lue' gunna' xezr la xu chee  
benne' Canaán ca',  
da gaca na tu da xudele lu na' zri'ine zre súale."
- 12 Gate na' bábaze zaj naque'  
gulezré'e lu xezr la xu nígá ca benne' zitu' ca',
- 13 ne guledé'e tu xezr la xu xetú xezr la xu, ne tu xezre  
xetú xezre.
- 14 Quebe be' Dios lataj nu benne' bi gung'e chee  
bénneache chee',  
na' ne chee benne' ca' gudil-le' benne' wenná bea ca'.
- 15 Guzre' le': "Quebe bi gunle chee benne' ca' gucá'a,  
ne quebe gunle da calela chee benne' ca' dxuluchalaje'  
waláz chia'."
- 16 Bene' guta' tu gubina' lu xezr la xu na',  
na' gudú'e ca naca xeta xelawe'.
- 17 Gusel-le' tu benne' cuía lawe' lau benne' chie' ca',  
bénnea' naque' José, bi na' belutie'-be' chee gácabe'  
wen zrin chee benne' zitu'.
- 18 Buluzré'e ní'abe' lu xedxu chee cuaga da bexru na ní'abe',  
gate na' gulu'e-be' lizre xia lu xezr la xu Egipto,
- 19 ca bzrin zra guca li ca da gunná José dxal-la' gaca.  
Caní guca, ble'e xrtizra' Xránadxu cúnna' da li.
- 20 Nadxa benne' wenná bea chee Egipto gusel-le'  
nu gusán José na'.
- Bénnea' dxenná bé'ene' zánete cue' xezr la xu bsane'-be'.
- 21 Bzue'-be' gácabe' xrana benne' zaj zré'e lizre',  
ne chee nna be'ebe' ca naca da xu'u lu ne'e,
- 22 chee til-labe' benne' szren ca' chee wenná bea cáteze  
dxaca lázrebe',  
ne chee guzéajni'ibe' benne' gula chee xezr la xu Egipto  
chee xelaque' benne' sina.
- 23 Gudé na' gulu'e benne' Israel ca' lu xezr la xu Egipto,  
na' guzúa Jacob lu xezr la xu chee zri'ine zre sua Cam.
- 24 Gulánle'e bénneache chee Xránadxu lu xezr la xu na',  
na' bene' gulaque' wál-ladxa ca benne' guledábague' Le'.
- 25 Bcha Dios lázxdau benne' Egipto ca' chee xelecuidene'  
bénneache chee',  
chee xelugu'u lazre' xelune' da calela chee wen zrin chee' ca'.
- 26 Nadxa gusel-le' Moisés, wen zrin chee', lau bénneache  
chee' ca', ne Aarón, bénnea' guqu'é.
- 27 Benne' caní be'e Dios lataj belune' xel-la' waca ca'  
chee xabáa,  
ne xel-la' waca zrente ca' lu xezr la xu chee zri'ine zre sua Cam.
- 28 Gusel-la' Dios tu da chul-la da bgacu na duté xezr la xu na',  
san benne' Egipto ca' quebe buluzúe' dizra' da gunná be'ene' le'.
- 29 Nadxa bene' bexaca nisa xegu chee benne' ca' dxen,  
ne betie' xúgute' bela zaj zraba' xegu ca'.

- 30 Busezrate' xezr la xu chee' bluzru ca' ga bzrinte' gulezraba' xu'u lize benne' wenná bea chee' benne' Egipto ca'.
- 31 Gunnaze Dios, na' belelá' zánete be'a chee' bezre, ne be'a lase ca' dutę lu xezr la xu chee' benne' ca'.
- 32 Waláz chee' nisa xiuj gusel-le' xiaj bezxe' lu xezr la xu chee' benne' ca',  
ne xi' da bzezxe na ca naca xezr la xu chee'.
- 33 Bzria xi'e ca zaj naca lba uva chee', ne ca zaj naca xaga higo chee', na' bzúxuje' ca zaj naca xaga zaj zę lu xezr la xu chee'.
- 34 Gunnaze', na' belelá' biche zu ca', da quebe nu seque' gulaba lęba',
- 35 na' guláguba' dutę xixre' xa'a lu xezr la xu chee', ne guláguba' dutę lina da dxunna xezr la xu na'.
- 36 Nadxa bętie' xúgute' bi biu nedxu chee' benne' Egipto ca', bi zaj nácabe' bi blau chee'.
- 37 Bebéaje' bęnneache chee' na' zaj nu'e dumí plata, ne dumí oro,  
na' quebe nu chilá' benne' ládujla lę', benne' quebe chawe' zue'.
- 38 Gulebé benne' Egipto ca' gate beledxúaj benne' ca' ga na', lawe' da belezrébele'e lę'.
- 39 Bzalaј Dios tu beuj da gulú'u na benne' ca' zrul-la, ne tu xi' da bsaní na chee' chizrela.
- 40 Gulenabe' Dios, na' gusel-le' chee' btau ca', ne bęne' gulélajene' xeta da bdxuaj na xabáa.
- 41 Gulę'e tu xiaj xre, na' gulaj nisa da gudę na lu xezr la xu bizre na' ca tu xegu nisa.
- 42 Caní ben Dios lawe' da bsa lazre' xrtizre' lá'azxa da guchebe lazre' gune' chee' Abraham, wen zrin chee'.
- 43 Bebéaje' bęnneache chee' lu xezr la xu Egipto, dxelebene'.
- Lu da ba neza gulezrá' benne' ca' guqué'e.
- 44 Bnézruje' benne' ca' xezr la xu chee' benne' xezica ca', na' da belún benne' xezr la xu ca' bexaca na chee' benne' chee' ca',
- 45 chee' xulupá'ane' ca naca xrba chee' ca', ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

## 106

1 ¡Gaca ba lá'azxa Xránadxu Dios!

¡Le xę Xránadxu Dios: "Xcalenu!"

Caní dxal-la' gunle lawe' da naque' xrlátaje, ne lawe' da tu chí'izqueze dxexache lazre' dxi'u.

2 ¿Núzraqueze seque' gulé'ene' ca naca xel-la' waca zrente' ca' da nune' Xránadxu?

¿Núzraqueze seque' güe lá'ane' Le' ca dxal-la' gundxu?

3 Ba neza zrente' naca na chee' benne' ca' dxelune' da xrlátaje, benne' ca' tu dxelúnzqueze' da naca xrlátaje.

4 Bsa lazre' chia', Xrana' Dios, gate dxunu' da chawe' chee' bęnneache chiu'.

5 Gudá bselá neda' chee gaca le'eda' da chawe' gunu'  
chee benne' ca' ba guca'u Lue',  
ne chee beda' gate xezezá' bénneache chiu' lu da ba neza,  
ne chee bélena' bénneache chiu'.

6 Ba bentu' dul-la cáqueze belún xra xrtáuntu' ca'.  
Bentu' da calela, ne bentu' da zrinnaj.

7 Gate gulezá' xra xrtáuntu' lu xezr la xu Egipto,  
quebe bululaba lazre' ca naca xel-la' waca ca' chee xabáa  
da benu'.

Quebe xeajlesá lazre' ca bexache lázrele'u le'.  
Guledábague' Lue' dxu'a nísadau' da nazí le na Xrna.

8 Le' bselé' benne' ca' chee gaca ba lá'ana La Le',  
ne chee gulé'e lau ca naca xel-la' waca chee'.

9 Gudil-le' nísadau' Xrna na', na' bebizre na,  
na' gulede' bénneache chee' laduj nísadau' na' lu xu bizre.

10 Bselé' benne' ca' lu na' benne' guledábague' Le',  
ne bebéaje' le' lu na' benne' ca' bulusaca zi'e le'.

11 Nadxa nísadau' na' bgacu na benne' ca' guledábague' le'.  
Netú benne' ca' quebe nu begá'ana.

12 Nadxa benne' chee' ca' guléajle'e dizra' chee',  
ne belul-le' da belúe lá'ane' Le'.

13 Chadí gulal-la lazre' ca da bene'.

Quebe gulebeze' ca la' dizra' chee Dios.

14 Gulezá lazre' tu da calela le'e xixre' lawe' lataj na',  
na' buluché'e Dios le'e xixre' na'.

15 Gudé na' bnezruj Dios ca da gulenabe',  
san gusel-le' ládujla le' tu da gute na bal-la benne' ca'.

16 Gulaque' xa lazre' chee Moisés naga zaj zre'e,  
ne chee Aarón, Bénnea' gucá'a Xránadxu Dios.

17 Nadxa bzra xezr la xu na', ne gudebe na Datán,  
ne bgacu na benne' ca' zaj de'e Abiram.

18 Nadxa guxalaj xi' naga zaj nazraga benne' ca',  
na' bzezxe na benne' ca' dxelune' da calela.

19 Belune' tu bedáu' bezre da naca na oro lu xi'a Horeb,  
na' buluzú zribe' lau bedáu' oro na'.

20 Caní bulucá'ane' Dios, Benne' xabáa,  
chee xulucá'ana szrene' tu bedáu' bezre,  
da naca na ca tu bezre dxáguba' xixre'.

21 Gulal-la lazre' Dios, Bénnea' bselé' le',  
Bénnea' bene' xel-la' waca zrente' ca' lu xezr la xu Egipto,

22 ne bene' xel-la' waca ca' chee xabáa lu xezr la xu  
chee zri'ine zre sua Cam,  
ne da ca' buluchebe na dxi'u dxu'a Nísadau' Xrna.

23 Nadxa guca lazre' Dios guzría xi'e bénneache chee',  
san Moisés, bénnea' gucá'a Dios, bzua cuine' lau Dios

chee guzúa zrie' xel-la' dxezrá'a chee Dios,  
na' bene' quebe guzría xi' Dios benne' ca'.

24 Buluzúe' chalá'ala xezr la xu xrtante' da gunezruj Dios le',  
ne quebe guléajle'e dizra' chee'.

25 Tu gulennézqueze' chee Dios lu xu'u xide chee' ca',

ne quebe buluzé nague' da gunná Xránadxu Dios.

<sup>26</sup> Chee le na' bzetaj cuine' gunné' ca da gune' chee benne' ca'.

Gunné' gune' xelate benne' ca' le'e xixre' lawe' lataj na',

<sup>27</sup> ne gusi'e bénneache chee' lu xel-la' stu' lau benne'  
xezr la xu ca',

ne guse dínnaje' le' ládujla benne' xezr la xu ca'.

<sup>28</sup> Nadxa belune' tuze benne' ca' dxulucá'ana szrene'  
bedáu' xia nazí le na Baal-peor,

ne gulawe' béadu ca' belúti'e' lau dios gate ca'.

<sup>29</sup> Buluché'e' Dios ne chee da belune',

na' guxalaj tu xízrawe' zren da bete na benne' zan benne' ca'.

<sup>30</sup> Nadxa guxasa Finees, ne beti'e' bénnea' bene' dul-la,  
na' guleza xízrawe' zren na'.

<sup>31</sup> Da na' ben Finees guzí' Dios ca tu da dxucá'ana xrlátaje na  
bénnea',

da gulé'e' lawe na lau xúgutę cuen bénneache ca'.

<sup>32</sup> Cá'anqueze buluché'e' Dios dxu'a beaj nisa nazí le na  
Meriba,

na' guca da calela chee Moisés ne chee benne' ca',

<sup>33</sup> lawe' da ne chee da belune' guca Moisés xichaj zra'a,

na' bexúbete Moisés da gunné'.

<sup>34</sup> Gate gulu'e' lu xezr la xu nigá quebe buluzría xi'e'  
bénneache zaj nite' ga na'.

Caní guca, quebe belune' ca da guzre Dios le' xelune'.

<sup>35</sup> Gulaque' tuze benne' xezr la xu ca',

ne bulusédie' benne' Israel ca' xelune' ca dxelún benne' ca',

<sup>36</sup> na' bulucá'ana szrene' bedáu' xia xaga ca' chee benne' ca',  
da na' ben na bxrinnaj Dios bénneache chee'.

<sup>37</sup> Belúti'e' zr'i'ine' bi biu, ne bi nu'ula chee'

lau bedáu' chee da xriwe' ca',

<sup>38</sup> ne bululálaje' dxen chee bi dxé'enedu ca',  
bi quebe zaj nunbe' dul-la,

da naca na dxen chee zr'i'ine' bi biu, ne bi nu'ula,

bi ca' belúti'e' lau bedáu' xia xaga ca' chee bénneache Canaán,

na' guca sban xezr la xu na' ne chee dxen chee bidu ca'.

<sup>39</sup> Da ca' belune' ben na le' sban,

na' gulebéaj xíchaję' Dios lu da belune'.

<sup>40</sup> Chee le na' bzrá'ale'e' Dios bénneache chee',

na' gucuídeng' benne' ca' zaj naca chee'.

<sup>41</sup> Nadxa bdeę' benne' ca' lu na' benne' xezr la xu ca',

na' benne' ca' dxelecuide bénneache chee Dios  
gulenná bé'ene' le'.

<sup>42</sup> Benne' ca' guledábague' le' bulusaca zi'e' bénneache  
chee Dios,

ne buluxrinnaje' le' lu xel-la' dxenná bea chee'.

<sup>43</sup> Zánete' lasa Dios bselé' bénneache chee' ca',

san guledábague' ca da bsízrene' le',

na' gulape' xel-la' stu' lawe' da belune' da calela.

<sup>44</sup> Lácala caní belune', gate gulezré'e' lu da stębe,  
Dios gunné'e' ca da dxelezaque',

ne benne' ca da bululáwizre' Le',  
 45 na' xeajsá lazre' xel-la' wezria da bēnleñe' benne' ca,  
 na' bexiáje lazre' chee' xel-la' dxezrá'a chee'  
 lawe' da nácale'e benne' dxexache lazre'.  
 46 Cá'anqueze bēne' belexache lazre' benne' ca'  
 benne' ca' guleché'e le' ca benne' zaj nada'u.  
 47 ¡Bselá netu', Xránantu', nacu' Dios cheentu'!  
 ¡Becá'a netu' ládujla benne' xezr la xu ca',  
 chee' güe lá'anantu' Lau' lá'azxa,  
 ne chee' béle'entu' lu da dxúl-lantu' chiu'!  
 48 Cháwedau' naca Xránadxu, Bēneea' naque' Dios chee'  
 benne' Israel ca' nédxudaute, ne chadía chacanna.  
 Xúgute' bēneache dxal-la' xelenné': ¡Ca'an gaca na!  
 ¡Gaca ba lá'azxa Xránadxu Dios!

## 107

1 ¡Le güe lá'ana Xránadxu, Benne' xrlátaje!  
 ¡Chadía chacanna naque' Benne' zri'i lazre'!  
 2 Da nigá dxal-la' xelenná benne' ca' ba naxá'awe Xránadxu le',  
 benne' ca' bselé' lu na' benne' guledábage' Le'.  
 3 Beché'e le' naga gulezrá' benne' xezr la xu zítu' ca',  
 da zaj zua naga dxalaj gubizra, ne naga dxebia na,  
 ne naga za' be' zaga, ne naga dxedé gubizra beu' zaga ca'.  
 4 Bal-la benne' ca' guledé' le'e xixre' naga quebe bi neza zua,  
 ne quebe belezrelne' xezre naga xelezúe'.  
 5 Guledune', ne gulebílené',  
 ne québedxa bi gulebeza lazre'.  
 6 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 7 Na' buzre'e le' tu neza li,  
 chee' chjaque' tu xezre naga xelezúe'.  
 8 Dخال-la' xelúe lá'ane' Xránadxu lawe' da bexache lazre'  
 Xránadxu le',  
 ne lawe' da bēne' chee' da ca' da dxebánedxu.  
 9 Dxuxí'aje' benne' ca' dxelebile lazre',  
 ne dxugawe' benne' ca' dxeledún nen da chawe' chee'.  
 10 Bal-la benne' caní gulezúe' lu da chul-la, ne lu da stebe  
 chee' xel-la' gute.  
 Gulaque' ca benne' zaj xu'e lizre xia,  
 ne zaj nadxéaj du xia, ne dxeledéé' ba xa',  
 11 lawe' da guledábage' xrtizra' Xránadxu,  
 ne buluzúe' chalá'ala da bzéajni'i Dios zrente le'.  
 12 Belexedú lazre' lu zrin zí'ite' da dxelune'.  
 Xeleajcházie' zran xua da zaj nu'e,  
 ne quebe nu chilá' gácaleñe' le'.  
 13 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 14 Nadxa bebéaje' benne' ca' lu da chul-la  
 ne lu da stebe chee' xel-la' gute,

ne bzúzruje' du xia ca' da zaj nadxéaje'.

<sup>15</sup> Dخال-la' xelúe lá'ané' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

<sup>16</sup> Bchínnaje' dxa xu'u ca' zaj naca na xia gache,  
ne bzúzruje' xia ca' da zaj naxechaj na benne' ca'.

<sup>17</sup> Bal-la benne' ca' gulaque' benne' xala,  
ne guledéé' xel-la' zi' ne chee' dul-la da zaj nabague',  
ne ne chee' da zrinnaj ca' da belune'.

<sup>18</sup> Belexegútene' da dxelé'aj dxelawe',  
na' xáteze ca gulátie'.

<sup>19</sup> Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

<sup>20</sup> Gusel-le' dizra' chee' chee' benne' ca',  
na' bexune' le', ne bselé' le' lu xel-la' gute.

<sup>21</sup> Dخال-la' xelúe lá'ané' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

<sup>22</sup> Dخال-la' xelé'e Le': Xcalenu'.

Dخال-la' xelú'e da xulunézruje' Le',  
na' lu xel-la' dxelebé chee' dxal-la' xelúl-le',  
ne xuluzenne' bénneache ca zaj naca da nune'.

<sup>23</sup> Bal-la benne' ca' guledéé' lu nísadau'  
lu da zren ca' da dxedá lawe' nísadau'.  
Belezi'e dumí zren lu zrin dxelune' lu nísadau'.

<sup>24</sup> Belelé'ene' ca naca da ca' dxun Xránadxu,  
da ca' dxune' lu nísadau' da zaj naca na da dxebánedxu.

<sup>25</sup> Gunnéze', na' guzú lau dxaca be' bdunu',  
na' gulasa xeajxruza zren lu nísadau'.

<sup>26</sup> Belegüén da dxedá lawe' nísadau' ca' ca lu xi'a zri'a  
da naca na nísadau',

na' belexexetaj na lu da situj lawe' nísadau' na'.

<sup>27</sup> Gulechégüe', ne xeajleté' ni xeajleté' na' ca  
benne' dxelezuzre,

na' guca dácheze ca da zaj nusédie'.

<sup>28</sup> Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

<sup>29</sup> Bzua zrie' be' bdunu' na' da dxaca na,  
ne gulezúa zri xeajxruza chee' nísadau' na'.

<sup>30</sup> Gulebéle'ene' lawe' da zaj zua zri xeajxruza ca',  
na' guché'e Dios le' cháwedau' naga zjaque'.

<sup>31</sup> Dخال-la' xelúe lá'ané' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

<sup>32</sup> Dخال-la' xuluzenne' ca naca xel-la' szren chee' naga  
zaj nazraga bénneache chee',

ne xelúe lá'ané' Le' naga zaj nazraga benne' gula ca', benne'  
dxeleenná be'e.

<sup>33</sup> Ben Xránadxu gulebizre xegu nisa ca',  
ne busú'aje' beaj nisa ca'.

<sup>34</sup> Xu xa'a bexune' na xu bizre,  
ne chee' da caléla da belún benne' ca' zaj zre'e na'.

35 Naga naca xu bizre bexunē' na xu nisa,  
 na' xu xiaj bexunē' na naga dxalaj nisa.  
 36 Bzrē'ē ga na' benne' ca' benne' dxeledún,  
 na' belunē' tu xezre naga xelezúē'.  
 37 Gulazē' xezr la xu na', na' belexazē' lba uva ca',  
 na' belexezi'le'ē lina cheē na.  
 38 Benē' da chawe' cheē benne' ca', na' gulánle'ē  
 bídu cheē' ca',  
 ne quebe be'ē lataj xelesase ca zaj naca be xixre' cheē' ca'.  
 39 Gate buludé benne' dxelenná bea benne' ca' lu xel-la' zi',  
 ne bulusaca zi'ē le',  
 ne gulenná bé'edxene' le', ne belunē' le' da calēla,  
 ne buludé' le' lu da ba xa',  
 40 bca'ana ditaj Díos benne' xíchajē ca',  
 ne benē' guledé' le'ē xixre' lawe' lataj naga quebe bi neza de.  
 41 Bselé' benne' xache' ca' lu da zi' da xa' da dxeledé',  
 ne bzánle'ē zri'ine benne' ca' ca dxelán zrila' ca'.  
 42 Gate dxelelé'ē benne' xrlátaje ca' da caní, na' dxelebé'ē'ēnē',  
 na' benne' ca' dxelunē' da calēla quebe bi gaca xelenné'.  
 43 Benne' ca' zaj naque' sina dxal-la' xulaba lazre'  
 ca zaj naca da caní,  
 ne dxal-la' xelexúnbe'ē ca naca xel-la' zri'i lazre'  
 cheē Xránadxu.

## 108

1 Ba zúatequeze lázrdawa', Díos,  
 cheē gúl-laqueza' da güe lá'ana' Lue'.  
 Da nigá dxugú'u na neda' lu da ba neza.  
 2 Bebán lazre', bénne'du xu'a, na' le xebán lázrele,  
 le'ē dxínnele da dxúl-lalēnle, ne da con zríadi'i na du.  
 Che zílala cheajsá'queza'.  
 3 Güe lá'anaqueza' Lue' ládujla bénneache chiu', Xran.  
 Gúl-laqueza' chiu' lau benne' dutē xezr la xu,  
 4 lawe' da naca xel-la' dxexache lazre' chiu' zrendxa ca xabáa,  
 na' da li chiu' naca na zrendxa ca beuj bza ca'.  
 5 Xegá'ana szrénquezu' xabáa, Díos.  
 Xel-la' szren chiu' sua na lawe' dutē xezr la xu.  
 6 Cheē xeledá benne' ca' nazrí'iqueznu' Lue',  
 bselá le' dutē xel-la' waca chiu', ne bene chia'.  
 7 Lu lataj lá'azxa cheē' gunná Díos: "Wabéquezda' neda'.  
 Gunna' late weaj cheēle xezr la xu cheē benne' Siquem ca',  
 ne gudixra' cheēle xezr la xu de cuite xegu Sucot.  
 8 Chia' naca xezr la xu Galaad,  
 ne chia' naca xezr la xu cheē zri'ine zre sua Manasés.  
 Xezr la xu cheē zri'ine zre sua Efraín naca na ca tu  
 da napa chi'i na xíchaja'.  
 Xezr la xu cheē zri'ine zre sua Judá naca na naga dxenná be'a.  
 9 Xezr la xu cheē benne' Moab naca na ca tu zriga'  
 da xuzru nisa guná'a,

na' lu xęzr la xu cheę benne' Edom chu'una' zrela' gula.  
Si'a ba neza xęzr la xu cheę benne' Filistea."

10 ¿Nuzra che' neda' cheę chu'a xęzre da naxechaj ze'e sibe?

¿Nuzra che' neda' cheę guzétaja' benne' Edom ca'?

11 ¿Quegá Lue' na' che'u neda', Dios.

Nacu' Bénnea' bzua netu' chalá'ala,

ne quebe guxéajlenu' benne' cheęntu' ca', benne' dxjaque'  
wedil-la, Díos?

12 Gúcale netu' cheę séquentu' tíl-lalęntu' benne' ca'  
dxeledíl-lalęne' netu',

lawe' da naca dácheze xelácale bėnneache netu'.

13 Tu zren nen Dios gundxu tu da zrente,

na' Le' gulague' benne' ca' dxeledil-lalęne' dxi'u.

## 109

1 ¡Dios, dxue lá'ana' Lue'!

Quebe xegá'anu' zrize

2 lawe' da dxelenná benne' ca' dxelunę da calela,  
ne benne' wen lazre' ca' chia' neda'.

Dxelennę' chia' da naca da wen lazre'.

3 Lu xel-lá' dxelecuide cheę' zaj naxéchaję' neda',  
ne dxelennę' chia'.

Dxeledíl-lalęne' neda', ne quebe bi nuna' cheę benne' ca'.

4 Lácala bzri'ida' benne' ca', na'a dxeledábague' neda',  
san neda' dxenaba' gaca da chawe' cheę benne' ca'.

5 Lácala beña' neda' da chawe' cheę benne' ca', dxelunę' chia'  
da calela,

ne lácala bzri'ida' le', dxelecuídęne' neda'.

6 Bzua tu benne' wen da zrinnaj cheę guchi'e cheę  
benne' wen da calela ca',

ne beñ sua tu benne' nnie' cheę benne' ca',

benne' guzúę' ca' naca da calela belún benne' ca'.

7 Gate na' zri'a cheę', beñ gaca bea na zaj nabague' zria.

Ble'e da xelenabe' lau' ca' tu dul-la da dxelunę'.

8 Bzache zra xelaca ban benne' ca',  
ne beñ xelú'u xezica' benne' waláz cheę'.

9 Bca'ana zrí'ine' ca' bidau' wezębe,  
ne xelaca zru'ule' nu'ula tuze ca'.

10 Beñ xelaca zrí'ine' bi dxeledaze cheę xelenábabe' guna',  
ne beñ xelezrélebe' xeta xelágube' zitu' naga zaj zua lízrebe'  
da zaj naxinnaj.

11 Beñ xelú'u da ca' zaj nape' lu na' bėnne' ca'  
bulusanę' le' dumí.

Beñ xelexúa benne' zitu' ca' da ca' zaj nune'.

12 Beñ quebe nu zrel-la benne' xexache lazre' le',

ne quebe nu benne' zrel-la xexache lazre' bidau' wezębe  
cheę' ca'.

13 Beñ xelebía xi' zri'ine zre sua benne' ca',

ne québedxa nu cha' zri'ine zre sue',

si' le' ca' zaj nazi'i la benne' ca'.

14 Bsa lazre' ca' da calela da belún xra xrtawe', Xran,  
ne quebe xusulu' dul-la da gulún xrne'e ca'.



- 15 Tu chí'izqueze bsa lazre' ca da calëla da zaj nune'.
- Québedxa cheajsá lazru' benne' ca'
- 16 lawe' da quebe xeleajsá lazre' xelexache lazre' le sa' ljwezre' ca', san bulusaca zi'e benne' baxache' ca', benne' dxelexájrjeng', ne benne' dxexruij lazre' ca', na' belútië' bënne'du ca'.
- 17 Beledáneñe' da dxugú'u na de', na' da caníze guca na chee'.
- Quebe gulaca lazre' xelenabe' gaca chawe' chee' bënneache, na' da chawe' bebiga na naga zaj zue'.
- 18 De' da gulegú'e bënneache guca na ca tu da gulacu cuine', na' guxú'u na le'e ca nisa gulé'ajé', ne guxú'u na zrita chee' ca da za.
- 19 Tu chí'izqueze ben gaca na chee' ca xicha da dxelácuë', ne gaca na ca tu xpádxue' dxuluchela le'e.
- 20 Gaca da nigá da quizruj Xránadxu Dios benne' ca' dxelenné' calëla chia', ne da quízrujë' benne' ca' dxelune' da calëla, ne dxelenné' calëla chee' bënne'du xu'a.
- 21 Xrana' Dios, bën culuén chia' chee' xegá'ana' xrlátaje lau'.
- Bselá neda' lawe' da dxexache lázrele'u bënneache,
- 22 ne lawe' da dxezaca zi'a, ne dxexájrjeda', ne dxeque zi' lázrdawa'.
- 23 Dxedé chia' ca dxedé chee' tu zrul-la gate dxebía gubizra. Dxaca chia' ca dxaca chee' biche xuaj gate dxua be' leba'.
- 24 Dxelate zriba' lawe' da dxuna' gubasa, ne nazrítalë'a lawe' da quebe bi dxawa'.
- 25 Naca' ca tu da dxulucá'ana dítajé'.
- Dxelenné'e neda', ne dxelún le' chia', dxulutá xíchajé'.
- 26 Gúcalë neda', Xrana' Dios.
- Bselá neda' lawe' da dxexache lazru' bënneache.
- 27 Bën xeleque be'enë' Lué'queze dxácalënu' neda'.
- Lué'queze, Xrana' Dios, ba nunu' da nigá.
- 28 Dxelegu'e neda' de', san bën Lue' gaca chawe' chia'.
- Guxasa, bën xelexedué'e benne' ca' dxeledábage' neda', san bën beda' neda'.
- 29 Bën xelëzrá' lu xel-la' stu' benne' ca' dxelenné' da calëla chia'.
- Bën xeleque zréajeng' tu chí'izqueze.

30 Du lazra' gúl-laqueza' da güe lá'analë'a Xránadxu Dios. Ládujla benne' zan ca' güe lá'ana' Le'.

31 Le' zue' cuita xabela chee' benne' xache' ca' chee' guselé' bënne'du zaj xu'e lu na' benne' ca' dxuluchi'e chee'.

## 110

1 Xránadxu Dios guzre' Xrana': "Gudxé'e chalá'a xabela chia' cadxa zrin zra guna' ga benne' ca' dxeledábage' lue' xuluzúa zribe' lau'."

2 Naga zu' Sión, gun Xránadxu zriluj xel-la' dxenná bea chiu'. Dxenné': "Gunná be'e benne' ca' dxeledábage' lue'."

3 Lu zra gate tíl-lalenu' benne' ca' dxeledábague' lue',  
du lázrequeze benne' chiu' ca' chjaque' wedil-la.  
Ca dxun xrlé'ela chee' bálala, dxacu na xi'a lá'azxa,  
caníqueze xelaca benne' cuide' chiu' ca',  
xelelé'ē naga zu' xelácalene' lue'."

4 Guchebe lazre' Xránadxu, ne quebe gunítie' xrtizre',  
gunné': "Chadía chacanna nacu' bxruze ca guca bxruze  
Melquisedec."

5 Zua Xránadxu chalá'a xabela chiu'.  
Gate zre'e, na' guzría xi'e benne' wenná bea ca'.

6 Guchi'e chee' benne' dute' xezr la xu, na' gutie' zánete  
benne' xezr la xu ca'.

Guzría xi'e benne' dxelenná be'e dute' xezr la xu.

7 Xi'aj benne' wenná bea nigá nisa xégudu zua na dxu'a neza,  
na' xexape' xel-la' wal-la chee'.

## 111

1 Dute' lázrdawa' güe lá'ana' Xránadxu Dios tu zren nen  
benne' xrlátaje ca', benne' zaj nazrague' lau Le'.

2 Da zrente' zaj naca da ca' nun Xránadxu Dios,  
na' xúgute' benne' ca' dxelezaca ba lázrele'ne' da nune',  
ne dxelaca lazre' xelelé'enge' na.

3 Da xabáa, ne da xrtante' zaj naca da dxune' Le',  
ne tu chí'izqueze zua da xrlátaje chee'.

4 Dxune' dxeajsá lázredxu ca naca xel-la' waca zrente'  
da dxune'.

Xránadxu Dios naque' zren lazre', ne dxexache lazre'  
bénneache.

5 Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la' wezría da nune'.

6 Blé'enge' bénneache chee' ca' ca naca xel-la' waca chee'  
da ca' bene'.

Dxunézruje' benne' chee' ca' da zaj napa benne' xezica  
xezr la xu ca'.

7 Li lazre', ne xrlátaje zaj naca da ca' dxune'.

Li lazre' zaj naca xúgute' da bdxixruj be'e.

8 Tu chí'izqueze, ne chadía chacanna zaj zua da ca' bdxixruje'.  
Lu da li, ne lu da li lazre' nune' ca zaj naca na.

9 Gusel-le' tu benne' weselá chee' guselé' bénneache chee'.

Tu chí'izqueze nadxixruj be'e xel-la' wezría chee'.

Lá'azxa, ne tu da zrédexu naca La Le'.

10 Chee' su laudxu gácadxu sina, dxun na ba xen zrédexu  
Xránadxu Dios.

Dxeléajni'i xanne' xúgute' benne' ca' dxelune' ca zaj naca  
da nadxixruje'.

Tu chí'izqueze dxal-la' güe lá'anadxu Le'.

## 112

1 Ba neza zrente' naca na chee' bénnea' dxezrebe'  
Xránadxu Dios,

ne ca zaj naca da bdxixruj be'e dxezaca ba lázrele'ne'.

<sup>2</sup> Zri'ine zre sua b́ennea' xelape' xel-la' dxenná bea  
 lu xęzr la xu,  
 na' gaca chawe' cheę benne' xrlátaje ca'.  
<sup>3</sup> Da zan da dę, ne xel-la' gunnı́'a zaj zra na xu'u lizre',  
 ne tu chí'izqueze zua da xrlátaje da dxun b́ennea'.  
<sup>4</sup> Dxusanı́' tu xi' lu da chul-la naga zaj zra' benne' li lazre' ca',  
 benne' ca' zaj naque' zren lazre', ne xrlátaje,  
 ne dxelexache lazre' b́enneache.  
<sup>5</sup> Tu benne' xrlátaje dxexache lazre' b́enneache,  
 ne dxusanę' le' dumı́.  
 Lu da xrlátaje dxenná bé'engę' da zaj xu'u lu nę'e.  
<sup>6</sup> Cheę le' na' quebe bi gutá na le' lu lataj naga zue',  
 na' tu chí'izqueze xeajlesá lazre' b́enneache ca'.  
<sup>7</sup> Quebe zrebę' gate xenne' dxaca da calęla cheę  
 da xu'u lu nę'e.  
 Ze chacha lázrdawę' lawe' da dxuxrén lazre' Xránadxu Dios.  
<sup>8</sup> Zua chawe' lázrdawę', ne quebe bi dxezrebę',  
 ca zrindxa zra lé'engę' gaca cheę benne' ca' guledábage' le'  
 ca da dxezá lazre'.  
<sup>9</sup> Dxisie' da dę cheę', ne dxunézruje' da gácale  
 benne' xache' ca',  
 ne tu chí'izqueze zua da xrlátaje da dxunę'.  
 Lu da xabáa xegá'ana szren xel-la' dxenná bea cheę'.  
<sup>10</sup> Walé'e benne' węn da calęla da nigá, na' gueque zréajengę'.  
 Gágu xa'atę lazre', ne cue'ę gunne xue.  
 Xelenite da ca' dxelezá lazre' benne' ca' dxelunę' da calęla.

## 113

<sup>1</sup> ¡Le'e, węn zrin cheę Xránadxu Dios, le güe lá'ana Le'!  
 ¡Le güe lá'ana La Xránadxu Dios!  
<sup>2</sup> ¡Gaca ba lá'azxa La Xránadxu Dios,  
 na'a zra, ne chadía chacanna!  
<sup>3</sup> ¡Naga dxalaj gubizra ca zrintę naga dxebía na  
 gaca ba lá'azxa La Xránadxu Dios!  
<sup>4</sup> ¡Szrentę nagá'ana Xránadxu Dios lawe' dute xęzr la xu,  
 na' lówela xabáa dxe' da xabáa cheę'!  
<sup>5</sup> ¿Núzraqeze naca ca naca Xránadxu Dios,  
 B́ennea' dxe'e xabáa na'la?  
<sup>6</sup> Dios dxun cuinę' dxexruj lazre' cheę lé'engę'  
 da dę zran xabáa, ne lu xęzr la xu.  
<sup>7</sup> Dios dxechise' benne' xache' lu xu xrte,  
 ne dxebéaję' benne' baxache' lu da dxezaca zi'e,  
<sup>8</sup> na' dxunę' dxelebé' benne' canı́ ládujla benne'  
 dxelenná be'e,  
 ládujla benne' ca' dxelenná bé'engę' b́enneache cheę'.  
<sup>9</sup> Dxunę' zua nu'ula zue' tuze ládujla zrí'inequezę' ca',  
 na' dxebé nu'ula nigá lawe' da naque' xrna bi cheęqueze'.  
 ¡Gaca ba lá'azxa Xránadxu Dios!

## 114

<sup>1</sup> Gate beledxúaj benne' Israel ca' lu xęzr la xu Egipto,  
beledxúaj zri'ine zre sua Jacob lu xęzr la xu chee  
benne' zitu' ca',

<sup>2</sup> na' gulaca zri'ine zre sua Judá ca tu xu'u lizre Dios,  
gulaca benne' Israel ca' naga dxenná be'e.

<sup>3</sup> Ble'e Nísadau' Xrna da nigá, na' bzrunnuj na,  
na' gugá xegu Jordán.

<sup>4</sup> Gulexrite xi'a zri'a ca' ca dxelexrite chivo ca',  
na' gulexrite xi'adu ca' ca dxelexrite chíbudu ca'.

<sup>5</sup> ¿Bizra guca chiu', nísadau', lawe' da ben na bzrunnuju'?  
¿Bizra guca chiu', xegu Jordán, lawe' da ben na gugú'?

<sup>6</sup> Le'e, xi'a zri'a ca', ¿Bizr chee na' guxrítele ca dxelexrite  
chivo ca'?

Le'e, xi'adu ca', ¿Bizr chee na' guxrítele ca dxelexrite  
chíbudu ca'?

<sup>7</sup> Dxezrize xęzr la xu lau Xránadxu Dios, lau Dios chee Jacob.

<sup>8</sup> Dios nigá bene' bexaca xiaj xre' tu beaj nisa,  
na' bexaca xiaj tu ga dxalaj nisa.

## 115

<sup>1</sup> Quegá netu', Xran.

Quegá cuintu', san Lué'queze dxal-la' xucá'ana szrentu'  
ne chee xel-la' zri'i lazre' chiu', ne xel-la' li lazre' chiu'.

<sup>2</sup> ¿Bizr chee na' dxun na ba xen xuluchebe bėnneache netu':  
"Gazra zua Dios cheele?"

<sup>3</sup> Dios cheedxu zue' xabáa.

Dxunę' ca da dxaca lızrequeze'.

<sup>4</sup> Dios ca' chee benne' ca' zaj naca na bedáu' plata,  
ne bedáu' oro, da nun ni'a na' bėnneache.

<sup>5</sup> Zaj zua dxu'a na, san quebe dxelennę na.

Zaj zua xiaj lau na, san quebe dxelelé'e na.

<sup>6</sup> Zaj zua naga na, san quebe dxelén na.

Zaj zua zrına na, san quebe dxelelé'e na.

<sup>7</sup> Zaj zua na' na, san quebe bi dxelecá'a na.

Zaj zua ni'a na, san quebe dxeledá na.

Quebe dxedxuaj chi'i na lba na.

<sup>8</sup> Ca zaj naca na, zaj naca benne' ca' zaj nunę' na,  
ne benne' ca' dxuluxrén lazre' na.

<sup>9</sup> Le' guxrén lazre' Xránadxu, le'e, benne' Israel ca'.

Le' dxácalęne' le'e, ne dxuxúę' le'e.

<sup>10</sup> Le' guxrén lazre' Xránadxu, le'e, bxruze chee Dios,  
nácale zri'ine zre sua Aarón.

Le' dxácalęne' le'e, ne dxuxúę' le'e.

<sup>11</sup> Le' guxrén lazre' Xránadxu, le'e dxucá'ana szrenle Le'.

Le' dxácalęne' le'e, ne dxuxúę' le'e.

<sup>12</sup> Xránadxu dxajsá lazre' dxi'u, na' gunę' dxi'u da chawe'.

Gunę' da chawe' chee benne' Israel ca'.

Gunę' da chawe' chee bxruze chee', zri'ine zre sua Aarón.

<sup>13</sup> Gunę' da chawe' chee xúgutę benne' dxelape' Le' ba lá'ana,  
benne' blau ca', ne benne' quebe zaj naque' blau.

14 Gun Xránadxu chan zri'inu' ca',  
ne chan zri'ine bi biu chiu' ca'.  
15 Gun Xránadxu da chawe' chiu'.  
Naque' Bénnea' ben xabáa, ne xezr la xu.  
16 Chee tuze Xránadxu naca xabáa,  
san bnézruje' benneache xezr la xu.  
17 Benne' zaj nate quebe gaca xelúe lá'ane' Xránadxu,  
ne quebe gaca benne' ca' zaj zue' lu xedxu ba.  
18 Dxi'u, benne' ban, güe lá'anadxu Xránadxu,  
na'a zra, ne chadía chacanna.

¡Le güe lá'ana Xránadxu!

## 116

1 ¡Nazrí'ida' Xránadxu Dios  
lawe' da benne' chi'a, ne da gunaba' lawe',  
2 ne lawe' da bze nague' chia!  
Chee le na' guláwizra' Le' dxácate naca bana'.  
3 Guzúa' lu da stēbe chee xel-la' gute,  
ne bzreba' ba zua' chu'a lataj ba xa'.  
Guzúa' lu da stēbe, ne guzaca zí'a.  
4 Nadxa bláwizra' Xránadxu Dios, gunnía':  
Xrana' Dios, bselá benne'du xu'a.  
5 Cháwe'le'e naca Xránadxu Dios, ne xrlátaje naque'.  
Awe', dxexache lazre' Dios cheedxu dxi'u.  
6 Dxuxúe Xránadxu benne' dxexruj lazre' ca'.  
Gate na' guzúa' lu da stēbe bselé' neda'.  
7 Ben dipa lazre', benne'du xu'a,  
lawe' da nun Xránadxu da chawe' chiu'.  
8 Lue', Xran, bseláu' benne'du xu'a lu na' xel-la' gute,  
chee québedxa cuezre we'a, ne chee quebe cheajcházia'.  
9 Ta' lau Xránadxu Dios  
naga zaj zra' benne' ca' zaj naca bané'.  
10 Guxéajle'a chee', na' chee le na' bchálaja', lácala guzaca zí'le'a.  
11 Lu xel-la' dxezrebe chia', gunnía':  
Zaj naca xúgutē benneache benne' wen lazre' ca'.  
12 ¿Bizra quízrujqueza' Xránadxu Dios  
chee xúgutē da chawe' da bene' chia'?  
13 Si'a lu ne'e xel-la' weselá,  
ne guláwizra' Xránadxu Dios.  
14 Na'a guna' da ca' guchebe lazra' lau Xránadxu.  
Guna' na lau xúgutē benneache chee'.  
15 Xránadxu Dios dxe'e gunne xue  
chee benneache chee' gate dxelátie'.  
16 Xrana' Dios, da li naca' wen zrin chiu'.  
Naca' wen zrin chiu', ne zri'ine nu'ula wen zrin chiu'.  
Lue' bzúzruju' da zaj nadxéaj na neda'.  
17 Da güe lá'ana' Lue' gaca na ca tu béadau' gutia' lau',

ne gucá'ana szrena' Lau', Xrana' Dios.

<sup>18</sup> Lau Xránadxu Dios guna' da ca' guchebe lazra' chee',  
da guna' lau xúgutę bénneache chee'.

<sup>19</sup> Guna' na chale'aj xu'u lizre Xránadxu Dios,  
da dxe' na lu'ule xezre Jerusalén.

¡Gaca ba lá'azxa Xránadxu Dios!

## 117

<sup>1</sup> ¡Le güe lá'ana Xránadxu Dios, le'e, benne' dutę xezr la xu!

¡Le güe lá'ana Le', le'e, xúgutę bénneache,

<sup>2</sup> lawe' da zrentę naca xel-la' zri'i lazre' chee' ca nazr'ine' dxi'u,  
ne chadía chacanna naca xel-la' li lazre' chee'!

¡Le güe lá'ana Xránadxu!

## 118

<sup>1</sup> ¡Le güe lá'ana Xránadxu Dios lawe' da naque' xrlátaje,  
ne lawe' da chadía chacanna dxexache lazre' dxi'u!

<sup>2</sup> Dخال-la' xelenná benne' Israel ca':

¡Chadía chacanna dxexache lazre' dxi'u!

<sup>3</sup> Dخال-la' xelenná zri'ine zre sua Aarón:

¡Chadía chacanna dxexache lazre' dxi'u!

<sup>4</sup> Dخال-la' xelenná benne' ca' dxelezrebe' Xránadxu Dios:

¡Chadía chacanna dxexache lazre' dxi'u!

<sup>5</sup> Gate na' guzúa' lu da stębe bláwizra' Xránadxu Dios,  
na' bechebe Xránadxu, ne bselé' neda' lu da na'  
bexru na neda'.

<sup>6</sup> Zualę Xránadxu neda', na' québequeze zreba'  
bi xelún bénneache chia' neda'.

<sup>7</sup> Zúialę Xránadxu neda' ládujla benne' ca' dxelácalę' neda'.

Cheę le na' le'eda' cheajlechaze benne' ca' dxelecuídę' neda'.

<sup>8</sup> Cháwe'dxa naca guxrén lázredxu Xránadxu Dios  
quęzcala guxrén lázredxu bénneache.

<sup>9</sup> Cháwe'dxa naca guxrén lázredxu Xránadxu Dios  
quęzcala guxrén lázredxu benne' dxeleenná be'e.

<sup>10</sup> Gulechaj benne' xúgutę cue' xezr la xu neda',  
na' lu La Xránadxu Dios guzría xi'a benne' ca'.

<sup>11</sup> Gulęchaję' neda', ne buluchídę' neda',  
na' lu La Xránadxu Dios guzría xi'a benne' ca'.

<sup>12</sup> Gulęchaję' neda' ca dxelún bęscutuche',  
na' guca xel-la' dxelezá'a chee' ca tu xi' da dxuzezxe na  
xixre' xeche' bizre,

na' lu La Xránadxu Dios guzría xi'a benne' ca'.

<sup>13</sup> Buluzriguę' neda' cheę cheajcházia'

na' gúcalę Xránadxu Dios neda'.

<sup>14</sup> Naca Xránadxu Dios ca tu xu'u naga zua chawa',  
na' tu gúl-lazqueza' chee' lawe' da Lęqueze' dxuselé' neda'.

<sup>15</sup> Xel-la' dxelebé dxelul-la benne' xrlátaje ca'  
lawe' da dxuselá Xránadxu le'.

Dute xel-la' waca chee' dxun Xránadxu Dios da zrente ca'.  
 16 Szrente nagá'ana xel-la' waca zren chee Xránadxu Dios.  
 Da zrente ca' dxun xel-la' waca zren chee Xránadxu.  
 17 Québequeze gatia', san gaca bana',  
 na' guzenda' bènneache ca zaj naca da nun Xránadxu.  
 18 Bde Xránadxu neda' lu da ba xa',  
 san quebe bdee' neda' lu na' xel-la' gute.

19 Gusalaj dxa xu'u chee chu'a naga guchi'u chia', Xran,  
 na' chu'a na', ne güe lá'ana' Lue', Xrana' Dios.

20 Dxa xu'u nigá naca na chee Xránadxu Dios.  
 Dxa xu'u nigá dxelú'u benne' xrlátaje ca'.

21 Güe lá'ana' Lue', Xran, lawe' da bennu' chia',  
 ne bseláu' neda' lu da guca chia'.

22 Xiaj na' da buluzúa benne' wen xu'u ca' chalá'ala,  
 le' na' naca na xiaj blau.

23 Da nigá ben Xránadxu,  
 na' naca na tu da dxexebánedxu.  
 24 Zra nigá naca na zra da ben Xránadxu.  
 Béle'edxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu' na'a.  
 Dxata' xueda' Lue', Xrana', gunu' chepe ban na'a da dxuntu'.

26 Ba neza zrente naca na chee bènnea' ze'e waláz chee  
 Xránadxu Dios.

Lu xu'u lizre Xránadxu Dios nigá dxenábantu'  
 gaca chawe' chiu'.

27 Xránadxu naque' Dios, ne ba bènne' dxi'u tu da dxusaní na.  
 Le guchéaj béadu ca' gütele lawe' lu luzu cugu chee'.

28 Nacu' Lue' Dios chia', na' güe lá'ana' Lue'.  
 Dios chia', gucá'ana szrena' Lue'.

29 Le güe lá'ana Xránadxu Dios lawe' da naque' xrlátaje,  
 ne lawe' da chadía chacanna dxexache lazre' dxi'u!

## 119

### *Da dxun da bdxixruj be'e Dios dxi'u*

1 Ba neza zrente naca na chee benne' ca' tu dxelúnzqueze'  
 da naca du lazre',  
 benne' ca' tu dxelúnzqueze' ca dxenná da bdxixruj bea  
 Xránadxu Dios.

2 Ba neza zrente naca na chee benne' ca' tu dxelúnzqueze'  
 ca dxusede dizra' chee' dxi'u,  
 na' dute xichaj lázrdawe' dxuluzúe' dizra' chee'.

3 Benne' caní québequeze dxelunge' da zrinnaj,  
 benne' ca' tu dxelúnzqueze' ca dxenná Dios dxal-la' xelunge'.

4 Lue', Xran, bsízrenu' netu' chee gun xánnentu'

ca zaj naca da bdxixruj be'u Lue'.

<sup>5</sup> Dxaca lázreġ'a tu gúnzqueza'  
ca zaj naca xrba chiu'.

<sup>6</sup> Nadxa québequeze xedué'eda',  
na' cue'a gunne xue guna' xúgute da bdxixruj be'u.

<sup>7</sup> Dute xel-la' li lazre' chia' güe lá'ana' Lue' gate ba nusédia'  
da ca' nuchi'u cheentu', da zaj naca na xrlátaje.

<sup>8</sup> Tu gúnzqueza' ca da dxenná be'u.  
Québequeze cueaj xíchaju' neda'.

*Dxal-la' gundxu da gunnáqueze Dios*

<sup>9</sup> ¿Ájala gun benne' cuide' gunbe' da naca na xrlátaje?  
Dxal-la' tu gúnzquezebe' ca dxenná xrtizru'.

<sup>10</sup> Dute xichaj lázrdawa' dxuna' ba xuzre guna'  
da dxennáu' Lue'.

Quebe gu'u lataj guzúa' chalá'ala ca da bdxixruj be'u.

<sup>11</sup> Lu xichaj lázrdawa' tu dxúnzqueza' ca da dxennáu' Lue'  
chee xuebe guna' dul-la tábaga' Lue'.

<sup>12</sup> Ba lá'azxa nacu' Lue', Xrana' Dios.

Bséde neda' da ca' dxenná be'u.

<sup>13</sup> Nen dxú'aqueza' ba bzenda' bénneache  
ca zaj naca da ca' nuchi'u cheentu'.

<sup>14</sup> Dxebéġ'edxeda' tu dxúnzqueza' ca dxusede dizra' chiu' netu',  
quez ca dxelebé benne' ca' déġe'ġe xel-la' gunní'a chee'.

<sup>15</sup> Gulaba lazra' ca zaj naca da bdxixruj be'u Lue',  
ne nna' xánnia' ca dxennáu' dxal-la' guntu'.

<sup>16</sup> Béġe'eda' guna' ca da dxenná be'u,  
ne quebe gal-la lazra' ca zaj naca xrtizru'.

*Dxebéġ'edxu dxundxu da dxennáqueze Dios*

<sup>17</sup> Ben gaca chawe' chia' neda', wen zrin chiu',  
na' gaca bana', ne tu gúnzqueza' ca naca xrtizru'.

<sup>18</sup> Gusalaj xiaj lawa' chee nna'a  
da zrente' ca' da zaj zua na lu da bdxixruj be'u.

<sup>19</sup> Naca' ca tu benne' dxedaze' lu xezr la xu nigá.  
Ben chéajni'ida' da dxenná da bdxixruj be'u.

<sup>20</sup> Dxedú lazra' lawe' da tu chí'izqueze  
dxezá lazra' guna' da ca' nuchi'u cheentu'.

<sup>21</sup> Gudil-lu' benne' ca' dxulucá'ana szren cuine',  
benne' wen da calela ca',

benne' ca' dxuluzúe' chalá'ala da bdxixruj be'u.

<sup>22</sup> Quebe gu'u lataj nu benne' nne' schanni' chia',  
na' quegá gucá'ana dítaġe' neda'

lawe' da tu dxúnzqueza' ca dxusédenu' netu'.

<sup>23</sup> Cá'aqueze benne' dxelenná bea ca' gulenné' chia'.  
Neda', wen zrin chiu', blaba lazra' ca zaj naca xrba chiu'.

<sup>24</sup> Dxezaca ba lázreġena' da dxusede dizra' chiu' netu'.  
Dxuluzéajni' na neda'.

*Dute lázrdaudxu gundxu da dxennáqueze Dios*

<sup>25</sup> Zua bénne'du xu'a lu da stebe chee xel-la' gute.



Ben dipa xichaj lázrdawa' nen xrtizru'.

<sup>26</sup> Ble'eda' Lue' ca zaj naca da dxuna', na' bezi'u neda'.

Bsede neda' ca zaj naca xrba chiu'.

<sup>27</sup> Ben chéajni'ida' ca gaca guna' ca bdxixruj be'u

cheę gulaba lazra' ca zaj naca da zrente' ca' da benu'.

<sup>28</sup> Dxedú lazra' lawe' da dxewí'ine lázrele'a.

Bexru chacha neda' ne cheę xrtizru'.

<sup>29</sup> Quebe gu'u lataj guna' da naca na wen lazre'.

Lu xel-la' dxexache lazre' chiu' bsede neda' da bdxixruj be'u.

<sup>30</sup> Bechugu lazra' guna' da naca li lazre',

na' dxe'a gunne xue guna' da ca' nuchi'u cheętu'.

<sup>31</sup> Tu dxúnqueza' ca dxusede dizra' chiu' netu'.

Xran, quebe guzú' neda' lu xel-la' stu'.

<sup>32</sup> Tu gúnzqueza' ca bdxixruj be'u,

gate guzėjajni'idxenu' neda'.

### *Dxaca lázredxu chėjajni'idxu xrtizra' Dios*

<sup>33</sup> Xran, bsede neda' cheę guna' ca naca xrba chiu',  
na' tu gúnzqueza' ca naca na ca zrindxa zra cheajsé chia'.

<sup>34</sup> Bzėjajni'i neda', na' tu gúnzqueza' da bdxixruj be'u,

na' duté lázrdawa' guna' ca naca na.

<sup>35</sup> Ble'e neda' cheę guna' da bdxixruj be'u,

lawe' da dxaca lázrequeza' guna' ca dxenná na.

<sup>36</sup> Ben sa lazra' guna' ca dxusede dizra' chiu' netu',  
cheę quebe gaca' benne' wecude.

<sup>37</sup> Quebe gu'u lataj gucá'ana szrena' bedáu' xia xaga ca'.

Ben dipa xichaj lázrdawa' cheę guna' ca dxenná xrtizru'.

<sup>38</sup> Ben ca dxenná xrtizru' da guchebe lazru' chia' neda',  
wen zrin chiu', cheę zreba' Lue'.

<sup>39</sup> Bde chalá'ala dizra' schanni' da dxeleńné' chia',  
da na' dxezreba', lawe' da xrlátaje zaj naca xrba chiu'.

<sup>40</sup> Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje chiu'.

### *Dxuxrén lázredxu xrtizra' Dios*

<sup>41</sup> Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

<sup>42</sup> Becheba' lau bénnea' dxusi'e neda' xel-la' stu', gunńa':  
Dxuxrén lazra' xrtizra' Xrana' Dios.

<sup>43</sup> Ben tu séquezda' guchálaja' dizra' li lazre' chiu',  
lawe' da dxebeza lazra' da ca' dxuchi'u cheętu'.

<sup>44</sup> Tu gúnzqueza' ca dxenná da bdxixruj be'u.

Guna' na tu chí'izqueze, ne chadía chacanna.

<sup>45</sup> Láqueza' neda'

lawe' da dxe'a gunne xue guna' ca bdxixruj be'u.

<sup>46</sup> Guchálajqueza' ca dxusede dizra' chiu' netu'  
lau benne' wenná bea ca', na' québequeze xedué'eda'.

<sup>47</sup> Wabéle'ęquezda' guna' ca bdxixruj be'u,  
da ca' nazrí'ile'eda'.

<sup>48</sup> Dxechebe lazra' guna' ca bdxixruj be'u,  
da nazrí'ida', na' gulaba lazra' ca naca xrba chiu'.

*Tu zúazqueze xrtizra' Dios*

- 49 Bsa lazre' da guchebe lazru' chia' neda',  
wen zrin chiu', da na' benú' dxebeza lazra'.  
50 Gate na' guzaca zi'a, guzúa tu da bexúe zren na neda'  
lawe' da ben dipa xrtizru' xichaj lázrdawa'.  
51 Benne' dxulucá'ana szren cuine' belún lalé' chia' neda',  
san québequeze gusana' da dxenná da bdxixruj be'u.  
52 Xeajsá lazra' da bchi'u cheentu' nédxudaute, Xran,  
na' bexaca zrena'.  
53 Nen duté xel-la' dxezrá'a guzúa' lu da stebe  
ne chee benne' ca' dxelune' da zrinna',  
benne' ca' dxuluzúe' chalá'ala da bdxixruj be'u.  
54 Xrba chiu' ca' gulaca na chia' ca tu da dxul-la'  
gate na' zua' tu xezr la xu zitu'.  
55 Chizrela xeajsá lazra' lau' Lue', Xrana' Dios,  
na' tu bénzqueza' ca dxenná da bdxixruj be'u.  
56 Lu da ba neza caní guzúa'  
lawe' da tu bénzqueza' ca zaj naca da bdxixruj be'u.

*Dxebedxu dxulábadxu xrtizra' Dios*

- 57 Da dxezá lazra' nácaquezu' Lue', Xrana' Dios.  
Ba gunnía' tu gúnzqueza' ca naca xrtizru'.  
58 Duté lázrdawa' dxenaba' Lue' xidu' gácalenu' neda'.  
Bexache lazre' neda' ca ba gunnáu' gunu'.  
59 Gunná' xannia' ca zaj naca da dxuna',  
na' xecha lasa dxuna' ca dxusede dizra' chiu' netu'.  
60 Bena' ba xuzre, ne quebe guzreda'  
chee' tu gúnzqueza' ca bdxixruj be'u.  
61 Xralaj chee benne' ca' dxelune' da caléla zaj nuchele na  
neda',  
san quebe ne gal-la lazra' ca dxenná da bdxixruj be'u.  
62 Dxéla dxasa' chee güe lá'ana' Lue'  
lawe' da xrlátaje zaj naca da ca' dxuchi'u cheentu'.  
63 Naca' tuze nen xúgute benne' ca' dxelezrebe' Lue',  
benne' ca' tu dxelúnzqueze' da bdxixruj be'u.  
64 Xrana' Dios, dxezrin duté xezr la xu  
xel-la' dxexache lazre' chiú'.  
Bsede neda' chee guna' ca dxenná xrba chiu'.

*Zácalé'e da wnnáqueze Dios*

- 65 Ba benú' guca chawe' chia' neda', wen zrin chiu'.  
Xran, benú' na cáteze dxenná xrtizru'.  
66 Bsede neda' chee gueque be'eda' da naca xrlátaje,  
ne chee chéajni'ida' lawe' da dxéajlé'a da bdxixruj be'u.  
67 Nédxula ca bzéxruju' neda' gudéa' chalá'ala,  
na' na'a tu dxúnzqueza' ca dxenná xrtizru'.  
68 Nacu' xrlátaje, ne dxunu' gaca chawe' cheentu'.  
Bsede neda' guna' ca naca xrba chiu'.  
69 Benne' dxulucá'ana szren cuine' gulenné' chia'  
da wen lazre'  
san duté lázrdawa' tu gúnzqueza' ca bdxixruj be'u.  
70 Quebe xu'u xel-la' dxéajni'i lázrdau benne' ca'.

Neda' dxezaca ba lázreḷena' da dxenná da bdxixruj be'u.

71 Chawe' naca bzéxruju' neda'

cheḡ gusédia' guna' ca naca xrba chiu'.

72 Cháwedxa naca da bdxixruj be'u chia' neda'

queḡ ca gaxúa gaxúane dumí oro, ne plata.

*Cháweḷ'e naca da wnnáqueze Dios*

73 Nen ná'quezu' benu' neda' cáteze naca'.

Bzéajni'i neda' cheḡ gusédia' guna' ca bdxixruj be'u.

74 Benne' dxelezrebe' Lue' xeḷelé'ene' neda'.

Xelebene' lawe' da dxebeza lazra' gaca ca dxenná xrtizru'.

75 Xran, ba nézquezda' xrlátaje naca da dxuchi'u cheḡntu',

na' lu duté xel-la' li lazre' chiu' bsaca zi'u neda'.

76 Lu duté xel-la' dxexache lazre' chiu' bexúe zren neda' cáteze dxenná da guchebe lazru' chia' neda', weḡ zrin chiu'.

77 Bexache lazre' neda' cheḡ gaca bana'

lawe' da dxezaca ba lázreḷena' da bdxixruj be'u.

78 Ben xeḷexedué'e benne' ca' dxulucá'ana szren cuina

lawe' da gulenné' schanni' chia', ne quebe bi bena' cheḡ'.

Neda' gulaba lazra' ca da bdxixruj be'u.

79 Ben xeḷexelá' benne' ca' dxelezrebe' Lue',

cheḡ xelenne' chia',

na' xulusédie' da dxuséde dizra' chiu' netu'.

80 Ben gaca' du lazre' ca naca xrba chiu'

cheḡ québequeze xedué'eda'.

*Gun Dios ca dxenná xrtizre'*

81 Zua bénne'du xu'a lu da stebe

lawe' da dxebeza' xidu' guseláu' neda',

na' dxebeza lazra' gaca ca dxenná xrtizru'.

82 Dxezé bxrinne xiaj lawa' lawe' da dxezá lazra' xrtizru',

dxennia': ¿Bátaqueze xexúe zrenu' neda'?

83 Dxebizra' ca tu buzude xide zḡ na lu zren,

san quebe dxal-la lazra' guna' ca dxenná xrba chiu'.

84 ¿Bal-la zra gaca bana' neda', weḡ zrin chiu'?

¿Bátaqueze gudéu' lu da ba xa' benne' ca'

dxeláu zi' xuzre' neda'?

85 Benne' dxulucá'ana szren cuine' gulene' tu xḡdxu

naga cheajcházia'.

Québequeze dxelune' ca dxenná da bdxixruj be'u.

86 Da líqueze zaj naca xúgute da bdxixruj be'u.

Gúcale neda' lawe' da dxeláu zi' xuzre' neda',

ne quebe bi nuna' cheḡ'.

87 Xeláteze la belutiḡ' neda',

san quebe ne gusana' guna' ca bdxixruj be'u.

88 Lu xel-la' dxexache lazre' chiu' ben dipa xichaj lázrdawa',

cheḡ tu gúnzqueza' ca dxuséde dizra' chiu' netu'.

*Dxéajle'dxu xrtizra' Dios*

89 Xrana' Dios, tu chí'izqueze

zua xrtizru' xabáa na'la.

90 Xel-la' li lazre' chiu' sua na cheḡ xúgute bénneache.

Lue' bzua chúchuquezu' xęzr la xu, na' zúaqueze na.

<sup>91</sup> Ne cheę da gunnáquezu' zaj nnita xúgute da de,  
na' xúgute da ca' dxelún na zrin chiu'.

<sup>92</sup> La quebe bezaca ba lázreęna' da bdxixruj be'u  
bache benítia' lu da guzaca zi'a.

<sup>93</sup> Cabátaqueze gal-la lazra' da bdxixruj be'u  
lawe' da ne cheę da ca' ba btipu' lazra'.

<sup>94</sup> Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj be'u.

<sup>95</sup> Benne' dxelebéaj xichaj Dios gulenné'e neda' cheę  
xuluzría xi'e neda',

san neda' dxulaba lazra' ca dxusede dizra' chiu'.

<sup>96</sup> Dxelé'equezda' dxeajsé cheę xúgute da de lu xęzr la xu,  
san da bdxixruj be'u Lue' québequeze cheajsé cheę na.

*Dxaca lázredxu gúnbeadxu xrtizra' Dios*

<sup>97</sup> Dios, nazrí'ile'eda' da bdxixruj be'u.

Du zra dxulaba lazra' ca naca na.

<sup>98</sup> Ne cheę da bdxixruj be'u nunu' nácadxa' sina ca benne' ca'  
dxeledábage' neda'

lawe' da tu zúalezqueze da bdxixruj be'u neda'.

<sup>99</sup> Dxéajni'idxeda' ca benne' ca' dxulusédene' neda'

lawe' da dxulaba lazra' ca dxusede dizra' chiu' neda'.

<sup>100</sup> Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj be'u.

<sup>101</sup> Bena' ba xuzre quebe bi da calęla guna'

cheę tu gúnzqueza' ca dxenná xrtizru'.

<sup>102</sup> Quebe bsana' dxuna' da ca' nuchi'u cheęntu'

lawe' da Lué'queze bsédenu' neda'.

<sup>103</sup> Xrtizru' naca na ca tu da zixrele'ę lu dxu'a.

Nácadxa na zixre ca bzrina'dau' lu dxu'a.

<sup>104</sup> Ne cheę da bdxixruj be'u naca' benne' sina.

Cheę le' na' dxecuieda' xúgute da wen lazre'.

*Xrtizra' Dios dxuzéajni'i na dxi'u*

<sup>105</sup> Ca tu xi' naca xrtizru' naga dxedá',

da dxusení na neza xu'a.

<sup>106</sup> Bzétaja' Dios, ne guchebe lazra'

tu gúnzqueza' ca nuchi'u cheęntu' da naca na xrlátaje.

<sup>107</sup> Dzezaca zí'le'a.

Xrana' Dios, btípa lazra' cáteze guchebe lazru' gunu'.

<sup>108</sup> Xrana' Dios, dxata' xueda' Lue' si'u da dxue lá'ana' Lue',  
ne gusédenu' neda' guna' ca nuchi'u cheęntu'.

<sup>109</sup> Tu zúazqueza' lu da stębe cheę xel-la' gute,

san québequeze ne gal-la lazra' guna' ca bdxixruj be'u.

<sup>110</sup> Benne' dxelebéaj xichaj Dios buluzalę' xralaj

da queęa na neda'

san neda' quebe bsana' dxuna' ca bdxixruj be'u.

<sup>111</sup> Ba gucá'a da dxusede xrtizru' neda' cheę gaca na

da gápaqueza' chadía chacanna

lawe' da zaj naca xrtizru' da dzezaca ba lázrele'a.

112 Zúatequeze lázrdawa' guna' ca zaj naca xrba chiu'  
tu chí'izqueze, ca zrindxa zra cheajsé chia'.

*Bexácadxu chawe' ne chee xrtizra' Xránadxu*

113 Dxecuúdeda' benne' ca' dxelune' láweze da xrlátaje,  
san nazrí'ida' da dxenná da bdxixruj be'u.

114 Nacu' Lue' ca tu xu'u naga zua chawa', ne ca tu  
da dxucu'uj na neda',

lawe' da dxebeza lazra' gaca na ca dxenná xrtizru'.

115 Le gucuasa naga zua', le'e, benne' wen da calela,  
lawe' da tu gúnzqueza' ca bdxixruj bea Dios chia'.

116 Bze chacha neda' cáteze dxenná xrtizru', na' gaca bana',  
ne quebe xedué'eda' chee da na' dxebeza lazra'.

117 Bze chacha neda', na' la',  
ne tu xezaca ba lázrezqueza' ca naca xrba chiu'.

118 Bchuchu bléaju' xúgute benne' ca' bulusang' ca naca  
xrba chiu'

lawe' da wen lazre' naca xel-la' sina chee benne' ca'.

119 Ca bebe bzria xi'u xúgute benne' ca' dxelebéaj xíchaje'  
Lue' lu xezr la xu nigá.

Chee le na' nazrí'ida' da dxusede dizra' chiu' netu'.

120 Dxezrize bela' dxen chia' lawe' da dxezreba' Lue',  
ne dxezreba' da dxuchi'u cheentu' da naca na xrlátaje.

*Dxal-la' gundxu ca dxenná xrtizra' Xránadxu*

121 Ba bēna' ca da nuchi'u cheentu', ne ca naca da xrlátaje.

Quebe gudéu' neda' lu na' benne' ca' dxuluchínene' neda'.

122 Guchebe lazre' chia' gunu' gaca chawe' chia'.

Quebe gu'u lataj benne' ca' dxulucá'ana szren cuine'  
xuluchínene' neda' xadía.

123 Guzé bxxrinne xiaj lawa' lawe' da dxebeza' xidu'  
guseláu' neda',

ne guchi'u cheentu' ca dxenná xrtizru'.

124 Dute xel-la' dxexache lazre' chiu' ben gaca chawe'  
chia' neda', wen zrin chiu',

ne bsede neda' guna' ca naca xrba chiu'.

125 Naca' wen zrin chiu'.

Bzéajni'i neda' chee gúnbe'a da dxusede dizra' chiu' netu'.

126 Xrana' Dios, ba bzzrin zra bi gunu',

lawe' da ba buluzúe' chalá'ala da bdxixruj be'u.

127 Chee le na' neda' nazrí'idxada' da bdxixruj be'u Lue'  
quézcala oro, ne quézcala galega oro.

128 Chee le na' dxéqueda' zaj nácadxa li lazre'

da bdxixruj be'u ca xúgute da de,

na' dxecuúdeda' xúgute da zaj naca na da wen lazre'.

*Dxaca lázredxu gundxu ca dxenná xrtizra' Dios*

129 Dxebánentu' ca dxusede dizra' chiu' netu'.

Chee le na' du lazra' tu dxúnzqueza' ca dxenná na.

130 Gate nu dxuzájla' ca naca xrtizru', dxusaní na.

Dxun na dxeléajni'i benne' dxexruj lazre' ca'.

131 Guxá dxu'a, ne gucá'a lazra'

lawe' da dxezá lazra' gúnbe'a da bdxixruj be'u.  
 132 Gunná' neda', ne bexache lazre' neda',  
 ca tu dxúnzquezu' cheę benne' ca' zaj nazrí'ing' Lue'.  
 133 Ben tu gúnzqueza' ca dxenná xrtizru',  
 ne quebe gu'u lataj da zrinnaj nna be'e na neda'.  
 134 Bselá neda' lu na' benne' xichaj zra'a ca',  
 na' tu gúnzqueza' ca dxenná da bdxixruj be'u.  
 135 Ben gaca chawe' chia' neda', wen zrin chiu',  
 ne bseđe neda' guna' ca zaj naca xrba chiu' ca'.  
 136 Nisa gudxezra' guca na ca tu xegu nisa  
 lawe' da quebe dxelún bėnneache ca bdxixruj be'u.

*Da li naca da dxenná Xránadxu*

137 Xrana' Dios, xrlátaje nacu' Lue',  
 ne li lazre' naca ca dxuchi'u cheętu'.  
 138 Da dxuseđe dizra' chiu' netu', da na' bzu' lu na'ntu',  
 naca na da li, ne da li lazre'.  
 139 Dxedú lazra' lawe' da dxé'le'a gunne xue  
 lawe' da gulal-la lazre' benne' ca' dxeledábague' neda'  
 ca zaj naca xrtizru'.  
 140 Du lázrele'e naca xrtizru',  
 na' nazrí'ida' neda' na, naca' wen zrin chiu'.  
 141 Ddexruj lazre' naca', na' dxuluzúe' neda' chalá'ala,  
 na' quebe ne gal-la lazra' da bdxixruj be'u.  
 142 Tu chí'izqueze zua da dxuchi'u cheętu',  
 na' da li naca da bdxixruj be'u.  
 143 Da dxezaca zi'a, ne da stebe zua' zaj nuchuchuj na neda',  
 san dxezaca ba lázrele'na' da bdxixruj be'u.  
 144 Tu chí'izqueze naca li lazre' da dxuseđe dizra' chiu'.  
 Bzéajni'i neda', na' gaca bana'.

*Dxal-la' gulaba lázredxu da gunná Dios*

145 Duę lázrdawa' dxuláwizra' Lue', Xrana' Dios.  
 Ben gaca chawe' chia', na' tu gúnzqueza' ca dxenná xrba chiu'.  
 146 Dxuláwizra' Lue'.  
 Bselá neda', na' tu gúnzqueza' ca dxuseđe dizra' chiu' netu'.  
 147 Bálala dxasa', na' dxuláwizra' Lue'.  
 Dxebeza lazra' gaca ca dxenná xrtizru'.  
 148 Dxenná'aza' bedú xela,  
 cheę gulaba lazra' da bdxixruj be'u.  
 149 Duę xel-la' dxexache lazre' chiu' bene chi'a.  
 Xrana' Dios, da bchi'u cheętu' btipa lazra'.  
 150 Benne' dxeláu zi' xuzre' neda' ba zaj zre'e xelune' chia'  
 da caleła.  
 Zaj nusane' da dxenná da bdxixruj be'u.  
 151 Xrana' Dios, zu' Lue' gagu naga zua',  
 ne da li zaj naca xúgutę da bdxixruj be'u.  
 152 Gate nate ba núnbe'a da dxuseđe dizra' chiu' netu',  
 da na' nuzú' cheętu' tu chí'izqueze.

*Da gunná Dios dxuzéajni'i dxi'u*

153 Gunná' xque ca dxezaca zi'a, ne bselá neda'

lawe' da quebe ne gal-la lazra' da dxenná da bdxixruj be'u.

154 Bechebe waláz chia', ne bexa'u neda'.

Btipa lazra' nen xrtizru'.

155 Stébele'ē naca xeledá benne' ca' dxelebéaj xíchaje'

Lue', Dios,

lawe' da quebe dxelebé'ē gunne xue xelunē' ca naca xrba chiu'.

156 Xrana' Dios, dxexache lázrele'u bénneache chiu'.

Btipa lazra' cáteze dxenná xrtizru' gunu'.

157 Zánetej zaj naca benne' ca' zaj nau zi' xuzre' neda',

ne benne' ca' dxeledábague' neda',

san quebe ne gusana' dxuna' ca dxusede dizra' chiu' netu'.

158 Ble'eda' benne' ca' dxelún lazre', na' dxegúteda' benne' ca'

lawe' da quebe dxelunē' ca dxenná xrtizru'.

159 Gunná'xque, Xran, ca nazrí'ida' da bdxixruj be'u.

Dutej xel-la' dxexache lazre' chiu', btipa lazra'.

160 Da líqueze zaj naca xúgutej xrtizru',

ne tu chí'izqueze zaj naca da dxuchi'u cheentu' lu

da xrlátaje chiu'.

#### *Da gunná Dios dxutipa lázredxu*

161 Benne' ca' dxeleenná be'ē dxeláu zi' xuzre' neda'

na' quebe bi nuna' chee'.

Dutej lázrdawa' dxezreba' ca zaj naca xrtizru'.

162 Dxebéle'ēda' lu da dxenná xrtizru'

ca dxebé bénnea' dxezré'l-lenge' tu xel-la' gunní'a zrente.

163 Dxecuúdeda', ne dxegúteda' da wen lazre'.

Nazrí'ida' da dxenná da bdxixruj be'u.

164 Gazre lasa tu zra dxue lá'ana' Lue'

lawe' da xrlátaje naca ca dxuchi'u cheentu'.

165 Dxelebeza zri lázrele'ē benne' ca' zaj nazrí'inej'

da bdxixruj be'u,

na' quebe bi de da gun na cheajlecházije'.

166 Xrana' Dios, dxebeza' Lue' xidu' guseláu' neda',

ne tu dxúnzqueza' ca naca da bdxixruj be'u.

167 Dutej lázrdawa' tu dxúnzqueza' da dxusede dizra' chiu' netu',

ne nazrí'ile'ēda' ca naca na.

168 Tu dxúnzqueza' ca naca da bdxixruj be'u,

ne ca dxusede dizra' chiu' netu'

lawe' da dxelé'eqeznu' xúgutej da dxuna'.

#### *Dxebéle'ēdxu xrtizra' Dios*

169 Xrana' Dios, bene da dxuláwizra' Lue'.

Bzéajni'i neda' ca dxenná xrtizru' gunu'.

170 Bene da dxenaba' lau Lue'.

Bselá neda' ca dxenná xrtizru' gunu'.

171 Tu güe lá'anazqueza' Lue', Xran,

gate ba nusédenu' neda' guna' ca naca xrba chiu'.

172 Tu guchálajzqueza' ca naca xrtizru'

lawe' da xrlátaje naca ca dxenná be'enu' netu'.

173 Guzúatequeze gácalenu' neda'

lawe' da dxuna' ba xuzre guna' ca bdxixruj be'u.

174 Dxezá lazra' guseláu' neda', Xrana' Dios.

Dhezaca ba lázreḡna' da bdxixruj be'u.

175 Ben gaca bana', na' güe lá'ana' Lue',

na' da dxuchi'u chia' xelácale na neda'.

176 Gudéa' chalá'ala ca dxedá tu zrila' naníteba'.

Bexilaj neda', wen zrin chiu', lawe' da quebe ne gal-la lazra'  
da bdxixruj be'u.

## 120

1 Gate guzúa' lu da stebe bláwizra' Xránadxu Dios,  
na' Le' gúcaleḡe' neda'.

2 Bselá neda', Xrana' Dios, lu na' benne' wen lazre' ca',  
ne lu na' benne' dxelezi xē'e ca'.

3 ¿Bizra gunna Dios le'e, benne' dxelezi xē'e?

¿Bizra da ba neza gaca na cheeḡe gate gudé'e' le'e  
lu da zi' da xa'?

4 Gudé'e' le'e lu na' benne' ca' xuludé'e' le'e xaga nalá xéche'ze,  
ne xuluzrí'e' le'e xi' galaj.

5 Edxugúa neda'.

Dxaca chia' ca zúaqueza' ládujla benne' Mesec,  
ne ca zua' tu lu xu'u xide chee benne' Cedar.

6 Da zrentē ba guzúa' ládujla benne' caní  
dxuluzú'e' chalá'ala xel-la' dxebeza zri lazre'.

7 Neda' dxezá lazra' gata' xel-la' dxebeza zri lazre'.

Gate dxuchálaja' cheeḡ, dxeledíl-lalē benne' ca' neda'.

## 121

1 Chisa xíchaja' nna'a da dxelún bēnneache lu xi'a ca'.

¿Gazra za' da gácaleḡ na neda'?

2 Da gácaleḡ na neda' za' lu na' Xránadxu Dios,

Bēnnea' bēḡe' xabáa, ne xēzr la xu.

3 Quebe gu'e' lataj cheajcházii'.

Quebe gase Bēnnea' dxuxúequeze' lue'.

4 Gunná' xque, quebe te bchigala chee Bēnnea'.

Québequeze gase Bēnnea' dxuxúequeze' benne' Israel ca.

5 Xránadxu Dios dxucú'uj'e' lue'.

Xránadxu Dios zu'e' cuitu' xabēla dxegu'e' lue' zrul-la.

6 Quebe guzezze gubizra lue' te zra,  
ne quebe bi gune beu' lue' chizrela.

7 Xranu' Dios guxúequeze' lue' chee quebe bi da caleḡa  
gaca na chiu'.

Guxúequeze' bēnne'du xu'u.

8 Xránadxu Dios guxúequeze' lue' gate dxedxúaju',  
ne gate dxexú'u, na'a zra, ne chadía chacanna.

## 122

1 Gubéḡna' benne' ca' gulé'e' neda':

“Chéajdxu xu'u lizre Xránadxu Dios.”

2 Na'a zúadxu nigá, zēntu' dxa xu'u ze'e



da naxechaj lue', xezre Jerusalén.

<sup>3</sup>Jerusalén naca na tu xezre da belexunġe',

na' naca na xrtante, ne dxé'le'ġe na cháwedau'.

<sup>4</sup>Lu xezre na' zjaca xúgute cuen bénneache zaj de'ġe

Xránadxu Dios.

Dxelunġe' ca dxenná dizra' da guzre Dios benne' Israel ca',

cheġ xelúe lá'ane' La Xránadxu Dios.

<sup>5</sup>Lu xezre na' zaj dxe' benne' ca' dxuluchi'ġe cheġ

benne' Israel ca',

naga zaj dxe' benne' xrtia David, benne' ca' dxelenná be'ġe.

<sup>6</sup>Le naba lau Dios gata' xel-la' dxebeza zri lazre'

lu xezre Jerusalén,

cheġ xelepe ban da dxelún benne' ca' zaj nazrí'ine' xezre na'.

<sup>7</sup>Dxenábantu' Dios sua xel-la' dxebeza zri lazre'

lu'ule ze'e da naxechaj na lue', Jerusalén,

ne cheġ xelezrá' chawe' benne' zaj xu'ġe xu'u zren chiu'.

<sup>8</sup>Nazrí'ida' le sa' ljwezra', ne bi ljwezra' ca', na' dxennía':

Gata' xel-la' dxebeza zri lazre' chiu', xezre Jerusalén.

<sup>9</sup>Lawe' da nazrí'ida' xu'u lizre Xránadxu Dios

dxuna' ba xuzre gaca chawe' chiu'.

## 123

<sup>1</sup>Chisa xíchaja' nna'a naga zu', Xran,

naga zu' Lue', zu' xabáa na'la.

<sup>2</sup>Ca dxun tu bi wen zrin dxenná'abe' bi nna xránabe',

ne ca dxun nu'ula wen zrin dxenná'abe' bi nna

nu'ula xránabe',

caní dxenná'adxu bi nna Xránadxu Dios

ca zrindxa zra xexache lazre' cheġdxu.

<sup>3</sup>Bexache lazre' cheġntu', Xránantu' Dios.

Bexache lazre' cheġntu', lawe' da dxedú lázrentu'

lawe' da dxulucá'ana ditaj bénneache netu'.

<sup>4</sup>Dxedú lázrentu' lawe' da dxelún lala benne' gunní'a ca'

cheġntu',

ne dxulucá'ana ditaj netu', benne' ca' dxulucá'ana szren

cuinge'.

## 124

<sup>1</sup>Chela ca gúcale Xránadxu Dios dxi'u.

Caní dxal-la' xelenná benne' Israel ca' na'a.

<sup>2</sup>Chela ca gúcale Xránadxu Dios dxi'u

gate guledíl-lalġe benne' ca' dxi'u,

<sup>3</sup>na' buluzría xi'te' dxi'u

lu dutġe xel-la' dxelezrá'a zrentġe cheġe',

<sup>4</sup>ne guca cheġdxu ca dxaca cheġ benne'

dxugacu nísadau' le', da na' gute na le'.

<sup>5</sup>Chela guca caní cheġdxu, na' bétete' da na' dxi'u.

<sup>6</sup>Dxal-la' xedxu Xránadxu Dios; Xcalenu',

lawe' da quebe be'ġe lataj benne' ca' xuluzría xi'ġe dxi'u.

<sup>7</sup>Beladxu ca dxelá tu bxinne lu xixruj cheġ benne' wezén bxinne.

Bzria xi' Xránadxu xel-la' dxenná bea cheġ benne' ca', na' beladxu.

<sup>8</sup>Naca Xránadxu Dios Bénnea' dxácale' dxi'u,

Bénnea' bénqueze' xabáa, ne xezr la xu.

## 125

<sup>1</sup> Benne' ca' dxuluxrén lazre' Xránadxu Dios zaj naque' ca xi'a Sión, da quebe nu seque' gutá, san tu chí'izqueze zua chacha na.

<sup>2</sup> Ca zaj zua xi'a ca' da zaj naxechaj na Jerusalén, zua Xránadxu Dios, dxuxúequeze' bénneache chee' na'a zra, ne chadía chacanna.

<sup>3</sup> Quegá tu chí'izqueze xelenná bea benne' ca' dxelune' da calela lu xezr la xu chee benne' xrlátaje ca', chee quebe xelaca benne' xrlátaje ca' tuze nen benne' wən da zrinnaj ca'.

<sup>4</sup> Xrana' Dios, bən gaca chawe' chee benne' xrlátaje ca', ne chee benne' ca' zaj naque' li lazre'.

<sup>5</sup> Benne' ca' dxelebéaj xichaj Dios chee xelune' da calela, xucuasa Xránadxu Dios benne' ca' tu zren nen benne' ca' dxelune' da zrinnaj.

Dxenaba' gata' xel-la' dxebeza zri lazre' chee benne' Israel ca'.

## 126

<sup>1</sup> Gate Xránadxu Dios bselé' dxi'u lu na' benne' zitu' ca', ne begu'e dxi'u lu xezre Sión, gúquedxu dxennedxu xela.

<sup>2</sup> Nadxa bzrízredxu, ne bə lá'anadxu Xránadxu Dios. Nadxa gulenná benne' xezr la xu ca':

“Da zrentę ca' bən Dios, Xrana benne' ca', chee'.”

<sup>3</sup> Da zrentę ca' bən Xránadxu Dios cheedxu dxi'u, na' zúadxu lu da ba neza zrentę.

<sup>4</sup> Bselá Xránadxu dxi'u lu na' benne' zitu' ca', na' bezrindxu lu xezr la xu cheedxu ca dxezrín nisa guba'u lu xegu bizre ca'.

<sup>5</sup> Benne' ca' dxelebezre' tię dxelaze', nen xel-la' dxelebé xelexezi'e lina.

<sup>6</sup> Dxebezre tię' zéaje' nu'e binne cháwe'du ca', na' dutę xel-la' dxebé dxezrine' zeajnu'e lina chee'.

## 127

<sup>1</sup> Chela ca zúale Xránadxu Dios benne' ca' dxelune' tu xu'u dácheze naca xelune' zrin na'.

Chela ca dxuxúe Xránadxu Dios tu xezre, dácheze naca dxuluxúe benne' ca' lę na.

<sup>2</sup> Dácheze naca dxásazele che zílala, ne dxunle zrin cáteze dxalaj gubizra ca dxebíadxa na, ne dutę xel-la' dxudía dxezile da gágule, lawe' da dxunna Dios da xelagu benne' ca' nazrí'ine' dxácatę na' dxelásię'.

<sup>3</sup> Le nna' xque, zaj naca zrí'inedxu bi ca' benna Xránadxu dxi'u. Zaj naca bę' tu da gunní'a zrentę.

<sup>4</sup> Zrí'inedxu dxelálajbe' cheedxu gate ne nácadxu cuide' zaj nácabe' ca xaga nalá xéche'ze ca' da nuxru benne' zeje' wedil-la.

<sup>5</sup> Ba neza zrentę naca na chee bénnea' nuxrue' zánete xaga nalá xéche'ze caní.

Québequeze xedué'eng' gate zri'a chee'  
tu zren nen benne' ca' dxeledíl-laləṅe' le'.

## 128

<sup>1</sup> Ba neza zrente naca na chee benne' ca' dxelezrebe' Xránadxu Dios,  
benne' ca' tu dxelúnzqueze' ca nadxixruj be'e Dios.

<sup>2</sup> Gate dxagu' da dxezi'u chee zrin da nunu'  
gaca chiu' tu da ba neza, ne gaca chawe' chiu'.

<sup>3</sup> Gaca zru'ulu' ca tu lba uva da dxebía da zixre  
cuita xu'u lizru',  
na' zri'ínu' ca' xelácabe' ca xaga olivo ca' zaj zə  
dxu'a ga dxagu'.

<sup>4</sup> Caní gun Xránadxu gaca chawe' chee bēnea' dxezrebe' Le'.

<sup>5</sup> Dxenaba' gun Xránadxu, zuə' xi'a Sión, gaca chawe' chiu',  
chee le'enu' gaca chawe' chee xəzre Jerusalén xúgute zra naca banu',

<sup>6</sup> ne chee le'enu' zri'ine zre su'.  
Dxenaba' gata' xel-la' dxebeza zri lazre' chee benne' Israel ca'.

## 129

<sup>1</sup> Zúadxu lu da stébele'e gate nácatədxu cuide',  
waca xelenná benne' Israel ca'.

<sup>2</sup> Zúadxu lu da stébele'e gate nácatədxu cuide'  
san quebe buluzria xi'e dxi'u.

<sup>3</sup> Belunə' wə' cúzrudxu gate beline' dxi'u xide,  
na' gulaca cúzrudxu ca xəzr la xu naga dxedé xia chee bezre.

<sup>4</sup> Xlátaje naca Xránadxu Dios.  
Bselé' dxi'u lu na' benne' ca' buluchínene' dxi'u xadíaze.

<sup>5</sup> Bən cheajlechaze, ne xelebígaqueze  
xúgute benne' ca' dxelecuídene' benne' Sión ca'.

<sup>6</sup> Bən xelaque' ca xíxre'du ca' dxelebía na xrgu'u  
da dxelebizre na gate ne zaj nadxé'ene na,

<sup>7</sup> da na' quebe nu benne' dxexequé'e na,  
ne quebe seque' nu benne' gunə' na tu cheaj weaj.

<sup>8</sup> Quebe xelenná benne' dxeledé'e naga zaj zria na:  
Dxenábantu' gun Xránantu' Dios gaca chawe' chee.  
Lu La Xránantu' Dios dxenábantu' gaca chawe' chee.

## 130

<sup>1</sup> Ga ni zua' lu da stébele'e dxuláwizra' Lue', Xrana' Dios.

<sup>2</sup> jXran, bene chí'a!  
jBzə naga da dxenaba' lau'!

<sup>3</sup> Xrana' Dios, chela nna' xánniu' ca naca dul-la nabáantu'  
ǰnúzraqueze xegá'ana xrlátaje lau Lue'?

<sup>4</sup> Lué'quezu' dxunite lau' cheəntu'  
chee gápantu' Lue' ba lá'ana.

<sup>5</sup> Dute lázrdawa' dxebeza lazra' Xránadxu Dios,  
ne dxuxrén lazra' xrtizre'.

<sup>6</sup> Dxebeza lazredxa' Xránadxu Dios  
cáqueze dxelún benne' ca' dxuluxúe' xəzre ca',  
dxelebeze' chaní',  
ne cáqueze dxelún benne' ca' dxelicha bchigala,

dxelebeze' chaní'.

7 Benne' Israel ca' dxal-la' xebeza lazre' Xránadxu Dios lawe' da dxexache lazre' Xránadxu bènneache chee', ne dxexá'awe' benne' ca' lu na' benne' guledábague' Le'.

8 Dios xexá'awe' benne' Israel ca' lu na' xúgute' dul-la da zaj nabague'.

## 131

1 Xrana' Dios, ba bsana' xel-la' dxucá'ana szren cuina', ne ba bcuasa' xel-la' dxeque xrlátaje cuina'.

Quebe dxulapa napa' lu da zaj naca szren, da ca' quebe naca chia' gulapa' na'a.

2 Quebe bi gunnía', ne guzúa' zrize ca tu bi dxe'ene za bexuzrte' gúzrebe'.

Naca bènne' du xu'a ca tu bi dxe'ene za bexuzrte' gúzrebe'.

3 Le cueza lazre' Xránadxu Dios, le'e, benne' Israel na'a zra, ne chadía chacanna.

## 132

1 Bsa lazre', Xrana' Dios, ca guca chee' David, ne ca guzaca zí'e,

2 ne ca da guchébe lazre' guné' chiu', da guchébe lazre' lau', Dios wal-la chee' Jacob.

3 Guné': "Québequeze chu'a xu'u lizra', ne québequeze gáta'a ga dxasia'

4 ne québequeze guchúdia' xiaj lawa' ne québequeze gasia'

5 ca zrindxa zra ba bəna' tu xu'u lizre Xrana' Dios naga súaqueze Dios wal-la chee' Jacob."

6 Bénédxu zua xí'ina lá'azxa naga xu'u xel-la' wezría lu xəzr la xu Efrata,

na' bezréledxu na lu xəzr la xu chee' bènnea' le' Jaar.

7 Gunnantu': Chéajntu' naga zua Dios cheəntu'.

Guzú zríbentu' zran ní'a Lə'.

8 Guxasa, Xránantu' Dios, nen xí'ina naga xu'u xel-la' wezría chiu',

ne gudá lu xí'a naga súaquezu' Lue'.

9 Bən xelún bxruze chiu' ca' da naca xrlátaje, ne xebeze xa'a xúgute' bènneache chiu', lu dute xel-la' dxelebé chee'.

10 Lawe' da nazrí'inu' David, wən zrin chiu', quebe guzú' chalá'ala wenná bea na' ba guca'u Lue'.

11 Da líqueze bzetaj cuina Xránadxu Dios, guchébe lazre' chee' David quebe gucuase' ca da gunné'.

Gunné': "Guna' xelenná bea zri'ine zre su' naga dxenná béaquezu' Lue'.

12 Che zri'inu' ca' tu xelúnzqueze' ca naca xel-la' wezría chia', ne ca naca xrtizra' da gusédeda' le',

zri'inu' ca' tu xelenná béazqueze' naga dxenná be'u lue'."

13 Lawe' da gucá'a Xránadxu Dios xezre Sión,  
guca lazre' sua xu'u lízrequeze' ga na'.

14 Gunné': "Tu gácazqueze lataj nigá naga súaqueza' neda'.  
Tu súazqueza' nigá lawe' da caní dxezaca ba lazra' guna'.

15 Guna' gáta'le'e lina chee benne' ca',  
ne guna' xeledaj benne' xache' ca' xeta.

16 Guna' xelún bxruze chia' ca' da naca chawe',  
na' xelebezre xa'a xúgute bènneache chia' lu dute  
xel-la' dxelebé chee'.

17 Lataj na' guna' xexaca xel-la' dxenná bea chee David.  
Guna' xelezúa na' zri'ine zre sua wenná bea na'  
ba gucá'a neda'.

18 Guna' xeleque zréaje benne' guledábague' Le',  
na' guna' chepe ban xel-la' dxenná bea chee David na'."

### 133

1 Le nna' xque, xrtante naca, ne cháwe'le'e naca  
gate zaj nazraga bènneache chee Dios, zaj naque' tuze.

2 Naca na ca tu da za da dxuluzúa xíchaje',  
da dxedínnetę na dxu'a lawe',  
ca na' dxedínnetę na lu luzru Aarón,  
ne dxedínnetę na ga zria zre'.

3 Dxedínnetę na ca xrlę'ela da dxeruj lu xi'a Hermón,  
ne dxeruj na lu xi'a Sión lawe' da gun Xránadxu Dios  
gaca chawe' chee bènneache zaj zre'e na',  
ne gunne' benne' ca' xel-la' nabán da zeajlí canna.

### 134

1 Le na' xque, le güe lá'ana Xránadxu Dios,  
le'e, nácale węn zrin chee Xránadxu,  
zrale xu'u lizre Xránadxu chizrela.

2 Le chisa na'le lau lataj lá'azxa,  
ne le güe lá'ana Xránadxu Dios.

3 Dxenaba' lau Xránadxu zue' Sión gunę' gaca chawe' chiu',  
naque' Bènnea' bęne' xabáa, ne xezr la xu.

### 135

1 ¡Le güe lá'ana La Xránadxu Dios!

¡Le güe lá'ana Le', le'e, węn zrin chee Xránadxu,

2 le'e zrale xu'u lizre Xránadxu Dios,  
lu chale'aj chee xu'u naga zúaqueze Dios!

3 ¡Le güe lá'ana Xránadxu lawe' da naque' xrlátaje!  
¡Le gul-la da güe lá'anale La Le', lawe' da naque' zri'i lazre'!

4 Xránadxu Dios ba guquę'e zri'ine zre sua Jacob.  
Guquę'e zri'ine zre sua Israel chee xelaque' bènneache chee'.

5 Nézquezdxu szrentę naca Xránadxu Dios.

Xránadxu naque' szrendxa ca xúgute dios chee benne' zitu' ca'.

6 Xúgute da dxaca lazre' Xránadxu gunę',  
dxune' na zran xabáa, ne lu xezr la xu,  
ne lu nísadau', ne lu da situj chee nísadau' ca'.

- 7 Dxunę' zá'aca beuj dapa saca cheę xęzr la xu.  
 Dxunę' dxelepe xesa guziu' gate dxaca xiuj.  
 Dxunę' dxaca be' gáteteze.
- 8 Bene' gulate bi biu nedxu cheę benne' Egipto ca'.  
 Gulate bi biu nedxu cheę bėnneache,  
 ne bėadu ca' cheę bę xixre' cheę' ca'.
- 9 Bene' xel-la' waca ca' da za xabáa, ne da zrente ca'  
 da bene' lu xęzr la xu cheę benne' Egipto ca',  
 da ca' bęn Dios da guca cheę Faraón,  
 ne cheę xúgute węn zrin cheę Faraón na'.
- 10 Bzria xi'e bėnneache zánete cue' xęzr la xu ca',  
 ne betię' benne' wenná bea ca',  
 benne' zaj nápalę'e xel-la' dxelenná bea.
- 11 Betię' Sehón, wenná bea cheę benne' amorreo ca',  
 ne Og, wenná bea cheę benne' Basán ca',  
 ne xúgute benne' wenná bea cheę benne' Canaán ca'.
- 12 Bequę'e xęzr la xu nigá lu na' benne' wenná bea ca',  
 na' bnėzruje' na lu na' bėnneache cheę', benne' Israel ca'.
- 13 Xrana' Dios, chadía chacanna zua lau' Lue'.  
 Tu cheajlesá lázrezqueze bėnneache Lue'.
- 14 Xránadxu Dios guchi'e cheę bėnneache cheę',  
 ne xexache lazre' cheędxu dxi'u, węn zrin cheę'.
- 15 Bedau' xia xaga ca' cheę benne' xęzr la xu ca'  
 zaj naca na oro, ne plata.  
 Zaj naca na da belún bėnneache.
- 16 Zaj zua dxu'a na san quebe dxelennę na.  
 Zaj zua lau na san quebe dxelelé'e na.
- 17 Zaj zua naga na san quebe dxelén na, ne quebe  
 dxelecá'a na be'.
- 18 Benne' ca' dxelunę' na zaj nácaqueze' ca léqueze na,  
 ne caní zaj naca xúgute benne' dxuluxrén lazre' na.
- 19 Le'e, benne' xrtía Israel, le güe lá'ana Xránadxu Dios.  
 Le'e, benne' xrtia Aarón, le güe lá'ana Xránadxu Dios.
- 20 Le'e, benne' xrtia Leví, le güe lá'ana Xránadxu Dios.  
 Le'e, núlale dxezrébele Xránadxu Dios, le güe lá'ana  
 Xránadxu Dios.
- 21 Le'e, zrale xęzre Sión, le güe lá'ana Xránadxu Dios,  
 Bėnnea' zúaqueze' xęzre Jerusalén.

¡Gaca ba lá'azxa Xránadxu Dios!

## 136

- 1 ¡Le güe lá'ana Xránadxu Dios, Benne' xrlátaje!  
 ¡Chadía chacanna dxexache lazre' dxi'u!
- 2 ¡Le güe lá'ana Dios, naque' szréntędxa ca zaj naca dios  
 cheę xęzr la xu ca'!  
 ¡Chadía chacanna dxexache lazre' dxi'u!
- 3 ¡Le güe lá'ana Xránadxu, naque' szréntędxa ca zaj naca  
 xrana xęzr la xu ca'!

¡Chadía chacanna dxexache lazre' dxi'u!  
 4 ¡Le güe lá'ana Dios na', dxune' xel-la' waca zri'a ca'!  
 ¡Chadía chacanna dxexache lazre' dxi'u!  
 5 ¡Le güe lá'ana Dios na', bene' xabáa dute xel-la' sina chee'!  
 ¡Chadía chacanna dxexache lazre' dxi'u!  
 6 ¡Le güe lá'ana Dios na', bzue' xezr la xu lawe' nísadau'!  
 ¡Chadía chacanna dxexache lazre' dxi'u!  
 7 ¡Le güe lá'ana Dios na', bene' gubizra ne beu'!  
 ¡Chadía chacanna dxexache lazre' dxi'u!  
 8 ¡Bene' gubizra chee gusení na te zra!  
 ¡Chadía chacanna dxexache lazre' dxi'u!  
 9 ¡Bene' beu' ne belaj ca' chee xulusení na chizrela!  
 ¡Chadía chacanna dxexache lazre' dxi'u!  
 10 ¡Le güe lá'ana Dios na', betie' bi biu nedxu chee  
 benne' Egipto ca'!  
 ¡Chadía chacanna dxexache lazre' dxi'u!  
 11 ¡Le güe lá'ana Dios na', bebéaje' benne' Israel ca'  
 lu xezr la xu Egipto na'!  
 ¡Chadía chacanna dxexache lazre' dxi'u!  
 12 ¡Beche'e le' dute xel-la' waca zren chee'!  
 ¡Chadía chacanna dxexache lazre' dxi'u!  
 13 ¡Le güe lá'ana Dios na', bene' chupa la'a nísadau'  
 da nazí le' na Xrna!  
 ¡Chadía chacanna dxexache lazre' dxi'u!  
 14 ¡Bdee' benne' Israel ca' laduj nísadau' na'!  
 ¡Chadía chacanna dxexache lazre' dxi'u!  
 15 ¡Bgacue' nísadau' na' Faraón, benne' wenná bea chee Egipto,  
 ne benne' zeje' wedil-la chee' ca'!  
 ¡Chadía chacanna dxexache lazre' dxi'u!  
 16 ¡Le güe lá'ana Dios na', beche'e benne' chee' ca'  
 le'e xixre' lawe' lataj!  
 ¡Chadía chacanna dxexache lazre' dxi'u!  
 17 ¡Le güe lá'ana Dios na', betie' wenná bea blau ca'!  
 ¡Chadía chacanna dxexache lazre' dxi'u!  
 18 ¡Betie' wenná bea wal-la ca'!  
 ¡Chadía chacanna dxexache lazre' dxi'u!  
 19 ¡Betie' Sehón, wenná bea chee benne' amorreo ca'!  
 ¡Chadía chacanna dxexache lazre' dxi'u!  
 20 ¡Betie' Og, wenná bea chee xezr la xu Basán!  
 ¡Chadía chacanna dxexache lazre' dxi'u!  
 21 ¡Bnézruje' xezr la xu chee benne' ca' chee gaca na  
 chee benne' chee' ca'!  
 ¡Chadía chacanna dxexache lazre' dxi'u!  
 22 ¡Benne' na chee benne' Israel ca', benne' wen zrin chee' ca'!  
 ¡Chadía chacanna dxexache lazre' dxi'u!  
 23 ¡Naque' Dios na', quebe gul-la lazre' dxi'u  
 gate buluzetja benne' ca' dxi'u!  
 ¡Chadía chacanna dxexache lazre' dxi'u!  
 24 ¡Le' bselé' dxi'u lu na' benne' ca' guledí-lalene' dxi'u!  
 ¡Chadía chacanna dxexache lazre' dxi'u!  
 25 ¡Naque' Dios na', dxugawe' xúgute da zaj naca ban!  
 ¡Chadía chacanna dxexache lazre' dxi'u!

26 ¡Le güe lá'ana Dios chee xabáa!  
¡Chadía chacanna dxexache lazre' dxi'u!

## 137

1 Dxu'a xegu chee xezr la xu Babilonia gudxé'edxu,  
ne gudxézredxu gate xeajsá lázredxu chee xezr Sión.

2 Lu zruze xaga labada' dxu'a xegu na'  
buquéladxu da cun zríadi'i na du cheedxu ca'.

3 Benne' ca' guleché'ē dxi'u ca benne' zaj nada'u  
gulenábene' dxi'u gúl-ladxu.

Benne' ca' buluzría xi' xezre cheedxu gulé'ē dxi'u  
súadxu lu xel-la' dxebé, gulenné':

Le gul-la cheentu' da ca' bíl-lale lu xezre Sión.

4 ¿Ajazra gúl-ladxu da güe lá'anadxu Xránadxu Dios  
naga zúantu' lu xezr la xu chee benne' zitu' ca'?

5 Chela gal-la lazra' lue', xezre Jerusalén,  
gun Dios gunite na'a xabēla xel-la' waca chee na.

6 Ben xedá' luzra' chíhajla' che quebe cheajsá lazra' chiu',  
ne che quebe gucá'ana szrena' lue', Jerusalén,  
nacu' da dxezaca ba lázreleda'.

7 Xrana' Dios, bsa lazre' da calēla da belún benne' Edom  
lu zra na' guzría xi' xezre Jerusalén,  
gate na' gulenné': "Le guchinnaj na. Le guchinnaj na,  
ca zrintē lu lane chee na."

8 Le'e, benne' Babilonia, cuía xile.

Ba neza zrentē gaca na chee bēnnea' gunē' chee le  
ca da benle le'e cheentu' netu'.

9 Ba neza zrentē gaca na chee bēnnea' que'ē bidu chee le ca',  
ne quine'-be' lu xiaj xre na'.

## 138

1 Xrana' Dios, dutē lázrdawa' güe lá'ana' Lue'.

Tu dxúl-lazqueza' da dxue lá'ana' Lue' lau dios ca' chee  
benne' zitu' ca'.

2 Dxuzú zriba' lau xudau' lá'azxa chiu',  
ne dxue lá'ana' Lau' lawe' da nacu' li lazre',  
ne dxexache lazru' bēnneache chiu',  
ne lawe' da blé'enu' nacu' Benne' szrentē,  
na' szrentē naca xrtizru'.

3 Gate bláwizra' Lue', na' gúcalēnu' neda'.  
Nen dutē xel-la' waca chiu' btipu' lazra'.

4 Xúgutē benne' wenná bea du gabí'i xezr la xu  
xelúe lá'anē' Lue', Xrana' Dios.

Caní xelunē' lawe' da ba belenne' ca naca xrtizru'.

5 Xelúl-le' chee da ba nune' Xránadxu Dios,  
lawe' da zrentē naca xel-la' ba chee Xránadxu.

6 Szrentē naca Xránadxu Dios, ne dxácalēnē'  
benne' baxache' ca',  
na' quebe dxu'ē lataj benne' dxucá'ana szren cuine'  
zrine' lau Le'.



<sup>7</sup> Lácala zua' lu da ba xa', Lue' dxutipu' lazra'.  
Dxedábagu' benne' ca' dxeledábaguē' neda',  
ne dutē xel-la' waca chiu' dxuseláu' neda'.

<sup>8</sup> Gun Xránadxu Dios da guchebe lazre' chia'.  
Xrana' Dios, tu dxexache lázrezquezu' bēnneache chiu'.  
Quebe gusanu' dxunu' zrin da guzú lau' dxunu'.

## 139

<sup>1</sup> Xrana' Dios, ba gunná' xánniu' neda'  
ne núnbea xánniu' neda'.

<sup>2</sup> Nézqueznu' gate dxe'a, ne gate dxasa'.  
Zítu'la nézqueznu' da zaj xu'u xichaj lázrdawa'.

<sup>3</sup> Ba gunná' xánniu' ca dxuna', ne ca dxexezí' lazra'.  
Nézqueznu' xúgutē da dxuna'.

<sup>4</sup> Gate quebe ne guchálaja' ba nézqueznu' Lue', Xran,  
xúgutē da nnia'.

<sup>5</sup> Gátetezla cuita' neda' zúaquezu' Lue', Xran,  
ne nuzé na'u neda'.

<sup>6</sup> Ca szrentē naca da nézenu' Lue' naca na da dxebáneda'.  
Nácalē'ē na sina da quebe gaca chéajni'ida'.

<sup>7</sup> ¿Gala cha'a zitu' naga quebe zúaqueze Be' chiu'?  
¿Gala guzrúnmuja' naga quebe zúaquezu' Lue'?

<sup>8</sup> Che cuena' sibe zran xabáa, na' zúaquezu' Lue',  
ne che xétaja' lu da situj cheē xēzr la xu, na' zu' Lue'.

<sup>9</sup> La séqueda' tea' lu be', ne cha'a zitu' naga dxalaj gubizra,  
u tea' xechalá'a nísadau' naga dxebía gubizra,

<sup>10</sup> cá'anqueze na' súalēnu' neda',  
ne guxru na'u xabēla neda'.

<sup>11</sup> Chela gaca guna' gacu da chul-la neda',  
u guna' xexaca lení' da naxechaj neda', cheē  
xaca na da chul-la,

<sup>12</sup> da chul-la na' quebe gaca gucache na neda' lau Lue',  
na' chizrela xaca na ca te zra lau'.  
Túzqueze ca zaj naca da chul-la, ne xel-la' naxaní' lau Lue'.

<sup>13</sup> Lue' benu' da zaj xu'u lu bēla' dxen chia'.  
Lue' bzalju' neda' lu lē'ē xrna'a.

<sup>14</sup> Güe lá'anaqueza' Lue' lawe' da szrentē zaj naca da dxunu',  
ne dxebáneda' ca zaj naca na.  
Dutē lázrdawa' nézquezda' caní naca na.

<sup>15</sup> Blé'equenznu' neda' gate gulá' gubinna zrita xu'a,  
gate na' belezraga na lu lē'ē xrna'a,  
gate na' bgula' lu da bagácheze na'.

<sup>16</sup> Ble'enu' bēla' dxen chia' gate gulá' gubinna na.  
Xúgutē da caní ba naxúaj na lu xiche chiu',

na' ca gudé na' gulá' gubinna na,  
na' xúgutē na gulaca na cáteze zaj naxúaj na.

<sup>17</sup> Dios, szrentē zaj naca da dxuwía lazru' gunu'.  
Da zantē ca zaj naca na.

<sup>18</sup> Chela gaca lazra' gulaba' ca zaj naca na,

zaj naca na ca xuzre' dxe' dxu'a tu xegu zren.

Gate dxexebana', ne zúalequeza' Lue'.

<sup>19</sup> Dios, da líqueze gutiu' benne' ca' dxelune' da caleła.

Cheę le na', le gucuasa naga zua', le'e, weęe benne'.

<sup>20</sup> Chiu' Lue', Dios, dxelenné' dizra' schanni'.

Benne' ca' dxeledábague' lue' dxuluzétaje' Lau' lu da xálaze.

<sup>21</sup> Xrana' Dios, dxecuídada' benne' ca' dxuluzúę' Lue'  
chalá'ala,

ne dxezrá'li'a benne' ca' dxeledábague' Lue'.

<sup>22</sup> Dute lázrdawa' dxecuídada' benne' ca'.

Dxéqueda' benne' ca' ca benne' ca' dxeledábague' nédaqueza'.

<sup>23</sup> Gunná' xanne' neda', Dios, ne gunná' da xu'u na lázrdawa'.

Bxue neda' cheę nézenu' da xu'u lu xichaj lázrdawa'.

<sup>24</sup> Gunná' che zúale tu da caleła neda',

na' bsi neda' lu neza chawe' chiu' da zeajlí canna.

## 140

<sup>1</sup> Xrana' Dios, bselá neda' lu na' benne' ca' dxelune' da caleła.

Bxue neda' cheę quebe bi xelún benne' xichaj zra'a ca'  
chia' neda'.

<sup>2</sup> Benne' caní dxuluwía lazre' da caleła ca' da xelune'.

Tu zra tu zra dxulutíl-lalęne' bėnneache.

<sup>3</sup> Da dxelenné' naca na ca lazxa bėla' da zaj nalále'e.

Xrtizra' benne' ca' zaj naca na ca nisa snia cheę bėla'.

<sup>4</sup> Xrana' Dios, bxue neda' cheę quebe bi xelún benne' ca'  
dxelune' da caleła chia' neda'.

Bselá neda' lu na' benne' xichaj zra'a ca',

benne' ca' dxelune' ba xuzre cheajcházia'.

<sup>5</sup> Benne' ca' dxulucá'ana szren cuine' zaj nabeque'  
tu da queł-la na neda'.

Ba zaj nuzalę' xralaj dxu'a neza.

Ba zaj nabeque' da ca' xelęl-la na neda'.

<sup>6</sup> Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

<sup>7</sup> Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

<sup>8</sup> Xran, quebe gu'u lataj gaca ca da dxelezá lazre' benne' ca'  
dxelune' da caleła.

Quebe gu'u lataj chepe ban da dxuluwía lazre' xelune',

cheę quebe xulucá'ana szren cuine'.

<sup>9</sup> Zaj naxechaj benne' ca' dxelune' da caleła neda'.

Ben gaca cheę benne' ca' ca de' da dxelaca lazre' gaca  
cheę benne' xula.

<sup>10</sup> Ben xexruij xi' lawe' benne' ca'.

Bzra benne' ca' lu xi'.

Bzra benne' ca' lu da sítuje'e naga cabátadxá xelexedxúaje'.

<sup>11</sup> Quebe gu'u lataj xegá'ana lu xęzr la xu bėnnea' dxenné'  
da caleła.

Ben gaca da caleła cheę benne' xichaj zra'a, da guzríá xi na le'.

<sup>12</sup> Nezda' xechebe Xránadxu Dios waláz cheę benne' baxache',  
ne guzė chache' da zaj xu'u lu na' benne' xache' ca'.

<sup>13</sup> Da líqueze benne' xrlátaje ca' xelúe lá'ane' Lau' Lue',

na' benne' li lazre' ca' xelezúe' naga zu' Lue'.

## 141

<sup>1</sup> Xrana' Dios, dxuláwizra' Lue'.

Gudázega gácalenu' neda'.

Bene chi'a gate nnia' Lue'.

<sup>2</sup> Ben la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba' lau'.

<sup>3</sup> Xrana' Dios, bxue dxu'a nigá,

ne bxue xide dxu'a chee quebe nnia' tu da calela.

<sup>4</sup> Quebe gu'u lataj gaca lazra' guna' tu da calela,

ne chee quebe guna' tu da calela tu zren nen benne' ca'  
dxelune' da zrinnaj,

ne chee quebe gágulena' benne' ca' dxelune' da calela

lu laní chee'.

<sup>5</sup> Che gudé benne' xrlátaje neda' lu da ba xa', gaca na chia'

tu da chawe',

na' che til-le' neda', gaca na chia' ca tu da dxelále'e zixre

da dxegu'e xíchaja'.

Tu nábazqueza' Dios guzague' da calela da dxelún benne' ca'

dxelune' da calela.

<sup>6</sup> Gate xeledxú'une' benne' xíchaje ca' chee benne'

wen da calela ca' zran xi'a xiaj ca',

na' xeleque be'e bénneache naca li ca da gunnía'.

<sup>7</sup> Xelase dinnaj zrita chee benne' ca' dxu'a xedxu ba chee' ca'.

Xelaca na ca bchecu xu, da dxelase dinnaj na naga

dxa'ana bezre.

<sup>8</sup> Chee le na' dxenná'a naga zu' Lue', Xrana' Dios.

Dxuxrén lazra' Lue', quebe gusán lazru' neda'.

<sup>9</sup> Bxue neda' chee quebe xelej-la xralaj ca' chee benne' ca'

dxelune' da calela neda',

ne chee quebe cheajcházia' lu da zaj nabeque' benne'

wen da calela ca'.

<sup>10</sup> Ben cheajlechaze benne' ca' dxelune' da calela lu xralaj

da zaj nabéchequeze'

dxácaté na' tea' neda' ga na' zri'a chawe'.

## 142

<sup>1</sup> Zizraj dxuláwizra' Xránadxu Dios.

Du lazra' dxenaba' Xránadxu xexache lazre' neda'.

<sup>2</sup> Lau Le' dxawa' zría ca da dxaca chia'.

Lau Le' dxulé'eda' ca da stebe zua' neda'.

<sup>3</sup> Gate zua lázrdawa' lu da stebe, Lue', Xran, nézenu'

da dxaca chia'.

La neza naga dxedá' gulebeque' xralaj da quel-la na neda'.

<sup>4</sup> Dxenná'a cuita' xabela, san quebe nu chilá' gácalé neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xue' chia' neda'.

<sup>5</sup> Dxuláwizra' Lue', Xrana' Dios, dxennia':

Dxebeza lazra' tuzu' Lue'.

Tuzu' Lue' dxezá lazra' lu xezr la xu nigá.

6 Bene da dxuláwizra' Lue', lawe' da dxezaca zí'le'a.  
Bselá neda' lu na' benne' ca' dxeláu zi' xuzre' neda',  
lawe' da zaj naque' wál-ladxa ca neda'.

7 Bebéaj neda' lu da dxaca chia', chee gaca güe lá'ana' Lue'.  
Benne' xrlátaje ca' xeléchaje' neda' lawe' da gunu' gaca chawe' chia'.

## 143

1 Xrana' Dios, bene da dxuchálaja' lau Lue'.

Bze naga da dxenaba' lau'.

Gudá gácalenu' neda' lawe' da nacu' li lazre', ne xrlátaje.

2 Quebe guchi'u chia' neda', wen zrin chiu',  
ca naca da nabaga',

lawe' da lau' Lue' quebe nu chilá' benne' naque' du lazre'.

3 Gúcale neda' lawe' da dxeláu zi' xuzre' neda'.

Xeláteze bache xelútię' neda'.

Ba belune' naca' ca tu benne' dxedé' lu da chul-la  
ca naca chee benne' gate ca'.

4 Zua lázrdawa' lu da stébele'e, ne dxewí'ine lázrele'a.

5 Dxeajsá lazra' ca guca nédxudaute.

Dxulaba lazra' ca naca xúgute da benu'.

Dxeajsá lazra' ca naca da zrente' ca' da benu'.

6 Dxechisa na'a lau Lue'.

Naca' ca tu xezr la xu bizre, dxebíleda' Lué'queze.

7 Gudázega gácalenu' neda', Xran, lawe' da dxedú lazra'.

Quebe chenu' gácalenu' neda', chee quebe gaca' ca tu benne'  
ba xu'e xedxu ba.

8 Che zílala ben cheajsá lazra' dxexache lazru' bėnneache  
chiu' ca'

lawe' da dxuxrén lázrequeza' Lue'.

Bzėajni'i neda' ca dxal-la' guna'

lawe' da dxezá lazra' guna' da dxaca lazru' Lue'.

9 Xrana' Dios, bselá neda' lu na' benne' ca' dxeledábague'  
neda'

lawe' da dxuzúa cuina' lu na'u chee guxúequezu' neda'.

10 Bsedė neda' chee guna' da dxaca lazru' Lue',

lawe' da nacu' Lue' Dios chia'.

Gusel-la Be' xrlátaje chiu' chee che'e neda' la neza chawe' chiu'.

11 Chee gaca bea na nacu' xrlátaje, Xran, gutipu' lazra'.

Lawe' da nacu' xrlátaje, guseláu' neda' lu da dxaca chia'.

12 Lawe' da nacu' li lazre', guzría xi'u benne' ca'  
dxeledábague' neda',

ne guzría xi'u xúgute benne' ca' dxelaca lazre'

xuluzría xi'e neda',

lawe' da naca' neda' wen zrin chiu'.

## 144

1 jGaca ba lá'azxa Xránadxu Dios,

Bėnnea' dxuzé chache' neda'!

Naque' Bėnnea' dxuzázraje' na'a chee cha'a lu wedil-la,

ne dxuzázraje' zrube na'a chee séqueda' tıl-lalęna' benne' ca'  
dxelune' da calęla.

- 2 Naque' Benne' dxexache lazre' neda',  
ne naque' ca tu xu'u naga ze chawa'.  
Dxuzúa chache' neda', ne dxuselé' neda'.  
Dxucu'uje' neda', na' dxuxrén lazra' Le'.  
Dxune' dxuluzúa bénneache chia' dizra' chia'.  
3 Xrana' Dios, ¿ájazra naca nu benne', dxeajsá lazru' le'?  
¿Ájazra naca nu benne' dxe'u gunne xue chee'?  
4 Naca benne' ca tu da níteze.  
Zaj naca zra chee' ca tu zrul-la da dxedeze.  
5 Xrana' Dios, gusalaj zran xabáa, ne betaj gácalenu' neda'.  
Bta xi'a ca', na' dxuaj zren chee xi'.  
6 Bzalaj xesa guziu', ne blaga benne' ca' dxelune' da calela.  
Bzalaj xaga nalá xéche'ze chiu', ne bzria xi' le'.  
7 Naga zu' na'la, bze na'u, ne bselá neda' lu da stébele'e zua'.  
Bselá neda' lu na' benne' zitu' ca',  
8 benne' ca' tu dxelennézqueze' da wen lazre',  
ne dxuluzétaje' Dios gate dxelezí xe'e.  
9 Dios, gúl-laqueza' chiu' da cube, quínnia' da dxúl-lalena'.  
Nen tu da dxínnia' da nua chi du chee na gúl-laqueza' chiu'.  
10 Nacu' Lue' Bénnea' dxune' dxeledxúaj chawe'  
benne' wenná bea ca'.  
Dxuseláu' David, wen zrin chiu', lu xia nalá chee  
benne' wen da calela ca'.  
11 Bexa'u neda', ne bselá neda' lu na' benne' zitu' ca',  
benne' ca' tu dxelennézqueze' da wen lazre',  
na' dxuluzétaje' Dios gate dxelezí xe'e.  
12 Ben xelegula bi biu cheentu' ca tu xaga da dxegula chawe',  
ne zaj nácabe' bi cuide'.  
Ben xelaca bi nu'ula cheentu' ca bdú'a xiaj xrtante ca'  
da zaj nnita tu lu xu'u zren.  
13 Ben chaté lízrentu' xúgute cuen lina cheentu'.  
Ben xelánle' be xixre' cheentu', chee xelácaba'  
gaxúa gaxúane be xixre'du ca' lu xezr la xu cheentu'.  
14 Ben xelaca bezre cheentu' be wal-la chee xelunba' zrin.  
Ben quebe xelezanba' gate quebe ne zrin cha beu' cheeba' ca'.  
Ben quebe nu cha' cuezre xáche' la neza cheentu'.  
15 Ba neza zrenté naca na chee bénneache ca' dxaca caní chee'.  
Ba neza zrenté naca na chee bénneache ca'  
naca Xránadxu Dios chee'.

## 145

- 1 ¡Gucá'ana szrena' Lue', Dios chia', ne Wenná Bea chia'!  
¡Tu güe lá'anazqueza' Lau' Lue' chadía chacanna!  
2 ¡Tu zra tu zra güe lá'ana' Lue'!  
¡Tu güe lá'anazqueza' Lau' Lue' chadía chacanna!  
3 ¡Szrenté naca Xránadxu Dios, ne naca chee'  
tu güe lá'anazquezdxu Le'!  
¡Québequeze séquedxu gúnbeadxu ca szrenté naque'!  
4 Xúgute cuen bénneache chiu' xelúe lá'ané' da beñu' Lue',  
ne xuluzenne' benne' xezr la xu ca' ca naca da zrenté da beñu'.

- 5 Gulaba lazra' ca naca da xrtante chee da xabáa chee  
xel-la' szren chiu', ne ca naca da zrente da nunu'.
- 6 Xúgute bēnneache xuluchálaje' ca naca xel-la' waca chee  
da zrente da nunu',  
na' neda' guzenda' le' ca naca xel-la' szren chiu'.
- 7 Xuluzenne' le sa' ljwezre' ca naca xel-la' zri'i lazre' zren  
chiu',  
ne tu xelúl-lazqueze' chee da xrlátaje da nacu' Lue'.
- 8 Xránadxu Dios naque' zri'i lazre', ne dxexache lazre'  
bēnneache chee'.  
Dxezrene', ne quebe dxezrá'aze', na' dxexache lázrele'e dxi'u.
- 9 Dxun Xránadxu Dios da chawe' chee xúgute bēnneache,  
ne dxexache lazre' xúgute da zaj naca ban da nune'.
- 10 Xúgute da ca' nunu' xelúe lá'ana na Lue', Xran,  
na' bēnneache chiu' xulucá'ana szrene' Lue'.
- 11 Dxelenné' ca szrente naca xel-la' dxenná bea chiu'.  
Dxuluchálaje' ca naca xel-la' waca zrente chiu',
- 12 chee xuluzenne' xúgute bēnneache ca naca da zrente ca'  
da nunu',  
ne ca naca da xabáa chee xel-la' szren chee xel-la' dxenná bea  
chiu'.
- 13 Xel-la' dxenná bea chiu' tu súazqueze na,  
ne nna be'enu' xúgute cuen bēnneache.
- 14 Nuxru Xránadxu Dios xúgute benne' ca' dxeajlecházie',  
ne dxechise' xúgute benne' ca' zaj nada'u lu zrin wal-la.
- 15 Xúgute bēnneache dxelenné'e Lue' chee gácalenu' le',  
na' Lue' gunézruju' da xelawe' ca zrin zra chee na.
- 16 Dxuzé na'u, ne dxunézruju' ca naca da chawe'  
da dxelexárje xúgute da zaj naca ban.
- 17 Xlátaje naca Xránadxu Dios lu xúgute da dxune',  
ne dxexache lazre' xúgute da zaj naca ban da nun Le'.
- 18 Xránadxu Dios zúatequeze' gácalene' xúgute benne' ca'  
dxululáwizre' Le',  
xúgute benne' ca' du lazre' dxululáwizre' Le'.
- 19 Guné' ca dxelezá lazre' benne' ca' dxelezrebe' Le'.  
Cá'anqueze xenne' chee' gate xululáwizre' Le', ne guselé'  
benne' ca'.
- 20 Xránadxu Dios dxuxúequeze' xúgute benne' ca'  
zaj nazrí'ine' Le',  
san guzria xi'e xúgute benne' ca' dxelebéaj xíchaje' Le'.
- 21 Du lazra' güe lá'ana' Xránadxu Dios.  
Xúgute benne' dxal-la' tu xelúe lá'anazqueze' Le' lá'azxa  
chadía chacanna.

## 146

- 1 ¡Gaca ba lá'azxa Xránadxu Dios!  
¡Du lazra' güe lá'ana' Xránadxu Dios!

- 2 ¡Dxácate naca bana' güe lá'ana' Xránadxu Dios!  
 ¡Tu gúl-lazqueza' da güe lá'ana' Xránadxu Dios dxácate  
 naca bana'!
- 3 Quebe guxrén lázrele benne' dxeleenná bea,  
 ne quegá bènneache lawe' da quebe xelezéquene'  
 xuluselé' le'e.
- 4 Dxeledxúaj be' zaj xu'e, na' xelexexaque' xu xrte.  
 Lu zra ná'queze xelenite da dxuluwía lazre' xeluné'.
- 5 Ba neza zrente naca na chee bènnea', dxácalē Dios chee  
 Jacob le',  
 bènnea' dxebeza lazre' Xránadxu Dios.
- 6 Dios na' bene' xabáa, ne xezr la xu, ne nísadau',  
 ne xúgutē da zaj zra' lataj ca'.  
 Naque' Bènnea' tu dxúnzqueze' da li lazre'.
- 7 Dxuchi'e chee benne' baxache' ca',  
 ne dxugawe' benne' ca' dxeleduné'.  
 Xránadxu Dios dxuselé' benne' ca' zaj nada'u lu na'  
 benne' ca'.
- 8 Xránadxu Dios dxexuné' xiaj lau benne' la chul-la ca'.  
 Xránadxu Dios dxechise' benne' ca' dxejlecházie'.  
 Xránadxu Dios nazrí'ine' benne' xrlátaje ca'.
- 9 Xránadxu Dios dxuxúe' benne' zitu' ca'.  
 Nuxre' bidau' wezebe ca', ne nu'ula tuze ca',  
 na' dxuchinnaje' da dxelún benne' ca' dxeluné' da calela.
- 10 Tu nna béazqueze Xránadxu Dios.  
 Le'e, benne' xezre Sión, nna be'e Dios cheele  
 ne xúgutē cuen zrí'ine zre súale.

¡Gaca ba lá'azxa Xránadxu Dios!

## 147

- 1 ¡Le güe lá'ana Xránadxu Dios lawe' da naca chawe'  
 gúl-ladxu da güe lá'anadxu Dios cheedxu,  
 lawe' da xrtantē naca güe lá'anadxu Le'!
- 2 Xránadxu Dios xexuné' xezre Jerusalén.  
 Xequé'e benne' Israel ca' zaj zue' xezr la xu zitu' ca'.
- 3 Dxexuné' benne' ca' dxelexewí'ine lázrele'e,  
 ne dxudé'e ladxe' naga zaj naca we' chee benne' ca'.
- 4 ¡Nézquezne' ca zaj naxán belaj ca'!  
 ¡Tu tu belaj ca' dxu'e la na!
- 5 ¡Szrente naca Xránadxu Dios, ne nape' dutē xel-la' waca!  
 ¡Quebe bi de da quebe dxéajni'ine'!
- 6 Xránadxu Dios dxácalēne' benne' dxexruj lazre' ca',  
 na' dxuzéxruje' benne' ca' dxeluné' da calela.
- 7 ¡Le gul-la da güe lá'anale Xránadxu Dios!  
 ¡Le gul-la, ne le quinne da cun zríadi'i na du lau Dios cheedxu!
- 8 ¡Le' dxudé'e beuj ca' zran xabáa!  
 ¡Le' dxelel-le' nisa xiuj lu xezr la xu!  
 ¡Le' dxuné' dxelezzría xixre'du ca' lu xi'a ca'!
- 9 ¡Le' dxunézruje' da dxelagu be xixre' ca'!

¡Dxunézruje' da dxelagu béchajdu ca', be dxelebezre xa'aba'!

<sup>10</sup> Da dxezaca ba lázreleṅe' quebe naca na xel-la' wal-la  
cheḡ bzrina' ca',  
ne quegá xel-la' wal-la cheḡ bénneache.

<sup>11</sup> Dxezaca ba lázreleṅe' benne' ca' dxelezrebe' Le',  
ne benne' ca' dxelebeza lazre' Le' cheḡ xexache lazre' le'.

<sup>12</sup> ¡Le güe lá'ana Xránadxu Dios, le'e zrale xezre Jerusalén!  
¡Le güe lá'ana Dios cheḡle, le'e zrale xezre Sión!

<sup>13</sup> ¡Le' dxuzúa chúchue' dxa xu'u cheḡ xezre cheḡle!  
¡Dxunḡ' dxaca chawe' cheḡ benne' ca' zaj zre'e xezre cheḡle!

<sup>14</sup> ¡Dxebeque' xel-la' dxebeza zri lazre' lu xezr la xu cheḡle!  
¡Gúnnale'e cheḡle zrua' chawe'!

<sup>15</sup> ¡Dxusel-le' xrtizre' cheḡ benne' ca' zaj zre'e dutḡ xezr la xu,  
na' chadí dxaca ca da dxenné'!

<sup>16</sup> ¡Dxugacue' xezr la xu bezxe' da naca na ca zrila'!  
¡Dxuzéxruje' xrlḡ'ela dxela ca de!

<sup>17</sup> ¡Dxunḡ' dxelexruj xiaj bezxe' ca weaj xíajdu ca'!  
¡Nu benne' gaca guchaga lawe' da zaga cheḡ na?

<sup>18</sup> ¡Dxenná be'e, na' dxexuna na!  
¡Dxunḡ' dxaca be', na' dxexaca bezxe' na' nisa guba'u!

<sup>19</sup> ¡Bzézajni'ine' Jacob ca naca xrtizre', ne bdeḡ xrba cheḡ',  
ne da ca' gunná be'e lu na' benne' Israel ca'!

<sup>20</sup> Quebe ne gune' caní cheḡ xezr la xu xezícadxa ca',  
na' benne' xezr la xu ca' quebe dxelexúnbe'e xrba cheḡ'.

¡Gaca ba lá'azxa Xránadxu Dios!

## 148

<sup>1</sup> ¡Le güe lá'ana Xránadxu Dios!

¡Le güe lá'ana Xránadxu, le'e, zrale xabáa!  
¡Le güe lá'ana Le', le'e, zrale dxala!

<sup>2</sup> ¡Le güe lá'ana Le', le'e, gubáz cheḡ xabáa cheḡ' ca'!  
¡Le güe lá'ana Le', le'e, benne' zante cheḡ'!

<sup>3</sup> ¡Le güe lá'ana Le', le'e, gubizra, ne beu'!  
¡Le güe lá'ana Le', le'e, belaj dxusenile!

<sup>4</sup> ¡Le güe lá'ana Le', le'e, xabáa ca',  
ne le'e, nisa zrale lówela xabáa!

<sup>5</sup> ¡Le güe lá'ana La Xránadxu,  
lawe' da gunná bé'eng', na' guzúale!

<sup>6</sup> ¡Beneḡ' súale tu chí'ize, ne chadía chacanna!  
¡Bzueḡ' cheḡle tu da bdxixruj be'e da quebe te cheḡ na!

<sup>7</sup> ¡Le güe lá'ana Xránadxu lu xezr la xu,  
le'e, bea zri'a zrale lu nísadau', ne xúgute nisa situj,

<sup>8</sup> ne le'e, xesa guziu', ne xiaj xiuj, ne bezxe', ne beuj ca',  
ne le'e, be' bduunu' ca', dxunle ca gunná be'e!

<sup>9</sup> ¡Le güe lá'ana Le', le'e, xí'adu ca', ne xí'a zri'a ca',  
ne le'e, xaga zixre ca', ne xaga cedro ca',

<sup>10</sup> ne le'e, be' xixre' ca', ne bea ca' dxuluxúe bénneache,  
ne le'e, be' snia ca', ne be' zaj zua xrila!



11 ¡Le güe lá'ana Le', le'e, benne' wenná bea ca', ne xúgute  
bénneache,

ne le'e, benne' dxelenná be'e, ne benne' dxuluchi'e,

12 ne le'e, benne' wegú' ca', ne nú'uladu ca',

ne le'e, benne' gula ca', ne bidu ca'!

13 ¡Le güe lá'ana La Xránadxu!

¡Szréntedxa naca La Le' ca xúgute la bénneache!

¡Da xabáa chee' dxulé'e lau na lu xezr la xu, ne xabáa!

14 ¡Le' nune' xezr chee' xezre wal-la!

¡Le güe lá'ana Le', le'e, bénneache chee',

nácale zrí'ine zre sua Israel!

¡Nácale benne' nazrí'i Le'!

¡Le güe lá'ana Xránadxu!

## 149

1 ¡Le güe lá'ana Xránadxu Dios!

¡Le gul-la chee' Xránadxu tu da cube!

¡Le güe lá'ana Le' naga zaj nazraga bénneache chee'!

2 ¡Le be, le'e, benne' Israel, lau Bénnea' bene' le'e!

¡Le sua xel-la' dxebé, le'e, zrale Sion, lau Bénnea' naque'

Wenná Bea chee!

3 ¡Le güe lá'ana La Xránadxu, ne guxa'ale!

¡Le guchunchu xide ca', ne le quinne

da cun zríadi'i na du ca', dxue lá'anale Le'!

4 ¡Xránadxu Dios dxezaca ba lázrele' bénneache chee'!

¡Dxape' ba lá'ana benne' dxexruj lazre' ca', ne dxuselé' le'!

5 Dخال-la' xelebéqueze bénneache chee' lu da xabáa chee',

ne xelúl-le' duté xel-la' dxelebé du xela.

6 Dخال-la' xebezre xe'e, xelúe lá'ane' Dios,

zaj nu'e xia da zaj nalá dxupa la'ate,

7 chee' xelexebéaj lazre' benne' xezr la xu ca',

ne xuludé' xel-la' zi' benne' xezre ca',

8 ne xuluchéajé' benne' wenná bea chee' ca' du xia,

ne benne' dxelenná be'e nen du xia,

9 ne xuluzría xi'e benne' ca' ca ba nun Dios gaca chee'.

Da nigá gaca na da xabáa chee' bénneache chee' Dios.

¡Le güe lá'ana Xránadxu!

## 150

1 ¡Le güe lá'ana Xránadxu Dios!

¡Le güe lá'ana Xránadxu lu xudau' chee'!

¡Le güe lá'ana xel-la' waca chee' lu xabáa chee'!

2 ¡Le güe lá'ana Le' ca zaj naca da zren da nune'!

¡Le güe lá'ana Le' ca naca xel-la' szren chee'!

3 ¡Le güe lá'ana Le', gucuézrele luzu ca' da dxulucuezre'!

¡Le güe lá'ana Le', quinnele da cun zríadi'i na du,

ne da ca' dxínnele!

4 ¡Le güe lá'ana Le', guchúnehule xide, ne guxa'ale!

¡Le güe lá'ana Le', quinnele da cun zríadi'i na du,

ne gucuézrele bchiuj!

<sup>5</sup> ¡Le güe lá'ana Le', gutíl-lale xíadu ca'!

¡Le güe lá'ana Le', gutíl-lale xia zren ca'!

<sup>6</sup> ¡Le güe lá'ana Xránadxu, xúgutele naca banle!

¡Le güe lá'ana Xránadxu Dios!

## DIZRA' CHAWE' CA NACA CHEE JESUCRISTO DA BZUAJ SAN MATEO

*La benne' ca' gulaque' xra gula chee Cristo*

*(Lc. 3.23-38)*

<sup>1</sup> Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

<sup>4</sup> Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

<sup>5</sup> Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

<sup>6</sup> Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

<sup>11</sup> Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

<sup>12</sup> Jeconías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guquę' xra xetú benne' lę' Jacob.

<sup>16</sup> Jacob nigá guquę' xra José, benne' cheę María, xrna Jesús, Bénnea' naquę' Cristo.

<sup>17</sup> Caní naca, gulaca chidá' cue' bénneache gate guzú lau zua Abraham, ca bzrintę zra zua David, na' gulaca xechidá' cue' bénneache ca' gate guzú lau zua David, ca bzrintę zra gate na' benne' Babilonia ca' guleché'ę benne' Israel ca' lu xęzr la xu cheę', na' gulaca xechidá' cue' bénneache ca' gate guzú lau zra na', ca bzrintę zra gulaj Cristo.

*Ca guca gate gulaj Cristo*  
(Lc. 2.1-7)

<sup>18</sup> Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'i nę cheę xel-la' waca cheę Be' Lá'azxa cheę Dios.

<sup>19</sup> José, benne' cheę María nigá, naquę' benne' xrlátaje. Quebe guca lazre' gulé'ene' ca ba naca cheę María lau benne' xęzre ca'. Guca lazre' gusanę' lę' bagácheze.

<sup>20</sup> Dxácate dxudé lazre' da nigá, ble'e lau tu gubáz cheę xabáa, gubáz cheę Xránadxu, ga zua José na' lu bchigala, na' guzre' lę':

—José, zri'ine zre sua David, quebe zrebu' si' lu na'u María cheę gácabe' zru'ulu', lawe' da bidu biu na' sanbe' zabe' nę cheę Be' Lá'azxa cheę Dios.

<sup>21</sup> Zrú'ulu' gúxrube' tu bidu biu cheębe', na' lue' gu'u labe' Jesús. Caní gu'u labe' lawe' da guselabe' bénneache lu dul-la da zaj nabague'.

<sup>22</sup> Xúgute da caní gulaca ca' cheę guca ca da gunná Xránadxu lu dxu'a benne' ca' buluchálaje' waláz cheę'.

<sup>23</sup> Caní gunné':

Tu nú'uladau' gúadaube' sanbe' tu bidu biu cheębe', na' xelu'e labe' Emanuel.

Emanuel zéaje na: Dios zúalęne' dxi'u.

<sup>24</sup> Ca bebán José, na' bene' cáteze gunná gubáz cheę Xránadxu, na' guzí' lu nęęe María cheę gácabe' zru'ule'.

<sup>25</sup> Quebe gulaque' tuze ca gusandxa María bidu biu nedxu cheębe', na' buluzúe' labe' Jesús.

## 2

*Dxeleznín benne' sina ca' lu xęzre Jerusalén*

<sup>1</sup> Bidau' Jesús gúlajbe' lu xęzre Belén da nababa xęzr la xu Judea gate dxenná bea benne' lę' Herodes ga na'. Nadxa beleznín benne' ca' lu xęzre Jerusalén, benne' zá'aque' chalá'a naga dxalaj gubizra, zaj naquę' benne' sina gula.

<sup>2</sup> Na' gulenabe':

—¿Ga zua bidu na' ba gúlajbe' cheę gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj cheębe', na' bla'ntu' nigá cheę gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúe' stębe, ne cá'anqueze guca cheę xúgute benne' zaj zre'e Jerusalén.

<sup>4</sup> Nadxa Herodes, wenná bea na', btupe' xúgute benne' xíchaje cheę bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'e lę':

—Lu xęzre Belén da nababa xęzr la xu Judea, lawe' da bzuaj caní tu benne' bchálaje' waláz cheę Dios, gate na' gunné':

<sup>6</sup> Lue', Belén cheę xęzre ca' zaj nababa na Judá, nacu' lue' xęzre da quebe naca na da bzébedxa ládujla benne' ca' dxelenná be'ene' xęzr la xu Judá nigá, lawe' da ládujla bėnneache chiu' dxuaj tu benne' nna be'e, na' guxúequeze' bėnneache chia', benne' Israel.

<sup>7</sup> Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'ene'.

<sup>8</sup> Nadxa gusel-le' benne' ca' chjaque' xęzre Belén, ne guzre' le':  
—Le chjaca na', ne le naba xanne' cheę bidu na', na' ca cheajxrácale-be', na' le guzén neda' cheę cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná Herodes, wenná bea, nadxa besiá'que', na' belaj da belelé'ene' gate zaj zre'e chalá'a naga dxalaj gubizra zeaj na lau le', na' bzrinte na, ne guzúa na naga zua bidu na'.

<sup>10</sup> Gate benne' sina gula ca' belelé'ene' belaj na', nadxa gulebé'ene'.

<sup>11</sup> Ca gulu'e lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaje' xua cheę' ca', ne bulunézruje'-be' oro, ne xalaj zixre, ne mirra da naca na zichaj.

<sup>12</sup> Ca gudé na', Dios guzre' benne' ca' lu bchigala québedxa xelexedé'e naga zua Herodes. Cheę le' na belexequé'e neza xula, belexezrine' lazrie'.

### *Ca guca beleché'e Jesús lu xęzr la xu Egipto*

<sup>13</sup> Ca gudé besi'aca benne' sina gula ca', nadxa tu gubáz cheę xabáa, gubáz cheę Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xęzr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá cheę gutie'-be'.

<sup>14</sup> Nadxa José guxase', na' chizrélala beche'e bidu na', ne xrnabe', na' bexu'e-be' lu xęzr la xu Egipto.

<sup>15</sup> Gulezré'e na' ca bzrindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz cheę, gunné': "Xuláwizra' bi biu chia' cheę xedxúajbe' lu xęzr la xu Egipto."

### *Dxenná be'e Herodes benne' ca' xelútie' bidu biu ca'*

<sup>16</sup> Gate gúquebe'e Herodes gulezí xę benne' sina ca' le', na' bzrá'alg'e, ne gunná bé'ene' benne' ca' xelútie' xúgute bi biu dxé'enedau', ca zrinte bidu ca' ba zaj zua chup iza, bidu ca' zaj zrabe' xęzre Belén, ne bidu ca' zaj zrabe' lu xęzredu ca' zaj naxechaj na xęzre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'.

<sup>17</sup> Ca'an guca ca da bzuaj Jeremías, bėnnea' bchálaje' waláz cheę Dios ba guca zan' iza, gunné':

<sup>18</sup> Guca tu schaga lu xęzre Ramá. Guca webezre, ne gulebezre xache'. Raquel na' dxebézrele'e cheę bi cheę' ca'. Québequeze dxaca lazre' xexaca zrene' lawe' da ba gulate bi cheę' ca'.

<sup>19</sup> Ca gudé gute Herodes, na' tu gubáz cheę xabáa, gubáz cheę Xránadxu ble'e lawe' José lu bchigala naga zue' Egipto, na' guzre' le':

<sup>20</sup> —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelúti'e bidu nigá.

<sup>21</sup> Nadxa guxasa José, na' beche'e bidu na', ne xrnabe', na' belexezrine' lu xezr la xu Israel.

<sup>22</sup> Ca guneze José dxenná bea Arquelao naga nababa Judea waláz chee xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee xabáa le' lu bchigala.

<sup>23</sup> Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

### 3

*Juan dxegu'e lban le'e xixre' lawe' lataj*  
(Mr. 1.1-8; Lc. 3.1-9, 15-17; Jn. 1.19-28)

<sup>1</sup> Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea.

<sup>2</sup> Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

<sup>3</sup> Juan nigá naque' bénnea' bchalaj Isaiás chee'. Isaiás bchálaje' waláz chee Dios gate bzuaje' caní:

Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga té'e'.

<sup>4</sup> Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrina'dau' chee' bézudau'.

<sup>5</sup> Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute' xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán.

<sup>6</sup> Ca gulextrúalepe' dul-la chee', Juan nigá bchue' benne' ca' nisa lu xegu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za'?

<sup>8</sup> Le gun da xrlátaje da xelunna bea na ba bebí'i lázrele.

<sup>9</sup> Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham.

<sup>10</sup> Le'e nácale ca xaga ca'. Xia waga bache nalá na chee' chugu na xaga ca', na' xúgute' xaga ca' quebe dxelebía na da zixre chawe' welechugue na, na' xelexze na lu xi'.

<sup>11</sup> Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje' xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxé' blau ca neda', na' quebe zaca' cuéajza' zrele' xu'u ni'e.

<sup>12</sup> Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee' na, na' xuzrá chawe' zrua' xtila na' lu da'a chee' na, san guzezxe' xizre na' lu xi' da quebe xexula na.

*Da guca gate gudxúa Jesús nisa*  
(Mr. 1.9-11; Lc. 3.21-22)

<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee' guchúe' Le' nisa.

<sup>14</sup> Nédxute Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'.

<sup>16</sup> Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'axza chee' Dios dxétaje' ca tu gugu chíchidau', zeajsiaba' lawe Jesús.

<sup>17</sup> Nadxa ben tu chi'i lu be', gunné':

—Benne' nigá naque' Zrí'inequeza' nazrí'ite' lazra'. Dhezaca ba lázreleña' Le'.

## 4

### *Dxaca lazre' da xriwe' gun na бага Jesús zria (Mr. 1.12-13; Lc. 4.1-13)*

<sup>1</sup> Nadxa Be' Lá'axza chee' Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'.

<sup>2</sup> Quebe bi gudagu Jesús chua zra chua xela, na' ca gudé na' guduné'.

<sup>3</sup> Nadxa da xriwe' bzrin na naga zua Jesús chee' gun zréaje na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee' Dios dxenné': “Quebe gaca ban nu benne' gawe' xétaze, san nen xúgute dizra' chee' Dios gaca bane'.”

<sup>5</sup> Nadxa da xriwe' guché na Jesús lu xezre lá'axza Jerusalén, na' bzua na Le' xíchajte xudau',

<sup>6</sup> na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee' Dios:

Dios nna bé'ene' gubáz chee' xabáa chee' ca'

chee' xelácalene' Lue'.

Welexechise' Lue' nen ne'e

chee' quebe gunu' zi' ni'u lu xiaj ca'.

<sup>7</sup> Na' gunná Jesús:

—Cá'aqueze dxenná lu xiche chee' Dios, dxé'e bénneache: “Quebe guchínenu' Xranu' Dios cáteze dxaca lazru'.”

<sup>8</sup> Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee' na.

<sup>9</sup> Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

<sup>10</sup> Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: “Bca'ana szren Xranu' Dios, ne be lá'ana tuze Le'.”

<sup>11</sup> Nadxa da xriwe' becuasa na lau Jesús, na' belezrín gubáz chee' xabáa chee' Dios, ne bulunézruje' da dxechine Jesús.

### *Dxuzú lau Jesús dxuchálaje' xrtizra' Dios naga nababa Galilea (Mr. 1.14-15; Lc. 4.14-15)*

<sup>12</sup> Gate ben Jesús xu'u Juan lizre xia, na' bezé'e zexíaje' naga nababa Galilea.

<sup>13</sup> Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí.

<sup>14</sup> Caní guca ca da bzuaj Isaías, benne' bchálaje' waláz chee Dios, gunné':

<sup>15</sup> Lu xezr la xu chee Zabulón, ne chee Neftalí, naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán. Naga nababa Galilea, naga zaj zra' benne' quebe zaj naque' judío.

<sup>16</sup> Bénneache zaj zra' lu da chul-la belelé'eng' tu da dxusaníle'e na, na' benne' zaj zra' naga xu'u zrul-la chee xel-la' gute ba bsaní' tu xi' naga zaj zre'e.

<sup>17</sup> Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.

*Jesús dxuláwizre' tapa benne' wezén bela*

(Mr. 1.16-20; Lc. 5.1-11)

<sup>18</sup> Gate na' zeaj Jesús dxu'a nísadau' ga nababa Galilea, na' blé'eng' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzale' xixruj bela chee' lu nisa.

<sup>19</sup> Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dxunle dxezenle bela.

<sup>20</sup> La bulucá'anate' xixruj chee' ca', na' zjácálené' Jesús.

<sup>21</sup> Xelátedauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le'.

<sup>22</sup> na' la bulucá'anate' da dxedá lawe' nísadau' na', ne xre', na' zjácálené' Jesús.

*Jesús dxusédene' bénneache naga nababa Galilea*

(Lc. 6.17-19)

<sup>23</sup> Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bénneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexune' xúgute benne' ca' ca zaj naca xízrawe' cha chee'.

<sup>24</sup> Ca'an guca, xúgute benne' chee xezr la xu Siria belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zué' lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní.

<sup>25</sup> Zjácále benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

## 5

*Lban da bchalaj Jesús tu lu xi'a*

<sup>1</sup> Gate ble'e Jesús xúgute benne' zan ca' zá'aque' naga zué', nadxa guluéne' tu lu xi'a, ne gudxé'e na'. Nadxa benne' ca' dxusede Jesús beledube' cuité'.

<sup>2</sup> Nadxa guzú lau Jesús dxusédene' benne' ca'.



*Nu benne' naca chee' tu da ba neza**(Lc. 6.20-23)*<sup>3</sup> Gunná Jesús:

—Da ba neza zrentę naca na cheę benne' ca' dxelexúnbe'e ca naca xel-la' dxexazrje cheę' lau Dios. Benne' caní zaj naca cheę' xelexú'e naga dxenná bea Dios xabáa.

<sup>4</sup> 'Da ba neza zrentę naca na cheę benne' ca' dxelelé'elę' zaj zuę' lu da baxache' lawe' da zaj nabague' dul-la. Dios dxexúe zrenę' benne' caní.

<sup>5</sup> 'Da ba neza zrentę naca na cheę benne' zaj naque' zren lazre'. Benne' caní xelezí'e cheę' xęzr la xu da nachębe lazre' Dios gunęzruje' benne' caní.

<sup>6</sup> 'Da ba neza zrentę naca na cheę benne' du lazre' dxelaca lazre' xelunę' da naca xrlátaje lau Dios. Dios gácalęne' benne' caní.

<sup>7</sup> 'Da ba neza zrentę naca na cheę benne' dxelexexache lazre' benne' xula. Dios wexache lazre' benne' caní.

<sup>8</sup> 'Da ba neza zrentę naca na cheę benne' ca' zaj xu'u xichaj lázrdawe' da xrlátaje. Benne' caní welelé'eng' Dios.

<sup>9</sup> 'Da ba neza zrentę naca na cheę benne' dxelebeza zri lazre' nen bęneache. Dios guzúe' le' ca bi cheęqueze'.

<sup>10</sup> 'Da ba neza zrentę naca na cheę benne' dxeledęe' xel-la' zi' lu na' benne' ca' dxelunę' cheę' da calęla cate' dxelunę' da xrlátaje. Benne' caní zaj naca cheę' xelexú'e naga dxenná bea Dios xabáa.

<sup>11</sup> 'Da ba neza zrentę naca na cheęle le'e che benne' dxeleńę' schanni' cheęle, ne dxelunę' cheęle da calęla, ne dxeleńę' cheęle xúgute dizra' wen lazre' lawe' da nácale chia' neda'.

<sup>12</sup> Le be, ne le xezaca ba lázrele lawe' da wazile tu da zrentę da gunna Dios le'e xabáa. Caní gaca na lawe' da cá'anqueze caní guláu zi' xuzre' benne' ca' buluchálaje' waláz cheę Dios, benne' ca' gulezre'e nędxudxa ca le'e.

*Nácale ca zede', ne ca tu xi' lu xęzr la xu**(Mr. 9.50; Lc. 14.34-35)*<sup>13</sup> Na' gunná Jesús:

—Le'e nácale ca zede' cheę bęneache lu xęzrla xu nigá. Che zede' nigá xenite xel-la' sna'a cheę na, ¿ájazra gácalęle bęneache ca'? Québedxa gaca guchínedxu zede' caní. ¡Chú'unadxu na, na' xululáj bęneache le na!

<sup>14</sup> Le'e nácale ca tu xi' cheę bęneache zaj zre'e xęzr la xu. Tu xęzre da zua na tu lu xi'a, quebe gáchequeze na.

<sup>15</sup> Gate guzálajdxu tu xi', quebe gudúsedxu na. Guzúadxu na sibe naga gusení na cheę xelelé'e xúgute benne' zaj zre'e lu xu'u.

<sup>16</sup> Cá'anqueze le gun le'e. Le güe lataj gusení xi' da nácale lau bęneache ca' cheę xelelé'eng' ca da xrlátaje da dxunle. Nadxa xelúe lá'anę' Xrale Dios zuę' xabáa.

*Da bchalaj Jesús ca naca cheę da nadxixruj bea Dios*<sup>17</sup> Gunná Jesús:

—Quebe dxal-la' guéquele le'e za'a neda' cheę cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz cheę Dios. Quebe za'a cheę cua' na. Za'a cheę gulé'eda' cáteze zęaje na.

<sup>18</sup> Da li dxapa' le'e. Dxácatę zaj zua xabáa, ne xęzr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute ca da dxal-la' gaca na.

19 Chee le na', che tu benne' guzúe' chalá'ala bítetezla da nigá da bdxixruj bea Dios, láqueze naca na tu da dauze, ne che guzéajni'ine' bénneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bénnea' guzúe' dizra' da nadxixruj bea nigá, ne gulé'eng' bénneache chee xelúnqueze' ca', benne' nigá wegá'anaqueze' ba lá'ana naga dxenná bea Dios xabáa.

20 Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca chee xel-la' dxezrá' (Lc. 12.57-59)*

21 Na' gunná Jesús:

—Le'e ba bénele ca gulenná xrtíale gula ca': "Quebe gútele benne'," na' "Núteteze benne' gutie' benne' waxíaje' chee cuía xi'e."

22 Neda' dxapa' le'e, núteteze benne' dxezré'e le sa' ljwezre' waxíaje' chee cuía xi'e. Na' bénnea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludé'e le' chee cuía xi'e. Bénnea' dxenné' chee le sa' ljwezre' tu dizra' sban, benne' nigá nácaqueze chee' chéaj'e lu lataj ba xa'.

23 'Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru',

24 bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

25 'Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudé'e lue' lau bénnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudé'e lue' lu na' benne' dxuséxuje' bénne' ca' lizre xia, na' xelegú'e lue' lizre xia na'.

26 Da li dxapa' lue'. Quebe xedxúaju' na' che quebe quízruju' xúgut'e da dxebagu' chee benne' na'.

*Da bchalaj Jesús ca naca chee benne' dxíchaje' xrba chee xel-la' nuchaga na'*

27 Na' gunná Jesús:

—Le'e bache bénquezle ca gulenné' nédxute: "Quebe gunu' dul-la da dxichaj na xrba chee xel-la' nuchaga na'."

28 Neda' dxapa' le'e, núteteze benne' ne'e tu nu'ula, ne sa lazre' le', báchequeze beñe' dul-la nen nu'ula na' lu xichaj lázrdawe'.

29 'Che xiaj lau' da zua xabéla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee beł-la' dxen chiu' quézcala chu'u lataj ba xa' duté beł-la' dxen chiu'.

30 Che na'u da zua xabéla chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee beł-la' dxen chiu', quézcala chu'u lataj ba xa' duté beł-la' dxen chiu'.

*Jesús dxuséden'e ca naca chee benne' dxexelé'e nen zru'ule' (Mt. 19.9; Mr. 10.11-12; Lc. 16.18)*

31 Na' gunná Jesús:

—Cá'anqueze gulenné' nédxute: "Núteteze benne' dxexelé'e nen zru'ule', dxal-la' gunézruje' nu'ula na' tu xiche da dxulé'e na belexelé'e."

32 Neda' dxapa' le'e, che tu benne' dxexelé'e nen zru'ule', na' nu'ula nigá quebe guzúalene' benne' xula, benne' chee nu'ula nigá dxuzúe' le' lu dul-la chee da dxíchaj na xrba chee xel-la' nuchaga na' che tu benne' biu xula

guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

*Jesús dxusédené' ca naca chee benne' dxucá'ana lié' xrtizre'*

<sup>33</sup> Na' gunná Jesús:

—Cá'anqueze ba bénele ca gulenná benne' gula ca', gulenné': "Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios."

<sup>34</sup> Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios,

<sup>35</sup> ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenná Bea.

<sup>36</sup> Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle.

<sup>37</sup> Le nnaze: "Awe'," u le nnaze: "Cabi," lawe' da gate tu benne' dxudadxe' chee' chee da nigá, naca na chee da xriwe'.

*Dxulé'e Jesús ca naca chee nu benne' dxexebéaj lazre'*

(Lc. 6.29-30)

<sup>38</sup> Na' gunná Jesús:

—Le'e ba bénele ca da gulenné' nédxute: "Che tu benne' cuéaje' xiaj lau', cá'anqueze gunu' chee', ne che cuéaje' lazzu', cá'anqueze gunu' chee'."

<sup>39</sup> Neda' dxapa' le'e, quebe tíl-laléle nu benne', san che tu benne' gu'e chalá'a xragu', be' lataj gu'e xechalá'a xragu'.

<sup>40</sup> Che tu benne' gaca xúze'leñe' lue', ne dxaca lazre' cue' zrau', be' lataj xúate' xicha chiu'.

<sup>41</sup> Che dxulusebágué' lue' gu'u xua chee' tu cuéndau', bia na chupa cuenla.

<sup>42</sup> Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.

*Jesús dxusédené' ca dxal-la' zri'idxu benne' ca' dxeledábague' dxi'u*

(Lc. 6.27-28, 32-36)

<sup>43</sup> Na' gunná Jesús:

—Cá'anqueze ba bénele ca da gulenné' nédxute: "Bzri'i le sa' ljwezru', ne gucuide benne' dxedábague' lue'."

<sup>44</sup> Neda' dxapa' le'e, le zri'i benne' ca' dxeledábague' le'e. Le naba gaca chawe' chee benne' dxelenné' chee. Le gun da chawe' chee benne' dxele-cuídené' le'e. Le naba lau Dios gaca chawe' chee benne' dxelenné' schanni' chee ne dxelune' chee da calela.

<sup>45</sup> Che gunle caní gácale bi cheéqueze Xrale zué' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxelune' da calela.

<sup>46</sup> Che nazrí'ile tuze benne' zaj nazrí'ing' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ing' le sa' ljwezre'.

<sup>47</sup> Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios.

<sup>48</sup> Le gaca benne' xrlátaje cáteze naca Xrale zué' xabáa, naque' xrlátaje.

## 6

*Dxul'é Jesús ca naca da xrlátaje da dxelún bénneache*

<sup>1</sup> Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee le lau bénneache chee xeelé'eng' na. Che ca'an dxunle, na' Xrale Dios zue' xabáa québequeze bi gunné' le'e.

<sup>2</sup> Chee le na', gate lue' dxácalenu' benne' dxelexázejene', quebe guzennu' xúgute' bénneache ca da dxunu', ca dxelún benne' ca' dxelune' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxelune' da caní chee xelenné' bénneache xrlátaje chee'. Da li dxapa' le'e, ba déqueze lazruj chee'.

<sup>3</sup> Gate lue' gunézruju' late' chee benne' dxelexázejene', ben na luéze chee quebe neze le sa' ljwezru'.

<sup>4</sup> Ben da caní bagácheze, na' Xrau' Dios, Bénnea' dxelé'eng' ca da dxunu' bagácheze, Le' gunné' lazruj chiu'.

*Jesús dxusédené' ca dxal-la' gundxu xel-la' dxuláwizra Dios*

*(Lc. 11.2-4)*

<sup>5</sup> Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelune' xrlátaje cúzreze. Dxeledánene' dxelune' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, chee xeelé' e bénneache da dxelune'. Da li dxapa' le'e, ba déqueze lazruj chee'.

<sup>6</sup> Gate lue' dxuláwizru' Dios, guxú'u lu xu'u chiu'. Bsezuj dxa xu'u chiu', na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bénnea' dxelé'eng' ca da dxunu' bagácheze, Le' xuzri'e chiu'.

<sup>7</sup> Gate dxuláwizru' Dios dxuchálajlenu' Le', quebe tuz ca da nneu' zánete' lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelenné'le'e.

<sup>8</sup> Quebe gunle ca dxelún benne' ca', lawe' da Xrale Dios ba nézquezne' ca da dxechinnele le'e nédxula ca za ná bale na.

<sup>9</sup> Chee le na', le guláwizra Dios nnale caní:

Xrantu' Dios, zu' xabáa,  
gaca lá'azxaqueze Lau'.

<sup>10</sup> Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',  
cáteze dxaca xabáa.

<sup>11</sup> Benná netu' da gáguntu' na'a.

<sup>12</sup> Bnité lau cheentu' ca naca da calela da bentu',  
ca netu' ba bnité launtu' chee benne' belune' cheentu'  
da calela.

<sup>13</sup> Quebe gu'u lataj nu gun zréaje netu',  
2 san bselá netu' lu na' da xriwe'.  
Naca chiu' gápaquezu' xel-la' dxenná bea,  
ne xel-la' waca,

ne da xabáa chadía chacanna. ¡Ca'an gaca na!

<sup>14</sup> Che le'e gunite laule chee benne' belune' chee da calela, na' Xrale Dios zue' xabáa gunite lawe' chee le'e.

<sup>15</sup> Che le'e quebe gunite laule chee benne' ca', na' Xrale Dios quebe gunite láuqueze' chee le'e ca naca dul-la da nabá gale.

*Jesús dxusédenę' ca dxal-la' gundxu gubasa*

<sup>16</sup> Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelunę' xrlátaje cúzreze. Benne' caní dxelunę' ca' cheę xelexé'e bénneache le' dxelunę' gubasa. Da li dxapa' le'e, ba déqueze lazruj cheę benne' ca'.

<sup>17</sup> Lue', gate dxunu' gubasa, bza xíchaju' chawe', ne gudibe lau',

<sup>18</sup> cheę quebe xeléquebe'e bénneache dxunu' gubasa. Tuze Xrau' Dios na', Bénnea' zúalęne' lue' naga zu' tuzu', Le' dxennátequeze', na' gunne' da naca na chiu'.

*Jesús dxusédenę' cheę da gunní'a cheę xabáa*

(Lc. 12.33-34)

<sup>19</sup> Na' gunná Jesús:

—Quebe gutúpale da gunní'a lu xęzr la xu nigá, naga guteba' na, ne da ca' dxelebía xi na, na' xelú'u gubán ne xelebenę' na.

<sup>20</sup> Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán cheę xelexé'e na.

<sup>21</sup> Naga nuzrale da gunní'a cheęle, na' zúaqueze lázrdaule.

*Jesús dxusédenę' cheę tu xi' da xú'udxu*

(Lc. 11.34-36)

<sup>22</sup> Na' gunná Jesús:

—Xiaj laule zaj naca na ca tu xi' cheę bel-la' dxen cheęle. Che xiaj laule zaj naca na chawe', dutę ca naca bel-la' dxen cheęle naxani'.

<sup>23</sup> Che xiaj laule quebe zaj naca na chawe', dutę ca naca bel-la' dxen cheęle nachul-la na. Cá'unqueze che xi' da xu'ule xexaca na tu da chul-la, chúl-lalę'dxa súaquezle.

*Jesús dxusédenę' cheę Dios, ne cheę da gunní'a*

(Lc. 16.13)

<sup>24</sup> Na' gunná Jesús:

—Netú benne' quebe séquene' guzúa cuine' lu na' chupa xrane', lawe' da wazré'e tu xrane' ne wazrí'ine' xetúę, u wéquene' ba lá'ana tu xrane' na' xetúę' guzúę' chalá'ala. Quebe séquele guzúa cuinle lu na' Dios, ne lu na' da gunní'a.

*Jesús dxusédenę' ca dxun Dios, dxuxúę' xúgute bi cheę' ca'*

(Lc. 12.22-31)

<sup>25</sup> Na' gunná Jesús:

—Cheę le' na' dxapa' le'e, quebe cue'le gunne xue ga sa' da gágule da xí'ajle cheę gaca banle, ne ga sa' zra lánale da gágule. Zácadxá xel-la' nabán cheęle ca da dxágule, ne zácadxá bel-la' dxen cheęle ca zra lánale.

<sup>26</sup> Le nna'xque bxinnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zuę' xabáa dxunéruzje' da dxeláguba'. Zácadxale le'e ca bxinnedu ca'.

<sup>27</sup> ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

<sup>28</sup> ¿Bizr cheę na' dxe'le le'e gunne xue cheę zra lánale? Le nna'xque ca dxelegula xiaj ca' zaj zę le'e xixre'. Quebe dxelún na zrin, ne quebe dxelache na du.

<sup>29</sup> Dxapa' le'e, Salomón benne' wenná bea na' quebe gucue' ca da xrtan cheę xiaj caní, na' le' gúta'le'e cheę da gunní'a.

<sup>30</sup> Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelezxe na lu xi', quegá gundxe' da chawe' chee le'e, benne' québete ca dxeajlí lazre'.

<sup>31</sup> Chee le' na', quebe cué'tecale gunne xue, nnaale: "¿Ga sa' da gágudxu? ¿Ga sa' da xi'ajdxu? ¿Ga sa' da gácudxu?"

<sup>32</sup> Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgute da dxechinnele.

<sup>33</sup> Zria laudxa cuele gunne xue chee nna bea Dios lu xichaj lárzdaule, ne chee gunle da xrlátaje da xezaca ba lazre' Dios, na' sile xúgute da ca' dxechinnele.

<sup>34</sup> Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

## 7

### *Jesús dxusédene' chee benne' dxuchi'e da dxun le sa' ljwezre'* (Lc. 6.37-38, 41-42)

<sup>1</sup> Na' gunná Jesús:

—Quebe guchí'ale da dxelún le sa' ljwézrele chee quebe guchi'a Dios caní chee le'e.

<sup>2</sup> Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e.

<sup>3</sup> ¿Bizr chee na' dxená'u bēbedau' da xu'u xiaj lau le sa' ljwezru', ne quebe dxená'u da zrente da xu'u na xiaj láuquezu' lue'?

<sup>4</sup> ¿Ájazra gunu' xu'u le sa' ljwezru': "Bēnna lataj xebéaja' bēbedau' da xu'u xiaj lau", che da zrendxa xu'u xiaj láuquezu' lue'?

<sup>5</sup> Lue', benne' dxun xrlátaje cūzreze. Bebéaj nedxu da zrente da xu'u xiaj láuquezu', na' gaca le'enu' cháwedau' xebéaju' bēbedau' da xu'u xiaj lau le sa' ljwezru'.

<sup>6</sup> Quebe gunézrujle da naca lá'azxa chee benne' dxelune' ca dxelún becu' snia, checa xelexéchaje', ne xuluzúruē' le'e. Quebe guzúale da zaca chee lau benne' dxelune' ca dxelún cuche, dxuluchuchuj dxululéajba' da dxugágule-ba'.

### *Dxuchalaj Jesús ca dxal-la' nábaxu, ne xexlajdxu, ne nne dxu a dxa xu'u* (Lc. 11.9-13; 6.31)

<sup>7</sup> Na' gunná Jesús:

—Le naba, na' Dios gunne' na chee le. Le xilaj na, na' xezrélele na. Le nne dxu'a dxa xu'u, na' sálujē' chee le.

<sup>8</sup> Le gun caní lawe' da benne' bi dxenabe', dxezi'e na. Benne' bi dxexlajē', dxeajxraque' na, na' benne' dxenné' dxu'a dxa xu'u, zua nu benne' sálujē' chee'.

<sup>9</sup> Netule le'e quebe gunézrujle zrí'inele tu xiaj che lebe' dxenábabe' le'e tu xeta.

<sup>10</sup> Quebe gunézrujle zrí'inele tu bela' snia che lebe' dxenábabe' le'e tu bela.

<sup>11</sup> Che le'e, benne' wen da calēla, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

<sup>12</sup> Le gun chee le sa' ljwézrele ca dxaca lázrele le'e xelún lebe' chee le. Da nigá naca da nadxixruj bea na Moisés, ne da dxenná na lu xiche naga naxúaj da glenná benne' ca' buluchálaje' waláz chee Dios.

*Jesús dxusédene' cheę dxa xu'u lechide'*  
(Lc. 13.24)

<sup>13</sup> Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'.

<sup>14</sup> Dxa xu'u lechide', ne neza lase zaj naca naga zjaca benne' xezezi'e xel-la' nabán da zeajlí canna, na' bábase benne' dxelexezrelne' na.

*Naca bea tu xaga ne cheę da zixre dxebía na*  
(Lc. 6.43-44)

<sup>15</sup> Na' gunná Jesús:

—Le guxúe cuínale cheę benne' wen lazre' ca', benne' dxelenné' zaj naque' benne' dxuluchálaje' waláz cheę Dios. Benne' caní zá'aque' naga zrale le'e, zaj nun cuine' ca' tu benne' dxexruj lazre' ca naca tu zrila'dau', san lu xichaj lázrdawe' zaj naque' snia ca tu becu' xi'a.

<sup>16</sup> Le'e xúnbeale le' ne cheę da dxelune'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'.

<sup>17</sup> Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'.

<sup>18</sup> Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'.

<sup>19</sup> Xúgute xaga zrinnaj welechugue na, na' xezezxe na lu xi'.

<sup>20</sup> Ca'an naca, le'e xúnbeale benne' ca' ne cheę da ca' dxelune'.

*Quegá xúgute benne' xelu'e naga dxenná bea Dios xabáa*  
(Lc. 13.25-27)

<sup>21</sup> Na' gunná Jesús:

—Quebe xelu'e naga dxenná bea Dios xabáa xugute benne' ca' dxelé'e neda': "Xrana', Xrana'." Welú'u tuze benne' ca' dxelune' ca da dxaca lazre' Dios zu'e xabáa.

<sup>22</sup> Ca zrin zra na', benne' zante xelé'e neda': "Xránantu', Xránantu', netu' bchálajntu' ne cheę Lau' Lue', ne bchínentu' Lau' bebéajntu' be' xriwe' ca', ne nen Lau' Lue' bénle'entu' xel-la' waca ca' cheę xabáa."

<sup>23</sup> Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba benle da caléla."

*Jesús dxusédene' cheę chupa lane xu'u*  
(Lc. 6.47-49; Mr. 1.22)

<sup>24</sup> Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre.

<sup>25</sup> Guca xiuj, na' bdxuaj guba'u, ne guxasa be' bdu' cheę xuluzría xi na xu'u na', san quebe guzré'e na lawe' da xu'u lane na lu xiaj xre.

<sup>26</sup> Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bene' tu lizre' lu xu dxeze.

<sup>27</sup> Guca xiuj, na' bdxuaj guba'u ne guxasa be' bdu' cheę xuluzría xi na xu'u na', na' chadite guzré'e na, ne guzría xite na.

<sup>28</sup> Ca bezuzre bchalaj Jesús, na' belexebanne benne' ca' ca naca da bsédene',

<sup>29</sup> lawe' da dxusédene' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxuzájle'e da nadxixruj bea Dios.

## 8

*Dxexún Jesús tu benne' dxuzru lu xpele'*  
(Mr. 1.40-45; Lc. 5.12-16)

<sup>1</sup> Gate bexetaj Jesús lu xi'a na', benne' zante zjácalene' Le'.

<sup>2</sup> Na' bzrin tu benne' we' dxuzru lu xpele', ne bzu zribe' lau Jesús. Dxë'e Le':  
—Xran, che dxaca lazru', waca xexunu' neda'.

<sup>3</sup> Nadxa Jesús guxrúa ne'e bennea'. Dxë'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácatë' ca naca xízrawë' cheë'.

<sup>4</sup> Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, cheë xelexé'e benne' ca' ba bexacu' na'a.

*Dxexún Jesús bi wën zrin cheë tu benne' dxenná be'e lu wedil-la*  
(Lc. 7.1-10)

<sup>5</sup> Ca hexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuene' Le',

<sup>6</sup> dxë'e Le':

—Xran, bi wën zrin chia' debe' lizra'. Naxrú' unebe' bine, ne dxezácale' ebe'.

<sup>7</sup> Jesús dxë'e le':

—Wazá'a xexuna'-be'.

<sup>8</sup> Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wën zrin chia'.

<sup>9</sup> Caní waca gunu' lawe' da zua benne' dxenná bé'ene' neda', ne cá' anqueze neda' dxenná be'eda' benne' ca' dxjaque' wedil-la. Gate dxapa' tube': "Guxíaj", na' dxéajbe'. Na' gate dxapa' bi xula: "Gudá", na' dxídabe'. Na' gate dxuchineda' bi wën zrin chia' cheë bi da gunbe', na' dxunbe' na.

<sup>10</sup> Gate bene Jesús da nigá, bebánene', na' guzre' benne' ca' zjácalene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle' e chia' ca dxun benne' nigá.

<sup>11</sup> Neda' dxapa' le'e, zá'aca benne' zante chalá'a naga dxalaj gubizra, ne xechalá'ala naga dxebía gubizra, na' xelexé'e tu zren xelawe' nen Abraham, ne Isaac, ne Jacob naga dxenná bea Dios xabáa.

<sup>12</sup> Benne' ca' gucá'a zga'ale Dios cheë xelu'e naga dxenná bea Le', guzale' benne' ca' lataj chul-la naga xelexezre', ne xeláguxa'atë lazxe'.

<sup>13</sup> Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná' queze bexácatë' bi wën zrin cheë'.

*Dxexún Jesús xrna zru'ule Pedro*  
(Mr. 1.29-31; Lc. 4.38-39)

<sup>14</sup> Guxíaj Jesús lizre Pedro, na' blé'ene' xrna zru'ule' de' lu da'a, xu'e da la.

<sup>15</sup> Xeajté' ne'e, na' bedxúaj da la da xu'e. Nadxa nu'ula na' guxase', ne guzú lawë' dxusení'e da xelagu benne' ca'.

*Dxexún Jesús benne' zante benne' we'*  
(Mr. 1.32-34; Lc. 4.40-41)

<sup>16</sup> Ca guzria gubizra, na' belezrín benne' zante lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéajë' be' xriwe' ca', ne bexunë' xúgute benne' we' ca'.



17 Da nigá guca na ca da gunná Isaías, benne' bchálaję' waláz cheę Dios, gunné': "Le' bequę'e xızrawę' ca' da nápadxu, ne gubague' ca' da dxezácadxu."

*Dxelaca lazre' benne' chjácłęne' Jesús*

(Lc. 9.57-62)

18 Gate na' ble'e Jesús benne' zantę zaj naxéčaję' Le', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa.

19 Na' bzrin lau Jesús tu benne' dxuxuzájle'ę da bdixiruj be'e Dios, na' dxe'ę Le':

—Benne' Wesede, dxaca lazra' sálena' Lue' gáteteze chéaju'.

20 Na' Jesús guzre' le':

—Beza' zaj zua bluaj cheęba', na' bxinne zaj zria xrú'neba', san neda', Benne' Gulje' Bėnneache, ne naga xrua xíchaja' quebe ga zua.

21 Bzrin xetú benne' naque' benne' ba bsédequeze Jesús, na' guzre' Le':

—Xran, bėnna neda' lataj xexá'a nedxu cheę cheajxecacha' xra'.

22 Nadxa Jesús guzre' le':

—Gudálęn neda'. Be' lataj benne' gate ca' xulucache ljwezre'.

*Dxebeque zri Jesús be' bdunu', ne xeajxruga cheę nísadau'*

(Mr. 4.35-41; Lc. 8.22-25)

23 Nadxa guxú'u Jesús lu da dxedá lawe' nísadau', na' benne' ca' dxusédene' belune' Le' tu zren.

24 Na' guzú lau dxaca tu be' bdunu' lawe' nísadau', na' xeajxruga cheę nísadau' guxú'u na lu da dxedá lawe' nísadau' na', dxácate dxase Jesús.

25 Nadxa benne' ca' dxusédene' bulusebane' Le', na' dxelę'e Le':

—Xránantu'. Bselá netu'. Ba dxázentu' lu nisa.

26 Jesús guzre' le':

—¿Bizr cheę na' dxezrebele'ęle? Nácale benne' látęga dxelejlı lázre' Dios.

Nadxa guxasa Jesús. Gudıl-le' be' bdunu', ne nísadau', na' la belebé zrite' na.

27 Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' cheę'.

*Benne' Gadara zaj xu'ę be' xriwe'*

(Mr. 5.1-20; Lc. 8.26-39)

28 Gate bezrin Jesús xechalá'a nísadau' na' lu xęzr la xu cheę benne' Gadara, na' chupa benne' biu belexedxúaje' lu bluaj cheę benne' gate, na' belezrine' lau Jesús. Dxúpatę benne' ca' zaj xu'ę be' xriwe', ne zaj naque' benne' sniałę'e, na' netú benne' quebe dxexázrene' xedę'e la neza na'.

29 Na' gulezú lawe' dxelebėzre'ę'e. Dxelenné':

—¿Bizr cheę na' za'u naga zúantu', Jesús, Zrı'ine Dios? ¿Za'u nigá cheę gusaca zi'u netu', ne quebe ne zrin zra?

30 Tu chi na' zra tu cue' cuhe dxeláguba'.

31 Be' xriwe' ca' gulata' xue na Jesús, gulenná na:

—Che Lue' xebėjaju' netu' nigá, bėnna lataj cheajchú'untu' lu cuhe ca'.

32 Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuhe ca'. Nadxa xúgutę cuhe ca' belelázruba' tu dxu'a xi'a zren, na' xeajlecházęba' lu nísadau' naga gulázęba' nisa, na' guláteba'.

33 Benne' ca' buluxúe'-ba' belezrebe', na' besá'aca chęgü'e, ne belexezrine' lu xęzre. Buluchálaję' ca guca xúgutę da canı, ne ca guca cheę benne' ca', belexedxúaj be' xriwe' zaj xu'e.

<sup>34</sup> Nadxa xúgute benne' zaj zre'e lu xezre na' beledxúaje', ne belezrine' naga zua Jesús. Na' ca belelé'ene' Le', gulata' xuene' Le' xezé'e lu xezr la xu chee'.

## 9

*Dxexún Jesús tu benne' zaj zua zri ni'a ne'e*

*(Mr. 2.1-12; Lc. 5.17-26)*

<sup>1</sup> Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'.

<sup>2</sup> Na' bedajlegu'e tu benne' biu lau Le', zaj zua zri ni'a ne'e, zaj naxrú'e benne' na' tu lu ta'a blaga'. Gate ble'e Jesús ca dxelájle'e chee', na' gunné', dxe'e benne' we':

—Ben dipa lazru', zrí'ina'dau'. Dul-la chiu' dxunite lawa'.

<sup>3</sup> Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítaje' Dios nen xrtizre'."

<sup>4</sup> Lawe' da neze Jesús ca gulenné' lu xichaj lázrdawe', na' dxe'e benne' ca', gunné':

—¿Bizr chee' na' dxennale caní lu xichaj lázrdaule?

<sup>5</sup> ¿Bízrala da quebe nácadxa stebe guna'? ¿Nnia': "Dul-la chiu' ba bnite lawa'", u che nnia': "Bexasa, guzá'?"

<sup>6</sup> Chee' le' na' gulé'eda' le'e neda', Benne' Gulje' Bénneache, napa' xel-la' dxenna' bea lu xezr la xu nigá gunite lawa' dul-la.

Nadxa dxe'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

<sup>7</sup> Bénnea' zaj zua zri ni'a ne'e bexasé', na' zexíajte' lizre'.

<sup>8</sup> Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee' bénneache.

*Jesús dxuláwizre' Mateo*

*(Mr. 2.13-17; Lc. 5.27-32)*

<sup>9</sup> Ca bezá Jesús na', na' blé'ene' tu benne' biu le' Mateo, dxe'e lataj naga dxuchízruje' waláz chee' xezre Roma, na' dxe'e le', gunné':

6 —Ben neda' tuze.

Nadxa Mateo nigá guxasé' zéajle'ne' Jesús.

<sup>10</sup> Gate na' dxe' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusédene'.

<sup>11</sup> Benne' xudau' fariseo ca', gate belelé'ene' da nigá, dxelé'e benne' ca' dxuséde Jesús, gulenné':

—¿Bizr chee' na' Benne' dxusédene' le'e dxágulene' benne' wechizruj ca', ne benne' we' da zrinnaj ca'?

<sup>12</sup> Jesús benne' da nigá, na' dxe'e benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechíne' le'.

<sup>13</sup> Le hjaca, le cheajsede ca da dxenná da naxúaj na lu xiche chee' Dios, dxenné': "Neda' dxaca lazra' xexache lázrele le sa' ljwézrele, quegá gútele be xíxre'du ca' lu cugu chia'." Bla' neda', quegá chee' guláwizra' benne' xrlátaje. Dxuláwizra' benne' dul-la chee' xelexebí'i lazre'.

*Jesús dxusédene' ca naca chee' gubasa*

*(Mr. 2.18-22; Lc. 5.33-39)*

14 Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábene' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

15 Na' Jesús dxé'e benne' ca', gunné':

—¿Ájala chee na' xelezúa ba xácheze benne' zaj zué' laní chee wechaga na' dxácate zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

16 'Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'.

17 Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le' na' dxal-la' ca'adxu xrise uva wal-la cube lu bzude xide cube. Che ca'an gundxu, selegá'ana chawe' dxúpaté na.

Bchalaj Jesús da caní ca naca chee benne' ca' dxelezí' lu ne'e xrtizre'.

*Dxexún Jesús bi nu'ula chee Jairo, ne nu'ula', xeajté'e zra lana Jesús*  
(Mr. 5.21-43; Lc. 8.40-56)

18 Dxácate na' dxuchalaj Jesús da nigá, na' bzrin tu benne' xíchaje chee benne' judío ca', na' bzru zribe' lau Jesús, dxenné':

—Bi nu'ula chia' za gütetebe'. Che Lue' xidu' ne guzé na'u lebe', wexaca banbe'.

19 Na' guxasa Jesús, guxíajlene' le' nen benne' ca' dxusédene'.

20 Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajté'e zra lana Jesús.

21 Dxenné' lu xíchaj lázrdawe': "Che cheajtaza' zra lane', na' xexaca."

22 Jesús guxé'chaje', guné'e nu'ula', na' dxé'e le':

—Ben dipa lazru', zrí'ina'dau'. Bache bexacu' lawe' da dxéajle'u chia'.

La bexácate nu'ula na'.

23 Gate na' bzrin Jesús lizre benne' xíchaje chee benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zré'e dxelune' zralaj.

24 Gunná Jesús, dxé'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'.

25 Gudé'bebéaje' benne' ca', na' guxú'u Jesús, ne béxrué' na' bi nu'ula na', na' guxásabe'.

26 Du ca naca xezre ca' bzriluj dizra' chee da ben Jesús.

*Dxexún Jesús chupa benne' la chul-la*

27 Ca bedxúaj Jesús na', na' chupa benne' xjaque' cuzru Le', dxelenné' zizraj: —Bexache lazre' netu', Lue', Zrí'ine David.

28 Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

29 Nadxa Jesús gudané' xiaj lau benne' ca', dxenné':

—Gaca chee ca dxéajlele.

30 Belexaca xiaj lawe'. Nadxa Jesús gunné' xuene' benne' ca', gunné':

—Le guxúe xanne' chee quebe nu neze da nigá.

<sup>31</sup> Gate beledxúaje', na' buluchálaje' du ca naca xezre ca' ca da ben Jesús chee'.

*Dxexún Jesús tu benne' quebe dxaca nnie'*

<sup>32</sup> Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nnie', benne' xu'e be' xriwe'.

<sup>33</sup> Cáteze bebéaj Jesús be' xriwe' nigá, na' benne' quebe dxaca nnie' bezú lawe' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

<sup>34</sup> Benne' xudau' fariseo ca' gulenné':

—Benne' nigá dxebéaje' be' xriwe', dxuchínene' xel-la' waca chee da xriwe', da na' dxenná be'e na be' xriwe' ca'.

*Dxexache lazre' Jesús bénneache ca'*

<sup>35</sup> Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bénneache zaj nape' tu tu cue' xízrawe' ca da dxelezaque'.

<sup>36</sup> Gate ble'e Jesús bénneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'.

<sup>37</sup> Nadxa guzre' benne' ca' dxusédene':

—Da lí, da zrentę de da lápaxu, na' bábaze benne' wen zrin zaj zre'e.

<sup>38</sup> Chee le' na' le naba lau Xrana lina nigá, sel-le' benne' wen zrin xelexepe' lina chee'.

## 10

*Dxeca'a Jesús chazrinnu benne' xelaque' gubáz chee'*

(Mr. 3.13-19; Lc. 6.12-16)

<sup>1</sup> Nadxa Jesús bláwizre' chazrinnu benne' ca' dxusédene', na' bnézruje' le' xel-la' dxenná bea chee xelexebéaje' be' xriwe' ca', ne chee xelexexunę' bénneache zaj xu'e tu tu cue' xízrawe' ca da dxelezaque'.

<sup>2</sup> Caní zaj le' chazrinnu benne' gubáz ca' chee Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

<sup>3</sup> Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechízruj chee xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

<sup>4</sup> Xetúe' le' Simón, benne' dxé'e gunne xue chee xezr la xu Israel.

Xetúe' le' Judas Iscariote, bénnea' gudéje' Jesús lu na' benne' dxeledábague' Le'.

*Dxesel-la Jesús benne' gubáz chee' ca' cheajlezenne' bénneache xrtizre'e*

(Mr. 6.7-13; Lc. 9.1-6)

<sup>5</sup> Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria.

<sup>6</sup> Le chjaca naga zaj zra' benne' Israel zaj naque' ca zrila' zaj naníteba'.

<sup>7</sup> Le chjaca cu'ule lban, xelexe bénneache ba bzrin gáguze zra nna bea Dios lu xezr la xu nigá.

<sup>8</sup> Le xexún benne' zaj xu'e wə' guzru', ne benne' bila xízrawə' dxel'é'eng'. Le gusebán benne' gate. Le xebéaj be' xriwə' da zaj xu'u bénneache. Cá'aze guzile xel-la' dxenná bea nigá, na' cá'aze le guchine na, quebe bi sile.

<sup>9</sup> Quebe gúale dumí oro, ne dumí plata, ne dumí lase.

<sup>10</sup> Quebe gúale xixruij xeta da gágule la neza. Quebe gúale xetú cue' zra lánale, ne zréale, ne xaga da gúxrule. Benne' wən zrin wazrúequeze' da gawə'.

<sup>11</sup> 'Gate na' zrinle le'e tu xəzre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'.

<sup>12</sup> Gate na' chu'ule lu xu'u na', le xə bénnea' naca lizre' na': "Xela dxebeza zri lazre' suale na le'e."

<sup>13</sup> Che benne' ca' zaj naca chee' xezezi'e xel-la' ba lá'ana caní, le gucá'ana cá'aze na. Che quebe zaj naca chee' xezezi'e da nigá, na' quebe gata' chee'.

<sup>14</sup> Che quebe lataj dxelung' le'e, ne quebe dxelennə' chee, le xedxúaj lu xu'u na' u lu xəzre na', na' le xebibe bxrtedu na' zria ní'ale.

<sup>15</sup> Da li dxapa' le'e, ca zrin zra guchi'a Dios, Dios gundxe' da ba xa' chee benne' xəzre na' quez ca da gunə' chee benne' Sodoma, ne benne' Gomorra, xəzre ca' guzria xi'e.

### *Xelebé nawə' bi ca' chee Jesús*

<sup>16</sup> Na' gunná Jesús:

—Le na' xque nigá. Neda' dxesel-la' le'e, gácale ca zri-la' zaj zra-ba' ládujla becu' xi'a ca'. Chee lə na', le gaca sina ca zaj naca bəla', san le gaca dxexruij lazre' ca zaj naca bgúgudu ca'.

<sup>17</sup> Le guxúe cuínale. Zaj zra' benne' xuludé'e le'e lu na' benne' xu'u lawe', ne xuluzálaj'e le'e lu xu'u naga dxulucá'ana szrenə' Dios.

<sup>18</sup> Cá'anqueze weleché'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío.

<sup>19</sup> Gate na' xuludé'e le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle.

<sup>20</sup> Quegá le'eze guchálajle, lawe' da Be' Lá'azxa chee Dios guchálaj'e lu dxú'ale.

<sup>21</sup> 'Xuludé bénneache benne' bíchequeze' lu na' benne' xelútiə' lə'. Cá'anqueze xra xrna xuludé'e zri'ing', na' zri'ing' ca' xeledábagabe' xra xrnáquezebe' chee xelátie'.

<sup>22</sup> Xúgutə bénneache xezeze'e le'e lawe' da nácale chia' neda', san bénnea' guzru chache' dizra' chee Dios ca zrin zra cheajsé chee', la bénnea'.

<sup>23</sup> Gate xelebé nawə' le'e tu xəzre, le xuzrunnuj xetú xəzre. Da li neda', Benne' Gulje' Bénneache, dxapa' le'e, xida' nédxula ca quebe ne tache tale xúgutə xəzre chee benne' Israel.

<sup>24</sup> 'Netú benne' quebe naque' szrendxa ca benne' dxusédene' lə'. Cá'anqueze netú benne' wən zrin quebe naque' szrendxa ca xranə'.

<sup>25</sup> Tu benne' dxuséde dxal-la' gun zi' lazre' gague' ca naca benne' dxusédene' lə', na' benne' wən zrin dxal-la' gun zi' lazre' gague' ca naca xranə'. Che benne' naque' xrane xu'u dxel'é'e lə' Beelzebú, da xriwə', chezradxa xelenné' chee bi chee' ca'.

*¿Núzraqueze dxal-la' zrébedxu?*

*(Lc. 12.2-9)*

<sup>26</sup> Na' gunná Jesús:

—Chee le na', quebe zrêbele bènneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na.

<sup>27</sup> Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'.

<sup>28</sup> Quebe zrêbele benne' xelúti'e bel-la' dxen chee. Quebe xelezéqueng' xelúti'e bènne'du xu'ule. Le zrebe Dios. Le' dxezéqueng' guzria xi'e bel-la' dxen chee, ne bènne'du xu'ule lu lataj ba xa'.

<sup>29</sup> 'Dxelúti'e chupa bxínnedu ca' nen tu dumí'au'. Netuba' quebe gáteba' chee quebe ne güe lataj Xrale.

<sup>30</sup> Cá'anqueze xicha xíchajle, xúgute na zaj nababa na.

<sup>31</sup> Chee le na', quebe zrêbele. Zácadxale le'e quezcala be zan bxínnedu ca'.

*Dxal-la' xechébedxu nácadxu chee Jesucristo  
(Lc. 12.8-9)*

<sup>32</sup> Na' gunná Jesús:

—Xúgute benne' ca' dxelexechebe' zaj naque' chia' neda' lau bènneache, cá'anqueze neda' wechébequeza' zaj naque' chia' neda' lau Xra' zué' xabáa.

<sup>33</sup> Benne' ca' quebe dxelexechebe' zaj naque' chia' lau bènneache, néda'queza' québequeze xechéba' zaj naque' chia' lau Xra' zué' xabáa.

*Da naca Jesús naca na tu da dxun na chupa la'a bènneache  
(Lc. 12.51-53; 14.26-27)*

<sup>34</sup> Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bènneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la.

<sup>35</sup> Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zrí'ine'.

<sup>36</sup> Ca'an gaca, tu tu benne' tíl-lale xrtía ljwezre' le'.

<sup>37</sup> 'Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'.

<sup>38</sup> Che tu benne' quebe gun cuine' ca tu benne' zéajte'e le'e xaga béguaj, ne guné' neda' tuze, quebe naca chee' gaque' chia'.

<sup>39</sup> Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudé'e xel-la' nabán chee' ne chia' neda', guselé' xel-la' nabán chee'.

*Da gunna Dios dxi'u  
(Mr. 9.41)*

<sup>40</sup> Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'.

<sup>41</sup> Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bénnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'.

<sup>42</sup> Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazí'e da gunezruj Dios le'.

## 11

*Dxeleznín benne' ca' gusel-la Juan lau Jesús  
(Lc. 7.18-35)*

<sup>1</sup> Gate bexuzre Jesús bchálajlęę' bėnneache, na' bchálajlęę' chazrinnu benne' ca' dxusėdene'. Bezė'ę na' cheę cheajśėdene', ne cheajchálaje' lban xúgute xęzre ca' lu xęzr la xu na'.

<sup>2</sup> Juan, bėnnea' bchue' bėnneache nisa, xu'ę lizre xia, na' benne' ca naca da dxun Cristo. Nadxa gusel-le' chupa benne' ca' dxeledálęę' le' lau Jesús.

<sup>3</sup> Benne' chupe' caní buluchębe' Jesús:

—¿Nacu' Lue' Cristo, Bėnnea' dxal-la' xide', u che dxal-la' cuėzantu' xelá' xetú benne'?

<sup>4</sup> Na' bechebe Jesús:

—Le chjaca cheajėzrele Juan da caní dxelė'ele, ne da dxenle.

<sup>5</sup> Le xę'ę ca dxaca, dxelexelė'e benne' gulaque' la chul-la. Dxelexedá benne' gulezúa zri ni'a ne'ę. Belexexaca benne' gulezaque' we' guzru', ne belexexaca ban benne' ca' gultatie'. Benne' xache' ca' dxelennę' đizra' chawe' cheę Dios.

<sup>6</sup> Ba neza zrentę naca na cheę bėnnea' quebe xucuán lazre' sálęę' neda'.

<sup>7</sup> Ca besí'aca benne' chupa ca', na' guzú lau Jesús dxuchálajlęę' benne' zaj zre'ę na' ca naca cheę Juan. Dxennė':

—¿Bizra xeajjna'le le'e le'ę xixre' na'? ¿Xeajjna'le tu xia da dxuxrize be'?

<sup>8</sup> Che cabí, ¿bizra xeajjna'le na'? ¿Xeajjna'le tu benne' nacue' zra lanę' da zaca? Nézquele benne' ca' zaj nácue' ladxe' zaca, lizre benne' dxelenná be'ę zaj zra' benne' caní.

<sup>9</sup> ¿Bízraqueze xeajjna'le? ¿Xeajjna'le tu benne' dxuchálaje' waláz cheę Dios? Awe'. Ca'an guca. Bėnnea' ble'ele na' nácadxe' blau ca tu benne' dxuchálaje' waláz cheę Dios.

<sup>10</sup> Lu xiche cheę Dios naxúaj na ca naca cheę Juan na'. Dxenná na: Neda' dxesel-la' benne' gubáz chia' nédxula ca Lue', cheę gucueze' neza naga teu'.

<sup>11</sup> Da li dxapa' le'e, ládujla xúgute bėnneache quebe nu chilá' benne' nácadxe' blau ca naca Juan, bėnnea' bchue' bėnneache nisa. Naga dxenná bea Dios, bėnnea' nácadxe' benne' dxexruj lazre' nácadxe' blau ca naca Juan na'.

<sup>12</sup> 'Ca lu zra bla' Juan, bėnnea' bchue' bėnneache nisa, bzrintę na'a zra, zaj zra' benne' dxelunę' zi' lazre' xelu'ę naga dxenná bea Dios xabáa, na' benne' dxelunę' zi' lazre' dxeleznúe'ę na.

<sup>13</sup> Ca da bzuaj Moisés lu xiche cheę da nadxixruj bea na, ne ca gulenná xúgute benne' buluchálaje' waláz cheę Dios, dxuchalaj na ca naca cheę xel-la' dxenná bea cheę Dios, bzrintę ca bla' Juan na'.

<sup>14</sup> Che le'e dxaca lázrele chėjlele da nigá, Juan na' naque' Elías, bėnnea' bchálaje' waláz cheę Dios gate nate, na' dxal-la' xelė'ę cheę guchálaje' waláz cheę Dios.

<sup>15</sup> Che zua nágale, le xen da nigá.

<sup>16</sup> '¿Ájazra zaj naca benne' zaj zre'ę na'a zra? Zaj naque' ca bidu ca' dxelebe'ebe' dxelítajbe' lawe' xi'a, ne dxelennębe' zizraj, dxelė' ljęwėzrebe' ca':

<sup>17</sup> "Bcuėzrentu' bchiuj san quebe bxá'ale le'e. Bil-la xáčentu' san quebe gudxėzrele."

<sup>18</sup> Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'ę be' xriwe'.

<sup>19</sup> Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj cheę Roma. Naca bea nu benne' nape' xel-la' sina cheę Dios ne cheę da dxun bénnea'.

*Ca gaca cheę bénneache quebe dxuluzúe' xrtizra' Dios*  
(Lc. 10.13-15)

<sup>20</sup> Nadxa guzú lau Jesús dxedil-le' bénneache cheę xezre ca' naga bene' xel-la' waca ca' cheę xabáa, lawe' da quebe belexebí'i lazre' benne' zaj zřeę na'. Na' gunné':

<sup>21</sup> —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' cheę xabáa ca da gulaca ládujla le'e, da zrentę ba zęj gulácue' zra lanę tuzruj, ne gulegú'ę de xichaję' da zaj naca bea na belexebí'i lazre'.

<sup>22</sup> Neda' dxapa' le'e, lu zra guchi'a Dios, gundxe' da ba xa' cheęle quez ca da ba xa' gunę cheę benne' Tiro, ne benne' Sidón.

<sup>23</sup> Le'e zrale xezre Capernaum, ¿dxéquele Dios wechise' le'e xabáa? Dios gudęe' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' cheę xabáa ca da gulaca ládujla le'e, nagá'anatequeze xezre na' lu zra na'a zra.

<sup>24</sup> Neda' dxapa' le'e, lu zra guchi'a Dios, gundxe' da ba xa' cheęle quez ca gunę' da ba xa' cheę benne' Sodoma ca'.

*Dxenná Jesús: "Le da naga zua' xezí' lázrele"*  
(Lc. 10.21-22)

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxelėjni'ine', san blé'enu' na bidu caní.

<sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> 'Xra' ba bdeę' lu na'a xúgutę da caní. Quegá nu benne' núnbe'ę neda', Zri'ine Dios, san Xra' Dios núnbe'ę neda'. Quegá nu benne' núnbe'ę Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'.

<sup>28</sup> Le da naga zua', xúgutęle le'e dxeajxręquele lu zrin dxunle cheę xudau', ne ca naca xua da núale, na' neda' guna' xezí' lázrele.

<sup>29</sup> Le gunna lataj xrua' le'e ca nu benne' xruę' bęzre xugu' cheęba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu benne'du xu'ule.

<sup>30</sup> Da na' naca na ca xugu' cheę bezre da xrua' le'e quębetę ca naca na stębe cheę gúale na, na' xua da xrua' le'e naca na zraze.

## 12

*Bi ca' dxusede Jesús dxelequęę dau zrua' xtila gate naca zra dxulupá'ana judío*

(Mr. 2.23-28; Lc. 6.1-5)

<sup>1</sup> Ca lu zra na' xu'u Jesús neza zęaje' ládujla naga dę xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawe' dxelálaje' dau naga zria zrua' xtila, ne dxelawe' na.

<sup>2</sup> Gate belelé'e benne' xudau' fariseo ca' da caní, na' gulé'ę Jesús:



—Gună' xque ca dxelún benne' ca' dxusédenu', dxelunę' zrin da quebe naca cheę' xelunę' lu zra dxupá'anadxu.

<sup>3</sup> Jesús guzre' benne' ca':

—¿Quebe ne gulábale le'e ca bęn David gate na' le', ne benne' ljwezre' ca' guledunę'?

<sup>4</sup> Guxú'ę lu xu'u cheę Dios, ne gulawę' xeta xtila lá'azxa, da quebe zaj naca cheę' xelawę', le', ne benne' ljwezre' ca', san tuze bxruze ca' zaj naca cheę' xelawę' na.

<sup>5</sup> ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunę' zrin cheę xudau' lu zra dxupá'anadxu, ne quebe zaj nabagųe' zria?

<sup>6</sup> Neda' dxapa' le'e, de tu da naca blaudxa ca xudau' nigá.

<sup>7</sup> ¿Quebe ne chėjani'ile ca zėję da naxúaj na lu xiche cheę Dios? Dxenná na: Neda' dxaca lazra' xexache lázrele le sa' ljwézrele, ne quegá gútele bę xixre'du ca' lu cugu chia'. La ba guxėjani'ile da nigá, quebe ne guzria xile bėnneache quebe zaj nabagųe' dul-la.

<sup>8</sup> Cheę le' na', neda', Benne' Gulje' Bėnneache, napa' xel-la' dxenná bea dxuna' zrin chia' lu zra dxupá'anadxu.

*Dxexún Jesús tu benne' zua zri ne'ę*  
(Mr. 3.1-6; Lc. 6.6-11)

<sup>9</sup> Nadxa Jesús bezé'ę na', na' guxú'ę tu lu xu'u naga dxelúe lá'anę' Dios.

<sup>10</sup> Zua tu benne' zua zri ne'ę ga na'. Benne' judío ca' gulaca lazre' xelezrelne' ájala xelunę' cheę gaca xelagu zrie' cheę Jesús. Cheę le' na' gulenábeng' Le':

—¿Dxunna Dios lataj xexundxu benne' wę' lu zra dxupá'anadxu?

<sup>11</sup> Jesús guzre' benne' ca':

—Núteze benne' zuę' ládujla le'e, che zua tu zrila' cheę', ne che bixreba' tu xędxu situj lu zra dxupá'anadxu, ¿quebe chėję' cheajxeláję'-ba' xca'?

<sup>12</sup> Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

<sup>13</sup> Nadxa Jesús guzre' benne' wę' na':

—Bli na'u.

Ca bli ne'ę, na' bexaca na ca ne'ę xetú.

<sup>14</sup> Nadxa beledxúaj benne' xudau' fariseo ca', ne gulezú lawę' dxeliláję' ájala xelunę' xelútie' Jesús.

*Da gunná tu benne' bchálaje' waláz cheę Dios ca dxal-la' gaca cheę Jesús*

<sup>15</sup> Gate gúquebe'e Jesús da nigá, na' bezé'ę na', na' benne' zante zjácálne' Le'. Bexún Jesús xúgųę benne' wę' zaj zre'ę ládujla benne' ca'.

<sup>16</sup> Jesús gunné xúeng' benne' ca' quebe nu xululé'eng' nu naca Le'.

<sup>17</sup> Cani guca ca da gunná Isaías, benne' bchálaje' waláz cheę Dios, gunné':

<sup>18</sup> Benne' nigá naque' wen zrin chia', benne' ba gacá'a.

Benne' nigá nazrí'ida', ne dzezaca ba lázrelena' Le'.

Guzúaqueza' xichaj lázrdawę' Be' Lá'azxa chia'.

Guzenne' bėnneache xúgųę xęzr la xu ca dxuchi'a da dxaca.

<sup>19</sup> Quebe tıl-laleęquezę' bėnneache, ne quebe cuézrexę'ę.

Netú benne' quebe xenne' chi'ę la neza.

<sup>20</sup> Quebe quichje' tu xia da ba nachaj,

ne quebe xusul-le' xi' da ba dxaca wexul-la na,

ca zrindxa zra xuzúę' xel-la' dxenná bea chawe' cheę'.

<sup>21</sup> Bėnneache xúgųę xęzr la xu xuluxrén lázrequeze' Le'.

*Dxelenné' napa Jesús xel-la' dxenná bea chee da xriwe'  
(Mr. 3.19-30; Lc. 11.14-23; 12.10)*

<sup>22</sup> Nadxa guleché' e lau Jesús tu benne' la chul-la, benne' quebe dxaca nnié', lawe' da xu' e be' xriwe'. Jesús bexuné' benne' nigá, na' belé' ene', ne bennié'.

<sup>23</sup> Xúgute benne' ca' belexebánene', gulenné':

—¿Naca benne' nigá Zri'ine David zra?

<sup>24</sup> Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

<sup>25</sup> Dxeque be'e Jesús ca da dxelenné', dxelé' e ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezicadxé', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenitequeze xezre na', u xrtía ljwezre ca'.

<sup>26</sup> Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na?

<sup>27</sup> Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xebebéaje' be' xriwe' ca'? Chee le na léqueze' dxululé' etene' nanéguele le'e.

<sup>28</sup> Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba blá' xel-la' dxenná bea chee Dios ládujla le'e.

<sup>29</sup> ¿Ájazra gun tu benne' chu' e lizre tu benne' wal-la chee que' e da de chee' che nédxula quebe guchéaje' ni'a na' bènea'? Che gune' caní, na' wazéqene' que' e da de chee bènea'.

<sup>30</sup> Nu benne' quebe dxácalene' neda', dxedábage' neda', na' benne' quebe dxexezígalene' neda', dxexúsie' na.

<sup>31</sup> Chee le na' dxapa' le'e, gunité lau Dios chee bèneache xúgute dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunité lau Dios chee'.

<sup>32</sup> Núteteze benne', che bi nnié' schanni' chia' neda', Benne' Gulje' Bèneache, Dios gunité lawe' chee', san che tu benne' nnié' schanni' chee Be' Lá'azxa, québequeze gunité lau Dios chee' lu xezr la xu nigá ne cá'anqueze lu xezr la xu da za za'.

*Da dxun tu benne' dxule'e na ca naque'  
(Lc. 6.43-45)*

<sup>33</sup> Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na.

<sup>34</sup> Le'e, be snia ca'. ¿Ájazra gunle le'e nnele da xrlátaje che le'e nácaquezle benne' wen da calela xca'? Ca da dxedxuj dxú' adxu naca na ca da zua na lu xichaj lázrdaudxu.

<sup>35</sup> Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'.

<sup>36</sup> Neda' dxapa' le'e, lu zra guchi'a Dios, xúgute bèneache xuludé' ca da gulenné', tu tu dizra' xala da gulenné'.

<sup>37</sup> Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

*Béneache wen da calela ca' dxelenábene' Jesús gune' tu xel-la' waca chee xabáa*

*(Mr. 8.12; Lc. 11.29-32)*

<sup>38</sup> Nadxa bal-la benne' xudau' fariseo, ne benne' dxuluxuzájle'e da nadx-ixruij bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—Béneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xelexé'eqezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios.

<sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Béneache, waxú'uqueza' lu xedxu ba chunna zra chunna xela.

<sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee béneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá.

<sup>42</sup> Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee béneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'*

*(Lc. 11.24-26)*

<sup>43</sup> Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na:

<sup>44</sup> “Webi'a xexá'a lizra' naga bedxúaja.” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na.

<sup>45</sup> Nadxa cheaj na cheajxezrí na xegazre be' xriwe' da zaj naca na xriwedxa ca le na, na' xúgute na dxelú'u na lu bènea', na' naca chee benne' na' da caléladxa ca guca chee nedxu. Cá'anqueze gaca chee béneache wen da calela caní.

*Benne' zaj naque' ca xrna Jesús, ne ca benne' biche' ca'*

*(Mr. 3.31-35; Lc. 8.19-21)*

<sup>46</sup> Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chalé'ajla, ne dxelaca lazre' xuluchálajlene' Jesús.

<sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zre'e chalé'ajla. Dxelaca lazre' xuluchálajlene' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

<sup>49</sup> Nadxa ble'e Jesús benne' ca' dxusédene', dxenné':

—Benne' caní zaj naque' xrna'a, ne bi bícha'dau' ca'.

<sup>50</sup> Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

## 13

*Da bsede Jesús ca da ben benne' dxaza*

*(Mr. 4.1-9; Lc. 8.4-8)*

<sup>1</sup> Lu zra na' bdxuaj Jesús xu'u, na' xeajdxé'e dxu'a nísadau'.

<sup>2</sup> Na' lawe' da belezraga benne' zanté naga zua Jesús, guxú'e tu lu da dxedá lawe' nísadau', ne gudxé'e na'. Xúgute' benne' ca' belexegá'ane' dxu'a nísadau' na'.

<sup>3</sup> Nadxa bsede Jesús benne' ca' da zanté da bchálaje', dxenné':

—Tu benne' dxaza guzé'e zíaje' guza.

<sup>4</sup> Dxácaté dxaze', bal-la bínneđu ca' xeajlechaze na dxu'a neza. Na' beelé' bxinneđu ca', guláguba' bínneđu ca'.

<sup>5</sup> Bal-la bínneđu ca' xeajlechaze na lu xiaj naga quebe dxé'teca xu. Bínneđu caní chadí gulezría na lawe' da quebe dxé'teca xu.

<sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na.

<sup>7</sup> Bal-la bínneđu ca' xeajlechaze na naga bezríale'e lba xeche', na' lba xeche' ca' belegula na, ne blule na da du ca' naze'.

<sup>8</sup> Bal-la bínneđu ca' xeajlechaze na lu xu bebe, na' belúnna'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na.

<sup>9</sup> Che zua nágale, le xene.

*Dxenná Jesús bizr chee na' dxuchálaje' da dxululé'e na*

*(Mr. 4.10-12; Lc. 8.9-10)*

<sup>10</sup> Nadxa benne' ca' dxuseđe Jesús gulebigue' naga zue' Le', ne buluchebe' Le':

—¿Bizr chee na' dxuchálajlenu' benne' ca' da dxululé'e na?

<sup>11</sup> Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj.

<sup>12</sup> Benne' nape' late', Dios gunézrujdxé' le', na' gápale'e, san benne' quebe bi nape', Dios wequé'e ca da du nape'.

<sup>13</sup> Chee le' na' dxuchálajlenu' benne' caní da dxululé'e na, lawe' da cate' dxelenné'e quebe dxelélé'eng'. Cate' dxelenne' quebe dxeléajni'ing'.

<sup>14</sup> Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

<sup>15</sup> Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácué' xiaj lawe' chee quebe xelélé'eng'.

Quebe dxelenne', na' quebe dxeléajni'ing'.

Quebe dxelaxílaje' neda' chee xexuna' le'.

<sup>16</sup> Ba neza zrenté naca na chee le'e lawe' da dxelé'ele nen xiaj laule, ne dxenle nen nágale.

<sup>17</sup> Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje ca' gulaca lazre' xelélé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

*Jesús dxuzéajni'ine' benne' ca' ca naca chee benne' dxaza*

*(Mr. 4.13-20; Lc. 8.11-15)*

<sup>18</sup> Na' gunná Jesús:

—Le xenne ca zéaje da naca chee benne' dxaza nigá.

<sup>19</sup> Benne' dxelenne' ca naca chee Bénnea' dxenná be'e xabáa, ne quebe dxeléajni'ine' zaj naque' ca binnedu ca' xeajlechaze na dxu'a neza. Za da xriwe' ne dxugúa na ca naca dizra' da ba gulezi'e lu xichaj lázrdawe'.

<sup>20</sup> Ca naca chee binnedu ca' xeajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'.

<sup>21</sup> Ca na' guca chee binnedu ca', quebe guca xuludé lue na, ne quebe guzi' bea na, ca'an dxaca chee benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'e dizra' nigá, na' dxelexebigue'.

<sup>22</sup> Binnedu ca' xeajlechaze na ládujla xeche' dxululé'e na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunni'a dxezi' xe na benne' ca'. Xúgute' da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'.

<sup>23</sup> Ca naca chee binnedu ca' da xeajlechaze na lu xu bebe, da caní dxululé'e na ca naca chee benne' ca' dxelenne' dizra' nigá, ne dxeléajni'ine' na, na' zaj naque' ca binnedu ca' belúnna'le'e na. Bal-la benne' zaj naque' ca binnedu ca' belunna na tu gaxúa tu tu na, na' xebal-le' zaj naque' ca binnedu ca' belunna na ga xun tu tu na, na' xebal-le' zaj naque' ca binnedu ca' belunna na chi dxua tu tu na.

*Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila*

<sup>24</sup> Nadxa bchalaj Jesús xetú da dxulé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'.

<sup>25</sup> Gate dxelase xúgute', na' bzrin tu benne' dxezré'e le', ne xeajaze' binne xixre' zrinnaj lávela zrua' xtila, na' bezé'e.

<sup>26</sup> Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'.

<sup>27</sup> Nadxa benne' wen zrin ca' xeajleguezre' xrane na, dxelé'e le': "Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?"

<sup>28</sup> Gunná xránabe': "Tu benne' dxezré'e neda' bene' da nigá." Nadxa benne' wen zrin ca' buluchébe' le': "¿Dxaca lazru' chéajntu' cheajlépentu' xixre' zrinnaj ca'?"

<sup>29</sup> Le' guzre' wen zrin ca': "Quebe gaca na. Gate na' lázrule xixre' zrinnaj ca', walázzutele xel-la' zrua' xtila.

<sup>30</sup> Xelegúlaxa na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelegué'e nedxu xixre' zrinnaj ca', na' xuluchéaje' xelune' tu xrúnjuđu weaj chee guzézxedxu na. Nadxa xelape' zrua' xtila na', ne xezrá chawe' na lizra'."

*Da bchalaj Jesús ca naca chee binne mostaza*

*(Mr. 4.30-32; Lc. 13.18-19)*

<sup>31</sup> Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'.

<sup>32</sup> Da li binne mostaza nigá naca na da bízrujdxa lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezria bxinnedu ca' xrú'uneba' lu zruze na.

*Da bchalaj Jesús ca naca chee cua zichaj chee xeta xtila*  
(Lc. 13.20-21)

<sup>33</sup> Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dute na guxasa na bliche.

*Ca bchine Jesús da dxulé'e na caní*  
(Mr. 4.33-34)

<sup>34</sup> Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na.

<sup>35</sup> Caní guca ca da gunná benne' bchálaje' waláz chee Dios, gunné':  
Guchálaja' ca naca da dxulé'e na da guchálaja'.

Gulé'eda' ca naca da nagache gate guzrete xezr la xu.

*Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila*

<sup>36</sup> Nadxa Jesús bzé' benne' ca' dizra', na' guxú'e lu xu'u. Benne' ca' dxusede Jesús gulebigue' lau Le', na' gulé'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

<sup>37</sup> Nadxa Jesús guzre' benne' ca':

—Béneea' dxaze' binne cháwe'dau' nigá naque' Benne' Gulje' Bénneache.

<sup>38</sup> Naga dxaze' binne nigá naca na lu xichaj lázrdau béneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'.

<sup>39</sup> Béneea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios.

<sup>40</sup> Ca belexequé'e xixre' zrinnaj ca', ne buluzré'e na lu xi' chee xelezxe na, ca'an gácaqueze lu zra bzebe na'.

<sup>41</sup> Neda', Benne' Gulje' Bénneache, sel-la' gubáz chee xabáa chia' ca' chee xulucuasé' naga nna be'a xúgute benne' ca' dxuluxrinnajte' benne' xula, ne benne' ca' dxelune' da calela.

<sup>42</sup> Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xelebezre', ne xeláguxa'ate lazxe'.

<sup>43</sup> Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

*Da dxulé'e na ca naca chee tu xel-la' gunní'a da nagache*

<sup>44</sup> Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucache' na. Ne zúale'e xel-la' dxebe zexíaje' xeajxétie' xúgute da nape', na' bezi'e xezr la xu na'.

*Da dxulé'e na ca naca tu bga da zácalé'e na*

<sup>45</sup> Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexílaje' bga ca' da zaj zaca na.

<sup>46</sup> Gate dxezrélené' tu da zácalé'e, na' zexíaje' zeajxétie' xúguté da nape', na' si'e bga na'.

*Da dxulé'e na ca naca tu xixruj bela*

<sup>47</sup> Na' gunná Jesús:

—Ca naca cheé benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezené' zane' cue' bela.

<sup>48</sup> Gate dxezrá xixruj na', na' benne' ca' dxelezené' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxu-zré'e-ba' lu xcuite, na' bela xala ca' dxeledxú'ungé'-ba'.

<sup>49</sup> Ca'an gaca lu zra bzebe na'. Xeledxúaj gubáz cheé xabáa ca', xelexebéaje' benne' ca' dxeluné' da calela ládujla benne' xrlátaje ca'.

<sup>50</sup> Xuluzré'e benne' ca' dxeluné' da calela lu xi' gabila, naga xebezeze', ne xeláguxa'até lazxe'.

*Da zaca ca da zaj naca na da cube, ne da zaj naca na da gula*

<sup>51</sup> Nadxa bchebe Jesús benne' ca', dxenné':

—¿Dxéajni'ile le'e xúguté da caní?

Benne' ca' gulenné':

—Awe', Xran.

<sup>52</sup> Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawé'.

*Jesús dxexezrine' Nazaret*

(Mr. 6.1-6; Lc. 4.16-30)

<sup>53</sup> Gate bexuzre bchalaj Jesús da dxulé'e na caní, na' bezé'e na'.

<sup>54</sup> Bezrine' naga naca lazrie'. Na' guzú lawé' dxusédene' benne' ca' zaj zre'e lu xudau' cheé xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxuné' xel-la' waca caní?

<sup>55</sup> Benne' nigá naque' zri'ine gubizre xaga, na' naca xrné'e María. Naque' bi biche Jacobo, ne José, ne Simón, ne Judas.

<sup>56</sup> Bi zane' zaj zué' nigá nen dxi'u. ¿Ájazra na' dxaca dxuné' da caní?

<sup>57</sup> Cheé le' na' buluzúé' Jesús chalá'ala. Jesús guzre' benne' ca':

—Xúguté benne' xula dxelape' ba lá'ana tu benne' dxuchálaje' waláz cheé Dios. Benne' lazrie', ne xrtia ljwezre' quebe dxelúné' ca'.

<sup>58</sup> Jesús quebe bēnteque' na' xel-la' waca ca' lawe' da quebe guléajlé'e chee'.

**14***Ca gute Juan, bēnea' bchue' bēneache nisa*

(Mr. 6.14-29; Lc. 9.7-9)

<sup>1</sup> Lu zra na' Herodes, benne' dxenná be'e xezre ca' zaj nababa na Galilea, benne' ca' naca da dxun Jesús.

<sup>2</sup> Na' guzre' bi wen zrin chee' ca':

—Benne' nigá naque' Juan, bënnea' bchue' bënneache nisa. Ba bebang' ládujla benne' gate. Chee le na' nape' xel-la' waca zren nigá.

<sup>3</sup> Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bēne' caní ne chee Herodías, zru'ula Felipe, biche Herodes na'.

<sup>4</sup> Caní bēne' lawe' da guzre Juan le':

—Quebe naca chiu' sūalenu' nu'ula nigá.

<sup>5</sup> Herodes guca lazre' gutie' le', san dxezrebe' da xelún bënneache ca' lawe' da dxeléquene' naca Juan benne' dxuchálaje' waláz chee Dios.

<sup>6</sup> Gate bzrin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'.

<sup>7</sup> Chee le na' Herodes guchebe lazre' lau benne' ca' gunézruje' ca da naba bi nú'uladu na'.

<sup>8</sup> Lawe' da ba guzre xrnabe' lebe', na' gunabe':

—Benna nigá xichaj Juan, bënnea' bchue' bënneache nisa. Gulú'u na tu lu xé'ena.

<sup>9</sup> Nadxa guzúa stēbe Herodes, bënnea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le na' guzre' tu benne' wen zrin chee' gunézruje' na lebe'.

<sup>10</sup> Gunná bé'ene' nu benne' guchugue' xichaj Juan naga xu'e lizre xia.

<sup>11</sup> Nadxa xeajlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézrujbe' na xrnabe'.

<sup>12</sup> Nadxa belezrín benne' ca' bsēde Juan, na' belexú'e le', ne xeajlecachē' le'. Nadxa xjaque' xeajleguzre' Jesús.

*Dxugagu Jesús chi xun gaxúa benne' biu*  
(Mr. 6.30-44; Lc. 9.10-17; Jn. 6.1-14)

<sup>13</sup> Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bënneache, na' gusiá'que' ni'e, na' belezrine' naga zua Jesús.

<sup>14</sup> Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zu'e.

<sup>15</sup> Gate ba za xrinne, benne' ca' dxusēde Jesús gulebigue' lau Le', dxelenné':  
—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xelezí'e da xelawe'.

<sup>16</sup> Jesús guzre' le':

—Quebe dxun na ba xen chjaque'. Le gunezruj le'e da xelawe'.

<sup>17</sup> Benne' ca' gulé'e Le':

—Gáxuze xeta xtila de cheedxu nigá, ne chúpaze bela.

<sup>18</sup> Jesús guzre' benne' ca':

—Le gunna na nigá.

<sup>19</sup> Nadxa gunná bé'ene' gulebé' benne' zan ca' lawe' zrie. Guqu'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúzruje' xeta xtila, ne bnézruje' na benne' ca' dxusédene', na' benne' ca' gulisie' na lálwela benne' zan ca'.

<sup>20</sup> Xúgute' gulawe', ne gulélajene'. Ca gudé na' bulusuzré'e chazrinnu ga' da bízruju ca' zaj nagá'ana.

<sup>21</sup> Benne' gulawe' na zaj naque' chi xun gaxúa benne' biu, ne quebe nu blaba nu'ula, ne biđu ca'.



*Jesús dxedé' lawe' nisa*  
(Mr. 6.45-52; Jn. 6.16-21)

<sup>22</sup> Nadxa gunná be'e Jesús benne' ca' dxusédene' xelu'e lu da dxedá lawe' nísadau' chee xelague' nísadau' nédxudxa ca Le' chee xelexezrine' xéchala'a nísadau' na', dxácaté Le' dxuzé benne' zan ca' dizra'.

<sup>23</sup> Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zué' tuze'. Gate guxrinne zua Jesús tuze' na'.

<sup>24</sup> Dxácaté na' ba zeaj da na' dxedá lawe' nísadau' gachaj láwe'te nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácalé'e be', ne quebe dxue na lataj sa na.

<sup>25</sup> Gate gudé dxela gubiga Jesús naga zaj zré'e, zéaje' lawe' nisa.

<sup>26</sup> Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxela na'.

<sup>27</sup> Jesús guzre' benne' ca':

—Le gun dipa lázrele. Neda' nigá. Quebe zrébele.

<sup>28</sup> Na' gunná Pedro, dxé'e Jesús:

—Xran, che Lue' na', gunná be'e xida' lawe' nisa naga zu' na'te.

<sup>29</sup> Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús.

<sup>30</sup> Gate dxeque be'ene' ca' dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, becá'a neda'.

<sup>31</sup> Nadxa becá'a Jesús ne'e, ne guzre' le':

—Látega dxeajlí lazru' neda'. ¿Bizr chee na' ben chupa lazru'?

<sup>32</sup> Gate belexegüeng' lu da dxedá lawe' nísadau', na' bebé' zri be' na'.

<sup>33</sup> Nadxa benne' ca' zaj zré'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

*Jesús dxexuné' benne' we' ca', benne' zaj zré'e lu xezre Genesaret*  
(Mr. 6.53-56)

<sup>34</sup> Guledé'e xecha la'a nísadau', na' belezrine' lu xezr la xu chee benne' Genesaret ca'.

<sup>35</sup> Gate benne' ca' zaj zré'e xezre na' belexexúnbe'e Jesús, na' buludé'e dizra' kezícala xézredu ca', na' guleché'e xúgute benne' we' naga zua Jesús.

<sup>36</sup> Gulata' xuene' Jesús gu'e lataj xulutá benne' ca' zra lané' naze. Xúgute benne' buluté' zra lané' belexexaque'.

## 15

*Da dxuxrinnaj na bénneache*  
(Mr. 7.1-23)

<sup>1</sup> Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxelenné':

<sup>2</sup> —¿Bizr chee na' benne' ca' dxusédenu' quebe dxuluzú'e dizra' ca naca da gulún xra xrtaudxu? Quebe dxelíbequeze ne'e ca naca da zéajlentu' gate dxelawe'.

<sup>3</sup> Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele.

<sup>4</sup> Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' chee xra xrne'e, le gute bénnea'."

<sup>5</sup> Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúgute da de chia'."

<sup>6</sup> Dxennale che tu benne' dxune' caní québedxa dxun na ba xen gácalene' xra xrne'e. Caní dxunle le'e, dxuzuale chala'ala da bdxixruj be'e Dios, chee gunle ca naca da zéajlele.

<sup>7</sup> Le'e, láweze dxunle da xrlátaje. Da li naca da gunná Isaías, bénnea' bchálaje' waláz chee Dios, ca naca cheele le'e, gunné':

<sup>8</sup> Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana dute lázrdawe'.

<sup>9</sup> Dácheze naca dxelúe lá'ane' neda'.

Da gulenná be'ene' bénneache naca na da ca' dxulusédene'.

<sup>10</sup> Nadxa Jesús gunné' benne' ca', dxenné':

—Le xene, ne le chéajni'.

<sup>11</sup> Da dxu'u na dxu'a bénneache quegá le na guxrinnaj na bénneache. Da dxedxuaj na dxu'a bénneache naca na da dxuxrinnaj na bénneache.

<sup>12</sup> Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

<sup>13</sup> Jesús guzre' benne' ca':

—Bíteteze xágadau' da quebe guza Xra' zue' xabáa, welépeda'.

<sup>14</sup> Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpaté' xelexire' tu lu xedxu.

<sup>15</sup> Nadxa Pedro guzre' Jesús:

—Bzéajni' netu' ca naca chee da dxulé'e nigá.

<sup>16</sup> Gunná Jesús:

—¿Cá'anqueze le'e quebe dxéajni'ile?

<sup>17</sup> ¿Quebe nézele xúgute da dxu'u na dxú'adxu zeaj na le'edxu, na' te na' xedxuaj na?

<sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bénneache.

<sup>19</sup> Lu xichaj lázrdau bénneache dxeledxuaj da dxezá lazre' da calela, ca naca xel-la' wete benne', ne ca naca xel-la' zuale zru'ula benne' xula, ne ca naca da sban da dxelún bénneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj.

<sup>20</sup> Da caní dxuluxrinnaj na bénneache. Che tu benne' quebe dxexibe ne'e ca da zéajlele gate dxawe' xeta, da nigá quebe dxuxrinnaj na le'.

*Tu nu'ula zitu' dxéajle'e chee Jesús*

*(Mr. 7.24-30)*

<sup>21</sup> Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón.

<sup>22</sup> Tu nu'ula Canaán zue' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáritega dxezácabe'.

<sup>23</sup> Quebe bi bechebe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

<sup>24</sup> Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naniteba'.

<sup>25</sup> Gubiga nu'ula na' naga zua Jesús, ne bzu zribe' lau Le', ne dx'e'e Le':

—Xran, gúcale neda'.

<sup>26</sup> Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

<sup>27</sup> Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

<sup>28</sup> Nadxa Jesús guzre' le':

—Nú'uladu, da zrentę naca xel-la' dxeajlí lazre' chiu'. Gaca ca dxaca lazru'. Lu zra ná'queze bexaca zrí'ine' nú'uladu na'.

*Jesús dxexunę' benne' zantę benne' we'*

<sup>29</sup> Jesús guz'e'e na', gudęe' dxu'a nísadau' chee Galilea. Guluęe' tu lu xi'a, ne gudx'e'e na'.

<sup>30</sup> Benne' zan belezrine' naga zua Jesús, zaj nach'e'e benne' zrinna' ca', ne benne' la chul-la ca', ne benne' quebe dxaca xelennę', ne benne' zan zaj nadxugu ni'a na', ne zanedxa benne' we'. Buluzr'e'e benne' ca' lau Jesús, na' Le' bexunę' le'.

<sup>31</sup> Ca'an guca belexebane benne' ca' gate belelé'ene' dxelennę' benne' ca' quebe guca xelennę' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinna', ne dxelelé'e benne' ca' gulaque' benne' la chul-la. Gulezú lawe' dxelúe lá'ane' Dios chee benne' Israel ca'.

*Jesús dxugawe' tapa cue' tu gaxúa benne' biu*

(Mr. 8.1-10)

<sup>32</sup> Nadxa Jesús gunné' benne' ca' dxusędene'. Dxe'e le':

—Dxexache lazra' chee benne' caní lawe' da ba zeaj chunna zra zrálene' neda' nigá, ne quebe bi de' da xelawe'. Quebe dxaca lazra' xesel-la' le' chee cheajxaque' lizre' quebe ne xelawe' chee quebe xelate ni'a ne'e la neza.

<sup>33</sup> Nadxa benne' ca' dxusęde Jesús gul'e'e Le':

—¿Ajazra guntu' zréntu' da xelagu cátitę benne' zan caní? Lataj nigá quebe nu chilá' benne' zua lizre' nigá.

<sup>34</sup> Jesús bchebe' benne' ca', dxennę':

—¿Bal-la xeta xtila nápale?

Benne' ca' belexechebe':

—Gazre na, ne xetú chupa béladau'.

<sup>35</sup> Nadxa Jesús gunná bé'ene' benne' zan ca' xelebé'e lu xu.

<sup>36</sup> Guquęe' da gazre xeta xtila, ne béladu ca', na' guzre' Dios: "Xcalenu'." Nadxa bzúzruje' na, ne bnézruje' na benne' ca' dxusędene', na' benne' ca' gulisę' na chee benne' zan ca'.

<sup>37</sup> Xúgutę' gulawe', ne beléajtęne'. Gudé na' bulusuzrate' gazre ga' da bízrujdu ca' zaj nagá'ana.

<sup>38</sup> Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'.

<sup>39</sup> Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xezre Magdala.

## 16

*Dxelenabe' Jesús guné' tu xel-la' waca chee xabáa*  
(Mr. 8.11-13; Lc. 12.54-56)

<sup>1</sup> Benne' xudau' fariseo ca', ne benne' xudau' saduceo ca' xjaque' naga zua Jesús chee xuluxunéguene' Le'. Chee le na' gulenabe' Jesús guné' tu xel-la' waca zrenté da za xabáa.

<sup>2</sup> Jesús bechebe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.”

<sup>3</sup> Che zilala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e dxulé'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra.

<sup>4</sup> Benne' wen da calela caní, benne' zaj nabéaj xíchaje' Dios, dxelenabe' guna' tu xel-la' waca zrenté. Quebe xelélé'ene' xetú xel-la' waca. Welelé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

*Da dxelún benne' xudau' ca' da naca na ca' zica' chee xeta xtila*  
(Mr. 8.14-21)

<sup>5</sup> Gate benne' ca' dxusede Jesús guladéé' xechalá'a nísadau', na' gulal-la lazre' xelu'e chizre'.

<sup>6</sup> Jesús guzre' le':

—Le nna'xque. Le guxúe cuínale ca naca chee' cua zichaj chee' xeta xtila chee' benne' fariseo ca', ne chee' benne' saduceo ca'.

<sup>7</sup> Benne' ca' dxusede Jesús gulezú lawe' dxelé' ljwezre':

—Caní dxenné' lawe' da quebe núadxu xeta xtila.

<sup>8</sup> Jesús dxeque be'ene', na' guzre' le':

—¿Bizr chee' na' dxennale naca na lawe' da quebe núale xeta xtila? Láteze dxéajlele chia'.

<sup>9</sup> ¿Quebe ne chéajni'ile, ne quebe dxeajsá lázrele chee' da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale?

<sup>10</sup> ¿Quebe dxeajsá lázrele chee' da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale?

<sup>11</sup> ¿Ájazra na' quebe dxeque be'ele quegá bchálaja' chee' xeta xtila gate gunnía' le guxúe cuínale ca naca chee' cua zichaj chee' xeta xtila chee' benne' fariseo ca', ne chee' benne' saduceo ca'?

<sup>12</sup> Nadxa guleque bé'ene' quegá guzre Jesús le' xuluxúe cuine' chee' da naca cua zichaj chee' xeta xtila, san ca naca da dxulusede benne' fariseo ca', ne benne' saduceo ca'.

*Pedro dxenné' Jesús naque' Cristo*  
(Mr. 8.27-30; Lc. 9.18-21)

<sup>13</sup> Gate bzin Jesús naga nababa xezre Cesarea da ben Filipino, na' bchebe' benne' ca' dxusédene':

—¿Nuzra na' dxelenná bénneache naca' neda', Benne' Gulje' Bénneache?

<sup>14</sup> Na' benne' ca' gulenné':

—Bal-la benne' dxelenné' nacu' Juan, bénnea' bchuę' bénneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz cheę Dios.

<sup>15</sup> Nadxa guzre Jesús benne' ca':

—¿Gazra le'e? ¿Nuzra na' dxennale naca'?

<sup>16</sup> Gunná Simón Pedro:

—Lue' nacu' Cristo, Zri'ine Dios ban.

<sup>17</sup> Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'.

<sup>18</sup> Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleałí lazre' neda', na' xel-la' dxenná bea cheę da xriwe' quebe seque na gucu'uj na benne' ca'.

<sup>19</sup> Neda' gunna' lue' da naca na zren xia cheę xel-la' dxenná bea cheę xabáa, na' da guchéaju' lue' lu xęzr la xu nigá gaca na da ba nadxéajqueze na xabáa, na' da xesezru' lue' lu xęzr la xu nigá gaca na da ba naxęzrequeze na xabáa.

<sup>20</sup> Nadxa Jesús gunná bé'ene' benne' ca' dxusédenę' cheę quebe nu xelé'ę naca Le' Cristo.

*Jesús dxuchálaje' ca gaca gate gatie'*

*(Mr. 8.31—9.1; Lc. 9.22-27)*

<sup>21</sup> Lu zra ná'queze guzú lau Jesús dxuzéajni'ing' benne' ca' dxusédenę' dxal-la' xexíaje' xęzre Jerusalén, na' benne' gula ca', ne benne' xíchaje' ca' cheę bxruze ca', ne benne' dxuluxuzáįle'ę da nadxixruj bea Dios wulusaca zi'ę Le'. Na' guzre' benne' ca' dxusédenę' welute benne' Jerusalén ca' Le'. Nadxa gate gaca chunna zra xebanę'.

<sup>22</sup> Nadxa Pedro gulé'aje' Jesús chalá'ala, ne guzú lawe' dxedil-le' Le', dxenné':

—Dios quebe gu'ę lataj, Xran. Cabata' gaca chiu' da caní.

<sup>23</sup> Jesús bexéchaje', na' guzre' Pedro:

—Gucusa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bénneache dxulaba lazru'.

<sup>24</sup> Nadxa Jesús guzre' benne' ca' dxusédenę':

—Che nu benne' dxaca lazre' gaque' neda' tuze, dxal-la' guzúę' chalá'ala da naca cheę, ne guzúa' cuine' cheę gatie', na' nadxa gaca xídalęne' neda'.

<sup>25</sup> Bénnea' dxaca lazre' gapa chí'ę xel-la' nabán cheę' gunitię' na. Bénnea' gunitię' xel-la' nabán cheę' lawe' da dxunę' zrin chia', benne' nigá zrué'ene' xel-la' nabán du lazre'.

<sup>26</sup> ¿Bízraqueze ba neza naca na cheę tu benne' che gata' cheę' xúgute' xel-la' gunní'a da de lu xęzr la xu nigá, na' cuía xi'ę lau Dios? Quebe bi gaca quizruj tu benne' cheę la bénne' du xu'e lau Dios.

<sup>27</sup> Neda', Benne' Gulje' Bénneache wida' xecha lasa nen xel-la' szren cheę Xra', ne nen gubáz cheę xabáa ca'. Nadxa xuzría cheę tu tu benne' ca naca da zaj nun tu tuę'.

<sup>28</sup> Da li dxapa' le'e, bal-la benne' zaj zre'ę nigá quebe xelatię' cadxa xelélé'ene' neda', Benne' Gulje' Bénneache, xida' xedajnná be'a.

## 17

*Dios dxuché'ę ca dxenná' lau Jesús*

*(Mr. 9.2-13; Lc. 9.28-36)*

<sup>1</sup> Ca gudé guca xrupa zra, na' Jesús guché'ę Pedro, ne Jacobo, ne Juan, bi biche Jacobo, na' bi cá'aze xjácalęne' Le' tu lau xi'a sibe.

<sup>2</sup> Na' Dios bche'ë ca dxenná' lau Jesús lávela benne' ca'. Lawe' guca tite na ca gubizra, na' zra lane' guca na da chiche ca xel-la' naxaní'.

<sup>3</sup> Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús.

<sup>4</sup> Nadxa Pedro guzre' Jesús:

—Xran, cháwe'le'ë zúadxu nigá. Che dxaca lazru', guntu' chunna xu'u lágadau', tu chiu', ne tu chee' Moisés, ne tu chee' Elías.

<sup>5</sup> Dxácatë dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'itë lazra', ne chee' Le' dxezaca ba lazra'. Chee' Le' le xene.

<sup>6</sup> Gate belenne' da nigá, na' gulate' sudxú'ala lu xu. Dxelezebele'ë.

<sup>7</sup> Nadxa Jesús gubigue' naga zaj zre'ë, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'ë, québedxa nu belelé'ene'. Tuze Jesús zue'.

<sup>9</sup> Nadxa gate dxelexetájë' lu xi'a na', Jesús gunná bé'ene' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

<sup>10</sup> Nadxa benne' ca' dxusede Jesús buluchëbe' Le':

—¿Bizr chee' na' dxelenná benne' ca' dxuluxuzájle'ë da nadxixruj bea Dios dxun na ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca.

<sup>12</sup> Neda' dxapa' le'e, ba bla' Elías, na' benne' ca' quebe belexúnbe'ë le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

<sup>13</sup> Nadxa benne' ca' dxusede Jesús guléque be'ene' dxuchalaj Jesús ca naca chee' Juan, bënnea' bchuë' bënneache nisa.

### *Jesús dxexunë' tu bi biu dxe'ebe' chuna'*

*(Mr. 9.14-29; Lc. 9.37-43)*

<sup>14</sup> Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

<sup>15</sup> —Xran, bexache lazre' zri'ina', dxe'ebe' chuna', ne da zrentë da dx-ézácabe'. Zánete lasa ba xeajházebe' lu xi', ne lu nisa.

<sup>16</sup> Ba bedajgu'a-be' lau benne' caní dxusédenu', na' quebe guca xelexunë'-be'.

<sup>17</sup> Jesús bechebe':

—Le'e, benne' wën chupa lazre', ne benne' lázrdau zide'. ¿Bátatë zúalena' le'e? ¿Bátatë naca' zren lazre' nen le'e? Le cheajxri' bi cuide' na' nigá.

<sup>18</sup> Nadxa Jesús gudil-le' be' xriwe' na', na' bebéajë' na lu bel-la' dxen chee' bi cuide' na', na' zra ná'queze bexácatëbe'.

<sup>19</sup> Gudé na' benne' ca' dxusede Jesús gulenné' Le' chalá'ala, na' buluchëbe' Le':

—¿Bizr chee' na' quebe guca netu' xebéajntu' be' xriwe' na'?

<sup>20</sup> Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápale xel-la' dxeajlí lazre', lácala naca na láteze ca naca tu binnedau' chee' mostaza,

waca xeḷe xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi de da quebe gaca gunle che nápaḷe xel-la' dxeajlí lazre'.

<sup>21</sup> Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

*Jesús dxuchálaje' xecha lasa ca gaca gate gatíe'*

(Mr. 9.30-32; Lc. 9.43-45)

<sup>22</sup> Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache.

<sup>23</sup> Xelútíe' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

*Da dxuluchízruje' bénneache chee xudau'*

<sup>24</sup> Gate Jesús ne benne' ca' dxusédené' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédené' le'e chee xudau'?

<sup>25</sup> Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláZR chee', u benne' zitu' ca'?

<sup>26</sup> Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláZR chee' quebe xelízruje'.

<sup>27</sup> Na'a, chee quebe nu guchá'adxu, guxíaj lu nísadau' na', ne guchize da na' dxeláleu' belá lu nisa na', na' bebéaj bela nedxu quelu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

## 18

*Nu benne' nácadxa blau xabáa*

(Mr. 9.33-37; Lc. 9.46-48)

<sup>1</sup> Tu lasa gulebiga benne' ca' dxuséde Jesús naga zue', na' buluchebe' Le':

—¿Nuzra benne' nácadxe' blau naga dxenná bea Dios?

<sup>2</sup> Nadxa Jesús gunné' tu bidau', na' bze'-be' lau benne' ca' dxusédené'.

<sup>3</sup> Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa.

<sup>4</sup> Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá.

<sup>5</sup> Benne' gape' ba lá'ana tu bidau' caní lu La' neda', néda'queza' gape' ba lá'ana.

*Ca naca da dxun na gundxu dul-la*

(Mr. 9.42-48; Lc. 17.1-2)

<sup>6</sup> Na' gunná Jesús:

—Núteze benne' gungé' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'.

<sup>7</sup> Edxugúa bēnneache lawe' da déle'e da dxun na xelún bēnneache dul-la. Tu gátazqueze da caní, na' edxugúa bēnneache dxelune' xelún bēnneache dul-la.

<sup>8</sup> Chee le na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpatē na'u, ne dxúpatē ni'u.

<sup>9</sup> Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi gabila, zua dxúpatē xiaj lau'.

*Da dxulé'e na ca naca chee zrila' naníteba'*  
(Lc. 15.3-7)

<sup>10</sup> Na' gunná Jesús:

—Gutu guzú' chala'ala netú bidu caní. Neda' dxapa' le'e, zaj zra' gubáz chee xabáa chee bidu caní lau Xra' xabáa.

<sup>11</sup> Neda', Benne' Gulje' Bēnneache, bla'a bedajselá' benne' zaj nanitie'.

<sup>12</sup> '¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' be tápalalaj chennu na' le'e xixre', na' cheajdilje' zrila' na' naníteba'?

<sup>13</sup> Gate ba bezrelne'-ba', wabéle'edxene' chee be tu na' quézcala chee be tápalalaj chennu ca' quebe guleníteba'.

<sup>14</sup> Cá'anqueze Xrale le'e, zue' xabáa, quebe dxaca lazre' nite netú bidu caní.

*Ca dxal-la' gunite laudxu chee le sa' ljwézredxu*  
(Lc. 17.3)

<sup>15</sup> Na' gunná Jesús:

—Che bi bichu' dxunbe' chiu' da calela, bcháaljle tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'.

<sup>16</sup> Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'.

<sup>17</sup> Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

<sup>18</sup> 'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

<sup>19</sup> 'Cá'anqueze dxapa' le'e, che chúpale le'e gácale tuze ca da nábele Dios, na' Xra' zua xabáa gunne' na.

<sup>20</sup> Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

<sup>21</sup> Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

<sup>22</sup> Bechebe Jesús:

—Dxapa' lue', quegá gazre lasa, san ga xun chi da gazre lasa.

*Benne' wen zrin quebe guca lazre' gunite lawe' chee le sa' ljwezre'*

<sup>23</sup> Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'.

<sup>24</sup> Gate guzú' lawe' dxucá'ana chawe' na, na' guleché'e lau le' tu benne' dxebage' chee' zane' cue' chi gaxúa dumí.



<sup>25</sup> Lawe' da quebe de chee benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zri'ine' ca', ne ca nácaqueze da nape', chee gazruj da na' dxebague'.

<sup>26</sup> Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na."

<sup>27</sup> Na' xrané' bexache lazre' le', ne bnite lawe' da na' dxebague' chee', ne bsané' le'.

<sup>28</sup> Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látédau'. Na' gudele' lba bénnea', ne guzú lawe' dxusézxuje' chi'i bénnea', dxé'e le': "Gudizruj neda' da dxal-lu' chia'."

<sup>29</sup> Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na."

<sup>30</sup> Bénnea' quebe guca lazre', na' guxíaje' xejlu'e wen zrin ljwezre' na' lizre xia dxácaté quízruje' da na' dxebague'.

<sup>31</sup> Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xejleguezre' xrané' xúguté da ba guca.

<sup>32</sup> Nadxa xrané' na' gunná bé'ene' xejlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'.

<sup>33</sup> Cá'anqueze lue' dxal-la' xexache lazru' le sa' ljwezru' na' ca bēna' neda' bexache lazra' lue'."

<sup>34</sup> Xrané' na' bzrá'ale'e bénnea', na' bde'e le' xel-la' zi' dxácaté na' quízruje' ca naca da na' dxal-le' chee'.

<sup>35</sup> Nadxa gunná Jesús:

—Cá'anqueze gun Xra' zua xabáa chee le'e che quebe gunite laule dute lázrdaule chee le sa' ljwézrele.

## 19

### *Da bchalaj Jesús ca naca chee benne' dxulusán ljwezre'*

(Mr. 10.1-12; Lc. 16.18)

<sup>1</sup> Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra.

<sup>2</sup> Benne' zan zjácálené' Le', na' bexune' benne' zante, benne' we'.

<sup>3</sup> Nadxa bal-la benne' xudau' fariseo gulebigue' naga zua Jesús chee xelebéaje' Le' dizra' chee gaca xelagu zrié' Jesús, na' buluchébe' Le':

—¿Waca nu benne' gusané' zru'ule' ne chee bíteteze da gune'?

<sup>4</sup> Bechébe Jesús:

—¿Quebe ne gulábale le'e lu xiche lá'axza da na' dxenná na: "Bennea' bēne' benne' ca' nédxudaute bēne' le' benne' biu, ne nu'ula"?

<sup>5</sup> Cá'anqueze gunné': "Chee le na' benne' biu gusané' xra xrne'e chee gaque' tuze nen zru'ule', na' dxupe' xelaque' ca tuze benne'."

<sup>6</sup> Caní naca na, québedxa zaj naque' chupe', san tuze benne' zaj naque'. Chee le na' quebe dxal-la' xelá'a bēnneache da na' ba nuchaga Dios.

<sup>7</sup> Nadxa buluchébe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belexelé'e, na' gusané' le'?

<sup>8</sup> Jesús guzre' benne' ca':

—Caní bēne' lawe' da gulaca lazrdau zizraj xra xrtaule. Moisés bēnne' lataj gusanle zrú'ulale, san nédxudaute quebe guca na ca'.

<sup>9</sup> Neda' dxapa' le'e, che tu benne' gusanē' zru'ule', ne quebe dxedalēne' benne' biu xula, na' che xezualēne' nu'ula xula, benne' nigá gune' dul-la súalēne' nu'ula quebe naque' zru'ule', na' che nu benne' 'biu xeque'ē tu nu'ula nusán benne' chee', cá'anqueze gun dul-la bēneea' súalēne' nu'ula quebe naque' zru'ule'.

<sup>10</sup> Nadxa benne' ca' dxusede Jesús gulē'ē Le':

—Che ca' dxaca chee' benne' zúalēne' nu'ula, quebe dxal-la' súalēntu' nu'ula.

<sup>11</sup> Jesús guzre' benne' ca':

—Quegá xúgute' benne' gaca xelezi'ē dizra' nigá, san tuze benne' ca' ba nun Dios chee' xelezi'ē na.

<sup>12</sup> Zaj zra' benne' quebe dxelezúalēne' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bēneache naca caní. Na' zaj zra' benne' dxelexegá'ane' cá'aze, quebe nu dxelezúalēne' chee' gaca xelune' zrin chee' Dios, Bēneea' dxenná be'ē xabáa. Benne' gaca si'ē dizra' nigá dxal-la' si'ē na.

*Jesús dxenabe' gaca chawe' chee' bidu ca'*

*(Mr. 10.13-16; Lc. 18.15-17)*

<sup>13</sup> Nadxa belezrín benne' lau Jesús zaj nachē'ē bal-la bidau' chee' guzé ne'ē bidu ca', ne nabē' Dios gaca chawe' chee'be', san benne' ca' dxusede Jesús gulezú lawē' dxeledil-lē' benne' ca' zaj nachē'ē bidu ca'.

<sup>14</sup> Jesús guzre' le':

—Le güe bidu ca' lataj xelega'be' naga zua'. Quebe guzrúnale-be', lawe' da benne' zaj naque' ca' bidu caní xelu'ē naga dxenná bea Dios xabáa.

<sup>15</sup> Nadxa bzē Jesús ne'ē lawe' bidu ca', na' gudé na' bezé'ē lataj na'.

*Tu benne' cuide' nape' xel-la' gunní'a*

*(Mr. 10.17-31; Lc. 18.18-30)*

<sup>16</sup> Tu benne' cuide' guxiáje' naga zua Jesús, na' bchebe' Le':

—Benne' Wesēde chawe'. ¿Bi da xrlátaje dxal-la' guna' chee' gapa' xel-la' nabán zeajlí canna'?

<sup>17</sup> Jesús guzre' le':

—¿Bizr chee' na' dxu'u neda', benne' wesēde chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca' bdxixruj be'e Dios.

<sup>18</sup> Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalēnu' zru'ula benne' xula. Quebe cuanu'. Quebe nneu' da wēn lazre' chee' benne'.

<sup>19</sup> Gudapa ba lá'ana xra xrna'u. Bzri'i le sa' ljwezru' ca' nazrí'i cuinu'.

<sup>20</sup> Benne' cuide' na' gunné':

—Xúgute' da caní dxuna' nácatea' bídau'tē. ¿Bízradxa quebe ne guna'?

<sup>21</sup> Na' guzre' Jesús le':

—Che dxaca lazru' gacu' benne' li lazre', bexíaj, xeajete ca' naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup> Gate benne' cuide' na' benne' da nigá, bezé'ē dxexíaje lazre' lawe' da nápalē'ē xel-la' gunní'a.

<sup>23</sup> Nadxa gunná Jesús, dxē'ē benne' ca' dxusédene':

—Da li dxapa' le'e, stébele'ē naca chu'u tu benne' gunn'á naga dxenná bea Dios xabáa.

<sup>24</sup> Da xula dxapa' le'e, chadidxa gaca te tu bea', be dxebíá bēnneache lu negue' tu xeche' zriche, quézcala chu'u tu benne' gunn'á naga dxenná bea Dios.

<sup>25</sup> Gate belenne' benne' ca' dxusede Jesús da nigá, na' belexebánele'ēne', na' buluchebe ljwezre':

—¿Nuzra la xca'?

<sup>26</sup> Jesús guné'ē benne' ca', ne guzre' le':

—Da nigá quebe gaca xelún bēnneache, san Dios waca gune' ca naca.

<sup>27</sup> Nadxa gunná Pedro:

—Xran, netu' ba bcá'anantu' ca naca da nápantu', ne zéajlentu' Lue'. ¿Bizra gápantu' xca'?

<sup>28</sup> Bechebe Jesús:

—Da li dxapa' le'e, ca lu zra na' gate na' xúgute' xelexaca na cube, gate neda', Benne' Gulje' Bēnneache, cue'a lataj chawe' chia' naga nna be'a, le'e na' ba gudálele neda' cué'queze lu chazrinnu lataj naga nna beale, chee' guchí'ale chee' chazrinnu cue' benne' Israel, benne' judío ca'.

<sup>29</sup> Xúgute' benne' ca' ba bulucá'ane' lizre', u benne' biche', u nu'ula zane', u xre', u xrne'ē, u zru'ule', u zrí'ine', u xezr la xu chee', chee' xelune' zrin chia', xelezí'queze' tu gaxúala na, ne xelezí'queze' xel-la' nabán zeajlí canna.

<sup>30</sup> Benne' zante' zaj naca blau na'a xelaque' benne' bzébe, na' benne' zante' zaj naca benne' bzébe na'a xelaque' benne' blau.

## 20

### *Da dxulé'e na ca naca chee' benne' wen zrin ca'*

<sup>1</sup> Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete' cue' xezr la xu guzé'ē lizre' che zílala, zéaje' zeajtílaje' benne' wen zrin ca' chee' cheajlechibe' uva chee'.

<sup>2</sup> Bca'ana cháwelenē' benne' wen zrin ca' quízruje' tu dumí lazruj chee' tu zra, na' gusel-le' benne' ca' zeajleguene' zrin lu xezr la xu chee'.

<sup>3</sup> Ca gudé na' guzé'ē lizre' ca dxedá na, na' blé'ene' benne' zaj zre'ē lawe' xi'a zaj nalátaje'.

<sup>4</sup> Na' guzre' benne' ca': "Cá'anqueze le'e, le hjaca wen zrin lu xezr la xu chia', na' gunna' le'e da naca chawe'." Na' benne' ca' xjaque'.

<sup>5</sup> Xrane na' guzé'ē da xula wa gubizra, ne cá'anqueze dxexedá' chunna, ne tuze ca bene'.

<sup>6</sup> Xetu' du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee' na' zrale le'e nigá bedú zra quebe bi zrin dxunle?"

<sup>7</sup> Gulenné': "Quebe nu ne xe netu' guntu' zrin chee'."

'Na' guzre' benne' ca': "Cá'anqueze le'e, le cheajén zrin lu lina chia', na' gunna' le'e da naca chawe'."

<sup>8</sup> Gate gul-la' chizrela, xrane na' guzre' benne' xu'u lu ne'ē zrin na': "Gunné' benne' wen zrin ca', ne gudízruje', su lau' quízruju' benne' ca' belelá' bzébedxa, na' bzébetē quízruju' benne' ca' belelá' nédxute'."

<sup>9</sup> Nadxa belezrín benne' ca' belú'ē lu zrin na' gate dxexedadxa gazxu', na' tu tu benne' ca' belezi'ē lazruj chee' du naxá' lazruj tu zra wen zrin.

<sup>10</sup> Gudé na' gate belezrín benne' ca' gulu'e nédxutę lu zrin na', guléqueņg' xezezí'e da zrendxa, san cá'anqueze gulezí' tu tu benne' ca' lazruj tu zra wen zrin weaj.

<sup>11</sup> 'Gate gulezí'e na, na' gulezú lawe' dxelawe' zria lau xrane zrin na',

<sup>12</sup> dxelenné': "Benne' caní belelá' bzébedxa, tu chí'idau'ze ga belunę' zrin, na' gudízrujquezu' benne' caní ca gudízruju' netu', na' netu' bedú zra bentu' zrin, ne ca naca da la cheę zra nigá bchaga launtu'."

<sup>13</sup> 'Bechebe xrane na', dxę'e tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin?"

<sup>14</sup> Guzí' lazruj chiu', ne bexíaj. Neda' dxaca lazra' gunézruja' cheę benne' ca' belú'e bzébedxa ca da gudízrujqueza' lue'.

<sup>15</sup> ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

<sup>16</sup> Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábase benne' ca' xelaque' blau.

*Xecha lasa dxuchalaj Jesús ca gaca gate gatię'*

(Mr. 10.32-34; Lc. 18.31-34)

<sup>17</sup> Gate xu'u Jesús neza, zexíaje' Jerusalén, guléaje' cheęze benne' chazrinnu ca' dxusédene', ne guzre' le':

<sup>18</sup> —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchaje' ca' cheę bxruze ca', ne lau benne' ca' dxuluxuzájle'e da bdxixruj be'e Dios, na' xelechugue' chia' gatia'.

<sup>19</sup> Xuludé'e neda' lu na' benne' zitu' ca' cheę xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

*Da gunaba xrna Jacobo ne Juan*

(Mr. 10.35-45)

<sup>20</sup> Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén.

<sup>21</sup> Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabęla chiu', ne xetube' xéglala.

<sup>22</sup> Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute'?

Na' gulenabe':

—Wácantu'.

<sup>23</sup> Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabęla chia', ne chalá'a xéglala chia' quebe naca na chia' gunna' na le'e. Xra' gunézruje' na cheę bi ca' ca da ba nucueze'.

<sup>24</sup> Gate xechí benne' ca' dxusede Jesús belenne' ca', na' belezre'e dxupa bi cheę nu'ula na'.

<sup>25</sup> Jesús gunné' benne' ca, ne guzre' le':

—Ba nézele le'e ca dxelún benne' xíchaje chee xezr la xu ca, dxelenná bé'ene' benne' ca, na' benne' nácadxe' blau ládujla benne' ca' dxelenná be'e, dxuchínene' xel-la' dxenná bea chee'.

<sup>26</sup> Le'e quebe dxal-la' gunle' ca. Benne' dxaca lazre' gaque' blau ládujla le'e dxal-la' guné' zrin chee xezícadxale le'e,

<sup>27</sup> na' bènea' dxaca lazre' gaque' xíchaje chee, dxal-la' gaque' wen zrin chee xúgutele le'e.

<sup>28</sup> Dخال-la' guné' ca bēna' neda', Benne' Gulje' Bēneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzua' xel-la' nabán chia' ca da quízruja' chee guselá' benne' zante.

*Jesús dxexune' chupa benne' la chul-la'*

(Mr. 10.46-52; Lc. 18.35-43)

<sup>29</sup> Gate dxelxedxúaje' xezre Jericó, na' benne' zante zjácálene' Jesús.

<sup>30</sup> Naga dxeledé' zaj dxe' chupa benne' la chul-la' dxu'a neza, na' gate belenne' dxedé Jesús na' gulebezre xe'e, dxelenné':

—Xran, Zri'ine David, bexache lazre' netu'.

<sup>31</sup> Benne' zan ca' guledil-le' dxúpaté' na' chee xelexúé' zrize, san le' gulebezre xe'e zízrajdxá, dxelenné':

—Xran, Zri'ine David, bexache lazre' netu'.

<sup>32</sup> Nadxa Jesús guleze', na' gunné' benne' la chul-la' ca', na' bchebe' le':

—¿Bi dxaca lázrele guna' chee?

<sup>33</sup> Belexechebe benne' ca':

—Xran, dxaca lázrentu' xelé'entu'.

<sup>34</sup> Jesús bexache lazre' benne' ca', ne bte' xiaj lawé'. Na' belexelé'ete' benne' la chul-la' ca', na' xjácálene' Jesús.

## 21

*Ca da guca gate bexú'u Jesús Jerusalén*

(Mr. 11.1-11; Lc. 19.28-40; Jn. 12.12-19)

<sup>1</sup> Gate belezrín Jesús, ne benne' ca' dxusédene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'.

<sup>2</sup> Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' le'ba'. Le seze-ba', ne le che'e dxúpaté'ba' nigá.

<sup>3</sup> Che nu benne' bi xe'e le'e, le xe'e: “Xránadxu nachinne' le'ba', na' la xesél-la'tequeze'-ba'.”

<sup>4</sup> Da nigá guca na chee guxá ca da gunná benne' bchálaje' waláz chee Dios, gunné':

<sup>5</sup> Le xe' benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Dute' xel-la' dxexruj lazre' zrié' tu burro bzrise'.

Zrié' tu búrrodau', zri'ine tu be' dxua xua.”

<sup>6</sup> Nadxa dxupa benne' ca' dxuséde Jesús besía'que', ne belune' ca da ba gunná be'e Jesús le'.

<sup>7</sup> Xeajlexrí'e burro bzrise', ne zrí'ineba', na' belezrúe' zra lané' cúzruba', na' guzría Jesús le'ba'.

8 Benne' zan ca' gulechílaje' zra lanë' la neza na', na' xebal-le' buluchibe' zina' da buluzale' la neza.

9 Benne' zjaque' lówela, ne benne' zá'aque' bzebe gulezú lawë' dxelebezre xe'e, dxelenné':

—¡Gaca ba lá'azxa Zri'ine wenná bea David! ¡Ba neza zrentë naca na chee bënnea' ze'e waláz cheë Xránadxu Dios! ¡Gaca ba lá'azxa Dios!

10 Gate guxú'u Jesús xezre Jerusalén, ca naca bënneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

11 Bal-la benne' ca' gulenné':

—Benne' nigá naque' Jesús, benne' dxuchálaje' waláz cheë Dios, ze'e xezre Nazaret da nababa Galilea.

*Jesús dxuchi'e lu xudau'*

*(Mr. 11.15-19; Lc. 19.45-48; Jn. 2.13-22)*

12 Ca gudé na' guxú'u Jesús dxale'aj xudau' cheë Dios, na' bebéaje' xúgute benne' wëte, ne benne' dxelá'awë' na'. Bdxixre' blag ca' cheë benne' ca' dxuluché'e dumí, ne bdxixre' da ca' zaj dxe' benne' ca' dxelútië' bgúgudu ca'.

13 Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bënneache lawa' neda”, san le'e ba nunle na ca tu lizre gubán.

14 Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexunë' benne' ca'.

15 Belezrá' benne' xíchaje' ca' cheë bxruze ca', ne benne' ca' dxuluxúzajle'e da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!”

16 Gulé'e Jesús:

—¿Dxennu' ca' dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba beñu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

17 Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejgá'anë' xëla na'.

*Jesús dxugu'e de' xaga higo*

*(Mr. 11.12-14, 20-26)*

18 Che zílala ca zexíaj Jesús xezre na', na' gudunë'.

19 Zítu'la blé'engë' tu xaga higo dxu'a neza, na' gate bzrine' naga zua na, quebe bi da zixre cheë na blé'engë'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'.

20 Ca belelé'e benne' ca' dxusede Jesús da nigá, na' belexebánengë', ne buluchebe' Jesús:

—¿Ájazra na' chadite' gubizre xaga higo nigá?

21 Bechebe Jesús:

—Da li dxapa' le'e, che nápaie xel-la' dxeajlí lazre', ne quebe gun chupa lázrele, quegaze da nigá gaca gunle ca da beña' neda' cheë xaga higo nigá, san waca xe'e xi'a nigá: Gucuasa nigá, xeajsúa lu nísadau', na' gaca na.

22 Che dxeajlí lázrele, na' xezi'le bítetgeze da nábale Dios.

*Xel-la' dxenná bea da xu'u lu na' Jesús*

(Mr. 11.27-33; Lc. 20.1-8)

23 Nadxa guxú'lu Jesús lu chila xudau', na' dxácaté na' dxusédene' benne' zaj zre'è na', gulebiga naga zua Jesús benne' xíchajé ca' chee bxruze ca', ne benne' gula chee judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze beña lue' xel-la' dxenná bea nigá?

24 Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní.

25 ¿Nu benne' gusel-le' Juan dxuchúe' bénneache nisa? ¿Dios, che benneacheze?

Gulezú lawe' dxuluchálajle ljwezre', dxelenné':

—Che nnadxu Dios gusel-le' le', na' xe'e dxi'u: “¿Bizr chee na' quebe guxéajle chee'?”

26 Che nnadxu bénneache gusel-le' le', dxal-la' zrédexu bi xelún benne' zan ca' cheedxu dxi'u, lawe' da dxeleque xúgute' bénneache bchalaj Juan na' waláz chee Dios.

27 Chee le' na' gul'é'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

*Da dxulé'e na ca naca chee chupa bi biu chee tu benne'*

28 Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ine' bi biu, na' guzre' tube': “Zrí'ina', guxíaj xején zrin lu lina chee uva chia'.”

29 Zrí'ine' na' bechébebe': “Quebe dxaca lazra'.” Ca gudé na' bexíaje lázrebe', na' guxíajbe' xejénquezbe' zrin.

30 Cá'anqueze xrabe' na' guxíaje' xejné'e xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxíajbe'.

31 ¿Núlabe' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelxú'e naga dxenná bea Dios nédxudxa ca le'e

32 lawe' da bla' Juan, bedajlé'ene' le'e da naca xrlátaje, na' le'e quebe guxéajle chee'. Benne' wechizruj ca', ne nu'ula ca' dxeledále benne' biu zante guléajle'e chee'. Le'e, gate ble'ele da nigá, quebe bexíaje lázrele chee' chéajle chee'.

*Da dxulé'e na ca naca chee benne' wen zrin caléla ca'*

(Mr. 12.1-12; Lc. 20.9-19)

33 Nadxa gunná Jesús:

—Le xene ca naca da nadxizruj bea nigá. Tu benne' xrane tu xezr la xu guze' lba uva ca', ne beñe' le'aj chee na. Beñe' tu xedxu naga xelesíe' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guzé'e zéaje' zitu'.

<sup>34</sup> Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'.

<sup>35</sup> Benne' wen zrin ca' guleque'e bi wen zrin chee' ca'. Belúele'e tube', ne belutie' xetube', na' xetube' buluzríe'-be' xiaj.

<sup>36</sup> Nadxa xrane na' gusel-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'.

<sup>37</sup> Naga xeajché'tequeze na gusel-le' zrí'inequeze' lawe' da dxéqueñe': Welape' ba lá'ana zrí'ina'.

<sup>38</sup> Gate belelé'ene' zrí'ine', na' benne' wen zrin ca' gulé ljwezre': "Bi nigá xezí' lu na'be' ca naca da caní. Du gute-be' chee' xegá'ana cheedxu da caní."

<sup>39</sup> Chee le' na' gulele'-be', ne belexebáje'-be' lu xezr la xu na', na' belutie'-be'.

<sup>40</sup> Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

<sup>41</sup> Gulé'e Le':

—Gutie' benne' ca' dxeluné' da caléla ne quebe xexache lazre' le'. Nadxa gucá'analené' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

<sup>42</sup> Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' chalá'ala, le' na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

<sup>43</sup> Chee le' na' dxapa' le'e, Dios wequé'e da naca chee le'e naga dxenná be'e, na' gunézruje' na benne' xeluné' da naca chee xel-la' dxenná bea chee Dios.

<sup>44</sup> Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

<sup>45</sup> Gate benne' xichaje' ca' chee bxruze ca', ne benne' xudau' fariseo ca' belenne' da bchalaj Jesús, guleque bé'ene' chee léqueze' bchalaj Jesús da caní.

<sup>46</sup> Gate gulaca lazre' xelele' Le', belezrebe' benne' xezre ca' lawe' da dxeléajle' benne' ca' naca Jesús benne' dxuchálaje' waláz chee Dios.

## 22

### *Da dxulé'e na ca naca chee laní wechaga na'*

<sup>1</sup> Guzú lau Jesús dxuchálajlene' benne' ca' xecha lasa tu da dxulé'e na, dxé'e le':

<sup>2</sup> —Ca da gaca xabáa naga dxenná bea Dios naca na ca da guca gate tu benne' wenná bea bene' tu laní wechaga na' chee bi biu chee'.

<sup>3</sup> Gusel-le' benne' wen zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'.

<sup>4</sup> Nadxa gusel-ladxé' benne' wen zrin chee' ca', benne' xula. Dxe'e le': "Le xe benne' ca' gunnía', ba nucueza' xel-la' wagu. Ba gunná be'eda' xelútie' bezre ca', ne be dxelanne, na' ca naca na bache de. Dxal-la' xelelé'e nigá naga zra' wechaga na'."

<sup>5</sup> Benne' ca' gunné' quebe gulaca lazre' xédajgaque'. Tu benne' ca' guxíaje' lu xezr la xu chee', ne xetú benne' guxíaje' wete.

<sup>6</sup> Xebal-la benne' ca' gulele' bi wen zrin ca' chee wenná bea na', na' buluchácalene'-be', ne belútete'-be'.



<sup>7</sup> Nadxa wenná bea na' bzrá'ale'e, na' gusel-le' benne' chee' ca', benne' zjaca wedil-la xeajleguétie' benne' wete benne' ca', ne xeajlezéze'te' lazre' benne' ca'.

<sup>8</sup> Nadxa guzre' bi wen zrin chee' ca': "Bal-la bi de ba de chee wechaga na', na' benne' ca' gunnía' quebe zaj naca chee' xelexé'e.

<sup>9</sup> Le chjaca neza zri'a ca', ne le nne xúgute benne' lé'ele, chee xelexé'e laní chee wechaga na'."

<sup>10</sup> Benne' wen zrin ca' xjaque' la neza ca', na' xeajletupe' xúgute bènneache, benne' belelé'ene' zaj naque' benne' calela, ne benne' xrlátaje. Ca'an guca guzrate xu'u na' bènneache.

<sup>11</sup> Nadxa wenná bea na' guxú'e xeajné'e benne' ca' gunné', na' blé'ene' tu benne' dxe'e na', quebe nazi'e zra lane' chee laní chee wechaga na'.

<sup>12</sup> Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee laní wechaga na'?" Bènnea' gudxé'e zrize.

<sup>13</sup> Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chale'ajla naga naca chul-la, naga cuezre', ne xáguxa'ate' lazxe'."

<sup>14</sup> Benne' zante gunnía', na' bábaze' zaj naca chee' xelu'e nigá.

### *Ca naca chee dumí da dxuluchízruje'*

*(Mr. 12.13-17; Lc. 20.20-26)*

<sup>15</sup> Nadxa benne' fariseo ca' besiá'que', ne belune' tuze dizra' xelexéajje' Jesús dizra' chee xelexéquene' xelawe' zría chee'.

<sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee zeajleguezre' Jesús:

—Benne' wesede, nézentu' dxenníu' da li, ne dxusédenu' da li da zaj naca chee Dios, ne quebe dxezrebu' bi xelenná bènneache, ne quebe dxenná'u ca da zaj napa bènneache.

<sup>17</sup> Gunná xque. ¿Aja dxéquenu' lue'? ¿Dxun na ba xen quízrujdxu da dxuluchízruj benne' ca' nase-la César, benne' zitu', che cabí?

<sup>18</sup> Jesús ba nézene' ca da dxelaca lazre' xelune' chee', na' guzre' benne' ca': —Le'e, láweze dxunle da xrlátaje. ¿Bizr chee na' dxuzúale da guzría xi na neda'?

<sup>19</sup> Le gulé'e neda' dumí na' da dxízrujle chee wechizruj.

Nadxa bulunézrujje' Le' tu dumí chee xezre Roma.

<sup>20</sup> Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

<sup>21</sup> Belexechebe':

—Chee César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

<sup>22</sup> Gate belenne' da nigá, na' belexebánene', ne besiá'que' naga zua Jesús.

### *Da buluchebe' Jesús chee benne' xelexebane' ládujla benne' gate*

*(Mr. 12.18-27; Lc. 20.27-40)*

<sup>23</sup> Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

<sup>24</sup> —Benne' wesede, Moisés gunné' che tu benne' nuchaga ne'e gatie', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee sua tu bí chee benne' ba gutie'.

25 Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'.

26 Cá'anqueze gúcaqueze na chee' bi gudxupe', na' gúdé na' chee' bi guxunne', na' cá'anqueze guca chee' xúgute' bi gazre ca'.

27 Ca gúdé na', na' gute nu'ula na'.

28 Gate xelexebán benne' gate, ¿nula bi gazre caní gácabe' benne' chee' nu'ula na' lawe' da tu tu bi gazre ca' bchaga na'abe' nen nu'ula na'?

29 Jesús bechebe':

—Le'e dxeque zr'éajele lawe' da quebe núnbeale da naxúaj na lu xiche lá'azxa, ne ca naca xel-la' waca chee' Dios.

30 Gate zrin zra xelexebán benne' gate, québedxa xuluchaga na' bénneache, ne québedxa xelútié' bi nu'ula chee' xuluchaga na'abe'. Xelaque' ca zaj naca gubáz chee' xabáa chee' Dios.

31 Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné':

32 “Neda' naca' Dios chee' Abraham, ne Dios chee' Isaac, ne Dios chee' Jacob.” Dios quebe naque' Dios chee' benne' gate, san naque' Dios chee' benne' ban, benne' ca' ba gulatíe' lu xezr la xu nigá.

33 Gate belenne' da nigá, na' belexebane benne' ca' ca naca da dxusede Jesús.

### *Da gunná be'e Dios da naca blau*

*(Mr. 12.28-34)*

34 Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'.

35 Tu benne' ca', benne' naque' benne' dxuxuzájle' da nadxixruj bea na, guca lazre' guxúe' ájala nne Jesús. Bchebe' Le':

36 —Benne' wesede, ¿bizrla da gunná be'e Dios naca blau?

37 Bechébe Jesús:

—Dxal-la' zri'inu' Xranu' Dios duté xichaj lázrda'u, ne duté bénne'du xu'u, ne duté xel-la' dxéajni'i chiu'.

38 Da nigá naca da nadxixruj bea da blaudxa, ne da dxundxa na ba xen.

39 Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'.

40 Che tu benne' dxune' ca zaj naca chupa da nadxixruj bea caní, dxune' ca naca xúgute' da nadxixruj bea da bzuaj Moisés, ne ca naca xúgute' da bulusede benne' ca' buluchálaje' waláz chee' Dios.

### *¿Nuzra zri'ine naca Cristo?*

*(Mr. 12.35-37; Lc. 20.41-44)*

41 Dxácaté ne zaj nazraga benne' fariseo ca' na',

42 Jesús bchebe' le':

—¿Ájala dxéquele le'e chee' Cristo? ¿Nuzra zri'ine naque'?

Benne' ca' gulé' Le':

—Zri'ine David na'.

43 Nadxa guzre Jesús benne' ca':

—¿Ájazra na' David gate bchálaje' chee' Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

44 Xrana' Dios guzre' Xrana':

“Gudxé'e chalá'a xabéla chia'

cadxa guzúa' zran ni'u benne' ca' quebe chawe' dxelelé'eng' Lue'."

<sup>45</sup> ¿Ájazra naca na naca Cristo zri'ine David, che David ná'queze dxē'e Le': "Xrana"?"

<sup>46</sup> Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

## 23

*Jesús dxedil-ļe' benne' xudau' ca'*

*(Mr. 12.38-40; Lc. 11.37-54; 20.45-47)*

<sup>1</sup> Nadxa Jesús guzre' benne' ca' zaj zre'e na', ne benne' ca' dxusédenē',  
—dxenné':

—Benne' ca' dxuluxuzájļe'e da nadxixruj bea Moisés, ne benne' xudau' fariseo ca' zaj napē' xel-la' dxenná bea xuluxuzájļe'e da nadxixruj bea Moisés.

<sup>3</sup> Chee ļe na' le guzúa dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na.

<sup>4</sup> Dxelunge' xua zí'ile'e da quebe dxelezeque xelezúe bēnneache, ne dxelenná bé'eng' bēnneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla.

<sup>5</sup> Xúgute da dxelún benne' ca' naca na chee xeledé'e bēnneache. Dxeledánnē' dxelu'e luzxgue', ne ne'e ladxe' laga naga naxúaj dizra' chee Dios, ne dxelácue' zra lane' da zeajzē luzre na tunna.

<sup>6</sup> Dxelaca lazre' xeledé'e naga ze láweze naga dxelawe', ne naga naca blau lu xu'u ca' naga dxeledube'.

<sup>7</sup> Dxelaca lazre' xelapa bēnneache le' ba lá'ana la neza ca', ne xelé'e le': "Benne' wesede."

<sup>8</sup> Na'a le'e, quebe güele lataj nu xē le'e, "Benne' wesede", lawe' da xúgutele nácale bi bíchele tule xetule, ne tuze Benne' dxusédenē' le'e, neda', Cristo.

<sup>9</sup> Quebe nu xēle le'e: Xrae, lu xēzr la xu nigá, lawe' da zua tuze Xrale, Dios na' zue' xabáa.

<sup>10</sup> Quebe güele lataj nu xē le'e: Xran, lawe' da zua tuze Xránale, neda', Cristo.

<sup>11</sup> Bēnnea' dxune' zrin chee xezícadxale le'e nácadxē' blau ládujla le'e.

<sup>12</sup> Bēnnea' dxucá'ana szren cuine' wexéxrujla bēnnea', na' bēnnea' dxaque' dxexruj lazre' wegá'ane' szren.

<sup>13</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxusézxujle neza chee xabáa chee quebe nu chu'u na. Lé'eequeze quebe dxú'ule, ne quebe dxuele lataj benne' dxelaca lazre' xelu'e.

<sup>14</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxejúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee ļe na' da zrentē da guzría xi na le'e.

<sup>15</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xēzr la xu nigá ne ca naca nísadau' chee si' tu benne' ca naca da zéajļe chee Dios, na' gate bache dxunle na, na' dxugápadxale bēnnea' dul-la ca da nabágale le'e chee cuía xi'e lu lataj ba xa'.

<sup>16</sup> 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro chee xudau', da na' dxun na le' ba xen.

17 Nácalle benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'?

18 Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen.

19 Nácalle benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'?

20 Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na.

21 Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zue' lataj na'.

22 Cá'anqueze benne' dxuzétaje' xabáa, dxuzétaje' lataj naga zria Dios, ne Díósqueze, Bénnea' zrië' lataj na' dxuzétaje'.

23 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheë xudau' tu cue' cheë da chi cue' cheë xixruj weaj, ne cheë bínnedu ca' cheë anís, ne cheë cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheë gácale xrlátaje, ne cheë xexache lázrele le sa' ljwézrele, ne cheë chéajle cheë Dios. Da caní zaj naca na da dxun na ba xen gunle, ne quebe gusanle da ca' ba dxunle.

24 La chul-la nácalle, ne dxaca lázrele cu'ule benne' neza. Dxecá'ale da naca ca tu bé'adai', bę zrua lawe' da dxí'ajle, na' quebe dxeque be'ele dxí'ajle da naca ca tu camello, bę dxelaga benneache.

25 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácalle ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácalle lawe' da lu lázrdaule nácalle ca gubán, ne benne' dxucude.

26 Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

27 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácalle ca tu ba chiche da nalá na xrtantę cúzrela, na' lu'ule na nazratę na zrita cheë benne' gate', ne xúgutę da sgute.

28 Ca'an nácalle le'e. Cúzrela nala'le ca benne' xlátaje, na' lu lázrdaule nazrate na da węn lazre', ne da calela da dxunle.

29 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaje' waláz cheë Dios, ne dxuele lechítaje' lu'a cheë benne' xrlátaje ca'.

30 Dxennale: "Chela netu' ba zúantu' gate na' gulezrá' xra xrtauntu' ca', quebe gúcalentu' benne' ca' belutie' benne' ca' buluchálaje' waláz cheë Dios."

31 Gate dxennale ca', le'e dxexúnbeaquezle nácalle zri'ine zre sua benne' ca' belutie' benne' ca' buluchálaje' waláz cheë Dios.

32 Dxusexúzrele dxunle ca da gulezú lau belún xra xrtáule ca'.

33 'Bę snia nácalle, ne xrtia bę snia. ¿Ájazra gunle cheë gáchele lu da zi' da xa' cheë lataj ba xa'?

34 Cheë le' na' neda' sel-la' cheë benne' ca' xuluchálaje' waláz cheë Dios, ne benne' sina ca', ne benne' ca' xulusédenę' le'e. Lé'equze gútele, ne gudá'le

xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetú xezre.

<sup>35</sup> Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu bete Abel, benne' xrlátaje, ne naga bzrinte bétele Zacarías ládujla naga zua lataj lá'axza chee xudau' ne lataj naga dxuluzexē' bē xixre'du ca', bē dxelegú'e lu cugu chee Dios.

<sup>36</sup> Da li dxapa' le'e, bénneache zaj zre'e na'a xelebague' zria chee xúgute da caní.

*Jesús dxebezre' chee xezre Jerusalén  
(Lc. 13.34-35)*

<sup>37</sup> Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesel-la Dios naga zúale. Zane' lásate guca lazra' gutupa' zrí'inele chia', bē dxun bedxuj, dxutúpaba' be dxé'enedau' zran xrlába', san quebe guca lázrele.

<sup>38</sup> Le nna'xque na'a, lízrele xelexegá'ana na dácheze,

<sup>39</sup> lawe' da dxapa' le'e, québedxa lé'ele neda' cadxa zrin zra nnale: La'axza naca bénnea' zē'e waláz chee Xránadxu.

## 24

*Jesús dxenné' wabía xi' xudau'  
(Mr. 13.1-2; Lc. 21.5-6)*

<sup>1</sup> Nadxa bedxúaj Jesús xudau', na' dxácatē dxexedxúaje' na', gulebiga benne' ca' dxusédene' lau Jesús, ne gulezú lawe' dxuluchálajlene' Le' ca naca chee xudau' na'.

<sup>2</sup> Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzría cruzru ljwezre na. Ca naca na cuía xi na.

*Ca naca da xelunna bea na ba za zra bzebe  
(Mr. 13.3-23; Lc. 21.7-24; 17.22-24)*

<sup>3</sup> Nadxa xjaque' lu xi'a naga zaj zē xaga olivo, na' gate dxe' Jesús na', benne' ca' dxusédene' belezrine' lau Le', ne bagácheze buluchebe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

<sup>4</sup> Nadxa Jesús guzre' benne' ca':

—Le guxúe cuínale chee quebe nu si xē le'e.

<sup>5</sup> Benne' zan xelexé'e. Xelún lazre' xelenné' zaj naque' Cristo, na' xelexí xē'e benne' zan.

<sup>6</sup> Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe.

<sup>7</sup> Tu cue' xezr la xu tíl-lalē na xetú cue' xezr la xu, ne tu xezre tíl-lalē na xetú xezre. Wata' gubina', ne welata' xízrawē' ca', ne wazrú' gáteteze na'.

<sup>8</sup> Xúgute da caní zaj naca na naga dxezú lau ca da xelexaca bénneache.

<sup>9</sup> Nadxa xuludé' le'e naga si sácale, na' bál-lale welútequeze'. Ca naca bénneache xelexuídene' le'e lawe' da dxunle da naca chia'.

<sup>10</sup> Lu zra na' benne' zan québedxa xeléajle' chia', na' xelexuídene' le sa' ljwezre', ne xuludé' le sa' ljwezre' lu na' benne' guledábague' le'.

<sup>11</sup> Welelá' benne' zan benne' wēn lazre'. Xelenné' dxuluchálaje' waláz chee Dios, na' xelexí xē'e benne' zante.

<sup>12</sup> Lawe' da gáta'le'e da calēla, benne' zan québedxa xelezrí'ine' le sa' ljwezre'.

<sup>13</sup> Bénnea' zua chache' ca zrintę zra bzebe, la bénnea'.

<sup>14</sup> Ca naca dizra' chawe' nigá ca nna bea Dios, zralaj na du gabí'i xęzr la xu cheę xelén ca naca benne' cheę xúgute cue' xęzr la xu, na' te na' cheajsé cheę xęzr la xu nigá.

<sup>15</sup> Benne' gulabe' da nigá dxal-la' chėjni'ine'. Daniel, benne' bchálaje' waláz cheę Dios, bzuaaje' ca naca cheę tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa cheę xudau',

<sup>16</sup> nadxa benne' zaj zře'e xęzre ca' zaj nababa Judea dxal-la' xuluzrúnnuje', ne chjaque' lu xi'a zren.

<sup>17</sup> Che tu benne' ze' chju'u cheę, quebe dxal-la' xexétaje' bi cheajxeléaje' lu xu'u. Dخال-la' guzrúnnuje'.

<sup>18</sup> Benne' zue' le'e xixre' quebe dxal-la' xezrine' lizre' cheajxęzri'e xicha cheę da gácue'.

<sup>19</sup> Edxugúa nu'ula ca' zaj zře'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'.

<sup>20</sup> Le naba Dios quebe gun na ba xen guzrúnnuje beu' zaga, ne quegá lu zra dxupá'anale,

<sup>21</sup> lawe' da che ca' gaca na, na' da zręntędxa da xelezí saca bénneache ca da quebe ne xelezaque' ca guzú laute zua xęzr la xu nigá, ne québedxa bi xelezaque' caní ca te cheę da nigá.

<sup>22</sup> Che Dios quebe guzáchie' zra ca', na' netú quebe nu la. Guzáchie' na cheę gácalęne' benne' ca' bache nabéaje' cheę'.

<sup>23</sup> Cheę le' na', quebe chėjle che nu xę le'e: "Le nna'xque, nigá zua Cristo", u che nu xę le'e: "Le nna' xque, na'la zue'."

<sup>24</sup> Caní dxapa' le'e lawe' da xelelá' benne' zan, benne' guzrí xę'e, na' xelenné' zaj naque' Cristo, u zaj naque' benne' dxuluchálaje' waláz cheę Dios, na' da zrentę xululé'engé', ne xelunę' xel-la' waca zren ca' cheę xelezí xę'e benne' ca' ba nabéaj Dios. Caní xelunę' che xelezéquęe'.

<sup>25</sup> Ba bchálajęna' le'e caníque na'a quebe ne gaca na.

<sup>26</sup> Cheę le' na', che nu xę le'e: "Le nna'xque, na' zue' le'e xixre'", quebe chėjle na', u che nu xę le'e: "Le nna'xque, lu xu'u nigá zue'", quebe chėjle.

<sup>27</sup> Ca dxun tu xesa guziu', dxepe na naga dxalaj gubizra, na' dxelédxu na naga dxebía gubizra, ca'an gaca gate xida' neda', Benne' Gulje' Bénneache.

<sup>28</sup> Gátęte zę tu da nate, na' dxelexezraga laba ca'.

*Ca da gaca gate ba zua xelá' Benne' Gulje' Bénneache*

*(Mr. 13.24-37; Lc. 21.25-33; 17.26-30, 34-36)*

<sup>29</sup> Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelezrízequeze ca naca da zaj naca na szren da dxeledá' lu be'.

<sup>30</sup> Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bénneache zaj zře'e xęzr la xu xelebézrequeze'. Nadxa xelelé'engé' neda', Benne' Gulje' Bénneache, zezá'a lu beuj zran xabáa, zúale neda' dute xel-la' dxenná bea, ne da xabáa.

<sup>31</sup> Nadxa sél-laqueza' gubáz cheę xabáa chia' ca', na' xulucuézre' zizraj lúzuba' cheę xuluxutupe' benne' ca' ba nabéaja' chia' dapa saca cheę xęzr la xu nigá, ne du ca naca xęzr la xu nigá.

32 'Le gusede ca naca da dxulé'e xaga higo. Gate dxelexedxé'ene zruze na, ne dxezría na laga' dxe'ene, ba nézele ba za xaca beu' la.

33 Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na.

34 Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu zra na'.

35 Xabáa ne xezr la xu weledé chee na. Dizra' chia' quebe te chee na.

36 'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

37 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache.

38 Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawe', ne dxuluchaga ne'e, ne dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca.

39 Quebe guleque bé'ene' ca da dxal-la' gaca na, cadxa bzrin zra guca xiuj na', ne bete na ca naca benne' ca'. Cá'anqueze gaca gate xelá'a neda', Benne' Gulje' Bénneache.

40 Ca lu zra ca' xelezrá' chupa benne' biu le'e xixre'. Tue' xeché'e, na' xetúe' xegá'ane'.

41 Xelezrá' chupa nu'ula dxelútue'. Tue' xeché'e, na' xetúe' xegá'ane'.

42 'Le sua le'e ban lazre' lawe' da quebe nézele bi zra xelá'a neda', Xránale.

43 Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'.

44 Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

*Benne' wen zrin li lazre', ne benne' wen zrin quebe naque' li lazre'*  
(Lc. 12.41-48)

45 Na' gunná Jesús:

—¿Nuzra na' benne' wen zrin li lazre' ne dxéajni'ine', bénnea' xrane' dxucá'analene' le' benne' zaj zre'e lizre' chee gunézruje' da xelawe' gate zrin zra chee na?

46 Ba neza naca na chee benne' wen zrin na', gate xezrín xrane', lé'ene' le' dxune' ca naca da nabague'.

47 Da li dxapa' le'e, xrane' gucá'analene' le' ca naca da nape'.

48 Che benne' wen zrin na' gaque' benne' wen da caléla, ne guéquene' quebe xelá' ze xrane',

49 ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre',

50 nadxa xrane' xezrine' zra gate québela dxebeze'. Gaca na zra quebe nézene',

51 na' gusaca zi'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate' lazxe'.

## 25

*Da dxulé'e na ca naca chee chi nu'ula cuide'*

<sup>1</sup> Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'e xi' chee' ca', chee chjaque' laní chee wechaga na', dxelebeze' bátala xelá' benne' wechaga na'.

<sup>2</sup> Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'.

<sup>3</sup> Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegu'e lu xi' chee' ca'.

<sup>4</sup> Nu'ula ban lazre' ca' belú'e xi' chee' ca', ne da za zxezxe na da xelegu'e na.

<sup>5</sup> Lawe' da guzré benne' wechaga na', na' gulaca wase ca zaj naque', na' xúgute' gulasie'.

<sup>6</sup> Dxéla ben tu chi'i benne' dxebezre xe'e, dxenné': "Ba za' wechaga na'. Le dxuaj si' lu na'le le'."

<sup>7</sup> Xúgute nu'ula cuide' caní gulase', na' gulezú lawe' bulugale' xi' chee' ca'.

<sup>8</sup> Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelexula xi' cheentu'."

<sup>9</sup> Nu'ula ban lazre' ca' belexechebe': "Quebe gaca, lawe' da che gúnnantu' late' chee, quebe gaca na da dxechínnentu' netu', ne da dxechínnele le'e. Le chjácala naga dxutie' na, ne le cheajxri' chee."

<sup>10</sup> Dxácaté zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee wechaga na', na' bsezxuj dxa xu'u na'.

<sup>11</sup> Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'!"

<sup>12</sup> Le' bechebe': "Cabata'. Da líqueze quebe núnbe'a le'e."

<sup>13</sup> Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

### *Da dxulé'e na ca naca chee benne' gulezú'e dumí*

<sup>14</sup> Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wēn zrin chee' ca', ne bcá'analēnē' bi wēn zrin ca' dumí chee'.

<sup>15</sup> "Tu bi ca' bnéruzje' gazxu' cue' dumí, na' xetube' bnéruzje' chupa cue' dumí, na' xetube' bnéruzje' tu cue' dumí. Bnéruzje' chee tu tube' ca da xelezéquebe' xuluchínebe' na. Nadxa guz'é'e zéaje' zitu'."

<sup>16</sup> Bi wēn zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí.

<sup>17</sup> Cá'anqueze bi wēn zrin na' guzi'be' chupa cue' dumí, bezi'be' xechupa cue' dumí.

<sup>18</sup> Bi wēn zrin na' guzi'be' tu cue' dumí na' guxíajbe', ne bcáchebe' dumí chee xránabe' tu lu xēdxu da bēnbe' lu xu.

<sup>19</sup> Zane' iza ba guca gate bezrín xrane bi wēn zrin ca', na' guzú lawe' dxezi'e da bde'e lu na' bi wēn zrin ca'.

<sup>20</sup> Nedxu bzrin bi wēn zrin na' guzi'be' gazxu' cue' dumí, na' bnéruzje' xránabe' xegazxu' cue' dumí, na' gúzrebe' le': "Xran, bēnnu' neda' gazxu' cue' dumí. Nigá de xegazxu' cue' da bezi'a nen dumí chiu'."



<sup>21</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubéle'e."

<sup>22</sup> Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de xechupa cue' da bezi'a nen dumí chiu'."

<sup>23</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubéle'e."

<sup>24</sup> Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'."

<sup>25</sup> Chee le na' bzreba', na' guxá'a xeajcáchia' dumí chiu' lu xu. Nigá de da naca chiu'."

<sup>26</sup> Na' xránabe' guzre' lebe': "Nacu' bi wen zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'."

<sup>27</sup> Chee le na' la xju'u dumí chia' na' lu na' benne' dxelízruje' chee dumí da dxuluchínene', na' gate za' neda', na' xezi'a da naca chia' nen da belezi'e."

<sup>28</sup> Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bénnea' nape' chi cue' dumí."

<sup>29</sup> Benne' nape' wazidxe' da zrendxa, na' benne' quebe nape', ca late' da du na' nape' wecá'a na."

<sup>30</sup> Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'atę lázxabe'."

### *Ca gun Dios gate guchi'e chee bénneache zaj zre'e xezr la xu*

<sup>31</sup> Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa.

<sup>32</sup> Na' bénneache chee xúgute cue' xezr la xu xelexezrague' lawa' neda', na' xebéaja' cha chee' ca dxun benne' dxuxúe' zrila'. xebéaje' chíbudu ca' ládujla zrila' ca'."

<sup>33</sup> Guzrá'a benne' ca' zaj naca zrila' chia' chalá'a xabęla chia', na' benne' ca' zaj naca ca chíbudu ca' guzrá'a le' chalá'a xęglala chia'."

<sup>34</sup> Nadxa xapa' benne' ca' zaj zra' chalá'a xabęla chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' bene' xezr la xu nigá."

<sup>35</sup> Caní dxaca lawe' da guduna', na' bgágule neda'. Gubíleda', na' bėnnale da gu'a. Gudá' ca tu benne' xu'e neza, na' gulú'u'le neda' lızrele.

<sup>36</sup> Bxázrjeda' zra lana' gácua', na' bgácule neda'. Quebe chawe' guzúa', na' bedajnába le neda'. Guxu'a lızre xia, na' bedajnába le neda'."

<sup>37</sup> Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxeбіlenu', na' bėnnantu' da gu'u?"

<sup>38</sup> ¿Bata blé'entu' Lue' ca tu benne' xu'e neza, na' gulú'untu' Lue' lızrentu'? ¿Bata blé'entu' Lue' dxexázrjenu' zra lanu', na' bgácuntu' Lue'?"

<sup>39</sup> ¿Bata bėnentu' quebe chawe' zu', u xu'u lızre xia, na' bedajnábantu' Lue'?"

<sup>40</sup> Neda' xechęba': Da li dxapa' le'e, ca da benle chee bėnnedu caní, benne' zaj naca dxexruj lazre', chee néda'queza' benle ca'."

41 'Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wən da calela lau Xra'. Le chjaca lu xi' chee' lataj ba xa' da nabeza na chee' da xriwe', ne chee' gubáz chee' na ca'.

42 Caní dxaca lawe' da guduna', na' le'e quebe bənnale da gawa'. Gubíleda', na' quebe bənnale da xí'aja'.

43 Gudá' ca tu benne' xu'e neza, na' quebe gulu'ule neda' lízrele. Bxázzreda' zra lana' gacua', na' quebe bgáculé neda'. Quebe chawe' guzú'a' ne guxu'a' lízre xia, na' quebe bedajná bale neda'.

44 Nadxa benne' ca' xeléqueze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexázzrenu' zra lanu', u quebe chawe' zu', u xu'u lízre xia, na' quebe gúcalentu' Lue'?"

45 Neda', benne' wenná bea, xechəba': Da li dxapa' le'e, lawe' da quebe bi bənle chee' bənnedu caní, benne' zaj naca dxexruj lazre', quebe bi bənle chee' nédá'queza'.

46 Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

## 26

### *Dxelílaje' ájala xelele' Jesús*

(Mr. 14.1-2; Lc. 22.1-2; Jn. 11.45-53)

1 Gate bexuzre bchalaj Jesús caní, na' guzre' benne' ca' dxusédene':

2 —Ca ba nézqueze, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bənneache chee' lu xəzr la xu Egipto, na' neda', Benne' Gulje' Bənneache, xuludé' neda' lu na' benne' xuludé'e neda' xaga bəguaj.

3 Ca lu zra na' benne' xíchaje ca' chee' bxruze ca', ne benne' dxuluxuzájle'e da bdxixruj Moisés, ne benne' gula sina ca' chee' judío ca', belezrague' chale'aj chee' xu'u zaca chee' Caifás, bxruze blau.

4 Na' belílaje' ájala xelele' Jesús lu da wən lazre' chee' xelútié' Le'.

5 Gulenné':

—Quebe gundxu na lu zra laní nigá, chee' quebe xeledábaga benne' ca' dxi'u.

### *Tu nu'ula dxegu'e Jesús da dxelá zixre*

(Mr. 14.3-9; Jn. 12.1-8)

6 Zua Jesús xəzre Betania lízre Simón, bənnea' güé'eng' wə' guzru'.

7 Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e na xichaj Jesús.

8 Gate belelé'e benne' ca' dxusede Jesús da nigá, na' belezré'e, ne gulezú lawe' dxelenné':

—¿Bizr chee' na' guzría xi' da nigá?

9 Da nigá waca la gudá'u na sí'adxu da zrente, chee' gácaledxu benne' xache' ca'.

10 Jesús bənne' da nigá, na' guzre' benne' ca':

—¿Bizr chee' na' dxunle nu'ula nigá zede? Da nigá bəne' naca na tu da xrlátaje.

11 Benne' xache' ca' tu zrázqueze' ládujla le'e, na' neda' quegá tu súaleza' le'e.

12 Ca naca da bən nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee' zra gachia' lu xedxu ba.

<sup>13</sup> Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zrálajqueze ca da ben nu'ula nigá, chee cheajlesá lazre' bèneache le'.

*Judas dxechebe lazre' gudé' Jesús*  
(Mr. 14.10-11; Lc. 22.3-6)

<sup>14</sup> Nadxa tu benne' chazrinnu ca' dxuséde Jesús, bènea' le' Judas Iscariote, guxíaje' xeajchálajlene' benne' xíchaje ca' chee bxruze ca'.

<sup>15</sup> Guzre' le':

—¿Ájate gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata.

<sup>16</sup> Ca lu zra na' guzú lau Judas dxexílaje' ájala guné' gudé' Jesús lu na' benne' ca'.

*Da dxágudxu chee xucúbedxu ca guca gate gute Xránadxu*  
(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxuséde Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

<sup>18</sup> Jesús guzre' le':

—Le chjaca lu xezre na', naga zua lizre tu benne', na' le xe'e: “Bennea' dxusédene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'.”

<sup>19</sup> Benne' ca' dxuséde Jesús belune' ca da gunná bé'ene' le', na' bulucueze' da xelawe' chee Laní Pascua.

<sup>20</sup> Gate gula chizrela, na' gudxé' Jesús ga gawe' tu zren nen benne' ca' dxusédene'.

<sup>21</sup> Dxácaté na' dxelawe', guzre Jesús benne' ca':

—Da li dxapa' le'e, tule le'e naca bènea' gudé' neda' lu na' benne' ca' dxelune' da calela.

<sup>22</sup> Nadxa benne' ca' belexewí'inele'e, na' gulezú lawe' tu tue' dxuluchebe' Jesús:

—Xran, ¿quebe naca neda'?

<sup>23</sup> Na' bechebe Jesús:

—Bènea' dxudé ne'e lu xé'ena tu zren nen neda', benne' na' gudé' neda'.

<sup>24</sup> Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bènea' gudé' neda'. Cháwedxa naca la quebe gulaj bènea'.

<sup>25</sup> Nadxa gunná Judas, bènea' gudé' Jesús, dxenné':

—Benne' dxuséde, ¿quebe naca neda'?

Na' bechebe Jesús, gunné':

—Awe', lue' na'.

<sup>26</sup> Dxácaté dxelawe', Jesús guqué'e xeta xtila, na' guzre' Dios: “Xcalenu'.” Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na bel-la' dxen chia'.

<sup>27</sup> Gudé na' guqué'e tu zriga', na' guzre' Dios: “Xcalenu'”, na' bnézruje' na benne' ca', dxenné':

—Le xi'aj xúgutele da xuzru lu zriga' nigá.

28 Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunite lau Dios dul-la zaj nabaga benne' ca'.

29 Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

*Jesús dxenné' nna Pedro quebe núnbe'e Le'*  
(Mr. 14.26-31; Lc. 22.31-34; Jn. 13.36-38)

30 Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'.

31 Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínnajba'."

32 Gate te xebana' neda', cha'a neda' ga nababa Galilea nédxudxa ca le'e.

33 Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

34 Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

35 Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

*Jesús dxuchálajlene' Dios naga zaj zxe' xaga olivo ca' nazí le na Getsemaní*  
(Mr. 14.32-42; Lc. 22.39-46)

36 Nadxa bzrin Jesús nen benne' ca' dxusedene' tu lataj nazí le na Getsemaní, na' guzre' le':

—Le cue'e nigá dxacate cha'a neda', guchálajlene' Dios.

37 Jesús guché'e Pedro, ne dxúpaté zri'ine Zebedeo, na' guzú lawe' bewí'inele'ene' ne guzúale'e stebe.

38 Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

39 Nadxa Jesús guzre' zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

40 Nadxa bezrín Jesús naga zaj zra' benne' ca' dxusedene', na' blé'ene' benne' ca' dxelásie', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze?

41 Le nnaze, ne le guchálajle Dios chee quebe gun zréaje da xriwe' le'e. Da li béenne' du xu'ule dxaca lázre'le'e na, san lu belá' dxen chee dxate ní'a na'le.

42 Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

43 Ca gudé na' bezrine', ne belé'ene' benne' ca' dxusedene', dxelásie' lawe' da ba dxelezrude' lawe' dxelaca wásele'e.

44 Bca'ané' benne' ca', guzre' zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache.

45 Nadxa bezrine' naga zaj zra' benne' ca' dxusedene', na' guzre' le':

—Le gase na'a, ne le xezí' lazre'. Ba bzrin zra gate neda', Benne' Gulje' Bénneache, tea' lu na' benne' dul-la ca'.

<sup>46</sup> Le chasa, ne le chu'u. Ba za bénnea' dxudé'e' neda'.

*Dxeleché'e Jesús ca tu benne' wen da zrinnaj*

(Mr. 14.43-50; Lc. 22.47-53; Jn. 18.2-11)

<sup>47</sup> Ne dxuchálajte Jesús na' gate bzrin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchajé ca' chee bxrúze ca', ne benne' gula sina ca' chee judío ca'.

<sup>48</sup> Judas, bénnea' dxudé'e' Jesús, ba blé'eng' benne' ca' ca tu da gune' da gulé'e na nu na' naca Jesús. Gunné':

—Bénnea' gunupa' neda', Le' na'. Le che'e ca tu benne' wen da zrinnaj.

<sup>49</sup> Nadxa bzrin Judas lau Jesús, dxenné':

—Diuzre, Benne' dxusede.

Na' bnupé' Jesús.

<sup>50</sup> Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

<sup>51</sup> Tu benne' ca' dxusede Jesús guléajé' xia chee', ne guchugue' chalá'a naga bi wen zrin chee bxrúze blau.

<sup>52</sup> Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'.

<sup>53</sup> ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee xabáa, zaj naque' zánete tu tu cue'?

<sup>54</sup> Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

<sup>55</sup> Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusededa' le'e, ne quebe gudélale neda'.

<sup>56</sup> Xúgute da caní dxaca na chee gaca na ca da gulenná benne' ca' bu-luchálajé' waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bulucá'ane' Le' tuzé', buluxu-zrúnnuje'.

*Dxezrín Jesús lau benne' ca' chee xu'u lawe' blau chee judío ca'*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Benne' ca' gulele' Jesús guleché'e Le' lau Caifás, bxrúze blau, ga na' zaj nazraga benne' ca' dxuluxuzájle'e da bdxiruj be'e Moisés, nen benne' gula sina ca'.

<sup>58</sup> Pedro zéaje nawé' Jesús zítu'la, na' bzrine' chale'aj chee lize bxrúze blau, na' guxú'e, ne gudxé'e tu zren nen bi xa'aga chee lé'eng' ájala xexuzre da dxaca na'.

<sup>59</sup> Benne' xíchajé ca' chee bxrúze ca', ne benne' gula sina ca', ne xúgute benne' ca' chee xu'u lawe' blau chee judío ca' belilajé' ájala xuluzría xi'e Jesús, lálala naca na da wen lazre', chee xelezéqueng' xuludé'e Le' gatié'.

<sup>60</sup> Quebe bi belezrelne', lálala belezrín benne' zan benne' gulenné' da wen lazre' chee Jesús. Naga xaajsete na belezrín chupa benne' wen lazre'.

<sup>61</sup> Dxelenné':

—Benne' nigá gunné': "Wazéqueda' neda' guchínnaja' xudau' chee Dios, na' xexuna' na lawe' chunna zraze."

<sup>62</sup> Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

<sup>63</sup> Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

<sup>64</sup> Jesús guzre' le':

—Nácaqueza' ca dxenná' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chala'a xabēla chee Dios nen xel-la' szren chee', na' xelá'a lu beuj bza chee xabáa.

<sup>65</sup> Nadxa bxruze blau gucheze' zra lanē' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechēbe'? Ba bēnqueze le'e ca dizra' schanni' dxenné'.

<sup>66</sup> ¿Bi dxennale le'e?

Benne' ca' gulenné':

—Nabague' zria, ne dxal-la' gatie'.

<sup>67</sup> Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'.

<sup>68</sup> Na' gulé'e Le':

—¿Nácaquezu' Lue' Cristo? Gunné xa'a nu be Lue'.

### *Dxenná Pedro quebe núnbe'e Jesús*

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Dxácatē na' dxe' Pedro chalé'ajla, na' tu nu'ula wēn zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

<sup>70</sup> Pedro bēn chúchuē' xrtizre' lāwela xúgute benne' ca', gunné':

—Quebe nezda' nu chee na' dxenníu'.

<sup>71</sup> Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'anqueze benne' nigá dxedálēne' Jesús, benne' Nazaret na'.

<sup>72</sup> Xecha lasa bēn chúchuē' Pedro xrtizre', na' bzétaje' Dios, gunné':

—Quebe núnbe'a benne' na'.

<sup>73</sup> Xetú chí'idau' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bēnnea' lawe' da xel-la' dxenné' chiu' dxunna bea na lue'.

<sup>74</sup> Nadxa guzú lau Pedro dxuzrí xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatē na' gudxezre xjeaj.

<sup>75</sup> Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wanná' chunna lasa quebe núnbe'u neda'. Bedxúaj Pedro na', na' gudxézrele'e.

1 Gate guxaní', xúgute benne' xíchaje ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee xelúti'e Jesús.

2 Nadxa beleché'e Le' nadxéaje', ne xeajlegu'e Le' lau Poncio Pilato, benne' dxenná be'e waláz chee xezr la xu Roma.

### *Ca guca gate gute Judas*

3 Nadxa Judas, bēneea' bde'e' Jesús, gate guque bé'ene' ba buluzría xi'e Jesús, bexíajele'e'ene', na' bunézruje' da chi dxua dumí plata lau benne' xíchaje ca' chee bxruze ca', ne benne' gula sina ca'.

4 Dxe'e le':

—Neda' bēna' dul-la lawe' da bdea' tu benne' naque' du lazre' chee gati'e.

Belexechebe benne' xíchaje ca':

—¿Bizra naca cheentu' da nigá? Chiu' lue' naca da na'.

5 Nadxa Judas buzale' dumí na' lu xudau', ne bezé'e, na' xeajxelú'u du lbe'e.

6 Benne' xíchaje ca' chee bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

7 Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'.

8 Chee le na nazí le xezr la xu na' Xezr La Xu Chee Dxen ca lu zra na'a zra.

9 Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequé'e chi dxua dumí plata da naca na da zaca Le' da buluzúa benne' Israel.

10 Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

### *Dxezrín Jesús lau Pilato*

*(Mr. 15.2-5; Lc. 23.3-5; Jn. 18.33-38)*

11 Guleché'e Jesús lau bēneea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

12 Gate benne' xíchaje ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechebe'.

13 Nadxa gunná Pilato, dxe'e Jesús:

—¿Quebe dxennu' ca da dxelenná benne' caní chiu'?

14 Jesús quebe bi bechebe'. Ca'an guca bebanne bēneea', ne quebe bezrela lazre' ájala nne'.

### *Dxelechugue' chee Jesús gati'e*

*(Mr. 15.6-20; Lc. 23.13-25; Jn. 18.38—19.16)*

15 Gate dxu'u laní na', bēneea' dxenná be'e na' xu'u lawe' dxusane' tu benne' wen da zrinnaj, nüteteze benne' dxelaca lazre' benne' ca'.

16 Ca lu zra na' xu'u tu benne' lizre xia, benne' wénle'e da zrinnaj, nazí le' Barrabás.

17 Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bēneea' le' Cristo?

18 Caní gunné' lawe' da ba nézene' buludé'e Jesús lawe' le' lawe' da dxe-laque' xa lazre' chee Jesús.

19 Dxácatē na' dxe' Pilato naga dxuchi'e chee bēnneache, na' zru'ulē' gusel' le' tu benne' xeajezre' Pilato: "Quebe guchixre chiu' da naca chee benne' xrlátaje na', lawe' da guneda' xēla ba dxēle, da bzúalē'e na neda' stebe ne chee Le'."

20 Benne' xíchajē ca' chee bxruze ca', ne benne' gula sina ca' belegú'u xelē' benne' ca' chee xelenabē' la Barrabás, ne gate Jesús.

21 Bēnnea' dxenná be'e bchálajlēne' benne' ca' xecha lasa. Buchēbē' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

22 Pilato bchebē' benne' ca':

—¿Bizra guná chee Jesús, benne' le' Cristo?

Xúgute' belexechebē':

—Bdē'e xaga béguaj.

23 Nadxa gunná Pilato, dxē'e benne' ca':

—¿Bizra da calela nune'?

Benne' ca' gulezú lawē' dxelebezre xē'e, gulenné':

—Bdē'e xaga béguaj. Bdē'e xaga béguaj.

24 Gate Pilato guque bé'ene' quebe bi séquene', na' benne' zan ca' dxeledábaguē' le', na' gunná bé'ene' bla' nisa, na' gudibe ne'e lávela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

25 Xúgute' benne' ca' belexechebē':

—Netu', ne zrí'inentu' nabáantu' ca naca chee xel-la' gute chee'.

26 Nadxa Pilato bsane' Barrabás, ne gunná bé'ene' beleché'e Jesús chee xelu'e Le', na' bdeē' Le' chee tē'e xaga béguaj.

27 Nadxa benne' dxjaque' wedil-la chee bēnnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga zē Jesús.

28 Belequē'e zra lanē', ne bulugácuē' Le' tu ladxe' bzawe.

29 Buluzú'e xíchajē' tu da naca na zruze xaga xeche', ne buluguxre' Le' tu xaga ne'e xabēla. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

30 Cá'anqueze buluzré'e Le' zrene', na' gulequē'e xaga da nuxru Jesús, ne guline' na xíchajē'.

31 Ca gudé belún le' chee Jesús, na' belexegüē' ladxe' bzawe, na' buluxugácuē' Le' zra lánaqueze'. Nadxa beleché'e Le' chee tē'e xaga béguaj.

### *Dxuludé'e Jesús xaga béguaj*

*(Mr. 15.21-32; Lc. 23.26-43; Jn. 19.17-27)*

32 Ca gusiá'que' na', belexezraguē' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

33 Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate.

34 Na' bulunézruje' da xí'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

35 Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da



gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na."

<sup>36</sup> Nadxa gulebé'e dxuluzuzre' Jesús.

<sup>37</sup> Buluzri'e xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

<sup>38</sup> Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús.

<sup>39</sup> Benne' dxeledé'e na' dxelún le' chee Jesús. Dxulutá xíchaje',

<sup>40</sup> ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

<sup>41</sup> Cá'anqueze belún la chee' benne' xíchaje' ca' chee bxruze ca', ne benne' dxuluzuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

<sup>42</sup> —Bselé' benne' xula, san quebe dxezéquené' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'.

<sup>43</sup> Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

<sup>44</sup> Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

### *Ca guca gate gute Jesús*

*(Mr. 15.33-41; Lc. 23.44-49; Jn. 19.28-30)*

<sup>45</sup> Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna.

<sup>46</sup> La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

<sup>47</sup> Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup> Dxácaté na' guzá' chegu tu benne' ca', xeajxri'e tu da dxezrupe nisa, na' ca bsebise' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na.

<sup>49</sup> Benne' xezica ca' gulenné':

—Le guxúe xca'. Quebe gunu' ca'. Nná'xqedxu che wida Elías guselé' Le'.

<sup>50</sup> Xecha lasa gudxezre xa'a Jesús, na' gutie'.

<sup>51</sup> Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dx'e'ela. Guzrú' xezr la xu, na' xiaj xre ca' gulúzruqueze na.

<sup>52</sup> Gulexalaj ba, na' belexebán benne' gate ca', benne' guléajle'e da naca chee Dios.

<sup>53</sup> Ca gudé bebán Jesús, na' benne' caní belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

<sup>54</sup> Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an gulaca, na' belezrébele'e, dxelenné':

—Da lítegaze benne' nigá guque' Zri'ine Dios.

<sup>55</sup> Nu'ula zan zaj zře'ę na' dxelennę'ę zítu'la, nu'ula ca' xjácáleņe' Jesús gate bezé'ę ga nababa Galilea, ne gulácalequeze' Le'.

<sup>56</sup> Ládujla nu'ula ca' xu'u María Magdalena, ne María xrna Jacobo ne José, ne xrna zři'ine Zebedeo ca'.

*Dxulucache' Jesús lu xedxu ba  
(Mr. 15.42-47; Lc. 23.50-56; Jn. 19.38-42)*

<sup>57</sup> Ca guzú lau dxaca waxrinne, na' bla' tu benne' gunní'a le' José, benne' xęzre Arimatea, benne' dxéajlequeze' cheę Jesús.

<sup>58</sup> Benne' nigá guxíaje' xeajchálajleņe' Pilato, na' benabe' bel-la' dxen cheę Jesús. Pilato gunná bé'ene' xulunézruje' le' bel-la' dxen na'.

<sup>59</sup> Nadxa José bequé'ę bel-la' dxen na', na' bchele' na tu ladxe' da naxadxę.

<sup>60</sup> Nadxa gulu'ę Le' lu ba da naca na cheéqueze José na', da bęne' tu lu xiaj. Gulexřúe' tu xiaj blaga zren dxu'a ba cheę Jesús, na' bezé'ę ga na'.

<sup>61</sup> Gulezrá' María Magdalena, ne xetú María, zaj dxe'ę le nna' dxu'a ba na'.

*Dxulubia dxuluxue' ba cheę Jesús*

<sup>62</sup> Zeaj zra xula, da naca na zra ca gudé zra bulucueze', na' benne' xíchaje ca' cheę bxruze ca', ne benne' xudau' fariseo ca' belezřine' lau Pilato.

<sup>63</sup> Dxelé'ę le':

—Xran, dxeajsá lázrentu' ca naca da gunná benne' wen lazre' na' gate na' zuę'. Gunné' gate gaca chunna zra, na' xebane' ládujla benne' gate.

<sup>64</sup> Cheę le' na', bdixřuj be'ene' benne' ca' xulubia xuluxue' ba cheę' na' cadxa gaca chunna zra, cheę quebe xelexlá' benne' ca' bsédenę' xeda-jlexebéaje' bel-la' dxen na' chizřela, na' te na' xuluzenne' bėnneache ba bebane' ládujla benne' gate. Che ca'an gaca, na' dizra' wen lazre' bžebe nigá gun na da zřinnaj zřendxa ca da nedxu.

<sup>65</sup> Pilato guzře' benne' ca':

—Na' zaj zra' benne' dxjaque' wedil-la xuluzuzře' na. Le chjaca le'e, ne le guxúe xanne' ba na' ca se lau séquele.

<sup>66</sup> Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

## 28

*Ca guca gate bebán Jesús  
(Mr. 16.1-8; Lc. 24.1-12; Jn. 20.1-10)*

<sup>1</sup> Ca gudé cheę zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlennę'ę ba cheę Jesús.

<sup>2</sup> Chadite guzřú'le'ę na lawe' da betaj tu gubáz cheę xabáa cheę Xránadxu, na' bzřine' dxu'a ba na', ne bequé'ę xíajta'a zren na' da zrua na dxu'a ba na', na' gudxé'ę lawe na.

<sup>3</sup> Gubáz na' dxácatite legale', ne naca chiche zra lanę' ca bezxe'.

<sup>4</sup> Gate belelé'e benne' dxjaque' wedil-la gubáz cheę xabáa na', na' belezřizene' xel-la' dxelezrebe, ne belexegá'ane' ca benne' gate ca'.

<sup>5</sup> Nadxa gunná gubáz cheę xabáa na', dxę'ę nu'ula ca':

—Quebe zřébele. Nezda' dxexilajle Jesús, bėnnea' gudé'ę xaga bėguaj.

<sup>6</sup> Quebe zuę' nigá lawe' da ba bebane', cáteze na' gunné'. Le da nna'le lu ba naga gulegú'ę Le'.

<sup>7</sup> Le cheajxáquezega, le cheajezre benne' ca' bsédene' ba bebane' ládujla benne' gate, na' chéaje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

<sup>8</sup> Nadxa nu'ula ca' besiá'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguezre' benne' ca' bsede Jesús.

<sup>9</sup> Dxácatē na' Jesús bhague' nu'ula ca', ne bgape' le' diuzre. Belezrine' lau Jesús, dxelúe lá'ang' Le', ne bulunide' ni'a Jesús.

<sup>10</sup> Le' guzre' nu'ula ca':

—Quebe zrébele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

*Ca da gulenná benne' dxjaque' wedil-la*

<sup>11</sup> Dxácatē zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje' ca' chee' bxruze ca' ca da guca.

<sup>12</sup> Benne' xíchaje' ca' buluchálajlene' benne' gula sina ca' chee' xelune' tuze dízra'. Nadxa bulunézruje' benne' dxjaque' wedil-la dumí zrente'.

<sup>13</sup> Dxelenné':

—Le nna le'e beledá' benne' ca' bsede Jesús na' chizrela, dxácatē dxásele le'e, na' belexexú'e bel-la' dxen chee'.

<sup>14</sup> Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee' quebe bi gaca cheele le'e.

<sup>15</sup> Nadxa benne' dxjaque' wedil-la gulezí' lu ne'e dumí na', na' besiá'que' belune' ca bache zaj nézene'. Da nigá naca na ca dxelenná judío ca' zéajte lu zra na'a zra.

*Jesús dxesel-le' benne' gubáz chee' ca'*

*(Mr. 16.14-18; Lc. 24.36-49; Jn. 20.19-23)*

<sup>16</sup> Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'.

<sup>17</sup> Gate beledé'ene' Jesús, na' bulucá'ana szrene' Le'. Bal-le' gulaca chupa lazre'.

<sup>18</sup> Nadxa Jesús gubigue' naga zaj zra' benne' ca', na' guzre' le':

—Neda' ba nazi' lu na'a ca naca xel-la' dxenná bea xabáa, ne lu xezr la xu nigá.

<sup>19</sup> Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa.

<sup>20</sup> Le guséde-ne' xelaque' wezúa dízra' ca naca da ba gunná be'eda' le'e, na' neda' tu súalezqueza' le'e xúgute' zra cadxa cheajse' chee' xezr la xu nigá. ¡Ca'an gaca na!

## DIZRA' CHAWÉ' CA NACA CHEE JESUCRISTO DA BZUAJ SAN MARCOS

*Da bchalaj Juan, benne' bchue' bénneache nisa*

*(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Caní guzú lau dizra' chawé' ca naca chee Jesucristo, Zri'ine Dios.

<sup>2</sup> Bzrin lazre' da bzuaj Isaías, benne' bchálaje' waláz chee Dios, ca da gunná Dios:

jLe nna'xque nigá!

Neda' dxesel-la' benne' gubáz chia', benne' cuía lawé' lau Lue'.

Bénnea' gupé'e neza naga teu' chee ilúnbe'e bénneache Lue'.

<sup>3</sup> Welénqueze chi'i benne' dxebezre xé'e le'e xixre' lawe' lataj.

Dxenné': "Le gupá'a neza naga te Xránadxu lu xichaj lázrdaule.

Le xebéaj li neza lase chee' ca'."

<sup>4</sup> Caní guca lawe' da bla' Juan le'e xixre' lawe' lataj, na' bchálaje' dizra' chee Dios, ne gunné' dxal-la' xeledxúa bénneache nisa, na' bchué' le' nisa, benne' ca' belexebí'i lazre' chee gunite lau Dios dul-la da zaj nabague'.

<sup>5</sup> Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchué' benne' ca' nisa lu xegu Jordán, benne' ca' gulexrúalepe' dul-la da zaj nabague'.

<sup>6</sup> Caní guca zra lana Juan. Gucue' zra lane' ladxe' xicha zra camello, bia dxelebía bénneache, ne tu xpádxue' xide bchela le'e. Dxawé' biche xuaj, ne dxé'aje' bzrina'dau' chee bézudau'.

<sup>7</sup> Ca dxuchálaje' dizra' chee Dios, dxenné':

—Gate te chia' neda', na' xida xetú benne', bénnea' nápadxe' xel-la dxenná bea ca neda'. Quebe naca chia' xáchua' chee lechja' zrelé'.

<sup>8</sup> Da lítega, neda' bchua' le'e nisa. Le' gune' da zéaje xel-la dxedxúa nisa nigá, guzúe' Be' Lá'azxa lu xichaj lázrdaule.

*Ca da guca gate gudxúa Jesús nisa*

*(Mt. 3.13-17; Lc. 3.21-22)*

<sup>9</sup> Ca da guca lu zra ca', guzá' Jesús lu xezre Nazaret chee ga nababa Galilea, na' bzrine' lau Juan. Juan nigá bchué' Jesús nisa lu xegu Jordán.

<sup>10</sup> Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxulé'e lawé' ca tu bgúgudu chiche, na' bzrine' ca li xichaj Jesús.

<sup>11</sup> Ben tu chi'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázreleda' Lue'.

*Dxaca lazre' Satanás da xriwe' gun ga бага Jesús dul-la*

*(Mt. 4.1-11; Lc. 4.1-13)*

<sup>12</sup> Nadxa Be' Lá'azxa guché'e Jesús le'e xixre' lawe' lataj.

<sup>13</sup> Guzúa Jesús le'e xixre' lawe' lataj chua zra chua xela. Na' bzrin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalene' Jesús.

*Jesús dxezú lawé' dxusédené' bénneache*

*(Mt. 4.12-17; Lc. 4.14-15)*

<sup>14</sup> Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajlene' bénneache dizra' chawé' ca dxenná bea Dios.

15 Gunná Jesús:

—Ba bzin zra. Ba zua báguze gate nna bea Dios xezr la xu nigá. Chee le na', le xebí'i lazre', ne le cheajlí lazre' dizra' chawe' nigá.

*Dxenné Jesús tapa benne' wezén bela chee xelaque Le' tuze*  
(Mt. 4.18-22; Lc. 5.1-11)

16 Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale' xixruj bela chee' lu nísadau' lawe' da zaj naque' wezén bela.

17 Na' gunná Jesús:

—Le gun neda' tuze, na' guzúa' le'e gácale wen zrin chia'. Cheajxrile bénneache da dxunle dxezenle bela.

18 La bulucá' anate' xixruj chee' ca', na' zjácalene' Jesús.

19 Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexune' xixruj bela chee' ca'.

20 Ca gunné Jesús Jacobo, ne Juan, na' la bulucá' anate' xre' Zebedeo ne wen zrin chie' ca' zaj zre'e lu da dxedá lawe' nísadau', na' zjácalene' Jesús.

*Tu benne' xu'e be' xriwe'*  
(Lc. 4.31-37)

21 Gate gul-la na gulu'e lu xezre Capernaum, na' gate bzin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédené' benne' ca' zaj zre'e na'.

22 Belexebáne' ca naca da dxusede Jesús le' lawe' da dxuchálaje' nen duté xel-la dxenná bea, ne quegá ca dxuluchalaj benne' ca' dxuluxuzájl'e da nadixruj bea Dios.

23 Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bénnea'.

24 Gunná na:

—¿Bizra ná pantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee Dios nacu'.

25 Jesús gudil-le' na, gunné':

—Zrize guzúa. Bedxúaj lu bel-la' dxen chee benne' nigá.

26 Nadxa be' xriwe' na' bxrízele'e na bénnea', ne gudxezre xá'ale'e na, na' bedxúaj na.

27 Belexebánele'e xúgute benne' zaj zre'e na', dxelé ljwezre':

—¿Bizra dizra' cube da nigá? Duté xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

28 La bziríujté dizra' chee xel-la waca chee Jesús du ca naca xezre ca' zaj nababa Galilea.

*Jesús dxexune' xrna' zru'ula Pedro*  
(Mt. 8.14-15; Lc. 4.38-39)

29 Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren.

30 Lu xu'u na' de xrna' zru'ula Simón, xu'e da la. La buluchálajlete' Jesús ca dxaca chee nu'ula nigá.

31 Le' la béxroute' ne'e, bechise' le'. La bedxúajté da la da xu'e, na' bseni'e da gulawe'.

*Jesús dxexune' bénneache zan*  
(Mt. 8.16-17; Lc. 4.40-41)

<sup>32</sup> Ca gula guzré zra na', ca guzría gubizra, na' guleché'e xúgute benne' wé' lau Jesús, ne benne' ca' zaj xu'e be' xriwé'.

<sup>33</sup> Ca naca benne' xezre gulebigue' dxa xu'u naga zua Jesús.

<sup>34</sup> Jesús bexune' zánete benne' wé' ca zaj naca xízrawe' da xu'u tu tue', ne bebéaje' zane' be' xriwé' zaj xu'u bénneache ca'. Quebe be'e lataj be' xriwé' ca' xelenne' na lawe' da zaj núnbea na Le'.

*Dxuchalaj Jesús lau bénneache zaj zré'e Galilea*  
(Lc. 4.42-44)

<sup>35</sup> Ca bebán Jesús bál-lala, ne nachúl-late, bedxúaje' guzé'e zéaje' tu lataj naga nadache' bénneache, na' bchálajlene' Dios.

<sup>36</sup> Simón Pedro, ne benne' ca' zaj zrálene' le' belexexilaje' Jesús.

<sup>37</sup> Ca xeaixraque' Jesús, na' gulé'e Le':

—Xúgute bénneache dxelexexilaje' Lue'.

<sup>38</sup> Na' gunná Jesús:

—Chéajdxu xezre walizre ca' chee' guchálajlene' benne' ca' xrtizra Dios. Chee le' na' belja'.

<sup>39</sup> Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee' ga nababa Galilea, bchalaj Jesús dizra' chee' Dios, ne bebéaje' xízrawe' xriwé' ca' da zaj xu'u benne' wé' ca'.

*Jesús dxexune' tu benne' dxé'ene' xízrawe' guzru'*  
(Mt. 8.1-4; Lc. 5.12-16)

<sup>40</sup> Nadxa bzin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

<sup>41</sup> Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

<sup>42</sup> Ca gunné' caní, la becuásate xízrawe' na', na' begá'ane' chawe'.

<sup>43</sup> Nadxa Jesús bsízrene' le', na' besel-le' le'.

<sup>44</sup> Caní gunné':

—Quebe nu xu'u ca da guca chiu'. Guxíaj lau bxruze xeaíle'e cuinu', ne bnezruj ca naca da gunná be'e Moisés xelún benne' ca' xellexaxaque'. Caní gunu' chee' xelélé'ene' ba bexacu' na'a.

<sup>45</sup> Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' hexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénneache chee' xúgute xezre ca' belezrine' lau Jesús naga zue'.

## 2

*Jesús dxexune' tu benne' quebe gaca se'e*  
(Mt. 9.1-8; Lc. 5.17-26)

<sup>1</sup> Ca gudé chupa chunna zra, na' guxú'u Jesús xecha lasa lu xezre Capernaum. Belénne bénneache zua Jesús tu lu xu'u.

<sup>2</sup> La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios.

<sup>3</sup> Na' belezrín tapa benne' lu xu'u naga zua Jesús, zaj nu'e tu benne' quebe gaca se'e.

<sup>4</sup> Lawe' da quebe gulezéquene' xelezrine' lau Jesús, lawe' da zaj zra' bénneache zante ga na', na' gulesálujje' chju'u chee' xu'u naga zua Jesús. Na' bululétaje' da'a da zrua benne' na' quebe gaca se'e.

<sup>5</sup> Lawe' da dxeque be'e Jesús ca dxeleajlí lazre' benne' ca' Le', na' gunné', dxe'e bénnea' quebe gaca se'e:

—Zrí'ina'dau', ba nanite lau dul-la da nabagu'.

<sup>6</sup> Zaj dxe'e bal-la benne' ga na', benne' dxuluxuzájlē'e da nadxixruj bea Dios, na' gulenné lanze':

<sup>7</sup> —¿Bizr chee na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunite lau dul-la da zaj nabaga bénneache? Tuze Dios na'.

<sup>8</sup> Dxeque be'e Jesús lu lázrdawe' ca dxeleenné lanē' chee', na' gunné':

—¿Bizr chee na' dxéquele caní?

<sup>9</sup> ¿Bizra dizra' quebe naca na stébela xapa' benne' nigá quebe gaca se'e? ¿Naca na stebe xapa' le', ba nanite lau dul-la nabagu'? Cabí. ¿U che stebe xapa' le', bexasa, becá'a da denu', ne bexíaj?

<sup>10</sup> Na'a, chee nézele le'e neda', Benne' Gulje' Bénneache, napa' xel-la dxenná bea lu xezr la xu gunite lawa' dul-la da zaj nabaga bénneache.

Na' gunná Jesús, dxe'e bénnea'.

<sup>11</sup> —Lue' dxapa', bexasa, becá'a da'a chiu', ne bexíaj lizru'.

<sup>12</sup> Ca'an guca, la bexasatē', na' bequé'e da'a chee', ne bedxúaje' lau xúgute bénneache. Ca'an guca, xúgute benne' ca' belexebánene', na' belúe lá'ane' Xránadxu Dios. Dxeleenné':

—Cabata' ne lé'edxu gaca na ca guca da nigá.

### *Dxenné Jesús benne' le' Leví*

*(Mt. 9.9-13; Lc. 5.27-32)*

<sup>13</sup> Ca gudé na' bedxúaj Jesús zéaje' dxu'a nísadau', na' xúgute bénneache lu xezre ca' belezrine' lau Le'. Nadxa bsédene' benne' ca' xrtizra Dios.

<sup>14</sup> Ca gudé Jesús na', ble'ene' Leví, zrí'ine Alfeo, dxe'e lataj chee wechizruj. Na' gunná Jesús, dxe'e le':

—Ben neda' tuze.

La guxásatē Leví, guxíajlēne' Jesús.

<sup>15</sup> Ca' guca, gate gudxé' Jesús dxawe' lizre Leví, na' zánete benne' wechizruj, ne benne' dul-la ca' gulebé'e dxelágulēne' tu zren nen Jesús, ne benne' ca' dxusédene'. Caní naca lawe' da zjácalē benne' zante Jesús.

<sup>16</sup> Nadxa benne' ca' dxuluxuzájlē'e da nadxixruj bea Dios, ne benne' fariseo ca', gate belelé'eng' ca da dxun Jesús, dxágulēne' benne' wechizruj ca', ne benne' dul-la ca', na' gulenné', dxelē'e benne' ca' dxusēde Jesús:

—¿Bizra da nigá? Dxagu dxé'ajlēne' benne' wechizruj ca', ne benne' dul-la ca'.

<sup>17</sup> Ca ben Jesús da nigá, gunné':

—Benne' chawe' ca' quebe dxelechínene' benne' dxexún bénneache. Benne' we' ca' dxelechínene' bénnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

### *Ca dxal-la' xelún bénneache gate dxelunē' gubasa*

*(Mt. 9.14-17; Lc. 5.33-39)*

<sup>18</sup> Ca guca lu zra na', belún gubasa benne' ca' dxusēde Juan, ne benne' ca' dxulusēde benne' fariseo ca'. Na' belezrín benne' ca', bedajleguezre' Jesús:

—¿Bizr chee na' dxelún gubasa benne' ca' dxusēde Juan, ne benne' ca' dxulusēde benne' fariseo ca', na' benne' ca' dxusédenu' Lue' quebe dxelunē' gubasa? ¿Bizr chee na'?

<sup>19</sup> Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácatē na' zua benne' wechaga na' nen lē'? Dxácatē na' zua wechaga na' nen lē' quebe gaca xelunē' gubasa.

<sup>20</sup> Wazrín tu zra gate dua benne' wechaga na'. Lu zra na' xelunē' gubasa.

<sup>21</sup> 'Quegá nu benne' xudé'e tu ladxe' cube lē'e zradxu gula. Che ca'an gunē', ladxe' cube da xudé'e wazrube xu na da gula, na' wachézadxa na.

<sup>22</sup> Cá'anqueze, quegá nu benne' que'e xrise uva wal-la cube lu bzude xide gula. Che ca'an gunē', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

*Benne' ca' dxusede Jesús dxelíchajē' dau chee zrua' xtila zra dxulupá'ana judío ca'*

(Mt. 12.1-8; Lc. 6.1-5)

<sup>23</sup> Gate gudé Jesús naga zē zrua' xtila zra dxulupá'ana benne' judío ca', ná'atē na' benne' ca' dxusede Jesús, ca' zaj xu'e neza, gulezú lawē' dxelíchajē' dau naga zria zrua' xtila.

<sup>24</sup> Nadxa benne' fariseo ca' gulé'e Jesús:

—Gunná'xque. ¿Bizr chee na' dxelunē' zrin da quebe dxal-la' xelunē' zra dxupá'anadxu?

<sup>25</sup> Jesús guzre' benne' ca':

—¿Cabata' ne gulábale ca da bēn David gate gudunē', ne bxáizrjenē' da gagu lē', ne da gugawē' benne' ca' zaj zrálenē' lē'?

<sup>26</sup> Guxú'e lu xu'u chee Dios gate naca Abiatar bxruze blau, na' David gudawē' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawē' na. Na' bnézrujtē David da gulagu benne' ca' zrálenē' lē' chee xeta xtila na'.

<sup>27</sup> Cá'anqueze gunná Jesús, dxē'e benne' ca':

—Dios gudíxrujē' zra dxupá'anadxu chee gaca ba neza chee bēnneache, quegá bēnē' bēnneache chee xelunē' zrin chee zra dxupá'anadxu.

<sup>28</sup> Chee lē na', neda', Benne' Guljē' Bēnneache, naca' xrane zra dxupá'anadxu.

### 3

*Ca guca chee tu benne' nazrinnaj ne'e*

(Mt. 12.9-14; Lc. 6.6-11)

<sup>1</sup> Gate guxú'u Jesús da xula lu xu'u naga dxelúe lá'ana judío ca' Dios, zē tu benne' biu nazrinnaj ne'e ga na'.

<sup>2</sup> Judío ca' buluzuzre' Jesús che xexunē' benne' we' nigá lu zra dxulupá'anē', chee xelezéquenē' xelagu zria Jesús.

<sup>3</sup> Nadxa gunná Jesús, dxē'e benne' biu na' nazrinnaj ne'e:

—Guxasa. Guzē' laduj benne' caní.

<sup>4</sup> Nadxa gunaba Jesús lau judío ca', dxē'e lē':

—¿Naca chee zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee nu benne', u che guzríá xidxu xel-la nabán chee'?

Ná' gulezúa zrire judío ca'.

<sup>5</sup> Nadxa Jesús gunná zi'e benne' ca'. Bewí'inenē' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na.



<sup>6</sup> Ca'an guca, belexedxúaj benne' fariseo ca', na' belunę' xel-la wezría nen benne' ca' zaj de'e Herodes ájala xelútię' Jesús.

*Bénneache zan dxelezrague' dxu'a nísadau'*

<sup>7</sup> Nadxa gucuasa Jesús laduj benne' ca', na' guxiáje' dxu'a nísadau' nen benne' ca' dxusédenę'. Zjácale benne' zan ca' Jesús, benne' cheę xęzre ca' zaj nababa Galilea.

<sup>8</sup> Gate belén bénneache ca naca da zren ca' da dxun Jesús, belezrín benne' zan lau Lę', benne' cheę xęzre ca' zaj nababa Judea, ne benne' xęzre Jerusalén, ne benne' cheę xęzre ca' zaj nababa Idumea, ne benne' gusá'aque' xechalá'a xęgu Jordán, ne benne' gusá'aque' xęzre ca' zaj naxechaj na xęzre Tiro, ne xęzre Sidón.

<sup>9</sup> Cheę lę' na' gunná be'e Jesús benne' ca' dxusédenę' xulucueze' tu da dxedá lawe' nísadau' checa xuluchide' bénneache zan Lę'.

<sup>10</sup> Caní guca lawe' da bexún Jesús benne' zantę, na' benne' wę' ca' gulebigue' lau lę' cheę cheajletę' Lę'.

<sup>11</sup> Gate be' xriwę' ca' zaj xu'u bénneache belelé'e na Jesús, na' buluzú zribe na lau Lę', ne gulebezre xa'a na. Dxelenná na:

—Lue' nacu' Zri'ine Dios.

<sup>12</sup> Jesús gudil-lę' be' xriwę' ca' cheę quebe xululę' na da naca Lę'.

*Jesús dxennę' chazrinnu gubáz cheę'*

*(Mt. 10.1-4; Lc. 6.12-16)*

<sup>13</sup> Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Lę'.

<sup>14</sup> Bchague' chazrinnu benne' xelunę' Lę' tuze, benne' sel-lę' cheajlechálaje' xrtizra Dios.

<sup>15</sup> Bzue' lu na' benne' caní xel-la dxenná bea cheę xelexexunę' benne' wę' ca', ne cheę xelexebéaje' be' xriwę' ca' lu bel-la' dxen cheę bénneache ca'.

<sup>16</sup> Benne' chazrinnu caní zaj lę':

Simón, bénnea' bzua Jesús xetú lę' Pedro,

<sup>17</sup> ne Jacobo ne Juan, biche Jacobo, benne' ca' zaj naque' zri'ine Zebedeo.  
(Benne' chupa caní bzua Jesús lę' Boanerges, da zéaje na benne' wal-la ca guziu'.)

<sup>18</sup> Bchague' Andrés ne Felipe, ne Bartolomé, ne Mateo,

ne Tomás, ne Jacobo zri'ine Alfeo, ne Tadeo,

ne Simón, benne' dxue lázrele'e cheę lazrie',

<sup>19</sup> ne Judas Iscariote, bénnea' xudęe' Jesús lu na' benne' ca' dxeledábage' Lę'.

*Nu benne' dxennę' schanni' cheę Be' Lá'azxa*

*(Mt. 12.22-32; Lc. 11.14-23; 12.10)*

Ca gudé na' bzrin Jesús tu lu xu'u nen benne' ca' dxusédenę'.

<sup>20</sup> Xecha lasa gulebiga bénneache zan naga zua Jesús, na' québedxa dxaca lataj xelawe'.

<sup>21</sup> Gate belene benne' xrtia Jesús ca da dxun Lę', na' belezrinę' cheę xelexechę'e lę'. Dxelennę':

—Quebe zua xrlátaje xichaj lázrdawe'.

<sup>22</sup> Cá'anqueze benne' ca' dxuluxuzájle'e da nadxixruj bea Dios, benne' gusá'aque' Jerusalén, dxelennę':

—Benne' nigá zrague' Beelzebú, xrane be' xriwę' ca', na' ne cheę xrane be' xriwę' ca' dxebéaje' be' xriwę' ca'.

23 Nadxa gunné Jesús benne' ca', na' bchálajlęne' lę' tu da dxulę'e na. Dxennę':

—¿Wazeque Satanás da xriwe' xebéaj cuine na?

24 Che benne' dxelenná bea xelexaque' chupa la'a, quebe díaqueze xel-la dxenná bea cheę'.

25 Cá'anqueze che benne' zaj zřę'e tu lu xu'u xelaque' chupa la'a, quebe xeledíaqueze benne' zaj zřę'e lu xu'u na'.

26 Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadęqueze cheę' na.

27 'Quebe nu seque chu'u lizre benne' wal-la cheę' cuanę' da dę cheę' che quebe guchéaję' lę' nédxula. Nadxa seque' cuanę' da dę lizre benne' wal-la na'.

28 'Da li dxennía', dxapa' le'e: Xúgute dul-la da dxelún bęnneache, ne dizra' schanni' da dxelennę', ájateze zaj naca na, gunite láuqueze Dios cheę'.

29 Na'a, ca naca núteteze benne' nne' schanni' cheę' Be' Lá'azxa, cabata' gunite lau Dios cheę' bęnnea'. Webía xí'queze'.

30 Caní gunná Jesús lawe' da dxelennę':

—Zraga Jesús da xriwe'.

*Nu naca ca xrna Jesús, ne bi biche' ca'*

*(Mt. 12.46-50; Lc. 8.19-21)*

31 Ca gudę na' bzrin xrna Jesús nen bi biche' ca'. Gulebeze' chalé'ajla, na' gulesel-lę' tu benne' nne' Jesús.

32 Benne' ca' zaj zřę'e cuita Jesús gulę'e lę':

—Xrna'u ne bi bichu' ca' zaj zę' chalé'ajla, dxelennę' Lue'.

33 Gunná Jesús, dxę'e benne' ca':

—¿Nézele nuzra na' xrna'a, ne bi bicha' ca'?

34 Nadxa gunná Jesús benne' ca' zaj zřę'e cuita Lę', na' gunné':

—Benne' caní zaj zřálęne' neda' nigá zaj naque' ca' xrnáqueza', ne bi bicha' ca'.

35 Caní naca na lawe' da xúgute benne' dxelunę' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

## 4

*Da dxulę'e na ca naca cheę' benne' dxaza dxa'ana*

*(Mt. 13.1-23; Lc. 8.4-15)*

1 Xetú lasa guzú lau Jesús dxusędene' benne' ca' dxu'a nísadau', na' belezraga bęnneache zantę naga zuę'. Naxánlę' benne', na' bęn na ba xen guxú'u Jesús tu lu da dxedá lawe' nísadau' da dxe na', na' gudxę'e lu'ule da dxedá lawe' nísadau', na' bęnneache zan ca' gulezřę'e dxu'a nísadau'.

2 Nadxa bchalaj Jesús da dxululę'e na, na' bsędene' benne' ca' da zantę. Ca dxusędene' benne' ca', na' bchálaję' caní:

3 —Le xene da nigá. Tu benne' dxaza dxa'ana zéaję' guza.

4 Ca zéaję' dxazę', na' xeajlechaze bal-la bínnedu ca' dxu'a neza. Na' belezřin bxinne, ne guláguba' bínnedu caní.

5 Xezícadxa bínnedu ca' xeajlechaze na lu xiaj naga quebe déteca xu. Bínnedu caní belezřia na lawe' da quebe déteca xu.

6 Ca bdxuaj gubizra, na' bzezxe na lę na, na' lawe' da quebe zaj nun lue na lu da situj, gulebizre na.

<sup>7</sup> Xezícadxa bínnedu ca' xeajlechaze na naga dxelezríá xixre' xeche'. Xixre' xeche' caní gulegúládxá na ca lẹ na, na' bululule na lẹ na, na' quebe gulebía na da gágudxu.

<sup>8</sup> Xezícadxa bínnedu ca' xeajlechaze na lu xu bebe. Belezríá na cháwedau', na' belegula na, ne gulezríale'ẹ na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup> Gunnadxa Jesús, dxẹ'ẹ benne' ca':

—Che nu benne' zua nague', dxal-la' xenne' da nigá.

<sup>10</sup> Ca gudé na', ca gucuasa Jesús cuita benne' zan ca', na' gulenaba benne' ca' zrálẹnẹ' benne' ca' dxusede Jesús bi zéajẹ ca naca da dxulé'e nigá.

<sup>11</sup> Na' gunná Jesús, dxẹ'ẹ benne' ca':

—Dios dxunnẹ' le'e lataj nézele ca naca cheẹ da nagache cheẹ da dxenná bea Lẹ'. Na'a, ca naca cheẹ benne' ca' zaj zré'ẹ cúzrela, dxuchálajlẹna' lẹ' dízra'ze da dxulé'e na.

<sup>12</sup> Caní dxuna' lawe' da dxelenné'ẹ, na' quebe dxelaca lazrẹ' xelélé'engé'. Dxelennẹ', na' quebe dxelaca lazrẹ' xeléajni'ingé', cheẹ quebe xelxebí'i lazrẹ', na' chu'u xel-la wenite lau cheẹ dul-la da za nabague'.

<sup>13</sup> Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dízra' ca' da dxululé'e na?

<sup>14</sup> Benne' dxaza dxá'angé' nague' benne' dxuchálajẹ' xrtizra Dios.

<sup>15</sup> Bal-la bénneache zaj nague' ca bínnedu ca' xeajlechaze na dxu'a neza. Dxelennẹ' xrtizra Dios, na' ca dxedé na', dxezrín Satanás, na' dxucuasa na dízra' nigá da zua na xichaj lázrdau benne' ca'.

<sup>16</sup> Benne' xula ca' zaj nague' ca bínnedu ca' xeajlechaze na lu xiaj. Ca dxelennẹ' xrtizra Dios, na' dxelebéle'engé' dxelezi'ẹ na.

<sup>17</sup> Tu chí'idauze dxelunẹ' caní. Gate dxeledéé' xel-la zi', ne zua da dxedábaga lẹ' nẹ cheẹ xrtizra Dios, na' dxelexecuase' lawe' da quebe guxaze xrtizra Dios lú'ulete xichaj lázrdawé' ca guca cheẹ bínnedu ca' quebe belún lue na lu xu situj.

<sup>18</sup> Benne' xula ca' zaj nague' ca bínnedu ca' xeajlechaze na ládujla xixre' xeche' ca'. Dxelennẹ' xrtizra Dios.

<sup>19</sup> Lawe' da dxelebe'dxẹ' gunne xue da naca cheẹ xezr la xu nigá dxezi xẹ xel-la gunní'a lẹ', na' dxelezá lazrẹ' da zantẹ da dxelelé'engé'. Xúgute da caní dxelú'u na xichaj lázrdau benne' caní, na' xuluxunite na dízra' da guxú'u xichaj lázrdawé', na' quebe gaca gun na ca da dxal-la' gun dízra' nigá.

<sup>20</sup> Zaj zra' benne' dxelennẹ' xrtizra Dios, ne dxelezi' lu nẹ' na. Bal-lẹ' zaj nague' ca bínnedu ca' gulebía na chi dxua tu tu na. Benne' xula zaj nague' ca bínnedu ca' gulebía na ga xun tu tu na. Benne' xula zaj nague' ca bínnedu ca' gulebía na tu gaxúa tu tu na.

*Xúgute da nagache gulé'e lawe na*

*(Lc. 8.16-18)*

<sup>21</sup> Cá'anqueze gunná Jesús, dxẹ'ẹ benne' ca':

—¿Gúádxu xi', ne guzúádxu na zran xi'ina u che zran ga dxásedxu? Quebe gundxu ca', san guzúádxu na sibe cheẹ gusení na.

<sup>22</sup> Xúgute da nagache gulé'e lawe na, na' xúgute da xu'u xichaj lázrdaudxu wénqueze na.

<sup>23</sup> Che nu benne' zua nague', dxal-la' xenne' da nigá.

<sup>24</sup> Cá'anqueze gunná Jesús:

—¡Le xene xanne' ca da dxénele! Ca da dxudxíxrele, nen le na' gudxíxrequeze Dios cheele, na' gúnnadxe' le'e dxénele.

<sup>25</sup> Caní gaca na, benne' nape' da naca chee' xrtizre'e, gunézrujdxé' chee', na' benne' quebe hi nape', ca da dauze da nape' xecá'ate' na.

*Da dxulé'e na ca naca chee' binne da dxegula na*

<sup>26</sup> Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' bínne du ca' lu xu.

<sup>27</sup> Dxásię' chizrela, dxase' te zra, na' bínne du caní dxelezría na, ne dxelegula na, ne quegá nézene' ájala.

<sup>28</sup> Dxaca na caní lawe' da nácaqueze ca da dxun xezr la xu. Nedxu dxebía na xrlague na, nadxa za dau, na' bzébetę' dxebía na bínne du ca' lu dau.

<sup>29</sup> Gate ba gulegula xíxre du caní, na' dxechugue' na lawe' da ba bzin zra xequé'e na.

*Da dxulé'e na ca naca chee' binne mostaza*

(Mt. 13.31-32; Lc. 13.18-19)

<sup>30</sup> Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na'?

<sup>31</sup> Naca na ca tu binne mostaza da dxázadxu lu xu. Bínne du nigá nácadxa cuide' ca da zaj nnita lu xezr la xu.

<sup>32</sup> Gate ba gúzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácatę' dxelebía bxínne du ca' zran zrula chee' na.

*Ca bgune Jesús da dxulé'e na caní*

(Mt. 13.34-35)

<sup>33</sup> Caní bsede Jesús benne' ca' xrtizra Dios, na' bchálaje' zánete' da dxululé'e na caní, cadite' guléajni'ine'.

<sup>34</sup> Quebe bchálaje' da xula. Tuze dizra' da dxulé'e na bchálajlene' benne' ca'. Bzájla'adxę' ca naca na benne' ca' dxusédenę'.

*Jesús dxebeche zrię' be' bdunu'*

(Mt. 8.23-27; Lc. 8.22-25)

<sup>35</sup> Lu zra ná'queze, ca gul-la chizrela, na' gunná Jesús, dxę'e benne' ca' dxusédenę':

—Chéajdxu xecha la'a nísadau'.

<sup>36</sup> Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita kezícadxa da ca' dxeledá lawe' nísadau' ca' naga zaj zra' benne', na' xjácálne' Le'.

<sup>37</sup> Nadxa guzú lau dxaca tu be' bdunu' lu nísadau' na', na' dxu'ute' nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'.

<sup>38</sup> Jesús dę' dxasię' lu xcúgüę' naga nácadxa sibe lu da dxedá lawe' nísadau'. Na' bulusebanę' Jesús, dxelę'e Le':

—Benne' wesęde, ¿quebe dxę'u gunne xue wátedxu nate ca na'a?

<sup>39</sup> Nadxa guxasa Jesús, na' bchálajlene' be' bdunu', ne nísadau'. Dxennę':

—¡Gudxę zri'! ¡Zrize guzúa!

Gudxę zri' be' bdunu', na' nísadau' guzúa zri na.

<sup>40</sup> Nadxa gunná Jesús, dxę'e benne' ca' dxusédenę':

—¿Bizr chee na' dxezrébele'ele le'e? ¿Quebe dxeajlí lázrele Dios?

<sup>41</sup> Belezrébele'edxe', ne dxelé ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' chee'.

## 5

*Tu benne' xezre Gadara, benne' xu'e be' xriwe'*

*(Mt. 8.28-34; Lc. 8.26-39)*

<sup>1</sup> Bezrín Jesús, tu zren nen benne' ca' dxusédenē' xecha la'a nísadau' lu xezr la xu chee benne' Gadara ca'.

<sup>2</sup> Ca bedxúaj Jesús lu da dxdá lawe' nísadau', na' bzin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'.

<sup>3</sup> Benne' biu nigá zúaquezē' lu bluaj na'. Quebe nu dxezúe guchéaj lēbe' chalásaze, lácala nu guchéaj lēbe' nen du xia.

<sup>4</sup> Zane' lasa buluchéaje' lēbe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'enge' lēbe'.

<sup>5</sup> Dxdéaquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'.

<sup>6</sup> Gate ble'ebe' zítu'la ba za Jesús, na' guzá chégube', xeajzú zríbebe' lau Lē'.

<sup>7</sup> Gunné zizraj be' xriwe' xu'ube', dxē na Jesús:

—¿Bizra dxaca chiu' nen neda', Jesús, Zri'ine Dios szrentē? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup> Caní gunná na lawe' da gunná Jesús, dxē'e na:

—Lue', da xriwe', bedxúaj lu bel-la' dxen chee benne' nigá.

<sup>9</sup> Nadxa gunaba Jesús, dxē'e na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup> Guta' xue na Jesús chee quebe xesel-lē' na, ne quebe gucuae' na zitu' lu xezr la xu na'.

<sup>11</sup> Zaj zra' gagu lu xi'a na' tu cue' cuche zaj zra'ba' dxeláguba'.

<sup>12</sup> Gulata' xue be' xriwe' ca' Jesús, gulenná na:

—Besel-la netu' lu cuche ca'. Bēnna lataj chū'untu' lēba'.

<sup>13</sup> Nadxa Jesús be'e na lataj. Na' be' xriwe' ca' beledxúaj na lu bēnnea', na' gulú'u na cuche ca'. Zaj nácaba' ca galaj gaxúa cuche ca', na' buludixire cuínaba' tu chejéa. Xeajlechástēba' lu nísadau', ne gulátetēba' lu nisa na'.

<sup>14</sup> Benne' ca' dxuluxúe' cuche ca' buluxuzrúnuijē', na' xeajlezenne' benne' zaj zre'e lu xezre, ne benne' zaj zre'e lē'e xixre'. Na' belezrín benne' ca' naga zua Jesús, benne' ca' belenne' ca da ba guca.

<sup>15</sup> Gate belezrín benne' ca' naga zua Jesús, na' belelé'enge' bēnnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'.

<sup>16</sup> Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca.

<sup>17</sup> Nadxa benne' xezre ca' gulata' xuene' Jesús xedxúaje' lu xezr la xu chee'.

<sup>18</sup> Ca bexú'u Jesús lu da dxdá lawe' nísadau', na' bēnnea' guxú'ube' be' xriwe' ca' guta' xuebe' Jesús gu'e lataj chéajlēbe' Lē'.

<sup>19</sup> Quebe bē' Jesús lēbe' lataj, san dxē'e lēbe', gunné':

—Bexiaj lizru', ne xeajchálajlē xrtiu' ca' ca naca da zren ca' da bēn Xranu' nen lue', ne ca bexache lazre' lue'.

20 Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute benne' zaj zre'e xezre ca'.

*Bi nu'ula chee Jairo, ne nu'ula na' xeajté' zra lana Jesús  
(Mt. 9.18-26; Lc. 8.40-56)*

21 Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'ane' dxu'a nísadau'.

22 Ca'an guca bzrin tu benne' xíchaje chee xu'u naga dxelúe lá'ana judío ca' Dios, benne' le' Jairo. Gate blé'ene' Jesús, na' bzu zribe' zran ni'e.

23 Guta' xuene' Jesús, dxe'e Le':

—¡Bi nu'ula chia' ba dxátebe'! ¡Gudá, bze' na'u lebe' chee xexácabe', ne xaca banbe'!

24 Nadxa guxíajle Jesús bénnea', na' bénneache zan xjácále' Le', ne dxuluchíte' Le'.

25 Ládujla bénneache ca' za tu nu'ula quebe chawe' zue', ba zeaj chazrinnu iza nape' we' dxen.

26 Da zren da bulusaca benne' dxelexún bénneache ca' nu'ula nigá, na' bache ben dítaje' xúgute da nape'. Quegá bi gúcale' na le', san bzálaxa we' chee'.

27 Gate ben nú'ula' dxuluchalaj bénneache ca naca chee Jesús, na' bzrine' cúzrula Jesús ládujla bénneache, na' xeajté' zra lana Jesús.

28 Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'.

29 La gulézate' xel-la we' chie', ne la guque bé'etene' ba bexaca bel-la' dxen chee' chee xízrawe' na'.

30 Gúquebe'e Jesús ben zrin xel-la waca chee'. Chee le' na' bexéchaje', dxenné'e bénneache ca', na' gunábene' le':

—¿Nuzra bedajta' zra lana'?

31 Nadxa benne' ca' dxusede Jesús gulé'e Le':

—Dxelé'equenzu' bénneache zan dxuluchíe' Lue'. ¿Bizr chee' na' dxenabu': "Nuzra bedajta' neda'?"

32 Jesús guzúe' dxenné'e cuite' chee lé'ene' nua' bedajta' Le'.

33 Nadxa guxíaj nu'ula nigá, dxezrízie' dxezrebe' lawe' da nézene' ca da ba guca chee', na' bzu zribe' lau Jesús, na' gunné' ca naca da li.

34 Nadxa gunná Jesús, dxe'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatequezu' chee xízrawe' da guzxacu'.

35 Ne dxuchálajte Jesús gate belezrín benne' gusá'aca lizre benne' xíchaje chee xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee' na' dxunu' zédedxa benne' dxusede nigá?

36 Gate Jesús benne' ca da gulenná benne' caní, dxe'e benne' xíchaje chee xu'u na', gunné':

—Quebe zrebu'. Guxeajlí lazre' neda'.

37 Quebe be'e lataj hjácale' bénneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'.

38 Ca belezrine' lizre benne' xíchaje na', na' ble'e Jesús bénneache dxelún schaga. Dxelebezre benne', ne dxelebezre xa'ate'.

39 Nadxa guxú'u Jesús lu xu'u, na' dxe'e benne' ca', gunné':

—¿Bizr chee na' dxunle schaga? ¿Bizr chee na' dxebézrele? Quegá nate bidau' nu'ula. Dxásezebe'.

<sup>40</sup> Belún lala benne' ca' chee'. Nadxa Jesús bebéaje' xúgutę benne' ca', na' guché'e xrabe', ne xrna bidau' nigá, ne benne' ca' zjácáleņe' Le', na' guxú'e naga de nú'uladu na'.

<sup>41</sup> BÉxruę' na'be', ne guzre' lebe':

—Bi nú'uladau', lue' dxapa': jGuxasa!

<sup>42</sup> La bexásate nú'uladu na', na' guzátebe' lawe' da ba zéajbe' chazrinnu iza. Na' benne' ca' zaj zre'e lu xu'u na' belezrébele'e.

<sup>43</sup> Jesús gunná bé'ene' benne' ca' chee' quebe nu xelé'e ca da bene'. Nadxa guzre' benne' ca' xulugawe' nú'uladu na'.

## 6

### *Dxezrin Jesús lazrie' da nacan xezre Nazaret* (Mt. 13.53-58; Lc. 4.16-30)

<sup>1</sup> Jesús bezé'e naga zue', ne bezrine' lazrie', na' benne' ca' dxusédenę' xjácáleņe' Le'.

<sup>2</sup> Ca gula zra dxulupá'ana judío ca', na' bezú lau Jesús dxusédenę' benne' ca' zaj zre'e lu xu'u naga dxelúe lá'ana judío ca' Dios. Bénneache zan belenne' chee', ne belexebánene', dxelenné':

—¿Gazra bsede benne' nigá ca nácate? ¿Bizra xel-la sina da nunezruj Le', ne xel-la waca zren caní da dxunę'?

<sup>3</sup> ¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'anqueze zaj zrálene' dxi'u?

Chee le' na' quebe guléajle'e chee Jesús.

<sup>4</sup> Na' gunná Jesús, dxę'e benne' ca':

—Xúgutę benne' dxelape' ba lá'ana tu benne' dxuchálaje' waláz chee Dios, san benne' walázr chee' ca', ne benne' xrtię' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup> Chee le' na' quebe ben Jesús lazrie' na' netú xel-la waca zren. Tuze bexunę' bál-laze benne' we' gate na' guxrúa ne'e xichaj benne' ca'.

<sup>6</sup> Bebane Jesús lawe' da quebe guléajle'e chee'.

### *Jesús dxusel-le' benne' ca' dxusédenę' cheajlechálaje' xrtizra Dios* (Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' bsédenę' benne' zaj zre'e ga na'.

<sup>7</sup> Gunné' benne' chazrinnu dxusédenę', ne guzú lawę' dxesel-le' le' chupa weaje', ne bnézruje' le' xel-la waca xulucuae' be' xriwe' ca' lu bel-la' dxen chee bénneache ca'.

<sup>8</sup> Gunná bé'ene' le' quebe bi xelu'e chee la neza, con tuze xaga da xuluchie'. Quebe xelu'e xixruj xeta, ne xeta, ne dumí.

<sup>9</sup> Waca xululéaje' zrele', ne xelácie' tu cueze zra lanę'.

<sup>10</sup> Gunnadxa Jesús, dxę'e benne' ca':

—Gate na' chu'ule le'e tu lu xu'u chee benne', waca xegá'anatele lizre bénnea' ca' zrindxa zra xezá'ale lu xezre na'.

<sup>11</sup> Che zrinle tu lu xezre naga quebe xuluxé lawę' le'e, ne quebe xelénenę' cheele, waca xezá'ale, na' cuibetęle bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da

li dxennéa', lu zra guchi'a Dios chee bèneache, waxache' gácaxda da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' chee.

<sup>12</sup> Nadxa gusá'aca benne' ca' dxusede Jesús, na' buluchálajlne' bèneache chee xelexebí'i lazre'.

<sup>13</sup> Cá'anqueze belexebéaje' zánete be' xriwe' ca' lu bel-la' dxen chee bèneache ca', na' gulegü'e da za zane' benne' we', na' belexexaque'.

*Ca gute Juan, benne' bchue' bèneache nisa*  
(Mt. 14.1-12; Lc. 9.7-9)

<sup>14</sup> Na' ben wenná bea Herodes ca naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bèneache nisa, bache bebané' ládujla benne' gate, na' chee le' na' nape' xel-la waca zren nigá.

<sup>15</sup> Benne' xula dxelenné':

—Eliás, bènea' bchálaje' waláz chee Dios benne' nigá.

Benne' xula dxelenné':

—Nácalje' bènea' dxal-la' xelá' guchálaje' waláz chee Dios, che nácalje' benne' gulasá, benne' bchálaje' waláz chee Dios.

<sup>16</sup> Ca ben Herodes da caní, na' gunné':

—Benne' nigá nague' Juan, bènea' gunná be'eda' neda' gulechugue' xíchaje'. Benne' nigá ba bebané' ládujla benne' gate.

<sup>17</sup> Caní gunná Herodes lawe' da gunná be'e le' buluzé' Juan na' lizre xia, ne buluchéaje' le' du xia, da na' bene' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequé'e nu'ula' chee guque' zru'ule'.

<sup>18</sup> Gunná Juan, dxé'e Herodes:

—Quebe dxal-la' súalenu' zru'ula bi bichu'.

<sup>19</sup> Chee le' na' Herodías guzré'e Juan, ne guca lazre' gútete' le'. Quebe guca chee'

<sup>20</sup> lawe' da neze Herodes naca Juan nigá tu benne' xrlátaje, ne benne' nague' tuze nen Dios, na' bezrebe' le'. Chee le' na' quebe be'e lataj Herodías na' gútete' Juan nigá, na' lácala quebe guxéajni'ine' ca naca xúgute' da bchalaj Juan, Herodes nigá bze nague' chee' du lazre'.

<sup>21</sup> Herodías na' bzrélene' ájala guné' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje' ca', ne benne' dxelenná be'e lu wedil-la, ne benne' zaj nague' blau lu xezre ca' zaj nababa Galilea.

<sup>22</sup> Nadxa guxú'u bi nu'ula chee Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenná bea Herodes, dxé'e nu'ula cuide' nigá:

—Gunaba neda' ca da dxedánenu', na' gunna' na' chiu'.

<sup>23</sup> Guchebe lazre' Herodes, ne bzétaje' Dios gunézruje' bíteteze da nábabe', lácala nábabe' gáchajte naga dxenná be'e le'.

<sup>24</sup> Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xíchaj Juan, bènea' bchue' bèneache nisa.

<sup>25</sup> La guxu'ute' nu'ula cuide' nigá naga zua wenná bea, na' gunabe', dxé'ebe' le':



—Dxaca lazra' gunnu' neda' na'a tu lu xé'ena xichaj Juan, bénnea' bchue' bénneache nisa.

<sup>26</sup> Nadxa wenná bea nigá bewí'inele'e, ne lawe' da ba bzétaje' Dios, na' belénete' benne' ca' da gunné', quebe guca lazre' guzruné' ca' da gunaba bi nu'ula nigá.

<sup>27</sup> Chee le' na' gusel-la wenná bea tu benne' dxeje' wedil-la, ne gunná bé'ene' le' cheajxri'e xichaj Juan na'.

<sup>28</sup> Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézrujte' na bi nu'ula na', na' lebe' bnézrujbe' na xrnabe'.

<sup>29</sup> Gate gulénneze benne' ca' da nigá, benne' ca' bsede Juan, na' xea'jlexexri'e be'l-la' dxen chee', na' xea'jlecácheté' na.

*Jesús dxugawe' chi xun gaxúa benne' biu*

*(Mt. 14.13-21; Lc. 9.10-17; Jn. 6.1-14)*

<sup>30</sup> Ca gudé na' belexezrín benne' gubáz ca' chee' Jesús naga zua Le', ne buluzenne' Le' xúgute' ca da belune', ne ca da bulusédené' benne' ca' naga xjaque'.

<sup>31</sup> Nadxa gunná Jesús, dxe'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'e lataj xelawe'.

<sup>32</sup> Nadxa Jesús ne benne' gubáz chee' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'.

<sup>33</sup> Benne' zan ca' belelé'ene' ca zjaque', ne belexexúnbe'e Jesús, na' gusá'aca chégü'e xjá'aque' na'. Benne' xúgute' xezre ca' belezrine' lataj na' nédxudxa ca Jesús.

<sup>34</sup> Gate bedxúaj Jesús lu da dxedá lawe' nísadau', na' blé'ene' benne' zante, ne hexache lazre' le' lawe' da zaj zre'e ca zrila' ca' quebe zua benne' dxuxúe' leba'. Na' guzú lawe' dxusédené' benne' ca' da zante.

<sup>35</sup> Ca gula guzré', belezrín benne' ca' dxusede Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá.

<sup>36</sup> Besel-la benne' caní chee' cheajxaque' xezre ca' zaj nnita gálaze chee' xezelí'e xeta xelawe' lawe' da quebe bi de nigá da xelawe'.

<sup>37</sup> Na' gunná Jesús, dxe'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee' chupa gaxúa zra chee' gugágudxu benne' zan caní?

<sup>38</sup> Na' gunná Jesús, dxe'e le':

—¿Bal-la xeta xtila ná'pale? Le cheajnná'.

Ca gulénézene', na' gulenné', dxelé'e Jesús:

—Gaxxu' xeta xtila, ne chupa béladau'.

<sup>39</sup> Nadxa gunná be'e Jesús gulebé'e xúgute' bénneache ca' tu cue' weaj lu xrguie xa'a.

<sup>40</sup> Na' gulebé'e tu cue' weaj, du tu gaxúe', du chi xunge'.

<sup>41</sup> Nadxa Jesús béxrué' gaxxu' xeta xtila ca', ne da chupa béladau'. Na' guchisa lawe' xabaala, gunabe' lau Dios gun la'axxe' na, na' bzúzruje' xeta xtila ca', ne bnézruje' na benne' ca' dxusédené' chee' gulísie' na chee' benne' ca'. Cá'anqueze gudísie' da chupa béladau' chee' xúgute' benne' ca'.

<sup>42</sup> Na' gulaga xúgute' ne gulélajte'.

43 Nadxa buluxutube' ca da begá'ana chee xeta xtila, ne chee béladu ca', na' guca chazrinnu xcuite xca'a.

44 Benne' ca' gulawe' xeta xtila ca' zaj naque' chi xun gaxúa benne' biu.

*Dxezá Jesús lawe' nísadau'*  
(Mt. 14.22-27; Jn. 6.16-21)

45 La gunná bé'ete Jesús benne' ca' dxusédenē' gulu'e lu da dxedá lawe' nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácatē Le' dxuzé' dizra' bēnne' ca'.

46 Ca gudé bze' dizra' benne' ca', na' guzé'e zéaje' lu xi'a zeajchálajlene' Dios.

47 Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'.

48 Gate blé'ene' ca dxelezraga lawe' dxulusé'e da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zre'e, dxezé'e lawe' nísadau' na', ne guca lazre' té'e lau da dxedá lawe' nísadau' na'.

49 Gate belelé'ene' Le' ze'e lawe' nísadau' na', guléqene' da dxedá dxela, na' gulebezre xe'e.

50 Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxé'e benne' ca' dxusédenē':

—Ga zrēbele. Neda' nigá. Le gun chuchu lázrele.

51 Nadxa guluén Jesús lu da dxedá lawe' nísadau' naga zaj zre'e, na' guleza be' na'. Na' guleque zrējene', ne belexebánele'ene',

52 lawe' da quebe ne xelėjni'ine' ca naca xel-la waca zren da bene' chee xeta xtila ca', lawe' da ne dxun zide' xichaj lázrdawe'.

*Dxexún Jesús benne' we' ca' lu xezre Genesaret*  
(Mt. 14.34-36)

53 Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'.

54 Ca beledxúaje' lu da dxedá lawe' nísadau', la belexexúnbeatē bēnneache ca' Jesús.

55 La gusá'aca chégute' zjaque' lu xezre ca' xeajlexrí'e benne' we' ca' tu tu lu ta'a, na' zeajlegü'e le' naga zaj nézene' xedé Jesús.

56 Gáteteze xézredu ca', ne xezre ca', ne le'e xixre' naga dxedé Jesús, na' buluzú'e benne' we' ca' du la neza, ne gulata' xuene' Jesús gunézruje' lataj cheajletaze' zra lanē', na' xúgute' benne' ca' xeajleté' zra lanē' belexexácatē'.

## 7

*Da dxucá'ana sban bēnneache*  
(Mt. 15.1-20)

1 Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezrine' lau Jesús.

2 Benne' caní belelé'ene' ca dxelún bal-la benne' dxuséde Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le' na' gulenná benne' Jerusalén ca':

—Zaj naca sban na' benne' ca' dxuséde Jesús.

Nadxa gulezí tizre' le'.

3 Caní gulenná benne' ca' lawe' da zjácale' benne' xudau' fariseo ca', ne xúgute' benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa.

4 Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dedxa da zante da zjácálene', ca xexadxé zriga' da dxelé'aje', ne zruaga, ne zriga xé'ena, ne da naga dxelásie'.

5 Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulenábene' Jesús:

—¿Bizr chee na' quebe zjácále benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

6 Na' bechebe Jesús:

—Láweze dxunle da xrlátaje. Lu lázrdaule xu'ule da caléla. Cháwedau' bchálajqueze Isaías ca nácale le'e gate na' bzuaje' caní:

Bénneache caní dxelúe lá'ane' neda' nen dxú'aze'. Xichaj lázrdawe' ca' zaj nacuasa na neda'.

7 Níteze naca xel-la ba lá'ana da dxelu'e neda', lawe' da dxulusédené' da zaj nadxixruj bea bénneacheze.

8 Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bénneache ca dxíbele zruaga, ne zriga' chee, ne zánete da caní da dxunle.

9 Na' gunnadxé', dxé'e benne' ca':

—Chala'ala dxuzúale ca da nadxixruj bea Dios chee zéajlele ca naca da tu dxúnzquezle.

10 Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bénnea'."

11 Le'e dxennale, "Che tu benne' xe'e xra xrne'e: Corbán," da zéaje na, quebe gaca gácaléna' le'e lawe' da bache bnézruja' chee Dios ca naca da de chia'.

12 Che ca'an dxenné', nadxa le'e québedxa dxu'ule le' lataj gácaléne' xra xrne'e.

13 Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajqueze dxunle zánete da zaj naca na caní.

14 Xecha lasa gunné' Jesús bénneache ca', na' gunné', dxé'e le':

—Le guzé nágale xúgutele, ne le chéajni'.

15 Netú da dxe'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le na' dxucá'ana na le' sban.

16 Le'e zua nágale, le xene.

17 Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédené' gulenábene' Le' ca naca chee da dxul'é nigá.

18 Nadxa gunná Jesús, dxé'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxe'aj dxagu bénneache quebe seque gucá'ana na le' sban

19 lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxe'aj dxágudxu.

20 Na' gunnadxé':

—Ca naca da dxedxuaj na lu xichaj lázrdau bénneache, le na' dxucá'ana na le' sban

21 lawe' da lu xichaj lázrdau bénnea' dxeledxúaj ca da caléla da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne',

22 ne xel-la gubán, ne da dxezá lazre' gapa da naca chee benne' xula, ne da caléla ca', ne xel-la wezrí xe', ne da dxezá lazre' da sban, ne xel-la zre'e

lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze.

<sup>23</sup> Xúgute da calela caní dxeledxúaj na lu xichaj lázrdau bénneache, ne dxuluxrinnaj na le'.

*Tu nu'ula quebe naca judío dxeajlí lazre' Jesús*

*(Mt. 15.21-28)*

<sup>24</sup> Na' bezá'a Jesús naga zué', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'.

<sup>25</sup> La gunézeté tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'.

<sup>26</sup> Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula.

<sup>27</sup> Gunná Jesús, dxe'e nu'ula':

—Be' lataj xelagu nedxu zri'ine benne' lu xu'u, lawe' da quebe naca chawe' cúadxu xeta xtíla chee bidu ca', ne gunézrujdxu na chee bécudu ca'.

<sup>28</sup> Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup> Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu be-la' dxen chee zri'inu' nu'ula.

<sup>30</sup> Gate bezrín nu'ula' lizre', na' blé'ene' zrí'ine' nu'ula dēbe' lu da naga dxásebe', na' be' xriwe' ba bedxúaj na lu be-la' dxen chee'be'.

*Dxexún Jesús tu benne' nacuézrué', ne quebe dxaca nnie'*

<sup>31</sup> Nadxa bedxúaj Jesús, bezé'e naga nababa xezre Tiro, na' gudétie' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xezr la xu Galílea.

<sup>32</sup> Nadxa bedajleguá' benne' ca' tu benne' nacuézrué', ne quebe dxaca nnie', na' gulenábé' Jesús xrúa ne'e benne' nigá.

<sup>33</sup> Guché Jesús benne' nigá chalá'ala naga zaj zra' benne' ca', na' bdie' zrube ne'e lu naga bénnea', na' bzre'e zrene', ne bte' lawe' luzre bénnea'.

<sup>34</sup> Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

<sup>35</sup> Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'.

<sup>36</sup> Na' gunná Jesús, dxe'e benne' ca' quebe nu xelé'e ca da bene'. Lácala gunná be'ene' le' caní, buluchúlujdxe' dizra' ca da bene'.

<sup>37</sup> Benne' ca' zaj zra' na' belexebánele'ene', dxeleenné':

—Xúgute dxune' cháwedau'. Dxexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxeleenné'tie'.

## 8

*Dxugagu Jesús chua gaxúa benne' biu*

*(Mt. 15.32-39)*

<sup>1</sup> Ca lu zra ca' zaj nazraga benne' zan, na' quebe bi de da xelawe'. Ca'an guca gunné Jesús benne' ca' dxusédene', na' guzre' le':

<sup>2</sup> —Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'.

<sup>3</sup> Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

<sup>4</sup> Na' belexechebe benne' ca' dxusede Jesús, dxelé'e Le':

—¿Ájazra gundxu gunézrujdxu da xelawe' nigá, ga quebe nu chilá' benne'?

<sup>5</sup> Jesús bchebe' le':

—¿Bal-la xeta xtila nápaie le'e?

Benne' ca' gulenné':

—Gazre na.

<sup>6</sup> Nadxa gunná be'e Jesús xelebé' xúgute bénneache ca' lu xu. Nadxa guqué'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédene', na' benne' caní gulisie' na lówela xúgute bénneache ca'.

<sup>7</sup> Zaj nápaqueze' tu chupa béladau'. Na' Jesús gunabe' Dios gune' na chawe'. Nadxa gunná bé'ene' gulise benne' ca' le na.

<sup>8</sup> Gulagu xúgute bénneache ca', ne belezúale'e chawe'. Ca gudé na' buluzre'e gazre xcuite xca'a nen xeta bizruj da belegá'ana.

<sup>9</sup> Benne' ca' gulawe' zaj naque' ca chua gaxúa benne' biu. Nadxa Jesús bze' benne' ca' dizra'.

<sup>10</sup> Nadxa guxú'e lu da dxedá lawe' nísadau' nen benne' ca' dxusédene'. Xjaque' lu xezr la xu chee benne' xezre Dalmanuta.

### *Dxelenabe' Jesús gune' tu xel-la waca*

*(Mt. 16.1-4; Lc. 12.54-56)*

<sup>11</sup> Nadxa belezrín benne' xudau' fariseo ca' ga na', ne gulezú lawe' dxulutille' dizra' nen Jesús. Gulenabe' Jesús gune' tu xel-la waca da za xabáa, chee xelenézene' bi xel-la waca nape'.

<sup>12</sup> Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

<sup>13</sup> Nadxa Jesús bca'ane' benne' ca', na' bexu'e lu da dxedá lawe' nísadau', dxexiaje' xechelá'a chee nísadau'.

### *Da naca ca cua zichaj chee xeta xtila*

*(Mt. 16.5-12)*

<sup>14</sup> Gulal-la lazre' benne' ca' dxusede Jesús xelu'e da xelawe', na' zaj nu'e tute xeta xtila lu da dxedá lawe' nísadau'.

<sup>15</sup> Nadxa Jesús gunná bé'ene', dxé'e benne' ca':

—¡Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

<sup>16</sup> Nadxa benne' ca' dxusede Jesús gulé ljwezre':

—Le' dxenné' caní lawe' da quebe de xeta xtila gágudxu.

<sup>17</sup> Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácalé'e zide lázrdaule?

<sup>18</sup> ¿Quebe dxelé'ele nen xiaj laule, ne quebe dxenle nen nágale? ¿Quebe dxejásá lázrele?

19 Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinnu na.

20 Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zrate becá'ale?

Le' gulenné':

—Gazre na.

21 Nadxa Jesús guzre' benne' ca':

—¿Ne la gázqueze quebe dxéajni'ile?

### *Jesús dxexune' tu benne' la chul-la*

22 Ca gudé na' Jesús, ne benne' ca' dxusédene' belexezrine' lu xezre Bet-saida, na' benne' Betsaida guleché'ē tu benne' la chul-la lau Jesús, na' gulata' xuenē' Le' guté' le'.

23 Jesús gudele' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawé', ne guxrúa ne'ē le'. Na' bchebe' le' chete dxelé'ene'.

24 Benne' la chul-la gunné'e, na' gunné':

—Dxelé'eda' benne' ca', zaj naque' ca' weaj xaga, na' dxesí'aque'.

25 Nadxa Jesús guxrúa ne'ē xiaj lawé' da xula, na' benne' na' gunná' dxgüē'. Na' bexaque', ne xúgute' bache dxelé'ene' cháwedau'.

26 Nadxa Jesús besel-le' le' lizre', dxē'e le':

—Quebe chu'u lu xezre nigá, ne quebe nu xu'u caní.

### *Pedro dxenné' naca Jesús benne' nasel-la Dios*

(Mt. 16.13-20; Lc. 9.18-21)

27 Ca gudé na' Jesús, ne benne' ca' dxusédene' xjaque' lu xézredu ca' zaj nababa xezre Cesarea naga dxenná bea Filipino. Dxácatē zaj xu'ē neza bchebe Jesús benne' ca':

—¿Nuzra na' dxelenná benne' naca' neda'?

28 Belexechebe':

—Bal-la benne' dxelenné' nacu' Juan, bēnnea' bchue' bēnneache nisa. Benne' xula dxelenné' nacu' Elías, bēnnea' bchálaje' waláz chee Dios. Benne' xula dxelenné' nacu' tu benne' xula bchálaje' waláz chee Dios.

29 Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

30 Nadxa gunná be'e Jesús benne' ca'. Gunné':

—Quebe nu xele ca'.

### *Dxuchalaj Jesús ca dxal-la' gatie'*

(Mt. 16.21-28; Lc. 9.22-27)

31 Nadxa guzú lau Jesús dxulé'ene' benne' ca' ca dxal-la' sáca'le'ē Lē', Benne' Gulje' Bēnneache, ne ca xelún benne' gula chee judío ca', ne benne' xíchaje ca' chee bxruze ca', ne benne' dxuluxuzáj'le'ē da nadxixruj bea Dios, xuluzúē' Lē' chalá'ala. Nadxa guzre' le' welútiē' Lē', san xebane' zra guxunne zra.

32 Da nigá guzre' le' caníqueze. Nadxa Pedro guché'ē Jesús chalá'ala, ne guzú lawe' dxedil-le' Lē'.

33 Jesús bexéchaje', ne gunné'ē benne' ca' dxusédene', na' gudil-le' Pedro, dxē'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bénneache dxunu'.

<sup>34</sup> Nadxa Jesús gunné' benne' ca' dxusédene', ne xúgute bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgute da dxezá lázrele le'e, ne gácale ca tu benne' zéajé' chee' te'e xaga béguaj, na' gunle neda' tu zren.

<sup>35</sup> Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bénnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'.

<sup>36</sup> Che tu benne' gape' xúgute da naca chee' xezr la xu nigá, na' gunitie' benne'du xu'e, ¿bízraqueze da ba neza gaca na chee' bénnea'?

<sup>37</sup> Quebe bi gaca gunezruj tu benne' chee' guselé' benne'du xu'e.

<sup>38</sup> Che tu benne' gapa stu'e chia' neda', ne chee' dizra' chawe' chia' lau benne' caní, benne' dxulucá'ana Dios, ne dxelún dul-la, la gaze neda', Benne' Gulje' Bénneache, gapa stú'queza' chee' bénnea' gate xida' nen xel-la szren chee' Xra', ne nen gubáz chee' xabáa lá'azxa ca'.

## 9

<sup>1</sup> Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xeelé'ene' xida xel-la dxenná bea chee' Dios nen xel-la waca chee'.

*Ca guca gate bcha ca gunná Jesús  
(Mt. 17.1-13; Lc. 9.28-36)*

<sup>2</sup> Ca gudé xrupa zra, guché Jesús Pedro, ne Jacobo, ne Juan, na' guxiájlene' benne' canize tu lu xi'a sibe. Na' bcha ca gunná' Jesús lau benne' ca'.

<sup>3</sup> Zra lana Jesús bexacá na chiche ca bezxe' da dxágute na laudxu. Quegá nu chilá' benne' lu xezr la xu gaca quibe' zra lané' chee' xegá'ana na chiche ca guca zra lana Jesús.

<sup>4</sup> Na' benne' ca' dxusede Jesús belelé'ene' Elías, ne Moisés, benne' gulate nédxudaute, dxuluchálajlene' Jesús.

<sup>5</sup> Pedro guzre' Jesús:

—Benne' wesede, cháwelle'e naca zradxu nigá. Guntu' chunna xu'u lágadau', tu chiu', ne tu chee' Moisés, ne tu chee' Elías.

<sup>6</sup> Caní gunná Pedro lawe' da dxelezrebe benne' ca' dxusede Jesús, na' Pedro quebe nézene' ca da dxenné'.

<sup>7</sup> Nadxa betaj tu beuj naga zaj zre'e, da bcache na le', na' lu beuj na' belenne' tu chí'i benne', gunné':

—Benne' nigá naque' Zri'ina' nazrí'ite' lazra'. Le xen da dxenné'.

<sup>8</sup> Gate gulenné'e, québedxa nu nalá' nen le', san tuze Jesús.

<sup>9</sup> Dxácate dxelexétaje' lu xi'a na', gunná be'e Jesús benne' ca' quebe nu xuluchálajlene' ca naca da belelé'ene' gate te na' xebán Benne' Gulje' Bénneache ládujla benne' gate.

<sup>10</sup> Chee' le' na' gulezúe' zrize ca naca da ba guca. Buluchebe ljwezre':

—¿Bizra zéajé da na', xebane' ládujla benne' gate?

<sup>11</sup> Nadxa buluchebe' Jesús:

—¿Bizr chee' na' dxeleenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

<sup>12</sup> Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche chee Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala.

<sup>13</sup> Neda' dxapa' le'e, ba bla' Elías, na' belune' chee' ca naca xúgute da gulaca lazre' ca da dxenná na lu xiche chee Dios ca da dxal-la' gaca chee'.

*Dxexún Jesús tu benne' cuide' xu'ube' be' xriwe'*  
(Mt. 17.14-21; Lc. 9.37-43)

<sup>14</sup> Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxéchaje' le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalene' le' dizra'.

<sup>15</sup> Gate belelé'ene' Jesús, na' xúgute' belexebánene', na' gusi'aca chégüe' naga zua Jesús, ne bulugape' Le' diuzre.

<sup>16</sup> Ca'an guca, Jesús bchebe' benne' ca':

—¿Bizra na' dxedíl-lalele benne' ca'?

<sup>17</sup> Nadxa tu benne' ze' ga na' bechebe':

—Benne' wesede, nache'a zri'ina' nigá chee xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'.

<sup>18</sup> Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezria bzrina' xú'abe', ne dxagu lázxabe'. Chee le' na' ba dxéxrujle'ebe'. Ba gunaba' benne' ca' dxusédenu' xelexebéaje' be' xriwe' na', san quebe gulezéquene'.

<sup>19</sup> Bechebe Jesús:

—Le'e, benne' quebe dxéajlele chia'. ¿Ájate dxal-la' súalena' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

<sup>20</sup> Na' xeaixelxri'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxe bixre dxetúl-labe' lu xu, ne guzría bzrina' dxú'abe'.

<sup>21</sup> Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatebe' bidau'.

<sup>22</sup> Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcale' netu'.

<sup>23</sup> Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

<sup>24</sup> Nadxa xra bi cuide' nigá gunné' zizraj:

—Dxéajle'a chiu'. Gúcale' neda' chee chéajledxa'.

<sup>25</sup> Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnie', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu be-la' dxe cheebe'!

<sup>26</sup> Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup> Nadxa gucá'a Jesús na'be', bechise'-be'. Na' benne' cuide' na' bezebe'.

<sup>28</sup> Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':



—¿Bizr chee na' quebe guzéquentu' netu' xebéajntu' be' xriwe' na'?

<sup>29</sup> Nadxa Jesús guzre' benne' ca':

—Ca naca be' xriwe' caní séquele xebéajle na che ná bale lau Dios, ne gunle gubasa.

*Jesús dxuchálajé' da xula ca gaca gate gatie'*

*(Mt. 17.22-23; Lc. 9.43-45)*

<sup>30</sup> Gate besí'aque' naga zaj zře'e, na' belexedée' naga nababa Galilea. Jesús quebe guca lazre' nu neze ga zué',

<sup>31</sup> lawe' da dxuzéajni'ine' benne' ca' dxusédene', na' guzre' le':

—Zua tu benne' gudé'e neda', Benne' Gulje' Bénneache, lu na' benne' ca' dxeledábague' neda', na' xelútié' neda', san gate gaca chunna zra natia', na' xebana'.

<sup>32</sup> Benne' ca' quebe guléajni'ine' ca da dxé'e le', ne belezrebe' xuluchebe' Le'.

*Nu benne' naque' blau*

*(Mt. 18.1-5; Lc. 9.46-48)*

<sup>33</sup> Nadxa belezrine' lu xezre Capernaum, na' gate zaj zře'e lu xu'u na', bchebe Jesús benne' ca' dxusédene':

—¿Bizra dizra' dxutíl-lalele ljuwézrele za'le la neza?

<sup>34</sup> Gulezre'e zrze lawe' da bulutil-le' dizra' la neza na' che nule' nácadxe' benne' blau.

<sup>35</sup> Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee xúgute' bénneache.

<sup>36</sup> Nadxa guqué'e tu bidau', na' bzue' lebe' gachaj lawe' benne' ca'. Na' bnide'-be', ne guzre' benne' ca':

<sup>37</sup> —Benne' na' gape' ba lá'ana tu bidau' ca bidu nigá lawe' da nazrí'ine' neda', bénnea' gape' ba lá'ana neda', na' bénnea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasel-le' neda'.

*Benne' quebe dxedábague' dxi'u, dxácalene' dxi'u*

*(Lc. 9.49-50; Mt. 10.42)*

<sup>38</sup> Nadxa Juan guzre' Jesús:

—Benne' Wesede, blé'entu' tu benne' dxebéaje' be' xriwe' da xu'u bénneache, dxuchínene' Lau' Lue', san bénnea' quebe dxune' dxi'u tu zren. Chee le' na' gúzrentu' le' québedxa gune' ca'.

<sup>39</sup> Jesús guzre' benne' ca' dxusédene':

—Quebe bi xe le'. Che nu benne' gune' tu xel-la waca, guchínene' La' neda', benne' nigá quebe gaca nne' schanni' chia'.

<sup>40</sup> Caní naca na lawe' da benne' quebe dxedábague' dxi'u, dxácalene' dxi'u.

<sup>41</sup> Núteteze benne' gunne' le'e tu zriga' nisa ne chee La' neda' lawe' da nácale chia' neda', Cristo, da líqueze dxennía', wazí'queze' da dxal-la' si'e.

*Ca naca da dxun na dxi'u benne' dul-la*

*(Mt. 18.6-9; Lc. 17.1-2)*

<sup>42</sup> Gunnadxa Jesús:

—Núteteze benne' gulé'ene' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi'i lba bénnea', ne cheajchú'unadxu le' lu da situj chee nísadau'.

<sup>43</sup> Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpatę na'u, naga quebe xexula xi' da xezacu'.

<sup>44</sup> Lataj ba xa' na' quebe xelate bzuga', bę dxeláguba' benne' ca' dxelunę' da calela, na' xi' na' cabata' xexúl-laqueze na.

<sup>45</sup> Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpatę ni'u, naga quebe xexula xi'.

<sup>46</sup> Lataj ba xa' na' quebe xelate bzuga', bę dxeláguba' benne' ca' dxelunę' da calela, na' xi' na' cabata' xexúl-laqueze na.

<sup>47</sup> Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpatę xiaj lau'.

<sup>48</sup> Lataj ba xa' na' quebe xelate bzuga', bę dxeláguba' benne' ca' dxelunę' da calela, na' xi' na' cabata' xexúl-laqueze na.

<sup>49</sup> 'Ca dxundxu gate dxugú'udxu zede' bela' da guzáladxu lu xi' cheę xegá'ana chawe' na, ca'an gaca cheę xúgutę benne'. Cá'anqueze dxugú'udxu zede' da dxuzęxedxu lau Dios.

<sup>50</sup> Zede' na' naca na da chawe', san che xenite xel-la sna'a cheę na, ¿ájala gundxu cheę guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

## 10

### *Ca naca cheę benne' dxexelę'ę nen zru'ule'* (Mt. 19.1-12; Lc. 16.18)

<sup>1</sup> Nadxa bedxúaj Jesús xęzre Capernaum, na' guxíaje' naga nababa Judea xechalá'a xęgu Jordán naga dxalaj gubizra. Na' belezraga bęnneache zan naga zua Jesús, na' xecha lasa na' bsédenę' lę' cáqueze dxunę'.

<sup>2</sup> Nadxa bal-la benne' xudau' fariseo ca' belezrine' lau Jesús, na' buluchebe' Lę' cheę da gun nne' Lę' tu da quebe dxal-la' nne'. Buluchebe' Lę':

—¿Waca tu benne' xelę'ę nen zru'ule'?

<sup>3</sup> Nadxa bechebe Jesús:

—¿Bizra gunná be'e Moisés le'e?

<sup>4</sup> Na' belexechebe benne' ca':

—Benna Moisés lataj gunęzrujdxu zru'uladxu tu xiche da dxenná na dxelá'adxu, na' gusandxu lę'.

<sup>5</sup> Nadxa Jesús guzrę' lę':

—Caní gunná be'e Moisés lawe' da zaj naca zizraj lázrdaule le'e.

<sup>6</sup> Gate nédxudau' gate bęn Dios xúgutę da dxelę'edxu, na' bęnę' bęnneache benne' biu, ne nu'ula, na' gunné':

<sup>7</sup> "Cheę lę' na' benne' biu na' gusanę' xruze xrnę'ę cheę gaquę' tuze nen zru'ule',

<sup>8</sup> na' dxupe' xelaquę' ca tuze benne'." Ca' naca na, québedxa zaj naca chupe', san tuze benne' zaj naquę'.

<sup>9</sup> Cheę lę' na' netú benne' quebe dxal-la' xelę'ę da nuchaga Dios.

<sup>10</sup> Gate zaj zra' lu xu'u benne' ca' dxusede Jesús buluchebe' Lę' xetú lasa ca naca cheę da niga.

<sup>11</sup> Na' Jesús guzrę' benne' ca':

—Che tu benne' xelę'ę nen zru'ule', ne xezúalęnę' nu'ula xula, dxíchuję' xrba cheę wechaga na' lawe' da dxusebague' zru'ule' nedxu na' dul-la.

12 Cá'anqueze che tu nu'ula gusané' benne' cheé', ne xezúaləne' benne' xula, la gázqueze dxíchujé' xrba cheé wechaga na' da dxusebague' benne' cheé' dul-la.

*Jesús dxenabe' Dios gun chawé'e bidu ca'*

(Mt. 19.13-15; Lc. 18.15-17)

13 Nadxa bəneache ca' guleché'e bidu cheé' ca' lau Jesús cheé xrua ne'e lebe', na' benne' ca' dxusede Jesús gulezú lawé' dxeledil-le' benne' ca' zaj naché'e bidu ca'.

14 Gate ble'e Jesús da dxelune', na' bzre'e, ne guzre' le':

—Le güe bidu ca' lataj xeledá'abe' naga zua'. Quebe guzágale-be' lawe' da benne' zaj naque' ca' bidu caní xelu'e naga dxenná bea Dios.

15 Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bəneá' naga dxenná bea Le'.

16 Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawé'e-be'.

*Benne' cuide' nape' da gunní'a dxuchálajlene' Jesús*

(Mt. 19.16-30; Lc. 18.18-30)

17 Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' cheé gapa' xel-la nabán zeajlí canna?

18 Jesús guzre' le':

—¿Bizr cheé na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje.

19 Núnbeaquezu' ca da bdxixruij bea Dios gate na' gunné':

Quebe quichju' xrba cheé wechaga na'.

Quebe gutiu' benne'.

Quebe cuanu' cheé benne'.

Quebe nneu' cheé nu benne' da quebe naca na.

Quebe gagu lanu'.

Gudapa ba lá'ana xra xrna'u.

20 Nadxa bəneá' bechebe':

—Benne' wesəde, xúgute da caní dxuna' nácatea' bidau'.

21 Na' Jesús gunné'e le' xrtandau', ne guzre' le':

—Tu da dxexázrjenu'. Guxíaj xeajete xúgute da napu', na' bnezruj benne' xache' ca' dumí cheé na. Nadxa gapu' da gunní'a xabáa. Na' gudá, gacu' ca tu benne' zéajé' cheé te'e xaga béguaj, ne ben neda' tuze.

22 Gate beng' da nigá, na' benne' cuide' na' bewi'ine lázrele'e, na' bexíaje' dxewí'ing' lawe' da nácalé'e benne' gunní'a.

23 Nadxa Jesús gunné'e ni naze, na' guzre' benne' ca' dxusedene':

—Stébeté naca chu'u benne' gunní'a naga dxenná bea Dios.

24 Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébeté naca xelú'u naga dxenná bea Dios benne' dxuluxrén lazre' xel-la gunní'a.

25 Chadidxa te tu bea zren lu negue xeche' quézcala chu'u tu benne' gunní'a naga dxenná bea Dios.

26 Gate belén benne' ca' dizra' nigá, na' belexebánele'ene', na' buluchebe lijwezre':

—¿Núzraqueze la xca'?

27 Jesús gunné'e benne' ca', ne guzrē' lē':

—Quebe seque' nu bēnne' gunē' da nigá, san Dios wazéqueñe'. Quebe bi de da quebe gaca gun Dios.

28 Nadxa Pedro guzrē' Jesús:

—Xránantu', netu' ba bcá'anantu' xúgute da nápantu', ne zéajlentu' Lue'.

29 Na' bechebe Jesús:

—Da li dxapa' le'e, núteteze benne' gusanē' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee' ne chia' neda', u ne chee' dizra' chawe' chia',

30 benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bēnneache lē'. Lu xezr la xu da za za' wazi'queze' xel-la nabán zeajli canna.

31 Zánete benne' zaj naca na'a benne' blau xelaque' ca benne' bzebe, na' zánete benne' zaj naca na'a ca benne' bzebe xelaque' benne' blau.

*Dxuchalaj Jesús xetú lasa ca gaca gate gatiē'*

*(Mt. 20.17-19; Lc. 18.31-34)*

32 Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédene'. Dxelezrebe benne' ca', ne lu xel-la dxelezrebe zjácalene' Lē'. Na' da xula gucá'a Jesús benne' chazrinnu ca' dxusédene', na' guzú lawe' dxē'e lē' ca naca da dxal-la' gaca chee'.

33 Na' guzrē' lē':

—¡Le na' xque nigá! Dxeüendxu zéajdxu Jerusalén naga tu benne' gudé'e neda', Benne' Guljé Bēnneache, lu na' benne' xíchaj ca' chee bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee gatia', na' wuludee' neda' lu na' benne' zitu' ca'.

34 Nadxa xelún lē' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

*Jacobo ne Juan dxelenabe' Jesús bi gunē' chee'*

*(Mt. 20.20-28)*

35 Nadxa Jacobo ne Juan, zri'ine Zebedeo, belezrine' lau Jesús, na' gulé'e Lē':

—Benne' Wesede, dxaca lázrentu' gunu' cheentu' da nábantu' Lue'.

36 Nadxa bchebe Jesús lē':

—¿Bi dxaca lázrele guna'?

37 Na' belexechebe' Lē':

—Benna netu' lataj cué'entu', tuntu' chalá'a xabēla chiu', ne xetuntu' chalá'a xéglala chiu' naga nna be'u xabáa chiu'.

38 Na' guzre Jesús lē':

—Le'e quebe nézele da dxenábale. ¿Waca xí'ajle le'e da na' xi'aj neda', da zéajje na ca naca da sácadxu? ¿Waca chuale nisa ca chua' neda' nisa lu xel-la gute?

39 Lē' belexechebe':

—Wácantu'.

Na' Jesús guzrē' lē':

—Da li wé'ajle ca naca da na' xi'aj neda', ne chuale nisa ca chua' neda' nisa.

40 Chee cué'ele chalá'a xabēla chia' u chalá'a xéglala chia', quegá neda' gunna' na. Gaca chee benne' ca' ba nucueza Dios chee'.

41 Gate xechi benne' ca' dxusede Jesús belenne' na, na' belezré'e nen Jacobo ne Juan.

42 Jesús gunné' benne' ca', na' guzrē' lē':

—Ba nézquezle ca dxelún benne' dxelenná be'e benne' xezr la xu ca'. Dxelún cuine' xrane benne' xezr la xu ca'. Benne' blau ládujla le' dxezi'e ba neza xel-la dxenná bea chee'.

<sup>43</sup> Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' gune' zrin chee ljwezre',

<sup>44</sup> na' che nu benne' ládujla le'e dxaca lazre' gaque' benne' xíchaje, benne' nigá dxal-la' gaque' ca tu benne' nada'u chee gune' zrin chee xúgute ljwezre'.

<sup>45</sup> Caní gaca na lawe' da cá'anqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

### *Dxexún Jesús tu benne' la chul-la le' Bartimeo*

(Mt. 20.29-34; Lc. 18.35-43)

<sup>46</sup> Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusédené', ne nen benne' zante, na' zua tu benne' la chul-la le' Bartimeo, zri'ine Timeo, dxe'e dxu'a neza dxenabe' guna'.

<sup>47</sup> Na' ca bénne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—¡Jesús, Zri'ine David, bexache lazre' neda'!

<sup>48</sup> Benne' zan ca' guledil-le' le' chee sue' zrize, na' le' zízrajdxá gunné':

—¡Zri'ine David, bexache lazre' neda'!

<sup>49</sup> Nadxa gugá Jesús, na' gunné':

—Le nné le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

<sup>50</sup> Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús.

<sup>51</sup> Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

<sup>52</sup> Na' Jesús guzre' le':

—Waca xexiaju'. Bache bexacu' lawe' da guxéajle'u chia'.

La ble'ete benne' la chul-la na', na' guxíajlene' Jesús la neza.

## 11

### *Dxu'u Jesús xezre Jerusalén*

(Mt. 21.1-11; Lc. 19.28-40; Jn. 12.12-19)

<sup>1</sup> Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédené',

<sup>2</sup> na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' le'ba'. Le sezre-ba', ne le che'-ba' nigá.

<sup>3</sup> Che nu benne' nabe' le'e bizr chee na' dxesézrele-ba', xégale le': “Xránadxu dxechine'-ba”, na' la xesél-la'te' le'ba'.

<sup>4</sup> Nadxa xjaque', ne xea'jlexraque' burro na' da'ba' xaga dxu'a dxa xu'u cuita neza, na' gulesézre'-ba'.

<sup>5</sup> Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee' na' dxesézrele búrrua'?

<sup>6</sup>Nadxa le' gulé'e benne' ca' ca ba gunnáqueze Jesús, na' belúe' le' lataj.

<sup>7</sup>La belexeché'ete' búrrua' lau Jesús, na' buluzríe' zra lané' cúzruba', na' guzría Jesús leba'.

<sup>8</sup>Benne' zante gulechúluje' xicha chee', ne xladxe' la neza, na' benne' xula gulechugue' zina' da gulíxrue' la neza.

<sup>9</sup>Na' benne' ca' zaj zrié' lawe', ne benne' ca' zjaque' bzebe, gulezú lawe' dxeleñné' zizraj:

—¡Gaca ba! ¡Lá'azxa naca benne' ze'e, nase-la Xránadxu Dios Le'!

<sup>10</sup>¡Lá'azxa naca xel-la dxenná bea da za', xel-la dxenná bea chee' xradxu David! ¡Gaca ba Dios!

<sup>11</sup>Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute da zaj nnita du cuite', na' bezé'e zexíaje' xezre Betania nen benne' chazrinna ca' dxusédené', lawe' da ba zeaj dxezré'.

### *Jesús dxugu'e de' xaga higo* (Mt. 21.18-19)

<sup>12</sup>Gute xu zra xula gate na' gusá'aque' xezre Betania, gudún Jesús.

<sup>13</sup>Na' blé'eng' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre.

<sup>14</sup>Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

### *Jesús dxexún lbe'e lu xudau'* (Mt. 21.12-17; Lc. 19.45-48; Jn. 2.13-22)

<sup>15</sup>Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa'u na'. Na' bdxixre' blaga chee' benne' weche'e dumí chee' benne' zitu', ne bdxixre' naga dxelebé' benne' wete bgúgudu ca'.

<sup>16</sup>Quebe be'e lataj nu benne' xudé'e xua ca' lu xudau'.

<sup>17</sup>Nadxa bsédené' bénneache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

<sup>18</sup>Na' benne' xíchaje ca' chee' bxruze ca', ne benne' dxuluxuzájle'e ca da nadxiruj bea Dios belenne', na' gulezú lawe' dxelexíluje' ájala gaca xelúte'e Jesús lawe' da dxelezrebe' Le'. Ca'an guca lawe' da dxelexebane xúgute bénneache ca naca da dxuséde Jesús le'.

<sup>19</sup>Ca gula chizrela, Jesús bezé'e lu xezre.

### *Dxebizre xaga higo* (Mt. 21.20-22)

<sup>20</sup>Ca gula zra xula che zílala, na' Jesús, ne benne' ca' dxusédené' belexedé'e na', na' belelé'eng' xaga higo na', ba nabizre na duté lue na.

<sup>21</sup>Nadxa xeajsá lazre Pedro, na' guzre' Jesús:

—Benne' weséde, gunná'xque xaga higo nigá da gulú'u na de'. Bache gubizre na.

<sup>22</sup>Jesús gunné':

—Le cheajlí lazre Dios.

<sup>23</sup> Da li dxapa' le'e, che nútetezele nnale, xeḗ xi'a nigá: "Cuasa lue' nigá, xeajchú'u lu nísadau'", ne che quebe dxun chupa lázrele, na' chéajlele waca da ba gunnale, na' gácaqueze na.

<sup>24</sup> Chee le na' dxapa' le'e, xúgutę da ná bale Dios gate dxuchálajlele Le', che chéajlele ba guzile na, ca'an gácaqueze.

<sup>25</sup> Gate na' dxuchálajlele Dios, che dxezrá'ale nu benne', le gunite lau chee bénnea' chee cá'anqueze Xrale zuę' xabáa gunite lawe' dul-la da nabágale.

<sup>26</sup> Che quebe gunite laule chee bénnea', Xrale zuę' xabáa quebe gunite lawe' dul-la da nabágale.

### *Ca naca xel-la dxenná bea da napa Jesús*

(Mt. 21.23-27; Lc. 20.1-8)

<sup>27</sup> Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchaje ca' chee bxruze ca', ne benne' dxuluxuzájle'e da nadxixruj bea Dios, ne benne' gula ca'.

<sup>28</sup> Na' benne' caní gulenábeņe' Jesús:

—¿Bizra xel-la dxenná bea napu' dxunu' da caní? ¿Nuzra bęna lue' xel-la dxenná bea nigá?

<sup>29</sup> Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní.

<sup>30</sup> ¿Nuzra gusel-lá Juan bchue' bénneache nisa? ¿Dios che bénneache? Le xechébe na'a.

<sup>31</sup> Nadxa gulezú lau benne' ca' dxuluchálajle' leze', dxelé ljwezre':

—Che xędxu Le', Dios gusel-le' le', na' nnáqueze': "¿Bizr chee na' quebe guxájlele chee'?"

<sup>32</sup> Che nnadxu bénneache gulesel-le' le', dxal-la' zrėbedxu da xelún benne' xezre ca'.

Caní gulenné' lawe' da xúgutę benne' xezre nigá dxeléajle'e guca Juan benne' bchálajle' waláz chee Dios.

<sup>33</sup> Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxę'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

## 12

### *Da dxulé'e na ca naca chee benne' węn zrin quebe zaj naque' xrlátaje*

(Mt. 21.33-46; Lc. 20.9-19)

<sup>1</sup> Nadxa guzú lau Jesús dxuchálajleņe' benne' ca' tu da dxulé'e na. Dxe'e le':  
—Zua tu benne' bde'e lba uva ca' lu xęzr la xu chee', na' bęne' le'aj chee na. Bęne' tu xiaj lutju naga guchuchuje' uva ca', ne bęne' tu bdupa' naga cue' benne' guxúe' da caní.

'Nadxa bdeę' xęzr la xu chee' na' lu na' benne' węn zrin ca' chee' xelunę' la'a lina chee na, na' guzė'e zėaje' xezre zitu'.

<sup>2</sup> Ca gula zra chee lina, na' gusel-le' tu bi węn zrin chee' cheajxęzri'ibe' lu na' benne' węn zrin ca' ca naca lina da dxal-la' xezí' benne' xranbe'.

<sup>3</sup> Na' benne' węn zrin ca' gulel-le'-be', ne buluzalje'-be', na' belexesel-le'-be' dáchezebe'.

<sup>4</sup> Nadxa xránabe' gusel-le' bi węn zrin xula, na' bi nigá belú'e-be' xiaj, ne gulelé'e xíchajbe', ne buluchálajle'-be'.

<sup>5</sup> Na' xránabe' na' gusel-le' xetube', na' bi nigá belútete benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

<sup>6</sup> 'Xránabe' zua tu zrí'ine' bi biu, bi nazrí'ile'ene', na' naga bzébetē gusel-le' zrí'ine' nigá, dxenné' lu xichaj lázrdawe': Dخال-la' xelape' ba lá'ana zrí'ina'.

<sup>7</sup> Benne' wēn zrin ca' gulenné', dxelé ljwezre': "Bi nigá gueque chee'be' xezr la xu nigá. Gútete dxu-be' na'a, na' dxi'u xegá'analēdxu da nigá."

<sup>8</sup> Ca'an guca, gulē-le'-be', ne belútete'-be', na' gulebéaje' be'l-la' dxen chee'be' lu xezr la xu na'.

<sup>9</sup> Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'e, na' gútete' benne' wēn zrin ca', na' gudé'e' xezr la xu chee' lu na' benne' xula ca'.

<sup>10</sup> Ba blábale da naxúaj na lu xiche chee' Dios. Dxenná na:

Xiaj na' da quebe buluchine benne' wēn xu'u, xiaj na' naca na'a xiaj blau chee' xu'u.

<sup>11</sup> Da nigá ben Xránadxu, na' dxexebánedxu chee' na.

<sup>12</sup> Nadxa gulaca lazre' xelel-le' Jesús lawe' da zaj nézene' bchálaje' da dxulé'e nigá chee' gulé'ene' ca' zaj naca le'. Quebe bi gulune' lawe' da gulezrebe' bi xelūn benne' xezre ca'. Chee' le' na' bulusanē' Jesús, besí'aque'.

*Da bchalaj Jesús chee' da dxuchizruj xu'u lawe'*

(Mt. 22.15-22; Lc. 20.20-26)

<sup>13</sup> Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee' gulebéaje' Le' dizra' chee' xelezéquene' xelawe' Le' zria.

<sup>14</sup> Benne' caní belelé'e lau Jesús, na' gulé'e Le':

—Benne' wesēde, ba nézentu' ca' dxennáu' da li, ne quebe dxezí'u ca' da dxelennaze bēnneache, lawe' da quebe dxennáu' Lue' ca' zaj naca cúzreze bēnneache. Da li naca ca' dxusédenu' bēnneache da naca chee' Dios. ¿Dxunna da nadxiruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dخال-la' quízrujdxu, che quebe quízrujdxu?

<sup>15</sup> Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee' na' dxebéajle neda' dizra'? Le dajguá nigá tu dumí da dxízrujle chee' le'eda' na.

<sup>16</sup> Na' bedajlegü'e na, na' ca ble'e Jesús le' na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee' benne' dxenná bea Roma.

<sup>17</sup> Nadxa Jesús guzre' benne' ca':

—Le' gunezruj chee' benne' dxenná bea Roma da naca chee', na' le' gunezruj chee' Dios da naca chee' Dios.

Na' belexebánene' ca' naca da bchalaj Jesús.

*Da bchalaj Jesús ca' xelexebán benne' gate*

(Mt. 22.23-33; Lc. 20.27-40)

<sup>18</sup> Nadxa belezrin lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulénábene' Jesús caní:

<sup>19</sup> —Benne' wesēde, Moisés bzuaje' chee'dxu da nadxiruj bea nigá: "Che tu benne' biu gatiē', ne xegá'ana zru'ule', na' quebe nu zua bi chee' bēnnea', na' benne' biche' dخال-la' xequé'e nu'ula na' gute benne' chee' chee' sua zrí'ine bēnnea' gutiē'."



20 Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua.

21 Na' benne' gudxupe' bequé'e nu'ula na', na' cá'anqueze gutie' quebe nu zrí'ine' zúaqueze. Cá'anqueze guca chee benne' guxunne'.

22 Ca'an guca, benne' gazre caní gulezúalene' nu'ula na', na' netue' quebe nu zrí'ine' guzúa. Naga xeajsete na gúte'e nu'ula'.

23 Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale' benne' gazre ca' le'?

24 Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios.

25 Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa.

26 Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.”

27 Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

### *Da nadxiruj bea Dios da naca blau*

*(Mt. 22.34-40)*

28 Na' zéqueze tu benne' dxuxuzájle'e da nadxiruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxiruj be'e Dios naca na da blaudxa?

29 Na' Jesús guzre' le':

—Da bdxiruj be'e da naca na da blaudxa ca xúgute' dxenná na caní: Le xene benne' Israel. Xránadxu Dios tuze naque'.

30 Bzri'i Xranu' Dios du lazru', ne nen duté bénne'du xu'u, ne nen duté xichaj lázrda'u, ne nen duté xel-la wal-la da napu'. Da nigá naca da nadxiruj bea da blaudxa,

31 na' da nadxiruj bea gudxupe' nácaqueze na ca le' na, da dxenná na caní: Bzri'i benne' xula ca nazrí'i cuinu'. Quebe zua xetú da nadxiruj bea da naca blaudxa ca da chupa caní.

32 Nadxa gunná bénnea' dxuxuzájle'e da nadxiruj bea Dios, dxé'e Jesús:

—Ca'an xanne naca ca bechebu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le',

33 na' che zri'idxu Dios du lázredxu, ne nen duté xichaj lázrdaudxu, ne nen duté bénne'du xú'udxu, ne nen duté xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute' be xixre' ca' dxútedxu-ba' lau Dios, ne ca xúgute' da dxuzéxedxu lu cugu chee Dios.

34 Nadxa Jesús, ca benne' bchálaje' chawe', na' guzre' le':

—Xeláteze ne de' na chee nna bea Dios xichaj lázrda'u.

Na' québedxa nu bexazre nábene' Le' dizra' ca'.

### *¿Nu zrí'ine' naca Cristo?*

*(Mt. 22.41-46; Lc. 20.41-44)*

35 Jesús dxusédene' benne' ca' lu xudau', na' gunné':

—¿Bizr chee na' dxelenná benne' dxuluxuzájle'e da nadxiruj bea Dios naca Cristo zrí'ine David?

36 David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':  
 "Gudxé'e chalá'a xabela chia',  
 ca zrin zra ba nuzúa' benne' dxeledábage' lue',  
 chee na be'enu' le'."

<sup>37</sup> Che David ná'queze dxenné': "Xrana", ¿ájala chee na' naque' zrí'ine'?  
 Benne' zan ca' du lazre' buluzé' nague' chee'.

*Jesús dxulé'ene' zaj nachixre benne' ca' dxuluxuzájle'e da nadxixruj bea Dios*  
 (Mt. 23.1-36; Lc. 11.37-54; 20.45-47)

<sup>38</sup> Ca dxusede Jesús benne' ca', na' gunné':

—Le gapa chi'i cuínale chee benne' ca'an dxuluxuzájle'e da nadxixruj bea Dios. Benne' caní dxeledánene' dxelácue' zra lane' tunna, ne dxeledánene' xulugapa bénneache le' diuzre nen dizra' ba lá'ana lau bénneache ca'.

<sup>39</sup> Benne' caní dxeledánene' dxelebé'e lataj blau lu xu'u naga dxelezraga benne' dxelúe lá'ane' Dios, ne dxeledánene' dxelebé'e lataj blau naga dxelawe' xrche'.

<sup>40</sup> Benne' caní dxelegüe' lizre xrlataj nu'ula ca' ba gulate benne' chee', na' chee xululé'e cuine' ca benne' xrlátaje, dxelune' xel-la dxuluwizraj Dios tunna. Le' zaj nabágadxé' zria.

*Dumí da gulú'u nu'ula xache' ba gute benne' chie'*  
 (Lc. 21.1-4)

<sup>41</sup> Tu lasa gate na' dxe' Jesús lu xudau' cuita naga dxelegü'e dumí, na' dxenné'e ca dxelún benne' ca' dxelegü'e dumí, ne ca dxelún benne' gunní'a ca', dxelegü'e dumí zren.

<sup>42</sup> Ca'an guca, bzrin tu nu'ula xache' ba gute benne' chie', na' gulu'e chupa dumí lásedau' da quebe zaj zácaté can.

<sup>43</sup> Nadxa gunné Jesús benne' ca'an dxusédené', na' guzre' le':

—Da li dxapa' le'e, nu'ula xache' nigá bnézrudxe' ca xúgute benne' ca'an gulegü'e dumí.

<sup>44</sup> Xúgute benne' ca' gulegü'e da québedxa dxelechínne'. Nu'ula xache' nigá gulu'e ca naca da nape', da nunte' gawe'.

## 13

*Dxuchalaj Jesús ca gaca gate xrinnaj xudau'*  
 (Mt. 24.1-2; Lc. 21.5-6)

<sup>1</sup> Gate bedxúaj Jesús lu xudau', na' tu benne' dxusédené' guzre' le':

—Benne' Weséde, gunná'xque ca zren naca xudau', ne xiaj xrtante caní.

<sup>2</sup> Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

*Da xelunna bea na gate cheajsé chee xezr la xu nigá*  
 (Mt. 24.3-28; Lc. 21.7-24; 17.22-24)

<sup>3</sup> Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

<sup>4</sup> —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

<sup>5</sup> Na' bechebe Jesús:

—Le gapa chi'i cuínale chee quebe nu si xe le'e,

6 lawe' da xeledá' benne' zante xelún lu'a neda', welenné' zaj naque' Cristo, na' welezí xē'e benne' zante.

7 'Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé chee na,

8 lawe' da xeledíl-lalē benne' tu xēzr la xu benne' xetú xēzr la xu, na' tu xēzre benne' tíl-lalē na xetú xēzre. Wazrú' zánete xēzre, ne wata' gubina', ne wadxé'e na zraga bēnneache. Da caní zaj naca na naga su lauze ca naca da xelezaca zi' bēnneache.

9 'Le guxúe cuínale lawe' da xuludé'e le'e lu na' benne' xu'u lawe', na' xuluzaljē le'e lu xu'u naga dxulucá'ana szreng' Dios. Xuludé'e le'e lau benne' xu'u lawe' ca', ne lau benne' dxelenná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'.

10 Nédxudxa ca zrin zra cheajsé chee na, dizra' chawe' chia' gaca lban chee na lau bēnneache zaj zré'e xúgute xēzr la xu.

11 Gate xelechē'e le'e chee xuludé'e le'e lu na' benne' xu'u lawe' ca', quebe cue'le gunne xue bi nnae, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lázaxa, Le' nne'.

12 Ca xelún bēnneache lu zra na', xuludé'e bi biche' ca' lu na' benne' xelútiē' lēbe'. Cá'anqueze xelún xruze xrna' ca', xuludé'e zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátie'.

13 Xúgute bēnneache xelezré'e le'e lawe' da nácale chia' neda'. Bēnnea' zē tipe' ca zrindxa zra cheajsé chee na, la bēnnea'.

14 'Daniel, bēnnea' bchálajē waláz chee Dios bzuaje' ca naca chee da sban da guzríá xi na. Gate lé'ele le'e zria da nigá lataj lázaxa naga quebe dxal-la' cuía na, nadxa benne' zaj zré'e xēzre ca' zaj nababa xēzr la xu Judea dxal-la' xuluzrúnnuje', ne chjaque' lu xi'a zren. (Benne' dxulabe' da nigá dxal-la' cheajní'ine' da naca chee na.)

15 Nu benne' zria chju'u lizre' lu zra na' quebe dxal-la' xexétaje' chee bi xebéaje' lu xu'u.

16 Benne' zē le'e xixre' quebe dxal-la' xezrine' lizre' chee xequé'e zra lane'. Dخال-la' xuluzrúnnujte benne' caní.

17 Baxache' xelaca nu'ula zaj zue' zi'i, ne nu'ula ca' zaj nuxre' bidu dx'e'ene lu zra na'.

18 Le naba lau Dios chee quebe gaca beu' zaga gate na' dxal-la' guzrúnnujle,

19 lawe' da xelezaca zidxa bēnneache lu zra ca'an ca da quebe ne xelezácate', gulala ben Xránadxu Dios xēzr la xu nigá, ne québedxa xelezácadqe' ca'.

20 Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi chee' ca', bi ca' ba gucá'a Le'.

21 'Lu zra na', che nu benne' dxē'e le'e: "Le na' xque, nigá zua Cristo", u che nne': "Le na' xque, na' zē'", quebe chéajle chee'.

22 Welelá' benne' xelezí xē'e, benne' xelunē' lu'a Cristo, ne xelunē' lu'a xel-la waca chee xabáa chee xelezí xē'e bi ca' ba gucá'a Dios che xelezéquene'.

23 Le sua le'e ban lazre'. Neda' ba gucha' le'e xúgute nédxute ca gaca na.

*Ca gaca gate xida Benne' Gulje' Bēnneache*  
(Mt. 24.29-35, 42-44; Lc. 21.25-36)

24 Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'.

<sup>25</sup> Belaj ca' xelexruj na zran xabáa, na' ca da zaj nalá' zaj zē tipa zran xabáa welezrízetē na.

<sup>26</sup> Ca nadxa xelexé'eng' neda', Benne' Guljē' Bénneache, za'a lu beuj bza, napa' xel-la waca zren, ne da xabáa chia'.

<sup>27</sup> Na' la sél-latea' gubáz cheē xabáa chia' ca' cheē xuluchague' benne' ca' gunniá', benne' zaj zre'ē dapa saca cheē xezr la xu nigá, benne' zitu' zá'aca nila, zá'aca na'la.

<sup>28</sup> 'Le gusede ca naca da dxulé'e na ca naca cheē xaga higo. Gate na' dxelexedxé'ene zruze na, ne zá'aca xrlague na, na' ba nézele za beu' la.

<sup>29</sup> Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácatē na.

<sup>30</sup> Da li dxapa' le'e, xúgutē da caní gaca na nédxudxa ca xelate bénneache zaj zre'ē lu zra na'.

<sup>31</sup> Xabáa ne xezr la xu nigá wadé cheē na. Xrtizra' nigá quebe te na ca'anze, san waca li na.

<sup>32</sup> 'Ca naca cheē zra na', ne cheē beu' na' quegá nu neze bata gaca na. Quebe zaj neze gubáz cheē xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup> 'Cheē lē na', le sua le'e ban lazre'. Le guxúe, ne le guchálajlē Dios lawe' da quebe nézele bátala zrin zra na'.

<sup>34</sup> Gaca na ca guca cheē tu benne' biu, benne' guzé'ē zéajē' zitu'. Gate na' za dxúajē' xu'u, na' dxudégé' da nape' lu na' bi wen zrin cheē' ca', ne dxunézrujē' tu tube' zrin da xelunbe', ne dxusebague' benne' ze' dxa xu'u guxúe xánniē'.

<sup>35</sup> Cheē lē na', le sua le'e ban lazre' lawe' da quebe nézele le'e bátala xelá' xrane xu'u, che dxe xrínneze, che dxela, che ca cuezre xjeaj, che che zílala,

<sup>36</sup> ga gaze xelé'ē chadí dutē, na' cheajxraque' le'e dxásele.

<sup>37</sup> Ca da dxenniá', dxapa' le'e, dxapa' xúgutē benne': ¡Le sua ban lazre'!

## 14

### *Dxelexegá'ane' dizra' cheē xelexé-le' Jesús* (Mt. 26.1-5; Lc. 22.1-2; Jn. 11.45-53)

<sup>1</sup> Xechupa zra za zrin cheē xelunē' laní cheē xulusá lazre' ca naca da ben Dios gate na' bebéajē' benne' Israel ca' lu xezr la xu Egipto, laní na' dxelawē' xeta xtila da quebe nachixre cua zichaj cheē na. Na' benne' xíchajē' ca' cheē bxruze ca', ne benne' dxuluxuzájle' da nadxixruj bea Dios belilaj lazre' ájala xelunē' cheē xelexé-le' Jesús bagácheze cheē xelútiē' Lē'.

<sup>2</sup> Na' gulenné':

—Quegá gundxu na lu laní, cheē quebe dxe'ena zraga bénneache.

### *Tu nu'ula dxegúé'ē da za zichaj Jesús* (Mt. 26.6-13; Jn. 12.1-8)

<sup>3</sup> Zua Jesús lu xezre Betania, lu lizre tu benne' lē' Simón, benne' guzríē' wē' guzru'. Dxácatē zaj dxe'ē dxelawē' na', na' bzrin tu nu'ula nu'ē tu da dau' da naca na xiaj xrtan da nazí le na alabastro, ne nazratē na da za da dxelá xizre cheē xiaj nardo, da zácalē'ē na. Na' gulé'ē da dau' na', ne blálajē' da za na' zichaj Jesús.

<sup>4</sup> Bal-la benne' ca', benne' zaj zre'ē na', belezré'ē, na' gulenné', dxelē' ljwezre':

—¿Bizr cheē na' ben ditaj nu'ula nigá da za na'?

<sup>5</sup> Waca ta'u da na' chee sídxadxu ca lázrujdxu chee tu iza, chee gácaleđxu benne' xache' ca'. Na' guledil-le' nu'ula'.

<sup>6</sup> Na' Jesús guzre' le':

—Quebe xeŕe nu'ula nigá ca'. ¿Bizr chee na' dxunle le' zeđe? Ca naca da ben nu'ula nigá chia' neda' naca na da cháwelle'e.

<sup>7</sup> Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e.

<sup>8</sup> Nu'ula nigá bene' ca da guzéquene', gulu'e da za bel-la' dxen chia' nédxula chee zra gate gachia' lu xedxu ba.

<sup>9</sup> Da li dxapa' le'e, gáteteze na' gaca lban chee dizra' chawe' chia' lu xúgute xezre zaj nnita xezr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

*Judas dxexegá'ane' dizra' gudé' Jesús lu na' benne' ca' dxeledábage' Le'*

(Mt. 26.14-16; Lc. 22.3-6)

<sup>10</sup> Nadxa Judas Iscariote, tu benne' chazrinnu ca' dxusede Jesús, guxíaje' xeajchálajlene' benne' xíchaje' ca' chee bxruze ca' chee xelexegá'ane' dizra' ájala guné' gudé' Jesús lu na' benne' ca'.

<sup>11</sup> Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawe' dxexílaje' ájala gudé' Jesús lu na' benne' ca'.

*Da dxágudxu chee gusá lázredxu ca gute Jesús*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Zra nedxu chee laní gate dxelawe' xeta xtila da quebe nachixre cua zichaj chee na, ne dxelutie' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusede Jesús buluchebe' Le':

—¿Gazra dxaca lazru' chéajntu' cheajcuézentu' da gágudxu Laní Pascua?

<sup>13</sup> Nadxa Jesús gusel-le' chupa benne' ca' dxusédené'. Dxe'e le':

—Le chjaca lu xezre Jerusalén, na' cheajxrácale tu benne' biu ze nu'e tu dxe'e nisa. Le chjácalene',

<sup>14</sup> na' naga xexu'e, xeŕe benne' xrane xu'u na': “Benne' Wesede cheedxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusédeda'?”

<sup>15</sup> Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

<sup>16</sup> Nadxa benne' ca' dxusédené' belexedxúaje' gusá'aque', na' belezrine' xezre Jerusalén. Na' guca xúgute ca da ba guzre Jesús le', na' bulucueze' da xelawe' lu Laní Pascua.

<sup>17</sup> Ca gula chizrela, na' bzin Jesús nen benne' chazrinnu ca' dxusédené'.

<sup>18</sup> Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudé' neda' lu na' benne' ca' dxeledábage' neda'.

<sup>19</sup> Nadxa benne' ca' gulezúa xácheze', ne gulezú lawe' dxuluchebe' Jesús tu tue':

—¿Neda' xca'?

Na' xetúe' cá'anqueze guzre' Le':

—¿Neda' xca'?

<sup>20</sup> Nadxa bechebe Jesús, dxe'e le':

—Tu benne' ládujla le'e chazrínulle, benne' dxawē' tu zren nen neda' lu xé'ena nigá.

<sup>21</sup> Da li gatia' neda', Benne' Guljē' Bénneache, ca da naxúaj na chia' lu xiche cheē Dios. Baxache' naca cheē benne' na' gudé' neda' lu na' benne' ca' dxeledábague' neda'. Cháwedxa gaca cheē bénnea' la ca gúlajē'.

<sup>22</sup> Dxácate zaj zre'ē dxelawē', na' gucá'a Jesús xeta xtíla, ne guzre' Dios: "Xcalenu'." Ca gudé bzúzrujē' na, na' bnézrujē' na cheē benne' ca', ne guzre' le':

—Le gagu na. Da nigá dxulé'e na ca gaca cheē bel-la' dxen chia'.

<sup>23</sup> Nadxa guqué'ē tu da dxé'ajdxu, ne ca gudé guzre' Dios: "Xcalenu'", na' bnézrujē' na benne' ca', na' xúgute' gulé'aje' late' weaj da na'.

<sup>24</sup> Nadxa Jesús guzre' le':

—Da nigá zéajē na dxen chia' da dxucá'ana chawe na xel-la wezríá cube. Dxen chia' nigá lalaj na ne cheē benne' zan.

<sup>25</sup> Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

*Dxulé'e Jesús nna Pedro quebe núnbe'e Jesús  
(Mt. 26.30-35; Lc. 22.31-34; Jn. 13.36-38)*

<sup>26</sup> Ca gudé belul-le' da gaca ba Dios, na' belegüenē' lu Xi'a Xaga Olivo Ca'.

<sup>27</sup> Nadxa gunná Jesús, dxē'ē le':

—Xúgutele le'e gusán lázrele neda' na'a xela lawe' da naxúaj na lu xiche cheē Dios, dxenné': "Gutia' benne' dxuxúē' zrila' ca', na' zrila' ca' welase dínnajba'."

<sup>28</sup> Gate te xebana' lu xēdxu ba, waxá'a neda' nédxula ca le'e naga nababa Galílea.

<sup>29</sup> Nadxa Pedro guzre' Jesús:

—Láqueze xúgute benne' caní xulusán lazre' Lue', neda' québequeze guna' ca'.

<sup>30</sup> Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup> Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

*Jesús dxuchálajlē' Dios tu lataj nazí le na Getsemaní  
(Mt. 26.36-46; Lc. 22.39-46)*

<sup>32</sup> Nadxa belezrine' tu lataj naga nazí le na Getsemaní, na' gunná Jesús, dxē'ē benne' ca' dxusédene':

—Le cueza nigá dxácate cha'a cheajchálajlēna' Dios.

<sup>33</sup> Nadxa Jesús guché'ē Pedro, ne Jacobo, ne Juan, na' guzú lau dxezúa xáche'le'e.

<sup>34</sup> Na' dxē'ē benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup> Nadxa Jesús guzē'ē zéajē xelate' ca na'la, na' guzú' sudxú'ala, gunabe' Dios che gaca, quebe téē' xel-la zi' ca da dxal-la' saque' lu zra na'.

<sup>36</sup> Ca dxuchálajlē' Dios na', gunné':

—Xrae, xúgute wazéquenu' Lue'. Bselá neda' cheē quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup> Nadxa bezrine' naga zaj zra' benne' ca'an dxusédene', ne xeajxraque' le' dxelásie'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze?

<sup>38</sup> Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu beła' dxen chee dxate ní'a na'le.

<sup>39</sup> Nadxa Jesús guxiájé' da xula zeajchálajlene' Dios, na' tuze ca dxenne'.

<sup>40</sup> Nadxa ca bezrine', xecha lasa xeajxraque' benne' ca'an dxusédene', dxelásie' lawe' da xu'u bchigala xiaj lawe'. Benne' caní quebe belexezrela lazre' bi xelé'e Le'.

<sup>41</sup> Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzrin zra tea' neda', Benne' Guljé' Bénneache, lu na' benne' dul-la ca'!

<sup>42</sup> ¡Le chasa! ¡Le chu'u na'a! ¡Ba za benne' gudé'e neda' lu na' benne' ca' dxeledábage' neda'!

### *Dxelel-le' Jesús*

*(Mt. 26.47-56; Lc. 22.47-53; Jn. 18.2-11)*

<sup>43</sup> Dxácaté dxuchalaj Jesús caní, na' bzrin Judas, tu benne' nabábalene' benne' chazrinnu ca' dxuséde Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchaje ca' chee bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'.

<sup>44</sup> Judas, benne' dxudé'e Jesús lu na' benne' ca' dxeledábage' Le', ba blé'ene' benne' ca' tu da gune' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

<sup>45</sup> Na' ca bzrine' na', gubigue' lau Jesús, ne dxé'e Le':

—Benne' Weséde.

Na' bnupe' Le'.

<sup>46</sup> Nadxa benne' ca' gulel-le' Jesús, ne belexeché'e Le' ba nadxéaje'.

<sup>47</sup> Tu benne' dxune' Jesús tu zren guléaje' xia nalá chee', na' guchugue' naga tu bi wen zrin chee bxruze blau.

<sup>48</sup> Nadxa Jesús guzre' benne' ca':

—¿Dxujale le'e zale nen xia nalá, ne xaga ca' chee quél-lale neda', dxugúnele neda' ca tu benne' gubán?

<sup>49</sup> Xúgute zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee gaca li ca da naxúaj na lu xiche chee Dios.

<sup>50</sup> Nadxa xúgute benne' ca' dxuséde Jesús bulusán lazre' Le'. Buluzrúnmuje'.

### *Dxuzrunnuj tu bi cuide'*

<sup>51</sup> Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'.

<sup>52</sup> Na' bsanbe' ladxe' laga da nácube', na' bzrúnmuje' gala xídezebe'.

### *Dxezrín Jesús lau benne' ca' chee xu'u lawe' blau chee judío ca'*

*(Mt. 26.57-68; Lc. 22.54-55, 63-71; Jn. 18.12-14, 19-24)*

<sup>53</sup> Nadxa beleché'e Jesús lau bxruze blau, na' belezraga xúgute benne' xíchaje ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios.

<sup>54</sup> Pedro nawe' Jesús zítu'la, na' bzrine' chale'aj chee' lizre bxruze blau, naga begá'ane' tu zren nen zruza ni'a na' benne' xu'u lawe' ca', dxuluxuché'ē dxu'a xi'.

<sup>55</sup> Na' bxruze blau, ne xúgute' benne' chee' xu'u lawe' blau chee' judío ca' gullil-laje' tu da gagu na zria Jesús chee' xeze'équene' xuluzría xi'ē Le' chee' gatié', na' quebe bi belezrélené'.

<sup>56</sup> Benne' zante' belún lazre' chee' Jesús. Quebe bedxúaj dizra' chee' tuze ca' dxeleéné' tue' ne xetúe'.

<sup>57</sup> Bal-le' belase', na' gulagu zría Jesús da wen lazre', dxeleéné':

<sup>58</sup> —Netu' ba bēnnetu' chee', gunné': “Neda' guchínnaja' xudau' nigá da belún bēneache, na' ca gaca chunna zra xechisa' xetú xudau' da quebe xelún bēneache.”

<sup>59</sup> Cá'anqueze quebe butil-le ca da dxeleéné'.

<sup>60</sup> Nadxa bxruze blau guxase' ládujla xúgute' benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxeleéné' chiu' Lue'?

<sup>61</sup> Jesús guzúe' zrise, ne gútuqueze bi dizra' buzri'ē. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

<sup>62</sup> Na' gunná Jesús, dxe'ē le':

—Awe', ca' naca'. Walé'ele neda', Benne' Gulje' Bēneache, dxe'a chalá'a xabela chee' Dios, nape' duté xel-la waca. Walé'ele neda' zezá'a lu beuj bza.

<sup>63</sup> Nadxa bxruze blau gucheze' zra lané', na' gunné':

—¿Núzradxa nachímedxu benne' xelagu zria Le'?

<sup>64</sup> Le'e' bache bēnquezle ca dxenné' schanni' chee' Dios. ¿Bi dxennale le'e' xca'?

Xúgute' benne' ca' gulenné':

—Nabía xi'ē dxal-la gatié'.

<sup>65</sup> Nadxa bal-la benne' ca' gulezú lawe' dxuluzré'ē Le' zrene', na' bulucache' lau Jesús, ne buluzálaje' Le'. Dxeleéné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawe' belú'ē lau Jesús.

### *Dxenná Pedro quebe núnbe'ē Jesús*

*(Mt. 26.69-75; Lc. 22.56-62; Jn. 18.15-18, 25-27)*

<sup>66</sup> Pedro guzúe' lu chale'aj zrila, na' bzrin tu nu'ula wen zrin chee' bxruze blau,

<sup>67</sup> na' ca ble'ebe' Pedro dxe'ē dxu'a xi' dxuxuché'ē, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

<sup>68</sup> Na' bechebe' Pedro, dxenné':

—Quebe núnbe'a bēnea', ne quebe nezda' nu chee' na' dxuchálaju'.

Na' bedxúaj Pedro chale'aj naga dxelu'ē. Nadxa gudxezre xjeaj.

<sup>69</sup> Nadxa nu'ula wen zrin chee' bxruze blau na' gunná'abe' Pedro xecha lasa, na' gunabe', dxe'ēbe' benne' ca' zaj zré'ē na':

—Benne' nigá naque' tuze benne' ca'an.

<sup>70</sup> Pedro xecha lasa bzue' Jesús chalá'ala. Xetú chí'idau' benne' ca' zaj zré'ē na' gulé'ē Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee' xezre ca' zaj nababa Galilea. Ca dxuchálaju' naca bea na da na'.



71 Nadxa Pedro guzú lawe' dxuzría xi' cuine', ne ben chúchuē' xrtizre', gunné':

—Quebe núnbe'a bénnea' dxennale le'e ca'.

72 Ca'an guca, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': “Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'.” Na' ca xeajsá lazre' da nigá, gudxézrele'e.

## 15

### *Dxezrín Jesús lau Pilato*

(Mt. 27.1-2, 11-14; Lc. 23.1-5; Jn. 18.28-38)

1 Ca guxani' che zila, na' benne' xíchajē ca' cheē bxruze ca' belexedupe' nen benne' gula sina ca', ne benne' ca' dxuluxuzájle'ē da nadxixruj bea Dios, ne xúgute' benne' cheē xu'u lawe' blau cheē judío ca'. Guleché'ē Jesús nadxéajē', na' buludé'ē Le' lu na' Pilato.

2 Pilato gunábene' Jesús:

—¿Nacu' Lue' wenná bea cheē judío ca'?

Na' bechebe Jesús:

—Ca' naca na, ca ba gunnáu' lue'.

3 Na' benne' xíchajē ca' cheē bxruze ca' gulawe' zria Jesús da zante'.

4 Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete' da dxelawe' zria Lue'.

5 Jesús quebe bi dizra' ca buzri'ē. Ca' guca, bebánele'ē Pilato.

### *Dxelichaj be'e gate Jesús*

(Mt. 27.15-31; Lc. 23.13-25; Jn. 18.38—19.16)

6 Pilato zua tu da dxúnqueze' tu iza tu iza gate dxaca Laní Pascua. Dxusane' tu benne' xu'e lizre xia, núteteze benne' xelenaba bénneache ca' le'.

7 Lu xu'u lizre xia na' xu'u tu benne' le' Barrabás, benne' nunē' tu zren benne' ca' belutie' benne' ca', gate na' gudíl-lalene' benne' Roma ca'.

8 Na' belezrín lau Pilato benne' xezre ca', ne gulezú lawe' dxelenabe' lau Pilato gunē' ca dxúnqueze'.

9 Na' bechebe Pilato:

—¿Dxaca lázrele le'e gusana' bénnea' naque' wenná bea cheē judío ca'?

10 Caní gunná Pilato lawe' da dxeque be'ene' buludé'ē benne' xíchajē ca' cheē bxruze ca' Jesús lu ne'ē lawe' da dxelaque' zre'e lazre' Le'.

11 Na' benne' xíchajē ca' cheē bxruze ca' beleché'ē benne' xezre ca', ne gulegú'u xel-le' le' cheē xelexenabe' lau Pilato gusane' Barrabás.

12 Nadxa Pilato gunábene' benne' ca':

—¿Bi dxaca lázrele le'e guna' cheē bénnea' naque' wenná bea cheē judío ca'?

13 Nadxa belexechebe', gulenné' zizraj:

—Bde'ē xaga béguaj.

14 Na' Pilato bchebe' benne' ca':

—¿Bizra da calēla nun benne'?

Xecha lasa gulenné' zizraj:

—Bde'ē xaga béguaj.

15 Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca gudé na' bsebage' benne' ca' xeline' Jesús tu xide, na' bdee' Le' lu na' benne' ca' cheē xuludé'ē Le' xaga béguaj.

16 Nadxa benne' dxjaque' wedil-la guleché'ē Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'.

17 Na' bulugácue' Jesús tu ladxe' bzawe, ne buluzríe' xíchaje' tu da zaj nune' nen zruze xaga xeche'.

18 Nadxa gulezú lawe' dxeleñné' zizraj:

—¡Gaca ba wenná bea chee judío ca'!

19 Na' belú'e xíchaj Jesús nen tu xia xtila, ne buluzré'ē Le' zrene'. Na' buluzú zribe' lawe', dxelape' Le' ba lá'ana.

20 Ca gudé bulucá'ana dítaje' Le' caní, na' belexegu'e ladxe' bzawe, na' buluxugácue' Le' zra lá'anaqueze'. Nadxa belexebéaje' Le' chee chjaque' naga xuludé'ē Le' xaga béguaj.

*Dxuludé'ē Jesús xaga béguaj*

*(Mt. 27.32-44; Lc. 23.26-43; Jn. 19.17-27)*

21 Tu benne' chee xezre Cirene le' Simón, xra Alejandro, ne Rufo, zezé'ē le'e xixre', na' ca bedé'ē na', na' bulusebague' le' gu'e xaga béguaj chee Jesús.

22 Guleché'ē Jesús tu lataj nazí le na Gólgota, da zéaje na "Lataj Chee Zrita Xíchaj Benne' Gate."

23 Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na.

24 Nadxa buludé'ē Le' xaga béguaj, na' benne' dxjaque' wedil-la gulebéaje' da gulé'e na nule' xelexalé' zra lana Jesús, na' bila xelexúa tu tue'.

25 Guca che zílala gate na' buludé'ē Jesús xaga béguaj.

26 Buludé'ē da naxúaj xíchaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'."

27 Cuita Jesús buludé'ē le'e xaga béguaj ca' chupa benne' gubán, tue' chalá'a xabela chee', ne xetúe' chalá'a xéglala chee'.

28 Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinnaj ca'."

29 Na' benne' dxeledé'ē na' gulenné' schanni' chee Jesús, ne buluté' xíchaje', dxeleñné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na.

30 Bselá cuinu' na'a, ne bexetaj le'e xaga béguaj na'.

31 Cá'anqueze belún benne' xíchaje' ca' chee bxruze ca', ne benne' dxulux-zájle'ē da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'.

32 Lue', Cristo, wenná bea chee benne' Israel, bexetaj le'ē xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'ē le'e xaga béguaj ca' tu zren nen Jesús, gulenné' schanni' chee'.

*Dxate Jesús*

*(Mt. 27.45-56; Lc. 23.44-49; Jn. 19.28-30)*

33 Ca bzrin wagubizra, na' guchul-la dute lu xezr la xu nigá tu chi'i wal-la gula.

34 Ca gudé na', na' gunná Jesús zizraj:

—Eloi, Eloi, ¿lama sabactaní?

Da nigá zéaje na: "Dios chia', Dios chia', ¿bizr chee na' nusanu' neda'?"

35 Bal-la benne' ca' zaj zre'ē na' belenne' na, na' gulenné':

—Le xene. Dxenné' Elías, bénnea' bchálaje' waláz chee Dios.

<sup>36</sup> Nadxa tu benne' guzá chégüé', na' xeajlá'awaje' lu xrise uva zichaj tu da dxezrupe na nisa, na' bzué' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétaje' Le'.

<sup>37</sup> Nadxa Jesús gudxezre xe'e, na' gútete'.

<sup>38</sup> Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la.

<sup>39</sup> Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

<sup>40</sup> Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José.

<sup>41</sup> Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

*Dxulucache' Jesús lu xedxu ba*  
(Mt. 27.57-61; Lc. 23.50-56; Jn. 19.38-42)

<sup>42-43</sup> Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús.

<sup>44</sup> Bebánele'e Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'.

<sup>45</sup> Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús.

<sup>46</sup> Nadxa José guzi'e tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bséxuje' ba na' nen tu xiaj zren.

<sup>47</sup> María Magdalena, ne María, xrna José belelé'equezne' naga bulucache' Jesús.

## 16

*Dxexebán Jesús ládujla benne' gate*  
(Mt. 28.1-10; Lc. 24.1-12; Jn. 20.1-10)

<sup>1</sup> Ca gudé zra dxulupá'ane', na' María Magdalena, ne Salomé, ne María, xrna Jacobo, gulezi'e da dxelá zixre chee cheajlelu'e Jesús.

<sup>2</sup> Na' bál-la'la zra nedxu chee da gazre zra belezrine' dxu'a ba gate na' za dxalaj gubizra.

<sup>3</sup> Na' gulenné', dxelé' ljwezre':

—¿Nuzra cua xiaj da naxezxuj ba?

<sup>4</sup> Ca gulenné'e, na' belelé'ene' xiaj zren na' da buluséxuje' ba, ba nadúa na.

<sup>5</sup> Ca gulu'e lu ba, na' belelé'ene' tu benne' dxe'e chala'a xabela, nácu'e zra lane' tunna da chiche, na' belezreb'e'.

<sup>6</sup> Na' gunná benne' nigá, dxe'e nu'ula ca':

—Quebe zrébele. Le'e dxexilajle Jesús, benne' Nazaret, bénnea' gudé'e le'e xaga béguaj. Bache bebán bénnea'. Québedxa xu'e nigá. Le nna' lataj naga gulexru'e Le'.

<sup>7</sup> Le chjaca na'a, le cheajezre benne' ca' bsédene', ne Pedro cuía lau Jesús chéajé' naga nababa Galilea ca le'e. Na' xelé'equezle Le' ca ba gunnáqueze'.

<sup>8</sup> Nadxa nu'ula ca' buluzrúnnuje', besi'aque' dxu'a ba lawe' da belezrébele'ë. Quebe nu guléqueze' ca da guca na lawe' da dxelezhébele'ë.

*Jesús dxulé'e lau María Magdalena*

*(Jn. 20.11-18)*

<sup>9</sup> Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'ë.

<sup>10</sup> Nu'ula nigá guxiáje' xeajezre' benne' ca' gulaque' Jesús tuze, zaj zre'ë baxácheze, ne dxelebezre'.

<sup>11</sup> Gate na' gulenne' nabán Jesús, na' ba ble'e nu'ula nigá Le', quebe guléajle'ë.

*Dxulé'e lau Jesús chupa benne' bsédene'*

*(Lc. 24.13-35)*

<sup>12</sup> Ca gudé na' ble'e lau Jesús nazrala chupa benne' ca' bsédene' zaj xu'e neza le'ë xixre'.

<sup>13</sup> Benne' caní belexebi'ë, na' xeajleguezre' benne' xezícala. Cá'anqueze benne' caní quebe guléajle'ë.

*Jesús dxusebaguë' benne' gubáz chee' ca' da dxal-la' xelune'*

*(Mt. 28.16-20; Lc. 24.36-49; Jn. 20.19-23)*

<sup>14</sup> Ca gudédxa, na' ble'e lau Jesús chinéaj benne' ca' bsédene' ca zaj dxe'ë dxelawe', na' gudil-le' le' lawe' da quebe guléajle'ë ba bebane', ne lawe' da zaj naque' lázrdau zide' lawe' da quebe guléajle'ë chee benne' ca' belexelé'ene' Le' ca gudé bebane'.

<sup>15</sup> Na' gunné', dxe'ë benne' ca':

—Le chjaca du ca naca xezr la xu. Le cu'u lban chee dizra' chawe' chia' chee xelénqueze xúgute bënneache.

<sup>16</sup> Benne' chéajle'ë, ne chue' nisa, la bënnea', na' benne' quebe chéajle'ë, wabía xi' bënnea'.

<sup>17</sup> Da dxelunna bea caní xululé'e benne' ca' xeléajle'ë chia', xuluchínene' La neda' chee xelexebéajé' be' xriwe'. Xuluchálaje' dizra' nazrala.

<sup>18</sup> Welúxrue' bela' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'ë benne' quebe chawe' zaj zue', na' xelexexaque'.

*Dxexepe Jesús xabáa*

*(Lc. 24.50-53)*

<sup>19</sup> Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'ë chalá'a xabela chee Dios.

<sup>20</sup> Nadxa benne' ca' guledxúaje', xeajlelu'ë lban chee dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'ë dizra' chee' ne' chee xel-la waca ca' da za xabáa da belune'. ¡Ca'an gaca na!

## DIZRA' CHAWE' CA NACA CHEE JESUCRISTO SDA BZUAJ SAN LUCAS

### *Dizra' dxuchalaj San Lucas, dx'e Teófilo*

<sup>1</sup> Benne' zan ba belunę' ca da gulezéquene' buluzúaje' cáteze naca da guca ládujla dxi'u,

<sup>2</sup> cáteze na' gulę benne' ca', benne' belelé'eng' nédxudautę ca naca da guca na, na' buluchálaje' dizra' chawe' na'.

<sup>3</sup> Cá'anqueze neda' ba bchi'a xánnia' xúgute' da ca' gulaca na nédxudautę, na' dxéqueda' chawe' guzúaja' da nigá chiu' cáteze guca, bi nazrí'ite' lazra', lue', Teófilo.

<sup>4</sup> Dxuna' caní cheę nézenu' naca na da li ca da ba bululé'eng' lue'.

### *Gubáz cheę xabáa dxuzenne' ca galaj Juan, benne' guchúę' bėnneache nisa*

<sup>5</sup> Gate na' naca Herodes wenná bea cheę xęzre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale' bxruze Aarón.

<sup>6</sup> Zacarías ne zru'ule' Elisabet gulaque' xrlátaje lau Dios, ne dxelunę' ca zaj naca da bdxixruij bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios.

<sup>7</sup> Quebe nu zrí'ine' chilá', lawe' da naca Elisabet na' nu'ula wizre, na' dxúpate' zaj bezúalę' gula.

<sup>8</sup> Tu zra, gate belexala bxruze ca' naga nababa Zacarías xelunę' zrin lu xel-la bxruze cheę' lau Dios,

<sup>9</sup> cáteze naca da dxelún bxruze ca', na' bexala Zacarías chu'e lu lataj lá'azxa cheę Xránadxu lu xudau' cheę guzeze' xala.

<sup>10</sup> Dxácate' na' dxezxe xala na', ca naca benne' ca' zaj zra' chalé'ajla dxu-luchálajlę' Dios.

<sup>11</sup> Nadxa ble'e lau tu gubáz cheę xabáa cheę Xránadxu, ze' chalá'a xabela cheę cugu naga zria xala dxezxe na.

<sup>12</sup> Ca ble'e Zacarías gubáz cheę xabáa na', guzúę' stębe, ne bzrébele'e.

<sup>13</sup> Gubáz cheę xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlęnu' Le', na' nu'ula chiu', Elisabet, walaj tu zrí'ine', bi na' guzú' labe' Juan.

<sup>14</sup> Wabéle'enu', ne gaca chiu' tu da ba neza zrente, na' benne' zan xelebenę' lawe' da ba gulaj bidu na'.

<sup>15</sup> Ca'an gaca lawe' da gaca zri'inu' szrente lau Dios. Quebe xi'ajbe' xrise uva wal-la, u da dxusuzre na bėnneache, na' gate gálajtębe' tu súalęzqueze Be' Lá'azxa nen lebe'.

<sup>16</sup> Ne cheę lebe' benne' zan xelexaque' bi cheę Xránadxu Dios.

<sup>17</sup> Juan nigá quia laube' lau Xránadxu, na' Be' na', ne xel-la waca da gulezúale' na Elías, bėnnea' bchálaje' waláz cheę Dios gate nate, xelezúale' na lebe', cheę guzúabe' tuze benne' ca' zaj naque' xra xrna nen zrí'ine', ne cheę gulę'ebe' benne' dxeledábague' Dios cheę xelunę' ca dxenná xrtizra' Dios. Ca'an gaca, gucá'ana cháwebe' bėnneache cheę xelezí' lu ne'e Xránadxu.

<sup>18</sup> Zacarías na' bchebe' gubáz cheę xabáa:

—¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

<sup>19</sup> Na' bechebe gubáz chee xabáa na':

—Neda' naca' Gabriel, ne naca' wen zrin chee Dios. Le' gusel-le' neda' chee guchálajlena' lue', ne guzenda' lue' dizra' chawe' nigá.

<sup>20</sup> Na'a, lawe' da quebe guxéajle'u da gucha' lue', xegá'anu' quebe gaca nníu' cadxa galaj zri'inu'. Caní gaca na ca zrinte zra chee na.

<sup>21</sup> Dxácatę na' zaj zra' benne' ca' chalé'ajla, dxelebeze' Zacarías, ne dx-elexebánene' lawe' da dxezréle'ene', quebe dxedxúaje' lu lataj lá'azxa.

<sup>22</sup> Gate bedxúaj Zacarías, québedxa dxaca nnie'. Nadxa guleque bé'eng' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nnie'.

<sup>23</sup> Ca xeajsé chee zra ca' dxal-la' gun Zacarías zrin chee xudau', na' bezé'e zexíaje' lizre'.

<sup>24</sup> Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe':

<sup>25</sup> “Xrana' Dios ba bene' chia' da nigá chee québedxa xuluzúa bėnneache neda' chalá'ala.”

### *Gubáz chee xabáa dxuzenne' ca galaj Jesús*

<sup>26</sup> Ca gudé xrupa beu' gate na' bchálajle gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret,

<sup>27</sup> chee cheajchálajlene' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

<sup>28</sup> Gubáz chee xabáa na' guxú'e naga zua María na', na' guzre'-be':

—Padiuzre. Dios dxunę' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

<sup>29</sup> Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

<sup>30</sup> Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'.

<sup>31</sup> Na'a, zua da gunna Dios chiu', na' galaj tu bidu biu chiu', na' guzú' labe' Jesús.

<sup>32</sup> Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios gunę' Le' wenná bea ca guca xra xrtawe' David,

<sup>33</sup> chee nna bé'etecaze' xezr la xu Israel, na' xel-la dxenná bea chee' quebe cheajséqueze chee na.

<sup>34</sup> Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalena'?

<sup>35</sup> Gubáz chee xabáa na' gunné':

—Be' Lá'azxa chee Dios suę' xichaj lázrda'u, na' xel-la waca chee Dios szrente sua na nen lue'. Chee le na' bidu na' gálajbe' gácaquezebe' chee Dios, na' sí'queze labe' Zri'ine Dios.

<sup>36</sup> Cá'anqueze bila ljwezru' Elisabet wálajqueze bidu chee' lálala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'.

<sup>37</sup> Quebe bi de da quebe gaca gun Dios.

<sup>38</sup> Nadxa gunná María:

—Neda' nácaqueza' wən zrin cheę Xránadxu. Gun Dios chia' ca da ba gunnáu'.

Na' gubáz cheę xabáa na' bezé'ę naga zua María na'.

*María zeajxúbe' Elisabet*

<sup>39</sup> Ca lu zra na' María guzá'abe' zéajbe' tu xézredau' da zua na laduj xi'a ca' cheę ga nababa Judea.

<sup>40</sup> Na' guxú'ube' lizre Zacarías, ne bgápabe' diuzre Elisabet.

<sup>41</sup> Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzúale' Be' Lá'azxa le'.

<sup>42</sup> Nadxa gunné' tu chi'e zizraj:

—Dios ba beņe' tu da cháwedxa chiu' quézcala cheę xúgutę nu'ula ca', lawe' da ba zua da beņa Dios chiu'.

<sup>43</sup> ¿Núzraqueze naca' neda', za xrna Xrana' ga zua' neda'?

<sup>44</sup> Cáteze benda' dizra' da gunnéu', na' guxríte bidu chia' lu le'a lu xel-la dxebe' cheebe'.

<sup>45</sup> Ba neza naca na chiu' guxéajle'u lawe' da gaca li ca da gunná Xránadxu.

<sup>46</sup> Nadxa gunná María:

Benne'du xu'a dxue lá'ana na Xrana'.

<sup>47</sup> Lázdawa' dxebe' na ca dxun Dios, weselá chia'.

<sup>48</sup> Lawe' da gudxé' Dios gunne xue chia', nácaqueza' wən zrin cheę'.

Na'a su lau na, xúgutę benne' xelenné' nazi'a tu culwen zren cheę Dios.

<sup>49</sup> Dios Szrentę ba beņe' tu da zrentę chia' neda'.

Cheę le' na' lá'azxa naca La Le'.

<sup>50</sup> Le' xexache lázrqueze' xúgutę benne' ca' dxelezrebe' Le'.

<sup>51</sup> Da zrentę ba beņ Le'.

Bzue' zřila benne' ca' dxulucá'ana szren cuine'.

<sup>52</sup> Bebéaje' benne' blau ca' lu lataj cheę',

ne bechise' benne' dxexruj lazre' ca'.

<sup>53</sup> Bnézrujle'ę da gulagu benne' dxeledún,

na' benne' gunní'a ca' bca'anę' le' cá'aze.

<sup>54</sup> Gúcalęe' benne' Israel, benne' wən zrin cheę' ca'

lawe' da bezři lázrqueze' le',

<sup>55</sup> ca da guchębe lazre' cheę xra xrtáudxu ca',

cheę Abraham, ne cheę benne' xrtie' ca' chadía chacanna.

<sup>56</sup> María begá'analebe' Elisabet ca chunna beu', na' ca gudé na' bezrinbe' lizrebe'.

*Ca galaj Juan, benne' bchue' bėnneache nisa*

<sup>57</sup> Ca gudé na' guxá' beu' cheę Elisabet na' cheę galaj bidu cheę', na' guzane' tu bi biu cheę'.

<sup>58</sup> Benne' walızr cheę' ca', ne xrtia ljwezre' belezřine' dxelebeņe' nen le', gate belenęe' Dios bezři lázrele'ę le'.

<sup>59</sup> Gate guca xrunu' zra, belezřine' cheę xelechúgue' lu xpélabē' da gulé'e na naca be' bi cheę Dios, na' gulaca lazre' xuluzúe' labe' Zacarías ca le' xrabe'.

<sup>60</sup> Na' gunná xrnabe':

—Quebe gaca. Dخال-la' si' labe' Juan.

<sup>61</sup> Na' gulé'ę le':

—¿Bizr cheę na'? Quebe nu chilá' xrtia ljwézrele le' ca'.

<sup>62</sup> Na' buluchębe' xra bidu na', bulutá ne'ę cheę xelenézene' ájazra guzúe' labe'.

63 Na' xrabe' na' gunabe' tu blágadau', na' bzuaje' le'e na: Juan si' labe'. Na' xúgute benne' ca' belexebánene'.

64 Ca' guca Zacarías benné', na' guzú lawe' dxue lá'ane' Dios.

65 Ca belelé'ene' da nigá, xúgute benne' walírz chee' belexebánene', na' ca naca xezre zaj nnita laduj xi'a ca ga nababa Judea, buluchálaje' ca da guca.

66 Xúgute benne' belenne' na, gulezú lawe' dxelené' lu lázrdawe', ne buluchebe ljweze' tue' xetúe':

—¿Ájazraqueze gun bi nigá?

Naca bea na Xránadxu zúalene'-be'.

### *Ca da bil-la Zacarías*

67 Na' Be' Lá'azxa guzúalene' Zacarías, xra bidu nigá, na' bchálaje' waláz chee Dios, gunné':

68 ¡Gaca ba Xránadxu, Dios chee xezre Israel!

Ba ble'e naga zúadxu, bènneache chee', na' bselé' dxi'u.

69 Ba gusel-le' tu benne' wál-lale'e, weselá cheedxu.

Bènnea' gulaj ládujla xrtia David, benne' wen zrin chee'.

70 Ca'an guchebe lazre' Dios lu dxu'a benne' ca' buluchálaje' waláz chee' nédxudate.

71 Guchebe lazre' guselé' dxi'u lu na' benne' dxelezzré'e dxi'u, ne lu na' benne' dxelecuídené' dxi'u.

72 Xezrí lazre' xra xrtáudxu ca', ne quebe gal-la lazre' xel-la wezría lá'azxa chee'.

73 Da nigá naca na da guchebe lazre' Dios da bzua chache' nen xra xrtáudxu Abraham,

da naca tu da gunné' cheedxu dxi'u.

74 Guchebe lazre' guselé' dxi'u lu na' benne' dxelezzré'e dxi'u chee' gaca gundxu zrin chee', ne quebe zrédexu,

75 ne gácadxu xrlátaje lau Le', ne gácadxu bi cheéqueze' xúgute zra naca bandxu.

76 Lue', zrí'ina'dau', sí'queze lau' bi guchálajqueze waláz chee Dios szrente, lawe' da quia lau' lau Xránadxu, salju' neza chee Xránadxu,

77 Guzénenu' bènneache chee', Le' gunité lawe' dul-la chee', ne guselé' benne' ca'.

78 Ca'an gaca lawe' da dxexezrí lazre' Dios dxi'u.

Dxuné' na'a dxalaj tu xi' chee xabáa da dxusení' cheedxu,

79 na' gusení' na naga zaj zra' benne' zaj zre'e lu na' xel-la gute, chee' cu'u na dxi'u lu neza xrtante lau Dios.

80 Bidu na' bgúlabe', ne bgula bènne'du xu'ube' chawe' lu da naca chee Dios. Guzúaquezbe' le'e xixre' lawe' lataj cadxa bzrin zra ble'e laube' xezre Israel.

## 2

### *Ca guca gate gulaj Jesús*

(Mt. 1.18-25)

1 Ca lu zra na' gate dxenná bea Augusto, benne' xezre Roma, benne' dxenná be'e xúgute cue' xezr la xu, le' gunná bé'ene' xelú'u lu xiche xúgute benne' zaj zre'e xezr la xu.

2 Da nigá naca da nédxudau' gulú'u bènneache lu xiche. Guca caní gate naca Cirenio benne' zaj xu'u lu ne'e xezre ca' zaj nababa Siria.

3 Xúgute bènneache dxun na ba xen chjaque' lu xezre naga zaj nababe' chee xelu'e lu xiche.



4 Chee le na' José guzê'e lu xezre Nazaret, da nababa Galilea, chee bzrine' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'.

5 José guxiájê' Belén chee chu'e lu xiche tu zren nen María. María nigá ba nachêbebe' guchaga ná'alebe' José, na' ba bnezruj Dios cheebe'.

6 Dxácatê na' zaj zre'ê lu xezre Belén, na' bzrin zra san María bidu chee'.

7 Lu xezre na' gulaj bidu nedxu chee', na' bchele'-be' ládxe'du ca', na' gúxruê'-be' xu'u naga dxelún chi'ê da dxelagu bea ca', lawe' da quebe ga bzrela tu lataj lu xu'u naga che'e.

*Dxuluchálajê gubáz chee xabáa benne' ca' dxuluxúe' zrila' ca'*

8 Gagu cuita xezre Belén zaj zra' benne' ca' dxuluxúe' zrila' ca', dxelex-egá'anê' le'ê xixre' chizrela, dxuluxúe' zrila' chee' ca'.

9 Naga zaj zre'ê ble'e lau tu gubáz chee xabáa chee Xránadxu. Na' xel-la naxani' chee Xránadxu Dios bsaní na naga zaj zre'ê. Ca'an guca, belezrébele'ê.

10 Na' gubáz chee xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee dizra' nigá xelebêle'ê xúgute bènneache.

11 Na'a, lu xezre chee David, ba gulaj tu bidau' gácabe' weselá chee. Bi nigá naque' Cristo, Xránadxu.

12 Da nigá gaca na tu da gunna bea na chee. Cheajxrácale bidu dx'e'ene nigá, dxélabê ládxe'du ca', ne debe' tu xu'u naga dxelún chi'ê da xelagu bea ca'.

13 Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lá'anê' Dios, dxelenné':

14 ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee bènneache, benne' dxelune' ca da dxaca lazre' Dios!

15 Gate besí'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tuê' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

16 Ca'an guca, besí'aca zézxuje', na' xeajlexraque' María ne José, ne bidu dx'e'ene na', debe' xu'u naga dxelún chi'ê da xelagu bea ca'.

17 Gate belelé'engê' bidu na', na' buluchálajlêne' benne' ca' ca da gunná gubáz chee xabáa ca da naca chee bidu na'.

18 Na' xúgute benne' ca' belenne' da nigá belexebánele'engê' ca da gulenná benne' cani.

19 María bcache' da nigá lu xichaj lázrdawe', na' blaba lazre' ca naca da nigá.

20 Ca'an guca besí'aca benne' ca' dxuluxúe zrila', dxulucá'ana szrene' Dios, ne dxelúe lá'anê' Le' ca naca xúgute da belenne', ne da belelé'engê', lawe' da guca xúgute ca da guzre gubáz chee xabáa na' le'.

*Ca guca gate belú'ê bidu Jesús lu xudau'*

21 Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'ê La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'ê bidu na'.

22 Ca bzrin zra chee xelune' ca bdxixruj bea Moisés chee xellexaxaque' chawe' lau Dios, na' belú'ê bidu na' lu xezre Jerusalén chee xuluzúe'-be' lu na' Xránadxu Dios.

<sup>23</sup> Belunë' caní lawe' da ba naxúaj lu da nadxixruj bea Xránadxu Dios da dxenná na caní: Xúgute bi biu, bi nedxu gálajbe' dxal-la' guzúale-be' chee Xránadxu Dios.

<sup>24</sup> Na' xjaque' xeajlegu'e dxen chee be xíxre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxinnedau'.

<sup>25</sup> Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebeze' benne' sel-la Dios chee guselé' bënneache Israel. Zúale Be' Lá'azxa chee Dios Simeón na'.

<sup>26</sup> Be' Lá'azxa ba guzre' Simeón na' quebe gati'e cadxa lé'eng' Cristo, benne' na' sel-la Xránadxu Dios.

<sup>27</sup> Simeón nigá guxiáje' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xelunë' chee'be' ca da bdxixruj be'e Moisés,

<sup>28</sup> na' Simeón na' guqu'é' bidu na'. Bnide'-be', ne be lá'anë' Dios, gunné':

<sup>29</sup> Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchebe lazru' chia', naca' wen zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bénnea' ba bzu' chee gácaleng' xúgute bënneache.

<sup>32</sup> Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bënneache chiu', benne' Israel.

<sup>33</sup> José ne xrna Jesús belexebánele'eng' ca da gunná Simeón chee bidu Jesús.

<sup>34</sup> Nadxa Simeón gunabe' lau Dios gunë' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zante lu na' da xriwe', na' benne' zante xelexexase' lau Dios. Lebe' gácabe' tu da dxunna bea chee Dios, na' benne' zante xuluzúe' lebe' chalá'ala.

<sup>35</sup> Ne chee lebe' gulé'e lau ca da dxeajlesá lazre' tu tuë'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cá'anqueze zua na' tu nu'ula dxenné' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuide'te, na' guzúalene' benne' chee' gazre iza.

<sup>37</sup> Na' begá'anë' tuze', ne ba xu'e tapa lalaj tapa iza. Quebe becuase' xudau', na' dxunë' zrin chee Xránadxu Dios te zra chizrela. Dxunë' gubasa, ne dxuchálajlene' Dios.

<sup>38</sup> Ana na' bzirínqueze' na', na' ca gudé guzre' Dios: "Xcalenu'", na' guzúlawe' dxuchálaje' chee bidu Jesús nen xúgute benne' ca' dxelebeze' benne' na' sel-la Dios chee guselé' benne' Jerusalén ca'.

### *Ca guca gate belexezrine' xezre Nazaret*

<sup>39</sup> Ca belunë' xúgute ca da dxenná da nadxixruj bea Xránadxu, nadxa besía'que' xjaque' naga nababa Galilea, na' belexezrine' xezre Nazaret da naca lazrie'.

<sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'anë' lebe' chawe'.

### *Ca guca gate bzin bidu Jesús lu xudau'*

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xezre la xu Egipito.

42 Ca guque Jesús chazrinnu iza, na' xjá'aque' xúgute' Jerusalén, ca dxelúnqueze' ca dxaca laní.

43 Ca gudé laní, na' besia'que', na' bidu Jesús begá'anabe' Jerusalén, ne quebe guleque be'e xrnabe', ne José.

44 Dxeléquene' Jesús zezabe' ládujla benne' zan ca', na' besia'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e,

45 quebe belexezréne'-be'. Ca'an guca belexebi'e zeajxá'aque' Jerusalén chee cheajlexedilje'-be' na'.

46 Ca gudé guca chunna zra, nadxa belexezréne'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dxelenné', ne dxuchébebe' benne' ca'.

47 Xúgute' benne' ca' dxelenne' dxelexebánene' cheebe' ca naca xel-la sina cheebe', ne ca naca da dxuchálajlebe' le'.

48 Gate belelé'e xra xrnabe' lebe', na' belexebánene'. Na' gunná xrnabe', dxe'e-be':

—Zri'ina', ¿bizr chee na' benu' caní nen netu'? Cadite stēbe ba guzúantu' chiu' dxexilajntu' lue', xrau' ne neda'.

49 Nadxa Jesús dxe'ebe' le':

—¿Bizr chee na' dxexilajle neda'? ¿Quebe nézele le'e dxal-la' guna' neda' da naca chee Xra'?

50 Xra xrnabe' quebe guléajni'ine' ca da gúzrebe' le'.

51 Nadxa bezálebe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute' da nigá lu lázrdawe'.

52 Jesús zéajbe' dxegúlabe' lu bel-la' dxen cheebe', ne lu xichaj lázrdaube', na' dxedxúajquezebe' chawe' lau Dios, ne lau bēnneache.

### 3

*Juan, benne' dxuchúe' bēnneache nisa, dxuchálaje' xrtizra' Dios le'e xixre' (Mt. 3.1-12; Mr. 1.1-8; Jn. 1.19-28)*

1 Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisantias dxenná be'e naga nababa Abilinia.

2 Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj.

3 Juan na' gudé'e ca naca xézredu ca' zaj nnitan' chalá'a weaj xegu Jordán, na' dxe'e benne' ca' dxal-la' xelexebi'i lazre', ne xeledxúe' nisa chee gunite lau Dios chee xtul-le'.

4 Caní guca ca na' gunná Isaías, benne' bchálaje' waláz chee Dios, gunné': Nen tu chi'i bēnnea' dxenné' zizraj le'e xixre' lawe' lataj. Dxenné':

Le gucueza neza naga te Xránadxu.

Le xulí chawe' neza lase chee'.

5 Ca naca zritudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

6 Ca naca bēnneache xelexé'ene' Benne' Weselá sel-la Dios.

7 Gate benne' ca' belezrine' lau Juan chee xeledxúe' nisa, na' le' dxe'e benne' ca':

—Xrtia beła snia. ¿Ble'e nu benne' le'e chee cuásale ca naca xel-la dxezrá'a chee Dios da ba za?

<sup>8</sup> Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xexune' xiaj caní xrtia Abraham.

<sup>9</sup> Xa waga ba de cuásate na chee chugue' xaga ca', na' xúgute' xaga da quebe dxelebia na da zixre chawe' welechugue na, na' xuluzré'e na lu xi'.

<sup>10</sup> Nadxa benne' ca' buluchebe' le':

—¿Bi dxal-la' guntu'?

<sup>11</sup> Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bènea' quebe bi de chee'.

<sup>12</sup> Cá'anqueze belelá' benne' wechizruj ca' chee xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

<sup>13</sup> Juan guzre' le':

—Quebe guchizruje da zrendxa ca da nadxixruj bea na.

<sup>14</sup> Cá'anqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee cuale dumí chee', na' le be nen cadite názruje.

<sup>15</sup> Benne' zaj zre'e na' zaj zue' stebe, na' dxuluchebe' lu lázrdawe' che Juan na' naque' Cristo, benne' nasel-la Dios.

<sup>16</sup> Juan na' gunné':

—Neda', da li dxuchúa' le'e nisa nen nisa. Wida tu benne' guné' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e.

<sup>17</sup> Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee na lu xi' da cabata' xul-la na.

<sup>18</sup> Ca naca dizra' nigá, ne xezícadxa dizra' zan bchálajlene' benne' ca' ca naca dizra' chawe' chee Dios.

<sup>19</sup> Juan gudil-le' Herodes, benne' dxenná be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante' da calela. Nadxa Herodes

<sup>20</sup> béndxaqueze' da calela, gulu'e Juan lizre xia.

### *Da guca gate gudxúa Jesús nisa*

*(Mt. 3.13-17; Mr. 1.9-11)*

<sup>21</sup> Gate ne dxuchúa Juan na' bèneache nisa, cá'anqueze Jesús gudxúe' nisa, na' gate dxuchálajlene' Dios, na' bxfalaj xabáa,

<sup>22</sup> na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazri'ite lazra'. Dhezaca ba lázrelena' Lue'.

### *Ca naca xra xrtau Jesucristo*

*(Mt. 1.1-17)*

<sup>23</sup> Jesús nape' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

<sup>24</sup> Elí na' guque' zri'ine Matat,

Matat na' guque' zri'ine Leví,  
 Leví na' guque' zri'ine Melqui,  
 Melqui na' guque' zri'ine Jana,  
 Jana na' guque' zri'ine xetú José.

<sup>25</sup> José nigá guque' zri'ine Matatías,  
 Matatías na' guque' zri'ine Amós,  
 Amós na' guque' zri'ine Nahum,  
 Nahum na' guque' zri'ine Esli,  
 Esli na' guque' zri'ine Nagai.

<sup>26</sup> Nagai na' guque' zri'ine Maat,  
 Maat na' guque' zri'ine xetú Matatías,  
 Matatías nigá guque' zri'ine Semei,  
 Semei na' guque' zri'ine xetú José,  
 José nigá guque' zri'ine Judá.

<sup>27</sup> Judá na' guque' zri'ine Joana,  
 Joana na' guque' zri'ine Resa,  
 Resa na' guque' zri'ine Zorobabel,  
 Zorobabel na' guque' zri'ine Salatiel,  
 Salatiel na' guque' zri'ine Neri.

<sup>28</sup> Neri na' guque' zri'ine xetú Melqui,  
 Melqui nigá guque' zri'ine Adi,  
 Adi na' guque' zri'ine Cosam,  
 Cosam na' guque' zri'ine Elmodam,  
 Elmodam na' guque' zri'ine Er,

<sup>29</sup> Er na' guque' zri'ine Josué,  
 Josué na' guque' zri'ine Eliezer,  
 Eliezer na' guque' zri'ine Jorim,  
 Jorim na' guque' zri'ine xetú Matat,

<sup>30</sup> Matat nigá guque' zri'ine xetú Leví,  
 Leví nigá guque' zri'ine Simeón,  
 Simeón na' guque' zri'ine xetú Judá,  
 Judá nigá guque' zri'ine xetú José,  
 José nigá guque' zri'ine Jonán,  
 Jonán na' guque' zri'ine Eliaquim,

<sup>31</sup> Eliaquim na' guque' zri'ine Melea,  
 Melea na' guque' zri'ine Mainán,  
 Mainán na' guque' zri'ine Matata,  
 Matata na' guque' zri'ine Natán.

<sup>32</sup> Natán na' guque' zri'ine David,  
 David na' guque' zri'ine Isaí,  
 Isaí na' guque' zri'ine Obed,  
 Obed na' guque' zri'ine Booz,  
 Booz na' guque' zri'ine Salmón,  
 Salmón na' guque' zri'ine Naasón.

<sup>33</sup> Naasón na' guque' zri'ine Aminadab,  
 Aminadab na' guque' zri'ine Aram,  
 Aram na' guque' zri'ine Esrom,  
 Esrom na' guque' zri'ine Fares,  
 Fares na' guque' zri'ine xetú Judá,

<sup>34</sup> Judá nigá guque' zri'ine Jacob,

Jacob na' guquē' zri'ine Isaac,  
 Isaac na' guquē' zri'ine Abraham,  
 Abraham na' guquē' zri'ine Taré,  
 Taré na' guquē' zri'ine Nacor.  
<sup>35</sup> Nacor na' guquē' zri'ine Serug,  
 Serug na' guquē' zri'ine Ragau,  
 Ragau na' guquē' zri'ine Peleg,  
 Peleg na' guquē' zri'ine Heber,  
 Heber na' guquē' zri'ine Sala,  
<sup>36</sup> Sala na' guquē' zri'ine Cainán,  
 Cainán na' guquē' zri'ine Arfaxad,  
 Arfaxad na' guquē' zri'ine Sem,  
 Sem na' guquē' zri'ine Noé,  
 Noé na' guquē' zri'ine Lamec,  
<sup>37</sup> Lamec na' guquē' zri'ine Matusalén,  
 Matusalén na' guquē' zri'ine Enoc,  
 Enoc na' guquē' zri'ine Jared,  
 Jared na' guquē' zri'ine Mahalaleel,  
 Mahalaleel na' guquē' zri'ine xetú Cainán.  
<sup>38</sup> Cainán na' guquē' zri'ine Enós,  
 Enós na' guquē' zri'ine Set,  
 Set na' guquē' zri'ine Adán,  
 Adán na' guquē' ca zri'inequeze Dios.

## 4

### *Satanás da xriwe' dxilaj lazre' na ájala gusebaga na Jesús dul-la* (Mt. 4.1-11; Mr. 1.12-13)

<sup>1</sup> Jesús, zúalē Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawé' lataj.

<sup>2</sup> Na' guzúē' chua zra, na' Satanás da xriwe' gudilaj lazre' na ájala si xē na Le'. Quebe bi gudagu Jesús da chua zra ca', na' ca' gude' na' gudune'.

<sup>3</sup> Nadxa gunná da xriwe', guzre na Le':

—Che da li nacu' Lue' Zri'ine Dios, bēn xelxaca xiaj caní xeta xtila.

<sup>4</sup> Na' bechebe Jesús:

—Naxúajqueze na lu xiche cheē Dios, dxenné': Quegá nen xeta xtilaze gaca ban bēneache, san cá'anqueze nen xrtizra' Dios gaca ban bēneache.

<sup>5</sup> Nadxa da xriwe' guché na Jesús tu xi'a sibe, na' chaditē ble'e na Le' xúgute cue' xēzr la xu da zaj nnita lu xēzr la xu nigá,

<sup>6</sup> na' guzre na Le':

—Neda' gunna' Lue' ca naca xel-la dxenná bea nigá, ne xel-la szren cheē xúgute xēzr la xu caní, lawe' da zaj xu'u da caní lu na' a neda', na' gunézruja' na nu dxaca lazra' gunézruja' na.

<sup>7</sup> Gunna' na chiu' che lue' guzú zribu' lawa', ne gucá'ana szrenu' neda'.

<sup>8</sup> Jesús bechebe':

—Gucuasa lue', Satanás, lawe' da dxenná xiche cheē Dios, dxē'e bēneache: "Bca'ana szren Xranu' Dios, ne bēn zrin cheē tuze Le'."

<sup>9</sup> Nadxa da xriwe' na' guché na Jesús lu xēzre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxēzu' lu xu,

<sup>10</sup> lawe' da lu xiche cheē Dios dxenné':

Dios gusebague' gubáz chee xabáa chee' ca' xuluxue' Lue'.

<sup>11</sup> Xelechísaqueze' Lue' nen ne'e,  
chee quebe gaca we' ni'u lawe' xiaj ca'.

<sup>12</sup> Jesús bechebe':

—Cá'anqueze naxúaj na lu xiche chee Dios, dxé'e bénneache: "Quebe guchínenu' ca dxaca lazru' Xranu' Dios."

<sup>13</sup> Gate da xriwe' québedxa bezrela lazre' na ájala gun zréaje na Jesús, na' becuasa na tu chi'i.

*Jesús dxune' zrin chee' naga nababa Galilea*

*(Mt. 4.12-17; Mr. 1.14-15)*

<sup>14</sup> Na' Jesús bezrine' Galilea, ba nápalé'e xel-la waca chee Be' Lá'azxa, na' ca naca xézredu ca' zaj nababa na' buluchálaj bénneache ca naca xel-la waca chee'.

<sup>15</sup> Jesús bsédené' benne' ca' tu tu lu xudau' ca', na' xúgute' belúe lá'ane' Le'.

*Jesús dxexezrine' Nazaret*

*(Mt. 13.53-58; Mr. 6.1-6)*

<sup>16</sup> Nadxa Jesús bezrine' Nazaret, xézre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxune', chee gulabe' da naxúaj na lu xiche chee Dios.

<sup>17</sup> Buludé'e Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabe' naga naxúaj da dxenná:

<sup>18</sup> Be' Lá'azxa chee Xránadxu zúalene' neda', lawe' da guqué'e neda' chee guchálajlëna' benne' baxache' ca' dizra' chawe' chee'.

Gusel-le' neda' chee xexuna' benne' ca' quebe chawe' zaj zue', ne chee guzenda' benne' ba zaj nadxéaje' lu da zrinna, waca xeelé', ne chee xexuna' lau benne' la chul-la ca', ne chee guselá' benne' dxelezaca zi'e,

<sup>19</sup> ne chee guzenda' bénneache ba bzrin zra Xránadxu Dios gucá'ane' le' chawe'.

<sup>20</sup> Nadxa Jesús butube' xiche na', na' bdee' na lu na' benne' dxuxúe' xu'u na', na' bebé'e. Xúgute' benne' zaj zré'e lu xu'u na' dxelenné'e Le',

<sup>21</sup> na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchébe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xeje neda': Ca da bémentu' benu' lu xézre Capernaum, cá'anqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'.

<sup>25</sup> Dxapa' le'e, gulezrá' nu'ula zan ba gulate benne' chee' lu xézr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xézr la xu na'.

<sup>26</sup> Dios quebe gusel-le' Elías lau netú nu'ula, nate benne' chee', zue' xézr la xu Israel. Gusel-le' le' lau tu nu'ula, nate benne' chee', zue' lu xézre Sarepta, da zua na gagu naga dxe' xézre Sidón.

<sup>27</sup> Cá'anqueze gulezrá' benne' zan benne' dxeledxé'eng' wẹ' guzru' lu xezr la xu Israel ca lu zra guzúa Eliseo, benne' bchálajẹ' waláz cheẹ Dios, na' netúẹ' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'ẹ xu'u na' da nigá, na' belezrá'ale'ẹ.

<sup>29</sup> Na' gulase', ne belexebájẹ' Jesús xezre na', na' beleché'ẹ Lẹ' dxu'a chjéaj naga zria xezre na', cheẹ xuludxixre' Lẹ' na'.

<sup>30</sup> Na' Jesús bedéẹ' ládujla benne' ca', na' bezé'ẹ zexíajẹ'.

*Jesús dxexunẹ' tu benne' xu'ẹ be' xriwẹ'*  
(Mr. 1.21-28)

<sup>31</sup> Nadxa Jesús bexíajẹ' Capernaum, tu xezre nababa Galilea, na' guzú lawẹ' dxusédene' benne' ca' lu zra lá'azxa cheẹ judío ca'.

<sup>32</sup> Belexebánene' ca naca da dxusédene', lawe' da dxuchálajẹ' ca tu benne' napẹ' xel-la dxenná bea.

<sup>33</sup> Lu xu'u na' zua tu benne' xu'ẹ be' xriwẹ', na' dxebezre xẹ'ẹ,

<sup>34</sup> dxenné':

—Bsan netu'. ¿Bizr cheẹ na' dxunu' netu' zede, Jesús, benne' Nazaret? ¿Za'u guzríaxi'u netu'? Neda' núnbe'a Lue', ne nezda' nacu' benne' lá'azxa cheẹ Dios.

<sup>35</sup> Jesús gudil-lẹ' be' xriwẹ' na', dxenné':

—Zrize guzúa. Bsan benne' biu nigá.

Nadxa be' xriwẹ' na' gudín na bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na cheẹ'.

<sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'eng' be' xriwẹ' ca' nen dute xel-la dxenná bea cheẹ', ne nen xel-la waca, na' be' xriwẹ' ca' dxeledxúaj na.

<sup>37</sup> Na' buluchálajẹ' ca naca cheẹ Jesús xúgute' lu xezre ca' zaj nababa na'.

*Jesús dxexunẹ' xrna zru'ula Pedro*  
(Mt. 8.14-15; Mr. 1.29-31)

<sup>38</sup> Nadxa bedxúaj Jesús lu xu'u na', na' guxú'ẹ lizre Simón. Xrna zru'ula Simón na' quebe chawe' zue', xú'ule'ẹ da la, na' gulata' xuene' Jesús xexunẹ' le'.

<sup>39</sup> Jesús gubiguẹ'ẹ cuite', na' gudil-lẹ' da la na', na' bedxúaj na. Ca ná'queze bexasate', na' guzú lawẹ' dxuseni'ẹ da xelawe'.

*Jesús dxexunẹ' benne' zan quebe chawe' zaj zue'*  
(Mt. 8.16-17; Mr. 1.32-34)

<sup>40</sup> Ca dxebiá gubizra, benne' ca' zaj nnita' benne' quebe chawe' zaj zue' lizre' belú'ẹ le' lau Jesús, na' Lẹ' bze ne'ẹ tu tu benne' ca', ne bexunẹ' le'.

<sup>41</sup> Cá'anqueze zánete' be' xriwẹ' belexedxúaj na lu xichaj lázrdau benne' ca'. Dxeleenná na:

—Lue' nacu' Zri'ine Dios.

Jesús gudil-lẹ' be' xriwẹ' ca'. Quebe be'ẹ na lataj xelenné' na, lawe' da zaj neze na naca Lẹ' Cristo.

*Jesús dxuchálajẹ' naga nababa Galilea*  
(Mr. 1.35-39)

<sup>42</sup> Ca dxaní'sise', bdxuaj Jesús xezre na', guxíajẹ' naga xeajsúe' tuze'. Na' benne' ca' belexexílajẹ' Lẹ', na' belezrine' xuluzague' Lẹ' cheẹ quebe xezẹ'ẹ.

<sup>43</sup> Jesús gunné':

—Dxun na ba xen guzenda' bénneache xezícadxa xezrdu ca' ca dxenná bea Dios, lawe' da cheẹ guna' caní gusel-lẹ' neda'.



44 Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

## 5

### *Dxelezene' bela zan*

(Mt. 4.18-22; Mr. 1.16-20)

1 Gate zua Jesús dxu'a nísadau' chee Genesaret, na' belezrín benne' zan, ne buluchídetē' Le', lawe' da dxelaca lazre' xelenne' xrtizra' Dios.

2 Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj chee' ca'.

3 Nadxa guxú'u Jesús tu lu da dxedá lawe' nísadau', da naca na chee Simón, na' guzre' Simón guzrigue' na xelate' lu nísadau' na'. Jesús gudxé' lu da dxedá lawe' nísadau' na', na' guzú lawe' dxusédenē' benne' ca'.

4 Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj chee'le na' chee' senle bela.

5 Simón bechebe':

—Benne' Wesede, bedú xela bentu' zrin, ne quebe bi bela ne sentu'. Lu dizra' chiu', na' a guzal-la' xixruj nigá.

6 Ca belune' ca gunná Jesús, na' bela zante gulezene', na' gúcate wadxeza xixruj na'.

7 Nadxa bulutá ne'e gulenné' benne' ljwezre' zaj zre'e xetú lu da dxedá lawe' nísadau' chee xelácalene' le'. Benne' ca' belezrine', na' bulusezrate' dxúpatē da dxedá lawe' nísadau' ca', na' gulácatē na' z'i, ne dxácatē welaze na lu nísadau'.

8 Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

9 Caní gunná Simón lawe' da dxezrébele'e ne chee' da guca na, ne cá'anqueze dxelezrebe benne' ljwezre' ca', gate belelé'ene' bela zan ca'.

10 Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atēla su lau' senu' bēnneache lu da naca chee Dios.

11 Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjácalene' Jesús.

### *Jesús dxexune' tu benne' dxé'ene' we' guzru'*

(Mt. 8.1-4; Mr. 1.40-45)

12 Gate Jesús zue' tu xezre, na' bzrin tu benne' dxé'ene' we' guzru', na' ca blé'ene' Jesús, bzu zribe', ne gudíxrujte lawe' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

13 Nadxa Jesús btē'-be' nen ne'e, gunné':

—Dxaca lazra'. Bache bexacu'.

Ca gunné' ca', we' guzru' na' bedxúajte na.

14 Jesús bsebague' bēnnea' quebe nu xē'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí chee xexádxeu' lau Dios ca da gunná be'e Moisés chee xeleneze benne' ba bexacu' ca naca xízrawe' chiu'.

15 Ca naca xel-la waca chee Jesús bziríujdxá na, na' benne' zanté belezrague' lau Jesús chee xelenne' da dxuchálaje', ne chee xexune' le' ca naca xízrawe' chee'.

16 Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

*Jesús dxexune' tu benne' naxrú'une ní'a ne'e*

(Mt. 9.1-8; Mr. 2.1-12)

17 Tu zra zua Jesús dxusédene', na' bal-la benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee xezre Jerusalén, na' zúale xel-la waca chee Xránadxu Dios Jesús, na' bexune' benne' ca' quebe chawe' zaj zue'.

18 Nadxa belezrín tapa benne' zaj nu'e tu benne' zua zri ní'a ne'e, dee' tu lu blaga', na' gulaca lazre' xelegú'e le' lu xu'u chee xelíxrue' le' lau Jesús.

19 Quebe guca xelezrine' lau Jesús lawe' da zrále'e benne' zan ga na'. Nadxa gulegüéne' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús.

20 Gate ble'e Jesús ca dxeléajle benne' ca' chee', na' guzre' benne' quebe chawe' zue':

—Bénne'dau', ba bnite lawa' dul-la chiu'.

21 Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunite lawe' dul-la chee bénneache. Tuze Dios gaque'.

22 Jesús dxéquebe'eng' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní'?

23 ¿Bízrala na quebe naca na stebe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj?

24 Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee gunite lawa' dul-la chee bénneache.

Nadxa guzre' benne' na' naxrú'une ní'a ne'e:

—Lue' dxapa', bexasa, bexúa blaga' chiu', ne bexíaj.

25 Ca gunné' ca', bexásate benne' na' lau xúguté benne' ca', na' bequé'e blaga' chee', ne bezé'e zexíaje' lizre' zeajxé lá'ané' Dios.

26 Xúguté benne' ca' belexebánene', na' belúe lá'ané' Dios, ne nen xel-la dxelezrebe gulenné':

—Na'a ble'edxu da dxebánequezdxu.

*Jesús dxenné' Leví*

(Mt. 9.9-13; Mr. 2.13-17)

27 Ca gudé na' bezá'a Jesús, na' blé'eng' tu benne' dxuchizruje' waláz chee xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

28 Na' guxasa Leví, bca'ané' ca naca chee' ca', na' guxíajlene' Jesús.

29 Ca gudé na', Leví gulu'e tu xrche' zrente' lizre' chee bca'ana szrene' Jesús, na' zrále'équeze na' xezícadxa wechizruj ca', ne xezícadxa benne' zaj dxe'e dxágulene' benne' ca'.

30 Na' benne' xudau' fariseo ca', ne benne' ca' dxuluxuzájle'e da nadxixruj bea na gulezú lawe' dxelezí tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

<sup>31</sup> Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'.

<sup>32</sup> Neda' quegá za'a dxennéa' benne' xrlátaje. Za'a dxennéa' benne' dul-la, chee xelexebí'i lazre'.

*Dxuluchebe' Jesús ca naca chee gubasa*

*(Mt. 9.14-17; Mr. 2.18-22)*

<sup>33</sup> Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusédenu' tu dxelé'aj dxeláguzqueze'?

<sup>34</sup> Jesús bechebe':

—¿Wazéquele xeje benne' zaj zra' laní chee wechaga na' xelune' gubasa dxácaté na' zua benne' wechaga na' nen benne' ca'?

<sup>35</sup> Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

<sup>36</sup> Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' guné', na' guzrí'a xí'e ca naca zre' cube na', na' ládxe'du cube na' quebe gulé'e na cháwedau' nen ladxe' gula na'.

<sup>37</sup> Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'.

<sup>38</sup> Chee le' na' dxal-la' cá'adxu xrise uva cube lu bzude xide cube, na' dxúpaté na' xegá'ana chawe' na.

<sup>39</sup> Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

## 6

*Benne' ca' dxuséde Jesús dxelálaje' dau zrua' xtila lu zra lá'azxa chee judío ca'*

*(Mt. 12.1-8; Mr. 2.23-28)*

<sup>1</sup> Tu lu zra lá'azxa chee judío ca', gudé Jesús naga naxaza zrua' xtila, na' benne' ca' dxusédene' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'.

<sup>2</sup> Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lá'azxa cheedxu?

<sup>3</sup> Jesús bechebe':

—¿Quebe ne gulábale le'e ca ben David ne benne' ljwezre' ca' gate guledune'?

<sup>4</sup> Guxú'u David na' tu lu xudau' chee Dios, ne guqu'é'e xeta xtila da gulú'u bxruze lau Dios, na' gudawe' na, ne bnézrujte' chee benne' ca' zjácálene' le', ne quebe naca chee' xelawe' xeta xtila na'. Tuze bxruze ca' naca chee' xelawe' na.

<sup>5</sup> Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca chee zra lá'azxa.

*Jesús dxexune' benne' nazrinnaj ne'e*

*(Mt. 12.9-14; Mr. 3.1-6)*

<sup>6</sup> Xetú lu zra lá'azxa chee judío ca', guxú'u Jesús tu lu xu'u, na' guzú lawe' dxusédenē' benne' zaj nazrague' na'. Zua na' tu benne' nazrinnaj ne'e xabela.

<sup>7</sup> Benne' ca' dxuluxuzájle'e da nadxixruj bea na, ne benne' xudau' fariseo ca' dxuluzuzre' Jesús chee xeelé'ene' che xexún Jesús bēnnea' lu zra lá'azxa chee', chee xelezéquene' xelawe' zria Jesús.

<sup>8</sup> Jesús ba nézene' ca da dxelegú'u lazre', na' guzre' bēnnea' nazrinnaj ne'e: —Guxasa, ne guzé laduj nigá.

Benne' na' guxase', na' guzé' na'.

<sup>9</sup> Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa chee, da xrlátaje che da calela? ¿Gucache cháwedxu xel-la nabán chee tu benne', che guzría xidxu na?

<sup>10</sup> Nadxa Jesús guné'e benne' ca' zaj naxechaj Le', na' guzre' benne' we' na': —Bli na'u nigá.

Benne' na' bene' ca', na' bexácatē ne'e na'.

<sup>11</sup> Na' benne' ca' zaj zre'e na' belezrá'ale'e, na' gulezú lawe' dxuluchebe ljwezre' bi xelezéquene' xelune' chee Jesús chee xuluzría xi'e Le'.

*Jesús dxequ'e benne' chazrinnu ca' xelaque' gubáz chee'*

*(Mt. 10.1-4; Mr. 3.13-19)*

<sup>12</sup> Ca lu zra na' Jesús guxiáje' tu lu xi'a xeaichálajlene' Dios, na' guzúe' bedú xela dxuchálajlene' Dios.

<sup>13</sup> Ca guxaní' gunné' benne' ca' dxusédenē', ne guqu'e' chazrinnu benne' ca', na' bzre'e benne' ca' xelaque' gubáz chee'.

<sup>14</sup> Benne' caní zaj naque':

Simón, (bēnnea' bzuē' le' Pedro),  
Andrés, (benne' biche Šimón na'),  
Jacobo, Juan, Felipe, Bartolomé,

<sup>15</sup> Mateo, Tomás,

Jacobo, (zri'ine Alfeo),

Simón, (bēnnea' dxedábague' benne' Roma ca')

<sup>16</sup> Judas, (benne' biche Jacobo), ne

Judas Iscariote, (bēnnea' gudé'e Jesús lu na' benne' ca' dxeledábague' Le'.)

*Jesús dxusédenē' benne' zante*

*(Mt. 4.23-25)*

<sup>17</sup> Jesús bđinne' lu xi'a na' nen benne' ca' dxusédenē', na' bzrine' tu lache' nen benne' ca'. Benne' zan zaj zre'e na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'e chee xelene' da dxuchalaj Jesús, ne chee xexún Jesús le' ca naca xízrawe' dxeledxé'ene'.

<sup>18</sup> Cá'anqueze benne' ca' zaj xu'e be' xriwe' belexaque'.

<sup>19</sup> Xúgutē benne' ca' gulaca lazre' xuluté' Jesús lawe' da dxexún Le' xúgutē' nen xel-la waca chee'.

*Benne' ca' naca da ba neza zren chee', ne benne' ca' zaj naque' baxache'*

*(Mt. 5.1-12)*

<sup>20</sup> Nadxa Jesús gunné'e benne' ca' dxusédenē', na' guzre' le':

—Ba neza zrentē naca na chee le'e, dxéquebe'ele nácale benne' xache', lawe' da waxú'ule le'e naga dxenná bea Dios.

<sup>21</sup> Ba neza zrentē naca na chee le'e, dxedunle da dxunna Dios, lawe' da wélajquezle.

'Ba neza zrentę naca na cheęle le'e, dxebézrele ne cheę dula, lawe' da guzrízrequezle.

<sup>22</sup> 'Ba neza zrentę naca na cheęle le'e, gate xelecuide bénneache le'e, ne gate xelexebáję' le'e chalé'ajla, ne gate xelenné' schanni' cheęle, ne gate xalucá'ana ditję' lala ca tu da sban lawe' da nácale bi chia' neda', Benne' Gulję' Bénneache.

<sup>23</sup> Le béle'e, ne le sua lu da ba neza lu zra na' lawe' da zrué'ele tu da zren lu xabáa cheę Dios. Cá'anqueze benne' xra xrtau benne' caní bulusaca zi'e benne' ca' buluchálaję' waláz cheę Dios.

<sup>24</sup> 'Baxache' nácale le'e, benne' gunnı'a, lawe' da ba nápale xel-la dxebé da naca cheę xęzr la xu nigá.

<sup>25</sup> 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

<sup>26</sup> 'Baxache' nácale le'e gate xúgute bénneache dxeleonné' da chawe' cheęle, lawe' da ca' belún xra xrtáule, gulenné' da chawe' cheę benne' węn lazre' ca', benne' gulenné': "Netu' dxuchálajntu' waláz cheę Dios."

*Dxal-la' zrí'idxu benne' ca' dxelecuídenę' dxi'u*  
(Mt. 5.38-48; 7.12)

<sup>27</sup> Na' gunná Jesús:

—Dxapa' le'e dxénele chia', le zri'i benne' ca' dxelecuídenę' le'e, ne le gun chawe' cheę benne' ca' dxelezzré'ę le'e.

<sup>28</sup> Le nęę chawe' cheę benne' ca' dxeleonné' caleļa cheęle, ne le naba lau Dios gaca chawe' cheę benne' ca' dxeleonné' schanni' cheęle.

<sup>29</sup> Che nu benne' capę' xrágale, le guzęte xecha la'a, ne che nu benne' que'e xicha cheęle, le güe lataj ca'ate' zrale.

<sup>30</sup> Le gunezruj nütęze benne' bi nabe' le'e, ne che nu benne' que'e da naca cheęle, quebe xenábale na.

<sup>31</sup> Le gun cheę bénneache cáteze na' dxaca lázrele xelunę' cheęle.

<sup>32</sup> 'Che le'e nazri'ile tuze benne' ca' zaj nazrí'ine' le'e, ¿bízraqueze da chawe' dxunle? Cá'anqueze dxelún benne' ca' dxelunę' da caleļa.

<sup>33</sup> Che dxunle chawe' cheę tuze benne' ca' dxelunę' le'e chawe', ¿bízraqueze da chawe' dxunle? Cá'anqueze dxelún benne' węn da zrinnaj ca'.

<sup>34</sup> Che bi dxusanle cheę tuze benne' ba nézele wexunne' na, ¿bízraqueze da chawe' dxunle? Cá'anqueze benne' węn da caleļa ca' dxulusanę' da naca cheę cheę benne' ca' dxelunę' da caleļa, lawe' da zaj nézenę' wulunézrujtę benne' ca' le na.

<sup>35</sup> Dxal-la' zri'ile le'e benne' ca' dxelezzré'ę le'e, ne gunle da chawe' cheę, ne gusanle cheę benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' cheę Dios szrente, lawe' da naca Le' zri'i lazre' nen benne' ca' quebe dxelexezaca ba lazre', ne benne' węn da caleļa ca'.

<sup>36</sup> Le xęzri lazre' bénneache da dxun Dios, dxezri lazre' le'e.

*Quebe guzúale chalá'ala le sa' ljwézrele*  
(Mt. 7.1-5)

<sup>37</sup> Na' gunná Jesús:

—Quebe guzúale chalá'ala le sa' ljwézrele, na' Dios quebe guzúe' le'e chalá'ala. Quebe bi nnele cheę le sa' ljwézrele, na' Dios quebe guchi'e cheęle le'e. Le gunite lau cheę le sa' ljwézrele, na' Dios gunite lawę' cheęle le'e.

<sup>38</sup> Le gunezruj chee bënneache, na' Dios gunne' chee le'e. Dios cu'e lu xcuite chee tu xi'ina da nálate, ne da naxi'tequeze, ne gunibete' na, ne sua dí'atequeze na. Dios gudxixrequeze' chee ca da dxudxírele chee bënneache.

<sup>39</sup> Nadxa Jesús bchálaje' da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' guné', dxúpaté' xelexixre' tu lu xedxu.

<sup>40</sup> Netú benne' dxusede gácadxe' szren ca naca bënnea' dxusedene' le', na' gate xuzre gusedié', gaque' ca naca bënnea' bsédené' le'.

<sup>41</sup> '¿Bizr chee na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'?

<sup>42</sup> Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': "Benna lataj xebéaja' bébedu na' xu'u na xiaj lau'?" Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljwezru'.

*Naca bea tu benne' ne chee da dxune'*

*(Mt. 7.17-20; 12.34-35)*

Nadxa gunná Jesús:

<sup>43</sup> —Tu xaga xrlátaje quebe cuía na da zixre calela, na' xaga da quebe naca chawe' quebe gaca cuía na da zixre chawe'.

<sup>44</sup> Tu tu xaga naca bea na ne chee da zixre da dxebia na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá.

<sup>45</sup> Benne' xrlátaje, da xrlátaje dxenné bënnea' lawe' da naxaza da xrlátaje lu xichaj lázrdawe', na' benne' wen da calela, da calela dxenné bënnea' lawe' da xu'u da calela lu xichaj lázrdawe'. Dxu'e na' dxenné na ca naca da xu'u lu xichaj lázrdawe'.

*Dxuchalaj Jesús chee chupa lane xu'u*

*(Mt. 7.24-27)*

Gunná Jesús:

<sup>46</sup> —¿Bizr chee na' dxéle neda': "Xran, Xran", ne quebe dxunle ca da dxapa' le'e?

<sup>47</sup> Xapa' le'e aja naca bënnea' ze'e nen neda', ne dxenne' xrtizra'a, ne dxunge' ca da dxapa' le'.

<sup>48</sup> Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gune na xu'u na' lawe' da zria lane na lawe' xiaj xre.

<sup>49</sup> Na' bënnea' dxenne' xrtizra'a, ne quebe dxunge' ca da dxapa' le', naque' ca tu benne' bene' xu'u chee' lawe' xu dxeze, ne quebe guzale' lane na, na' gate bdxuaj xegu na', ne xeajchú'ule'e na le'e xu'u na', na' guché na le na, na' tu chí'izqueze bzria xi na le na.

## 7

*Jesús dxexune' bi wen zrin chee tu benne' Roma*

*(Mt. 8.5-13)*

<sup>1</sup> Gate bexuzre bchálaje Jesús benne' ca', na' bezé'e xezíaje' Capernaum.

<sup>2</sup> Zua tu benne' Roma na', benne' dxenná be'e lu wedil-la, na' zua tu bi wen zrin chee' nazri'ile'ene'-be', na' bi na' quebe chawe' zúabe', ne dxaca wátebe'.

<sup>3</sup> Gate ben benne' Roma na' ca da dxun Jesús, na' gusél-le' bal-la benne' gula sina chee judío ca', chee xeajleguezre' Jesús xide' xexune' bi wen zrin chee'.

<sup>4</sup> Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca chee' gácalenu' le',

<sup>5</sup> lawe' da dxape' ba lá'ana xezre cheedxu, na' léqueze' bene' tu xu'u cheedxu ga dxezragadxu.

<sup>6</sup> Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusél-le' bal-la benne' ljwezre' xeajleguezre' Jesús: —Xran, quebe senu' gunne xue, lawe' da quebe naca chia' chu'u lizra'.

<sup>7</sup> Chee le' na' ne quebe bexazrda' néda'queza' xedajdilja' Lue'. Cun gunnaze, na' xexaca bi wen zrin chia'.

<sup>8</sup> Néda'queza' zua benne' dxenná bé'enge' neda', na' neda' dxenná be'eda' benne' dxjaca wedil-la. Che xapa' tu bénnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wen zrin chia' da gunbe', na' gunbe' na.

<sup>9</sup> Gate ben Jesús da nigá, na' bebánene', na' gunné'e benne' ca' zjácále Le', gunné':

—Da li, quebe ne cheajxraca' tu benne' xezre Israel dxeajli lazre' neda' ca dxun benne' nigá.

<sup>10</sup> Gate belexezrin benne' ljwezre benne' Roma na' lizre', na' belelé'enge' ba bexaca bi wen zrin na'.

*Jesús dxusebané' bi biu chee' tu nu'ula ba gute benne' chie'*

<sup>11</sup> Ca gudé na' Jesús guzé'e zéajé' tu xezre da nazí le na Naín, na' xjácále Le' benne' ca' dxusédené', ne benne' zante.

<sup>12</sup> Gate bzrine' gáguze naga zua xezre na', blé'enge' benne' zaj nu'e tu bi gate zeajlecaché'-be', na' naca be' bi tulicha' chee xrnabe', nu'ula na' ba gute benne' chie'. Benne' zan, benne' lazrie' zjácálene' le'.

<sup>13</sup> Gate Xránadxu blé'enge' nu'ula na', na' bexache lazre' le', ne guzre' le':

—Québedxa cuezru'.

<sup>14</sup> Nadxa gubiga Jesús dxu'a xi'ina xu'ube', na' bte' na. Na' benne' ca' zeajlexxu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup> Na' bi na' ba nate bexasabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'.

<sup>16</sup> Gate belelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente', benne' dxenné' waláz chee Dios, ba ble'e ládujla dxi'u.

Cá'anqueze dxelenné':

—Dios ba ble'e dxácalene' xezr chee'.

<sup>17</sup> Ca naca naga nababa Judea, ne xezre walizr chee na belén bénneache ca naca xel-la waca chee Jesús.

*Juan, bénnea' bchue' bénneache nisa dxesel-le' gubáz chee' lau Jesús (Mt. 11.2-19)*

<sup>18</sup> Naga xu'u Juan lizre xia, bénene' ca naca chee da nigá lawe' da benne' ca' zjácálene' Juan buluzenne' le' da dxaca na. Juan gunné' chupa benne' ca',

<sup>19</sup> na' gusel-le' le' lau Jesús chee cheajlechebe' Le' che da li naque' Cristo, bénnea' dxal-la' xide', u che dxal-la' xebeze' benne' xula.

<sup>20</sup> Nadxa benne' ca' gusel-la Juan belezrine' lau Jesús, na' gulé'e Le':

—Juan, b́ennea' bchue' b́enneache nisa nasele' netu' zedajch́ebentu' Lue' che Lue' na' nacu' Cristo, b́ennea' dxal-la' xide', u che dxal-la' cuézantu' benne' xula.

<sup>21</sup> Ca lu zra na' Jesús bexune' benne' zante' benne' we', ne benne' dxé'eng' xízrawe' da dxedá du zren, ne benne' ca' zaj xu'e be' xriwe', na' bexune' benne' la chul-la ca'.

<sup>22</sup> Nadxa Jesús guzre' benne' ca' nasele' Juan:

—Le cheajxaca, ne le xe' Juan ca naca da ba ble'ele, ne da bénele. Benne' la chul-la ca' dxelexelé'eng', na' benne' zrinnaj ca' dxelexedé', na' benne' dxeledxé'eng' we' guzru' ba belexaque', na' benne' xache' ca' dxelenne' dizra' chawe' chee' Dios.

<sup>23</sup> Ba neza zren naca na chee' benne' quebe gusán lazre' neda'.

<sup>24</sup> Gate besí'aca benne' ca' gusel-la Juan, na' Jesús guzú lawe' dxuchálajlene' benne' zaj zre'e na' ca naca chee' Juan na', dxenné':

—¿Bizra guxíajle le'e xeajna'le le'e xixre' lawe' lataj? ¿Tu xia ttila da dxutá be'?

<sup>25</sup> Che cabí, ¿bizra xeajna'le? ¿Tu benne' nacu' zra lané' da zácále'e? Ba nézquezle le'e benne' ca' dxelacu' zra lané' da zácále'e, ne dxelé'aj dxelawe' da zácále'e zaj zre'e lizre' benne' blau ca'.

<sup>26</sup> Che cabí, ¿bizra xeajna'le? ¿Tu benne' dxuchálaje' waláz chee' Dios? Awe', ble'ele tu benne' nácadxé' szren ca tu benne' dxuchálajé' waláz chee' Dios.

<sup>27</sup> Juan nigá naque' b́ennea' naxúaj na chee' lu xiche chee' Dios, dxenné': Dxesel-la' gubáz chia' lau Lue', chee' gucá'ana chawe' neza naga teu'.

<sup>28</sup> Dxapa' le'e, ládujla xúgute' benne' quebe nu chilá' benne' dxuchálaje' waláz chee' Dios nácadxé' szren ca Juan nigá. Na'a benne' nácadxé' dxexruj lazre' naga dxenná bea Dios nácadxé' blau ca Juan nigá.

<sup>29</sup> Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'eng' Dios naque' xrlátaje, na' beledxúe' nisa lu na' Juan.

<sup>30</sup> Benne' xudau' fariseo ca', ne benne' ca' dxuluxuzájle'e da nadxixruj bea na buluzúe' chalá'ala ca naca da dxaca lazre' Dios guné' chee', na' quebe beledxúe' nisa lu na' Juan.

<sup>31</sup> Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿ájazra zaj naque'?

<sup>32</sup> Zaj naque' ca bidu ca' dxelebe'be' dxelitajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Bil-la xáchentu', san quebe gudxézrele.”

<sup>33</sup> Caní zaj naca benne' ca' lawe' da bla' Juan, b́ennea' bchue' b́enneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'.

<sup>34</sup> Nadxa bla'a neda', Benne' Gulje' B́enneache, dxe'aj dxawa', na' dxelenné' naca' wagu xrata, ne benne' dxé'ajle'e, ne dxelenné' naca' ljwezre benne' dul-la ca', ne benne' wechizruj ca'.

<sup>35</sup> Xel-la sina chee' Dios naca bea na ne chee' da dxelún benne' ca' zaj nape' xel-la sina chee' Dios.

*Da bchalaj Jesús lizre Simón, benne' xudau' fariseo*



36 Tu benne' xudau' fariseo gunné' Jesús cheajtawé' xeta lizre', na' Jesús guxíajé' lizre bénnea', na' gudxé'ē dxawé'.

37 Nadxa tu nu'ula dul-la chee xezre na', gate benne' bzrin Jesús dxawé' xeta lizre benne' fariseo na', na' bzrin nu'ula na' ga na', nu'ē tu da' naca na xiaj zaca, da nazrátē na da dxelá zixre.

38 Gate bzrin nu'ula na' naga zua Jesús, na' gudxé'ē zran ni'ē dxebezre', ne guzú lawé' dxibe' ni'a Jesús nen nisa dxebezre', ne bsebize' ni'ē nen xicha xíchajé', ne bnupé' ni'a Jesús, na' gulu'ē na da dxelá zixre na'.

39 Na' benne' xudau' fariseo, bénnea' gunné' Jesús lizre', gate blé'ene' da nigá, gunné' lu lázrdawé': "Chela benne' nigá da li naque' benne' dxuchálajé' waláz chee Dios, guéquebe'equeze' aja naca chee nu'ula nigá dxuté' ni'ē, lawe' da naque' nu'ula dul-la."

40 Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

41 Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tuē dxal-le' chee' lazruj chee' chupiza, na' xetúe' dxebage' lazruj chee' chupa beu'.

42 Lawe' da quebe dxelezéquene' xelexéxíruje' chee' bénnea', na' le' bnite lawé' chee' dxúpatē benne' ca' ca naca da dxelebage' chee'. Na'a gunná, ¿nula benne' caní zrí'idxene' bénnea'?

43 Simón bechebe':

—Dxéqueda' bénnea' bnite lawé' chee' da zrendxa.

Na' Jesús guzre' le':

—Da li dxennáu'.

44 Nadxa Jesús gunné'ē nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu' gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebize' na nen xicha xíchajé'.

45 Quebe bnupu' neda', san nu'ula nigá, gate guxú'utea', quebe dxusane' dxunúpequeze' ni'a.

46 Quebe gulú'u da za xíchaja', san nu'ula nigá gulu'ē ni'a da dxelále'ē zixre.

47 Chee le' na' dxapa' lue', lawe' da nazrí'ilé'ene' neda', da nigá naca bea na ba bnite lawa' chee' ca naca dul-la zan chee', san bénnea' naca bábaze dul-la chee' da bnite lawa', láteze zrí'ine' neda'.

48 Nadxa Jesús guzre' nu'ula':

—Dul-la chiu' ba bnite lawa'.

49 Na' benne' ca' zaj zre'e nen Le', ne zaj dxe'e na' gulezú lawé' dxelenné' lu lázrdawé': "¿Nuzra benne' nigá, dxunite láuqueze' dul-la?"

50 Jesús guzre' nu'ula na':

—Ba naláu' lawe' da guxéajle'u chia'. Bexíaj duté xel-la dxebeza zri lazre'.

## 8

### *Nu'ula ca' belún zrin chee Jesús*

1 Ca gudé da nigá, gudá Jesús zane' xezre, ne xézredu ca', dxusédene', ne dxuchálajé' ca dxenná bea Dios. Benne' chazrinnu gubáz ca' zjácalene' Le'.

<sup>2</sup> Cá'anqueze zjácale Lē' bal-la nu'ula ca', benne' ca' bexunē' lē' ca naca xízrawē' cheē', ne bebéajē' be' xriwē' ca' da zaj xu'ē. Ládujla nu'ula ca' ziaj María Magdalena, nu'ula na' belexedxúaj gazre be' xriwē' lu xichaj lázrdawē'.

<sup>3</sup> Ládujla lē' zíajqueze Juana, zru'ula Chuza, benne' na' xu'u lu ne'ē da napa Herodes. Cá'anqueze ládujla lē' ziaj Susana, na' zjaca nu'ula zandxa na', nu'ula ca' dxelácalēnē' Jesús nen da zaj nape'.

*Da dxulé'e na ca naca cheē benne' dxaze' zrua' xtila*

(Mt. 13.1-9; Mr. 4.1-9)

<sup>4</sup> Benne' zan beledxúajē' lu xēzre ca' cheē xeledé'ene' Jesús, na' gate belezraga benne' zan naga zuē', na' bchálajē' tu da dxulé'e na, dxē'ē lē':

<sup>5</sup> —Tu benne' dxaze' guzē'ē zjaze' zrua' xtila. Ca zéajē' dxaze' na, bal-la bínnedu ca' xeajlechaze na dxu'a neza, na' benne' ca' bululéajē' na, na' belezrín bxínnedau' guláguba' na.

<sup>6</sup> Xebal-la bínnedu ca' xeajlechaze na lu xiaj ca', na' gate bínnedu caní belezría na, chaditē' gulebizre na, lawe' da quebe gudxé' gupa'.

<sup>7</sup> Xebal-la bínnedu ca' xeajlechaze na naga zaj dxē' lue xeche', na' bululule xeche' ca' lē' na.

<sup>8</sup> Xebal-la bínnedu ca' xeajlechaze na lu xu bebe, na' gate belegula na, na' gulezríalē'ē na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

*Jesús dxenné' bizr cheē na' dxuchálajē' da dxululé'e na*

(Mt. 13.10-17; Mr. 4.10-12)

<sup>9</sup> Nadxa benne' ca' dxusede Jesús gulénábene' Lē' bizra zéajē' da dxulé'e nigá.

<sup>10</sup> Jesús guzre' lē':

—Dios dxuzéajni'ine' le'e ca naca da nagache cheē xel-la dxenná bea cheē', san benne' xula, dxuchálajēna' lē' da dxulé'e na caní, cheē gate dxeledé'ene' xelaque' ca benne' quebe dxeledé'ene', ne gate dxelenne' quebe dxeléajni'ine'.

*Jesús dxuxuzájē'ē da dxulé'e na ca naca cheē bēnnea' dxaze'*

(Mt. 13.18-23; Mr. 4.13-20)

<sup>11</sup> Na' gunná Jesús:

—Da nigá naca ca zéajē da dxulé'e na': Bínnedu ca' zéajē na xrtizra' Dios.

<sup>12</sup> Bínnedu ca' xeajlechaze na dxu'a neza zéajē na benne' ca' dxelenne' xrtizra' Dios, san za' da xriwē', na' dxegúa na dizra' na' lu xichaj lázrdau benne' ca', cheē quebe xeléajē'ē, ne quebe xeledé'.

<sup>13</sup> Bínnedu ca' xeajlechaze na lu xiaj ca' zéajē na benne' ca' dxelenne' dizra' na', ne dxelezi'ē na dutē xel-la dxelebé, san quebe dxaze na lu xichaj lázrdawē'. Dxeléajē'ē tu chí'idau'ze, na' gate dxeledé'ē lu da zi' da xa', na' dxulusán lazre' na.

<sup>14</sup> Bínnedu ca' xeajlechaze na naga zaj dxē' lue xeche' zéajē na benne' ca' dxelenne' dizra' na', na' dxexjaque', na' lawe' da dxelezenē' gunne xue da zante, ne dxelezé' lazre' xel-la gunní'a, ne da xele'aj xelawē' da zácalē'ē, na' xúgutē da caní dxulusunite na dizra' na', na' quebe dxun na zrin lu xichaj lázrdawē'.

<sup>15</sup> Na' bínnedu ca' xeajlechaze na lu xu bebe zéajē na benne' ca' zua chawe', ne du lazre' lázrdawē', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawē'.

*Da dxulé'e na ca naca chee tu da dxegú'u lení'*

*(Mr. 4.21-25)*

<sup>16</sup> Gunná Jesús:

—Netú benne' che gugale' da dxegú'u lení', quebe gudúsie' na tu xi'ina, u zranle ga dxasie', san guzúe' na sibe, chee cu'u lení' na chee benne' zaj zre'e lu xu'u na'.

<sup>17</sup> Quebe bi de da nagache' da quebe gulé'e lau na, ne quebe bi xu'u lu xichaj lázrdau bénneache da quebe gaca bea na, ne lá'tequeze na.

<sup>18</sup> 'Chee le na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéqueñe' nape'.

*Dxelezn' lau Jesús xrne'e, ne benne' biche' ca'*

*(Mt. 12.46-50; Mr. 3.31-35)*

<sup>19</sup> Nadxa xrna Jesús, ne benne' biche' ca' belezrine' naga zue', san quebe gulezéqueñe' xelezrine' lau Le', lawe' da zrále'e benne' zan ga na'.

<sup>20</sup> Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlene' Lue'.

<sup>21</sup> Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

*Jesús dxuzúa zrie' be' bdunu', ne xeajxrza chee nísadau'*

*(Mt. 8.23-27; Mr. 4.35-41)*

<sup>22</sup> Tu zra guxú'u Jesús tu lu da dxedá lawe' nísadau' nen benne' ca' dxusédené', na' guzre' le':

—Cheajdxu xecha la'a nísadau'.

Na' gusiá'que',

<sup>23</sup> ne dxácaté zjaque' lu nísadau' na', guse Jesús. Na' guzú lau dxácale'e be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácaté waxaze na lu nísadau'.

<sup>24</sup> Nadxa bulusebane' Jesús, dxelé'e Le':

—¡Benne' Weséde! ¡Benne' Weséde! ¡Ba dxázedxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na.

<sup>25</sup> Nadxa Jesús guzre' benne' ca' dxusédené':

—¿Quebe ne chéajlele chee Dios?

Benne' ca' belezrebe', ne belexebánene', na' buluchébe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

*Tu benne' Gadara xu'e be' xriwe'*

*(Mt. 8.28-34; Mr. 5.1-20)*

<sup>26</sup> Nadxa belezrine' xecha la'a nisa lu xezr la xu chee xezre Gadara, chalá'a ca'ala chee Galilea.

<sup>27</sup> Gate bedxúaj Jesús lu da dxedá lawe' nísadau' na', na' bzrin tu benne' xezre na' lau Le'. Zánete iza ba guca xu'u be' xriwe' ca' benne' nigá. Quebe gúcué' zra lane', ne quebe guzúe' netú lu xu'u, san xeajchu'e tu lu ba ca'.

<sup>28</sup> Gate blé'ene' Jesús, na' xeajzú zribe' lau Le', na' gudxezre xe'e, dxenné':

—¿Bizr chee na' za'u naga zua', Jesús, Zri'ine Dios szrente'? Dxata' xueda' Lue' quebe gusaca zi'u neda'.

<sup>29</sup> Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne'

nigá. Benne' xezre na' gulele' benne' nigá, ne buluchéaje' le' ni'a ne'e nen du xia, san le' bzúzuxe' du xia na', na' be' xriwe' ca' guleché na le' le'e xixre' lawe' lataj.

<sup>30</sup> Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'.

<sup>31</sup> Be' xriwe' ca' gulenaba na Jesús quebe sel-le' na lataj chul-la.

<sup>32</sup> Lu xi'a naga zua Jesús, na' zrále'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxezrá na lu cuche ca', na' bnezrui Jesús na lataj.

<sup>33</sup> Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute' cuche ca' buluzrúnnujba', ne gulebíxreba' dxu'a chjéa, na' xejlecházeba' lu nísadau', naga gulépeba', guláteba'.

<sup>34</sup> Benne' ca' dxuluxúe' cuche ca', gate belelé'eng' ca da guca, na' buluzrúnnuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe' xezre ca da guca.

<sup>35</sup> Nadxa benne' ca' beledxúaje' xejlenné'e ca da guca. Gate belezring' naga zua Jesús, na' belelé'eng' bènea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácu'e' ladxe', ne ba bezúa chawe' xichaj lázrdawe', na' benne' ca' belezrebe'.

<sup>36</sup> Na' benne' belelé'e ca da guca buluchálajlene' benne' xula ca' ca guca gate becaxa bènea' guxú'e be' xriwe' ca'.

<sup>37</sup> Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezrébele'e. Ca'an guca, guxú'u Jesús lu da dxedá lawe' nísadau', chee xezé'e xéaje'.

<sup>38</sup> Bènea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

<sup>39</sup> —Bexiaj lizru', na' bchalaj chee xúgute' ca da ba ben Dios chiu'.

Na' benne' na' bezé'e zexíaje', na' bchálajlene' benne' xezre ca' ca da ben Jesús chee le'.

*Jesús dxexune' bí nu'ula chee Jairo, ne tu nu'ula xejte' zra lane'  
(Mt. 9.18-26; Mr. 5.21-43)*

<sup>40</sup> Gate bezrín Jesús xecha la'a dxu'a nísadau', benne' ca' zaj zre'e na' gulezí' lu ne'e Le' nen duté xel-la dxelebe', lawe' da xúgute' dxelebeze' Le'.

<sup>41</sup> Nadxa bzrin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre',

<sup>42</sup> lawe' da zua tuze bi nu'ula chee'. Xu'ube' chazrinnu iza, na' ba dxaca wátebe'. Gate guzá' Jesús zéaje', benne' zante zjácálene' Le', ne buluchídete lwezre'.

<sup>43</sup> Ládujla benne' ca' zeaj tu nu'ula quebe chawe' zue', na' chazrinnu iza ba zeaj dxé'eng' we' dxen da dxaca chee nu'ula ca'. Ba gudízruje' benne' dxelexún bèneache ca' xúgute' ca da gudape', na' quebe bi gulezéquene' xelune' chee xexaca nu'ula na'.

<sup>44</sup> Nu'ula na' gubigue' cúzrula Jesús, na' xejte' zran ni'a zre', na' la ná'queze bexágate dxen da dxaca nu'ula na'.

<sup>45</sup> Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesede, benne' caní dxuluchídee' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

<sup>46</sup> Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup> Gate gúquebe'e nu'ula na' ba neze Jesús da guca, nadxa gudé'e dxezrízete', na' bzu zribe' lau Jesús, ne guxrúalepe' lau xúgute' benne' ca' bizr chee' na' bte' Jesús, ne ca guca bexacáte'.

<sup>48</sup> Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, dute' xel-la dxebeza zri lazre'.

<sup>49</sup> Ne dxuchálajte' Jesús, bzin tu benne' naga ze Jesús, benne' guzé'e lizre Jairo, benne' blau chee' xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

<sup>50</sup> Gate ben Jesús ca' gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

<sup>51</sup> Gate bzin Jesús xu'u na', netú quebe be' lataj chú'ule' Le', san tuze Pedro, ne Jacobo, ne Juan, ne xra xrna bi nu'ula na'.

<sup>52</sup> Xúgute' benne' zaj zre'e na' dxelebezre', ne dxelebezre xache' chee' bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

<sup>53</sup> Na' benne' ca' buluzrizre' chee', lawe' da zaj nézquezne' ba gútebe'.

<sup>54</sup> Nadxa Jesús guqu'é'e na' bi na', na' gunné' zizraj:

—¿Bi nu'ula, bexasa!

<sup>55</sup> Na' bebanbe', ne bexásatebe'. Na' Jesús busebague' le' xulunézruje' da gágube'.

<sup>56</sup> Xra xrnabe' belexebánele'ene'. Jesús busebague' le' quebe nu xelé'e ca da guca.

## 9

*Jesús dxesel-le' benne' chazrinnu ca' xelune' xrchine'*

*(Mt. 10.5-15; Mr. 6.7-13)*

<sup>1</sup> Jesús bhague' benne' chazrinnu ca' dxusédené', na' bnézruje' le' xel-la waca, ne xel-la dxenná bea chee' xelexebéaje' xúgute' cue' be' xriwe' ca' da zaj xu'u bénneache, ne chee' xelexexuné' benne' ca' zaj xu'e xízrawé'.

<sup>2</sup> Na' gusel-le' le' chee' xuluzenne' bénneache ca dxenná bea Dios, ne chee' xelexexuné' benne' zaj xu'e xízrawé' ca'.

<sup>3</sup> Na' guzre' le':

—Quebe bi gúale chee' la neza. Quebe gúale xaga da guchíchele, na' xixruj cheele, ne da gágule, ne dumí. Le gua' tu cue'ze zra lánale.

<sup>4</sup> Gáteteze xu'u naga chú'ule, le xegá'ana na' cadxa zrin zra xeza'ale lu xezre na'.

<sup>5</sup> Naga quebe xelezí'e dizra' guchálajle' le', le xedxúaj xezre na', ne le cuibe bxrte xu da da' ní'ale, da gulé'e na zaj nabague' zria lau Dios.

<sup>6</sup> Nadxa beledxúaje', na' ca naca xézredu ca' xejlechálaje' dizra' chawe' chee' Dios, ne belexexuné' benne' zaj xu'e xízrawé' ca'.

*Ca guca gate gute Juan, benne' bchuē' bénneache nisa*

(Mt. 14.1-12; Mr. 6.14-29)

<sup>7</sup> Herodes, benne' dxenná be'ene' xezr la xu na', benne' ca naca xúgute da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate.

<sup>8</sup> Xebal-le' dxelenné' Elías, bénnea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ní'te.

<sup>9</sup> Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zantē dxenda' dxunē'?

Nadxa Herodes bene' ba xuzre lé'ene' Jesús.

*Jesús dxugawē' chi xun gaxúa benne'*

(Mt. 14.13-21; Mr. 6.30-44; Jn. 6.1-14)

<sup>10</sup> Gate belexezrin benne' gubáz ca' chee Jesús lau Le', na' gulé'e Le' ca da ba beluné'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxē' xezre ca', naga zua lu xezr la xu chee xezre Betsaida.

<sup>11</sup> Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchálajlene' le' ca dxenná bea Dios, ne bexuné' benne' zaj xu'e xízrawe' ca'.

<sup>12</sup> Gate guzú lau zezaj dxezré', na' gulebiga benne' chazrinnu gubáz ca' chee Jesús lau Le', na' gulé'e Le':

—Bze benne' caní dizra' chee chjaque' naga xelasié', ne xelílaje' da xelawē' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawē'.

Nadxa benne' ca' bele'e Jesús:

—Quebe dedxa cheentu' ca gáxzuga xeta xtíladau', ne chúpaga bela, u ¿wacheajxríquezentu' da xelagu catite benne' zan caní'?

<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xē benne' ca' xelebé'e chi xun weaje' tu cue' tu cue'.

<sup>15</sup> Ca'an beluné', na' gulebe'e xúgute'.

<sup>16</sup> Nadxa Jesús guqu'é da gaxxu' xeta xtíla ca', ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre bzúruje' na, na' bnéruje' na benne' ca' dxusédene' chee xelisié' na chee benne' zan ca'.

<sup>17</sup> Xúgute' gulawē', ne belélaje'. Ca gudé na' bulusuzré'e chazrinnu ga' da bízrujdu ca' belexegá'ana na.

*Pedro dxenné' Jesús naque' Cristo*

(Mt. 16.13-19; Mr. 8.27-29)

<sup>18</sup> Tu zra gate zua Jesús dxuchálajlene' Dios naga quebe zaj zra benne' zan ca', na' zrale benne' ca' dxusédene' Le', na' Le' bchebe' benne' ca':

—¿Nuzra dxelenná benne' naca' neda'?

<sup>19</sup> Le' belexechebe':

—Bal-le' dxelenné' nacu' Juan, bénnea' bchuē' bénneache nisa, na' xebal-le' dxelenné' nacu' Elías, bénnea' bchálaje' waláz chee Dios, na' xebal-le' dxelenné' nacu' tu benne' ca' buluchálaje' waláz chee Dios ca ní'te, na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

*Jesús dxuzenne' benne' ca' ca gaca gate gatie'*

*(Mt. 16.20-28; Mr. 8.30—9.1)*

<sup>21</sup> Jesús bsebague' benne' ca' quebe nu xel'é ca'.

<sup>22</sup> Na' guzre' le':

—Neda', Benne' Gulje' Bénneache, dxal-la' téle'a xel-la zi', na' benne' gula sina ca', ne benne' xíchajé ca' chee bxruze, ne benne' ca' dxuluxuzájle'e da nadxixruj bea na xuluzúe' neda' chalá'ala. Xelútié' neda', san gate gaca chunna zra, na' xebana'.

<sup>23</sup> Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute da naca chee', na' guné' neda' tuze xúgute zra, lácala gate benne' na'.

<sup>24</sup> Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da naque' chia', wazrué'enge' na.

<sup>25</sup> ¿Bizra da ba neza gaca na chee' tu benne' che gape' ca naca da de lu xezr la xu nigá, san cuía xi' léqueze'?

<sup>26</sup> Che nu benne' xedué'enge' chia' neda', ne chee' dizra' chia', cá'aqueze neda', Benne' Gulje' Bénneache, wedué'eda' chee' bennea' gate za'a neda' chee' nna be'a nen xel-la szren chee' Xra', ne chee' gubáz lá'azxa chee' xabáa ca'.

<sup>27</sup> Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

*Gate bcha lu'a lesaca Jesús*

*(Mt. 17.1-8; Mr. 9.2-8)*

<sup>28</sup> Ca guzre xi' gudé gunná Jesús da nigá, na' guluéne' tu lu xi'a chee' guchálajlene' Dios, na' xjácale Pedro, ne Jacobo, ne Juan Le'.

<sup>29</sup> Dxácate dxuchálajlene' Dios, na' bcha lu'a lesaca Jesús, na' zra lane' bexaca na da chiche, ne guca tite na.

<sup>30</sup> Nadxa bululé'e lau chupa benne' dxuluchálajlene' Jesús. Zaj naque' Moisés ne Elías.

<sup>31</sup> Naga zele Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén.

<sup>32</sup> Gulácale'e welase Pedro ne benne' ljwezre' ca', san bulusebán lazre', na' belelé'enge' ca naca xel-la szren chee' Jesús, ne chupa benne' ca' zaj zélene' Jesús.

<sup>33</sup> Gate benne' ca' belexesiá'que' naga ze Jesús, na' Pedro gunné':

—Benne' Weseđe, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee' Moisés, ne tu chee' Elías.

Pedro quebe dxéquebe'enge' ca da dxenné'.

<sup>34</sup> Dxácate dxenná Pedro caní, na' bla' tu beuj da gacu na naga zaj zre'e, na' belezrebe Pedro, ne benne' ljwezre' ca' gate gulezré'e lu beuj na'.

<sup>35</sup> Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'ite' lazra'. Le xen da dxuchálajbe'.

<sup>36</sup> Ca gudé belenne' chi'i na', na' belelé'enge' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'enge'.

*Jesús dxexune' tu bi biu xu'ube' be' xriwe'*

*(Mt. 17.14-21; Mr. 9.14-29)*

<sup>37</sup> Gute xu, gate belexexétaje' lu xi'a na', na' benne' zan zjaque' zeajlexrígale' Jesús.

<sup>38</sup> Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te bi chia' naca,

<sup>39</sup> na' tu be' xriwe' dxaze na lebe', ne dxucuezre xa'a na lebe', ne dxudxixre dxutula na lebe', na' dxebía bzrina' dxú'abe'. Dxusaca zi na lebe', ne quebe dxaca lazre' na gúsán na lebe'.

<sup>40</sup> Ba guta' xueda' benne' ca' dxusédenu' chee xelexebéaje' na, san quebe gulezéquene'.

<sup>41</sup> Jesús bechebe':

—Le'e, benne' wen chupa lazre', ne wen da calela. ¿Ájate dxal-la' súalena' le'e? ¿Ájate dxal-la' guchaga lawa' nen le'e? Xeajxri' zri'inu' na' nigá.

<sup>42</sup> Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexuné' bi cuide' na', na' bdeé'-be' lu na' xrabe'.

<sup>43</sup> Xúgute benne' ca' belexebánene' ca naca xel-la szren chee Dios.

*Jesús dxuzenne' benne' ca' xecha lasa ca gaca gate gatie'*  
(Mt. 17.22-23; Mr. 9.30-32)

Dxácate na' xúgute benne' ca' dxelexebánene' ca da dxun Jesús, Le' guzre' benne' ca' dxusédene':

<sup>44</sup> —Le xen xanne' da nigá, ne quebe gal-la lázre na. Neda', Benne' Gulje' Bénneache, wuludé' neda' lu na' bénneache.

<sup>45</sup> Benne' ca' dxusédene' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

*¿Nuzra naca blau?*  
(Mt. 18.1-5; Mr. 9.33-37)

<sup>46</sup> Nadxa benne' ca' dxusede Jesús gulezú lawe' dxuluchebe ljwezre' núzraqueze naca blau ládujla le'.

<sup>47</sup> Jesús gúquebe'ene' ca da dxelenné'. Nadxa guqué'e tu bi biúdau', ne bze'-be' cuité',

<sup>48</sup> na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasele-le' neda'. Cá'anqueze bénnea' nácaxé' benne' dxexruj lazre' ládujla le'e, benne' nigá naque' benne' blau.

*Benne' quebe dxedábage' dxi'u zue' gácalene' dxi'u*  
(Mr. 9.38-40)

<sup>49</sup> Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe guné' ca' lawe' da quebe naque' dxi'u tuze.

<sup>50</sup> Jesús guzre' le':

—Quebe guzágale ca da dxuné' lawe' da benne' quebe dxedábage' dxi'u zue' gácalene' dxi'u.

*Jesús dxedil-le' Jacobo ne Juan*



51 Gate ba za zrin zra dxal-la' xexíaj Jesús xabáa, ben zi' lazre' chéajé' Jerusalén.

52 Na' gusél-le' gubáz chee' ca' xelebía lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús.

53 Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéajé' Jerusalén.

54 Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee' guzría xi na benne' caní, ca ben Elías, bénnea' bchálajé' waláz chee' Dios?

55 Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e.

56 Caní naca lawe' da bla' neda', Benne' Gulje' Bénneache, quegá chee' guzría xi'a xel-la nabán chee' bénneache, san chee' gucache chawa' le' na.

Nadxa xjaque' xetú xézredau'.

*Benne' dxelaca lazre' chjácáene' Jesús  
(Mt. 8.19-22)*

57 Ca zjaque' lu neza na', tu benne' biu guzre' Jesús:

—Xran, dxaca lazra' sále'na' Lue' gáteteze chéajú'.

58 Jesús bechebe':

—Beza ca' zaj zua bluaj cheeba', na' bxínnedu ca' zaj zria xrú'neba', san neda', Benne' Gulje' Bénneache, quebe bi de ga xrua xíchaja'.

59 Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

60 Na' Jesús bechebe':

—Be' lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

61 Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

62 Jesús guzre' benne' na':

—Benne' dxugá'ane' bezre, na' nne'e cúzrule', quebe gaca chee' bénnea' gune' zrin chee' da dxenná bea Dios.

## 10

*Jesús dxesel-le' benne' gaxún chi ca'*

1 Ca gudé na', Xránadxu guqué'e xegaxún chi benne' ca', na' gusél-le' chupa weaje' xelebía lawe' lau Le' xúgute xezre, ne xézredu ca' naga dxal-la' chéajé' Le'.

2 Guzre' benne' ca':

—Da li dxennéa', lina da zren naca na, na' benne' wen zrin bábaze zaj naque'. Chee' le' na' le naba lau Xrane zrin na' sel-le' benne' wen zrin ca' xelexequé'e lina na'.

3 Le chjaca! Le nna'xque, neda' dxesel-la' le'e, gácale ca zrila'du ca' ládujla becu' xi'a ca'.

4 Quebe gúale xixruj, ne dumí, ne zréale, ne quebe gagale la neza nu guchálajlele.

<sup>5</sup> Gate chu'ule tu lu xu'u, na' gugápale diuzre, nnaile: “Xel-la dxebeza zri lazre' gaca chee benne' zaj zre'e lu xu'u nigá.”

<sup>6</sup> Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale.

<sup>7</sup> Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tune'. Quebe cheajsúale tu xu'u xetu xu'u.

<sup>8</sup> Gate zrinle tu xezre naga xezezi' lu ne'e le'e, le gagu ca da xelunne'.

<sup>9</sup> Le xexún benne' zaj xu'e xízrawe' zaj zre'e na', na' le xe'e: “Xel-la dxenná bea chee Dios ba zua nen le'e.”

<sup>10</sup> Che zrinle tu xezre naga quebe xezezi' lu ne'e le'e, le xedxúaj la neza chee xezre na', na' nnaile:

<sup>11</sup> “Ca naca bxrtedu' da' ní'antu' dxexebíentu' na chee gaca tu da gulé'e na le'e nabágale zria lau Dios. Dخال-la' nézele ba bla' ládujla le'e xel-la dxenná bea chee Dios.”

<sup>12</sup> Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácaxda na xel-la zi' ca da xelezaca benne' xezre Sodoma, xezre na' bzria xi' Dios.

*Da gaca chee xezre naga quebe beluné' ca dxenná xrtizra' Dios*

*(Mt. 11.20-24)*

<sup>13</sup> Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'eng' ca naca xel-la waca chee xabáa da ba gulaca ládujla le'e, gate na'te ba belexebí'i lazre', belácué' zra lané' tuzruij, ne buluzríe' de xíchajé'.

<sup>14</sup> Lu zra guchi'a Dios da dxaca, na' sácaxdale le'e xel-la zi' ca da xelezaca benne' Tiro, ne Sidón.

<sup>15</sup> Na' le'e, benne' xezre Capernaum, ¿dxéquele waxásale zrínṭeḷe xabáa? ¡Lataj chúl-lala xétajle!

<sup>16</sup> Nadxa guzre' benne' ca' dxusédene':

—Benne' xenne' cheeḷe le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

*Dxelexezrín benne' gaxún chi ca'*

<sup>17</sup> Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

<sup>18</sup> Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu.

<sup>19</sup> Neda' ba benna' le'e xel-la dxenná bea chee guléajle be snia ca', ne bexrujni, ne chee guchúchujle duté xel-la dxenná bea chee da xriwe', na' quebe bi seque gune na le'e.

<sup>20</sup> Quebe bele lawe' da dxelún be' xriwe' ca dxennale le'e, san le be lawe' da ba naxúaj lale xabáa na'la.

*Jesús dxebeng'*

*(Mt. 11.25-27; 13.16-17)*

<sup>21</sup> Lu zra ná'queze gubelé'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xęzr la xu, lawe' da ba blé'enu' bėnne'du caní da bcácheu' cheę benne' sina ca', ne benne' dxeléajni'ingē'. ¡Ca' naca, Xrae, lawe' da ca'an guca lazru' Lue'!

<sup>22</sup> 'Xra' ba bėnņe' neda' xúgute. Quegá nu neze nu na' naca Zrí'ingē', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ingē' guzėjajni'ingē' le' Nu na' naca Xrę'.

<sup>23</sup> Nadxa guné'ę benne' ca' dxusédenę', na' guzre' benne' cá'anze:

—Ba neza naca na cheę benne' ca' dxelelé'engē' ca da dxelé'ele le'e,

<sup>24</sup> lawe' da dxapa' le'e, zánete benne' ca', benne' buluchálaje' waláz cheę Dios, ne benne' wenná bea ca' gulaca lazre' xelelé'engē' ca da dxelé'ele le'e, san quebe belelé'engē' na. Gulaca lazre' xelenņe' ca da dxenle le'e, san quebe belenņe' na.

*Da dxulé'e na ca bėn benne' Samaria, benne' naque' chawe'*

<sup>25</sup> Nadxa tu benne' dxuxuzájle'ę da nadxixruj bea Dios bdxúaje', ne guxíaje' xeajchálajleņe' Jesús cheę gaca guzúa zrię' Lę', na' bchebę' Lę':

—Benne' Wesęde, ¿bizra dxal-la' guna' cheę gata' chia' xel-la nabán da zeajli canna?

<sup>26</sup> Jesús bechebę':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

<sup>27</sup> Bėnnea' dxuxuzájle'ę da nadxixruj bea Dios bechebę':

—Bzri'i Xranu' Dios dutę lázrda'u, ne nen dutę bėnne'du xu'u, ne nen dutę xel-la dxun zi' lazre' chiu', ne nen dutę xel-la dxulaba lazre' chiu', na' bzri'i le sa' ljwezru' ca nazri'i cuinu'.

<sup>28</sup> Nadxa gunná Jesús, guzre' le':

—Cháwe'le'ę bechebu'. Che dxunu' caní, na' gapu' xel-la nabán na'.

<sup>29</sup> Bėnnea' dxuxuzájle'ę da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

<sup>30</sup> Bechebę Jesús:

—Tu benne' guzé'ę Jerusalén, bétaje' zíaje' Jericó. Lu neza na' xu'e, na' gulela gubán le', ne gulebanę' ca naca da nape', ne zra lanę'. Na' buluzálaje' le', ne besía'que' zaj nucá'anę' le' ca benne' gate.

<sup>31</sup> Nadxa gudę tu bxruze neza na', na' gate blé'engē' le', gudéę' chalá'ala.

<sup>32</sup> Cá'anqueze gudę na' tu benne' xrtia Levi, benne' dxunę' zrin cheę xudau', na' gate blé'engē' bėnnea', gudéę' chalá'ala.

<sup>33</sup> Nadxa tu benne' Samaria gudéę' neza na', na' gate blé'engē' le' bexache lazre' le'.

<sup>34</sup> Gubigę' cuita benne' na', ne btupe' tu da za lu wę' cheę, ne xrise uva wal-la, na' bchele' na ladxe'. Nadxa bcuene' le' cuzru bea cheę, na' beche'ę le' tu lu xu'u naga xegá'anę', ne bxuę' le' na'.

<sup>35</sup> Zra xula, ca bezá' benne' Samaria na', na' guléaje' chupa dumí da bnęzruję' xrane xu'u na', ne guzre' le': "Bxue benne' nigá, na' che ba gucá'adxaxelate' dumí chiu', neda' xexunna' na gate xelá'a."

<sup>36</sup> Nadxa Jesús guzre' benne' dxuxuzájle'ę da nadxixruj bea Dios:

—¿Nula benne' chunna caní guque' le sa' ljwezre bėnnea' gulela gubán ca'?

<sup>37</sup> Na' gunná bėnnea' dxuxuzájle'ę da nadxixruj bea Dios:

—Bėnnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

*Jesús dxezrine' lizre Marta ne María*

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'.

<sup>39</sup> Marta na', zua tu bi bile' le' María, na' María na' gudx'é zran ni'a Jesús chee xenne' da dxuchálaje'.

<sup>40</sup> Marta déle'e da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxezéle'enu' gunne xue, ne zu' stēbe ca naca chee da ca dxunu',

<sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

**11***Ca dxal-la' gundxu guchálajle dxu Dios*

(Mt. 6.9-15; 7.7-11)

<sup>1</sup> Tu zra Jesús bchálajlene' Dios tu lataj, na' gate bexuzre bchálajlene' Dios, na' tu benne' ca' dxusédenē' guzre' Le':

—Xran, bsēde netu' guchálajlentu' Dios, ca ben Juan, bsédenē' benne' ca' zaj de'e le'.

<sup>2</sup> Jesús gunné':

—Gate guchálajlele Dios, na' nnale:

Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xezr la xu, ca da dxaca xabáa.

<sup>3</sup> Benna cheentu' da gáguntu' na'a zra.

<sup>4</sup> Bnite lau dul-la cheentu' ca dxunite launtu' chee benne' ca' dxelune' cheentu' da calela.

Quebe gu'u lataj da xriwe' cu'u na netu' neza chee na, na' bselá netu' lu na' da calela.

<sup>5</sup> Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xe'e le': “Bi ljwezra', guleaj neda' chunna xeta xtila

<sup>6</sup> lawe' da zua tu bi ljwezra' za belá'tēbe' lizra', na' quebe bi de' chia' gugawa'-be'.”

<sup>7</sup> ¿Wechebe benne' ljwezre' na', benne' xu'u lu xu'u: “Quebe gunu' neda' zede. Naxe xuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?”

<sup>8</sup> Neda' dxapa' le'e, lácala quebe chase' bi gunézruje' le' lawe' da naque' ljwezre', san chase' chee québedxa gune' le' zede, na' gunézruje' le' ca naca da nachinnene'.

<sup>9</sup> Caní dxapa' le'e:

Le naba, na' Dios gunne' cheele.

Le xexilaj, na' xezrélele.

Le nne dxu'a dxa xu'u, na' xalaj cheele.

<sup>10</sup> Ca' naca na, lawe' da benne' dxenabe', na' si'e, ne benne' dxexilaje', na' xezrélene', ne benne' dxenné' dxu'a dxa xu'u, na' xalaj chee'.

11 'Che tu benne' ládujla le'e naque' xra xrna', ¿waca gunézruje' zrí'ing' tu xiaj che nábabe' tu xeta xtila? ¿Waca gunézruje'-be' tu bela' che nábabe' tu bela?

12 ¿Waca gunézruje'-be' tu bécxrujni che nábabe' tu zrita?

13 Che le'e nácale benne' wen da calela, na' nézele gunézruje da chawe' chee zrí'inele, ¿quebe nácadxa Xrale zua xabáa li lazre' chee gunne' chee nu benne' nabe' Be' Lá'azxa?

*Dxelenné' napa Jesús xel-la dxenná bea chee da xriwe'*

*(Mt. 12.22-30; Mr. 3.19-27)*

14 Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bénnea'. Na' benne' ca' belexebánenē' chee da nigá.

15 Na' bal-le' gulenné':

—Benne' nigá dxebéaje' be' xriwe' ca', dxuchínenē' xel-la dxenná bea chee Beelzebú, xrane be' xriwe' ca'.

16 Xebal-la benne' gulaca lazre' gulé'e Jesús xel-la waca chee', na' gulenabe' Le' gunē' tu xel-la waca da za xabáa.

17 Le' nézenē' ca da dxelaca lazre', na' guzre' benne' ca':

—Che benne' zaj zré'ē tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'anqueze welebía xi' benne' ca'.

18 Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'.

19 Che caní naca na, ¿nuzra dxunezruj xel-la dxenná bea benne' ca' dxusédele le'e chee xelexebéaje' be' xriwe' ca'? Chee le' na', benne' caníqueze dxululé'ene' dxeque zréajele.

20 Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

21 'Che tu benne' wal-la nape' da guchínenē' lu wedil-la, ne dxuxúequeze' lizre', na' da zra lizre' napa chí'ē na.

22 Che za' xetú benne' nácadxe' wal-la ca le', ne dxucul-le' le', nadxa que'ē ca naca da dxuchínenē' lu wedil-la, da na' dxuxrén lazre', na' quisie' da gudapa bénnea'.

23 'Benne' quebe zuē' gácalenē' neda', dxedábage' neda', na' benne' quebe dxexeque'ē nen neda' dxúsela bénnea'.

*Be' xriwe' da dxexezrín na lizre na*

*(Mt. 12.43-45)*

24 Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.”

25 Gate xezrín na, na' le'e na bénnea' naque' ca tu xu'u da nalúa lu'ule na, ne nabá'atē na.

26 Nadxa xezíaj na, zeajxezrín na xegazre be' xriwe' da zaj nácadxa na xriwe' ca le' na, na' ca naca da ca' xelú'u na xelezúa na lu xichaj lázrdau bénnea', na' naga cheajsetē chee benne' na' nácadxa da calela chee' ca da guca chee' nédxula.

*Da ba neza chee bénneache da naca na li lazre'*

27 Dxácate Jesús dxenné' da caní, tu nu'ula ládujla benne' ca' gunné' zizraj:

—Ba neza zrentę naca na cheę nu'ula na' guzane' Lue', ne bsegule' Lue'.

<sup>28</sup> Na' gunná Jesús:

—Ba neza zrendxa naca na cheę benne' ca' dxelenne' ca da dxenná Dios, ne dxunę' ca dxenná dizra' na'.

*Dxelenabe' Jesús gunę' tu xel-la waca da za xabáa*

*(Mt. 12.38-42; Mr. 8.12)*

<sup>29</sup> Benne' ca' ne zaj zřeę cuita Jesús, na' Le' guzú lawe' dxuchálajlene' le', gunné':

—Benne' zaj zřeę lu zra caní zaj naque' benne' wen da caleła, na' dxelenabe' neda' guna' tu xel-la waca da za xabáa, na' québedxa bi xeledé'eng' ca da ble'e Jonás, bēneea' bchálaję' waláz cheę Dios.

<sup>30</sup> Ca guca cheę Jonás, guque' tu da ble'e na benne' gulezřeę lu xezre Nínive, cá'anqueze neda', Benne' Gulje' Bēneache, gaca' tu da gulé'e na benne' zaj zřeę lu zra na'a zra.

<sup>31</sup> Lu zra guchi'a Dios, gate Dios guchi'e cheę benne' zaj zřeę lu zra na'a zra, na' chasa nu'ula na' gunná bé'eng' xezr la xu da zua chalá'a naga dxedé gubizra beu' zaga ca', na' gulé'eng' zaj nabaga zria benne' caní, lawe' da nu'ula na' guzé'e zítu'tę cheę xenne' ca naca xel-la sina cheę Salomón, na' nigá zua tu Benne' nácaxę' blau ca Salomón na'.

<sup>32</sup> Lu zra guchi'a Dios, gate Dios guchi'e cheę benne' zaj zřeę lu zra na'a zra, na' xelase' benne' ca' gulezřeę xezre Nínive, na' xululé'eng' zaj nabaga zria benne' caní, lawe' da benne' ca' gulezřeę xezre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácaxę' blau ca Jonás na'.

*Da dxusení lu xichaj lázrdaudxu*

*(Mt. 5.15; 6.22-23)*

<sup>33</sup> Gunná Jesús:

—Netú benne' che dxugale' xi' cheę, quebe guzúę' na tu naga nagache, ne quebe gudusię' na tu xi'ina, san guzúę' na sibe cheę xeledé'e benne' ca' xelu'e lu xu'u na'.

<sup>34</sup> Xiaj laudxu zaj naca na ca tu xi' da dxusení na lu xichaj lázrdaudxu. Che xiaj lau' zaj naca na chawe', ca naca xichaj lázrda'u xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrda'u.

<sup>35</sup> Bxue xanne' ca naca xi' da napu' cheę quebe xexaca na da chul-la.

<sup>36</sup> Che ca naca xichaj lázrda'u xu'u na lení', na' quebe bi xu'u da chul-la, na' le'enu' chawe' xúgute da dxaca gate tu xi' dxusení na lizru'.

*Jesús dxedil-le' benne' xudau' ca'*

*(Mt. 23.1-36; Mr. 12.38-40; Lc. 20.45-47)*

<sup>37</sup> Gate beuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'e dxawe'.

<sup>38</sup> Na' benne' fariseo na' bebánene' gate blé'eng' Jesús quebe gudibe ne'e ca da zjácale benne' judío gate dxelawe' xeta.

<sup>39</sup> Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátęle ca naca da ba gulanle, ne da caleła da dxunle.

<sup>40</sup> Le'e, benne' lázrdau zide', ¿quebe nézele Bēneea' beņę' da zua cúzrela bēnqueze' da zua lu'ula?

<sup>41</sup> Le gunezruj benne' xache' ca' cheę da nápaie, na' ca nácale xegá'anale chawe'.

<sup>42</sup> 'iEdxugúa le'e, benne' fariseo ca! Le'e dxunézrujle Dios tu cue' chee da chi cue' chee xixru weaj, ne chee binne chee ruda, ne chee xúgute xixre' cuan, san dxuzúale chala'ala ca naca xel-la wen xrlátaje, ne xel-la zri'i lazre' chee Dios. Da caní dخال-la' gunle, ne quebe gusanle ca da ba dxunle.

<sup>43</sup> 'iEdxugúa le'e, benne' fariseo ca! Dxaca lázrele gápale lataj blau naga cue'le lu xu'u naga dxezragale, ne dxaca lázrele xelapa benne' le'e ba lá'ana lawe' xi'a ca'.

<sup>44</sup> 'iEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj nalá', na' benne' ca' dxeledé' lálwela na, ne quebe zaj nézene' da dxululéaje'.

<sup>45</sup> Nadxa gunná tu benne' dxuxuzájle'e da nadxixruj bea na, guzre' Jesús: —Benne' Wesede, gate dxennáu' da nigá, dxennéteu' ca' cheentu'.

<sup>46</sup> Na' Jesús gunné':

—iEdxugúa le'e, benne' dxuluxuzájle'e da nadxixruj bea na! Dxugúale bénneache xua da quebe xezezuéne', na' le'e netú zrube názele quebe dxaca lázrele gutale na.

<sup>47</sup> 'iEdxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule.

<sup>48</sup> Ca da dxunle dxulé'e na nácale tuze nen da belún xra xrtáule ca'. Benne' ca' belutié' le', na' le'e dxunle lu'a chee ba chee' ca'.

<sup>49</sup> 'Chee le' na' gunná Dios lu xel-la sina chee', gunné': “Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútié', na' xebal-le' xeláu zi' xúzrequeze' le'.”

<sup>50</sup> Dios gusebague' benne' zaj zre'e lu zra na'a zra ca naca xel-la gute chee xúgute benne' ca' gulenné' waláz chee', benne' gulatie' lu na' benne' ca' zaj zre'e gate bente' xezr la xu,

<sup>51</sup> gate na' tu benne' betie' Abel, zri'ine Adán, ca bzrinte zra belutié' Zacarías gachaj lálwela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'e lu zra na'a zra xel-la gute chee benne' ca'.

<sup>52</sup> 'iEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

<sup>53</sup> Gate Jesús guzre' benne' ca' da caní, na' benne' ca' dxuluxuzájle'e da nadxixruj bea na, ne benne' fariseo ca' belezra'ale'e Le', na' gulezú lawe' dxelune' Le' zeđe, na' da zante da buluchebe' Le',

<sup>54</sup> na' buluzuzre' che bi nna Jesús chee xezezéquene' xelagu zrie' Le'.

## 12

### *Jesús dxenné' ca naca chee da naca xrlátaje láweze*

<sup>1</sup> Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxé'e benne' ca' dxusédene':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'.

<sup>2</sup> Quebe bi de da dxundxu bagácheze da quebe gulé'e lawe', ne quebe bi de da nagache da quebe nu zeze.

<sup>3</sup> Chee le' na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúgute bénneache.

*Nu dxal-la' zrêbedxu**(Mt. 10.28-31)*<sup>4</sup>Na' gunná Jesús:

—Dxapa' le'e, bi ljwézra'du ca', quebe dxal-la' zrêbele benne' dxelute bêla' dxen cheë bénneache, san gate te na', québedxa xezezéqueñe' bi xelune'.

<sup>5</sup>Na'a dxapa' le'e nu dxal-la' zrêbele. Le zrebe Bénnea' gate te xeque'ê xel-la nabán cheë bénneache, nape' xel-la dxenná bea gudé'ê bénneache ca' lataj ba xa'. Awe', Lê' le zrebe.

<sup>6</sup>¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'.

<sup>7</sup>Cá'anqueze xícha xíchajle le'e xúgute na zaj nababa na lau Dios. Cheë lē na' quebe zrêbele. Zácadxale le'e ca beḡ zantē bxínnedu ca'.

*Benne' dxelexechebe' zaj naque' cheë Jesús**(Mt. 10.32-33; 12.32; 10.19-20)*<sup>8</sup>Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bénneache, cá'anqueze neda', Benne' Guljē' Bénneache, xechébequeza' cheë benne' ca' lau gubáz cheë xabáa ca' cheë Dios,

<sup>9</sup>san benne' ca' quebe xelexechebe' chia' lau bénneache, néda'queza' quebe xechéba' cheë' lau gubáz cheë xabáa ca' cheë Dios.

<sup>10</sup>'Che nu benne' bi nniē' chia' neda', Benne' Guljē' Bénneache, gunite lau Dios cheë', na' benne' nniē' cheë Be' Lá'azxa, quebe gunite lau Dios cheë bénnea'.

<sup>11</sup>'Gate xelechē'ê le'e lau benne' xíchaje cheë xudau', u lau benne' dxuchi'ê da dxaca, u lau benne' xu'u lawe', quebe cue'le gunne xue bi xechébele u bi nnale,

<sup>12</sup>lawe' da gate zrin zra dxal-la' nnele, Be' Lá'azxa gul'é'ene' le'e da dxal-la' nnele.

*Da stēbe cheë xel-la gunní'a*<sup>13</sup>Tu benne' ládujla benne' ca' guzre' Jesús:

—Benne' Wesēde, guzre bi bicha' gúnnabe' chia' da xexal-la' cheë da guca cheë xrantu'.

<sup>14</sup>Jesús guzre'-be':

—Benne', ¿zua nu bzua neda' ca benne' dxuchi'ê da dxaca u ca benne' le'ê xezr la xu?

<sup>15</sup>Nadxa guzre' benne' ca':

—¡Le na' xque! ¡Le guxúe xanne' cuínale cheë quebe gucúdele! Xel-la nabán cheë nu benne' quebe zua na lu da nápalē'e.

<sup>16</sup>Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu cheë' bnézrujlē'ê na.

<sup>17</sup>Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá.

<sup>18</sup>Nadxa dxenné': “¡Ba nezda' ca da guna! Guchínnaja' naga dxezrá' lina chia', cheë guna' da zrí'adxa, na' guzrá'a na' ca naca lina chia' nigá, ne ca naca da ba napa'.

<sup>19</sup>Nadxa nníqueza' néda'queza': Ba délé'ê chiu' da zantē cheë zane' iza. Bezí' lazre'. Güe'e gudagu, ne gubé'.”

<sup>20</sup>Na' Dios guzre' bénnea': “Lue', benne' zide', lu zre' na'a zre' gatiu', na' da nuzrá' chawu', quebe nézenu' nu cheë gaca na'.”



21 Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

*Dios dxuxúe' bi chee' ca'*  
(Mt. 6.25-34)

22 Ca gude' na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gágule.

23 Xel-la nabán chee zácadxa na ca da gágule, na' beł-la' dxen chee zácadxa na ca zra lánale.

24 Le nna'xque ca dxaca chee bxínne' ca'. Quebe dxelázaba', ne quebe dxelélápaba', ne quebe zaj zua naga dxuluxuzraba', na' Díosqueze' dxuxi'aj dxugawe'-ba'. Zácadxale le'e ca bxínne' ca'.

25 ¿Núla' le'e séquele gusetunna cuínale xetú ben lawe' da dxebé'le'ele gunne xue?

26 Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

27 'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucue' da xrtandxa ca tu xiajdu caní.

28 Che Dios dxugacue' caní xixre'du ca', da zaj zua na'a le'e xixre', na' wxre xelexe na, ¿quegá gundxe' chee le'e, benne' dxeléajle'le láteze chia'?

29 Chee le' na', quebe cue'le gunne xue ca naca da gágule, u ca naca da xí'ajle, ne quebe súale stebe.

30 Ca' naca na, lawe' da ca naca benne' ca' zaj zre'e xezr la xu dxelaxíajle' ca naca da caní, san le'e, zua Xrale xabáa ba nézene' nachinnele ca naca da caní.

31 Le cue' gunne xue nna bea Dios lu xichaj lárdaule, na' sile ca naca da caní.

*Da gunní'a da dxegú'u cháwedxu xabáa*  
(Mt. 6.19-21)

32 Na' gunná Jesús:

—Quebe zrébele, zríla'du chia', bábaze nácale le'e. Xrale Dios dxezaca ba lazre' gunne' chee lataj naga dxenná be'e.

33 Le gute da nápa'le, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na.

34 Naga nuzúale xel-la gunní'a chee, na' súaqueze lárdaule.

*Dxal-la' gupá'a cuínadxu*

35 Na' gunná Jesús:

—Le gupá'a cuínale, ne le gugala xi' chee.

36 Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'.

37 Ba neza zrente naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'.

38 Lácala xezrine' dxela u dxaní'sise', che xedajxraque' le' dxelennaze', ba neza naca na chee benne' wen zrin ca'.

39 Dxal-la' nézele da nigá, che xrane xu'u gunézene' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'.

<sup>40</sup> Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

*Benne' wən zrin li lazre', ne benne' wən zrin quebe naque' li lazre'*  
(Mt. 24.45-51)

<sup>41</sup> Nadxa Pedro bchebe' Jesús:

—Xran, ¿bchálaju' da dxulé'e nigá chee' nétu'ze, che chee' xúgute' benne'?

<sup>42</sup> Xránadxu gunné':

—¿Nuzra naca wən zrin li lazre', bénnea' dxucá'ana xranē' lu ne'e benne' zaj zra' lizre' chee' gunézruje' da xelagu benne' ca' gate zrin zra chee' na?

<sup>43</sup> Ba neza naca na chee' benne' wən zrin na', gate xezrín xranē', xeda-jxraque' le' dxunē' ca da nabague'.

<sup>44</sup> Da li dxapa' le'e, xranē' gucá'ane' lu ne'e xúgute' da nape'.

<sup>45</sup> Che benne' wən zrin na' dxéquene' wazré' xranē' xelé'e, ne su lawe' gusaca zi'e benne' wən zrin xezica ca', ne nu'ula wən zrin ca', ne su lawe' xi'aj gawe', ne súzrene',

<sup>46</sup> nadxa xranē' xelé'e lu zra quebe dxebeze' le', ne lu zra quebe nézene', na' gusaca zí'le'e le', ne chugue' chee' saque' ca xelezaca benne' ca' quebe zaj naque' chee' Dios.

<sup>47</sup> 'Benne' wən zrin na' nézene' ca da dxaca lazre' xranē' san quebe nucueze', ne quebe dxuzúe' dizra', benne' nigá gudé'e le' ba xa'.

<sup>48</sup> Benne' wən zrin na' quebe nézene' da na', ne dxunē' da dxusebaga na le' zria, benne' nigá té'e láteze xel-la zi'. Che tu benne' dxezi'le'e da dxunezruj Dios le', Dios wanábale'e le', na' bénnea' Dios nuxrén lazre' le' da zrente, Dios wanné xúle'e'ne' le'.

*Dxelaca benne' chupa la'a ne chee' Jesús*  
(Mt. 10.34-36)

<sup>49</sup> Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'.

<sup>50</sup> Dخال-la' chu'a lu xel-la gute ca dxu'u tu benne' lu nisa gate dxedxúe' nisa, na' téle'a xel-la zi' cadxa gácatequeze na.

<sup>51</sup> ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee' guna' benne' chupa la'a.

<sup>52</sup> Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábague' chupe', na' chupe' xeledábague' chunne'.

<sup>53</sup> Xra tu bi biu tábague' bi biu chee', na' bi biu na' tábagabe' xrabe'. Xrna tu bi nu'ula tábague' bi nu'ula chee', na' bi nu'ula na' tábagabe' xrnabe'. Tau zri'ine tu nu'ula tábague' zru'a lizre', na' zru'a lizre' na' tábague' tau zri'ing'.

*Da dxululé'e na ca da gaca lu zra na'a zra*  
(Mt. 16.1-4; Mr. 8.11-13)

<sup>54</sup> Na' Jesús guzre' benne' ca':

—Gate le'e dxelé'ele da' beuj naga dxebí'a gubizra, na' dxennale, waca xiuj, ne ca' dxaca.

<sup>55</sup> Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'.

<sup>56</sup> Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xezr la xu nigá, san quebe dxezéquele xuzájla'ale da dxululé'e na ca gaca cheele lu zra na'a zra.

*Dخال-la' xezúadxu lu xel-la dxebeza zri lazre' nen benne' dxedábague' dxi'u*  
(Mt. 5.25-26)

57 Na' gunná Jesús:

—¿Bizr chee na' quebe dxeque be'ele da naca xrlátaje?

58 Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee zrinle lau bénnea', ben ba xen xezú' lu xel-la dxebeza zri lazre' nen bénnea' dxácate xu'ule neza, chee quebe che'e lue' lau bénnea', na' bénnea' gudée' lue' lu na' benne' guséxuje' lue' lizre xia.

59 Dxapa' lue' quebe xedxúaju' na' cadxa quízruju' ca da dxebagu'.

## 13

### *Dxal-la' xelexebí'i lazre' bénneache*

1 Ca lu zra na' belezrín bal-la benne' lau Jesús, na' buluzenne' Le' ca ben Pilato, betie' bal-la benne' Galilea, na' bchague' dxen chee benne' ca' nen dxen chee be xixre', bea ca' ba belutie' chee xuluzrie' dxen chee na lau Dios.

2 Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca benne' ca' xezícala zaj zre'e xezre ca' zaj nababa Galilea?

3 Dxapa' le'e: Cabí, na' che quebe xebí'i lázrele le'e, xúgutele le'e cuía xile.

4 ¿Dxéquele le'e benne' chinu chunna ca' gultatie' gate guzría cha xu'u sibe le' da nazí le na Siloé zaj nabágadxe' dul-la ca xezícala benne' ca' zaj zre'e xezre Jerusalén?

5 Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

### *Xaga higo da quebe dxebía na da zixre*

6 Nadxa Jesús bchájlene' benne' ca' da dxulé'e nigá, dxenné':

—Tu benne' zua tu xaga higo chee' zua na lu xezr la xu chee', na' xeajné'e na che zría na, na' quebe bi bezrélene'.

7 Nadxa guzre' benne' dxun zrin lu xezr la xu chee': "Gunná'xque, chun ízate ba bida' dxenná'a che zria xaga nigá, ne quebe bi bezréleda'. ¿Guchugu na! ¿Bizr chee na' nulán na xezr la xu nigá?"

8 Bénnea' dxun zrin chee xezr la xu na' bechebe': "Xran, bca'ana na xetú iza na'a. Guzúlujdxa' zran na, ne cua'a na bebe.

9 Nen da na', gúnnalja na, san che cabí, na' chugu' na."

### *Jesús dxexune' tu nu'ula nalegu cuzre'*

10 Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédene' benne' ca',

11 na' zua na' tu nu'ula xu'e we' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelíe'.

12 Gate ble'e Jesús le', na' gunné' le', ne guzre' le':

—Nu'ula, ba bexacu' chee xízrawe' chiu'.

13 Nadxa guxrúa ne'e nu'ula na', na' la ná'queze nu'ula na' belite', na' guzú lawe' dxue lá'ane' Dios.

14 Na' benne' xíchaje chee xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

15 Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre cheele u burro cheele lu zra dxupá'anadxu chjua'le-ba' xelé'ajba' nisa?

16 Nú'ula nigá naque' xrtia Abraham, na' da xriwe' nuchéaj na le' lu xízrawe' nigá ba zeaj chinu chunna iza, na' ¿quebe dxal-la' xebéaja' xízrawe' da nuchéaj na le' lu zra dxupá'anadxu?

17 Gate gunná Jesús da nigá, xúgute' benne' dxeledábage' Le' belexe-dué'ene', na' xúgute' benne' xezícadxa gulebene' gate belelé'ene' ca naca da zrente da dxun Jesús.

*Da dxulé'e na ca naca chee binnedau' chee mostaza*  
(Mt. 13.31-32; Mr. 4.30-32)

18 Nadxa gunná Jesús:

—¿Aja naca xel-la dxenná bea chee Dios, ne bi gutil-le lébeda' na?

19 Naca na ca tu binnedau' chee mostaza, tu benne' dxaze' na lu xezr la xu chee', na' dxegula na, ne dxácaté na ca tu xaga zren, na' bxínnedu ca' dxuluzríaba' xrú'uneba' lu zruze na ca'.

*Da dxulé'e na ca naca chee cua zichaj chee xeta xtila*  
(Mt. 13.33)

20 Cá'anqueze gunná Jesús:

—¿Bizra gutil-le lébeda' xel-la dxenná bea chee Dios?

21 Naca na ca cua zichaj chee xeta xtila tu nu'ula dxuchague' na chunna xaga de xezaj, na' dxuchazra na ca naca cua na'.

*Dxa xu'u lechide'*  
(Mt. 7.13-14, 21-23)

22 Dxácaté xu'u Jesús neza zexíajé' xezre Jerusalén, dxusédene' bénneache lu xezre ca', ne xézredu ca' naga dxedé'.

23 Na' bchebe tu benne' Le':

—Xran, ¿bábaze benne' xeledá?

Bechebe Jesús:

24 —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezéque'.

25 Ca te na' chasa xrane xu'u, ne guséxuje' dxa xu'u, na' le'e zrale chulé'ajla nnele dxu'a dxa xu'u na', nnaile: “Xran, gusalaj chú'untu'.” Na' le' xechébe': “Quebe nezda' ga benne' le'e.”

26 Nadxa su láuquezle le'e nnaile: “Güe'e gudágulentu' lue', na' lue' bsédenu' lu neza cheentu' ca'.”

27 Le' xechébe': “Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da caléla.”

28 Na' cuézrele, ne xagu xá'até láxzale gate lé'ele Abraham, ne Isaac, ne Jacob, ne xúgute' benne' ca' gulenné' waláz chee Dios, zaj zué' naga dxenná bea Dios, na' le'e zrale chulé'ajla.

29 Welelá' benne' zaj zre'e dapa saca chee xezr la xu nigá, na' xelebé'e xelawe' naga dxenná bea Dios.

30 Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

*Dxebezre Jesús chee xezre Jerusalén*  
(Mt. 23.37-39)

31 Lu zra ná'queze, belezrín lau Jesús bal-la benne' fariseo ca', na' gulé'e Le': —Bezá' nigá, lawe' da dxaca lazre' Herodes gutie' Lue'.

32 Jesús bechebe':

—Le chjaca cheajguézrele benne' wilaj lazre' caleļa na': “Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'.”

<sup>33</sup> Dxun na ba xen chéajļena' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén le'.

<sup>34</sup> “Jerusalén, Jerusalén, le'e na' dxútele benne' dxelenné' waláz chee Dios, ne dxuzriále xiaj benne' gubáz ca' dxesel-la Dios. Zane' lasa guca lazra' gutupa' bi cheeļe ca' ca dxun bedxuj, dxutúpaba' bédxujdu ca' zran xrilaba', san quebe guca lázrele.

<sup>35</sup> ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bénnea' ze'e lu La Xránadxu!”

## 14

### *Jesús dxexune' tu benne' de xi' ca naca beļ-la' dxen chee'*

<sup>1</sup> Tu zra dxulupá'ana benne' judío ca' guxíaj Jesús zeajtawe' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi guné'.

<sup>2</sup> Zúaqueze lau Jesús tu benne' de xi' ca naca beļ-la' dxen chee'.

<sup>3</sup> Nadxa Jesús bchebe' benne' ca' dxuluxuzájle'e da nadxixruj bea na, ne benne' fariseo ca', gunné':

—¿Waca nu benne' xexune' benne' we' lu zra dxupá'anadxu, che cabí?

<sup>4</sup> Benne' ca' gulezúe' zrize. Nadxa Jesús guqu'é' benne' we' na', ne bexune' le', na' guzre' le' xexíaje'.

<sup>5</sup> Nadxa guzre' benne' fariseo ca':

—¿Núlale le'e, che bezre cheeļe u bia cheeļe bíxreba' tu lu xedxu, quebe xebéajle-ba' zra ná'queze lácala naca zra dxupá'anadxu?

<sup>6</sup> Quebe bi guca xelexechebe'.

### *Benne' zaj zre'e laní chee wechaga na'*

<sup>7</sup> Gate ble'e Jesús ca dxelún benne' ca', dxeleb'é' lataj blaudxa ga dxelawe', na' bchálaje' da dxulé'e na, dxenné':

<sup>8</sup> —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxe' blau ca lue',

<sup>9</sup> na' bénnea' gunné' dxúpatele xide' xe'e lue': “Bnezruj lataj nigá benne' nigá.” Nadxa gun na ba xen xexíaju' lataj bzébedxa lu xel-la stu'.

<sup>10</sup> Na'a, gate nu benne' nne' lue', gudxé'e lataj bzébedxa, chee gate za bénnea' gunné' lue', wanné': “Bi ljwezra', gudé nigala naga nácadxa blau.” Ca'an gaca, xegá'anu' szren lau benne' ca' zaj zre'e dxelágule' lue'.

<sup>11</sup> Benne' dxucá'ana szren cuine', wexéxrujla bénnea', na' benne' dxucá'ana bachache' cuine' wegá'ana szrénqueze'.

<sup>12</sup> Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walíZR chiu' ca' zaj nape' da gunní'a, lawe' da benne' caní welenné'queze' lue', na' zrué'equenzu' da xelexexunne' chiu'.

<sup>13</sup> Gate dxunu' tu laní, gunné' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'.

<sup>14</sup> Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazrju' gate xelexebán benne' xrlátaje ca'.

*Da dxulé'e na ca naca chee tu xrche' zren*

15 Gate ben tu benne' dxágule Lē' da na', na' guzre' Jesús:

—Ba neza zrente naca na chee benne' gawe' xeta naga dxenná bea Dios.

16 Jesús guzre' le':

—Tu benne' gulu'e tu xrche' zren, na' gunné' benne' zan.

17 Ca bzrin zra xelawe' xrche' na', gusél-le' wēn zrin chee' chee' cheajezre' benne' ca' gunné': "Le da, lawe' da ba nusení'a da gágudxu."

18 Xúgute' gulezú lawe' dxelenabe' gu'e le' lataj quebe xelidē'. Benne' nedxu gunné': "Za bezíte'a tu cue' xēzr la xu chia', na' dxal-la' cheajnná'a na. Dxata' xueda' lue' si zrenu' chia'."

19 Xetúe' gunné': "Za bezíte'a' gazxu' cue' bežr chia', na' guxúa' aja xelunba'. Dxata' xueda' lue' si zrenu' chia'."

20 Na' xetúe' gunné': "Za bchágate' na'a, na' quebe gaca xida'."

21 Gate bezrin benne' wēn zrin na', guzre' xranē' ca naca da nigá. Nadxa bzra'a xranē' na', na' guzre' wēn zrin na': "Guxíaj na'a la neza ca', ne neza chee' xēzre nigá, na' xeajxrí' xúgute' benne' xache' ca', ne benne' zaj nadxugu ní'a ne'e, ne benne' zrinnaj ca', ne benne' la chul-la ca'."

22 Ca gudé na' gunná benne' wēn zrin na': "Xran, ba beña' ca' gunnáu', na' ne dedxa lataj."

23 Nadxa gunná xranē' na': "Guxíaj na'a la neza ca', ne neza lásedu ca', na' xeajén ba xen xeledé'e, chee' cha' lizra' nigá."

24 Dxapa' le'e, netú benne' ca' gunné'a' nédxula quebe xelawe' xrche' chia'."

*Xel-la zi' da te benne' chéajlēne' Jesús*

25 Benne' zan zjácálene' Jesús, na' Lē' bexéchaje', na' guzre' benne' ca':

26 —Che nu benne' zē'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zane' ca', ne xel-la nabán chee', quebe gaca gaque' neda' tuze.

27 Benne' quebe sá'lene' neda' lácala dxal-la' te'e xaga béguaj, quebe gaca gaque' neda' tuze.

28 Che tu benne' ládujla le'e dxaca lazre' gune' tu xu'u sibe, ¿quebe cue'e nedxu gune' xrbaba chee' che wazúene' xuzrte' na?

29 Che quebe gune' caní, ne che cueche' lane na, na' ca te na' quebe suene' xuzre' na, na' xúgute' benne' xeledé'ene' na xelezú lawe' xelún le' chee' bēnea',

30 na' xelenné': "Benne' nigá guzú lawe' dxune' tu xu'u. Quebe guque' gune' ca naca."

31 Che tu benne' wenná bea dxal-la' cheajtíl-lalēne' xetú benne' wenná bea, ¿quebe cue'e gune' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalēne' bēnea' za' nen chupa gaxúa gaxúa benne' dxjaque' wedil-la?

32 Che quebe séquene', gate benne' wenná bea na' xetú ne zē'e zitu', na' sel-le' gubáz chee' ca' xelenabe' gata' xel-la dxebeza zri lazre'.

33 Ca' naca na, núteteze benne' ládujla le'e, che quebe gusanē' ca naca da nape', quebe gaca gaque' neda' tuze.

*Zede' da québedxa naca na sna'a*

(Mt. 5.13; Mr. 9.50)

34 Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na?

<sup>35</sup> Quebe gaca guchínedxu na, quegá chee gucá'ana cháwedxu xezr la xu, ne quegá chee guchíredxu bebe, san dxal-la' chú'unadxu na. Benne' ca' zaj zua nagu'e, dxal-la' xelenne'.

## 15

### *Ca guca chee tu zrila' guniteba'* (Mt. 18.10-14)

<sup>1</sup> Benne' zante benne' wechizruj waláz chee Roma, ne benne' dul-la ca' gulebigue' naga zua Jesús chee xelenne' da dxuchálaje'.

<sup>2</sup> Chee le na' benne' fariseo ca', ne benne' dxuluxuzájle'e da nadxixruj bea na gulezi tizre' Jesús, gulenné':

—Benne' nigá dxune' tu zren benne' dul-la ca', ne dxáguleñe' le'.

<sup>3</sup> Nadxa bchalaj Jesús da dxulé'e na, gunné':

<sup>4</sup> —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zra'ba' le'e xixre', na' se'e cheajdílaje' bea na' guniteba' cadxa xezrelne'-ba'?

<sup>5</sup> Na' gate xezrelne'-ba', bene', na' xequé'e-ba' xexrúe'-ba' xe'a xene'.

<sup>6</sup> Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e le': "Le be nen neda', lawe' da bezrelda' zrila' chia' guniteba'."

<sup>7</sup> Na' gunná Jesús, dxé'e benne' ca':

—Cá'aqueze zúale'edxa xel-la dxebe' xabáa gate tu benne' dul-la dxexebí'i lazre', quézcala chee tápalalaj chennu benne' xrlátaje ca' dxeléquene' quebe dxun na ba xen xelexebí'i lazre'.

### *Ca guca chee tu dumí da gunite*

<sup>8</sup> Nadxa Jesús bchálaje' xetú da dxulé'e na, dxé'e benne' ca':

—Tu nu'ula nape' chí dumí zaca, na' che nite tu na, nadxa guzúe' xi' chee' chee gusaní na lu xu'u chee'. Nadxa su lawe' gulu'e lu xu'u chee', xexílaje' bínnalu ca xezrelne' dumí chee' da gunite na.

<sup>9</sup> Na' ca xezrelne' dumí na', gutupe' nu'ula ljwezre' ca', ne nu'ula walízr chee' ca', na' xe'e le': "Le be nen neda', lawe' da bache bezrelda' dumí chia' da gunite na."

<sup>10</sup> Na' gunná Jesús, dxé'e benne' ca':

—Cá'aqueze dxelebe' gubáz chee xabáa ca' chee Dios gate tu benne' dul-la dxexebí'i lazre'.

### *Ca guca chee zri'ine tu benne' guniteba'*

<sup>11</sup> Nadxa Jesús bchálaje' xetú da dxulé'e na, dxé'e le':

—Tu benne' zaj zra' chupa bi chee'.

<sup>12</sup> Na' bi cuide' chee' gúzrebe' xrabe': "Xrae, benna chia' da dxal-la' si'a chee da naca chiu'." Nadxa xrabe' bene' gachaj da bnéruje' cha cheebe' tube', ne xetube'.

<sup>13</sup> Ca gudé tu chupa zra, bi cuide' chee bénnea' btúpabe' xúgute da naca cheebe', na' guzabe' zitu', na' bzrinbe' xetú xezr la xu. Na' ben dítajbe' dumí cheebe' lu da calela da benbe'.

<sup>14</sup> Na' ca gudache xúgute dumí cheebe', bzrin tu gubina' lu xezr la xu na', na' lebe' gudunbe'.

<sup>15</sup> Nadxa guzabe' xejítajbe' zrin gunbe' chee tu benne' lu xezr la xu na'. Benne' na' gusé-lé'-be' le'e xixre' chee' chee cheajxúebe' cuche chee' ca'.

<sup>16</sup> Guca lázrebe' gágube' da calela da dxelagu cuche ca'. Netú benne' quebe bi bnéruje' da gágube'.

17 Nadxa xeajsá lázrebe', dxennabe': "Benne' zante, benne' wən zrin zaj zre'e lizre xra', na' déle'e da dxelawe'. Neda' dxátequeza' xel-la dxedún.

18 Webí'iza' xexá'a naga zua xra', na' xapa' le': Xrae, beña' dul-la lau Dios, ne lau lue'.

19 Québedxa naca chia' gaca' zri'ínu'. Bzua neda' ca tu benne' wən zrin chiu'."

20 Nadxa begú'ube' neza, bezrinbe' lizre xrabe'.

"Tu chi na', ble'e xrabe' lebe' ba zezabe', na' bexache lazre'-be'. Na' guzá chégüe' xeajchague'-be', na' bnide'-be', ne bnúpete'-be'.

21 Nadxa gunabe': "Xrae, beña' dul-la lau Dios, ne lau lue'. Québedxa naca chia' gaca' zri'ínu'."

22 Na' gunná xrabe', dxé'e benne' wən zrin cheg' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'.

23 Le cheajzrí' tu bezre be dxanne, na' gútele-ba'. Gágudxu, ne gundxu laní, 24 lawe' da bi chia' nigá guca cheebe' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxeluné' laní.

25 'Dxácaté na', zrí'iné' bi waca zúabe' le'e xixre' dxunbe' zrin. Na' chizrela' ca bezrinbe' gagu cuífa xu'u lizre xrabe', na' benbe' dxaca wil-la, ne dxaca wexá'a.

26 Nadxa gunnébe' tu bi wən zrin na', dxé'ebe' lebe': "¿Bi dxaca nigá?"

27 Bi wən zrin nigá cúnnabe': "Ba belá' bi bichu', na' xrau' gunná bé'ene' nu gute tu bezre be dxanne, lawe' da belabe' zúabe' zri'a chawe'."

28 Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lebe' xexú'ube'.

29 Na' cúnnabe', dxé'ebe' xrabe': "Nézqueznu' zane' iza ba beña' zrin chiu', ne cabata' bcha'a lue', na' ne tu lasa quebe ne gunnu' chia' tu chíbudau' chee guna' tu laní nen ljwezra' ca'.

30 Na'a belá' bi chiu' nigá, bi ba ben dítajbe' dumí chiu', guzúalebe' nu'ula dxeledá zraga ca', na' bete lizu' bezre be dxanne ne chee lebe'."

31 Nadxa gunná xrabe', dxé'e-be': "Zri'ina', lue' tu zúalezquezu' nen neda', na' xúgute da de chia' naca na chiu'.

32 Na'a dxun na ba xen gundxu laní, ne bedxu, lawe' da bi bichu' gúcabe' ca tu benne' ba gute, ne naca banbe'. Gunítebe', na' ba bezrágadxu-be'."

## 16

### *Benne' wən zrin blau quebe naque' xrlátaje*

1 Nadxa Jesús guzre' benne' ca' dxusédené':

—Guzúa tu benne' gunní'a, na' zua tu benne' wən zrin blau cheg'. Na' bal-la benne' xeajleguezre' le' benne' wən zrin blau na' dxun dítajé' da de chee xrane'.

2 Nadxa xrané' gunné' le', ne guzre' le': "¿Bizra da nigá dxelenné' chiu'? Blué'e neda' ca naca chee zrin dxunu', lawe' da québedxa gaca gacu' wən zrin blau chia'."

3 Nadxa benne' wən zrin blau na' guzú lawe' dxenné' lu xichaj lázrdawe': ¿ájazra guna' na'a, lawe' da xebéaj xrana' neda' lu zrin chia'? Quebe sueda' guna' zrin le'e xixre', ne wedué'eda' naba' guna'.

4 Na'a ba nezda' tu da guna' chee xelezúa benne' xelezí' lu ne'e neda' gate québedxa de zrin chia'.



<sup>5</sup> Nadxa gunné' tu tu benne' dxelal-le' chee xrané' na'. Na' bchebe' benne' nedxu: “¿ájate dxal-lu' chee xrana?”

<sup>6</sup> Benne' na' bechebe': “Dxal-la' chee' tu gaxúa zruaga da za.” Nadxa benne' wen zrin blau na' guzre' le': “Nigá de xiche chiu'. Gudxé'e bexún xetú na, na' bzuaj na dxebagu' chi xun zruaga ca'.”

<sup>7</sup> Gudé na' bchebe' xetú benne' ca': “¿Gazra lue', ájate dxebagu'?” Na' benne' nigá guzre' le': “Dxebagu' tu gaxúa bzude' zrúa' xtila.” Nadxa benne' wen zrin blau guzre' le': “Nigá de xiche chiu'. Ben xetú na, na' bzuaj na dxebagu' tápalalaje.”

<sup>8</sup> Xrané' gúquebe'ene' nácale'e sina benne' wen zrin blau na' ca bene' da ca'. Nadxa gunná Jesús:

—Ca' naca na, benne' zaj zre'e na'a zra zaj nácadxe' sina lu da dxelune' nen le sa' ljwezre' ca', ca zaj naca benne' zaj naque' chee Dios.

<sup>9</sup> Neda' dxapa' le'e, le guchine xel-la gunní'a chee xezr la xu nigá chee cha benne' ljwézrele, chee gate te chee xel-la gunní'a na', na' sua nu si' lu na' le'e naga gaca banle chadía chacanna.

<sup>10</sup> 'Benne' dxuchínene' láteze lu duté xel-la li lazre' chee', cá'anqueze guchínene' tu da zrendxa duté xel-la li lazre' chee', na' benne' quebe naque' li lazre' ca dxuchínene' láteze, cá'anqueze quebe gaque' li lazre' ca guchínene' tu da zrendxa.

<sup>11</sup> Ca' naca na, che quebe nácale li lazre' ca dxuchínele xel-la gunní'a chee xezr la xu nigá, ¿nuzra guxrén lazre' le'e chee guchínele xel-la gunní'a li?

<sup>12</sup> Che quebe nácale li lazre' ca dxuchínele da naca chee benne' xula, ¿nuzra gunna le'e da gaca cheéquezele?

<sup>13</sup> 'Quebe gaca tu benne' wen zrin guné' zrin chee chupa xrané', lawe' da cuídené' tue', na' xetúe' zrí'ine', u gaque' li lazre' nen tue', na' xetúe' guzúe' chalá'ala. Quebe gaca nu gun zrin chee Dios, ne chee da gunní'a da nape'.

<sup>14</sup> Benne' fariseo ca', benne' dxulucúdee' dumí, ne dxuluzé nague' da dxenná Jesús, belún le' chee'.

<sup>15</sup> Nadxa gunná Jesús:

—Le'e dxulé'e cuínale xrlátaje lau bénneache ca', san Dios núnbe'e lázrdaule. Da dxeleque bénneache naca na xrlátaje, naca na da dxuzúa Dios chalá'ala.

### *Da nadxixruj bea na, ne xel-la dxenná bea chee Dios*

<sup>16</sup> Na' gunná Jesús:

—Ca bzrin zra zua Juan gulenná bea da nadxixruj bea na, ne da bululé'e benne' ca' buluchálaje' waláz chee Dios. Na'a, ca na'te dxendxu dizra' chawe' ca gaca chú'udxu naga dxenná bea Dios, na' xúgute benne' dxelune' ba xuzre xelu'e na'.

<sup>17</sup> Waca te chee xabáa, ne chee xezr la xu nigá, san quebe te chee tu da naxúaj na lu da nadxixruj bea na.

### *Benne' biu dxulusáne' nu'ula chee'*

(Mt. 19.1-12; Mr. 10.1-12)

<sup>18</sup> Na' gunná Jesús:

—Che tu benne' biu gusané' zru'ule', ne súalene' nu'ula xula, benne' biu nigá dxune' dul-la dxáchajne' xrba chee xel-la wechaga na', na' benne' biu zúalene' tu nu'ula ba bsan benne' chee' le', benne' nigá cá'anqueze dxune' dul-la dxáchajne' xrba chee xel-la wechaga na'.

*Tu benne' gunní'a, ne tu benne' xache'*

19 Na' gunná Jesús:

—Guzúa tu benne' gunní'a, gúcuę' zra lanę' da zaca, ne da zri'a xrtan, na' xúguę' zra bene' laní zren.

20 Cá'anqueze guzúa tu benne' xache' le' Lázaro, nazrate wę' lu bel-la' dxen cheę', na' dxējché'ę lu xu dxu'a lizre benne' gunní'a na'.

21 Benne' xache' nigá guzá lazre' gawę' ca da dxelxruj zranla ga dxelagu benne' gunní'a na', na' bécudu ca' dxelélé'ęba' lu wę' ca' cheę Lázaro.

22 Bzrin zra gute benne' xache' na', na' belexeché' gubáz cheę xabáa ca' le' zeajxezúalęę' Abraham lu lataj chawe' cheę Dios. Cá'anqueze gute benne' gunní'a na', na' bulucache' le'.

23 Gate benne' gunní'a na' dzezaca zi'ę lataj chul-la cheę benne' gate, na' guchisa lawę', na' blé'ęę' Abraham zuę' zitu', ne Lázaro zúalęę' le'.

24 Nadxa gudzezre xę'ę, gunné': "iXrae, Abraham, bexache lazre' neda', ne gusel-la Lázaro, cheajsebise' tu zrube ne'ę, na' xide' xuculę' luzra' nigá! Dzezaca zi'a lu xi' nigá."

25 Na' Abraham gunné': "Bi chia', bsa lazre' gúcalę'ę chawe' chiu' lu xęzr la xu, san Lázaro gúcalę'ę da zi' da xa' cheę'. Na'a le' dxezi'ę da ba neza nigá, na' lue' dzezaca zi'u na'.

26 Xetú da zua, zua tu chejéa zrentę laduj netu' ne le'e. Ca' naca na, che nu benne' zua nigá dxaca lazre' chėję' naga zu', quebe gaca, ne quebe gaca benne' zua naga zu' xide' naga zúantu' netu'."

27 Nadxa gunná benne' gunní'a na': "Dxata' xueda' lue', xrae Abraham, sel-lu' Lázaro lizre xra',

28 naga zaj zra' gazxu' bi bícha'dau', cheę cheajchálajlęę'-be', cheę quebe xeledá' lębe' nigá xelezaca zi'be' ca dxaca chia'."

29 Abraham gunné': "Zaj nape' da buluzúaj Moisés, ne benne' ca' buluchálaję' waláz cheę Dios. Dخال-la' xelená' xánnie' da na' naxúaj na'."

30 Benne' gunní'a na' bechebę': "Awe', xrae Abraham, san che nu benne' ládujla benne' gate chėję' cheajchálajlęę' le', welxebí'i lazre'."

31 Abraham gunné': "Che quebe xelennę' ca da gulenná Moisés, ne benne' ca' buluchálaję' waláz cheę Dios, québequeze xelėjaję'ę che tu benne' xebanę' ládujla benne' gate."

## 17

### *Ca naca da dxun na ga nabágdxu dul-la*

(Mt. 18:6-7, 21-22; Mr. 9:42)

1 Jesús guzre' benne' ca' dxusédenę':

—Welezúaqueze da xelún na xelebaga bėnneache dul-la, na' edxugúa bėnnea' gunę' da gun na xebaga benne' xula dul-la.

2 Gácadxa chawe' cheę bėnnea' che nu guchėj xiaj xiche lbe', na' chu'ę lu nísadau' naga gátetę' quézcala gunę' da gun na xebaga bidu caní dul-la.

3 Le guxúe xanne' cuínale.

'Che le sa' ljwezru' gunę' chiu' da calęla, bzėjni'ing', na' che xebí'i lazre', bnite lau cheę'.

4 Lácala gunę' chiu' da calęla gazre lasa tu zra, na' gazre lasa xide' xę'ę lue': "Dxexebí'i lazra'", dxal-la' gunite lau' cheę'.

### *Xel-la waca cheę xel-la dxējilí lazre'*

5 Benne' gubáz ca' cheę Xránadxu gulę'ę Le':

—Ben ga cheajlí lázredxantu' Dios.

<sup>6</sup> Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu bínedu chee mostaza, waca xeḷe xaga zrentē nigá: “Gucuasa nigá, ne xeajsúa lu nísadau',” na' xaga na' gúzúa na dizra' cheele.

*Da dxal-la' gun benne' wen zrin*

<sup>7</sup> Che tu benne' ládujla le'e zua tu benne' wen zrin chee', na' xel'é'e le'e xixre' gate te gudé'e bezre u guxúe' béadu ca', ¿we'e benne' wen zrin na': “Gudé nigala, gudxé'e gagu'?”

<sup>8</sup> Cabí, san nne': “Bcueza da gawa', ne gusí' chawe' le'u chee' gaca ca'u chia' da xi'aj gawa'. Te na' waca xi'aj gagu' lue'.”

<sup>9</sup> ¿We'e benne' wen zrin na': “Xcalenu'”, lawe' da bene' da gunná be'e xranē' le'?' Cabí.

<sup>10</sup> Cá'anqueze le'e, gate xuzre gunle xúgute' da gunná be'e Dios le'e, dxal-la' nnale: “Nácantu' benne' wen zrin quebe bi zaj zaca, lawe' da quebe bi ne guntu' da zréndxala ca naca da nabágantu'.”

*Jesús dxexunē' chi benne' zaj de'e we' guzru'*

<sup>11</sup> Ca zexíaj Jesús zéajē' Jerusalén, gudé'e' lu xezr la xu chee' xezre ca' zaj nababa Samaria, ne xezre ca' zaj nababa Galilea.

<sup>12</sup> Gate bzrinē' tu xézredau', bedajlechaga Le' chi benne' zaj de'e we' guzru', na' belezé' zítu'la,

<sup>13</sup> ne gulebezre xē'e, dxelenné':

—Jesús, Benne' Wesede, bexache lazre' netu'.

<sup>14</sup> Gate ble'e Jesús le', na' gunné':

—Le chjaca le cheajlué'e cuinale lau bxruze ca'.

Dxácatē zjaque' na', na' belexexaque' chee' xízrawē' chee'.

<sup>15</sup> Nadxa tu benne' ca', gate guque bé'engē' ba bexaque', na' bebi'e, dxue lá'ane' Dios du lazre'.

<sup>16</sup> Bzu zribe' lau Jesús, ne gudíxrujtē' lawe' lu xu, dxē'e Le': “Xcalenu'.” Benne' nigá naque' tu benne' Samaria.

<sup>17</sup> Nadxa gunná Jesús:

—¿Quegá chiē' na' belexexaque' lu xízrawē' na'? ¿Gazra na' xeguē'?

<sup>18</sup> ¿Tuze benne' zitu' nigá belá' güe lá'ane' Dios?

<sup>19</sup> Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

*Ca la' xel-la dxenná bea chee' Dios*

(Mt. 24.23-28, 36-41)

<sup>20</sup> Benne' fariseo ca' buluchēbe' Jesús bátala la' xel-la dxenná bea chee' Dios, na' bechebe Le':

—Ca la' xel-la dxenná bea chee' Dios quebe naca na da lé'ele.

<sup>21</sup> Quegá nu nna: “Nigá zua na”, u “Na' zua na”, lawe' da ba zua lu'ule le'e xel-la dxenná bea chee' Dios.

<sup>22</sup> Nadxa guzre' benne' ca' dxusédene':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na.

<sup>23</sup> Che xelenná bénneache, xel'é'e le'e: “Nigá zue'”, u: “Na' zue'”, quebe chéajle, ne quebe gaule benne' ca'.

<sup>24</sup> Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'.

<sup>25</sup> Nédxula dxal-la' téle'a xel-la zi', na' benne' zaj zre'ē lu zra na'a zra xuluzúe' neda' chala'ala.

<sup>26</sup> Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache.

<sup>27</sup> Lu zra na' zua Noé gulé'aj gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gúcale'ē xiuj, na' gulate xúgute' benne' ca'.

<sup>28</sup> Cá'anqueze guca lu zra zua Lot, gulé'aj gulawe', ne gulá'awe', ne belútiē', na' gulaze', ne belune' lizre',

<sup>29</sup> na' gate Lot bedxúaje' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzéxxele'e zran xabáa, ne bzria xi na ca naca benne' ca'.

<sup>30</sup> Ca'an gaca lu zra xelá'a neda', Benne' Gulje' Bénneache.

<sup>31</sup> 'Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'ē cuéaje' na, na' che nu benne' zue' le'ē xixre', quebe dxal-la' xezrine' lizre'.

<sup>32</sup> Le cheajsá lazre' ca guca chee' zru'ula Lot.

<sup>33</sup> Benne' dxaca lazre' gapa chi'ē xel-la nabán chee' gunitie' na, na' bènea' wdee' na, wazrué'e bènea' xel-la nabán.

<sup>34</sup> 'Dxapa' le'e, lu zre na', chupa benne' xelate' tu zren ga dxelase'. Tue' xeché'ē, na' xetúe' xegá'ane'.

<sup>35</sup> Chupa nu'ula xelezre'ē dxelútue'. Tue' xeché'ē, na' xetúe' xegá'ane'.

<sup>36</sup> Chupa benne' xelezre'ē le'ē xixre'. Tue' xeché'ē, na' xetúe' xegá'ane'.

<sup>37</sup> Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

## 18

*Da dxulé'e na ca naca chee' tu nu'ula ba gute benne' chee', ne benne' dxuchi'a da dxaca*

<sup>1</sup> Jesús bchálaje' da dxulé'e na ca naca chee' gusédenē' benne' ca' dxal-la' xuluwízrajtecaze' Dios, ne quebe xelexebigue'.

<sup>2</sup> Na' guzre' benne' ca':

—Tu xezre guzúa tu benne' dxuchi'ē da dxaca, na' quebe gudape' ba lá'ana Dios, ne cá'anqueze bèneache.

<sup>3</sup> Lu xezre ná'queze guzúa tu nu'ula ba gute benne' chee'. Guxíaje' xejnabe' lau benne' dxuchi'ē da dxaca chee' guchi'ē da dxaca chee' nen tu benne' dxune' chee' da calēla.

<sup>4</sup> Zane' lásate' benne' dxuchi'ē da dxaca quebe guca lazre' guchi'ē chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'anqueze bèneache,

<sup>5</sup> san lawe' da nu'ula nigá dxune' neda' zede, guchi'a chaza' da dxaca chee' chee' québedxa xide' gúnle'ē neda' zede.

<sup>6</sup> Na' gunná Xránadxu:

—Caní na' gunná benne' wen da calēla na', benne' dxuchi'ē da dxaca.

<sup>7</sup> ¿Quebe guchi'a Dios da dxaca chee' benne' ca' ba guqué'ē, benne' ca' dxelenné' Le' te zra, ne chizrela? ¿Wazrene' xechēbe' chee' benne' ca'?

<sup>8</sup> Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bénneache, ¿wazréldxada' tu benne' lu xezr la xu nigá, benne' dxéajle'e chia'?

*Da dxulé'e na ca naca chee tu benne' fariseo, ne tu benne' wechizruj*

<sup>9</sup> Jesús bchálaje' xetú da dxulé'e na, chee xelene benne' ca' dxeléquene' zaj naque' xrlátaje, san dxuluzúe' chalá'ala le sa' ljwezre'.

<sup>10</sup> Gunné':

—Chupa benne' xjaque' xudau' chee xuluchálajlene' Dios. Tue' naque' benne' xudau' fariseo, na' xetúe' naque' wechizruj waláz chee xezre zitu'.

<sup>11</sup> Benne' xudau' na' guzé' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da caléla, ne benne' dxelún dul-la dxeláchajne' xrbá chee wechaga na', ne quegá ca benne' wechizruj nigá.

<sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee da chi cue' da dxezi'a.”

<sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Bélé'e la chu'e, dxenné': “Dios, bexache lazre' neda', naca' benne' dul-la.”

<sup>14</sup> Dxapa' le'e, benne' wechizruj na' bezé'e xexíaje' lizre', ne bexaque' xrlátaje lau Dios, san quegá caní guca chee benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

*Jesús dxenabe' gaca chawe' chee bidu ca'*

*(Mt. 19.13-15; Mr. 10.13-16)*

<sup>15</sup> Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxuséde Jesús da nigá, na' gulezú lawe' dxeledil-le' benne' ca'.

<sup>16</sup> Jesús gunné' benne' ca' dxusédené', na' dxe'e le':

—Le güe lataj xeledá' bidu ca' naga zua', ne quebe guzágale-be', lawe' da benne' zaj naque' ca bidu caní welexu'e naga dxenná bea Dios.

<sup>17</sup> Da li dxapa' le'e, benne' quebe si' lu ne'e nna bea Dios le' ca dxelún bidu caní, québequeze chu'e naga dxenná bea Dios.

*Tu benne' cuide' naque' benne' gunní'a*

*(Mt. 19.16-30; Mr. 10.17-31)*

<sup>18</sup> Tu benne' xíchaje bchebe' Jesús:

—Benne' Weséde xrlátaje, ¿bi da dxal-la' guna' chee zrué'eda' xel-la nabán zeajlí canna?

<sup>19</sup> Jesús guzre' le':

—¿Bizr chee na' dxennáu' naca' xrlátaje? Netú benne' quebe naque' xrlátaje. Tuzé Dios naque' xrlátaje.

<sup>20</sup> Lue' núnbe'u ca zaj naca xrbá chee Dios:

Quebe gunu' dul-la da dxachaj na xrbá chee wechaga na'.

Quebe gutiu' benne'.

Quebe cuanu'.

Quebe nneu' chee le sa' ljwezru' da quebe naca na.

Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute da caní dxuna' ne nácatea' bídau'te.

<sup>22</sup> Gate ben Jesús da nigá, na' guzre'-be':

—Ne dxexáxrjenu' xetú da dxal-la' gunu'. Bete ca naca da de chiu', na' bnezruj na chee benne' xache' ca'. Nadxa gapu' xel-la gunní'a lu xabáa chee Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'inele'ene' lawe' da nápalē'e da gunní'a.

<sup>24</sup> Gate ble'e Jesús ca bewí'ine benne' na', gunné':

—Stébetē naca chee benne' gunní'a ca' xelexú'e naga dxenná bea Dios.

<sup>25</sup> Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bēnneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' chee zálentu' Lue'.

<sup>29</sup> Nadxa Jesús bechebe':

—Da li dxapa' le'e, núteteze benne' gusane' lizre', u xra xrne'e, u bi biche', bi zane' ca', u zru'ule', u zri'ine' ca', chee gune' zrin chee xel-la dxenná bea chee Dios,

<sup>30</sup> benne' nigá wazi'e da zrendxa lu xezr la xu nigá, na' lu xezr la xu da za za' wazi'e xel-la nabán da zeajlí canna.

*Jesús dxuchálaje' xecha lasa ca gaca gate gatie'*

*(Mt. 20.17-19; Mr. 10.32-34)*

<sup>31</sup> Na' Jesús gunné' chala'ala benne' chazrinnu ca' dxusédene', na' guzre' le':

—Na'a zexiajdxu Jerusalén, naga gaca li ca naca da buluzúaj benne' ca' buluchálaje' waláz chee Dios ca gaca chia' neda', Benne' Gulje' Bēnneache.

<sup>32</sup> Benne' zaj zre'e Jerusalén xuludé' neda' lu na' benne' zitu' ca', na' xelún le' chia', ne xelennéqueze' schanni' chia', ne wuluzráqueze' neda' zrene'.

<sup>33</sup> Welúequeze' neda', na' te na' xelútie' neda', na' zra guxunne' zra xebana' ládujla benne' gate.

<sup>34</sup> Benne' ca' quebe guléajni'ine' da nigá, ne quebe zaj nézene' bi chee na' dxuchálajlene' le', lawe' da zaj naca da quebe guca xeléajni'iquezne'.

*Tu benne' la chul-la, benne' zue' xezre Jericó*

*(Mt. 20.29-34; Mr. 10.46-52)*

<sup>35</sup> Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'.

<sup>36</sup> Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na.

<sup>37</sup> Na' gulé'e le':

—Jesús, benne' Nazaret dxedé' nigá.

<sup>38</sup> Nadxa gudxezre xa'a la chul-la na', gunné':

—Jesús, Zri'ine David, bexache lazre' neda'!

<sup>39</sup> Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxal le', dxenné':

—Zri'ine David, bexache lazre' neda'!

<sup>40</sup> Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

<sup>41</sup> —¿Bi dxaca lazru' guna' chiu'?

Bechebe la chul-la ná':

—Xran, dxaca lazra' xelé'eda'.

<sup>42</sup> Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

<sup>43</sup> Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute' benne' ca' belelé'ene' da nigá cá'anqueze belúe lá'ane' Dios.

## 19

### *Jesús dxuchálajlene' Zaqueo*

<sup>1</sup> Nadxa Jesús guxú'e xezre Jericó, ne dxedé'e xezre na'.

<sup>2</sup> Lu xezre na' zua tu benne' gunní'a le' Zaqueo. Naque' xíchaje chee benne' wechizruj ca'.

<sup>3</sup> Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante' na', na' Zaqueo na' quebe naque' benne' tunna.

<sup>4</sup> Nadxa guxíaj chégü'e' guzría lawe', ne chee gaca lé'ene' guluéne' tu lu xaga zren da zua gagu naga dxal-la' te Jesús.

<sup>5</sup> Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.

<sup>6</sup> Nadxa Zaqueo na' bexétaje' chadí, na' nen duté xel-la dxebé guzú' lu ne'e Jesús.

<sup>7</sup> Gate belelé'e benne' ca' da nigá, xúgute' gulezú lawe' dxelezi tizre' Jesús, dxelenné':

—Jesús bzrine' begá'ane' lizre tu benne' dul-la.

<sup>8</sup> Nadxa Zaqueo na' guzé', na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de' chia', na' che nu benne' bsaca zia' le', xunézruja' tapa cue'la chee'.

<sup>9</sup> Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham.

<sup>10</sup> Ca' naca na lawe' da bla' neda', Benne' Gulje' Bénneache, chee xexíajaja', ne guselá' benne' ca' zaj nanítie'.

### *Da dxulé'e na ca naca chee chi dumí zaca*

<sup>11</sup> Dxácaté na' dxuluzé naga benne' ca' dxenná Jesús da caní, na' bchálaje' tu da dxulé'e na lawe' da ba zue' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá.

<sup>12</sup> Nadxa guzre' benne' ca':

—Guzúa tu benne' gunní'a xrlátaje, na' dxal-la' chéaje' zitu' chee xuluzúe' le' gaque' wenna' bea, na' te na' xezrine' lazrie'.

<sup>13</sup> Gate za se'e, gunné' chi benne' wen zrin chee', na' bnézruje' tu tu benne' ca' tuwéaj dumí zácale'e, ne guzre' benne' ca': “Le guchine dumí nigá cadxa xelá'a.”

<sup>14</sup> Benne' zaj zre'e lázrie' dxelecuídene' le', na' gulesel-le' bal-la benne' gubáz chee' naga zéaje' chee' cheajleguezre' benne' zaj zre'e na': “Quebe dxaca lázrentu' gaca benne' nigá wenna' bea cheentu'.”

<sup>15</sup> Buluzúe' le' gaque' wenna' bea, na' bezrine' lázrie'. Gate bezrine' gunné' benne' wen zrin ca' bnézruje' dumí, chee nézene' ájate bezi' tu tu benne' ca'.

<sup>16</sup> Benne' nedxu bzrine' lawe', na' gunné': “Xran, dumí chiu' ba bezi' na chi cue'la.”

17 Wenná bea na' bechebe': "Chawe' benu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'."

18 Na' bzin xetúe' lawe', na' gunné': "Xran, dumí chiu' ba bezí na gazxu' cue'la."

19 Cá'anqueze guzre' benne' nigá: "Lue' gacu' benne' nna be'ene' gazxu' xezre ca'."

20 Nadxa xetúe' bzrine', na' gunné': "Xran, nigá de dumí chiu'. Bcache chawa'a na tu lu bazxu,

21 lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxelapu' naga quebe guzu'."

22 Nadxa wenná bea na' guzre' le': "Wen zrin caléla. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxruá', ne dxelapa' naga quebe guza',

23 ¿bizr chee' na' quebe xju'u dumí chia' lu na' benne' xuluchínene' na, chee xezí' lu na'a neda' dumí chia' nen da gun xíchaje na, gate xezrina' neda' lizra'?"

24 Nadxa guzre' benne' ca' zaj zre'e na': "Le xecá'a dumí na' lu ne'e, na' le gunezruj na benne' nape' chi dumí ca'."

25 Benne' ca' gulé'e le': "Xran, ba nape' chi dumí."

26 Na' bechebe' wenná bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'.

27 Na'a, ca naca chee' benne' ca' quebe gulaca lazre' gaca' neda' wenná bea chee', le cheajxri'e nigá, ne le gutie' lawa' neda'."

*Jesús dxexu'e Jerusalén*  
(Mt. 21.1-11; Mr. 11.1-11; Jn. 12.12-19)

28 Ca gudé gunné' da nigá, na' bexú'u Jesús neza zexíaje' Jerusalén.

29 Gate ba zua xezrine' xezre Betfagé, ne xezre Betania, ne zu'e gáguze naga zua Xi'a Xaga Olivo, na' gusel-le' chupa benne' ca' dxusédené'.

30 Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía leba'. Le sezre-ba', na' le chee'-ba' nigá.

31 Che nu naba le'e bizr chee' na' dxesézrele-ba', le xe'e Xránadxu nachínene'-ba'.

32 Na' gusiá'ca benne' ca', na' belelé'ene' xúgute' naca na ca ba guzre Jesús le'.

33 Na' gate dxelesezre' búrrua', na' xránaba' buluchebe' le':

—¿Bizr chee' na' dxesézrele búrrua'?

34 Benne' chupa ca' belexechebe':

—Lawe' da nachine Xránadxu leba'.

35 Na' beleché'e-ba' lau Jesús, na' belexrúe' xicha chee' cúzruba', na' buluzríe' Jesús cúzruba'.

36 Ca zeaj Jesús, xu'e neza zrie' búrrudu na', na' dxelechiluj benne' ca' xicha chee' la neza naga té'e'.

37 Gate bzrine' gagu naga naca létajla chee' Xi'a Xaga Olivo, xúgute' benne' ca' zaj de'e Le' gulezú lawe' dxelebezre xe'e lu xel-la dxelebe', ne dxelúe lá'ane' Dios ca naca xúgute' xel-la waca chee' xabáa da belelé'ene'.

38 Gulenné':

—La'azxa naca wenná bea, benne' za' waláz chee' Xránadxu Dios. Gaca xel-la dxebeza zri lazre' da za xabáa, ne gaca ba Dios.

39 Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.



<sup>40</sup> Jesús bechebe':

—Dxapa' le'e, che benne' caní xelezúa zrié', xiaj caní xelebezre xa'a na.

<sup>41</sup> Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee na.

<sup>42</sup> Na' gunné':

—La chéajni'ile lu zra chee le nigá da gaca gunna chee le xel-la dxebeza zri lazre'. Na'a da na' nagache na, na' quebe gaca lé'ele na.

<sup>43</sup> Weleznín zra gaca chee le da zrinna, gate benne' dxelecuídeng' le'e xeléchaje' ze'e dxu'a xezre chee le, ne xuluzague' le'e gáteteze na',

<sup>44</sup> na' xuluchínnaje' xezre chee le. Na' xelútie' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca chee le lawe' da quebe gúquebe'ele zra bla' Dios chee gácalene' le'e.

*Jesús dxucá'ana chawe' chale'aj xudau'*

*(Mt. 21.12-17; Mr. 11.15-19; Jn. 2.13-22)*

<sup>45</sup> Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutie', ne dxelá'awe' na'.

<sup>46</sup> Na' guzre' benne' ca':

—Lu xiche chee Dios dxenné': “Lizra' naca na xu'u naga guchálajlele neda',” na' le'e nunle na ca tu lizre gubán ca'.

<sup>47</sup> Tu zra tu zra Jesús dxusédené' benne' ca' zaj zra' chale'aj xudau'. Benne' xíchaje' ca' chee bxruze, ne benne' dxuluxuzájle' da nadxixruj bea na, ne benne' xu'u lawe' chee xezre na' dxelílaje' ájala xelune' xelútie' Le'.

<sup>48</sup> Quebe belezréne' ájala xelune', lawe' da dxuluzé naga xanne' xúgute benne' ca' Jesús, chee xelenne' ca da dxenné'.

## 20

*Ca naca xel-la dxenná bea napa Jesús*

*(Mt. 21.23-27; Mr. 11.27-33)*

<sup>1</sup> Tu zra gate zua Jesús chale'aj xudau' dxusédené' benne' ca', ne dxuchálajlene' le' ca naca dizra' chawe' chee Dios, na' beleznín na' benne' xíchaje' ca' chee bxruze ca', ne benne' ca' dxuluxuzájle' da nadxixruj bea na, ne benne' gula sina ca',

<sup>2</sup> na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

<sup>3</sup> Na' gunná Jesús:

—Cá'aqueze neda' gucheba' le'e tu. Le xechebe chia'.

<sup>4</sup> ¿Nuzra gusel-la Juan guchúé' bènneache nisa? ¿Dios che bènneache?

<sup>5</sup> Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: “¿Bizra chee na' quebe guxéajlele chee?”

<sup>6</sup> Che xedxu Le', bènneache gulesel-le' le', benne' zaj zre'e nigá wuluzrié' dxi'u xiaj, lawe' da zaj neze xánnie' bchalaj Juan waláz chee Dios.

<sup>7</sup> Nadxa belexechebe' quebe zaj nézene' nu gusel-la Juan bchue' bènneache nisa.

<sup>8</sup> Na' Jesús guzre' benne' ca':

—Cá'aqueze neda' quebe xapa' le'e bi xel-la dxenná bea napa' dxuna' da caní.

*Da dxul'é na ca naca chee benne' wen zrin caléla ca'*

*(Mt. 21.33-44; Mr. 12.1-11)*

<sup>9</sup> Na' guzú lau Jesús dxuchálajle' benne' ca' zaj zre'e na', dxuchálaj' da dxul'é na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ane' na lu na' benne' wen zrin ca', na' guzú'e na' zane' iza.

<sup>10</sup> Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' bulúzálajé'-be', na' belexesel-le'-be' cá'aze.

<sup>11</sup> Nadxa xrane lina na' gusel-le' xetú bi wen zrin chee', na' cá'aqueze bi nigá bulucháchalene'-be', ne bulúzálajé'-be', na' belexesel-le'-be' cá'aze.

<sup>12</sup> Xrane na' gusel-le' xetú bi wen zrin chee', na' benne' wen zrin ca', cá'aqueze belune'-be' zi', na' belexebéajé'-be' lu lina na'.

<sup>13</sup> Naga xeaiche'te na, xrane na' gunné': "¿ájazra guna? Sel-la' zri'ina nazrí'ite lazra'. Gate xeledé'ene'-be' nalja xelape'-be' ba lá'ana."

<sup>14</sup> Na' gate benne' wen zrin ca' belelé'ene'-be', na' gulé ljwezre': "Bi nigá xezí' lu na'be' da de chee' xránadxu. Gútedxu-be', chee' gácadxu xrane na dxí'aqueze."

<sup>15</sup> Nadxa belexebéajé'-be' lu xezr la xu na', na' belutié'-be'.

Nadxa Jesús bchebe' benne' ca':

—¿Bizra gun xrane na' chee' benne' wen zrin ca'?

<sup>16</sup> Xel'é, na' gutié' benne' wen zrin ca', na' gudé'e xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'e lataj gaca ca'.

<sup>17</sup> Na' Jesús gunné'e benne' ca', na' gunné':

—¿Bizra zéajé da naxúaj na lu xiche chee' Dios? Dxenné' caní:

Xiaj na' da buluzúa benne' wen xu'u ca' chalá'ala,

le' na' naca na xiaj blau.

<sup>18</sup> Núteteze benne' cheajchazie' lawe' xiaj na', na' chúzrujqueze bénnea', na' che xiaj na' xezruj na lawe' nu benne', gútuté na le'.

*Ca naca chee da dxuchizruj xezre zi'tu'*

*(Mt. 21.45-46; 22.15-22; Mr. 12.13-17)*

<sup>19</sup> Benne' xíchajé ca' chee' bxruze ca', ne benne' ca' dxuluxuzájle'e da nadxixruj bea na gulaca lazre' xelele' Jesús zra ná'queze, lawe' da guleque bé'ene' bchalaj Jesús da dxul'é na ca zaj naca le', san belezrebe' da xelún bénneache ca'.

<sup>20</sup> Nadxa gulesel-le' benne' ca' xuluzuzre' Jesús, benne' xululé'e cuine' ca' benne' xrlátaje ca'. Benne' caní dxelaca lazre' xelebéajé' Jesús dizra' chee' xelezé'quene' xuludé'e Le' lu na' bénnea' dxenná be'e.

<sup>21</sup> Chee' xelune' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee' bénneache cáteze dxululé'e cuine', san lu da li dxusédenu' da naca chee' Dios.

<sup>22</sup> Guzre netu', ¿naca na chawe' quízrujdxu da dxuchizruj César, bénnea' dxenná bé'ene' duté xezr la xu, che cabí?

<sup>23</sup> Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee' na' dxaca lázrele gun xálele neda'?

<sup>24</sup> Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechēbe':

—Chee benne' dxenná bea na'.

25 Nadxa gunná Jesús:

—Le gunezruj bēnnea' da naca chee', na' le gunezruj Dios da naca chee' Dios.

26 Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

*Ca gaca gate xelexebán benne' gate*

(Mt. 22.23-33; Mr. 12.18-27)

27 Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

28 —Benne' Wesede, Moisés bzúaje' cheentu' che tu benne' gatie', ne gucá'ane' zru'ule', ne che quebe nu chilá' zrí'ine', na' bi biche bēnnea' dxal-la' guchaga na'abe' nen nu'ula na' gute benne' chee' chee' galaj tu bidau' gácabe' ca zrí'ine bēnnea' ba gúte'e'.

29 Gulezrá' gazre benne' gulaque' zrí'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'.

30 Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'.

31 Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'.

32 Naga xeajche'te na, na' gute nu'ula na'.

33 Gate xelexebán benne' gate, ¿nula bi ca' gaca zrú'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

34 Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'.

35 Na' benne' ca' naca chee' xelexexú'e xezr la xu da za za', ne chee' xelexebane' ládujla benne' gate, québedxa xuluchaga ne'e, ne québedxa xulunéruje' zrí'ine' lu xel-la wechaga na'.

36 Ca'an gaca lawe' da quebe nu gátedxa na'. Xelaque' ca zaj naca gubáz chee' xabáa ca', ne xelaque' bi chee' Dios lawe' da belexebane'.

37 Moisésqueze, gate bzuaje' ca guca chee' bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee' Dios, naque' Dios chee' Abraham, ne Dios chee' Isaac, ne Dios chee' Jacob.

38 Dios quebe naque' Dios chee' benne' gate ca'. Naque' Dios chee' benne' ban ca', lawe' da lau Le' zaj naca ban xúgute' bēnneache'.

39 Nadxa bal-la benne' ca', benne' dxuluxuzájle'e da nadxixruj bea na gulé'e Jesús:

—Cháwedau' dxennáu', Benne' Wesede.

40 Québedxa belexázejne' bi xuluchebe' Jesús.

*¿Nu benne' naca Cristo zrí'ine'?*

(Mt. 22.41-46; Mr. 12.35-37)

41 Jesús guzre' le':

—¿Bizr chee' na' dxennale le'e naca Cristo zrí'ine David?

42 Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuíta xabēla chia',

43 Cadxa guzúa' benne' dxelecuídenē' lue' ca' zran ni'u.”

44 ¿ájazra chee' na' naca Cristo zrí'ine David, na' Davidqueze dxē'e Le': “Xran”?

*Jesús dxenné' chee benne' ca' dxuluxuzájlé'e da nadxixruj bea na*

*(Mt. 23.1-36; Mr. 12.38-40; Lc. 11.37-54)*

<sup>45</sup> Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédene':

<sup>46</sup> —Le guxúe xanne' cuínale chee benne' ca' dxuluxuzájlé'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bèneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezrágale, ne lataj blau ca' naga dxelawe' zrué.

<sup>47</sup> Benne' caní dxelequé'e ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bèneache ca' dxululawízraje' Dios da tunna lu xu'u ca' naga dxezrágale. Benne' caní xelezaca zídxaqueze'.

## 21

*Dumí da bnezruj tu nu'ula xache' ba gute benne' chee'*

*(Mr. 12.41-44)*

<sup>1</sup> Gate zua Jesús chale'aj xudau', blé'ene' benne' gunní'a ca' dxelegú'e dumí lu xí'ina chee' xudau'.

<sup>2</sup> Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'.

<sup>3</sup> Na' gunná Jesús:

—Da lí dxapa' le'e, nu'ula xache' nigá gulú'udxe' da zrendxa ca benne' gunní'a caní,

<sup>4</sup> lawe' da dxelegú'u benne' ca' chee' da dxutínneze na, san nu'ula nigá, lu xel-la baxache' chee' bnézruje' ca naca da nape' da nunte gawe'.

*Jesús dxuchálaje' ca gaca gate cuía xi' xudau'*

*(Mt. 24.1-2; Mr. 13.1-2)*

<sup>5</sup> Bal-la benne' dxuluchálaje' ca naca chee' xudau' na', ne chee' xiaj xrtante da zaj zrále'e na ze'e xudau' na', ne chee' da xrtan da bulunezruj benne' chee' xudau' na'. Nadxa gunná Jesús, dxé'e le':

<sup>6</sup> —Wazrín zra gate xelebía xí' xúgute' da caní dxelé'ele, ne quebe xegá'ana netú xiaj cuzru ljwezre na.

*Da xululé'e na gate cheajsé chee' xezr la xu nigá*

*(Mt. 24.3-28; Mr. 13.3-23)*

<sup>7</sup> Nadxa benne' ca' buluchebe' Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

<sup>8</sup> Jesús gunné':

—Le guxúe xanne' cuínale, ne quebe güele lataj nu si xe' le'e, lawe' da xelalá' benne' zanté benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'.

<sup>9</sup> Gate xénele dxaca wedil-la, ne xeledábage' bèneache xu'u lawe', quebe zrébele, lawe' da dxal-la' gaca da caní nedxu, san quebe ne zrin zra cheajsé chee' xezr la xu nigá.

<sup>10</sup> Nadxa guzre' benne' ca':

—Bèneache tu xezr la xu xeledíl-lalé bèneache xetú xezr la xu, na' benne' tu xezre xeledíl-lalé benne' xetú xezre.

<sup>11</sup> Wazrú'le'eqeze, ne gácalé'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup> 'Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee' xelechugue' ca

xelunę' cheęle, na' xelegú'ę le'e lizre xia, ne xelechę'ę le'e lau benne' wenná bea ca', ne lau benne' xu'u lawe' ca' lawe' da nácale neda' tuze.

<sup>13</sup> Gate gaca da caní gata' lataj guchálajle benne' ca' ca naca chia' neda'.

<sup>14</sup> Le guzúa chacha lázrdaule, quebe gucuézale nédxula da dxal-la' nnele,

<sup>15</sup> lawe' da gunna' neda' le'e dizra', ne xel-la sina da quebe xezeque benne' dxeledábague' le'e bi xelennę' cheę na.

<sup>16</sup> Wuludęqueze bęnneache le'e lu na' benne' dxeledábague' le'e. Caní xelúnqueze xra xrnale, ne bi bíchele, ne xrtia ljwézrele, ne bi ljwézrele ca'. Welútequeze' bál-lale le'e,

<sup>17</sup> na' xúgute bęnneache welecuídenę' le'e lawe' da nácale neda' tuze,

<sup>18</sup> san quebe nite tu xicha xíchajle lau Dios.

<sup>19</sup> Che sua cháchale, na' gápale xel-la nabán.

<sup>20</sup> 'Gate lé'ele zaj naxechaj benne' dxjaque' wedil-la xęzre Jerusalén, na' nézele ba za cuía xi' xęzre nigá.

<sup>21</sup> Lu zra na', benne' zaj zre'ę xęzre ca' zaj nababa Judea dxal-la' xulzrúnnuje' chjaque' lu xi'a ca', na' benne' zaj zre'ę xęzre Jerusalén dxal-la' xeledxúaje' na', na' benne' zaj zre'ę le'ę xixre' quebe dxal-la' xelexezrine' xęzre na'.

<sup>22</sup> Lu zra ca' Dios gudęe' benne' ca' lu da zi' da xa', na' gaca li ca naca da naxúaj na lu xiche cheę Dios ca dxal-la' gaca cheę benne' ca'.

<sup>23</sup> Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'ę da xelezaca bęnneache ca', na' gaca tu da ba xa' zrente cheę benne' ca'.

<sup>24</sup> Bal-le' xelatie' lu wedil-la na', na' xebal-le' xelechę'ę le' zaj nadxéaje' tu tu xęzr la xu ca', na' benne' zitu' ca' xululéaje' xęzre Jerusalén cadxa cheajsę cheę zra xelenná bea benne' zitu' ca'.

*Ca gaca gate xelá' Benne' Gulje' Bęnneache*  
(Mt. 24.29-35, 42-44; Mr. 13.24-37)

<sup>25</sup> Na' gunná Jesús:

—Lu zra na' xelata' da xululę'e na lau gubizra, ne lau beu', ne lau belaj ca', na' lu xęzr la xu xelezúa stębe benne' ca', ne xelezrebe' ca naca schaga' da gun nísadau', ne xeajxruza cheę na.

<sup>26</sup> Benne' ca' xelate ni'a ne'ę ne cheę xel-la dxelezrebe gate xulusá lazre' ca da dxal-la' gaca lu xęzr la xu, ne ca naca da zaj zra' zran xabáa, da zaj napa xel-la waca xelexrízequeze na.

<sup>27</sup> Lu zra na' xelélé'equezne' neda', Benne' Gulje' Bęnneache, xelá'a tu lu beuj, nen dutę xel-la waca zren, ne da xabáa chia'.

<sup>28</sup> Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca cheęle.

<sup>29</sup> Nadxa bchalaj Jesús tu da dxulę'e na, gunnę':

—Le nna'xque xaga higo, u bíteteze xaga.

<sup>30</sup> Gate lé'ele ba dxezría na laga' dxe'ene, nézquezle le'e ba za xaca beu' la.

<sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> 'Da li dxapa' le'e, xúgute da caní xelaca na nédxudxa gate quebe ne xelate bęnneache zaj zra' lu zra na'a zra.

<sup>33</sup> Xabáa, ne xęzr la xu weledę cheę na, san dizra' chia' quebe te cheę na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da calęla ca' ca naca xel-la dxagu xrata, ne xel-la dxezuzre, ne xel-la dxezá lazre'

da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na',

<sup>35</sup> ne chee quebe gaca na ca tu da quele na le'e, lawe' da caní gaca chee xúgute benne' zaj zre'e lu xezr la xu nigá.

<sup>36</sup> Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuinale du lázrele lawa' neda', Benne' Gulje' Bénneache.

<sup>37</sup> Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo.

<sup>38</sup> Xúgute benne' ca' belezrine' lu xudau' na' xugu' zila chee xelenne' chee Jesús.

## 22

### *Dxelune' tuze dizra' xejele' Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' benneache chee' lu xezr la xu Egipto.

<sup>2</sup> Lu zra ca' benne' xíchaje' ca' chee bxruze ca', ne benne' ca' dxuluxúzajle'e da nadxixruij bea na belíajé' ájala xelune' xelútié' Jesús bagácheze, lawe' da dxelezebe' da xelún benne' zan ca'.

<sup>3</sup> Nadxa guxú'u Satanás da xriwe' lu lázrdau Judas, bennea' cá'anqueze le' Iscariote. Naque' tu benne' chazrinnu gubáz ca' chee Jesús.

<sup>4</sup> Judas nigá guxíaje' xeajchálajlene' benne' xíchaje' ca' chee bxruze ca', ne benne' blau ca' chee xudau', na' bchálajlene' benne' ca' ájala gune' gudéé' Jesús lu na' benne' ca'.

<sup>5</sup> Benne' caní gulebene', na' gulechebe lazre' xulunézruje' le' dumí.

<sup>6</sup> Judas na' guzú' lu ne'e dumí na', na' guzú lawe' dxíajé' ájala gune' gudéé' Jesús lu na' benne' ca' gate quebe nu chilá' benne'.

### *Da dxágudxu chee cheajsá lazrdxu ca gute Xránadxu*

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútié' zrila'dau' ca' chee Laní Pascua.

<sup>8</sup> Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

<sup>9</sup> Benne' caní buluchebe' Le':

—¿Ga dxaca lazru' gucuézentu' na?

<sup>10</sup> Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dxe'e nisa. Le chjácálene' xu'u naga xezrine',

<sup>11</sup> na' le xe xrane xu'u na': "Benne' Wesede dxé'e lue': ¿Ga zua xu'u naga gágulena' benne' ca' dxusédea' zrila'dau' chee Laní Pascua?"

<sup>12</sup> Nadxa gulé'ene' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

<sup>13</sup> Benne' ca' xjaque', na' belezrélene' xúgute ca da ba guzre Jesús le', na' bulucuezé' da xelawe' chee Laní Pascua.

<sup>14</sup> Gate bzrin zra, Jesús ne benne' ca' dxusédene' gulezré'e ga xelawe' na.

<sup>15</sup> Nadxa gunná Jesús, dxé'e benne' ca':

—Guzá lázrele'a gágulena' le'e chee Laní Pascua nigá nédxudxa ca quebe ne gatia'.

<sup>16</sup> Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup> Nadxa guqué'e tu zruágadau', na' guzre' Dios: “Xcalenu”, na' gunné':

—Le xi'aj late' weaj tu tule le'e.

<sup>18</sup> Dxapa' le'e québedxa xi'aja' chee nisa uva caní cadxa xida xel-la dxenná bea chee Dios.

<sup>19</sup> Nadxa guqué'e xeta xtila, ne guzre' Dios: “Xcalenu”, na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz chee. Le gun da nigá chee cheajsá lázrele chia' neda'.

<sup>20</sup> Cá'anqueze bene' nen zruágadau' na' ca gudé gulawe' xrche', na' gunné':

—Zruágadau' nigá zéaje na xel-la wezría cube, da guzúa' chúchua' nen dxen chia', da gulálaja' waláz chee.

<sup>21</sup> Na'a, zrua na' benne' biu na' tu zren nen na'a ga zua da dxágadxu, bénnea' gudé' neda' lu na' benne' dxeledábage' neda'.

<sup>22</sup> Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gudé' neda' chee gatia'.

<sup>23</sup> Nadxa benne' ca' dxuséde Jesús gulezú lawe' dxuluchebe ljwezre' nu na' gudé Jesús.

### *Dxuluchebe ljwezre' nule' gácadxe' blau*

<sup>24</sup> Cá'anqueze buluchebe ljwezre' nule' gácadxe' benne' blau.

<sup>25</sup> Na' Jesús guzre' le':

—Benne' wenna' bea chee xezr la xu ca' dxelenná bé'eng' bénneache ca xrane bénneache ca', na' benne' xíchaje chee benne' ca' dxelenné' zaj naque' benne' dxelune' da chawe' chee benneáche ca'.

<sup>26</sup> Le'e quebe dxal-la' gunle ca'. Benne' nácadxé' blau ládujla le'e dxal-la' gaque' ca' benne' nácadxé' cuide', na' benne' dxenná be'e dxal-la' gaque' ca' benne' nada'u chee ljwezre' ca'.

<sup>27</sup> ¿Nu nácadxá blau, benne' dxe'e dxawe', che benne' dxudé' xel-la wagu? ¿Quebe naca bénnea' dxe'e dxawe'? Neda' zúalena' le'e ca tu benne' dxune' zrin chee.

<sup>28</sup> Le'e guzúalequezele neda' gate neda' guzú guzaca'.

<sup>29</sup> Chee le na' dxunna' le'e lataj nna beale, ca ben Xra', benne' na neda',

<sup>30</sup> chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinnu cue' xrtia Israel.

### *Jesús dxenné' Pedro nne' quebe núbbe'e Le'* (Mt. 26.31-35; Mr. 14.27-31; Jn. 13.36-38)

<sup>31</sup> Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca dxun tu benne' dxudxixre dxutul-le' xizre za.

<sup>32</sup> Neda' guta' xueda' Xra' gácalene' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee xelezé chache'.

<sup>33</sup> Na' gunná Simón, guzre' Jesús:

—Xran, ba zúaqueza' sá'lena' Lue' lizre xia, ne chee gátequeza' nen Lue'.

<sup>34</sup> Jesús guzre' le':

—Pedro, dxapa' lue', ná'atela ne dédxela cuezre xjeaj, lue' wannáu' chunna lasa quebe núnbe'u neda'.

*Ba zua gagu zra si saca Jesús*

<sup>35</sup> Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zréale, ¿bxájrjele bi da guchínnele?

Benne' ca' belexechebe':

—Gutu bi de.

<sup>36</sup> Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchínene' lu wedil-la, dxal-la' xexutie' xicha chee', na' si'e xia chee'.

<sup>37</sup> Dxapa' le'e dxal-la' gaca chia' néda'queza' ca da naxúaj na lu xiche chee' Dios, dxenné': "Gubabe' ca tu benne' wēn da zrinnaĵ." Xúgute da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de chupa xia.

Le' bechebe':

—Da naze.

*Jesús dxuchálajlene' Dios naga nazí le na Getsemaní*

(Mt. 26.36-46; Mr. 14.32-42)

<sup>39</sup> Nadxa bedxúaj Jesús xu'u na', na' ca dxúnqueze', guxíaje' lu Xi'a Xaga Olivo, na' benne' ca' dxusédene' xjácálene' Le'.

<sup>40</sup> Gate belezrine' na', Jesús guzre' le':

—Le naba lau Dios chee' quebe seque da xriwe' cu'u na le'e lu dul-la.

<sup>41</sup> Nadxa Jesús guzé'e ca tu legu'una xiaj naga zaj zra' benne' ca', na' bzu zribe' bchálajlene' Dios.

<sup>42</sup> Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz chee' xabáa, na' btipe' lazre' Jesús.

<sup>44</sup> Gate ne dxezácale'e, du lazre' bchálajlene' Dios, na' xesa chee' guca na ca dxen dxelezzrún na lu xu.

<sup>45</sup> Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédene', na' blé'ene' dxelase benne' ca', lu xel-la dxelexewi'ine lazre' chee'.

<sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee' quebe seque da xriwe' cu'u na le'e lu dul-la.

*Dxelele' Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu' ca', ze'e zria lawe' lau benne' ca', na' gubigue' cuita Jesús chee' gunupe' Le'.

<sup>48</sup> Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee' gudéu' neda' lu na' benne' dxeledábague' neda'?

<sup>49</sup> Benne' ca' zrálene' Jesús, ca belelé'ene' ca da dxaca, na' buluchebe' Jesús:

—Xran, ¿guchínentu' xia?



50 Tu benne' ca' dxedále Jesús bene' zi' tu bi wen zrin chee bxruze blau, guchugue' nágabe' zua xabela.

51 Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexunge' na.

52 Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xelech'é Jesús, gunné':

—¿Blale le'e nen xia, ne xaga chee quélale neda' ca dxélale tu gubán?

53 Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

*Pedro dxenné' quebe númbe'e Jesús*

*(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

54 Nadxa gulelé' Jesús, na' guleché'e Le' lizre bxruze blau, na' Pedro ziaje' nawe' Le' zítu'la.

55 Na' gulebé'e guléchaje' xi' na', na' Pedro gudxé'e ládujla benne' ca'.

56 Nadxa tu nu'ula wen zrin, gate blé'ene' Pedro dxe'e dxu'a xi' na', guzúe' dxenné'e le', na' gunné':

—Cá'anqueze benne' nigá guque' tuze len Jesús.

57 Pedro gunné':

—Nu'ula, quebe númbe'a bénnea'.

58 Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

59 Xelate gudé na', xetú benne' ben chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

60 Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajte Pedro ca', na' gudxezre xjeaj.

61 Nadxa Xránadxu bzechaj xíchaje', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atela ne dédxela cuezre xjeaj, lue' wannáu' chunna lasa quebe númbe'u neda'.”

62 Nadxa bedxúaj Pedro, na' gudxezre xáche'le'e.

*Dxelún le' chee Jesús*

*(Mt. 26.67-68; Mr. 14.65)*

63 Na' benne' ca' zaj nuxre' Jesús belún le' chee', na' buluzalje' Le'.

64 Bulucache' lawe', na' belegape' xrague', dxelé'e Le':

—Gunné xa'a nu be Lue'.

65 Da zan da gulenné', dxelenné' schanni' chee Jesús.

*Jesús dxezrine' lau benne' ca' chee xu'u lawe' blau chee judío ca'*

*(Mt. 26.59-66; Mr. 14.55-64; Jn. 18.19-24)*

66 Gate naca te zra, na' belezraga benne' gula sina ca' chee judío ca', ne benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchebe' Le':

67 —Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajle,

68 na' che bi guchęba' le'e, quebe xechębele chia', ne quebe gusanle neda'.

69 Ná'atęla neda', Benne' Gulję' Bęnneache, cue'a chalá'a xabęla cheę Dios nape' dutę xel-la waca.

70 Nadxa xųgutę' buluchębe' Lę':

—¿Nacu' Lue' Zri'ine Dios?

Jesús bechębe':

—Naca', ca dxennáquezle le'e.

71 Nadxa gulenná benne' ca':

—¿Núzradxa chínnedxu bi nņę' cheę benne' nigá? Dxí'unqueze ba bęnedxu ca da gunnáqueze'.

## 23

### *Jesús dxezrinę' lau Pilato*

(Mt. 27.1-2, 11-14; Mr. 15.1-5; Jn. 18.28-38)

1 Nadxa gulasa xųgutę benne' dxuluchi'e, na' gulechę'e Jesús lau Pilato, benne' dxenná be'e waláz cheę Roma.

2 Na' gulezú lawę' dxelagu zrię' Jesús, dxelennę':

—Ble'entu' benne' nigá dxegú'u xel-le' bęnneache cheę xeledábague' xu'u lawe'. Dxennę' quebe dxal-la' quízrujntu' da dxuchizruj César, benne' Roma, na' cá'aqueze dxennę' naque' Cristo, Benne' Wenná Bea.

3 Nadxa Pilato bchębe' Jesús:

—¿Nacu' Lue' Wenná Bea cheę judío ca'?

Na' bechębe Jesús:

—Ca' naca na, ca ba gunnáu' lue'.

4 Nadxa gunná Pilato, guzre' benne' xíchaję ca' cheę bxruze ca', ne bęnneache ca':

—Quebe bi da zrinnaj dxezrelda' nun benne' nigá.

5 Benne' ca' belún chųchue' dizra' cheę', gulennę':

—Dxegu'u xel-le' xųgutę benne' zaj zre'e xęzre ca' zaj nababa Judea cheę xeledábague' xu'u lawe'. Guzú lawę' dxune' na naga nababa Galilea, na' na'a dxune' na nigá.

### *Jesús dxezrinę' lau Herodes*

6 Gate ben Pilato da nigá, na' bchębe' che naca Jesús benne' Galilea.

7 Gate gulę'e lę' naca Jesús benne' Galilea, na' Pilato gusél-le' Lę' lau Herodes, benne' dxenná be'e xęzre ca' zaj nababa Galilea, na' lu zra na' zuę' Jerusalén.

8 Gate ble'e Herodes Jesús, gubélé'ęne', lawe' da bátatę dxaca lazre' lé'ęne' Lę', lawe' da ba benne' dxuluchalaj bęnneache cheę Jesús, na' guca lazre' lé'ęne' gun Jesús tu xel-la waca da za xabáa.

9 Da zantę da bchębe' Jesús, na' Lę' quebe bi bechębe'.

10 Zráqueze benne' xíchaję ca' cheę bxruze ca' na', nen benne' ca' dxulux-uzájle'e da nadxixruj bea na, na' belún chųchue' dizra' cheę' da dxelagu zria Jesús.

11 Nadxa Herodes, ne benne' cheę' ca' dxjaque' wedil-la buluzų'e Lę' chalá'ala, na' cheę xelún lę' cheę', bulugácue' Lę' ladxe' bzawe ca naca zra tu benne' wenná bea. Nadxa Herodes besel-le' Lę' lau Pilato.

12 Lu zra na' Pilato, ne Herodes belexaque' tuze, lawe' da belezrá'a ljwezre' nédxutę.

*Dxelechugue' chee Jesús gatie'*  
(Mt. 27.15-26; Mr. 15.6-15; Jn. 18.39—19.16)

<sup>13</sup> Nadxa Pilato bchague' benne' xíchaję ca' chee bxruze ca', ne benne' xu'u lawe' ca',

<sup>14</sup> na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bėnneache chee xeledábage' xu'u lawe'. Neda' ba bcheba Le' laule le'e, na' quebe bi da zrinnaj dxezréleda' nune' ca' naca da dxennale chee'.

<sup>15</sup> Cá'anqueze Herodes quebe bi da zrinnaj bzrélene' da nun Jesús, na' budée' Le' launtu'. Quebe bi ne gune' chee chuga' chee' gatie'.

<sup>16</sup> Gudéa' Le' xel-la zi', na' gusanqueza' Le'.

<sup>17</sup> Dxácatę dxaca laní na', Pilato dxal-la' gune' tu da dxelezaca ba lazre' bėnneache, gusanę' tu benne' xu'e lizre xia.

<sup>18</sup> Xúgute' benne' ca' gulezú lawę' dxelebezre xę'e, dxelenné':

—jGate benne' nigá! jBsan Barrabás na'!

<sup>19</sup> Barrabás nigá gulegú'ę le' lizre xia lawe' da gudábage' xu'u lawe', na' betie' tu benne'.

<sup>20</sup> Pilato guca lazre' gusanę' Jesús, na' bchálajlęne' benne' ca' xetú.

<sup>21</sup> Na' benne' ca' gulebezre xę'e zízrajdxá, dxelenné':

—jBde'ę xaga béguaj! jBde'ę xaga béguaj!

<sup>22</sup> Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatie'. Gudéa' Le' xel-la zi', na' te na' gusana' Le'.

<sup>23</sup> Na' benne' ca' belún chúchue' dizra' chee' chee te'ę xaga béguaj, ne gulebezre xá'atie', nen benne' xíchaję ca' chee bxruze ca', cadxa guca ca da gulaca lazre'.

<sup>24</sup> Nadxa Pilato guchugue' chee Jesús gaca chee' ca da dxelaca lazre' benne' ca'.

<sup>25</sup> Na' bsanę' bėnnea' belenabę', xu'e lizre xia lawe' da gudábage' xu'u lawe', ne betie' tu benne', na' bdee' Jesús chee gaca chee' ca dxelaca lazre' benne' ca'.

*Dxuludé'ę Jesús xaga béguaj*  
(Mt. 27.32-44; Mr. 15.21-32; Jn. 19.17-27)

<sup>26</sup> Gate zjaque' zaj naché'ę Jesús chee xuludé'ę Le' xaga béguaj, na' gulele' tu benne' Cirene, le' Simón, zezé'ę le'ę xixre', na' bulugu'ę le' xaga béguaj chee Jesús, na' zéaję cuzru Jesús na'.

<sup>27</sup> Na' xjácale Le' benne' zante, ne nu'ula zan dxelebezre', na' dxelebezre xache' ne chee da dxaca chee Jesús.

<sup>28</sup> Nadxa Jesús gunné'ę nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee zrí'inele,

<sup>29</sup> lawe' da zrin zra gate xelenné': “Ba neza zren naca na chee nu'ula wizre, ne nu'ula ca' cabata' gulezúę' zi'i, ne nu'ula ca' cabata' bulugazre' bidau'.”

<sup>30</sup> Lu zra na' xelezú lau bėnneache xelé'ę xi'a ca': “Le gugacu netu' xu.” Na' xelé'ę xí'adu ca': “Le gucache netu'.”

<sup>31</sup> Che dxelunę' da caní chia' neda', naca' ca tu xaga ban, ¿gázradxa xelunę' chee le'e, nácale ca xaga bizre ca'?

<sup>32</sup> Cá'anqueze guleché'ę chupa benne' węn da zrinnaj chee xelútię' le' tu zren nen Jesús.

33 Gate belezrine' lataj na' nazí le na, Calavera, da zéaje na, Xi'a Zrita Xíchajdxu, na' buludé'ē Jesús xaga béguaj, ne cá'aqueze belune' chee benne' wen da zrinnaj ca', tue' cuite' xabela, ne xetúe' cuite' xéglala.

34 Ca dxuludé'ē Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee xezezí'ē late' weaj zra lana Jesús.

35 Benne' ca' zaj zré'ē na' dxelenné'ē, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bénnea' Gucá'a Dios.

36 Cá'aqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj.

37 Gulé'ē Le':

—Che lue' nacu' Wenná Bea chee judío ca', bselá cuinu'.

38 Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

39 Tu benne' wen da zrinnaj, bénnea' de'ē xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselate' netu'.

40 Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezácaquezu' ca da gulechugue' chee' Le'.

41 Dxi'u dxezácadxu ca da dxál-la' queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

42 Nadxa gunné':

—Jesús, xeajsá lazre' neda' gate su lau' nna be'u.

43 Na' bechebe Jesús:

—Da li dxapa' lue', ná'atela súalequezu' neda' lu lataj chawe' chee Dios.

### *Ca guca gate gute Jesús*

*(Mt. 27.45-56; Mr. 15.33-41; Jn. 19.28-30)*

44 Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna.

45 Gubizra guchul-la na, na' ladxe' zē lu xudau' bdxuaj na chúpala.

46 Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutiē'.

47 Gate benne' dxenná bé'ene' benne' dxjaque' wedil-la blé'ene' ca da guca, na' be lá'ane' Dios, gunné':

—Da li, benne' nigá quebe bi da zrinnaj bene'.

48 Xúgutē benne' ca' zaj zré'ē na', gate belelé'ene' ca da guca, na' besía'que' na', dxelu'ē lachu'ē.

49 Xúgutē benne' ca' zaj núnbe'ē Jesús, ne nu'ula ca' xjácane' Jesús gate bezé'ē Galilea, belexegá'ane' zítu'la dxelenné'ē da caní.

### *Dxulucache' Jesús*

*(Mt. 27.57-61; Mr. 15.42-47; Jn. 19.38-42)*

<sup>50</sup> Zua tu benne' chawe' ne xrlátaje le' José, benne' xezre Arimatea chee xezre ca' zaj nababa Judea. Nababe' xu'u lawe' blau chee judío ca'.

<sup>51</sup> José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'.

<sup>52</sup> Benne' nigá guxiáje' xeajchálajlene' Pilato, na' gunabe' latja gucache' Jesús.

<sup>53</sup> Ca bexuzre buluxulétaje' Le' xaga béguaj, na' buluxuchele' Le' tu ladxe', na' gulu'e Le' tu lu xedxu ba, da ba gudene' tu le'e xi'a xiaj, naga quebe nu ne gáchequeze.

<sup>54</sup> Naca na zra dxulucueze' chee zra dxulupá'ane', da ba zua su lau na.

<sup>55</sup> Nu'ula ca' xjácálene' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xedxu ba.

<sup>56</sup> Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

## 24

### *Ca guca gate bebán Jesús*

*(Mt. 28.1-10; Mr. 16.1-8; Jn. 20.1-10)*

<sup>1</sup> Zra nedxu chee da gazre zra, nu'ula ca' belezrine' dxu'a ba na' dxani'sise', zaj nu'e ca naca da ca' dxelelál zixre da bulucueze', na' xebal-la nu'ula xjácálene' le'.

<sup>2</sup> Gate belezrine' na', belelé'ene' xiaj da guduse dxu'a ba na', québedxa naduse na naga guduse na.

<sup>3</sup> Belú'e lu ba na', san quebe belexezrelne' Xránadxu Jesús na'.

<sup>4</sup> Na' belezrébele'e, ne quebe zaj nézene' ájala xelune', na' belelé'ene' chupa benne' zaj ze' cuite', zaj nacue' zra lané' dxácatite na.

<sup>5</sup> Nu'ula ca' belezúe' sudxú'ala lu xu, ne belezrébele'e. Na' benne' ca' gulé'e le':

—¿Bizr chee na' dxexílajle le'e tu benne' naca bané' lówela benne' gate?

<sup>6</sup> Quebe zué' nigá, lawe' da ba bebane'. Le gusá lázre' da bchálajlene' le'e gate ne zué' Galilea.

<sup>7</sup> Gunné': "Benne' Gulje' Bénneache dxal-la' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'."

<sup>8</sup> Nadxa nu'ula ca' xeajlesá lazre' ca naca da gunná Jesús.

<sup>9</sup> Ca gudé besía'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee Jesús, ne xúgute' benne' ca' xezica, ca naca da guca na'.

<sup>10</sup> Nu'ula ca' xjaque' xeajlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'.

<sup>11</sup> Benne' gubáz ca' guléquene' da xálaze dxelenná nu'ula caní, na' quebe guléajle'e chee'.

<sup>12</sup> Nadxa bdxuaj Pedro, zeaj chégü'e dxu'a ba na', na' gate guné'e lu ba na', blé'ene' ladxe' da bedxela Jesús xu'u na chalá'ala, na' bezé'e zexiáje' xu'u naga guz'é'e, dxexebánene' ca naca da guca.

### *Da guca lu neza da zeaj xezre Emaús*

*(Mr. 16.12-13)*

<sup>13</sup> Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén.

14 Zjaque' dxuluchálaje' ca naca da guca lu zra ca'.

15 Dxácate' na' dxuluchálaje' caní, na' Jesús ná'queze gubigue' cuita benne' ca', na' guzú lawe' zéajlene' le'.

16 Quebe belexúnbe'e Jesús, lawe' da guzúa tu da guxúa na xiaj lau benne' ca'.

17 Nadxa bchebe Jesús benne' ca':

—¿Bizra da na' dxuchálaje' ljwézrele dxácate' xu'ule neza? ¿Bizr chee' na' zale dxewí'ine lázrele?

18 Tu benne' ca' le' Cleofas bechebe':

—Xúgute' benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

19 Nadxa Le' guzre' benne' ca':

—¿Bizra guca na'?

Gul'é'e Le':

—Da guca chee' Jesús, benne' Nazaret. Guque' tu benne' bchálaje' waláz chee' Dios, na' xel-la waca zren ca' bene', ne bchálaje' dizra' lau Dios, ne lau xúgute' béneache.

20 Na' benne' xíchaje' ca' chee' bxruze ca', ne benne' xu'u lawe' cheentu' ca' buludé'e Le' chee' gulechugue' chee' gati'e, na' buludé'e Le' xaga béguaj.

21 Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'.

22 Bal-la nu'ula ca' ládujla netu' buluzúaqueze' netu' lu da stebe, lawe' da xjaque' dxani'sise' dxu'a ba chee' na',

23 na' gate quebe belexezrelne' Le', na' belexelé'e naga zúantu', ne gulenné' belelé'eng' chupa gubáz chee' xabáa ca' bululé'e lawe' nu'ula ca', na' gulé'e le' nabán Jesús.

24 Nadxa bal-la benne' ljwézrentu' ca' xjaque' dxu'a ba na', na' belelé'eng' cáteze na' gulenná nu'ula ca', san quebe belelé'eng' Jesús.

25 Nadxa gunná Jesús:

—Le'e quebe dxéajni'ile, na' ne naca zide' lázrdaule chee' quebe chéajlele xúgute' da gulenná benne' ca' buluchálaje' waláz chee' Dios.

26 ¿Quebe dxal-la' saca Cristo da caní nédxudxa ca xegá'ane' szren?

27 Nadxa guzú lawe' dxuzéajni'ine' benne' ca' ca naca xúgute' da naxúaj lu xiche chee' Dios naga dxuchalaj na chee' Le'. Guzú lawe' lu xiche ca' chee' Moisés, na' ne zéajdxaqueze na lu xiche ca' chee' benne' ca' buluchálaje' waláz chee' Dios.

28 Gate belezrine' lu xezre naga zjaque', Jesús bene' ca benne' zeajteze' xu'e neza.

29 Na' benne' ca' buluxucá'ane' Le' xadía, dxelenné':

—Begá'analé netu', lawe' da ba zeaj dxezré', ne ba dxe' xrínnequeze na'a.

Nadxa Jesús guxú'ulene' benne' ca'.

30 Gate na' dxé'lene' le' dxelawe', guqué'e xeta xtila, ne bzúzruje' na, na' guzre' Dios "Xcalenu'", ne bnézruje' na benne' ca'.

31 La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'.

32 Na' gulé' ljwezre':

—¿Quebe guzúa xel-la dxebe lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee' Dios?

33 Nadxa, ne québedxa gulezrene', belexegu'e neza, zeajxaque' Jerusalén, naga belelé'eng' zaj nazraga benne' chinéaj gubáz ca', ne benne' ljwezre' ca'.

34 Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

35 Nadxa benne' chupa ca' buluzenne' le' ca' naca da guca la neza, ne ca belexúnbe'e Jesús gate bzúzruje' xeta xtila na'.

*Jesús dxulé'e lawe' benne' ca' xjácalene' Le'*  
(Mt. 28.16-20; Mr. 16.14-18; Jn. 20.19-23)

36 Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

37 Na' benne' ca' belexruse', ne belezrébele'e. Gulé'quene' dxelelé'ene' bxinne dxela.

38 Na' Jesús guzre' benne' ca':

—¿Bizr chee' na' dxezrébele? ¿Bizr chee' na' dxaca chupa lázrele?

39 Le na' na'a caní, ne le na' ni'a. Neda'queza' na'. Le gutá neda', ne le guxúe xque neda'. Tu bxinne dxela quebe napa na' bela' zrita, ca' dxelé'ele le'e napa' neda'.

40 Ca dxe'e benne' ca' da nigá, na' blé'ene' le' ne'e, ne ni'e.

41 Benne' ca' québequeze dxelé'ajle'e chee' lawe' da dxelebéle'ene', ne dxelxebánele'ene', na' guzre Jesús le':

—¿De late' da gawa' nigá?

42 Nadxa bulunézruje' Le' late' bela' guzrúa xi', ne late' da zixre che bézudau',

43 na' gucá'a Jesús da ca', ne gudawe' na' lau benne' ca'.

44 Nadxa guzre' benne' ca':

—Da ba guca chia' naca na' ca da gucha' le'e gate ne zúale'queza' le'e, gunnéa' dxal-la' gaca li ca' naca xúgute' da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee' benne' ca' buluchálajte' waláz chee' Dios.

45 Nadxa bzéajni'ing' benne' ca' ca' da naxúaj lu xiche chee' Dios,

46 na' guzre' benne' ca':

—Caní naxúaj na' dxal-la' gate Cristo, na' zra guxunne' zra dxal-la' xebane' ládujla benne' gate ca',

47 na' lu La Le' dxal-la' xuluchalaj bénneache lau xúgute' xezr la xu ca'. Su lau gunle na' lu xezre Jerusalén, xe'e bénneache dxal-la' xelxebí'i lazre' chee' gunite lau Dios dul-la' zaj nabaga benne' ca'.

48 Le'e nácale benne' xelexechebe' da caní.

49 ¡Le nna'xque! Neda' sel-la' chee' ca' da guchebe lazre' Xra'. Le xegá'ana nigá lu xezre Jerusalén, cadxa si'le xel-la' waca da za xabáa.

*Jesús dxexegüéne' xabáa*  
(Mr. 16.19-20)

50 Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee' benne' ca'.

51 Ne dxúntee' ca', na' bezé'e naga zaj zra' benne' ca', begüéne' zexíaje' xabáa.

52 Ca beuzre belúe lá'ane' Le', besía'que' zeajxaque' Jerusalén lu duté' xel-la' dxelebé,

53 na' gulezráqueze' chale'aj xudau' dxelúe lá'ane' Dios. Ca' naca na.

## DIZRA' CHAWE' CA NACA CHEE JESUCRISTO DA BZUAJ SAN JUAN

*Bénnea' le' Xrtizra' Dios dxaque' bénneache*

<sup>1</sup> Gate guzú lau zua xúgutę da de, ba zúaqueze Bénnea' le' Xrtizra' Dios, da zéaje na Benne' naque' dutę da nácaqueze Dios, na' Bénnea' le' Xrtizra' Dios zúalęņę Dios, ne nácaqueze' Dios.

<sup>2</sup> Nédxudautę Benne' nigá zúalęņę' Dios.

<sup>3</sup> Lu na' Benne' nigá ben Dios xúgutę da de. Quebe bi de da quebe nun Le'.

<sup>4</sup> Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache cheę xelaca banę'.

<sup>5</sup> Xel-la' naxaní' nigá dxusení na lu da chul-la cheę dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

<sup>6</sup> Guzúa tu benne' le' Juan, gusel-la Dios benne'a'.

<sup>7</sup> Benne' nigá blę'e cheę bchálaje' ca naca cheę Bénnea' naque' xel-la' naxaní' nigá, cheę xeléajle xúgutę bénneache cheę Bénnea' ne cheę da dxenné'.

<sup>8</sup> Juan nigá quebe naque' xel-la' naxaní' na'. Blę'e cheę bchálaje' ca naca cheę Bénnea' naque' xel-la' naxaní' nigá.

<sup>9</sup> Xel-la' naxaní' li, da dxusení na lu xichaj lázrdau xúgutę bénneache ba za' la' na lu xęzr la xu nigá.

<sup>10</sup> Bénnea' naque' Xrtizra' Dios zue' lu xęzr la xu nigá, na' lácala ben Dios xęzr la xu lu na' Bénnea', bénneache zaj zre'e lu xęzr la xu quebe belexxúnbe'e Le'.

<sup>11</sup> Blę'e naga zua da naca cheę', na' benne' lazrię' ca' quebe gulezí' lu ne'e Le'.

<sup>12</sup> Benne' ca' gulezí' lu ne'e Le', ne guléajle'e cheę', be'e benne' caní lataj xelaque' bi ca' cheę Dios.

<sup>13</sup> Benne' caní québedxa zaj naque' ca zri'ine bénneacheze, bi ca' dxelálajbe' ne cheę bénneache, u ne cheę da dxezá lazre' tu benne'. Benne' caní zaj naque' bi ca' cheę Dios ná'queze.

<sup>14</sup> Bénnea' naque' Xrtizra' Dios gúlaje' ca tu bénneache, na' guzúę' ládujla dxi'u, zaj zúalę xel-la' zri'i lazre', ne da li Le'. Blę'entu' ca naca xel-la' szren cheę, tu xel-la' szren da nunezruj Xradxu Dios cheę Zri'ine' tu licha'.

<sup>15</sup> Juan bchálaje' ca naca cheę Bénnea', gunné':

—Benne' nigá naque' Bénnea' bchálaja' neda' cheę' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxutę ca neda'.

<sup>16</sup> Xúgutędxu ba guzidxu xel-la' zri'i lazre' cheę' da dxúnnaqueze Le'.

<sup>17</sup> Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo.

<sup>18</sup> Netú benne' quebe ne lé'engę' Dios. Zri'ine' tu licha', bi nazrí'ite lazre', benne' nigá guque' tuz ca nácaqueze Xre'.

*Juan, benne' bchue' bénneache nisa, dxexechebe' cheę Jesús  
(Mt. 3.11-12; Mr. 1.7-8; Lc. 3.15-17)*



19 Benne' xíchaje ca' chee judío ca', benne' zaj zře'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchębe xánnie' le' nu naque'.

20 Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

21 Nadxa buluchębe' le':

—¿Nuzra nacu'? ¿Nacu' Elías, bėnnea' bchálaje' waláz chee Dios?

Bechebe Juan:

—Cabí.

Na' buluchębequeze' le':

—¿Nacu' bėnnea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

22 Nadxa buluchębedxaqueze' le':

—¿Nuzra nacu'? Dxun na ba xen gata' bi xechębentu' chee benne' gulesel-le' netu'. ¿Bi dxennáquezu' nu nacu'?

23 Juan bechebe':

—Neda' naca' bėnnea' naxúaj na ca naca chee' lu xiche chee Dios, da dxenná: Wen chi'i tu benne' dxebezre xę'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bėnnea' bchalaje' waláz chee Dios.

24 Benne' xudau' fariseo ca' gulesel-le' benne' caní chee cheajlechálajlene' Juan.

25 Le' buluchębe' le':

—Che lue' quebe nacu' Cristo, ne Elías, ne bėnnea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bėnneache nisa?

26 Juan guzre' benne' ca':

—Neda' dxuchúa' bėnneache nisa lu nísaze. Zua tu benne' ládujla le'e quebe nézele ca szren naque'.

27 Benne' nigá zę'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrele' da xu'u ni'e.

28 Xúgutę da caní guca na lu zęzr la xu chee xęzre Betábara, da zua na chalá'a xęgu Jordán naga dxalaj gubizra, naga zua Juan dxuchúe' bėnneache nisa.

*Jesús naque' Zříla'dau' chee Dios, bę dxelutie' lau Dios ne chee xtul-le'*

29 Zra xula ble'e Juan dxęzrín Jesús naga zue', na' gunné':

—¿Le nna'xque! Benne' nigá naque' Zříla'dau' chee Dios, cue' dul-la zaj nabaga bėnneache.

30 Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudaute ca neda'.

31 Néda'queza' quebe gunezda' nu naque'. Bla'x dxuchúa' bėnneache nisa chee xeleneze xęzre Israel nu Benne' naca Le'.

32 Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analęe' Benne' nigá.

33 Neda' quebe ne nezda' nu naque'. Dios na' nasel-le' neda' chee guchúa' bėnneache nisa, Le' guzre' neda': "Gate le'enu' Be' Lá'azxa xétaje' xegá'analęe'

tu benne', Benne' nigá guñe' da zéaje xel-la' dxedxúa nisa, guzúe' Be' Lá'azxa lu xichaj lázrdaule."

<sup>34</sup> Na'a ba ble'eda' guca da nigá, ne dxexecheba' nácaqueze Benne' nigá Zri'ine Dios.

*Benne' nedxu ca' dxusede Jesús*

<sup>35</sup> Zra xula zúaqueze na' Juan nen chupa benne' ca' dxusedene'.

<sup>36</sup> Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee' Dios, bia gáteba' ne chee dul-la nabágadxu!

<sup>37</sup> Dxúpaté benne' ca' dxusede Juan belenne' ca da gunné', na' xjácálene' Jesús.

<sup>38</sup> Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexilajle?

Benne' caní gulé'e Jesús:

—Benne' Wesede, ¿gazra zu'?

<sup>39</sup> Jesús bechebe':

—Le da nna'le.

Nadxa xjácálene' Jesús, ne belelé'ene' naga zue', na' belexegá'analene' Le' zra na' lawe' da bache zeaj du dxedá' tapa.

<sup>40</sup> Tu benne' chupa ca', benne' belenne' ca da gunná Juan, ne xjácálene' Jesús, naque' Andrés, benne' biche Simón Pedro.

<sup>41</sup> Andrés nigá la guxíajte' xeajdíajle' bi biche' Simón, na' guzre' le':

—Ba bezrélentu' Mesías. (Dizra' nigá zéaje na Cristo, Bénnea' guchebe lazre' Dios sel-le'.)

<sup>42</sup> Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

*Jesús dxenné' Felipe ne Natanael*

<sup>43</sup> Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

<sup>44</sup> Felipe nigá naque' benne' xezre Betsaida, da naca na lazre Andrés, ne Pedro.

<sup>45</sup> Felipe guxíajle' xeajdíajle' Natanael, na' guzre' le':

—Ba bezrélentu' Bénnea' bzuaj Moisés chee' lu xiche naga zaj naxúaj da nadxixruj bea na, ne cá'aqueze chee' Benne' nigá buluzúaj benne' ca' buluchálajle' waláz chee' Dios. Benne' nigá naque' Jesús, zri'ine José, tu benne' xezre Nazaret.

<sup>46</sup> Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

<sup>47</sup> Gate ble'e Jesús za Natanael naga zue', gunné':

—Nigá za' tu benne' naca xánnie' benne' Israel, benne' dxenné'queze' da dxéquene'.

<sup>48</sup> Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

<sup>49</sup> Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Bea cheentu', benne' Israel.

<sup>50</sup> Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá.

<sup>51</sup> Da li dxapa' le'e, walé'equezle le'e naxalaj xabáa, na' gubáz chee xabáa ca' chee Dios dxelétaje', ne dxelexegüene' naga zua neda', Benne' Gulje' Bénneache.

## 2

### *Dxaca laní chee wechaga na' lu xezre Caná*

<sup>1</sup> Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zu'e' na',

<sup>2</sup> na' zua nu gunné Jesús, ne benne' ca' dxusédenē' lu laní na'.

<sup>3</sup> Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aje'.

<sup>4</sup> Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

<sup>5</sup> Xrne'e guzre' benne' wen zrin ca':

—Le gun ca naca da xe'e le'e.

<sup>6</sup> Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxé'e nisa.

<sup>7</sup> Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'.

<sup>8</sup> Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'.

<sup>9</sup> Bénnea' zu'e' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zu'e' dxu'a ga dxelawe' gunné' benne' wechaga na',

<sup>10</sup> na' guzre' le':

—Xúgutē benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na' na'a.

<sup>11</sup> Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-la' szren chee', na' benne' ca' dxusédenē' guléajle'e chee'.

<sup>12</sup> Gudé na' Jesús bezé'e zexíaje' xezre Capernaum, zéajle xrne'e Le' nen benne' biche' ca', ne benne' ca' dxusédenē'. Na' gulezúe' na' zane' zra.

*Jesús dxucá'ana chawe' chale'aj xudau'*  
(Mt. 21.12-13; Mr. 11.15-18; Lc. 19.45-46)

13 Na' Jesús guxiájə' xəzre Jerusalén lawe' da ba za Laní Pascua gate benne' judío ca' dxulusá lazrə' ca bən Dios, bebéajə' xra xrtawə' ca' lu xəzr la xu Egipto.

14 Lu xəzre Jerusalén blé'enə' lu chale'aj xudau' na' zaj zra' benne' dxelxutiə' bežre ca', ne zrila' ca', ne bgúgudu ca', béadu ca' dxelutiə' lau Dios. Cá'anqueze blé'enə' na' benne' dxuluxuché'ə dumí chee xəzr zitu' ca'.

15 Gate ble'e Jesús da caní, na' bgu'ə du ca' da güe'ə benne' ca', na' bebéajə' ca' naca benne' ca' tu zrentə nen bežre chee' ca', ne zrila' chee' ca'. Na' gudxú'ungə' lu xula dumí chee' benne' ca' dxuluxuché'ə dumí, ne bdxixrə' blaga' ca' chee benne' ca'.

16 Na' guzrə' benne' ca' dxelexutiə' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

17 Nadxa benne' ca' dxusəde Jesús xeajlesá lazrə' da naxúaj na lu xiche chee Dios, da dxenná na: Dxácate zi' lázrdawa' lawe' da dxé'le'a gunne xue chee lizru'.

18 Nadxa judío blau ca' buluchəbe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

19 Bechəbe Jesús:

—Le guzria xi' xudau' nigá, na' neda', te chunna zra xechisa' na.

20 Nadxa judío ca' gulé'ə Lə':

—Xrupe xun iza ba zeaj dxelunə' xudau' nigá, na' Lue', ¿xechisu' na chunna zraze?

21 Bchalaj Jesús chee xudau' na' da naca na bəl-la' dxen chee'.

22 Chee lə' na', gate bebán Jesús ládujla benne' gate, na' benne' ca' bsédene' xeajlesá lazrə' ca da gunné', na' guléajlə'ə chee da naxúaj na lu xiche chee Dios ca naca chee Jesús, ne chee da guzre Jesús lə'.

### *Jesús núnbe'ə xúgute bénneache*

23 Gate zua Jesús xəzre Jerusalén lu Laní Pascua chee judío ca', na' benne' zan guléajlə'ə chee' gate belelé'əngə' ca naca xel-la' waca zren ca' da dxunə'.

24 Jesús quebe bde cuinə' lu na' benne' ca' lawe' da nézquezne' quegá xúgute benne' ca' dxeléajlə'ə chee'.

25 Quebe guchínəngə' nu benne' xə'ə Lə' ca zaj naca bénneache lawe' da nézquezne' ca da zaj xu'u xichaj lázxdau bénneache.

## 3

### *Jesús dxuchálajləngə' Nicodemo*

1 Zua tu benne' xudau' fariseo lə' Nicodemo. Naquə' benne' blau lávela benne' judío ca'.

2 Benne' nigá guxiájə' xeajnné'ə Jesús chizrela, na' guzrə' Lə':

—Benne' Wesəde, nézentu' Dios nasel-lə' Lue' chee gusédenu' netu' lawe' da quebe nu benne' gaca gunə' ca zaj naca xel-la' waca zrentə da dxunu' Lue' che quebe zúalə Dios lə'.

3 Nadxa Jesús guzrə' lə':

—Da li dxapa' lue', nu benne' quebe gálajə' xecha lasa quebe gaca gaquə' tuze benne' ca' dxenná be'e Dios.

4 Nicodemo bchəbe' Jesús:

—¿Ájazra gaca xexalaj tu benne' ba naquə' gula? ¿Waca xexu'ə lə'e xrnə'ə chee gálajə' xetú?

<sup>5</sup> Jesús bechebe':

—Da li dxapa' lue', nu benne' quebe gálaje' ne chee nisa chee xrtizra' Dios, ne ne chee Be' Lá'azxa, quebe gaca chu'e naga dxenná bea Dios.

<sup>6</sup> Benne' nálaje' lu ni'a lu na' bénneache, naque' bénneacheze. Nu benne' nálaje' ne chee Be' Lá'azxa, naca ban bénnea' ne chee Be' Lá'azxa.

<sup>7</sup> Quebe xebánenu' lawe' da dxapa' lue', dxun na ba xen gálaju' xecha lasa.

<sup>8</sup> Gáteteze dxaca be'. Dxennu' ca schaga da dxun na na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau bénnea', na' quebe dxelé'enu' ájala dxun Be' na'.

<sup>9</sup> Nadxa Nicodemo bchebe' Jesús:

—¿Ájazra gaca da caní?

<sup>10</sup> Bechebe Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní?

<sup>11</sup> Da li dxapa' lue', netu' dxuchálajntu' ca naca da nézentu', ne dxexchébentu' ca da blé'entu', na' le'e quebe dxéajle da dxentu' le'e.

<sup>12</sup> Che quebe dxéajle chia' gate dxuchálajlena' le'e ca naca chee da dxaca lu xezr la xu nigá, ¿ájazra gaca chéajle chia' che guchálajlena' le'e chee da dxaca xabáa?

<sup>13</sup> 'Quebe ne cuen tu benne' xabáa chee lé'eng' ca dxaca na'. Tuze Bénnea' bétaje' xabáa, Bénnea' naca' neda', Benne' Gulje' Bénneache, naca' Bénnea' zúaqueze' xabáa.

<sup>14</sup> Ca ben Moisés, bde'e tu bēla' xia le'e xaga naga zua le'e xixre' lawe' lataj, cá'anqueze neda', Benne' Gulje' Bénneache, wuludá'queze' neda' tu le'e xaga,

<sup>15</sup> chee quebe xelebía xi' nu benne' xeléajle'e chia'. Zrué'e bénnea' xel-la' nabán da zeajlí canna.

### *Dios dxezrí'i lazre' bénneache*

<sup>16</sup> Dios dxezrí'i lázrele'eng' bénneache, na' chee le na' bdee' Zrí'ine' tu licha' chee quebe xelebía xi' nu benne' dxeléajle'e chee'. Zrué'e bénnea' xel-la' nabán da zeajlí canna.

<sup>17</sup> Dios gusél-le' Zrí'ine' lu xezr la xu nigá, quegá chee guzrí'a xi'e bénneache, san chee guselé' bénneache.

<sup>18</sup> Bénnea' dxéajle'e chee Zrí'ine Dios quebe naca chee' cuía xi'e, san nu benne' quebe dxéajle'e chee' ba naca chee' cuía xi'e lawe' da quebe dxéajle'e chee Zrí'ine Dios, bi tu licha' chee'.

<sup>19</sup> Benne' ca' quebe dxeléajle'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxeng' da chul-la ca xel-la' naxaní', lawe' da dxeluné' da calela.

<sup>20</sup> Xúgute benne' dxeluné' da calela dxelecuídené' xel-la' naxaní', ne quebe dxelebigue' lu xel-la' naxaní', chee quebe gaca bea da calela da dxeluné'.

<sup>21</sup> Benne' ca' dxeluné' ca naca da li dxelebigue' lu xel-la' naxaní' chee gaca bea naca na chee Dios da dxeluné'.

### *Da gunná Juan, bénnea' bchue' bénneache nisa*

<sup>22</sup> Gudé na' guxíaj Jesús naga nababa Judea nen benne' ca' dxusédené', na' guzúe' na' zane' zra nen benne' ca', dxuluchúe' bénneache nisa.

<sup>23</sup> Cá'anqueze zua Juan lu xezr la xu chee xezre Enón da zua gáguze naga dxe' xezre Salím, dxuchúe' bénneache nisa lataj na' lawe' da délé'e na' nisa zila, na' belezrín benne' zan naga zua Juan, na' beledxúe' nisa.

24 Da nigá guca na nédxudxa gate quebe ne xelegú'e Juan lizre xia.

25 Nadxa bal-la benne' zaj de'e Juan gulezú lawe' dxulutil-le' judío ca' dizra' ca naca chee da dxucá'ana chawe na bénneache lau Dios.

26 Nadxa xeajleguezre' Juan:

—Benne' wesede, bénnea' ble'e naga zu' chalá'a xegu Jordán naga dxalaj gubizra, bénnea' bchálajenu' netu' chee', na'a dxuchúe' bénneache nisa, na' xúgute' bénneache zjácalene' Le'.

27 Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'.

28 Le'e bénquezle gunnía' neda' quebe nácaqueza' neda' Cristo, Bénnea' guchebe lazre' Dios sel-le'. Naca' tu benne' nase-la Dios chee quia lawa' lau Le'.

29 Lu laní chee wechaga na', bénnea' si'e nu'ula wechaga na' naque' benne' wechaga na', na' benne' ljwezre benne' wechaga na', bénnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo.

30 Le' dxal-la' gácadxe' szren, na' neda' dxal-la' gácadxa' cá'aze.

#### *Ca naca chee Bénnea' za' xabáa*

31 Na' gunná Juan:

—Bénnea' za' xabáa nácadxe' blau ca xúgute' bénneache. Benne' naque' chee xezr la xu nigá naque' bénneacheze, ne dxuchálaje' ca naca chee da dxaca lu xezr la xu nigáze. Bénnea' ze'e xabáa nácadxe' szren ca xúgute' bénneache.

32 Le' dxuchálaje' ca naca chee da ba blé'ene', ne da ba benne' xabaala, na' quebe dxéajle' nu benne' chee da dxenné'.

33 Che nu benne' dxéajle'e chee', benne' nigá dxulé'ene' naca li ca da dxenná Dios.

34 Bénnea' nase-la Dios dxuchálaje' xrtizra' Dios lawe' da dxunna Dios Le' Be' Lá'azxa chee' dute ca naque'.

35 Xradxu Dios nazrí'ine' Zrí'inequeze', ne ba bdee' lu ne'e xúgute' da de'.

36 Nu benne' dxéajle'e chee' Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee' Zrí'ine Dios quebe gape' xel-la' nabán caní. Wadé'e lu da ba xa' da gun Dios.

## 4

#### *Dxuchálajle Jesús tu nu'ula chee tu xezre nababa na Samaria*

1 Benne' fariseo ca' belenne' zjácalé benne' zandxa Jesús ca benne' zjácalene' Juan, na' dxuchúa Jesús benne' zandxa nisa ca benne' dxuchúa Juan nisa.

2 Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa.

3 Gate guque be'e Jesús da nigá, na' bezé'e naga nababa Judea, xexíaje' naga nababa Galilea.

4 Ca xu'u Jesús neza, ben na ba xen té'e naga nababa Samaria.

5 Ca'an guca, bzrine' tu xezre naga nababa Samaria nazí le na Sicar, da dxe' gáguze naga zua xezr la xu na' bnezruj Jacob chee zrí'ine', bi lebe' José.

6 Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra.

<sup>7-8</sup> Benne' ca' dxusede Jesús xjaque' lu xezre Sicar, xeajlegá'awé' da xelawé'. Dxácaté na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

<sup>9</sup> Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'.

<sup>10</sup> Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

<sup>11</sup> Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee xel-la' nabán?

<sup>12</sup> Xra xrtáuntu', Jacob, benne' netu' beaj nigá, naga gü'e'eqeze le' nisa, ne naga gulé'ajqueze zrí'ine', ne be xixre' chee'. ¿Nácadxu' szrendxa ca le'?

<sup>13</sup> Jesús bechebe':

—Xúgute' benne' dxelé'aje' nisa chee beaj nigá welexebilequezne' nisa.

<sup>14</sup> Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawé' ca tu beaj nisa da gunna na le' xel-la' nabán da zeajlí canna.

<sup>15</sup> Nadxa nu'ula na' guzre' Le':

—Benne', benne' neda' nisa na', chee québedxa gun na ba xen xida' nigá xedajxri'a nisa.

<sup>16</sup> Na' Jesús guzre' nu'ula na':

—Guxíaj xeajnné' benne' chiu', na' xídale nigá.

<sup>17</sup> Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu',

<sup>18</sup> lawe' da ba guzúalenu' gazxu' benne', na' bènea' zúalenu' na'a quebe naque' benne' chiu'. Ca naca da nigá gunnáu' da li.

<sup>19</sup> Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios.

<sup>20</sup> Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

<sup>21</sup> Na' bechebe Jesús:

—Guxéajle' chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén.

<sup>22</sup> Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'.

<sup>23</sup> Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelungé' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szrenle bèneache Le' caní.

<sup>24</sup> Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

25 Na' nu'ula na' guzre' Le':

—Neda' nezda' walá' benne' Mesías (da zéaje na Cristo), na' gate la' Le', na' guzéajni'ine' dxi'u ca naca xúgute.

26 Jesús guzre' le':

—Neda' naca' Bénnea', dxuchálajlena' lue'.

27 Ca gunné' ca', na' belexezrín benne' ca' dxusedene', na' belexebánene' lawe' da dxuchálajle Jesús tu nu'ula Netúe' quebe bexázrjene' guchebe' Le' bi da dxaca lazre', u bizra cheen dxuchálajlene' nu'ula na'.

28 Nadxa nu'ula na' bca'ane' dxe'e chee' dxu'a beaj na', na' bezé'e zexíaje' xezre na' naga xeajezre' benne' ca':

29 —Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bénnea' sel-la Dios?

30 Nadxa beledxúaj benne' ca' xezre na', zjaque' naga zua Jesús.

31 Dxácatē na', benne' ca' dxusede Jesús gulata' xuenē' Le', gulenné':

—Benne' Wesēde, gudagu late'.

32 Jesús guzre' benne' ca':

—De da dxawa', da quebe núnbeale le'e.

33 Nadxa benne' ca' dxusede Jesús gulezú lawe' dxuluchēbe ljwezre', dxelenné':

—¿Núteca bedajgú'e da gudawe'?

34 Jesús guzre' le':

—Xela wagu chia' naca na chee' guna' da dxaca lazre' Xra', Bénnea' nasel-le' neda', ne chee' gusexuzra' guna' zrin chee'.

35 Le'e dxennale: “Xetapa beu' xelápadxu.” Neda' dxapa' le'e, le nna' bēnneache zaj naque' ca tu lina, da bache naca na xelápadxu.

36 Benne' dxelape' dxezi'e lazruj chee', na' da dxelape' naca na chee' xelapa bēnneache xel-la' nabán da zeajlí canna, chee' sua xel-la' dxebé benne' dxaza tu zren nen benne' ca' dxelape'.

37 Da li naca ca da dxelenná bēnneache: Tu benne' dxaze', na' xetúe' dxelape'.

38 Neda' gusel-la' le'e xelápale naga quebe gúzale. Ca' naca na, benne' xula belune' zrin gulaze', na' le'e dxezile ba neza zrin da belún benne' ca'.

39 Benne' zan, benne' xezre na' naga nababa Samaria, guléajle'e chee' Jesús ne chee' xrtizra' nu'ula na', gunné': “Guzre' neda' xúgute da ba bēna'.”

40 Gate belelá' benne' Samaria ca' naga zua Jesús, na' gulata' xuenē' Le' xegá'ane' nen le', na' begá'ane' na' chupa zra.

41 Benne' zandxa guléajle'e chee' Jesús gate belenne' ca da dxenná Le'.

42 Nadxa gulé'e nu'ula na':

—Na'a dxéajlentu' chee' quegá tuze ne chee' da guzru' lue' netu', na' cá'aqueze lawe' da bēnquezentu' netu' chee', na' nézentu' da li naque' Cristo, Bénnea' guselé' ca naca bēnneache.

*Jesús dxexune' zri'ine tu benne' wen zrin blau chee xu'u lawe'*

43 Gudé chupa zra bezá' Jesús xezre ca' zaj nababa Samaria, na' guzē'e zéaje' naga nababa Galilea.

44 Guxíaje' na' lawe' da gunnáqueze Jesús, gunné': “Tu benne' dxuchalaje' waláz chee' Dios, quebe dxelapa benne' lazriē' le' ba lá'ana'.”

45 Gate bezrine' naga nababa Galilea, benne' zaj zre'e na' belezí' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xúgute da bēn Jesús lu laní na'.



<sup>46</sup> Nadxa bezrín Jesús xezre Caná naga nababa Galilea naga bene' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zri'ing' bi biu quebe chawe' zúabe'.

<sup>47</sup> Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xeajnné' e Jesús, na' gutá' xuene' Le' chéaje' lizre' xexune' bi biu chee', bi na' ba zua gátebe'.

<sup>48</sup> Nadxa Jesús guzre' le':

—Le'e quebe chéajle' chia' che quebe lé'ele xel-la' waca chee xabáa da dxulé'eda'.

<sup>49</sup> Benne' wen zrin blau na' gunné':

—Xran, gudázega na'a quebe ne gate zri'ina'.

<sup>50</sup> Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e zexíaje'.

<sup>51</sup> Gate ba zua xezrine' lizre', na' benne' wen zrin chee' xeajlexezrígale' le', na' gulé'e le':

—Naca ban zri'inu'.

<sup>52</sup> Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

<sup>53</sup> Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lizre' guléajle'e chee Jesús.

<sup>54</sup> Da nigá naca na xel-la' waca zren da gudxupe' da ben Jesús gate bezrine' naga nababa Galilea.

## 5

### *Jesús dxexune' tu benne' biu naga nazí le na Betesda*

<sup>1</sup> Ca gudé na' guxú'u tu laní chee judío ca', na' bezrín Jesús xezre Jerusalén.

<sup>2</sup> Lu xezre na', gáguze naga zua dxa xu'u chee xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila.

<sup>3</sup> Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxelebeze' ca bixre nisa na'.

<sup>4</sup> Ca'an naca lawe' da dxetaj tu gubáz chee xabáa bata gala, ne dxunibe' nisa na', na' benne' nedxu dxeajxu'e lu nisa na' ca dxedé dxunibe' na, dxexaque' chee bíteteze xel-la' we' xu'e.

<sup>5</sup> Zua tu benne' na' ba guca chinu chunne dxua iza xu'e we'.

<sup>6</sup> Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

<sup>7</sup> Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxe bixre na. Tu tu lasa gate dxaca lazra' chu'a, benne' xula dxu'e nédxudxa.

<sup>8</sup> Jesús guzre' le':

—jGuxasa! Becá'a da'a chiu', ne bexíaj.

<sup>9</sup> La' ná'queze bexaca benne' we' na', na' bequ'é'e da'a chee', ne guzú lawe' dxedé'. Zra na' naca zra dxulupá'ana judío ca',

<sup>10</sup> na' benne' judío ca' gulé'e bénnea' bexaque':

—Na'a naca na zra dxupá'anadxu. Quebe naca na gu'u da'a chiu'.

11 Na' benne' na' bechebe':

—Bénnea' bexuné' neda' guzre' neda': "Becá'a da'a chiu', ne bexíaj."

12 Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj?

13 Benne' na' quebe nézene' nu bénnea' bexuné' le' lawe' da ba zexíaj Jesús lávela benne' zan ca' zaj zre' e na'.

14 Ca gudé na' Jesús bezrague' bénnea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, chee quebe bi sacu' xetú da wál-ladxa.

15 Nadxa benne' na' bezé'e zexíaje', na' bzenne' judío ca' bexún Jesús le'.

16 Chee le' na' benne' judío ca' guláu zi' xuzre' Jesús, ne gulaca lazre' xelútie' Le' lawe' da dxune' da caní lu zra dxulupá'ane'.

17 Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

18 Chee le' na' benne' judío ca' gulaca lázredxe' xelútie' Jesús lawe' da quegá tuze dxuzúe' chalá'ala da nadxixruj bea na chee zra dxulupá'ane', na' cá'anqueze dxun cuine' ca Dios gate gunné' Dios nácaqueze' Xre'.

### *Xel-la' dxenná bea da napa Zrí'ine Dios*

19 Nadxa Jesús guzre' benne' judío ca':

—Da li dxapa' le'e, neda', Zrí'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute' da dxun Xra', cá'anqueze dxuna' neda', Zrí'ine'.

20 Dios, Xra', nazrí'ine' neda', Zrí'ine', ne dxulé'ene' neda' xúgute' da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequezle le'e ca xelaca na.

21 Ca dxun Xradxu Dios, dxusebané' benne' gate, ne dxuxunézruje' xel-la' nabán chee', cá'anqueze neda', Zrí'ine', dxuxunézruja' xel-la' nabán chee benne' ca' dxaca lazra' xunézruja' na.

22 Xradxu Dios quebe dxuchi'e nu benne', san ba benne' neda', Zrí'ine', xel-la' dxenná bea guchi'a da dxelún tu tu bénneache,

23 chee' xelapa xúgute' benne' neda', Zrí'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zrí'ine', cá'anqueze quebe dxape' ba lá'ana Xradxu Dios nasel-le' neda'.

24 "Da li dxapa' le'e, benne' dxenne' da dxenné'a' neda', ne dxéajle'e chee Dios nasel-le' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zue' lu xel-la' nabán.

25 Da li dxapa' le'e, wazrín zra, ne ba dxezrín zra na' gate benne' gate ca' xelenne' chí'a neda', Zrí'ine Dios, na' benne' xuluzúa xrtizra' welaca bánqueze'.

26 Xráqueza' nape' xel-la' dxenná bea xunézruje' xel-la' nabán da naca na li lazre' chee bénneache, ne cá'anqueze ba benne' neda', Zrí'ine', xel-la' dxenná bea xunézruja' bénneache xel-la' nabán caní,

27 ne ba benne' neda' xel-la' dxenná bea guchi'a chee bénneache lawe' da naca Benne' Gulje' Bénneache.

28 Quebe xebánele chee da nigá lawe' da zrin zra gate xúgute' benne' gate xelenne' chí'a

29 xelixedxúaje' lu xedxu ba. Benne' ca' beluné' da xrlátaje xelxebangé' chee xelape' xel-la' nabán da zeajlí canna. Benne' ca' beluné' da calela xelxebané' chee xelébía xi'e.

*Da dxelunna bea na napa Jesús xel-la' dxenná bea*

<sup>30</sup> Na' gunná Jesús:

—Neda' quebe bi gaca guna' cheé¿queza'. Neda' dxuchi'a chee bënneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasel-le' neda'.

<sup>31</sup> Che neda' dxexecheba' da nácaze cheé¿queza', da dxennéa' quebe naca na da dxunna bea na.

<sup>32</sup> Zua tu benne' xula dxexechebe' da nácaqueze chia', na' da dxenné' naca na da dxunna bea na.

<sup>33</sup> Le'e gusél-lale benne' xeajlechebe' Juan, na' ca da bechebe' naca na da li.

<sup>34</sup> Da dxunna bea na da dxuxrén lazra' neda' quebe naca na chee bënneacheze. Dxapa' le'e da nigá chee lale le'e.

<sup>35</sup> Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'.

<sup>36</sup> Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebagá Xra' neda' dxuna'. Da caní dxelunna bea na da li Dios, Xra', gusél-le' neda'.

<sup>37</sup> Cá'anqueze Xra' nasel-le' neda' dxexechebe' chia'. Lácala ba bchalaj Le', le'e quebe ne xénele chi'e, ne quebe ne lé'ele Le',

<sup>38</sup> ne quebe nuzúale dizra' chee' xichaj lázrdaule lawe' da quebe dxéajle chia' neda', nasel-la Xra' neda'.

<sup>39</sup> Le'e dxusédele du lázrele da naxúaj na lu xiche chee Dios lawe' da dxéquele xeZRélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'.

<sup>40</sup> Le'e quebe dxaca lázrele xídale naga zua' neda' chee gápale xel-la' nabán na'.

<sup>41</sup> Neda' quebe dxezi'a xel-la' ba lá'ana ca da dxelunna bënneache, da quebe naca na li lazre'.

<sup>42</sup> Neda' númbe'a le'e, ne nezda' quebe nazrí'ile Dios.

<sup>43</sup> Bla'a neda' waláz chee Dios, Xra', na' le'e quebe dxezí' lu na'le neda'. Che za' tu benne' lu da naca cheé¿queze', benne' na' wazí' lu na'le.

<sup>44</sup> ¿Ájazra gaca chéajlele le'e chia' che dxunle zrin chee xelapa lJwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'?

<sup>45</sup> Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e.

<sup>46</sup> Che da li guxéajlele le'e chee da gunná Moisés, cá'anqueze chéajlele chia' neda' lawe' da bzujaj Moisés ca naca chia' neda'.

<sup>47</sup> Na'a, che quebe dxéajlele chee da bzujaj le', ¿Ájazra gaca chéajlele chee da dxapa' le'e?

## 6

*Jesús dxugawe' chi xun gaxúa benne' biu*

(Mt. 14.13-21; Mr. 6.30-44; Lc. 9.10-17)

<sup>1</sup> Ca gudé na' guxiáj Jesús xecha la'a dxu'a nísadau' chee Galilea, da nazíqueze le na nísadau' chee Tiberias.

<sup>2</sup> Benne' zante zjácálene' Jesús lawe' da ba belelé'ene' xel-la' waca zren ca' da dxun Le', dxexuné' benne' we' ca'.

<sup>3</sup> Nadxa Jesús guluéne' tu lu xi'a, na' gudxé' na' nen benne' ca' dxusédene'.

<sup>4</sup> Ba zua gagu Laní Pascua chee judío ca'.

<sup>5</sup> Gate ble'e Jesús benne' zan ca' zá'aque' zeaj nawe' Le', na' guzre' Felipe:  
—¿Gazra cheajxridxu da xelagu benne' zan caní?

<sup>6</sup> Gunná caní Jesús chee la' bi nna Felipe, lawe' da ba neze Jesús ca da gune'.

<sup>7</sup> Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

<sup>8</sup> Nadxa Andrés, xetú benne' ca' dxusede Jesús, ne naque' bi biche Simón Pedro, guzre' Jesús:

<sup>9</sup> —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúgute' benne' caní?

<sup>10</sup> Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu.

<sup>11</sup> Nadxa gucá'a Jesús xeta xtila ca', na' ca gudé guzre' Dios "Xcalenu", bnézruje' na benne' ca' dxusedene', na' benne' caní gulísie' na láwele benne' zan ca' zaj dxe'e na'. Cá'anqueze ben Jesús chee bela ca', na' bnézruje' ca da gulaca lazre' benne' ca'.

<sup>12</sup> Gate gulélaje benne' ca', na' Jesús guzre' benne' ca' dxusedene':

—Le xutupa da bízrujdu ca' da dxelexegá'ana na, chee quebe bi gaca dítaje.

<sup>13</sup> Belexequé'e na, na' buluzré'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'.

<sup>14</sup> Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bènea' guchálaje' waláz chee Dios, bènea' dxal-la' le'e.

<sup>15</sup> Guque bé'ene' Jesús dxelaca lazre' xeleché'e Le' xadía chee xuluzúe' Le' ca benne' wenná bea, na' bezé'e na', ne begüene' lu xi'a sibe na' chee sue' leze'.

*Jesús dxedé' lawe' nísadau'*  
(Mt. 14.22-27; Mr. 6.45-52)

<sup>16</sup> Gate ba za xrinne, benne' ca' dxusede Jesús belétaje' dxu'a nísadau',

<sup>17</sup> na' gulu'e lu da dxedá lawe' nísadau', ne gulezú lawe' zjaque' xeledé' xechalá'a nísadau' chee xelezrine' xezre Capernaum. Ca guxrinne, quebe ne xezrin Jesús na'.

<sup>18</sup> Nadxa guzú lau dxaca tu be' bdunu' lawe' nísadau' na', na' xeajxruza chee nísadau' na' guxásale'e na.

<sup>19</sup> Gate ba guledé'e lu nísadau' na' catite sadxu tu chí'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'.

<sup>20</sup> Nadxa Jesús guzre' benne' ca':

—Neda' na'. Quebe zrébele.

<sup>21</sup> Nadxa lu duté xel-la' dxelebé' gulezú' lu ne'e Le' lu da dxedá lawe' nísadau' na', na' chadite belezrine' lu xezr la xu naga zjaque'.

*Benne' zan ca' dxelexilaje' Jesús*

<sup>22</sup> Zra xula benne' zan ca', benne' belexegá'ana xecha la'a nísadau', gueque bé'ene' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxíajlene' benne' ca'.

<sup>23</sup> Dxácate na' xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawe' xeta xtila na' ca gudé guzre Xránadxu Dios: "Xcalenu'."

<sup>24</sup> Chee le na' gate benne' zan ca' guleque bé'ene' québedxa zua Jesús na', ne cá'aqueze benne' ca' dxusédenē', na' gulu'e lu da dxeledá lawe' nísadau', ne xjaque' xezre Capernaum zeajlexedíajē' Jesús.

*Jesús naque' xeta xtila da dxunna na xel-la' nabán li lazre'*

<sup>25</sup> Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

<sup>26</sup> Jesús guzre' benne' ca':

—Da li dxapa' le'e, dxexíajle le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e.

<sup>27</sup> Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

<sup>28</sup> Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

<sup>29</sup> Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusel-la Dios.

<sup>30</sup> Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu' chiu'? ¿Bizra dxunu'?

<sup>31</sup> Xra xrtauntu' ca' gulawe' xeta maná le'e xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

<sup>32</sup> Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'.

<sup>33</sup> Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bénneache xel-la' nabán li lazre'.

<sup>34</sup> Nadxa benne' ca' gul'é Le':

—Xran, tu bénnazqueze cheentu' xeta xtila caní.

<sup>35</sup> Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'e chia' cabátadxa bilene'.

<sup>36</sup> Naca na ca ba gucha' le'e. Le'e na' quebe dxéajlele chia', lácala ba ble'ele neda'.

<sup>37</sup> Xúgute benne' ca' dxunna Xra' neda', xelexé'e lawa', na' benne' ca' xelexé'e naga zua', quebe guzúa' benne' ca' chalá'ala.

<sup>38</sup> Neda' guzá'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'.

<sup>39</sup> Da dxaca lazre' Xra', nasel-le' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe.

<sup>40</sup> Da dxaca lazre' Xra', nasel-le' neda', naca na chee xelapa bénneache xel-la' nabán da zeajlí canna, xúgute benne' ca' xelenné'e neda', Zrí'ine Dios, ne xeléajle'e chia' neda', na' chee gusebana' neda' benne' ca' lu zra bzebe na'.

41 Gate belenne' da nigá, na' judío ca' gulezú lawe' dxelezí tizre' Jesús lawe' da gunné': "Neda' naca' xeta xtila da betaj xabáa."

42 Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenné' bétaje' xabáa?

43 Nadxa Jesús guzre' benne' ca':

—Québedxa si tizrale.

44 Quebe nu benne' gaca xide' naga zua' neda', che quebe xedajgúa Xra' nasele' neda' bènnea', na' neda' gusebana' bènnea' lu zra bzebe na'.

45 Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusedene' xúgute bènneache. Ca' gaca na, xúgute benne' ca' dxuluzé nague' ca da dxusede Xra', dxelelé'e naga zua'.

46 "Quebe ne le'e nu benne' Xra'. Benne' tu licha', bènnea' blé'ene' Le', naca bènnea' guzé'e naga zua Dios.

47 Da li dxapa' le'e, nu benne' dxéajle'e chia' neda' nape' xel-la' nabán da zeajlí canna.

48 Neda' naca' xeta xtila da dxunna na xel-la' nabán li lazre'.

49 Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gulate'.

50 Xeta xtila nigá naca na da za xabáa, na' che nu benne' gawe' na, quebe gatie' tu chí'ize.

51 Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadía chacanna. Xeta xtila na' da dxunna' neda' naca na bela' dxen cheézqueza', da gunna' chee xelaca bánqueze bènneache.

52 Nadxa benne' judío ca' gulezú lawe' dxuluchebe ljwezre', dxelelé':

—¿Ájazra gun benne' nigá, gunne' dxi'u bela' dxen cheézqueze' chee gágudxu na?

53 Jesús guzre' benne' ca':

—Da li dxapa' le'e, che le'e quebe gágule bela' dxen chia' neda', Benne' Gulje' Bènneache, ne che quebe xí'aje dxen chia', quebe gápale xel-la' nabán li lazre'.

54 Benne' dxawe' bela' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bènnea' lu zra bzebe na'.

55 Bela' dxen chia' naca na xel-la' wagu li lazre' chee bènne'du xu'ule, na' dxen chia' naca na da xele'aj bènneache da naca na li lazre'.

56 Benne' dxawe' bela' dxen chia', ne dxí'aje' dxen chia', naque' neda' tuze, na' néda'queza' naca' bènnea' tuze.

57 Xra' nasele' neda' xu'u lu ne'e xel-la' nabán li lazre', na' neda' naca bana' ne chee Le'. Cá'anqueze bènnea' dxawe' da naca chia' neda' gaca bánqueze' ne chia' neda'.

58 Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawe' xeta xtila nigá waca bánqueze' chadía chacanna.

59 Bsede Jesús ca naca da caní naga zaj zra' benne' zan ca' lu xu'u naga dxelezraga bènneache chee xezre Capernaum.

*Ca naca dizra' na' da dxunna na xel-la' nabán da zeajlí canna*

60 Gate belén benne' zan ca' da nigá dxusede Jesús, na' benne' ca' zjácate Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní?

61 Guque bé'engé' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe'?

62 ¿Ájazra gunle checa' lé'ele neda', Benne' Gulje' Bénneache, xegüéna' xabáa naga zua' nédxute'?

63 Be' naca na da dxunna xel-la' nabán li lazre'. Da naca na bēla' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'.

64 Bál-lale le'e quebe dxéajle chia'.

Caní gunná Jesús lawe' da nézene' nédxudaṭe nu benne' ca' quebe dxéajle'ē chee', ne nua' gudé Le' lu na' benne' guledábage' Le'.

65 Nadxa gunná Jesús:

—Chee le' na' gucha' le'e, quebe nu benne' gaca xide' naga zua' neda' che quebe xedajgúa Xra' bēneá'.

66 Lu zra ná'queze benne' zan ca', benne' xjácalene' Jesús, québedxa xjácalene' Le'.

67 Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle'?

68 Bechebe Simón Pedro:

—Xran, ¿nunra chéajlentu'? Dizra' chiu' naca na da dxunna na xel-la' nabán da zeajlí canna.

69 Netu' dxéajlentu' chiu', ne nézentu' nacu' Cristo, Zri'ine Dios ban.

70 Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

71 Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábage' Le'. Naque' tu benne' chazrinnu ca' dxuséde Jesús.

## 7

### *Benne' biche Jesús quebe dxeléajle'ē chee'*

1 Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'ē na' xelútiē' Le'.

2 Ba za laní gate judío ca' dxelezúe' lu xu'u laga' ca'.

3 Chee le' na' bi biche Jesús gulé'ē Le':

—Quebe xegá'anu' nigáze. Bexíaj Judea, chee cá'anqueze benne' ca' dxeléajle chiu' zaj zre'ē na' gaca xeelé'ene' ca da dxunu'.

4 Che nu benne' dxaca lazre' xelúnbe'e bēneache le', quebe dxune' da ca' bagácheze. Lawe' da dxunu' Lue' da caní, ben na lau xúguṭe bēneache.

5 Caní gulenné' lawe' da quebe dxeléajle benne' biche' ca' chee Jesús.

6 Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle.

7 Benne' ca' zaj naca chee xezr la xu nigá quebe gaca xeleguédene' le'e. Dxeleguédene' neda' lawe' da dxulé'eda' neda' naca da calela da dxelún benne' ca'.

8 Le chjaca le'e laní na'. Quebe sa'a neda' na'a lawe' da quebe ne zrin zra cha'a.

9 Ca gudé guzre Jesús benne' ca' da nigá, na' begá'ane' naga nababa Galilea na'.

*Jesús dxezrine' laní gate judío ca' dxelezúe' xu'u laga' ca'*

10 Ca gudé besía'aca benne' biche Jesús, na' cá'anqueze Le' guxíaję' laní na'. Bagácheze guxíaję' cheę quebe nu le'e Le'.

11 Benne' xíchaję cheę judío ca' belexíaję' Jesús lu laní na'. Dxeleńńę':

—¿Gazra zua bėnnea'?

12 Ládújla benne' zan ca', benne' zan buluchálaję' ca naca cheę Jesús. Bal-le' gulenné': "Naque' benne' xrlátaję." Xebal-le' gulenné': "Quebe naque' xrlátaję lawe' da dxezí xe'ę bėnneache."

13 Quebe nu benne' bchálaję' caníqueze ca naca cheę lawe' da dxelezrebe' da xelún benne' xíchaję ca' cheę judío ca'.

14 Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'ę na'.

15 Belexebane benne' judío ca', dxeleńńę':

—¿Ájazra na' benne' nigá da zante nézene', ne quebe bsédie' cheę xudau'?

16 Bechebe Jesús:

—Da dxusédeda' neda' le'e quebe naca na cheézqueza'. Naca na cheę Xra' nasel-le' neda'.

17 Che nu benne' dxaca lazre' gune' ca da dxaca lazre' Dios, na' wanézenę' che da dxusédeda' naca na cheę Dios, u che dxennéa' ca da naca cheézqueza'.

18 Benne' dxuchálaję' da naca cheézqueze' dxune' na cheę xelapa bėnneache le' ba lá'ana. Bėnnea' dxue lazre' xelapa bėnneache ba lá'ana bėnnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

19 'Moisésqueze bėnne' le'e da nadxixruj bea na, na' netule le'e quebe dxuzúale dizra' cheę da nadxixruj bea na na'. ¿Bizr cheę na' dxaca lázrele gütele neda'?

20 Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutię' lue'?

21 Jesús guzre' benne' ca':

—Tu xel-la' waca bėna' lu zra dxupá'anale, na' xúgutele le'e dxebánele.

22 Moisés bėnne' da zėjajle, dxechúgule late' weaj bėla' cheę bėl-la' dxen cheę zrí'inele bi biudu ca' cheę xelexegá'anabe' xrlátaję lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'antę. Cheę le' na' le'e dxechúgule late' bėla' cheę bėl-la' dxen cheę tu bi biúdau' cheę xegá'anabe' xrlátaję lau Dios lácala naca zra dxupá'anale.

23 Che caní dxunle lu zra dxupá'anale cheę quebe gusanle ca naca da bdxixruj be'e Moisés, ¿bizr cheę na' dxezrá'ale neda' lawe' da bexuna' dute bėl-la' dxen cheę tu benne' gate naca zra dxupá'anale?

24 Quebe guchí'ale le'e cheę tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaję.

### *Jesús dxuchálaję' cheę naga ze'ę*

25 Nadxa bal-la benne' ca' zaj zre'ę Jerusalén gulezú lawe' dxuluchebe ljwezre':

—¿Quegá benne' nigá bėnnea' dxelexíaję' cheę xelútię' le'?

26 Nigá zue' dxuchálaję' lówela bėnneache, na' quebe nu bi dxę Le'. ¿Zaj neze benne' xíchaję ca' da li naca benne' nigá Cristo, Bėnnea' nasel-la Dios?

27 Netu' nézentu' ga za' benne' nigá. Gate xida Cristo, quegá nu neze ga ze'ę.

28 Jesús zue' dxusédene' benne' ca' chale'aj xudau', na' gate benne' da nigá, na' gunńę' zizraj:



—Dxennale núnbeale neda', ne dxennale nézele ga za'a. Bla'a nigá, quegá cheézza'zeza'. Bénnea' nasele-ḷe' neda' naque' li lazre', na' Bénnea' quebe núnbeale le'e.

<sup>29</sup> Neda' núnbe'a Le' lawe' da za'a naga zua Le', na' Le' gusél-ḷe' neda'.

<sup>30</sup> Nadxa gulaca lazre' xelḷe-ḷe' Jesús. Quebe nu gudela Le' lawe' da quebe ne zrin zra chee xelútie' Le'.

<sup>31</sup> Benne' zan guléajle'ḷe' chee Jesús, na' gulenné':

—Gate xida Cristo, ¿gúnljadxe' xel-la' waca zrente ca da dxun benne' nigá?

*Benne' fariseo ca' dxelesel-ḷe' xra'aga wen zrin chee' chee xelḷe-ḷe' Jesús*

<sup>32</sup> Benne' fariseo ca' belenne' ca da dxelenná bénneache ca naca chee Jesús, na' le', ne benne' xíchaje ca' chee bxruze ca' gulesel-ḷe' xra'aga wen zrin chee xudau' chee xelḷe-ḷe' Jesús.

<sup>33</sup> Nadxa gunná Jesús:

—Wazúalena' le'e xetú chí'idau', na' xezrínqueza' naga zua Bénnea' gusél-ḷe' neda'.

<sup>34</sup> Le'e wexílajle neda', na' quebe xezrélele neda', lawe' da quebe gaca sa'le naga sua' neda'.

<sup>35</sup> Nadxa benne' judío ca' gulezú lawe' dxuluchebe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíaje' naga zaj zra' benne' judío ca' zaj nase dinnaje' ládujla benne' xezr la xu ca' chee gusédené' benne' quebe zaj naque' judío?

<sup>36</sup> ¿Bizra zéaje da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

*Jesús dxuchálaje' chee xegu nisa da dxunna xel-la' nabán li lazre'*

<sup>37</sup> Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebilene', dxal-la' xide' naga zua' neda', na' xí'aje'.

<sup>38</sup> Naca na ca naxúaj na lu xiche chee Dios, dxenné': "Benne' dxéajle'ḷe' chia', lu lázrdawe' galaj xegu nisa da gunna na xel-la' nabán."

<sup>39</sup> Da nigá gunná Jesús ca naca chee Be' Lá'azxa, Bénnea' xelezí' benne' ca' xeléajle'ḷe' chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

*Bénneache dxelaque' chupa la'a*

<sup>40</sup> Bal-la bénneache, gate belenne' da nigá, gulenné':

—Da li benne' nigá naque' Bénnea' guchalaje' waláz chee Dios, Bénnea' dxal-la' xide'.

<sup>41</sup> Xebal-ḷe' gulenné':

—Benne' nigá naque' Cristo, Benne' guchebe lazre' Dios sel-ḷe'.

Xebal-ḷe' gulenné':

—¿Waca Cristo benne' Galilea?

<sup>42</sup> Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

<sup>43</sup> Ca'an guca, gulaca benne' ca' chupa la'a ne chee Jesús.

<sup>44</sup> Bal-ḷe' gulaca lazre' xelḷe-ḷe' Jesús, na' quebe nu hexazre guné' na.

*Benne' xíchaje ca' chee judío ca' quebe dxeléajle'ḷe' chee Jesús*

<sup>45</sup> Xra'aga wen zrin ca' chee xudau' belexezrine' naga zaj zra' fariseo ca', ne benne' xíchaje ca' chee bxruze ca', na' benne' caní buluchebe' xra'aga wen zrin ca':

—¿Bizr chee na' quebe guchēle bēnnea'?

<sup>46</sup> Belexechēbe xra'aga wēn zrin ca':

—Quebe ne guchalaj nu bēnneache ca dxuchalaj benne' nigá.

<sup>47</sup> Nadxa fariseo ca' gulé'e xra'aga wēn zrin ca':

—¿Cá'anqueze le'e beḷe lataj guzi xē'e le'e?

<sup>48</sup> Quebe nu ne chéajle chee bēnnea', benne' xíchajē caní, ne cá'anqueze benne' fariseo ca'.

<sup>49</sup> Benne' ca' dxelēajle'e chee bēnnea' quebe zaj núnbe'e da nadxixruj bea na, ne zaj nabía xi'e.

<sup>50</sup> Nicodemo, bēnnea' guxiájē' xejjnné'e Jesús chizrela naque' tu benne' fariseo ca', na' guzre' benne' ca':

<sup>51</sup> —Cateze dxenná da nadxixruj bea cheedxu quebe gaca guzria xidxu tu benne' che quebe ne xēnedxu xechēbe' chee nézedxu che bi da nabague'e.

<sup>52</sup> Nadxa belexechēbe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalajē' waláz chee Dios quebe ne gálajē' naga nababa Galilea, naga zaj zra' bēnneache quebe zaj naca xánnie' judío.

<sup>53</sup> Nadxa tu tu benne' ca' xejxaque' lize'.

## 8

<sup>1</sup> Na' Jesús guzé'e zéajē' lu Xi'a Xaga Olivo.

*Jesús dxuchálajlē' tu nu'ula dxunē' dul-la dxíchajē' xrba chee xel-la' nuchaga na'*

<sup>2</sup> Zra xula, gate guxaní', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Lē' gudxé'e, ne guzú lawē' dxusēdene' benne' ca'.

<sup>3</sup> Nadxa benne' ca' dxuluxuzájle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxunē' dul-la dxíchajē' xrba chee xel-la' nuchaga na'. Buluzé' nu'ula na' laduj benne' zaj zre'e na',

<sup>4</sup> na' gulé'e Jesús:

—Benne' Wesēde, nu'ula nigá blé'entu' le' dxunē' dul-la dxíchajē' xrba chee xel-la' nuchaga na'.

<sup>5</sup> Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxennáu' Lue'?

<sup>6</sup> Caní gulenná benne' ca' chee xuludxixre' Jesús chee xelezéquene' xelagu zria Lē'. Nadxa gudxé' luche Jesús, ne guzú lawē' dxuzúajē' lu xu nen zrube ne'e.

<sup>7</sup> Benne' ca' buluchébequeze' Jesús, na' Lē' bezé' dxē'e benne' ca':

—Nútetēzlale le'e quebe nabágale dul-la, waca su laule güele nu'ula nigá xiaj.

<sup>8</sup> Na' bebé' luche Jesús, ne bzúajqueze' lu xu.

<sup>9</sup> Benne' ca', gate belenne' da nigá, quebe bzua xichaj lázrdawē' le' zrize, na' belexedxúajē' tu weajē'. Belexedxúaj za'a benne' gúlaxda, na' ca belexedxúaj xúgute benne' ca' dxelagu zriē' nu'ula', na' begá'ana Jesús tuze' nen nu'ula na', ze' laduj benne' ca' dxuluzē' nague' chee'.

<sup>10</sup> Nadxa bezé' Jesús, ne gate québedxa nu benne' ca' ble'e Jesús, benne' dxulagu zriē' nu'ula na', nadxa guzre' le':

—Nu'ula, ¿gazra na' benne' ca' gulagu zrië' lue'? ¿Quebe nu chilá' benne' guzría xi'e lue'?

<sup>11</sup> Nu'ula na' gunné':

—Quebe nu chilá', Xran.

Nadxa Jesús guzrë' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

*Jesús dxusení'e lu xichaj lázxdau bénneache*

<sup>12</sup> Bchálajle Jesús benne' ca' xecha lasa, gunné':

—Neda' naca' xel-la' naxaní' cheë lu xichaj lázxdau bénneache. Benne' dxedálenë' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxë' lu da chul-la cheë dul-la da zaj nabague'.

<sup>13</sup> Nadxa benne' fariseo ca' gulé'e Le':

—Lue' dxexechëbu' cheézquezu', na' da dxexechëbu' quebe bi zaca na.

<sup>14</sup> Bechebe Jesús:

—Da dxexechëba' zaca na lácala néda'queza' dxexechëba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a.

<sup>15</sup> Le'e dxuchi'ale cáteze dxenná xichaj lázrdaule. Bla'a neda', quegá cheë guchi'a ca da dxun nu benne'.

<sup>16</sup> Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasel-le' neda' dxuchi'e tu zren nen neda' ca naca da dxelún bénneache.

<sup>17</sup> Lu da nadxiruj bea cheële le'e naxúaj gate zaj zra' chupa benne' dxelxechëbe' tuz ca dxelenné', naca da li xrtizra' benne' ca'.

<sup>18</sup> Néda'queza' dxexechëba' da naca cheézqueza', na' Xra' nasel-le' neda', cá'anqueze dxexechëbe' chia'.

<sup>19</sup> Nadxa benne' ca' buluchëbe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

<sup>20</sup> Da caní bchalaj Jesús dxácatë na' dxusédene' bénneache chale'aj xudau' naga zaj nnita xi'ina dumí cheë xudau'. Quebe nu gudëla Le' lawe' da quebe ne zrin zra cheë'.

*Dxenná Jesús: "Naga cha'a neda' quebe gaca sa'le le'e"*

<sup>21</sup> Nadxa Jesús guzrë' benne' ca':

—Wexá'a neda', na' le'e xexilajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

<sup>22</sup> Nadxa benne' judío ca' gulé ljwezrë':

—¿Gute cuinë', ne cheë le' na' dxenné' quebe gaca chéajdxu naga cheaj Le'?

<sup>23</sup> Nadxa Jesús guzrë' benne' ca':

—Le'e nácale cheë zran xabáa nigá. Neda' naca' cheë xabáa na'la. Le'e nácale cheë xëzr la xu nigá. Neda' quebe naca' cheë xëzr la xu nigá.

<sup>24</sup> Cheë le' na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

<sup>25</sup> Nadxa benne' ca' buluchëbe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudaute'.

<sup>26</sup> Délé'e da dxal-la' nnia' chee, ne da dxal-la' guchi'a ca naca da dxunle. Bénnea' gusél-le' neda' dxenné' da li, na' da dxapa' bénneache naca na da ba benda' gunné Le', lácala quebe dxezaca ba lázrele na.

<sup>27</sup> Benne' ca' quebe guléajni'ing' dxuchálajle Jesús le' ca naca chee Dios, Xre'.

<sup>28</sup> Nadxa Jesús guzre' benne' ca':

—Gate le'e chísale sibe neda', Benne' Gulje' Bénneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxennéa' ca da ba ble'e Xra' neda'.

<sup>29</sup> Bénnea' gusél-le' neda' zúaqueze' neda'. Xra' quebe nucá'ane' neda' tuza' lawe' da tu dxúnzqueza' ca da dxezaca ba lazre' Le'.

<sup>30</sup> Ca gunná Jesús da caní, guléajle benne' zan chee'.

*Benne' zaj naque' chee Dios, ne benne' ca' nuxru dul-la le'*

<sup>31</sup> Nadxa Jesús guzre' benne' judío ca', benne' dxeléajle'e chee':

—Che le'e se típale lu da dxapa' le'e, da li nácale neda' tuze.

<sup>32</sup> Gúnbeale da li, na' da li na' guselá na le'e.

<sup>33</sup> Belexechébe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca' benne' zaj nada'u. ¿Bizr chee na' dxennáu' Lue' lantu'?

<sup>34</sup> Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'.

<sup>35</sup> Nu benne' xu'e lu na' tu benne' ca' benne' nada'u quebe tu súazqueze' xu'u na'. Zrí'inequeze bénnea' wazúatequezebe'.

<sup>36</sup> Chee le' na', che neda', Zrí'ine Xra', guselá' le'e, da li láqueze le'e.

<sup>37</sup> Nezda' nácale le'e xrtia Abraham. Na'a dxaca lázrele gútele neda' lawe' da quebe dxezi' lu na'le da dxapa' le'e.

<sup>38</sup> Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

<sup>39</sup> Belexechébe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham.

<sup>40</sup> Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bene' da caní.

<sup>41</sup> Le'e dxúnquezele ca da dxun xráquezele.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

<sup>42</sup> Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasele' neda'.

<sup>43</sup> ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'.

<sup>44</sup> Xráquezele le'e naca da xriwe'. Le'e nácale chee da na', ne dxaca lázrele gunle ca da dxaca lazre' le' na. Da xriwe' na' naca na wete benne' nédxudaute'. Cabata' dxenné na da li lawe' da quebe bi zua da li nen le' na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na.

<sup>45</sup> Lácala dxapa' le'e da li, le'e quebe dxéajlele chia'.

46 ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajle chia'?

47 Benne' naque' chee Dios dxenne' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

*Cristo ba zúaqueze' nédxudxa ca Abraham*

48 Nadxa benne' judío ca' gulé'je Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

49 Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala.

50 Quebe dxé'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle.

51 Da li dxapa' le'e: Benne' dxune' ca naca dizra' chia', cabata' gátequeze bénnea'.

52 Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' guné' ca naca dizra' chiu' cabata' gátequeze'.

53 ¿Nácadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchálaje' waláz chee Dios. ¿Bízraqueze dxugue cuinu'?

54 Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale.

55 Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'.

56 Xra xrtáule Abraham, bénnea' gutie' nédxudaute, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

57 Nadxa benne' judío ca' gulé'je Jesús:

—Québequeze ne su' chi xun iza, na' ¿dxennáu' blé'enu' Abraham?

58 Jesús bechebe':

—Da li dxapa' le'e, nédxudaute gate quebe ne sua Abraham, báchequeze zua neda'.

59 Nadxa gulequ'é xiaj chee xelu'je Jesús, na' Le' bcache cuine'. Bdege' ládujla benne' ca', na' bedxúaje' chale'aj xudau', ne bezé'e.

## 9

*Jesús dxexune' tu benne' gúlaje' la chul-la*

1 Gate gudé Jesús tu lataj, na' blé'ene' tu benne' gúlaje' la chul-la.

2 Benne' ca' dxusede Jesús buluchébe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben léqueze' dul-la?

3 Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá.

<sup>4</sup> Dxácatę naca te zra dxal-la' guna' zrin cheę Bénnea' nasel-le' neda' lawe' da ba za da chul-la gate netú benne' quebe seque' gunę' zrin.

<sup>5</sup> Dxácatę ne zua' neda' xęzr la xu nigá, naca' xel-la' naxani' cheę bénneache.

<sup>6</sup> Ca gudé gunná Jesús da nigá, na' bzre'ę zrene' lu xu, ne bene' guna' nen zrene' na', na' btupe' na xiaj lau benne' la chul-la na'.

<sup>7</sup> Nadxa guzre' le':

—Guxíaj xeajtibe lau' lu beaj nisa nazí le na Siloé. (Dizra' nigá zéaję na: Da Nasel-la Na.)

Benne' la chul-la na' guxíaję' xeajtibe lawe', na' gate bezrine' ba dxelé'ene'.

<sup>8</sup> Nadxa benne' walíZR cheę' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bénnea' dxebé'ę dxenabe' guna'?

<sup>9</sup> Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

<sup>10</sup> Nadxa buluchebe' le':

—¿Ájazra na' ba dxelé'enu'?

<sup>11</sup> Bechebe bénnea':

—Bénnea' le' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xeajtibe lau'.” Guxá'a na', na' gate gudiba' lawa', guca ble'eda'.

<sup>12</sup> Nadxa buluchebe' le':

—¿Ga na' zua bénnea'?

Le' guzre' benne' ca':

—Quebe nezda'.

### *Benne' fariseo ca' dxuluchebe' bénnea' guque' la chul-la*

<sup>13</sup> Nadxa benne' ca' guleché'ę bénnea' guque' la chul-la lau benne' fariseo ca'.

<sup>14</sup> Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'.

<sup>15</sup> Cheę le' na' benne' fariseo ca' buluchebe' bénnea' guque' la chul-la ájazra guca dxelé'ene'. Le' guzre' benne' ca':

—Bzrię' guna' xiaj lawa', na' bexiba' na, ne dxelé'eda'.

<sup>16</sup> Nadxa bal-la benne' judío ca' gulenné':

—Bénnea' bene' da nigá quebe naque' cheę Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxunę' xel-la' waca zrente caní che naque' benne' dul-la?

Ca'an guca, gulaca chupa la'a benne' fariseo ca'.

<sup>17</sup> Xecha lasa buluchebe' bénnea' guque' la chul-la:

—¿Bi dxennáu' lue' cheę bénnea' bexunę' lue'?

Le' gunné':

—Neda' dxennéa' naque' benne' dxuchalaje' waláz cheę Dios.

<sup>18</sup> Benne' judío ca' quebe guléajle'ę guque' la chul-la, ne na'a dxelé'ene', na' gulenné' xra xrna bénnea' bexaque'.

<sup>19</sup> Na' buluchebe' xra xrna bénnea':

—¿Nácaqueze benne' nigá zrí'inele, dxennale le'e gúlaję' la chul-la? ¿Ájazra na' dxaca dxelé'ene'?

<sup>20</sup> Belexechebe xra xrne'e:

—Nézentu' benne' nigá naque' zrí'inentu', ne gúlaję' la chul-la.

<sup>21</sup> Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

<sup>22</sup> Caní gulenná xra xrne'e lu xel-la' dxelezrebe lawe' da ba zaj nun benne' xíchaję cheę judío ca' tuze dizra' xelexebáję' xu'u na' núteteze benne' xechébe' Jesús naque' Cristo.

<sup>23</sup> Cheę le' na' gulenná xra xrne'e: “Le guchebe le'. Ba nápaqueze' iza.”

<sup>24</sup> Nadxa benne' judío ca' belenné' bénnea' guque' la chul-la, na' gulé'e le':

—¿Gunné da li lau Dios! Nézentu' naca benne' nigá benne' dul-la.

<sup>25</sup> Le' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

<sup>26</sup> Na' buluchébequeze' le':

—¿Bizra bęne' chiu'? ¿Ájazra bęne' cheę bexune' xiaj lau'?

<sup>27</sup> Na' bechebe bénnea':

—Ba gucha' le'e, ne quebe dxénele chia'. ¿Bizr cheę na' dxaca lázrele nnia' xetú? ¿Cá'anqueze le'e dxaca lázrele gácale Le' tuze?

<sup>28</sup> Nadxa benne' judío ca' gulenné' schanni' cheę bénnea' guque' la chul-la, dxelenné':

—Lue' da'u bénnea', na' netu' da'ntu' Moisés.

<sup>29</sup> Netu' nézentu' Dios bchálajęne' Moisés. Quebe nézentu' ga benne' benne' nigá.

<sup>30</sup> Nadxa bénnea' bechebe':

—Da nigá naca na da dxebáneda'. Le'e quebe nézele ga bénnea', na' bexune' xiaj lawa'.

<sup>31</sup> Nézquezdxu Dios quebe dxenne' cheę benne' dul-la. Tuze dxenne' cheę benne' ca' dxulucá'ana szrene' Le', ne dxelunę' ca da dxaca lazre' Le'.

<sup>32</sup> Quebe ne xendxu che nu benne' xexunę' tu benne' gúlaję' la chul-la.

<sup>33</sup> Chela benne' nigá quebe naque' cheę Dios, quebe gaca bi gunę'.

<sup>34</sup> Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzėjni'inu' netu'?

Nadxa belexebáję' le' lu xu'u na'.

### *Benne' zaj naque' la chul-la lu xichaj lázrdawe'*

<sup>35</sup> Jesús benne' belexebáję' bénnea' guque' la chul-la, na' gate bezrague' le', guzre' le':

—¿Dxėjle'u lue' cheę Zri'ine Dios?

<sup>36</sup> Benne' na' guzre' Jesús:

—Xran, guzre neda' Nu na', cheę chėjle'a cheę'.

<sup>37</sup> Bechebe Jesús:

—Ba blé'eqeznu' Le'. Neda', dxuchálajęna' lue' naca' Bénnea'.

<sup>38</sup> Nadxa benne' na' bzu zribe' lau Jesús, na' gunné':

—Dxėjle'a chiu', Xran.

<sup>39</sup> Nadxa gunná Jesús:

—Neda' bla'a lu xęzr la xu nigá cheę guchi'a ca da dxelún bėnneache, cheę xelexe' la chul-la ca', ne cheę xelexaca ca la chul-la benne' ca' dxelenne' dxelele'eng'.

<sup>40</sup> Nadxa bal-la benne' fariseo ca', benne' zaj zře'e nen Jesús, gate belenne' da nigá gunná Jesús, buluchebe' Le':

—¿Cá'anqueze netu' nácantu' la chul-la?

<sup>41</sup> Jesús bechebe':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' cheę le na' nabágale dul-la.

## 10

### *Dxuchalaj Jesús da dxulé'e na ca naca cheę le'aj cheę zrila' ca'*

<sup>1</sup> Na' gunná Jesús:

—Da li dxapa' le'e, bėnnea' quebe dxu'e dxu'a dxa xu'u cheę le'aj cheę zrila' ca', na' dxu'e naga xula, naque' gubán, ne tu dxebánqueze'.

<sup>2</sup> Bėnnea' dxu'e dxu'a dxa xu'u na' naque' benne' dxuxúequeze' zrila' ca'.

<sup>3</sup> Bėnnea' zue' dxu'a dxa xu'u dxesálaje' cheę chu'u bėnnea' dxuxúequeze'-ba', na' zrila' ca' dxelexúnbeaba' chi'e. Benne' nigá dxu'e la tu tu zrila' ca', ne dxebaje'-ba' lu le'aj cheęba'.

<sup>4</sup> Ca dxedé dxebaje' xúgute'ba', na' dxebía lawe' lauba', na' zrila' ca' zjácáleba' Le', lawe' da dxelexúnbeaba' chi'e.

<sup>5</sup> Quebe zjácáleba' tu benne' quebe zaj núnbeaba'. Dxuluzrúnmuja' lau benne' na' lawe' da quebe dxelexúnbeaba' chi'i benne' quebe zaj núnbeaba'.

<sup>6</sup> Bchálaje' Jesús benne' ca' da dxulé'e nigá, na' benne' ca' quebe gulėjajni'ing' bi zėjaje da guzre Jesús le'.

### *Jesús naque' benne' chawe' dxuxúe' zrila' ca'*

<sup>7</sup> Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bėnneache zaj naque' ca zrila' chia' ca'.

<sup>8</sup> Xúgute' benne' dxuluxúe' zrila', benne' belele'e nédxudxa ca neda', gulaque' gubán, ne tu gulebánqueze'. Zrila' ca' quebe belėneba' cheę benne' ca'.

<sup>9</sup> Neda' naca' dxa xu'u. Bėnnea' chu'e ne chia' neda', láqueze bėnnea'. Gaque' ca tu zrila' dxu'uba', ne dxuajba' le'aj cheęba', na' dxezreleba' zriędu dxáguba'.

<sup>10</sup> 'Benne' gubán ze'e tuze cheę cuane'-ba', ne cheę gúte'-ba, ne cheę guzria xi'te'-ba'. Neda' bla'a cheę gápale xel-la' nabán, ne cheę gapa xánnele na.

<sup>11</sup> Neda' naca' benne' chawe' dxuxúe' zrila' ca'. Benne' chawe' dxuxúe' zrila' ca' dxuzúe' xel-la' nabán cheę cheę guselé' zrila' ca'.

<sup>12</sup> Benne' dxuxúe'-ba' lawe' da dxezi'e lazruj, gate dxelé'eng' za becu' xi'a, na' dxusane' zrila' ca', ne dxuzrúnmuje', lawe' da quebe nácaqueze' benne' dxuxúe' le'ba', na' zrila' ca' quebe zaj náca'ba' be cheęzeze'.

<sup>13</sup> Benne' nigá dxuzrúnmuje' lawe' da dxunze' zrin cheę si'e lázruje', na' quebe dxe'e gunne xue cheęba'.

<sup>14-15</sup> 'Neda' naca' benne' chawe' dxuxúe' zrila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zrila' chia' ca', na' le'ba' zaj núnbeaba' neda'. Neda' dxuzúe' xel-la' nabán chia' cheę guselé' zrila' ca'.

<sup>16</sup> Cá'anqueze zaj zra' zrila' chia' quebe zaj zra'ba' lu le'aj nigá. Dخال-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' le'ba'.

<sup>17</sup> 'Xra' nazrí'ing' neda' lawe' da dxuzúe' xel-la' nabán chia', na' xecá'a na.



18 Quebe nu seque' cua xel-la' nabán chia'. Neda' xuzúa' na cáteze dxaca lázrequeza' neda'. Napa' xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

19 Gate benne' judío ca' belenne' dizra' caní, na' gulaque' chupa la'a xetú.

20 Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

21 Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la?

### *Dxuluzúa benne' judío ca' Jesús chalá'ala*

22 Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios.

23 Jesús dxedé' chale'aj xudau' na' naga naca lachila chee Salomón.

24 Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátegala.

25 Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'.

26 Le'e quebe dxéajlele chia' lawe' da quebe nácale zrila' chia', ca ba gucha' le'e nédxula.

27 Zrila' chia' dxelexúnbeaba' chí'a, na' neda' núnbe'a-ba', na' leba' dxelauba' neda'.

28 Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebía xí'e, na' quebe nu seque' xecá'a le' lu na'a neda'.

29 Xra' bñne' neda' benne' caní, na' Le' nácadxe' szren ca xúgutē bñneache, na' quebe nu seque' xecá'a benne' ca' lu na' Xra'.

30 Neda', ne Xra' tuze nácantu'.

31 Nadxa benne' judío ca' gulequé'e xiaj xetú chee xelúti'e Jesús.

32 Nadxa Jesús guzre' benne' ca':

—Ba bñnequeza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

33 Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bñneache, na' dxun cuinu' Dios.

34 Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'.

35 Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulezí'e xrtizre' zaj naque' dios ca'.

36 Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios?

37 Che quebe dxuna' ca naca da dxun Xra', quebe chéajlele chia'.

38 Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

39 Xetú lasa gulaca lazre' xelēl-le' Jesús, na' Le' gulé' lu na' benne' ca'.

<sup>40</sup> Nadxa bezrín Jesús dxu'a xęgu Jordán chalá'a naga dxalaj gubizra, na' begá'ane' na', naga guzúa Juan nédxutę dxuchúę' bėnneache nisa.

<sup>41</sup> Benne' zan xjaque' xeajlennę'e Jesús, na' gulennę':

—Juan, da li quebe bi xel-la' waca zren bęne', na' xúgute da gunnę' ca naca cheę benne' nigá naca na da li.

<sup>42</sup> Benne' zan guléajle'e cheę Jesús lataj na'.

## 11

### *Ca guca gate gute Lázaro*

<sup>1</sup> Zua tu benne' dxé'eng' le' Lázaro, benne' xęzre Betania, da naca na lazre María, ne bi bile' le' Marta.

<sup>2</sup> María nigá, bi zan Lázaro, benne' dxé'eng' na', naque' nu'ula na' gulu'e ni'a Jesús da na' dxelále'e zixre, ne bsebizre' na nen xicha xíchaję'.

<sup>3</sup> Dxúpatę nu'ula caní gulesel-le' benne' xeajzeze' Jesús:

—Xran, bėnnea' nazrí'inu' quebe chawe' zue'.

<sup>4</sup> Ca ben Jesús da nigá, na' gunnę':

—Da dxé'eng' quebe naca na da gúteę na le'. Naca na cheę gulé'e lau na xel-la' szren cheę Dios, ne cá'anqueze cheę gulé'e lau na xel-la' szren chia' neda', Zrí'ine Dios, ne cheę xel-la' wę' na'.

<sup>5</sup> Lácala nazrí'i Jesús Marta, ne bi bile', ne Lázaro,

<sup>6</sup> gate benne' quebe chawe' zua Lázaro na', begá'ane' naga zue' xechupa zra.

<sup>7</sup> Ca gudé na' guzre' benne' ca' dxusédenę':

—Le chu'u naga nababa Judea xetú.

<sup>8</sup> Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelútię' Lue' nen xiaj. ¿Dxaca lazru' chėjaju' na' xetú?

<sup>9</sup> Jesús guzre' benne' ca':

—¿Quebe nun Dios dutę te zra gate dxelún bėnneache zrin? Che nu benne' dxdé' te zra, quebe cheajchazię' lu da stębe lawe' da dxelé'eng' xel-la' naxaní' da nuzúa Dios lu xęzr la xu nigá.

<sup>10</sup> Che nu benne' dxdé' chizrela, dxechęgüę' lawe' da quebe zúale xel-la' naxaní' le'.

<sup>11</sup> Ca gudé na' guzre Jesús benne' ca':

—Benne' Ijwézredxu Lázaro ba dxásię'. Cha'a neda' cheajsebana' le'.

<sup>12</sup> Nadxa benne' ca' gulé'e Jesús:

—Xran, che dxásię', wexaque'.

<sup>13</sup> Da nigá da gunná Jesús zéaję na ba gute Lázaro. Benne' ca' dxusédenę' guléquene' gunná Jesús dxáseze'.

<sup>14</sup> Nadxa Jesús bzėjni'ine' benne' ca', gunnę':

—Ba gútequeze Lázaro.

<sup>15</sup> Dxebeda' lawe' da quebe zua' na'. Caní gácadxa chawe' cheęle le'e, cheę chėjlele chia'. Le chu'u cheajnnadxu Lázaro.

<sup>16</sup> Nadxa Tomás, bėnnea' lęqueze' bilide', guzre' xezícala benne' ca':

—Le chú'unqueze dxi'u cheę gátedxu tu zren nen Jesús.

*Jesús naque' benne' dxusebane' benne' gate ca', ne benne' dxunnę' dxi'u xel-la' nabán li lazre'*

<sup>17</sup> Gate belezrine' xęzre Betania, na' bene Jesús gudapa zra bulucache' Lázaro.

18 Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na',

19 na' benne' zan benne' judío ca' xjaque' xeajlenné'e Marta ne María, na' xulunézruje' le' xel-la' zren lazre' lawe' da gute bi zane'.

20 Gate ben Marta ba za' Jesús, na' guzé'e zeajxrígalé' Le', na' María begá'ane' xu'u.

21 Marta guzre' Jesús:

—Xran, chela zu' nigá, quebe gute bi zana'.

22 Neda' nezda' Dios gunne' Lue' bíteteze da nabu'.

23 Jesús gunné':

—Webán bi zanu'.

24 Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

25 Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle'e chia, lácala gatie', webane',

26 na' xúgute benne' zaj naca bané', ne dxeléajle'e chia, québequeze xelatíe' tu chí'ize. ¿Dxéajle'u da nigá?

27 Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

*Jesús dxebezre' lawe' da zaj zua baxache' nu'ula ca'*

28 Ca gudé gunná Marta da nigá, na' guxíaje' xeajzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

29 Ca ben María da nigá, na' guxase' guzé'e, xeajnné'e Jesús.

30 Jesús quebe ne chu'e xezre na', na' zue' naga bezraga Marta Le'.

31 Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácale benne' caní le', dxeléquene' zéaje' dxu'a ba zeajchezre' na'.

32 Gate bzin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

33 Gate ble'e Jesús dxebezre María, ne cá'aqueze dxelebezre judío ca', benne' zjácálene' María, na' bexíajele'ene', ne guzúe' stebe lu lázrdawe'.

34 Na' bchebe' benne' ca':

—¿Ga bcáchele bénnea'?

Na' gulé'e Le':

—Xran, gudá le'enu'.

35 Na' gudxezre Jesús.

36 Nadxa gulenná benne' judío ca':

—Le nna'xque cátité nazrí'ine' le'.

37 Bal-la benne' ca' gulenné':

—Benne' nigá bexune' benne' la chul-la. La zue' nigá, ¿quebe guzéquene' ájala gune' chee quebe gute Lázaro?

*Jesús dxusebane' Lázaro*

38 Jesús guzúe' stebe xetú, na' bzrine' dxu'a ba. Ba na' naca na tu bluaj, na' da' tu xiaj ta'a dxu'e na.

39 Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bènnea' tula, lawe' da ba guca tapa zra na'a gutie'.

<sup>40</sup> Na' Jesús gunné':

—¿Quebe gucha' lue' che chéajle'u chia', walé'enu' xel-la' szren chee Dios?

<sup>41</sup> Nadxa belexequ'e' xiaj ta'a na'. Jesús guné'e' xabáa, gunné':

—Xrae, dxapa' Lue': "Xcalenu'" lawe' da ba bennu' chia'.

<sup>42</sup> Neda' nezda' tu dxénzquezenu' chia'. Dxennéa' da nigá chee gaca tu da ba neza chee benne' caní, chee xeléajle'e' chiu' nasel-lu' neda'.

<sup>43</sup> Ca gudé gunné' da nigá, na' gunné' zizraj:

—¡Lázaro, bedxúaj nigá!

<sup>44</sup> Bedxúaj benne' gate na', nadxéaj ni'a ne'e' nen ládxe'dau' da buluchele' ni'a ne'e', na' lawe' dxela na ladxe'. Jesús guzre' benne' ca':

—Le xesezre', ne le gusané' xexíaje'.

*Benne' dxeledábaque' Jesús dxelune' tuze dizra' xelél-le' Le'*

(Mt. 26.1-5; Mr. 14.1-2; Lc. 22.1-2)

<sup>45</sup> Nadxa guléajle benne' zan chee Jesús, benne' judío ca' xjácale María, ne belelé'ene' ca da ben Jesús.

<sup>46</sup> Bal-la benne' ca' xjaque' xeajlechálajlene' benne' fariseo ca', na' buluzenne' le' ca da ben Jesús.

<sup>47</sup> Nadxa fariseo ca', ne benne' xíchaje ca' chee bxruze ca' belezrague' nen benne' xu'u lawe' blau chee judío ca', na' gulenné':

—¿Ajazra gundxu? Benne' nigá dxúnle'e' xel-la' waca da za xabáa.

<sup>48</sup> Che ca' güedxu Le' lataj, xúguté bènneache xeleajlé'e' chee' chee xuluzúe' Le' ca wenna' bea, na' xelélé' benne' Roma ca', benne' zjaque' wedil-la, na' xuluzría xi'e' xudau' cheedxu, ne xezr la xu cheedxu.

<sup>49</sup> Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele,

<sup>50</sup> ne quebe dxeque be'ele gácadxa chawe' cheedxu gate' tuze benne' ne chee xezre nigá, ne quegala ca naca xezr la xu nigá cuía xi na.

<sup>51</sup> (Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz chee Dios, gunné' gate' Jesús ne chee xezr la xu judío.

<sup>52</sup> Quegá gatie' tuze ne chee xezr la xu naze. Cá'anqueze chee xutupe' lu na' Dios xúguté benne' zaj naque' chee Dios, benne' zaj nase dínnaje', benne' ca' zaj nababe' xúguté cue' xezr la xu.)

<sup>53</sup> Ca'an guca, ca lu zra na'te benne' judío wenna' bea ca' belune' tuze dizra' xelútie' Jesús.

<sup>54</sup> Chee le na' Jesús québedxa gudé' naga zaj zra' benne' wenna' bea ca' chee judío ca', na' guzé'e' naga nababa Judea, na' guxíaje' xezre Efraín naga zua gáguze tu le'e' xixre' lawe' lataj. Begá'ane' xezre na' nen benne' ca' dxusédené'.

<sup>55</sup> Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua.

<sup>56</sup> Guledé' dxelexílaje' Jesús, na' gate zaj zre'e' chale'aj xudau' na', buluchebe ljwezre':

—¿Ajazra dxéquele? ¿Wide' laní, che quebe xide'?

<sup>57</sup> Benne' fariseo ca', ne benne' xíchaje ca' chee bxruze ca' ba gulebéaje' dizra' che nu benne' ca' nézené' ga zua Jesús, na' xelé'e' benne' ca' chee gaca xelél-le' Le'.

## 12

*María dxugu'e da dxelá zixre ni'a Jesús*  
(Mt. 26.6-13; Mr. 14.3-9)

<sup>1</sup> Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaró, bènea' bsebán Jesús ládujla benne' gate'.

<sup>2</sup> Lu xezre na' belune' tu xrche', chee gulape' ba lá'ana Jesús. Marta bde'e' xel-la' wagu, na' Lázaró dxé'le'e' benne' ca' dxelágu'le'e' Jesús.

<sup>3</sup> Nadxa María guqu'e' tu xia da za da dxelá'le'e' zixre, da naca na chee dusén lase, da zácale'e' na, na' gulu'e' da za na' ni'a Jesús, ne bsebize' na nen xicha xíchaj'e'. Ca naca benne' zaj zra' xu'u na' gulelé'e' ca dxelá da zixre na'.

<sup>4</sup> Nadxa Judas Iscariote, zri'ine Simón, tu benne' ca' dxusede Jesús, ne naque' bènea' gudé'e' Jesús lu na' benne' guledábague' Le', gunné':

<sup>5</sup> —¿Biz chee na' quebe gudá'u da zixre na', na' sidxu na dumí lazruj chee chunna gaxúa zra chee gácale'dxu benne' xache' ca'?

<sup>6</sup> Quebe gunná Judas da nigá lawe' da dxe'e' gunne xue chee benne' xache' ca'. Naque' gubán, ne nu'e' bzude dumí chee benne' ca' dxusede Jesús, ne dxeban'e' late' weaj dumí na' da dxuluzré'e' lu bzude na'.

<sup>7</sup> Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xedxu ba.

<sup>8</sup> Benne' xache' ca' tu zrázquez'e' ládujla le'e. Neda' quebe tu súazqueza' nen le'e.

*Dxelun'e' tuze dizra' xelúti'e' Lázaró*

<sup>9</sup> Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e' Jesús. Cá'anqueze zeajlenné'e' Lázaró, bènea' bsebán Jesús ládujla benne' gate ca'.

<sup>10</sup> Nadxa benne' xíchaj'e' ca' chee bxruze ca' belun'e' tuze dizra' cá'anqueze xelúti'e' Lázaró,

<sup>11</sup> lawe' da ne chee Lázaró benne' zan benne' judío ca' dxelebéaj xíchaj'e' bxruze ca' chee xeajlé'e' chee Jesús.

*Dxexú'u Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'.

<sup>13</sup> Nadxa gulechugue' zina', na' xjaque' xeajlexrígal'e' Jesús, ne dxelenné' zizraj:

—¡Gaca ba lá'azxa Dios! ¡Ba neza zrent'e' naca na chee Benne' ze'e' waláz chee Xránadxu Dios! ¡Ba neza zrent'e' naca na chee Wenná Bea chee xezre Israel!

<sup>14</sup> Jesús xeajxraque' tu burro, na' guzri'e'-ba', ca naxúaj na lu xiche chee Dios, dxenná na:

<sup>15</sup> Quebe zrébele le'e, benne' zré'e' xezre Sión.

Le nna'xque, ba za' Wenná Bea chee'e.

Zri'e' tu burro.

<sup>16</sup> Nédxute' benne' ca' dxusede Jesús quebe guléajni'ine' da na' dxaca na. Ca gudé na', gate begá'ana szren Jesús lau Dios, na' xeajlesá lazre' xúgute' da caní zaj naxúaj na lu xiche chee Dios ca naca chee Jesús, na' ca'an guca chee'.

<sup>17</sup> Benne' ca' zaj zré'e' nen Jesús gate gunné' Lázaró lu xedxu ba, ne bxeban'e' le' ládujla benne' gate, buluzenne' bèneache Jerusalén ca da guca na'.

18 Chee le na' benne' caní xeaajlexrígale' Jesús lawe' da belenne' ca naca xel-la' waca zrente da bene'.

19 Nadxa benne' fariseo ca' gulé ljwezre':

—Ba dxelé'ele quebe séquedxu bi gundxu. Ca naca bènneache dxelune' Le' tuze.

*Dxelexilaj benne' griego ca' Jesús*

20 Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrene' Dios lu laní na'.

21 Benne' caní belezrine' lau Felipe, benne' Betsaida chee ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

22 Felipe guxiájé' xeaajezre' Andrés caní, na' xjaca dxupe' xeaajleguezre' Jesús ca'.

23 Nadxa Jesús guzre' benne' dxupa ca':

—Ba bzzrin zra xegá'ana szrena' neda', Benne' Gulje' Bènneache.

24 Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'.

25 Benne' dxe'e gunne xue gapa chi'e xel-la' nabán chee' gunitie' na. Bénnea' dxuzúe' chalá'ala xel-la' nabán chee' lu xezr la xu nigá, gapa chi'e na, ne zrué'ene' xel-la' nabán da zeajli canna.

26 Che nu benne' dxaca lazre' guné' zrin chia', dxal-la' gaque' neda' tuze, na' gáteteze sua' neda', na' súaqueze benne' dxune' zrin chia'. Che nu benne' dxune' zrin chia', Xra' gape' le' ba lá'ana.

*Jesús dxuchálaje' ca gaca gate gatie'*

27 Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqueza' chee gaca chia' da caní.

28 Xrae, bca'ana szren lau'.

Nadxa ben tu chí'i benne' dxenné' xabáa:

—Ba bca'ana szrena' na, ne gucá'ana szrena' na xetú.

29 Benne' ca' zre'e na' dxelenne' gulenné' guziu' gunné'. Xebal-le' gulenné':

—Tu gubáz chee xabáa bchálajlene' Le'.

30 Nadxa Jesús guzre' benne' ca':

—Quegá gunné' chi'e na' ne chia' neda'. Gunné na ne chee le'e.

31 Na'a ba bzzrin zra guchi'a Dios chee bènneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na.

32 Gate xelexise' neda' lu xezr la xu nigá le'e xaga béguaj, na' neda' nnia' xúgute bènneache chee xelaque' neda' tuze.

33 Gate gunné' caní, ble'e Jesús ca gatie'.

34 Nadxa benne' zan ca' gulé'e Jesús:

—Netu' bémentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxenná' Benne' Gulje' Bènneache xelexise' Le'? ¿Nuzra na' Benne' Gulje' Bènneache?

35 Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácaté ne zua xel-la' naxaní' nen le'e, chee quebe xrinnele, lawe' da benne' dxedé' lu da chul-la quebe nézene' ga zéaje'.

<sup>36</sup> Le cheajlé chee xel-la' naxaní' da naca' neda' dxácate zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

*Benne' judío ca' quebe dxeajlé'e chee Jesús*

<sup>37</sup> Lácala ble'e Jesús zane' xel-la' waca zrente lau benne' judío ca', quegá xúgute' guleajlé'e chee',

<sup>38</sup> lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

<sup>39</sup> Ca'an guca, quebe guca xeleajlé'e chee' lawe' da caní gunnáqueze Isaías na':

<sup>40</sup> Dios bene' benne' ca' la chul-la, ne bene' zide' lázrdawe',

chee quebe xelélé'eng' nen xiaj lawe',

ne quebe xeléajni'ing' lu xichaj lázrdawe',

ne quebe xelélé'e lawa' neda' chee xexuna' le'.

<sup>41</sup> Isaías na' gunné' da nigá lawe' da blé'eng' xel-la' szren chee Jesús, ne bchálaje' ca naca chee'.

<sup>42</sup> Zane' benne' judío ca' guléajlé'e chee Jesús, ne cá'aqueze bal-la benne' xíchaje' ca'. Quebe belexechebe' lówela bénneache lawe' da belezrebe' da xelún benne' fariseo ca', chee quebe xelexebéaje' le' xu'u naga dxelezrague'.

<sup>43</sup> Caní belung' lawe' da beledánedxeng' xel-la' ba lá'ana da dxelúe bénneache le' ca xel-la' ba lá'ana da dxue Dios le'.

*Dizra' chee Jesús guchi'a na chee da dxelún bénneache*

<sup>44</sup> Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'aqueze dxéajlé'e chee Xra' nasele' neda'.

<sup>45</sup> Bénnea' dxelé'eng' neda', dxelé'equezne' Xra' nasele' neda'.

<sup>46</sup> Neda', xel-la' naxaní', bla'a lu xezr la xu nigá chee quebedxa xelexegá'ana benne' dxeléajlé'e chia' lu da chul-la.

<sup>47</sup> Che nu benne' dxenne' dizra' chia', ne quebe dxunge' ca naca na, quegá neda' guzría xi'a le', lawe' da quebe bla'a neda' chee guzría xi'a bénneache. Bla'a chee guselá' benne' ca'.

<sup>48</sup> Benne' dxuzúe' neda' chalá'ala, ne quebe dxunge' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bénnea' lu zra bzebe na'.

<sup>49</sup> Caní gaca na lawe' da quebe dxuchálaja' cheézqueza', lawe' da Xra' nasele' le' neda' ba gunná bé'eng' neda' bi dxal-la' nnia', ne bi dxal-la' gusededa'.

<sup>50</sup> Neda' nezda' gunná be'e Xra' neda' caní chee xezezeque bénneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

## 13

*Jesús dxibe' ni'a benne' ca' dxusédene'*

<sup>1</sup> Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra zezé'e lu xezr la xu nigá chee xexíaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gulé'eng' benne' ca' tu da zrendxa da gulé'e na nazrí'ing' le'.

2-4 Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee' gudé'e' Jesús lu na' benne' guledábague' Le'. Nézqueze Jesús zé'e' naga zua Dios, ne dxal-la' xezrine' naga zua Dios, na' Xre' ba bnézruje' Le' duté' xel-la' dxenná' bea. Chee' le' na', gate dxelawe' xrche', guxasa Jesús, na' gudé'e' ladxe' naxrúa' cuzre', ne bnase' tu ladxe' dxu'a' le'e'.

5 Nadxa gudé'e' nisa tu zriga xia zren, ne guzú' lawe' dxibe' ni'a benne' ca' dxusédené', na' bsebizre' ni'e' nen ladxe' na' da nunase' dxu'a' le'e'.

6 Ca bzrine' chee' quibe' ni'a Simón Pedro, le' guzre' Jesús:

—Xran, ¿Lue' quibequezu' ni'a'?

7 Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

8 Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

9 Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

10 Jesús guzre' le':

—Benne' ba bexuzrte' guzje', tuze ni'e' dxal-la' chadxelawe' da ba naxádxexeze'. Le'e' ba naxádxele, san quegá xúgutele.

11 Gunná Jesús: “Quegá xúgutele”, lawe' da nézene' nu na' gudé'e' Le' lu na' benne' dxeledábague' Le'.

12 Ca gudé' gudibe Jesús ni'a benne' ca', na' bexrúe' ladxe' chee' cuzre', ne bebe'e' ga dxelawe', na' guzre' benne' ca':

—¿Dxéajni'ile le'e' da ba bēna'?

13 Le'e' dxele neda': Benne' Weséde, ne: Xran, na' caní dxal-la' nnale lawe' da caní naca'.

14 Che neda', Benne' Weséde chee'le, ne Xránale, ba gudiba' ní'ale, cá'anqueze le'e' dxal-la' quibe'le ni'a ljwézrele tule xetule.

15 Neda' ba ble'eda' le'e' tu da dxulé'e' na, chee' gunle le'e' ca da bēna' neda'.

16 Da li dxapa' le'e', tu benne' wen zrin quebe nácadxe' szren ca xrané', na' tu benne' gubáz quebe nácadxe' szren ca benne' nasel-le' le'.

17 Che dxéajni'ile da caní, ne dxunle ca zaj naca na, gaca chee'le tu da ba neza.

18 'Quebe dxuchálaja' chee' xúgutele le'e'. Neda' núnbe'a benne' ca' gucá'a, san dxal-la' gaca ca naxúaj na lu xiche chee' Dios, dxenná' na: Benne' dxágule neda' ba gudábague' neda' chee' gudé'e' neda'.

19 Dxapa' le'e' da nigá' na'a, nédxula gate quebe ne gaca na, chee' gate gaca na, na' chéajlele le'e' zúaqueza' neda'.

20 Da li dxapa' le'e': Benne' dxezi' lu ne'e' Bénnea' dxusel-le' neda', neda' na' dxezi' lu ne'e', na' benne' dxezi' lu ne'e' neda', dxezi' lu ne'e' Xra' nasel-le' neda'.

*Dxenná Jesús gudé' Judas Le' lu na' benne' dxeledábague' Le'*

*(Mt. 26.20-25; Mr. 14.17-21; Lc. 22.21-23)*

21 Ca gudé' gunná Jesús da nigá, na' guzúe' stebe lu xichaj lázrdawe', na' bzéajni'ine' benne' ca', gunné':

—Da li dxapa' le'e', tu benne' ládujla le'e' gudé'e' neda' lu na' benne' ca' dxeledábague' neda'.

22 Nadxa benne' ca' dxuséde Jesús gulezú lawe' dxelenná' ljwezre', ne quebe zaj nézene' nu chee' na' dxuchalaj Jesús.



<sup>23</sup> Tu benne' ca' dxusede Jesús, bénnea' nazrí'ile'e Jesús le', zu'e' cuita Jesús naga dxelawe' xrche',

<sup>24</sup> na' Simón Pedro bene' tu da dxunna bea lau bénnea' chee' guchebe' Jesús nu chee' na' dxenné' caní.

<sup>25</sup> Nadxa bénnea' de'e' cuita Jesús bchebe' Le':

—Xran, ¿nuzra na'?

<sup>26</sup> Bechebe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na chee' Judas Iscariote, zri'ine Simón.

<sup>27</sup> Ca gucá'a Judas xeta xtila na', na' da xriwe' guxú'ute na lu xichaj lázrdawe'. Nadxa Jesús guzre' le':

—Da dxal-la' gunu', béntega na.

<sup>28</sup> Benne' ca' zaj zre'e' dxelawe' na' quebe guléajni'ine' bizr chee' na' guzre' Judas na' caní.

<sup>29</sup> Lawe' da nua Judas bzude' dumí, bal-le' guléquene' Jesús guzre' le' bi si'e' chee' laní na', u bi gunézruje' benne' xache' ca'.

<sup>30</sup> Ca gudé gudagu Judas xeta xtila na', na' bdxúaje'. Ba guxrinne.

### *Da nadxiruj bea cube*

<sup>31</sup> Ca gudé bdxuaj Judas, gunná Jesús:

—Na'a gulé'e' lau xel-la' szren chia' neda', Benne' Gulje' Bénneache, na' regá'ana szren Dios ne' chia' neda'.

<sup>32</sup> Che neda', Benne' Gulje' Bénneache, dxulé'eda' ca naca xel-la' szren chee' Dios, na' Dios gulé'ene' ca naca xel-la' szren chia' neda', ne la gúntequeze' na.

<sup>33</sup> Le'e, bidu chia' ca', québedxa sua' scha' nen le'e. Le'e wexilajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'.

<sup>34</sup> Tu da cube dxixruj be'eda' le'e. Le zri'i le sa' ljwézrele tule xetule ca neda' nazrí'ida' le'e. Caní dxal-la' zri'i ljwézrele tule xetule.

<sup>35</sup> Che nazrí'i ljwézrele tule xetule, na' xúgute' bénneache xeleque bé'ene' nácale neda' tuze.

### *Jesús dxenné' nna Pedro quebe núnbe'e' Le'* (Mt. 26.31-35; Mr. 14.27-31; Lc. 22.31-34)

<sup>36</sup> Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lenu' neda' na'a. Te na'a wadéquezu' naga tea' neda'.

<sup>37</sup> Nadxa gunná Pedro:

—Xran, ¿bizr chee' na' quebe gaca sá'léna' Lue' na'a? Zúaqueza' guzúa' xel-la' nabán chia' chee' guna' Lue' tuze.

<sup>38</sup> Jesús bechebe':

—¿Zúaquezu' guzú' xel-la' nabán chiu' chee' gacu' neda' tuze? Da li dxapa' lue', nédxudxa ca cuezre xjeaj, lue' wannáquezu' chunna lasa quebe núnbe'u neda'.

## 14

### *Jesús naque' neza da dxezrín na naga zua Xradxu Dios*

<sup>1</sup> Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'.

<sup>2</sup> Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj chee'e.

<sup>3</sup> Ca te xexá'a cheajxecueza' lataj chee'e, na' wexelájqueza' xetú chee xedajxexri'a le'e súale neda', chee súale le'e naga súaqueza' neda'.

<sup>4</sup> Le'e nézele naga cha'a, ne núnbeale neza na'.

<sup>5</sup> Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

<sup>6</sup> Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'.

<sup>7</sup> Chela núnbeale neda', cá'anqueze núnbeale Xra'. Ná'atela núnbeale Le' lawe' da ba dxelé'ele Le'.

<sup>8</sup> Nadxa Felipe guzre' Jesús:

—Xran, ble'e netu' Xrau', xetú da ná'teze.

<sup>9</sup> Bechebe Jesús:

—Felipe, scha' ba guzúalena' le'e, na' ¿quebe ne gúnbe'u neda'? Benne' dxelé'ene' neda', dxelé'equenze' Xra'. Chee le na', ¿bizr chee na' dxenabu' neda' gulé'eda' le'e Xra'?

<sup>10</sup> ¿Quebe dxéajle'u zúalena' Xra', na' Xra' zúalene' neda'? Da dxapa' le'e, quegá dxennéa' na cheézqueza'. Xra', Bénnea' zúalene' neda', Léqueze' na' dxune' zrin chee' lu na'a neda'.

<sup>11</sup> Le chéajlele zúalena' Xra', na' Xra' zúalene' neda', u che cabí dxéajlele ca da dxennéa', le chéajle chia' ne chee da ca' dxuna'.

<sup>12</sup> Da li dxapa' le'e, benne' dxéajle'e chia', gúnqueze' ca da dxuna' neda', na' gune' da zaj nácadxa zren ca da caní dxuna' lawe' da xexá'a neda' naga zua Xra'.

<sup>13</sup> Xúgute da ná bale le'e lu La' neda', neda' guna' na, chee gulé'eda' neda' xel-la' szren chee Xra'.

<sup>14</sup> Néda'queza' guna' bíteteze da ná bale lu La' neda'.

### *Jesús dxechebe lazre' sel-le' Be' Lá'azxa*

<sup>15</sup> Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e.

<sup>16</sup> Neda' gata' xueda' Xra' sel-le' chee'e xetú Benne' gácalequeze' le'e, ne súaletecaze' le'e.

<sup>17</sup> Benne' nigá naque' Be' Lá'azxa gulé'ene' le'e ca naca da li. Benne' zaj naca chee xezr la xu nigá quebe xezezéque' xezezí' lu ne'e Le' lawe' da quebe gaca xeelé'ene' Le', ne quebe zaj núnbe'e Le'. Le'e núnbeale Le' lawe' da zúalene' le'e, ne súaqueze' lu xichaj lázrdaule.

<sup>18</sup> Quebe gucá'ana' le'e ca bi wezebe ca'. Welá'queza' súalena' le'e.

<sup>19</sup> Xetú chí'idau' bènneache ca' québedxa xeelé'ene' neda', san le'e welé'ele neda'. Le'e tu gaca bánzqueze' lawe' da tu naca bánzqueza' neda'.

<sup>20</sup> Lu zra na' guéquebe'ele neda' zúalena' Xra', na' le'e zúalele neda', na' neda' zúalena' le'e.

<sup>21</sup> Benne' nézene' ca naca da nadxixruj bea na nuna' neda', ne dxune' na, dxulé'ene' nazrí'iqueze' neda'. Xra' zrí'ing' benne' nazrí'ing' neda', na' cá'anqueze neda' zrí'ida' bènnea', ne gulé' lawa' le'.

<sup>22</sup> Judas, quegá bènnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau bénneache zaj zre'e xezr la xu nigá?

<sup>23</sup> Jesús bechebe':

—Benne' nazrí'ine' neda' dxune' ca naca da dxennéa', na' Xra' zrí'ine' bénnea', na' neda' ne Xra' xedajsúalentu' le'.

<sup>24</sup> Benne' quebe nazrí'ine' neda' quebe dxune' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' naselle' neda'.

<sup>25</sup> Dxapa' le'e xúgute da caní dxácaté ne zúaléna' le'e,

<sup>26</sup> na' Be' Lá'azxa, Bénnea' sel-la Xra' lu La' neda' chee gácaléne' le'e, Le' gulé'engé' le'e xúgute, ne gusá'queze' lázrele ca naca xúgute da ba gucha' le'e.

<sup>27</sup> Xel-la' dxebeza zri lazre' dxuca'ana' chee. Dxunna' le'e xel-la' dxebeza zri lazre' chia'. Quebe dxunna' na ca dxelunna bénneache xel-la' dxebeza zri lazre'. Quebe cuele gunne xue, ne quebe zrébele.

<sup>28</sup> Ba bénele gunnéa' wexá'a, ne welá'a súaléna' le'e xetu'. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren ca neda'.

<sup>29</sup> Da nigá dxapa' le'e na'a nédxula gate quebe ne gaca na, chee gate gaca na, na' chéajle chee da dxennéa'.

<sup>30</sup> 'Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'.

<sup>31</sup> Caní dxal-la' gaca chee xeleneze bénneache neda' nazrí'ida' Xra', ne dxuna' ca da gunná bé'engé' neda'. ¡Le chasa! ¡Le xebú'u nigá!

## 15

### *Jesús dxuchálaje' chee lba uva ne chee zruze na ca'*

<sup>1</sup> Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'angé' na.

<sup>2</sup> Le' dxechuge' zruze na ca' da quebe dxelebía na da zixre, ne dxun chí'e zruze na ca' da dxelebía na da zixre chee xelebíadxa na.

<sup>3</sup> Le'e nácale ca zruze na ca' da ba nun chí'e, ne chee dizra' da ba gucha' le'e.

<sup>4</sup> Le súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalezqueze na xaga na'. Cá'anqueze le'e quebe bi gaca gunle che quebe gácazquezele neda' tuze.

<sup>5</sup> 'Neda' naca' bzigu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxebiále'e na da zixre, lawe' da quebe bi seque' gunle che quebe gácale neda' tuze.

<sup>6</sup> Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

<sup>7</sup> Che le'e súatequezele neda' tuze, ne quebe gusanle dizra' chia', waca nácale ca da dxaca lázrele, na' sile na.

<sup>8</sup> Xra' dxegá'ana szrengé' gate nácale ca zruze na ca' da dxebiále'e na da zixre, ne caní gaca bea na nácale neda' tuze.

<sup>9</sup> Neda' nazrí'ida' le'e ca nazrí'i Xra' neda'. Chee le' na' le súaquezele lu xel-la' zri'i lazre' chia'.

<sup>10</sup> Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

11 'Neda' dxuchálajlena' le'e caní chee súale lu xel-la' dxebé chia', ne chee gaca du lazre' xel-la' dxebé chee.

12 Cani naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e.

13 Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácalene' bi ljwezre' ca'.

14 Le'e nácale bi ljwezra' che dxunle ca da dxixruj be'eda' le'e.

15 Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute' da guzre Xra' neda'.

16 Le'e quebe gunnéle neda'. Neda' gunnéa' le'e, ne ba nuzúa' le'e chee gácale ca zruze lba na' da dxelebiale'e na da zixre, na' tu súazqueze da zixre na'. Che gunle caní, na' Xra' gunne' le'e xúgute da nácale lu La' neda'.

17 Da nigá naca na da dxixruj be'eda' le'e: Le zri'i le sa' ljwézrele tule xetule.

*Bénneache chee xezr la xu nigá dxelecuídenē' Jesús, ne cá'anqueze benne' chee' ca'*

18 Nadxa gunná Jesús:

—Che bénneache dxelecuídenē' le'e, dxal-la' cheajsá lázrele belecuídequeze' neda' nédxute'.

19 Chela nácale le'e chee xezr la xu nigá, na' xelezrí'i bénneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bénneache chee xezr la xu nigá, na' chee le na' dxelecuíde bénneache le'e lawe' da québedxa nácale xezr la xu nigá tuze.

20 Le gusá lázrele da gucha' le'e, gunnéa': Netú benne' wen zrin quebe nácadxe' szren ca xranē'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' chee le'e.

21 Xúgute da caní xelune' chee le lawe' da nácale chia', ne lawe' da quebe zaj núnbe'e Xra' nasel-le' neda'.

22 'Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la

23 lawe' da nu benne' dxecuídenē' neda', cá'anqueze dxecuídenē' Xra'.

24 Chela quebe bēna' neda' xel-la' waca zren ca' lówela benne' ca' ca da netú benne' quebe ne gunē', na' quebe bi dul-la xelebáguē'. Lácala ba belelé'ene' da ca', dxelecuídenē' neda', ne dxelecuídenē' Xra'.

25 Da nigá dxaca na chee gaca li ca naxúaj na lu da nadxixruj bea na da zjácale benne' ca'. Dxenná na: Belecuídenē' neda' ne quebe bi da calēla bēna' chee benne' ca'.

26 'Gate xida Bénnea' gácalene' le'e, Bénnea' naque' Be' Lá'azxa, ne dxulé'ene' da li, Bénnea' sel-la' neda' waláz chee Xra', Léqueze' xechēbe' ca naca chia' neda'.

27 Cá'anqueze le'e wechébequeze ca naca chia' neda' lawe' da zúalele neda' nédxudaute'.

## 16

1 Gunná Jesús:

—Dxapa' le'e da caní chee quebe gusán lázrele da naca chia'.

2 Welexebéaje' le'e lu xu'u naga dxelezrague', na' zrin zra gate núteteze benne' gutiē' le'e guéquene' gunē' zrin chee Dios.

3 Caní xelune' lawe' da quebe ne xelúnbe'e Xra', ne neda'.

4 Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

*Da dxun Be' Lá'azxa*

Nadxa gunná Jesús:

—Quebe gucha' le'e da nigá nédxute lawe' da zúalequeza' le'e.

5 Na'a wexá'a cheajxezúalena' Xra' nasele' neda', na' netule le'e quebe dxuchébele neda' ga cha'a.

6 Dxewí'ine lázrele lawe' da gucha' le'e da caní.

7 Na'a dxapa' le'e da li: Cháwe'dxa gaca cheele le'e che xexá'a neda' lawe' da che quebe xexá'a, quebe xida Be' Lá'azxa xedajsúalene' le'e, Bénnea' gácalene' le'e. Che xexá'a neda', sel-la' Le' cheele.

8 Gate xida Le', na' gulé'ene' benneache zaj naque' benne' dul-la, ne quebe dxelune' da xrlátaje, na' Dios guzría xi'e benne' caní.

9 Zaj naque' benne' dul-la lawe' da quebe dxelájle'e chia' neda'.

10 Xeleque bé'ene' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'.

11 Xeleque bé'ene' Dios guzría xi'e le' lawe' da ba guchugue' chee da xriwe', da na' dxenná bea na lu xezr la xu nigá.

12 Ne déle'e da dxal-la' xapa' le'e, san le'e quebe gaca chéajni'ile na na'a.

13 Gate xida Be' Lá'azxa, Bénnea' dxulé'ene' da li, Le' gulé'ene' le'e ca naca xúgute da li lawe' da quebe guchálaje' cheézqueze'. Wanné' xúgute da xéne', na' guzéajni'ine' le'e ca da dxal-la' gaca na.

14 Le' gucá'ana szrene' neda' lawe' da wazi'e chee da naca chia' neda', na' guzéajni'ine' na le'e.

15 Xúgute da napa Xra', cheéqueza' naca na, na' chee le' na' gunnéa', wazí' Be' Lá'azxa da naca chia', na' guzéajni'ine' na le'e.

*Xel-la' dxelewí'ine lazre' chee benne' ca' xexaca na xel-la' dxelebé*

16 Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xelé'ele neda' lawe' da xexá'a neda' naga zua Xra'.

17 Nadxa bal-la benne' ca' dxusede Jesús buluchebe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xelé'edxu Le' lawe' da xexíaje' naga zua Xre'.

18 ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

19 Guque be'e Jesús dxelaca lazre' xuluchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xelé'ele neda'. ¿Da nigá na' dxuchebe ljwézrele?

20 Da li dxapa' le'e, wabézrele le'e, ne xewi'ine lázrele, san benneache chee xezr la xu nigá xelebengé'. Lácala le'e xewi'ine lázrele, xel-la' dxewí'ine lazre' cheele xexaca na xel-la' dxebé.

21 Gate tu nu'ula zua sané' bidau' zue' stebe lawe' da ba bzrin zra sua xel-la' dxudia chee'. Gate te galaj bidu na', na' québedxa dxeajsá lazre' da guzaque' lawe' da dxebé'ene' chee bidu na' ba gúlajbe'.

22 Cá'anqueze le'e zúale stebe na'a, san neda' welá'queza' xedajxenná'a le'e, na' lu xichaj lázrdaule súatequeze xel-la' dxebé, da naca na tu xel-la' dxebé da quebe nu seque' cua.

23 'Lu zra na' québedxa bi guchébele neda'. Da li dxapa' le'e, Xra' gunne' le'e xúgute da ná bale lu La' neda'.

<sup>24</sup> Nédxula quebe bi gunábale lu La' neda'. Na'a le naba, na' si'le, chee súale'ele xel-la' dxebé.

*Jesús guchuchuj guléajé' da dxaca lu xęzr la xu nigá*

<sup>25</sup> Gunná Jesús:

—Ba gucha' le'e da caní nen dizra' ca' da dxulul'é na. Wazrín zra gate québedxa guchálajlęna' le'e da naca da dxul'é na. Guchálajlęna' le'e caníqueze da naca chee Xra'.

<sup>26</sup> Lu zra na' nábale Xra' lu La' neda', na' quebe dxennéa' neda' gata' xueda' Xra' waláz cheęle,

<sup>27</sup> lawe' da Xrá'queze nazrí'ingé' le'e. Nazrí'ingé' le'e lawe' da nazrí'ile le'e neda', ne dxéajlęle chia' za'a naga zua Dios.

<sup>28</sup> Guzá'a lau Xra' chee bla'a lu xęzr la xu nigá chee xexá'a naga zua Xra'.

<sup>29</sup> Nadxa benne' ca' dxuseđe Jesús gulé'ę Lę':

—Na'a dxuchálajlęnu' netu' caníqueze. Quebe dxuchínenu' dizra' ca' da dxulul'é na.

<sup>30</sup> Na'a dxeque bé'entu' nézenu' xúgutę da ca', na' quebe dxal-la' nu guchębe Lue'. Chee lę na' dxéajlęntu' chiu' za'u naga zua Dios.

<sup>31</sup> Jesús guzre' benne' ca':

—¿Dxéajlęle chia' na'a?

<sup>32</sup> Za' zra, ne ba naca zra ná'queze gate le'e gase dínnaļle ca'ale xrneza cha cheęle, na' gucá'anale neda' tuza'. Quebe zúaqueza' tuza' lawe' da zúalę Xra' neda'.

<sup>33</sup> Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xęzr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xęzr la xu nigá.

## 17

*Jesús dxenabe' Dios xucá'ana chawę'ę benne' ca' dxelęajlę'ę chee'*

<sup>1</sup> Ca gudé gunné' da nigá, na' Jesús gunné'ę xabáa, dxenné':

—Xrae, ba bzrin zra. Bca'ana szren neda', Zri'inu', chee cá'anqueze neda', Zri'inu', gucá'ana szrena' Lue'.

<sup>2</sup> Lue' ba bęnnu' neda', Zri'inu', xel-la' dxenná bea chee nna be'eda' xúgutę bęnneache, chee gunęzruja' xel-la' nabán da zeajlį canna chee xúgutę benne' ca' bęnnu' neda'.

<sup>3</sup> Xel-la' nabán da zeajlį canna naca na chee xelúnbe'ę Lue', nacu' Dios tu lica', ne li lazre', na' chee xelúnbe'ę neda', Jesucristo, Bęnnea' gusel-lu' Lue'.

<sup>4</sup> Neda' ba bca'ana szrena' Lue' lu xęzr la xu nigá, ne ba bexzre bęna' da bđxiruj be'enu' neda'.

<sup>5</sup> Na'a, Xrae, bęnna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xęzr la xu nigá.

<sup>6</sup> Benne' ca' guca'u Lue' láduļļa bęnneache, benne' ca' bęnnu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bęnnu' neda' benne' ca', na' ba belunę' ca dxenná xrtizru'.

<sup>7</sup> Na'a zaj nézene' xúgutę da bęnnu' neda' za na naga zu' Lue'.

<sup>8</sup> Ba bnęzruja' chee benne' caní dizra' chiu' da bęnnu' neda', na' benne' caní ba gulezí' lu nę'ę na. Ba guleque bé'engé' da li neda' za'a naga zu' Lue', ne ba gulęajlę'ę chiu', gusel-lu' neda'.

9 'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'.

10 Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

11 'Neda' québedxa sua' lu xezr la xu nigá, san benne' caní xelexegá'ane' lu xezr la xu nigá, na' neda' wezá'a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'.

12 Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bènnea' ba nanítequeze', na' caní guca na chee guca li ca naxúaj na lu xiche chiu'.

13 'Na'a ba zezá'a naga zu' Lue'. Dxácatę ne zua' lu xezr la xu nigá dxennéa' da caní chee xelápale'ę benne' caní xel-la' dxebe' ca da nápaqueza' neda'.

14 Neda' bnézruja' benne' caní dizra' chiu'. Bénneache chee xezr la xu nigá dxelecuídenę' benne' caní lawe' da québedxa zaj naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá.

15 Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'.

16 Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá.

17 Bzua benne' caní chee xelaque' cheéquezu' Lue' ne chee da li. Dizra' chiu' naca na da li.

18 Ca gusel-lu' Lue' neda' ládujla bènneache zaj naque' chee xezr la xu nigá, cá'anqueze neda' dxusel-le' benne' caní ládujla bènneache zaj naque' chee xezr la xu nigá.

19 Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

20 'Dxata' xueda' Lue', quegaze chee benne' caní, san cá'anqueze chee benne' ca' xelájle'ę chia' gate xelene' da xuluchalaj benne' caní.

21 Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xelájle bènneache zaj naca chee xezr la xu nigá Lue' gusel-lu' neda'.

22 Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u.

23 Neda' súalęna' benne' caní, na' Lue' súalęnu' neda', chee xelácaqueze benne' caní tuze, na' caní xeleque be'e bènneache Lue' gusel-lu' neda', ne nazrí'inu' benne' caní cáteze nazrí'inu' neda'.

24 'Xrae, Lue' bennu' neda' benne' caní, na' dxaca lazra' xelexúalęne' neda' naga sua' neda', chee xelélé'ene' xel-la' szren da ba bennu' neda', lawe' da nazrí'inu' neda' nédxudautę gate quebe ne gunu' xezr la xu nigá.

25 Xrae chawe', benne' zaj naque' chee xezr la xu nigá quebe zaj núnbe'ę Lue', san neda' núnbe'a Lue', na' benne' caní ba zaj nézęne' Lue' gusel-lu' neda'.

26 Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súalę néda'queza' le'.

## 18

*Dxelel-le' Jesús**(Mt. 26.47-56; Mr. 14.43-50; Lc. 22.47-53)*

1 Ca gudé gunná Jesús da caní, na' bdxúaje' nen benne' ca' dxusédene' chee chjaque' xecha la'a xegu Cedrón. Lataj na' z'ele'e xaga olivo naga guxú'u Jesús nen benne' ca'.

2 Cá'anqueze Judas, bénnea' dxudé' Jesús lu na' benne' ca' dxeledábague' Le', núnbe'e lataj na' lawe' da zane' lasa guxiáj Jesús na' nen benne' ca' dxusédene'.

3 Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wən zrin chee xudau', benne' ca' gulesel-la benne' xíchaje ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe.

4 Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexilajle?

5 Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bénnea' dxudé' Jesús lu na' benne' ca' zúaqueze' ládujla benne' ca'.

6 Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu.

7 Nadxa Jesús bchebe' benne' ca' da xula:

—¿Nuzra dxexilajle?

Gulenná benne' ca':

—Jesús, benne' Nazaret.

8 Nadxa guzre Jesús benne' ca':

—Ba gucha' le'e neda' na'. Che dxexilajle neda', le güe benne' caní lataj cheajxaque'.

9 Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'."

10 Nadxa Simón Pedro, ne nu'e xia, guléaje' na, na' guchugue' naga da zua xabela chee Malco, wən zrin chee bxruze blau.

11 Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na'?

*Jesús dxezrine' lau bxruze blau**(Mt. 26.57-58; Mr. 14.53-54; Lc. 22.54)*

12 Nadxa benne' dxjaca wedil-la, ne benne' dxenná be'enge' le', ne benne' xra'aga wən zrin chee judío ca' gulel-le' Jesús, ne buluchéaje' Le'.

13 Nadxa guleché'e Jesús lizre Anás. Anás nigá naque' xrtau zri'ine Caifás, bénnea' naque' bxruze blau iza na'.

14 Caifás nigá naque' bénnea' guzre' judío blau ca' gácadxa chawe' gate tuze benne' waláz chee xezr la xu chee'.

*Pedro dxenné' quebe núnbe'e Jesús**(Mt. 26.69-70; Mr. 14.66-68; Lc. 22.55-57)*

15 Simón Pedro, ne xetú benne' ca' dxuséde Jesús zjaque' zeajnawé' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'uləne' Jesús chale'aj lizre bxruze blau na'.



16 Pedro begá'ane' dxu'a dxa xu'u da zua chale'aj na'. Chee le na' bdxuaj bënnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'.

17 Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

18 Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxexezezé'ene'. Pedro ze' nen benne' ca', dxexezezé'ene' dxu'a xi' na'.

*Bxruze blau dxuchebe' Jesús*

(Mt. 26.59-66; Mr. 14.55-64; Lc. 22.66-71)

19 Bxruze blau guzú lawe' dxuchebe' Jesús nuca benne' ca' zaj naque' benne' dxusédené', ne bi da dxusédené' le'.

20 Jesús guzre' le':

—Neda' ba bchálajqueza' lávela xúgute bënneache. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze.

21 ¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bí da bchálajlena' le'. Benne' ca' zaj nézene' da ba gunnéa'.

22 Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

23 Jesús bechebe':

—Che gunnéa' tu da caléla, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

24 Nadxa Anás gusé-le' Jesús, zaj nadxéaj ne'e, lau Caifás, bxruze blau.

*Pedro dxenné' xecha lasa quebe núnbe'e Jesús*

(Mt. 26.71-75; Mr. 14.69-72; Lc. 22.58-62)

25 Dxácate na' ze' Pedro dxu'a xi' na' dxexezezé'ene', na' gulé'e le':

—¿Quebe nacu' lue' tu benne' ca' zaj naque' tuze nen bënnea'?

Na' Pedro gunné':

—Quebe naca'.

26 Nadxa tu benne' wen zrin chee bxruze blau, benne' naque' xrtia bënnea' guchugu Pedro nague', bchebe' le':

—¿Quegá ble'eda' lue' nen bënnea' naga zaj ze' xaga olivo ca'?

27 Pedro gunné' xecha lasa:

—Quebe núnbe'a bënnea'.

La' ná'queze gudxeze xjeaj.

*Jesús dxezrine' lau Pilato*

(Mt. 27.1-2, 11-14; Mr. 15.1-5; Lc. 23.1-5)

28 Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxaní'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua.

29 Chee le na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

30 Belexechebe benne' ca':

—Chela ca naque' tu benne' wen da zrinna, quebe gudentu' le' lau'.

<sup>31</sup> Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee.

Belexechebe benne' judío ca':

—Netu', benne' judío, quebe naca cheentu' nu gútentu'.

<sup>32</sup> Ca'an guca, guca li ca naca da ba gunná Jesús ca gatie'.

<sup>33</sup> Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

<sup>34</sup> Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

<sup>35</sup> Pilato bechebe':

—¿Naca' neda' judío? Benne' xezr la xu chiu', ne benne' xíchaję ca' chee bxruze ca' buludé' lue' lawa' neda'. ¿Bizra bęnu'?

<sup>36</sup> Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaquezę chee quebe tea' neda' lu na' benne' judío caní. Naga dxenná be'a quebe naca na nigá.

<sup>37</sup> Nadxa guzre Pilato Jesús:

—¿Nacu' Lue' wenná bea?

Bechebe Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee nnia' da li. Xúgute benne' ca' dxelune' ca dxenná dizra' chee da li dxelenne' da dxennéa' neda'.

<sup>38</sup> Pilato gunné':

—¿Bizra na' da lí?

*Dxelechugue' chee Jesús gatie'*

*(Mt. 27.15-31; Mr. 15.6-20; Lc. 23.13-25)*

Ca gudé bchebe Pilato Jesús caní, na' bdxúaję xetú. Bchálajęne' benne' judío ca', na' guzre' le':

—Neda' quebe bi da calęla dxezrelda' nun benne' nigá.

<sup>39</sup> Le'e zua tu da zėjļę. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

<sup>40</sup> Nadxa xúgute' gulenné' zizraj:

—¡Quegá benne' nigá! ¡Bsan Barrabás!

Barrabás na' naque' gubán.

## 19

<sup>1</sup> Nadxa Pilato guqué'e Jesús, na' bdxixruj bé'ene' xelu'e Le' xide'.

<sup>2</sup> Benne' dxjaque' wedil-la buluzrię xichaj Jesús tu da' belune' zruze xaga xeche', ne bulugácuę' Le' tu ladxe' bzawe.

<sup>3</sup> Nadxa guléchaję' Le', dxelenné':

—¡Gaca ba lue', wenná bea chee judío ca'!

Nadxa belú'e dxu'a lau Jesús.

<sup>4</sup> Nadxa bdxuaj Pilato da xula, ne guzre' benne' ca':

—¡Le nna'xque! Dxebéaja' benne' nigá chee nézele quebe dxezrelda' bi da zrinaj nabague'.

<sup>5</sup> Bdxuaj Jesús zria xíchaję' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bęnnea'.

<sup>6</sup> Gate benne' xichaję ca' cheę bxruze ca', ne xra'aga wen zrin cheę' ca' belele' enę' Jesús, na' gulezú lawe' dxelenné' zizraj:

—¡Bde'ę xaga béguaj! ¡Bde'ę xaga béguaj!

Pilato guzre' benne' ca':

—Le che'ę, ne le gudé'ę xaga béguaj lé'equeze, lawe' da quebe dxezrelda' bi da zrinnaj nabague'.

<sup>7</sup> Na' benne' judío ca' belexechebe':

—Netu' nápantu' tu da nadxixruj bea na, ne ca dxenná na dxal-la' gatię' lawe' da dxun cuine' Zri'ine Dios.

<sup>8</sup> Gate ben Pilato da nigá, na' bezrébedxe'.

<sup>9</sup> Bexu'ę xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

<sup>10</sup> Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

<sup>11</sup> Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Cheę le na', bénnea' bdeę' neda' lu na'u dul-la zrendxa nabague' ca lue'.

<sup>12</sup> Lu zra na'te gudilaj lazre' Pilato ájala gunę' gusanę' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bénnea' dxenná bea Roma. Nu benne' dxun cuine' wenná bea dxedábague' César.

<sup>13</sup> Nadxa Pilato, gate benne' da nigá, bdxixruj bé' enę' xelexebéaje' Jesús, na' gudxé'ę lataj blau cheę', da zua lataj na' nazí le na Gabata nen dizra' hebreo, da zéaje na chale'aj xiaj ta'a.

<sup>14</sup> Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea cheęle.

<sup>15</sup> Na' benne' ca' gulenné' zizraj:

—¡Gatię'! ¡Gatię'! ¡Bde'ę xaga béguaj!

Pilato guzre' benne' ca':

—¿Gudá'a wenná bea cheęle xaga béguaj?

Belexechebe benne' xichaję ca' cheę bxruze ca':

—Netu' zua tuze wenná bea cheętu'. ¡César!

<sup>16</sup> Nadxa Pilato bdeę' Jesús lu na' benne' ca' cheę te'ę xaga béguaj, na' guleché'ę Jesús.

### *Jesús dxedé'ę xaga béguaj*

(Mt. 27.32-44; Mr. 15.21-32; Lc. 23.26-43)

<sup>17</sup> Na' bdxuaj Jesús nu'ę xaga béguaj cheę chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota.

<sup>18</sup> Buludé'ę Jesús xaga béguaj lataj na', na' tu zren nen Jesús buludé'ę xechupa benne' xaga béguaj ca' chalá'a weaj naga da' Jesús.

<sup>19</sup> Pilato bdxixruj bé' enę' buluzúę' le'e xaga béguaj xichaj Jesús da dxenná na: Jesús, Benne' Nazaret, Wenná Bea Cheę Judío Ca'.

<sup>20</sup> Zane' benne' judío ca' bululabe' da na' lawe' da zua lataj na' naga buludé'ę Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín.

21 Chee le na' benne' xíchaję ca' chee bxruze chee judío ca' gulé'ę Pilato:  
—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

22 Bechebe Pilato:

—Da bzuaja', ba naxúajqueze na.

23 Ca gudé buludá' benne' dxjaque' wedil-la Jesús xaga béguaj, na' belexequé'ę zra lane', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na.

24 Chee le na' benne' dxjaque' wedil-la gulé ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'ę zra lana', ne guléaję' da gunna bea na chee le na. Caní belún benne' dxjaque' wedil-la.

25 Gáguze naga zua xaga béguaj chee Jesús zę xrna Jesús nen bi bila xrne'ę, ne María, zru'ula Cleofas, ne María Magdalena.

26 Gate ble'e Jesús xrne'ę, ne cuita xrne'ę na' zę Juan, benne' bsede Jesús, bēnea' nazri'idxę', na' guzre' xrne'ę:

—Nú'uladau', na' zę zri'inu'.

27 Nadxa guzre Jesús bēnea':

—Na' zę xrna'u.

Zra na'tę benne' nigá beche'ę nu'ula na' lizre'.

### *Dxate Jesús*

(Mt. 27.45-56; Mr. 15.33-41; Lc. 23.44-49)

28 Ca gudé gunná Jesús da nigá, lawe' da nézene' xúgutę na ba guca li, ne chee guca li ca naxúaj na lu xiche chee Dios, gunné':

—Dxebíleda'.

29 Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúę' na lawe' tu xia tunna, na' buluzúę' na dxu'a Jesús.

30 Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaję', gutię'.

### *Tu benne' dxeję' wedil-la dxechizie' xia lachú'u Jesús*

31 Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'ę xaga béguaj ca' lu zra dxulupá'ang' lawe' da naca zra na' tu zra blau. Chee le na' gulenabe' lau Pilato dxixruij bé'eng' xelíchaję' ní'a benne' ca' zaj dę'ę xaga béguaj ca', ne xelexequé'ę le' le'ę xaga béguaj ca'.

32 Nadxa tu benne' ca' dxjaque' wedil-la gudíchaję' ni'a benne' nedxu na', ne cá'anqueze chee benne' xetú dę'ę cuita Jesús.

33 Gate bzrinę' naga da' Jesús, blé'eng' ba gutię', na' chee le na' quebe gudíchaję' ni'ę.

34 Tu benne' ca' dxjaque' wedil-la guchízię' xia chee' lachú'u Jesús, na' bdxuaj dxen, ne nisa na'.

35 Benne' dxuchalaj da nigá naque' benne' blé'eng' na, ne dxuchálaję' da li, ne nézene' dxenné' da li, chee cá'anqueze le'e chéajlele chee Jesús.

36 Da caní guca na chee guca li ca da naxúaj na lu xiche chee Dios, da dxenná na: Quebe gulíchaję' netú zrita chee'.

37 Xetú da naxúaj na lu xiche chee Dios dxenná na: Welélé'eng' bēnea' belunę' we'.

*Dxulucache' Jesús**(Mt. 27.57-61; Mr. 15.42-47; Lc. 23.50-56)*

<sup>38</sup> Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús.

<sup>39</sup> Cá'anqueze Nicodemo, bénnea' xeajchálajleñe' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre.

<sup>40</sup> Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácale benne' judío ca' da dxelune' chee benne' gate', gate na' dxulucache' le'.

<sup>41</sup> Lataj na' naga buludé'e Jesús xaga béguaj zua tu lataj naga zaj ze xaga ca', na' lálwela lataj na' zua tu ba cube le'e xiaj na', naga quebe nu ne chú'ujeze benne' gate'.

<sup>42</sup> Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupá'ana judío ca'.

**20***Jesús dxexebang' ládujla benne' gate**(Mt. 28.1-10; Mr. 16.1-8; Lc. 24.1-12)*

<sup>1</sup> Zra nedxu, guxíaj María Magdalena dxu'a ba na' dxani'sise', gate ne nachúl-late, na' blé'ene' québedxa naduse xiaj dxu'a ba na'.

<sup>2</sup> Nadxa bexíaj chégü'e naga zua Simón Pedro nen xetú benne' bsede Jesús, bénnea' bzri'idxe' Jesús, na' guzre' benne' ca':

—Ba belequé'e Xránadxu lu ba na', ne quebe nézentu' ga xeajlelú'e Le'.

<sup>3</sup> Nadxa Pedro, ne bénnea' xetú beledxúaje' zjaque' dxu'a ba na'.

<sup>4</sup> Dxúpaté' zjaca chégü'e tu zren, san bénnea' xetú guzá chégudxe' ca Pedro, ne bzrine' nédxudxa dxu'a ba na'.

<sup>5</sup> Na' xeajsé' su dxú'ala xeajnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'.

<sup>6</sup> Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na',

<sup>7</sup> ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chalá'ala.

<sup>8</sup> Nadxa cá'anqueze guxú'u bénnea' xetú, bénnea' bzrin nedxu dxu'a ba na', na' blé'ene' ladxe' ca', ne guxéajle'e.

<sup>9</sup> Quebe ne xeléajni'ine' da naxúaj na lu xiche chee Dios da dxenná na xebán Jesús ládujla benne' gate'.

<sup>10</sup> Nadxa benne' ca' bsede Jesús belexezrine' xu'u naga zaj zre'e.

*Jesús dxulé'e lawe' María Magdalena**(Mr. 16.9-11)*

<sup>11</sup> María begá'ane' dxu'a ba na', dxebezre'. Ca dxebezre' na', na' gulégü'e dxenné'e lu ba na',

<sup>12</sup> na' blé'ene' chupa gubáz chee xabáa zaj nácue' zra lané' chiche, zaj dxe'e naga guxú'u Jesús. Tu'e dxe'e naga guzrúa xichaj Jesús, na' xetú'e dxe'e zeaj zranle ga guzrúa ni'a Le'.

<sup>13</sup> Na' buluchebe gubáz chee xabáa ca' María na':

—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe nezda' ga xeajlelú'e Le'.

14 Caní dxenné', na' bzéčaj xíčajé', ne blé'engé' Jesús zé' ca'ala, san quebe nézengé' che Jesús na'.

15 Nadxa Jesús bchébe' María na':

—Nú'uladau', ¿bizr chee na' dxebezru'? ¿Nu dxexílaju'?

María gúquene' naque' benne' dxá'angé' xaga ca' zaj zé na', na' guzre' Le':

—Benne', che lue' bi'u Le', gunná ga xeajlú'u Le', chee cheajxezri'a Le'.

16 Nadxa Jesús guzre' nu'ula na':

—María.

María na' bexéčajé', ne guzre' Le' nen dizra' hebreo:

—¡Raboni!

Dizra' nigá zéájé na: Benne' Dxuséde.

17 Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxezre bi bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios cheeje.

18 Nadxa bexíaj María Magdalena, xeajzenne' benne' ca' bséde Jesús ba blé'engé' Jesús, na' Le' guzre' le' da caní.

*Jesús dxulé'e lawe' benne' ca' bsédene'*

(Mt. 28.16-20; Mr. 16.14-18; Lc. 24.36-49)

19 Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bséde Jesús, ne zaj nusézxujé' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

20 Ca gudé gunná Jesús da nigá, na' blé'engé' benne' ca' ne'e, ne le'e naga gudé xia na'. Benne' ca' bséde Jesús gulebéle'engé' gate belelé'engé' Xránadxu.

21 Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

22 Nadxa blube' lau benne' ca' ne guzre' le':

—Le si' Be' Lá'azxa chee Dios.

23 Benne' ca' dxunité laule le'e chee dul-la zaj nabague' ba bnite lau Dios chee', na' benne' ca' quebe dxunité laule le'e chee dul-la zaj nabague', quebe bunite lau Dios chee'.

*Tomás dxelé'engé' Xránadxu ba bebangé'*

24 Tomás, tu benne' chazrinnu ca' bséde Jesús, bénnea' le' Bi Lide', quebe zué' nen benne' ca' xezicadxa gate ble'e lau Jesús.

25 Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee bdiduj ca', ne gudéa' na'a le'e naga gudé xia na', québequeze chéajle'a.

26 Ca guca xrunu' zra, benne' ca' bséde Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxujé' dxa xu'u ca', ble'e lau Jesús lau benne' ca', ne guzré' laduj le', na' bgape' le' diuzre, gunné':

—Le gapa xel-la' dxebeza zri lazre'.

27 Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

<sup>28</sup> Nadxa bechebe Tomás:

—Xrana', ne Dios chia'.

<sup>29</sup> Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrente naca na chee benne' ca' dxeléajle'e chia' lálaca quebe ne xeelé'ene' neda'.

### *Da dxaca lazre' Juan gun xiche nigá*

<sup>30</sup> Jesús bene' da zandxa xel-la' waca zrente lau benne' ca' bsédene' da quebe zaj naxúaj na lu xiche nigá.

<sup>31</sup> Da caní zaj naxúaj na chee chéajle le'e chee Jesús, naque' Cristo nase-la Dios, ne Zri'ine Dios, ne chee gápale xel-la' nabán lawe' da dxéajle chee'.

## 21

### *Jesús dxulé'e lawe' gazre benne' ca' bsédene'*

<sup>1</sup> Ca gudé na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na.

<sup>2</sup> Zaj nazraga Simón Pedro, ne Tomás, bénnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús.

<sup>3</sup> Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'aqueze netu' wazá'le'ntu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'.

<sup>4</sup> Ca guzú lau dxaní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'.

<sup>5</sup> Nadxa Jesús guzre' benne' ca':

—Bénnea'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

<sup>6</sup> Nadxa guzre Jesús benne' ca':

—Le guzala xixruj na' chala'a xabela chee da dxedá lawe' nísadau' na', na' senle bela.

Ca' belune', na' ca dxelexequé'e xixruj na' quebe dxelexegué'ene' na lawe' da nazrate na bela zan.

<sup>7</sup> Nadxa bénnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázié' ladxe' dxexrúa cuzre' lawe' da nagüe' na, na' bexétaje' lu nisa.

<sup>8</sup> Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xue' xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj.

<sup>9</sup> Gate belexétaje' lu xu bizre, na' belelé'ene' ba dxe' xi', ne ba zrua tu bela lawe' xi' na', na' de' na' xeta xtla.

<sup>10</sup> Nadxa Jesús guzre' benne' ca':

—Le cheajxri' tu chupa bela ca', be za guzentele.

11 Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazratę na bela zri'a, tu gaxúa chi'inu xunba', na' lácala naca tu cá'antęba' quebe gudxeza xixruj na'.

12 Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchębe' Le' nu Le', lawe' da zaj nézene' naque' Xránadxu.

13 Nadxa Jesús guquę'e xeta xtila na', na' bnézurje' na benne' ca', ne cá'anqueze bene' cheę bela ca'.

14 Da nigá naca na da guxunne' lasa ble'e lau Jesús lau benne' ca' bsédene' ca gudé bebane' ládujla benne' gate.

### *Jesús dxuchálajęe' Simón Pedro*

15 Ca gudé gulawe' xrsila, na' Jesús bchębe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Bechębe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zríla' du chia' ca'.

16 Nadxa Jesús bchębe' le' da xula:

—Simón, zri'ine Jonás, ¿nazrí'inu' neda'?

Pedro bechębe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zríla' chia' ca'.

17 Da guxunne' lasa Jesús bchębe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchębe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zríla' chia' ca'.

18 Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácue' lue', ne che'ę lue' naga quebe gaca lazru' chéaju'.

19 Gate gunná Jesús da nigá, dxuzéajni'ine' benne' ca' ca dxal-la' gate' Pedro cheę gucá'ana szrene' Dios. Ca gudé na' Jesús guzre' le':

—Ben neda' tuze.

### *Da gaca cheę bénnea' nazrí'idxa Jesús*

20 Gate bexechaj Pedro, blé'ene' bénnea' nazrí'idxa Jesús zéaje nawe' le', naque' bénnea' dxe'ę cuita Jesús gate na' gulawe' xrche' na', ne bchębe' Jesús: "Xran, ¿nuzra na' gudé Lue' lu na' benne' ca' dxeledábague' lue'?"

21 Gate Pedro blé'ene' bénnea', na' bchębe' Jesús:

—Xran, ¿gazra benne' nigá? ¿Aja gaca cheę'?

22 Jesús bechębe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

23 Belén benne' ca' zaj de'ę Jesús quebe gate benne' na'. Jesús quebe guzre' le' quebe gatię'. Guzre' le': "Che neda' dxaca lazra' xegá'ane' ca zrindxa zra xelá'a neda', ¿naca na chiu' lue' nézenu'?"



<sup>24</sup> Benne' nigá naq̄e' benne' dxexechebe' chee da nigá, ne ba nuzúaje' na. Nézentu' dxenné' da li.

<sup>25</sup> Cá'anqueze ne zaj dedxa da zante da ben Jesús, na' chela xuaj tu tu na, dxéqueda' quebe gueque lu xezr la xu nigá cha' xiche ca' dxal-la' guzúajdxu. Ca' naca na.

## DA CA' BELÚN BENNE' GUBÁZ CHEE CRISTO

### *Dios nachebe lazre' sel-le' Be' Lá'azxa*

<sup>1</sup> Lue', Teófilo, bzujaja' chiu' lu xiche nedxu ca naca xúgute da guzú lau Jesús dxune', ne dxusédene' nédxudaute,

<sup>2</sup> cadxa begüéne' xabáa. Gate za kezé'e xexíaje' xabáa guqu'é gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'.

<sup>3</sup> Ca gudé gutié', Jesús ná'queze ble'e lawé' benne' ca', ne lawe' chua zra ble'e lawé' benne' ca', na' blé'ene' da zan da dxelunna bea na naca bane', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuene' le' quebe xesi'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunné' chee, ca gunníqueza' neda'.

<sup>5</sup> Da li Juan bchue' bènneache nisa, san lu zra caní gaca chee ca da zéaje xel-la' dxedxúa nisa, xida Be' Lá'azxa xedajsúe' lu xichaj lázrdaule.

### *Jesús dxegüéne' xabáa*

<sup>6</sup> Gate na' zaj nazrague' nen Jesús, na' buluchebe' Le':

—Xran, zgue Dios lataj nna béaqueze xezre Israel lu zra caní?

<sup>7</sup> Na' bechebe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca gune'.

<sup>8</sup> Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca náaqueze xezr la xu nigá.

<sup>9</sup> Ca gudé gunné' da nigá, ne dxácaté dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'.

<sup>10</sup> Ne zaj zra' benne' ca' dxelenné'e dxácaté dxegüén Jesús, belelá' chupa benne' zaj nácué' ladxe' chiche lau benne' ca',

<sup>11</sup> na' gulé'e benne' gubáz ca':

—Le'e, benne' Galilea, zbizr chee na' zéle dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'ele Le' zexíaje'.

### *Dxelequ'é Matías chee xedé'e waláz chee Judas*

<sup>12</sup> Nadxa besi'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zítu', san dxe' cátiteze da dxunna da nadxixruj bea na lataj xesi'aque' lu zra dxulupá'ane'.

<sup>13</sup> Gate belexezrine' lu xezre na', belexegüéne' xu'u sibe naga zaj zue'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bènnea' dxedábague' benne' Roma ca', ne Judas, zri'ine Jacobo.

<sup>14</sup> Xúgute benne' caní tu dxelezrágazqueze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bènneache, na' guzre' le':

16 —Le'e, bi bícha'dau', ben na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bénnea' guché'ē benne' ca' gulēl-le' Jesús.

17 Judas nigá guzúalēne' dxi'u tu zren, ne guque' dxi'u tuze lu zrin nigá.

18 Bxa'u tu cue' xezr la xu ca naca lazruj chee Judas, da guzi' lu ne'ē chee da calela da bene'. Na' benne' nigá xeajcházie' suxíchajla, ne gutín le'ē, na' bdxuaj ca naca zrájluē'.

19 Xúgute benne' zaj zre'ē Jerusalén belenne' da nigá, na' buluzúē' la xezr la xu na' Acéldama, da zéaje na: Xezr La Xu Chee Dxen.

20 Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' téē' waláz chee'.

21 'Zaj zra' nigá benne' ca' gusá'acalēne' dxi'u ca naca dxácatē guzúalē Jesús dxi'u.

22 Guzú lau na gate bchua Juan Jesús nisa, cadxa bzrin zra begüēne' xabáa. Dxun na ba xen tu benne' caní gaque' dxi'u tuze chee xechēbe' ca guca gate bebán Jesús lu xel-la' gute.

23 Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo.

24 Buluchálajlēne' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bénneache. Ble'e netu' nula benne' chupa caní ba nabéaju' Lue',

25 chee gaque' gubáz chiu', ne xedéē' waláz chee Judas, bénnea' bnitie' da naca chee' lawe' da bene' dul-la, na' bexíaje' lataj naga naca chee'.

26 Nadxa gulebéaje' da gaca bea na, na' bexala Matías, na' gúcatē' tuze benne' chinéaj gubáz ca'.

## 2

### *Ca guca gate bla' Be' Lá'azxa*

1 Ca bzrin zra Pentecostés, xúgute benne' ca' dxeléajle'ē chee Jesús zaj nazrague' tuze lataj.

2 Ca' guca, belenne' tu schaga da za' lu be' zran xabáa, ca dxun tu be' bduunu', na' belén na xúgute benne' zaj zre'ē lu xu'u naga zaj dxe'ē.

3 Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'.

4 Nadxa guzúalētequeze Be' Lá'azxa xúgute benne' ca', na' tu tue' gulezú lawe' dxuluchálaje' dizra' nazrala cáteze dxuchine Be' Lá'azxa le'.

5 Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgute xezr la xu zaj dxe' lu xezr la xu nigá.

6 Ca belenne' bénneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxeléajle'ē chee Jesús.

7 Na' belexebánele'ēne', ne belexruse', ne gulé ljwezre' tue' xetúē':

—Zaj naca benne' Galilea xúgute benne' caní dxuluchálaje'.

8 ¿Ajazra na' dxendxu dxuluchálaje' dizra' cha cheedxu dxi'u?

<sup>9</sup> Zradxu dxi'u nigá, nácadxu benne' xęzr la xu Partia, ne benne' xęzr la xu Media, ne benne' xęzr la xu Elam, ne benne' xęzr la xu Mesopotamia, ne benne' cheę xęzre ca' zaj nababa Judea, ne benne' cheę naga nababa Capadocia, ne benne' cheę naga nababa Ponto, ne benne' cheę naga nababa Asia,

<sup>10</sup> ne benne' cheę naga nababa Frigia, ne benne' cheę naga nababa Panfilia, ne benne' xęzr la xu Egipto, ne benne' cheę xęzr la xu Africa da zua dédedxa cheę xęzre Cirene. Cá'anqueze zaj zra' benne' xęzr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxiruj bea cheę benne' judío ca'.

<sup>11</sup> Cá'anqueze nácadxu benne' xęzr la xu Creta, ne benne' xęzr la xu Arabia. Xúguteđxu dxendxu lu dizra' cha cheędxu dxuluchalaj benne' caní ca naca da zren ca' da dxun Dios.

<sup>12</sup> Xúgute' belexebáneng', ne quebe zaj nézeng' bi da dxaca na', na' gulenaba ljwezre' tue' xetúe':

—¿Bizra Zéaje da nigá?

<sup>13</sup> Benne' xula ca' belún lę', gulenné':

—Dxelezuzre benne' caní.

### *Da bchalaj Pedro lau benne' ca'*

<sup>14</sup> Nadxa guxasa Pedro nen benne' chinéaj gubáz cheę Cristo, na' zizraj bchálajlęne' bėnneache zaj zra' na'. Dxe'e lę':

—Le'e, benne' Judea, ne xúgutele le'e nazrágale xęzre Jerusalén. Dخال-la' nézele le'e da nigá. Le xen xanne' ca naca da xapa' le'e.

<sup>15</sup> Netu' quebe dxezúrentu' ca dxéquele le'e. Za gudete xrsila na'a. Netú benne' quebe dxezúreng' ca ná'queze.

<sup>16</sup> Da nigá naca da gunnáqueze Joel, bėnnea' bchálaje' waláz cheę Dios gate na' gunné':

<sup>17</sup> Caní dxenná Dios: “Lu zra bzebe wasél-laqueza'

Be' Lá'azxa chia' cheę súalęne' xúgute bėnneache.

Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welennéquezeņę' xęla.

<sup>18</sup> Ca lu zra na' guzuáqueza' Be' Lá'azxa chia'

nen bi węn zrin chia' ca', benne' biu ne nu'ula ca',

na' guchálajquezebe' waláz chia' neda'.

<sup>19</sup> Lu be' zran xabáa gulé'equezda' xel-la' waca chia',

na' lu xęzr la xu dxe'ela gulé'eda' da xelunna bea na,

dxen, ne xi', ne zren da naca ca beuj gasaj.”

<sup>20</sup> Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra cheę da xebánedxu

ne zra na' walé'equezdXu xel-la' szren cheę Dios.

<sup>21</sup> Nadxa xeelá xúgute benne' ca'

xelenné' Xránadxu lu xel-la' dxelejlı lazre' cheę'.

<sup>22</sup> Cheę lę na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúaje' xrlátaje lau xúgutele le'e ne cheę da ben Dios laule le'e. Lu na' Jesús Dios blé'eng' da zan da dxebánedxu, ne xel-la' waca ca', ne da dxelunna bea na ca ba nézqueze le'e.

23 Gate Dios be'e lataj tu benne' bdee' Le' lu na'le le'e cáteze bache núnqueze' nedxu, nadxa le'e gudél-lale Le', na' bétele Le' gate na' bdele Le' lu na' benne' ca' dxeluné' da calela, benne' ca' buludé'e Le' xaga béguaj naga gutié'.

24 Nadxa Dios bsebané' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'.

25 Ca naca da nigá bchalaj wenná bea David ca naca chee Jesús na', gate gunné':

Belé'equeza' Xrana' lawa' nigá.

Le' zué' cuita' xabêla, chee quebe bi guchebe na neda'.

26 Chee le na' gubéle'eda', ne bil-la' lu xel-la' dxebé chia'.

Chee le na' guxrén lázrequeza' Le' gate gatia',

27 lawe' da quebe xucá'anaquezu' neda' lu lataj chee benne' gate.

Quebe güéquezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

28 Blé'equezenu' neda' ca dxal-la' guna' chee zrué'eda' xel-la' nabán,

na' gúnnale' u neda' xel-la' dxebé lawe' da zúalenu' neda'.

29 'Le'e, bi bícha'dau'. Naca bea na gute xra xrtáudxu David, na' bulucache' le' lu xedxu ba chee' da zúaqueze na na'a nagá zúadxu.

30 David na' guque' tu benne' bchálaje' waláz chee Dios, ne gunézene' ca da nachebe lázrequeze Dios gune'. Gunné lie' tu benne' zri'ine zre sua David na' gague' Cristo, Bénnea' nna béaqueze', xequé'e lawe' chee David.

31 Ca' guca, David nigá belé'equezne' nedxu ca naca da dxal-la' gaca chee Cristo, na' bchálaje' ca guca gate bebán Cristo, gunné': "Benne' nigá quebe xegá'anaqueze' lataj chee benne' gate, ne quebe güzruqueze bel-la' dxen chee'."

32 Caní guca, Dios bsebané' Jesús nigá, na' netu' dxexeché bentu' da li ca guca da nigá.

33 Ca' guca, Dios bzue' Jesús lu xabáa chee' nen xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze' nedxu gune', na' xúguté da caní dxelé'ele le'e, ne dxenle zaj naca na da dxun Be' Lá'azxa na'.

34 David na' quebe begüéne' xabáa, san léqueze' gune':

Xránadxu Dios guzre' Xrana':

"Gudxe'e cuita' xabêla nigá

35 ca zrindxa zra guzúa' benne' dxedábague' lue' chee nna be'enu le'."

36 'Xúgutéle le'e, benne' Israel, dxal-la' nézquezle da nigá: Jesús nigá, bénnea' bda'le le'e xaga béguaj, Dios ba nune' Le' Xránale ne Cristo cheele, Benne' guselé' le'e.

37 Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee Jesús, dxelé'e le':

—Benne' bíchentu', çájazra dxal-la' guntu' xca'?

38 Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunite lau Le' cheele le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee súalene' le'e.

39 Da nigá nachebe lazre' Dios naca na cheele le'e, ne chee zrí'inele, ne chee xúguté benne' zaj zre'e zitu', xúguté benne' ca' dxaca lazre' Dios nne'.

40 Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

<sup>41</sup> Ca'an guca, benne' ca' guléajlë'e chee da bchalaj Pedro belexedxúe' nisa, na' lu zra na' belaca tuze ca chí dxua gaxúa benne' nen benne' ca' ba dxeléajlë'e chee Jesús.

<sup>42</sup> Na' xúgute benne' ca' gulezúa típaqueze' ca da dxulusede benne' gubáz chee Jesús lë', na' gulezúe' tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.

*Ca belún benne' nedxu ca', benne' guleajli lazre' Cristo*

<sup>43</sup> Xúgute benne' ca' gulezrebe' gate belelé'eng' xel-la' waca zante, ne da dxelunna bea na da dxelún benne' gubáz chee Jesús.

<sup>44</sup> Xúgute benne' ca' dxeléajlë'e chee Jesús gulaque' tuze, ne bulunézruje' da de chee' tue' xetúe'.

<sup>45</sup> Belutie' xúgute da zaj nape', ne bulunézruje' dumí na' chee benne' ca' ca da dxelexáizrjeng'.

<sup>46</sup> Xugu' zra belexezrague' lu xudau', ne cá'anqueze lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebé, ne dutë xel-la' dxelexruj lazre' chee'.

<sup>47</sup> Belúe lá'ang' Dios, na' xúgute bénneache guléqueng' benne' ca' ba lá'ana. Tu zra tu zra Xránadxu bzane' benne' ca' chee Cristo ca dxelezí' lu ne'e tu tue' Cristo.

### 3

*Dxexaca tu benne' zrinnaj*

<sup>1</sup> Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bénneache Dios lu xudau'.

<sup>2</sup> Tu zra tu zra zua tu benne' na' naque' zrinnaj ca nálajte'. Dxelechë' benne' ljwezre' lë' xudau' na', ne dxelebeche' lë' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'.

<sup>3</sup> Gate benne' zrinnaj nigá blé'eng' Pedro ne Juan, dxelu'e xudau', na' gunabe' guna' lau benne' caní.

<sup>4</sup> Nadxa Pedro ne Juan gulennë'e lë', na' Pedro guzre' benne' na':  
—Gunná' netu'.

<sup>5</sup> Benne' na' gunná' xánnie' lë' lawe' da dxéquene' bi xulunezruje' lë'.

<sup>6</sup> Pedro guzre' lë':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

<sup>7</sup> Nadxa Pedro guquë'e na' benne' zrinnaj na' da zua xabëla, ne bechise' lë', na' ca bënë' caní, belexezúa chacha ni'e, ne béchajdu chee' ca'.

<sup>8</sup> Nadxa benne' zrinnaj na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ang' Dios.

<sup>9</sup> Xúgute benne' zaj zre'e na' belelé'eng' lë' dxedé', ne dxue lá'ang' Dios.

<sup>10</sup> Belexebáneng', ne belezrebe' ca da belelé'eng' guca na, lawe' da zaj núnbe'e benne' zrinnaj na', ne zaj nézene' naque' bénnea' dxebé'e dxenabe' guna' ga dxelexú'u bénneache xudau', da na' nazí le na Da Xrtante.

*Da bchalaj Pedro la chila da nazí le na La Chila Chee Salomón*

<sup>11</sup> Benne' zrinnaj na', benne' ba bexaque', quebe bsane' na' Pedro ne Juan, na' xúgute benne' dxelexebáneng', ne xjaque' naga nazí le na La Chila Chee Salomón, naga zaj zra' Pedro ne Juan.

<sup>12</sup> Gate blé'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebénele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'?

<sup>13</sup> ¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zrí'ine', Jesús, Bénnea' bdele le'e lu na' benne' xu'u lawe'. Gate guca lazre' Pilato gusané' Le', le'e quebe guca lázrele.

<sup>14</sup> Bzúale chalá'ala Benne' na' naque' lá'azxa ne xrlátaje, na' gunábale la tu benne' wen da zrinnaaj.

<sup>15</sup> Ca'an guca, bétele le'e Bénnea' dxunne' bémneache xel-la' nabán, san Dios bsebané' Le' ládujla benne' gate, na' netu' dxexeché'entu' chee da nigá.

<sup>16</sup> Guca lu La Jesús nigáqueze, u nnadxu guca na lawe' da guxéajle chee La Jesús, chee bezi' le dipa benne' nigá dxel'é'ele, ne núnbeale le'. Lawe' da guxéajle' chee Jesús, ba bexacáte'queze' ca dxel'é'ele le'e xúgutele.

<sup>17</sup> 'Le'e, Bi bicha', nezda' gate le'e, ne benne' xíchajé ca' chee bétele Jesús, quebe guque be'ele ca da dxunle.

<sup>18</sup> Dios bene' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios.

<sup>19</sup> Chee le na', le xebi'i lázrele, ne le xexaca Dios tuze, chee xusule' dul-la nabáale. Nadxa Xránadxu Dios gunne' le'e lataj xexaca chawe' xichaj lázrdauale.

<sup>20</sup> Sel-le' chee Jesús, Bénnea' guchebe lazre' sel-le' chee nédxudaute.

<sup>21</sup> Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálaje' waláz chee' nédxudaute.

<sup>22</sup> Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios chee tu benne' guchálaje' waláz chee'. Gaque' tu benne' ládujla bi bíchele ca', na' sel-le' le' chee ca gusel-le' neda'. Le xen xanne' xúgute da xe'e le'e,

<sup>23</sup> lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

<sup>24</sup> 'Xúgute benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní.

<sup>25</sup> Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zrí'ine zre su' gaca chawe' chee xúgute bémneache zaj zre'e lu xezr la xu."

<sup>26</sup> Gate Dios bsebané' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da caléla da dxunle.

## 4

### *Pedro ne Juan dxelezrine' lau benne' xu'u lawe' ca'*

<sup>1</sup> Pedro ne Juan ne dxuluchálajle' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'.

<sup>2</sup> Dxelezré'e lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús.

<sup>3</sup> Nadxa gulel-le' Pedro ne Juan, na' guleché'e le' lizre xia ca zrindxa zra xula lawe' da ba dxezré' zra na'.

<sup>4</sup> Guléajle' benne' zan ládujla benne' ca' belénne' da bchalaj Pedro, na' cátime benne' ca' dxeléajle'ē chee Jesús zaj naque' ca gazxu' cue' chi gaxúa benne' biu.

<sup>5</sup> Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxúzajle'ē da nadxixruj bea na, belezrague' lu xezre Jerusalén

<sup>6</sup> nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'.

<sup>7</sup> Nadxa gulenná be'e xejlexrí'ē Pedro ne Juan, na' buluzé' le' laduj naga zaj zre'ē, na' buluchēbe' le':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca',

<sup>9</sup> le'e dxuchébele netu' chee tu da chawe' da guca chee tu benne' we', chee nézele ájala guca bexaca bénnea'.

<sup>10</sup> Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'ē xaga béguaj, na' Dios bsebane' Le' ládujla benne' gate.

<sup>11</sup> Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u.

<sup>12</sup> Quebe nu chilá' bénneache seque' guselé' dxi'u lawe' da quebe ne gunna Dios xetú La bénneache lu xezr la xu nigá, benne' séquene' guselé' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'ē cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús.

<sup>14</sup> Cá'anqueze bénnea' bexaque' ze' na' nen Pedro ne Juan, na' chee le' na' quebe gulezéquene' bi xelenné' chee'.

<sup>15</sup> Nadxa gulenná be'e belexedxúaj benne' gubáz ca' ládujla le'. Cate' belexegá'ana leze' buluchēbe ljwezre',

<sup>16</sup> dxelenné':

—¿Ájazra gundxu chee benne' caní? Xúgute benne' zaj zre'ē Jerusalén zaj nézene' belune' xel-la' waca zren nigá, na' quebe gaca tábagadxu na.

<sup>17</sup> Na'a, chee québedxa zriluj da nigá lálwela bénneache, guxrúsadxu benne' caní chee québedxa nu xuluchálajlene' lu La Jesús.

<sup>18</sup> Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajlene', ne quebe nu xulusédenē' lu La Jesús.

<sup>19</sup> Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios.

<sup>20</sup> Netu' quebe gaca gusantu' gucháljantu' ca naca da blé'entu', ne da bémentu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusanē' le'. Quebe belezrelnē' ájala xelunē' xuluzaca zí'ē le' lawe' da dxelúe lá'ana xúgute bénneache Dios ca naca da ba guca.

<sup>22</sup> Bénnea' bexaque' ne chee xel-la' waca zren nigá ba gudée' chua iza.

*Benne' ca' dxeléajle'ē chee Jesús dxelenabe' lau Dios gunézruje' le' xel-la' dxuluxrén lazre'*



<sup>23</sup> Gate bulusang' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute da gulenná benne' xíchaje ca' chee bxruze ca', ne benne' gula sina ca'.

<sup>24</sup> Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute da zaj nnita lataj ca'.

<sup>25</sup> Lue', lu na' Be' Lá'azxa, ne lu dxu'a David, benne' wen zrin chiu', gunnáu':  
¿Bizr chee na' dxelasa bénneache xezr la xu ca',  
na' bénneache dxelegú'u lazre' da quebe bi zaj zaca?

<sup>26</sup> Benne' wenná bea ca' chee xezr la xu gulune' tuz,  
na' benne' blau ca' chee xezr ca' belezrague'  
chee xeledábage'e Xránadxu Dios, ne Cristo chee'.

<sup>27</sup> Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bénnea' bzúaquezu' Lue'.

<sup>28</sup> Ca'an guca, benne' ca' belune' xúgute ca da ba núnquezu' Lue' dxal-la' gaca na.

<sup>29</sup> Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrébentu',

<sup>30</sup> ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálaje' xrtizra' Dios duté xel-la' dxuluxrén lazre' chee'.

### *Xúgute' dxelune' tuze ca naca da zaj nape'*

<sup>32</sup> Benne' zan ca', benne' dxeléajle'e chee Jesús gulaque' tuze lu xichaj lázrdawé'. Netúe' quebe gunné' cheeze' naca da nape'. Xúgute da zaj nape' zaj nuné' tuze.

<sup>33</sup> Benne' gubáz ca' chee Jesús, nen duté xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute benne' ca'.

<sup>34</sup> Quebe nu guzúa ládujla benne' ca' bi bxárzjene' lawe' da caní belún xúgute benne' zaj nape' xezr la xu ca' u xu'u ca'. Belutie' na, na' belú'e dumí na',

<sup>35</sup> ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'.

<sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le na. Benne' nigá, buluzúa gubáz ca' le' Bernabé, da zéaje na benne' dxexúe zrene'.

<sup>37</sup> Benne' nigá betie' tu xezr la xu da nape', na' bi'e dumí na', ne bnézruje' na lu na' benne' gubáz ca'.

## 5

### *Dul-la da belún Ananías ne Safira*

<sup>1</sup> Xetú benne' le' Ananías nen zru'ule' Safira, betie' tu xezr la xu chee'.

<sup>2</sup> Benne' nigá bequ'e late' dumí na', na' da begá' anaze bi'e lau benne' gubáz ca', ne gunné' ca naca na'. Zru'ule' ca naca na nézene'.

<sup>3</sup> Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lázrda'u chee si xe'u Be' Lá'azxa, na' beca'u late' chiu' ca naca da guzi'u chee xezr la xu na'?

4 ¿Quebe guca xęzr la xu na' chiu'? Na' gate bętiu' na, ¿quebe guca dumí na' chiu'? ¿Ájazra guca benu' da nigá? Dios guzí xę'u, quegá bęnneache.

5 Ca ben Ananías da nigá, na' guzré'ę gýtetę'. Xúgütę benne' belén da nigá belezrébele'ę.

6 Nadxa gulebiga bal-la bi cuide' ca', ne buluchélabe' lę' tu ladxe', na' belúabe' lę' cheajlecáchebe' lę' lu ba.

7 Ca guca chunna hora gudé na', guxú'u zru'ula Ananías na', ne quebe nézeng' bi ba guca.

8 Pedro bchebe' lę':

—Gunná, ¿bétele le'e xęzr la xu na' ca dxennale guzile na?

Gunná Safira na':

—Awe', ca naca na'.

9 Nadxa Pedro guzre' lę':

—¿Bizr cheę na' benle le'e tuze dizra' gúquele si xęle Be' Lá'azxa? Chale'aj na' ba zesi'aca bi ca' xeajlecáchebe' benne' chiu', na' na'a xelúatequezebe' lue'.

10 La' ná'queze nu'ula na' guzré'ę gýtetę' zran ni'a Pedro. Gate belú'u benne' cuide' ca', na' belelé'ebe' lę' ba gutię', na' belexebájbe' lę' xeajlecáchebe' lę' cuita ba cheę benne' cheę'.

11 Xúgütę benne' ca' zaj nazraguę' na', ne xúgütę bęnneache, benne' belén da caní belezrébele'ę.

### *Benne' gubáz ca' dxelúnle'ę xel-la' waca cheę xabáa*

12 Benne' gubáz ca' belúnle'ę xel-la' waca cheę xabáa, ne da dxelunna bea na lau benne' ca', na' xúgütę' belezraguę' La Chila Cheę Salomón, da naca na cheę xudau'.

13 Netú benne' ca', benne' quebe dxeléajle'ę cheę Jesús, quebe belexázreng' gunę' benne' ca' tuze, san xúgütę bęnneache belape' benne' caní ba lá'ana.

14 Benne' zandxa gulezú lawę' dxeléajle'ę cheę Xránadxu, benne' biu ne nu'ula ca'.

15 Ca' guca na, belebéaje' benne' wę' ca', zaj dę' lu da dxeláta'ne', ne da'a cheę', na' gulíxruę' lę' la neza ca' cheę gate te Pedro na', na' te zruła cheę' lawę' benne' ca'.

16 Cá'anqueze benne' xęzre walizre ca' belelé'ę lu xęzre Jerusalén, zaj nu'ę benne' wę' cheę' ca', ne benne' ca' zaj xu'ę be' xriwę' ca', na' xúgütę' belexexaquę'.

### *Benne' gubáz ca' dxelu'ę lizre xia*

17 Nadxa bxruze blau, ne benne' saduceo ca' zaj zúalęng' lę', gulaquę' xa lazre',

18 na' gulęl-lę' benne' gubáz ca', ne buluzré'ę lę' lizre xia.

19 Na' tu gubáz cheę xabáa cheę Xránadxu gusalaje' dxa xu'u cheę lizre xia na' chizrela, na' bebéaje' benne' ca', ne dxę'ę lę':

20 —Le chjaca, ne le cheajsę lu xudau', ne le guzén benne' ca' ca naca cheę xel-la' nabán cube nigá.

21 Ca belenne' da nigá, zra xula belú'ę chila xudau' che zílala, na' gulezú lawę' dxulusédeng' benne' zaj zre'ę na'.

Dxácate na', bxruze blau na', ne benne' zrálęng' lę', buluchaguę' benne' ca' cheę xu'u lawę' blau, ne benne' gula sina ca' cheę xęzre Israel, na' gulenná be'ę xelexebáję' gubáz ca' zaj xu'ę lizre xia.

22 Gate belezrín bi xra'aga cheę xudau' na', quebe nu belelé'ęng' lu xu'u lizre xia, na' belexezrine', ne buluzenę' benne' ca',

<sup>23</sup> dxelenné':

—Gate bzirintu' lizre xia na', naxezxuj tipa na, na' benne' dxjaque' wedil-la zaj zře'ę dxu'a dxa xu'u na', ne dxuluxúę' na, san gate gusálajntu' na, quebe nu bezrélentu' lu xu'u na'.

<sup>24</sup> Gate bxruze blau, ne benne' xíchaję ca' cheę bxruze ca', ne xíchaję cheę bi xra'aga ca', belennę' da nigá, na' buluchebe ljwezre' ga cheajsę da nigá.

<sup>25</sup> La' ná'queze bzrin tu benne' guzre' le':

—Benne' ca' bzra'le le'e lizre xia zaj zře'ę lu chila xudau', dxulusédene' bėnneache.

<sup>26</sup> Nadxa benne' xíchaję cheę bi xra'aga cheę xudau' guxíajlęę' bi xra'aga ca', na' xeajlexrí'ę gubáz ca'. Quebe bi belúnene' le' lawe' da belezrebe' bi xelún benne' ca' dxelennę' cheę gubáz ca', lawe' da dxelęquęę' xelu'ę le' xiaj.

<sup>27</sup> Gate xeajlexrí'ę gubáz ca', na' buluzré'ę le' lau benne' xu'u lawe' blau, na' gunná bxruze blau na', dxę'ę benne' gubáz ca':

<sup>28</sup> —Netu' bzuránantu' le'e quebe guchálajlędxale bėnneache lu la bėnnea'. ĆBizra na' bęnle? Ba bzenle ca naca benne' zaj zře'ę xęzre Jerusalén ca naca da dxusédele, ne dxaca lázrele gusebágale netu' xel-la' gute cheę benne' na'.

<sup>29</sup> Nadxa belexechebe Pedro, ne xezicadxa benne' gubáz ca':

—Dxala' guzúantu' xrtizra' Dios, quegá xrtizra' bėnneache.

<sup>30</sup> Dios cheę xra xrtáudxu ca' bsebanę' Jesús, Bėnnea' bėtele le'e bda'ale Le' xaga bęguaj.

<sup>31</sup> Dios bca'ana szreņę' Le' chalá'a xabela cheę, ne bęņę' Le' Benne' Blau, ne Weselá, cheę gata' lataj cheę benne' Israel xelexebí'i lazre' cheę gunite lau Dios dul-la cheę'.

<sup>32</sup> Cheę le' na' netu' dxexechėbentu', ne cá'anqueze dxun Be' Lá'azxa. Dios dxunėzruję' Be' Lá'azxa benne' dxuluzúę' dizra' cheę'.

<sup>33</sup> Gate belennę' da nigá, na' belezré'ę, ne gulaca lazre' xelútię' gubáz ca'.

<sup>34</sup> Ládujla benne' xu'u lawe' ca' zua tu benne' fariseo le' Gamaliel. Naque' benne' dxuxuzájle'ę da nadxixruj bea na, na' dxelápale'ę bėnneache le' ba lá'ana. Benne' nigá guzúę', na' gunná bė'ene' xelexebėaję' gubáz ca' chalė'ajla tu chí'idau'.

<sup>35</sup> Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle cheę benne' caní.

<sup>36</sup> Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácalę ca tapa gaxúa benne' biu le'. Na' belutię' le', na' xúgute' benne' ca' gulaca le' tuze belexase dinnaję' ca', na' gudé cheę da na'.

<sup>37</sup> Gudé na', lu zra gate belú'u bėnneache xiche, na' bla' Judas, benne' Galilea, na' benne' zan xjácalęę' le'. Cá'anqueze belutię' bėnnea', na' xúgute' benne' gulede'ę le' belexase dinnaję'.

<sup>38</sup> Cheę le' na', le gusan benne' caní, ne quebe guchixre cheęle nen benne' ca'. Che da nigá naca na da dxun beneácheze, wadé cheę na.

<sup>39</sup> Che naca na da dxun Dios, quebe séquele le'e guzrí'a xile na. Le guxúe xanne' cheę quebe tíl-lalele Dios.

<sup>40</sup> Xúgute' belexaque' tuze. Nadxa gulenná be'ę belú'u gubáz ca' da xula, na' ca belú'u benne' ca', na' buluzrunę' le' quėbedxa nu xuluchálajle benne' ca' lu La Jesús. Gudé na' bulusane' le'.

<sup>41</sup> Na' benne' gubáz ca' belexedxáję' naga zaj zra' benne' xu'u lawe' ca', dxelebe'ę'ę' lawe' da be' Dios lataj gulede'ę' xel-la' zi' lawe' da zaj naque' Jesús tuze.

<sup>42</sup> Quebe bulusanë' dxuluchálajë', ne dxulusédene' bënneache ca naca chee Jesucristo xúgute zra, lu chila xudau', ne lu xu'u ca'.

## 6

### *Dxuluzúë' gazre benne' xelunë' zrin cheë benne' zaj de'ë Cristo*

<sup>1</sup> Lu zra ca', gate zaj dxan benne' ca' zaj de'ë Jesús, na' benne' ca' dxelennë' dizra' griego gulawë' zria benne' ca' dxelennë' dizra' hebreo. Dxelennë' quebe nu dxunezruj xanne' da xeláw nu'ula ba gulate benne' cheë' zaj zre'ë ládujla le' gate dxelísie' xel-la' wagu tu zra tu zra.

<sup>2</sup> Nadxa benne' gubáz ca' buluchague' ca naca benne' ca' dxeléajle'ë chee Jesús, na' gulé'ë le':

—Quebe naca xrlátaje gusantu' guchálajntu' xrtizra' Dios cheë gudentu' xel-la' wagu.

<sup>3</sup> Cheë le' na', biche ljwézrentu', le quilaj gazre benne' lówela le'e, benne' zaj naque' du lazre', ne dxeléajni'ine', ne zúale Be' Lá'azxa le', na' le gusebague' zrin nigá.

<sup>4</sup> Netu' tu guchálajlezquezentu' Dios, ne gusédentu' bënneache xrtizra' Dios.

<sup>5</sup> Xúgute' gulaza lazre', na' gulequë'ë Esteban, tu benne' dxéajle'ë dutë lázrdawë' cheë Jesús, ne zúale Be' Lá'azxa le'. Cá'aqueze gulequë'ë Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquia, benne' nédxute' bexaque' tuze benne' judío ca'.

<sup>6</sup> Na' guleché'ë benne' caní lau benne' gubáz ca', na' le' bululáwizre' Dios, ne buluzé ne'ë lawe' benne' gazre caní.

<sup>7</sup> Xrtizra' Dios zeaj dxezriluj na, na' benne' ca' dxeléajle' cheë Jesús guxánle'ë lu xezre Jerusalén, na' bxruze zan cheë judío ca' guléajle'ë cheë'.

### *Dxelë-lë' Esteban*

<sup>8</sup> Esteban, tu benne' nápalë'ë xel-la' waca, ne naque' chawe' lau Dios, bënë' xel-la' waca ca' cheë xabáa, ne da dxelunna bea na cheë da ca' lau bënneache ca'.

<sup>9</sup> Nadxa bal-la benne' cheë xu'u naga dxelezraga bënneache ca', nazí le na Xu'u Cheë Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' cheë ga nababa Cilicia, ne Asia, gulezú lawë' dxulutíl-lalëne' Esteban dizra'.

<sup>10</sup> Quebe gulezéquenë' bi xelennë' cheë xrtizra' Esteban lawe' da bchálajë' nen dutë xel-la' sina cheë Be' Lá'azxa.

<sup>11</sup> Nadxa gulízrujë' bal-la benne' ca' cheë xelennë' belennë' gunné Esteban dizra' schanni' cheë Moisés, ne cheë Dios.

<sup>12</sup> Caní belunë', ne gulu'ë xel-le' bënneache ca', ne benne' gula sina ca', ne benne' dxuluxuzájle'ë da nadxixruj bea na, na' gulebía dí'ë Esteban. Gulel-lë' le', ne guleché'ë le' lau benne' xu'u lawe' blau.

<sup>13</sup> Cá'aqueze gulíajë' benne' wën lazre' xelennë' cheë Esteban, na' gu-lennë':

—Benne' nigá quebe dxusanë' dxennë' schanni' cheë xudau' lá'azxa nigá, ne cheë da bdxixruj bea Dios.

<sup>14</sup> Ba bentu' gunné' ca gun Jesús, benne' Nazaret, dxennë' guzría xi'ë xudau' nigá, ne guchë'ë ca naca da zéajledxu da bca'ana Moisés.

<sup>15</sup> Nadxa benne' xu'u lawe' ca', ne xúgute' benne' zaj zre'ë na', gate gulennë'ë Esteban, belelé'ëne' lawë', naca na ca lau tu gubáz cheë xabáa.

## 7

*Dxexechebe Esteban lau benne' xu'u lawe' ca'*

1 Nadxa bxruze blau bchebe' Esteban:

—¿Zaj naca da li da caní?

2 Na' Esteban bechebe':

—Le'e, benne' gula, ne le'e biche ljwezra', le xene. Xradxu zue' xabáa ble'e lawe' lau xra xrtáudxu Abraham gate ne zue' lu xezr la xu Mesopotamia, nédxudxa gate quebe ne xezé'e cheajxezúe xezre Harán.

3 Dios guzre' le': "Bsan lázriu' ne xúgutē xrtia ljwezru', na' guxíaj lu xezr la xu da gulé'eda' lue'."

4 Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a.

5 Dios quebe bi bnézruje' chee Abraham naga sue' lu xezr la xu nigá, ne naga guné' lizre', san guchebe lazre' gunézruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zrí'ine Abraham.

6 Cá'anqueze Dios guzre' le' xelezúa zrí'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza.

7 Cá'anqueze guzre Dios le': "Neda' chuga' ca gaca chee xezr la xu na' guchine na zrí'ine zre su', na' te na' xelixedxúaje' ga na', ne xelúe lá'ané' neda' lu xezr la xu nigá."

8 Dios bene' tu xel-la' wezría nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zrí'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

9 'Zrí'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutiē-be' chee chu'ube' lu na' benne' guchínene'-be' lu xezr la xu Egipto. Dios guzúalene' José,

10 na' bselé'-be' lu xúgutē da zi' da xa'. Bnézruje'-be' xel-la' dxéajni'i, na' ben Dios bezaca ba lázrele' Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

11 'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrelene' da xelawe'.

12 Gate ben Jacob de zrua' xtila lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto.

13 Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'.

14 Nadxa José gunná bé'ene' xeajlexrí'e xre', ne ca naca xrtia ljwezre', zaj naque' ga xun chínuē'.

15 Ca'an guca, Jacob xeajsúe' Egipto naga gutiē', ne naga gulátequeze xra xrtáudxu ca'.

16 Ca gudé na' belú'e bēl-la' dxen gate chee benne' ca' lu xezre Siquem, naga bulucache' lē' lu ba da zua na lu xezr la xu na' da guzi' Abraham nen dumí da gudízruje' bi ca' zrí'ine Hamor lu xezre Siquem na'.

17 'Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulánl'e.

18 Nadxa guzú lau dxenná bea tu wenná bea lu xezr la xu Egipto, benne' quebe núnbe'e José.

19 Wenná bea nigá guzi' xe'e benne' ljwézredxu, ne bzálaje' xra xrtáudxu ca', na' gunná bé'eng' lē' cheajlecá'anē'-be' bidu dxe'ene chee' ca' chee xelátebe'.

20 Lu zra ca' gulaj Moisés, ne gúcabe' tu bidau' bezaca ba lazre' Dios chee'be', na' xra xrnabe' bulusegule'-be' lizre' chunna beu'.

21 Gate bzin zra zxal-la' cheajlega'anē'-be', na' bi nu'ula chee wenná bea na' bequé'e-be', ne bsegule'-be' ca' zrí'inequeze'.

22 Chee lē' na', Moisés guzúdebe' ca naca xel-la' sina chee Egipto, na' gúcabe' tu benne' nape' xel-la' dxenná bea ca naca da gunné', ne da bene'.

23 'Gate bzrie' chua iza, Moisés guca lazre' cheajnné'e benne' ljwezre', benne' Israel ca'.

24 Blé'eng' tu benne' Egipto dxu'e tu benne' Israel. Chee gúcalēng' benne' na', ne chee bebéaj lazre' bēnnea', be'ie' benne' Egipto na'.

25 Moisés gúqueng' benne' lazrie', benne' Israel ca', xeleque bé'eng' Dios guselé' benne' ca' nē chee lē'. Benne' ca' quebe guleque bé'eng' na'.

26 Zra xula Moisés blé'eng' chupa benne' Israel dxeledil-lē', na' lawe' da guca lazre' xelezrá zrie' benne' ca', na' guzre' lē': "Le'e nácale biche ljwézrele. ¿Bizr chee na' dxue ljwézrele?"

27 Nadxa benne' na' dxu'e benne' ljwezre' bzrigue' Moisés, na' guzre' lē': "¿Nu bzua lue' ca benne' xíchaje cheentu' chee guchi'u ca da dxuntu'?"

28 ¿Dxaca lazru' gutiu' neda' ca be'nu' neaje, be'tiu' benne' Egipto na'?"

29 Ca ben Moisés da nigá, na' bzrúnajē' zexiáje' lu xezr la xu chee benne' Madián ca'. Na' guzúe' ca tu benne' zitu', na' bhaga ná'lene' nu'ula, na' gulaj chupa zrí'ine'.

30 'Ca gudé chua iza, gate zue' lē'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa lē' tu lu xi' da dxe' lu xeche' bisigá.

31 Moisés bzrebe' ca naca da blé'eng', san gate gubigue' chee lē'e xánnēng', benne' chi'i Xránadxu, dxenné':

32 "Neda' naca' Dios chee xra xrtá'u ca', Dios chee Abraham, ne Dios chee Isaac, ne Dios chee Jacob." Nadxa Moisés guzú lau dxezrizie' lu xel-la' dxezrebe, na' quebe bexá'zjeng' nne'e.

33 Xránadxu guzre' lē': "Guleaj zrelu' xu'u ni'u lawe' da naca lá'azxa lataj naga dxeléaju'.

34 Neda' ba ble'eda' ca naca da dxelezaca zi' bēnneache chia' zaj zre'e lu xezr la xu Egipto. Dxenda' ca dxelebezre xache', ne ba bla'a chee guselá' benne' ca'. Gudá lue', sel-la' lue' lu xezr la xu Egipto."

35 'Lácala benne' ca' buluzúe' Moisés chalá'ala, gulé'e lē': "¿Nu bzua lue' ca benne' xíchaje cheentu' chee guchi'u ca da dxuntu'?" Dios gusel-lē' lē' ca benne' xíchaje, ne benne' guselá' lē', nē chee gubáz chee xabáa na' ble'e lawe' lē' lu xeche' bisigá.

36 Moisés na' bebéaje' xra xrtáudxu ca' lu xezr la xu Egipto, ne bene' xel-la' waca ca', ne da gulunna bea na da bene' lu xezr la xu na', ne lu nísadau' Xrna, ne lē'e xixre' lawe' lataj da chua iza na'.

<sup>37</sup> Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' ládujla xrtia ljwézrele le'e, ca gusel-le' neda'. Chee Le' le xen."

<sup>38</sup> Cá'anqueze Moisés nigá, bènea' guzúale benne' ca' le'e xixre' lawe' lataj, tu zren nen gubáz chee xabáa na' bchálaje' le' lu xi'a Sinaí, guzúale' xra xrtáudu ca', ne guzi'e dizra' chee xel-la' nabán chee bde'e' na cheentu'.

<sup>39</sup> 'Xra xrtáudu ca' quebe gulaca lazre' xuluzúa dizra' chee Moisés, san buluzúe' le' chalá'ala, ne gulaca lazre' xelexezrine' Egipto.

<sup>40</sup> Gate cabí zue' Moisés ga na' gulé'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bènea' bebéaje' netu' lu xezr la xu Egipto."

<sup>41</sup> Nadxa belune' tu bedáu' guca na ca tu bézredau', ne belutié' be xixre'du ca' lau bedáu' na', ne gulebene' chee da zaj nune'.

<sup>42</sup> Nadxa Dios becuase' nen benne' ca', na' be'e' le' lataj belúe lá'ané' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxeleené':

Le'e, benne' Israel ca', ¿guzríale-ba' chia' neda' be xixre'du ca' bétele duté' chua iza gate na' guzúale le'e xixre' lawe' lataj?

<sup>43</sup> ¡Cabí! Bíale xudau' xide zra be xixre' chee dios chee, Moloc, ne xudau' chee belaj nazí le na Renfán, dios chee, bedáu' ca' bénquezle le'e chee be lá'anale na.

Chee le' na' cuéaja' le'e lu xezr la xu chee, ne sel-la' le'e dédedxa ca naga dxe' Babilonia.

<sup>44</sup> 'Le'e xixre' lawe' lataj na' xra xrtáudu ca' belune' tu xudau' xide naga buluzrá chawe' blaga' xiaj naga naxúaj da nadxixruj bea na. Belune' na ca naca da ble'e Dios Moisés, gate guzre' le' guné' na ca naca da na' ba blé'eng'.

<sup>45</sup> Zri'ine xra xrtáudu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee beleque'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudu ca'. Ca'an guca ca bzrinté zra ca' zua David.

<sup>46</sup> Wenná bea David na', Dios bezaca ba lazre' chee', na' guca lazre' David guné' tu xudau' naga sua Dios chee Jacob.

<sup>47</sup> Salomón, zri'ine David, bene' lizre Dios na'.

<sup>48</sup> Dios szrenté quebe zue' lu xudau' ca' da zaj nun bénneache. Caní gunná tu benne' bchálaje' waláz chee Dios, gunné':

<sup>49</sup> Xabáa naca lataj naga dxe'a, na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

<sup>50</sup> ¿Quegá neda' bénqueza' da ca'?

<sup>51</sup> Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'axza. Nácale ca gulaca xra xrtáule ca'.

<sup>52</sup> Xra xrtáule ca' buluzría xi'e xúguté benne' ca' buluchálaje' waláz chee Dios. Belutié' benne' ca' buluchálaje' nédxudauté ca dxal-la' gaca chee benne' xrlátaje nigá, na' gate ble'e, lé'equezle bdele Le' lu na' benne' ca' guledábague' Le', ne bétele Le'.

<sup>53</sup> Le'e guzile da nadxixruj bea na da benne gubáz chee xabáa dxi'u, san quebe dxuzúale dizra' chee na.

### *Dxelutië' Esteban*

<sup>54</sup> Gate belén benne' ca' da caní, na' gulagu lazxe' lu xel-la' dxelezá'a Esteban.

<sup>55</sup> Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chalá'a xabeła chee Dios.

<sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chalá'a xabeła chee Dios.

<sup>57</sup> Benne' ca' bulusézxujé' nague', na' gulebezre xe'e, ne xeajlechia che'e Esteban na'.

<sup>58</sup> Na' belebéajé' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lané' lu na' tu benne' cuide' le' Saulo.

<sup>59</sup> Dxácaté dxuluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca hexuzre gunné' ca', na' gutié'.

## 8

### *Saulo dxenáu zi' xuzre' benne' ca' dxeléajle'e chee Jesús*

<sup>1</sup> Saulo guque' tuze nen benne' ca' belutië' Esteban.

Lu zra ná'queze gulezú lawe' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgute' belexase dínnaje' ca naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ane' xezre Jerusalén na'.

<sup>2</sup> Bal-la benne' ca' zaj naque' chee Dios bulucache' Esteban na', ne gulebézrele'e chee'.

<sup>3</sup> Dxácaté na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

### *Dxuluchálaje' dizra' chawe' chee Jesús naga nababa Samaria*

<sup>4</sup> Benne' ca' chee Cristo, benne' buluzrúnnujé' Jerusalén, buluchálaje' dizra' chawe' chee Jesús gáteteze na' zjaque'.

<sup>5</sup> Felipe, tue' benne' ca', guxíaje' tu xezre naga nababa Samaria, na' guzú lawe' dxuchálajle' benne' ca' ca naca chee Cristo.

<sup>6</sup> Benne' ca' zaj nazrage' belén xánnene' ca da dxuchalaj Felipe, ne belelé'equezne' ca naca xel-la' waca ca' da dxune'.

<sup>7</sup> Benne' zan, benne' zaj xu'e be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ní'a ne'e, ne benne' zrinnaj ca' belexexaque'.

<sup>8</sup> Ca'an guca, gulebéle'e xúgute benne' ca' lu xezre na'.

<sup>9</sup> Zua na' tu benne' le' Simón, nédxute guque' benne' wazrá', ne guzú xe'e benne' Samaria ca', dxenné' naque' tu benne' szren.

<sup>10</sup> Xúgute' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee Dios.



<sup>11</sup> Gulape' le' ba lá'ana lawe' da lu xel-la' wazrá' chee' na' guzi xē'e benne' ca' zane' iza.

<sup>12</sup> Gate guléajle'e chee dizra' chawe' da dxuchalaj Felipe ca dxenná bea Dios, ne ca naca chee La Jesucristo, xúgute', benne' biu, ne nu'ula ca', beledxúe' nisa.

<sup>13</sup> Cá'aqueze Simón na' guxéajle'e chee Jesús, ne gudxúe' nisa, na' guzú lawe' zéajlene' Felipe, na' dxexebánene' ca naca xel-la' waca da za xabáa da dxun Felipe.

<sup>14</sup> Gate benne' gubáz ca' chee Jesús, benne' zaj zre'e Jerusalén, belenne' gulezi' lu na' benne' Samaria ca' xrtizra' Dios, na' gulesel-le' Pedro ne Juan na'.

<sup>15</sup> Gate belezrine' na', na' belenabe' law Dios chee benne' Samaria ca' dxeléajle'e chee Jesús chee xezezi'e Be' Lá'azxa.

<sup>16</sup> Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús.

<sup>17</sup> Nadxa Pedro ne Juan buluzé ne'e lawe' benne' ca', na' gulezi'e Be' Lá'azxa.

<sup>18</sup> Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí,

<sup>19</sup> gunné':

—Le gunna neda' xel-la' waca nigá chee gate guzée' na'a lawe' núteteze benne', na' si'e Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios.

<sup>21</sup> Quebe naca chiu', ne quebe napu' lataj lu da nigá lawe' da quebe naca xrlátaje xichaj lázrda'u lau Dios.

<sup>22</sup> Bsan ca naca da calēla chiu' nigá, ne guta' xue Dios chee gunite lawe' chiu' ca da gúquenu' lu xichaj lázrda'u.

<sup>23</sup> Dxeque be'eda' nazrate xichaj lázrda'u da calēla, na' da calēla na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda', chee quebe gaca chia' ca da gunnáu'.

<sup>25</sup> Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bēnneache dizra' chawe' chee Jesús lu xézredu ca' zaj nababa Samaria, na' ca gudé na' belexezrine' Jerusalén.

### *Felipe dxuchálajlene' tu benne' chee xezr la xu Etiopía*

<sup>26</sup> Gudé na' guzre tu gubáz chee xabáa chee Xránadxu Felipe:

—Guxasa, guxiáj chalá'a naga dxedé gubizra beu' zaga ca', naga zrúa neza chee Jerusalén da zeaj xezre Gaza, da dxedé na le'e xixre' lawe' lataj.

<sup>27</sup> Felipe guxase', na' guzé'e zéajé', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxiáj benne' nigá Jerusalén chee be lá'ane' Dios.

<sup>28</sup> Na'a zexiájé' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios.

<sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba bēnnea' xiche chee Isaías, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?  
Na' guzre' Felipe cuene' cué'lene' le'.

<sup>32</sup> Naga dxulabe' lu xiche chee Dios dxenná na caní:

Belech'e Le' naga gati'e ca tu zrila' dau',  
na' ca zrila' na' dxátaba' zrize lau benne' ca' dxuluchibe' zraba',  
ca' bènqueze Le', quebe bi gunné'.

<sup>33</sup> Bulucá'ana ditje' Le', ne quebe belú'e lataj nu guchi'a chee',  
ne quebe nu gaca guchálaje' ca naca chee' zri'ine zre sue',  
lawe' da belutie' Le'.

<sup>34</sup> Na' benne' Etiopía na' bchebe' Felipe:

—Gunná, ¿nuzra chee' dxenná benne' nigá, cheéqueze' na', che chee' xetú  
benne' xula?

<sup>35</sup> Nadxa guzú lau Felipe bzéajni'ine' le' ca naca naga dxulabe', ne  
bchálajlene' le' dizra' chawe' ca naca chee' Jesús.

<sup>36</sup> Gate guledé' tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle'u duté lárda'u, waca.

Benne' na' bechebe':

—Dxéajle'a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na' dxúpate' gulu'e lu nisa, na'  
Felipe bchue' le' nisa.

<sup>39</sup> Gate bexedxúaje' lu nisa na', na' Be' chee' Xránadxu beche'e Felipe naga  
xula. Benne' Etiopía na' québedxa blé'ene' le', na' bexu'e neza chee' duté xel-la'  
dxebé.

<sup>40</sup> Felipe na' guque bé'ene' ba zu'e xezre Azoto, na' gudé'e tu tu xezre  
dxuchálaje' dizra' chawe' ca naca chee' Jesús cadxa bezrine' Cesarea.

## 9

### *Saulo dxexaque' benne' chee' Jesús*

*(Hch. 22.6-16; 26.12-18)*

<sup>1</sup> Dxácate' na' Saulo quebe dxusané' dxune' ba xuzre gutie' benne' ca'  
dxeléajle'e chee' Xránadxu. Chee' guné' caní guxíaje' xeajchálajlene' bxruze  
blau.

<sup>2</sup> Gunabe' xiche da dxulé'e na nape' xel-la' dxenná bea da gu'e chéaje'  
xudau' ca' zaj nnita xezre Damasco, chee' séquene' cheaxxedíajle' benne' ca'  
dxeléajle'e chee' dizra' chawe' chee' Jesús, ne che'e le', benne' biu, ne nu'ula  
ca', chee' guzré'e le' lizre xia lu xezre Jerusalén.

<sup>3</sup> Na' gate ne xu'e neza zéaje', ne ca ba zua zrine' xezre Damasco, na' bsaní'  
tu xi' naga zéaje' da za' xabáa.

<sup>4</sup> Saulo xeajcházie' lu xu, na' benne' chi'i tu benne' dxe'e le':

—Saulo, Saulo, ¿bizr chee' na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran'?

Na' bènnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca  
dxun bezre gate dxulíbeba' lawe' xágala da dxádu'e'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

<sup>7</sup> Benne' ca' zjácalę Saulo belezrébele'e lawe' da belenne' chi'i benne' na', san quebe nu belelé'ene'.

<sup>8</sup> Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequ'e ne'e, ne guleché'e le' lu xezre Damasco.

<sup>9</sup> Guzúe' na' chunna zra quebe dxelé'ene', ne quebe bi gü'e gudawe'.

<sup>10</sup> Lu xezre Damasco na' zua tu benne' dxéajle'e cheę Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxę'e le':

—Guxasa, guxíaj neza da nazí le na: Neza Li, na' lizre Judas guchębu' cheę tu benne' Tarso, le' Saulo. Benne' nigá dxuláwizre' Dios.

<sup>12</sup> Tu lu da blé'ene', ba blé'ene' tu benne' le' Ananías chu'e guzúe' ne'e le' cheę xelé'ene'.

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' cheę benne' nigá, ne cheę xúgute da calęla da dxune' cheę benne' ca' dxeléajle'e chiu' Lue' lu xezre Jerusalén.

<sup>14</sup> Na'a blę'e nigá napę' xel-la' dxenná bea cheę benne' xíchaję ca' cheę bxruze ca', cheę che'e lizre xia xúgute benne' dxelenné' Dios lu Lau' Lue'.

<sup>15</sup> Na' Xránadxu guzre' le':

—Guxíaj. Neda' ba gucá'a benne' na' cheę cheajzenne' benne' xezr la xu ca', ne benne' wenná bea ca', ne benne' Israel ca', ca naca chia' neda'.

<sup>16</sup> Neda' gulé'eda' le' ca naca da zante da saque'e ne chia' neda'.

<sup>17</sup> Nadxa Ananías guzúe' zéaję' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasel-le' neda' cheę xelé'enu', ne cheę súalę Be' Lá'axza lue'.

<sup>18</sup> Ca' guca beléxrujte lu xiaj lawe' da zaj naca ca xrlacu bela, na' belé'ene'. Na' bexasa Saulo, ne gudxúate' nisa.

<sup>19</sup> Gudé na' gudawe', ne bedipe'. Begá'ane' tu chupa zra nen benne' Damasco ca' dxeléajle'e cheę Jesús.

### *Saulo dxuchálaję cheę Jesús lu xezre Damasco*

<sup>20</sup> Nadxa guzú lau Saulo dxuchálaję cheę Jesús lu xu'u ga dxelezraga judío ca' zaj nnite' Damasco, dxenné' Jesús naque' Zri'ine Dios.

<sup>21</sup> Xúgute benne' beléneę' cheę' belexebánene', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' blę'e nigá cheę che'e benne' ca' xezre Jerusalén cheę gudé'e le' lu na' benne' xíchaję ca' cheę bxruze ca'?

<sup>22</sup> Saulo bchálajdxę' du lazre' cheę Jesús, ne dxulé'ene' Jesús naque' Cristo cheę Dios, na' bzua zrie' benne' judío ca' zaj zre'e Damasco.

### *Saulo dxelé' lu na' benne' judío ca'*

<sup>23</sup> Ca gudé zane' zra, benne' judío ca' belunę' tuze dizra' xelútię' Saulo.

<sup>24</sup> Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bénneache xezre na', cheę xelútię' le'.

25 Nadxa benne' ca' dxeléajle'e chee Jesús gulegú'e Saulo tu lu xcuite lba zren, na' buluxulétaje' le' chizrela le'e ze'e da naxechaj na xezre. Ca' guca, gulá Saulo.

### *Saulo dxezrine' Jerusalén*

26 Gate bezrín Saulo Jerusalén, guca lazre' guné' tuze benne' ca' dxeléajle'e chee Jesús, san benne' ca' dxelezrebe' le' lawe' da quebe dxeléajle'e ba dxéajle'e Saulo chee Jesús.

27 Bernabé guché'e Saulo, ne bze' le' lau benne' gubáz ca' chee Jesús. Na' bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajlene' Saulo, ne ca bchalaj Saulo du lazre' lu xezre Damasco nen xel-la' dxenná bea chee La Jesús.

28 Nadxa Saulo begá'ane' Jerusalén, dxedálene' benne' ca'.

29 Bchalaj Saulo du lazre' lu La Xránadxu, dxuchálajlene' benne' ca' dxe-lenne' dizra' griego, san benne' caní gulaca lazre' xelúti'e' le'.

30 Gate guleque be'e biche ljwézredxu da caní, na' guleché'e Saulo lu xezre Cesarea, na' lu xezre na' gulesel-le' le' xezre Tarso.

31 Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale Be' Lá'azxa le', gulané'.

### *Pedro dxexune' Eneas*

32 Gate dxedá Pedro dxeajnné'e biche ljwézredxu ca', na' guxíajqueze' xea-jnné'e benne' ca' dxeléajle'e chee Jesús lu xezre Lida.

33 Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj.

34 Na' gunná Pedro, dxé'e le':

—Eneas, Jesucristo ba bexune' lue'. Bexasa, ne butube da'a chiu'.

Na' bexásate Eneas na'.

35 Belelé'e xúgute benne' le', benne' zaj zre'e xezre Lida, ne xezre Sarón, na' belexaque' chee Xránadxu.

### *Dorcas dxexebang' ládujla benne' gate*

36 Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'.

37 Lu zra ca' guxú'u Dorcas xel-la' we', na' gutie'. Na' bulugazje' le', ne belexrue' le' tu lu xu'u naga zua gudxupe' cuía dxala.

38 Xezre Jope na' zua na' gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

39 Nadxa Pedro guxíajlene' benne' ca'. Gate bzrine' na', na' beleché'e le' naga zrua Dorcas na', na' xúgute nu'ula ca' ba zaj nate benne' chie' zaj naxéchaje' Pedro dxelebezre', ne dxululé'eng' le' zra nu'ula, ne zra benne' biu, da ca' ben Dorcas na' gate ne zue' nen benne' ca'.

40 Nadxa guleaj Pedro xúgute benne' ca', na' bzu zribe' bchálajlene' Dios. Na' gunné'e nu'ula gate na', gunné'e:

—Tabita, bexasa.

Nadxa nu'ula na' bexá' lawe', na' gate blé'eng' Pedro, bexasé' gudxé'e.

41 Na' Pedro bequé'e ne'e, bechise' le'. Nadxa gunné' biche ljwézredxu ca', ne nu'ula ca' ba gute benne' biu chee', na' blé'eng' benne' ca' le' naca bane'.

42 Ca guca da nigá belén ca naca benne' zaj zře'e xezre Jope, na' benne' zan guléajle'e chee Xránadxu.

43 Pedro begá'ane' zane' zra lu xezre na' lizre Simón, tu benne' dxucá'ana chawe' xide zra be xixre'.

## 10

### *Pedro ne Cornelio*

1 Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la.

2 Benne' nigá, ne benne' zaj zře'e lizre' dxulucá'ana szrené' Dios, ne dxelezrebe' Le'. Cá'anqueze dxunézrujle'e dumí dxácalene' benne' judío ca', ne tu dxuchálajlezqueze' Dios.

3 Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zu'e, na' guzre' le':

—Cornelio.

4 Cornelio guzúe' dxenné'e gubáz chee xabáa na' duté xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'.

5 Gusel-la benne' chjaque' xezre Jope, cheajlenné' Simón, bènea' léqueze' Pedro.

6 Zu'e lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

7 Gate bezá' gubáz chee xabáa na' bchálajlene' le', na' gunné Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'.

8 Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

9 Zra xula, dxácaté zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee guchálajlene' Dios.

10 Ba dxedúnle'e, ne guca lazre' gawe', na' dxácaté ne dxulucueze' da gawe', blé'ene' tu da ble'e Dios le'.

11 Blé'ene' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápaté la'a chee na.

12 Lawe' ladxe' na' zaj zria xúguté cue' be xixre', be zria tapa ni'a na'ba', ne be snia ca', ne be zua xrila ca'.

13 Nadxa benne' tu chi'i benne' dxe'e le':

—Guxasa, Pedro. Bete tu bea ca' chee gagu'-ba'.

14 Pedro bechebe':

—Cabí, Xran. Neda' cabata' ne gawa' da quebe nun Dios gagu bèneache, ne quegá da naca na sban.

15 Benne' na' bchálaje' da xula, dxe'e le':

—Da ba nucá'ana chawe' Dios, quebe nnau' lue' naca na sban.

16 Da nigá guca na chunna lasa, na' ladxe' na' beguén na xabáala.

17 Dxácaté dxe' Pedro dxulaba lazre' bi zéaje ca naca da blé'ene', na' belezrín benne' ca' nasel-la Cornelio dxu'a dxa xu'u, dxuluchebe' ga zua lizre Simón.

18 Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bènea' léqueze' Pedro.

19 Gate Pedro ne dxulaba lazre' ca naca da blé'ene', na' Be' Lá'azxa guzre' le':  
—Gunná'xque, chunna benne' dxelexíajle' lue'.

20 Guxasa, bexetaj. Guxíajle' benne' ca', ne quebe gun chupa lazru' lawe' da nasel-la' neda' benne' ca'.

21 Nadxa Pedro bexétaje' naga zaj zra' benne' ca' nasel-la Cornelio, na' guzre' le':

—Neda' na' dxexíajle' le'e. ¿Bizra chee' za'le'?

22 Benne' ca' belexechebe':

—Za'ntu' waláz chee' Cornelio, benne' dxenná' be'e lu wedil-la. Naque' benne' xrlátaje, ne dxezrebe' Dios, na' xúgute' benne' judío ca' dxelape' le' ba lá'ana, ne zaj nazrí'ine' le'. Tu gubáz chee' xabáa chee' Dios guzre' le' dxal-la' sel-le' benne' xedajlenné' lue' xidu' lizre' chee' xenne' ca' da dxal-la' xu'u le'.

23 Nadxa Pedro bzre'e benne' ca' xu'u na', na' belexegá'ane' nen le' xela na'. Zra xula guxíajle' Pedro benne' ca', na' xjácale' bal-la biche ljwézredxu le', benne' zaj zre'e Jope.

24 Zra gudxupe' zra belezrine' xezre Cesarea naga zua Cornelio dxebeze' le', ne zrale' bal-la benne' xrtie' le', ne xezícadxa benne' ljwezre', benne' ca' gunné'.

25 Gate bzrin Pedro chale'aj, bdxuaj Cornelio guzú' lu ne'e le'. Bzu zribe' lau Pedro chee' gucá'ana szrene' le'.

26 Pedro bechise' le', dxenné':

—Guzé. La gázqueze neda' naca' bénneache ca lue'.

27 Dxácaté dxuchálajle' Pedro Cornelio, gulu'e lu xu'ula, na' blé'ene' benne' zan zaj nazrague' na'.

28 Nadxa gunná Pedro, dxé'e le':

—Nézquezle' le'e quebe dxunna da nadxixruj bea chee' judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' chee' netú benne', quebe nnia' naque' sban, u naque' benne' quebe gapa' ba lá'ana.

29 Chee' le' na', gate gulenné' neda', la guzá'tea', ne quebe ben chupa lazra'. Dxaca lazra' nezda' bi chee' na' gunnele' neda'.

30 Nadxa bechebe Cornelio:

—Ba zea'j tapa zra ca zúadxu na'a, zua' lizra' nigá dxuna' gubasa, ne dxuchálajlena' Dios, gate ble'e lau tu benne' neda', nacue' zra lané' da dxácatite na.

31 Benne' na' guzre' neda': “Cornelio, Dios ba benne' da dxuchálajlenu' Le', na' nézene' ca da dxunu' dxácalenu' benne' xache' ca'.

32 Gusel-la benne' chjaque' xezre Jope, cheajlexri' e Simón, bénnea' léqueze' Pedro. Zue' lizre' xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xide' nigá, na' guchálajlene' lue'.”

33 Ca'an guca, gusél-latea' benne' ca' bedajlexedíajle' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute' ca da gunná be'e Xránadxu lue' guchálajlenu' netu'.

### *Da bchalaj Pedro lizre Cornelio*

34 Nadxa guzú lau Pedro dxuchálajle', dxenné':

—Na'a dxéajni'ida' Dios quebe dxebéaje' bál-laze bénneache,

35 Na' xúgute' xezr la xu Dios dxezí' lu ne'e benne' ca' dxelezrebe Le', ne dxelune' da xrlátaje.

<sup>36</sup> Dios bchálajlęne' zri'ine zre sua Israel ca', ne bchálaję' dizra' chawe' cheę xel-la' dxebeza zri lazre', da dxezidxu ne cheę Jesucristo, Bénnea' naque' Xrana xúgute bęneache.

<sup>37</sup> Le'e ba nézquezle ca naca da guca du ca naca lu xęzr la xu cheę benne' judío ca', da guzú lau na naga nababa Galilea ca gudę bchalaj Juan xrtizra' Dios, ne bchue' bęneache nisa.

<sup>38</sup> Nézele ca ben Dios, bnęzruje' Jesús, benne' Nazaret, xel-la' waca cheę Be' Lá'azxa, ne ca gudá Le' dxune' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúalę Dios Le'.

<sup>39</sup> Netu' dxexechębentu' cheę da caní, xúgute da ben Jesús naga nababa Galilea, ne da bene' lu xęzre Jerusalén. Gudę na' belutie' Le', gate buludę'e Le' xaga bęguaj,

<sup>40</sup> na' Dios bsebanę' Le' gate guca chunna zra, na' be'e lataj ble'e lau Jesús netu'.

<sup>41</sup> Quebe ble'e lawę' xúgute bęneache, san launtu' nétu'ze, nácantu' benne' ca' guleaj Dios nédxudautę cheę xechębentu' cheę da caní. Netu' gü'e'e gudáguntu' nen Le' gate gudę bebanę' ládujla benne' gate.

<sup>42</sup> Gusel-le' netu' guchálajlęntu' bęneache, ne xechębentu' ca da nun Dios, nuzúę' Jesús nigá cheę guchi'e cheę benne' ban ca', ne cheę benne' gate ca'.

<sup>43</sup> La gázqueze nédxudautę gulenná xúgute benne' ca' buluchálaję' waláz cheę Dios, buluchálaję' ca dxal-la' gaca cheę Jesús, gulennę' xúgute benne' xelęajlę'e cheę Jesús, na' ne cheę Le' Dios gunite lawę' xtul-la benne' ca'.

### *Benne' quebe zaj naque' judío dxelezi'e Be' Lá'azxa*

<sup>44</sup> Ne dxuchalaj Pedro gate bzrin Be' Lá'azxa bedajsúalęne' xúgute benne' ca' dxelennę' da dxuchalaj Pedro.

<sup>45</sup> Benne' judío ca' dxelęajlę'e cheę Jesús, benne' ca' zá'acalęne' Pedro, belexebánene' gate guleque be'ene' ba zúalę Be' Lá'azxa benne' ca' quebe zaj naque' judío.

<sup>46</sup> Dxeleque be'ene' na lawe' da belennę' dxuluchalaj benne' ca' dizra' cheę benne' xula, ne dxelúe lá'ane' Dios.

<sup>47</sup> Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bentu' netu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudę na', benne' ca' gulata' xuene' Pedro xegá'ane' nen le' tu chupa zra.

## 11

### *Pedro dxuzenne' benne' gubáz ca' zaj zrę'e Jerusalén ca naca da bene'*

<sup>1</sup> Benne' gubáz ca', ne biche ljwézredxu ca' zaj zrę'e Jerusalén belennę' ba gulezi' lu na' benne' quebe zaj naque' judío dizra' cheę Dios.

<sup>2</sup> Gate bezrín Pedro xęzre Jerusalén, gulezi' tizra' benne' ca' lę', benne' ca' dxelennę' dxal-la' chugu late' belá' cheę benne' ca' zaj naque' cheę Dios.

<sup>3</sup> Benne' caní buluchębe' Pedro:

—¿Bizr cheę na' guxiaju' xeajsúalęnu' benne' ca' quebe zaj naque' judío, ne gudágulęnu' lę'?

<sup>4</sup> Nadxa Pedro bzenne' benne' ca' xúgute da guca cha cheę na, gunné':

<sup>5</sup> —Neda' zua' lu xęzre Jope, na' gate dxuchálajlęna' Dios, ble'eda' tu da ble'e Dios neda'. Ble'eda' tu ladxe' zren nadxęaj dápatę la'a cheę na, da dxetaj na xabáa, ne bedajsę na lawa'.

<sup>6</sup> Gate gunná' xánnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílaba'.

<sup>7</sup> Na' benda' tu chi'i benne' guzre' neda': "Guxasa Pedro, bete tu bea ca', na' gagu'-ba'."

<sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bénneache, ne quegá da naca sban.

<sup>9</sup> Nadxa bénnea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban."

<sup>10</sup> Da nigá guca na chunna lasa, na' ca gudé na' xúgute da ca' belexegüén na xabáa.

<sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea chee zedajlexedilaj neda'.

<sup>12</sup> Be' Lá'azxa gunná bé'ene' neda' chéajlęna' benne' ca', ne quebe gun chupa lazra'. La gázqueze gusiá'cale xrupa benne' biche ljwézredxu caní neda'. Xúgutęntu' guxú'untu' lizre tu benne'.

<sup>13</sup> Le' bchálajlęne' netu' ca blé'ene' lizre' tu gubáz chee xabáa, ze ni'e, ne guzre' le': "Gusel-la benne' chjaca xezre Jope chee cheajlęnné' Simón, benne' léqueze' Pedro.

<sup>14</sup> Benne' nigá xe'e lue' aja gunu' chee lau' lue', ne xeelé xúgute benne' zaj zre'e lizru'."

<sup>15</sup> Gate guzú lawa' dxuchálajlęna' benne' ca', na' bzrin Be' Lá'azxa guzúalęne' benne' ca', ca ble'e guzúalęne' dxi'u nédxudaute.

<sup>16</sup> Nadxa xeajsá lazra' ca gunná Xránadxu, gunné': "Da li Juan bchue' bénneache nisa, na' gaca chee de da zéaję xel-la' dxedxúa nisa, súale Be' Lá'azxa le'e."

<sup>17</sup> Che Dios bnézruje' chee benne' ca' ca benne' dxi'u, guxéajlędxu chee Xránadxu Jesucristo, ħnuzra naca' neda' chee tábaga' Dios?

<sup>18</sup> Nadxa gate biche ljwézredxu ca' zaj zre'e Jerusalén belenne' da caní, na' gulezúa zrie', ne gulezú lawe' dxelúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebí'i lazre' chee xezezi'e xel-la' nabán zeajlí canna.

### *Benne' dxelájle'e chee Jesús zaj zre'e xezre Antioquia*

<sup>19</sup> Gate belutię Esteban, na' belau zi' xuzre' xezícala benne' dxelájle'e chee Jesús, na' bal-le' buluzrúnnaje', xjaque' xezre Fenicia, ne lu xu Chipre, ne xezre Antioquia. Gate belezrine' lataj ca', na' buluchálaję' dizra' chee Jesús lau benne' judío cá'aze, ne quegá lau benne' quebe zaj naque' judío.

<sup>20</sup> Nadxa bal-la benne' dxelájle'e chee Jesús, benne' Chipre, ne benne' Cirene, belelé'e xezre Antioquia, na' buluchálajlęne' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús.

<sup>21</sup> Xel-la' waca chee Xránadxu guzúale na benne' ca', na' ca'an guca, benne' zan belexexaque' chee Xránadxu.

<sup>22</sup> Gate belén benne' ca' da nigá, benne' dxelájle'e chee Jesús zaj zre'e Jerusalén, na' gulesel-le' Bernabé xezre Antioquia.

<sup>23</sup> Gate bzrin Bernabé na', blé'ene' ca da chawe' da dxun Dios chee benne' ca', na' gubéle'ene'. Na' bsízrene' xúgute benne' ca' chee xelezúa chúchue' lu da naca chee Xránadxu.

<sup>24</sup> Bernabé naque' benne' xrlátaje, na' zúale Be' Lá'azxa le', ne dute lázrdawe' dxéajle'e chee Jesús. Ca'an guca, ne chee le' gulájle benne' zan chee Xránadxu.



25 Gudé na' guxíaj Bernabé xezre Tarso, zeajxedílaye' Saulo, na' gate bezrelne' le', beche'e le' Antioquía.

26 Gulezúe' na' tu iza naxá' nen benne' ca' dxeléajle'e chee Jesús, na' bulusédene' benne' zan. Lu xezre Antioquía na' guca na da nedxu gulé'e benne' ca' dxeléajle'e chee Xránadxu, Benne' Cristiano.

27 Ca lu zra ca', bal-la benne' dxelenné' waláz chee Dios besía'que' Jerusalén, xjaque' Antioquía.

28 Tu benne' ca' le' Agabo guzé' lówela biche ljwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma.

29 Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xelesel-le' da gácale na biche ljwézredxu zaj zre'e xezre ca' zaj nababa Judea, ca da xezezeque' tu tue' xulunézruje'.

30 Ca'an belune', na' belesel-le' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

## 12

### *Dxelutie' Jacobo ne dxelegú'e Pedro lizre xia*

1 Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús.

2 Gunná bé'ene' belutie' Jacobo, biche Juan nen xia nalá.

3 Gate ble'e Herodes dxelexezaca ba lazre' benne' judío ca' ca naca da bene', na' gudel-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila.

4 Ca gudé gudel-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní.

5 Ca'an guca xu'u Pedro lizre xia naga dxuluxúe xánnie' le', na' benne' biche ljwézredxu ca' buluchálajlequeze' Dios du lazre'.

### *Dios dxuselé' Pedro lizre xia*

6 Dxela xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéajle' chupa du xia, na' xebal-la benne' dxjaca wedil-la zaj zre'e dxu'a dxa xu'u dxuluxúe' lizre xia na'.

7 Nadxa ble'e lau tu gubáz chee xabáa chee Xránadxu, na' ca naca lizre xia na' guxani'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexezeze na na' Pedro.

8 Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

9 Pedro bedxúaje' cuzru gubáz chee xabáa na', ne quebe nézeng' che naca da li che cabí ca da dxun gubáz chee xabáa na'. Dxéquene' dxelé'ene' tu da dxulé'e Dios le'.

10 Belexedé'e naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a

dxa xu'u xia da dxedxujaz zejaj la nézala, dxa xu'u na' leze na bxfalaj na. Belexedxúaje', na' ca gudé besia'que' belezrine' xetú neza xula chee xezr na', na' bca'ana gubáz chee xabáa na' leze'.

11 Nadxa guque be'e Pedro ba bedxúaje', na' guzá' lazre', gunné': Na'a dxelé'eda' naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute' da gulaca lazre' judío ca' xelune' chia'.

12 Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro.

13 Gate gunné' Pedro dxu'a dxa xu'u na', bzrin na' tu bi nu'ula lebe' Rode zejajnabe' nu na'.

14 Gate bexúnbeabe' chi'i Pedro, quebe gusalajbe' dxa xu'u. Xel-la' dxebe' cheebe' zexiaj chégube' naga zaj nazraga benne' ca' chee zejézrebe' benne' ca' ze Pedro dxu'a dxa xu'u.

15 Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

16 Dxácaté na' ze Pedro tu dxennézqueze' dxu'a dxa xu'u. Na' gate gulesálaje', ne belelé'eng' Pedro, na' belexebáneng'.

17 Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexiaje' naga xula.

18 Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro.

19 Herodes gunná bé'eng' xelexilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'eng' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxiaje' xeajsúe' xezre Cesarea.

### *Dxate Herodes*

20 Herodes dxezré'e benne' ca' zaj zre'e xezre Tiro, ne xezre Sidón. Benne' chee xezre ca' belune' tuze dizra' chee cheajlelé'e cuine' lau Herodes na'. Belune' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní belune' lawe' da nédxute' dxelagu benne' xezre Tiro, ne Sidón da guzá' xezre Cesarea naga zua Herodes.

21 Nadxa Herodes buze' tu zra xelezrín benne' ca' lawe'. Lu zra na' Herodes gucu'e zra lane' da zácalé'e, na' gudxé'e lataj blau chee', ne bchálajlene' benne' zan ca'.

22 Nadxa benne' zan ca' gulezú lawe' dxelenné' zizraj:

—¡Benne' nigá dxuchálaje' quebe naque' benia'chezel! ¡Dios na'!

23 Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

24 Bzriluj dizra' chawe' chee Xránadxu, na' benne' ca' buluchálaje' ca naca na gáteteze na'.

25 Gate belezúe Bernabé, ne Saulo zrin dxelune' lu xezre Jerusalén, besia'que' xezre na', zaj naché'e Juan, bi na' léquezebe' Marcos.

## 13

*Bernabé ne Saulo dxelezú lawe' dxeledé' dxuluchálaje' dizra' chee Dios*

<sup>1</sup> Ládujla benne' ca' zaj nazraga chee Cristo lu xezre Antioquía zaj zra' benne' ca' dxelenné' waláz chee Dios, ne benne' ca' dxulusédene' bénneache xrtízra' Dios. Ládujla benne' caní zaj zua Bernabé, ne Simón, bénnea' léqueze' benne' gasaj, ne Lucio, benne' xezre Cirene, ne Manaén, benne' gúlalébe' Herodes, benne' xu'u lu ne'e xezr la xu Galilea na', ne Saulo.

<sup>2</sup> Tu zra gate benne' caní zaj zre'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

<sup>3</sup> Chee le' na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé' le' dizra'.

*Dxupa benne' gubáz ca' dxuluchálaje' dizra' chee Dios lu xezr la xu Chipre*

<sup>4</sup> Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le na Chipre.

<sup>5</sup> Gate belezriné' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajlequezebe' gubáz ca' chee gácalébe' le'.

<sup>6</sup> Na' guledé' xúgute' xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios.

<sup>7</sup> Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeaínné' Bernabé, ne Saulo lawe' da dxaca lazre' xenne' dizra' chee Dios.

<sup>8</sup> Na' benne' wazrá' na', léqueze' Elimas gudábage' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'.

<sup>9</sup> Nadxa Saulo, bénnea' léqueze' Pablo, zúale Be' Lá'azxa le', gunná' dxugüe' le'.

<sup>10</sup> na' guzre' le':

—Guzrí xé, benne' wen da calela. Zri'ine da xriwe', ne benne' dxusezxiu xrneza xúgute' bénneache. ¿Bizr chee na' quebe dxusanu' dxusézxuju' neza chee benne' ca' dxelaca lazre' chjácálene' Xránantu'?

<sup>11</sup> Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxaní' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxelé'ene'.

<sup>12</sup> Gate ble'e benne' xu'u lu ne'e xezr la xu na' da nigá, na' guxéajle'e chee Jesús lawe' da bebánene' ca naca da dxuséde Pablo ca naca chee Xránadxu.

*Pablo ne Bernabé dxelezrine' xezre Antioquía da nababa xezr la xu Pisidia*

<sup>13</sup> Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén.

<sup>14</sup> Gudé na' gubáz ca' besía'que' Perge, na' belezrine' xezre Antioquía da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e.

15 Nadxa, ca gudé bululabê' lu xiche naga naxúaj da bdxixruij bea Moisés, ne da gulenná benne' ca' buluchálajê' waláz cheê Dios, na' benne' xíchajê ca' cheê xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápaie dizra' da guzėjajni'ile netu', waca nnele na na'a.

16 Nadxa Pablo guxasê', na' guchisa ne'ê cheê xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios.

17 Dios cheê xezre Israel guquê'ê xra xrtáudxu ca', na' bene' benne' ca' tu cue' benne' zantê gate ne zaj zrê'ê ca benne' zitu' ca' lu xezr la xu Egipto, na' ca gudé na' bebéajê' le' lu xezr la xu na' dutê xel-la' waca chee'.

18 Dios bchaga lawê' benne' ca' chua iza le'ê xixre' lawe' lataj,

19 na' bzria xi'ê gazre cue' bènneache gulezúa lu xezr la xu Canaán, chee bnézruje' xra xrtáudxu ca' xezr la xu cheê benne' ca'.

20 Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'ê chee', cadxa bzrin zra zua Samuel, benne' bchálajê' waláz cheê Dios.

21 Nadxa benne' ca' gulenabê' Dios sua tu benne' gaquê' wenná bea chee', na' Dios bzue' wenná bea tu benne' le' Saúl, zri'ine Cis, tu benne' cheê tu cue' benne' judío zaj naquê' zri'ine zre sua Benjamín. Saúl nigá guquê' wenná bea lawe' chua iza.

22 Gudé na' Dios begüê' Saúl lataj chee', na' bzue' David gaquê' wenná bea chee', na' cheê benne' nigá gunné': “Nezda David, zri'ine Isaí, naquê' tu benne' dxunê' da dxezaca ba lazra', ne gunê' xúgutê da dxaca lazra'.”

23 Tu benne' zri'ine zre sua David nigá naca Jesús, bènnea' bzua Dios chee guselê' benne' Israel ca', ca ba guchebe lazre' cheê David.

24 Nédxudxa gate za xida Jesús, Juan bchálajlêne' ca naca benne' Israel ca', guzre' benne' ca' dxal-la' xelexebí'i lazre', ne xelexedxúe' nisa.

25 Na' gate ba za cheajsê cheê Juan, na' gunné': “Neda' quebe naca' bènnea' dxéquele naca', san ca te chia' neda' za xetú benne' quebe naca chia' neda' cuéaja' zrelê' da xu'u ni'e.”

26 'Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' cheele dizra' nigá chee lalê.

27 Benne' ca' gulezrá' Jerusalén, ne benne' blau chee' ca', quebe belexúnbe'ê nu na' Jesús, ne quebe gulėjajni'ingê' dizra' da buluchalaj benne' ca' buluchálajê' waláz cheê Dios da dxellenê' xúgutê zra dxulupá'angê'. Ca' guca, benne' ca' belún líqueze' ca naca da naxúaj na cheê Jesús gate gulechugue' chee' gatie'.

28 Lácala quebe belezrelne' tu da nabaga Jesús chee xelútie' Le', gulenabê' lau Pilato nna bé'ene' gatie'.

29 Nadxa, gate gudé belunê' xúgutê da naxúaj na lu xiche cheê Dios ca naca da dxal-la' gaca cheê Jesús, na' buluxulétajê' Le' xaga béguaaj, ne bulucachê' Le'.

30 Nadxa Dios bsebanê' Le' ládujla benne' gate.

31 Lu zane' zra Jesús ble'e lawe' benne' ca' guledálêne' Le' gate bezé'ê Galilea dxeajê' Jerusalén, na' na'a, benne' caní dxelexechebe' ca naca chee' lau bènneache.

32 'Cá' anqueze netu' dxuzénetu' le'e dizra' chawe' ca naca da guchebe lazre' Dios lau xra xrtáudxu ca'.

33 Ben liē' ca naca da guchebe lazre' cheedxu dxi'u, nacadxu zri'ine zre sua benne' ca, gate bsebanē' Jesús, ca naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a."

34 Dios blé'engē' gusebanē' Le' ládujla benne' gate, chee quebe guzru bel-la' dxen chee' gate gunné' lu xiche chee': "Gunna' le'e da chawe' da guchebe lazra' lau David."

35 Cá'anqueze dxenné' xetú lu salmo: "Quebe gu'u lataj guzru bel-la' dxen chee wen zrin chiu', bi nazri'itē lazru'."

36 Da li David benē' zrin chee benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga belegache xra xrtawe' ca, na' guzru bel-la' dxen chee'.

37 Quebe guzru bel-la' dxen chee Bénnea' bsebán Dios Le'.

38 Biche ljwezra', dxuzenda' le'e, dxal-la' nézele Dios gunite lawe' chee dul-la chee le ne chee Jesús.

39 Ne chee Le', xúgute benne' dxelejli lazre' Le', Dios dxunite lawe' chee benne' ca' ca naca xúgute da quebe guca gunite lawe' chee' lácala belunē' ca naca da bdxixruj be'e Moisés.

40 Le guxúe xanne' cuinale chee quebe gaca chee ca naca da buluzúaj benne' ca' buluchálaje' waláz chee Dios, gate gulenné':

41 Le nna', le'e, benne' wen la, ne le xebane, ne le xenite, lawe' da guna' neda', Dios chee le, lu zra chee le,

tu da naca da zrente, da quebe chéajle lácala nu guzén le'e.

42 Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'.

43 Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelunē' da naca chee Dios, xjácálene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

44 Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelennē' dizra' chee Dios.

45 Gate benne' judío ca' belelé'engē' benne' zantē zaj nazrague' na', na' belaque' xa lazre' ne gulezú lawe' dxelennē' chee da dxenná Pablo, ne gulennē' schanni' chee'.

46 Nadxa Pablo ne Bernabé gulennē' du lazre', gulé'e benne' judío ca':

—Ben na ba xen bzénentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee le gápale xel-la' nabán zeajli canna, chee le na' chéajntu' na'a chálajlentu' benne' quebe zaj naque' judío.

47 Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca',

ne chee gacu' weselá chee bénneache zaj zre'e ca naca xezr la xu.

48 Gate belennē' da nigá, benne' quebe zaj naque' judío gulebé'engē', na' gulezú lawe' dxelennē' xrlátaje naca dizra' chee Xránadxu, na' guléajle xúgute benne' ca' ba nabéaj Dios chee xelape' xel-la' nabán zeajli canna.

49 Ca' guca, bzriluj dizra' chee Dios du ca naca lu xezre ca' zaj nababa na'.

50 Benne' judío ca' buluchálajlene' bal-la nu'ula blau ca' zjácálene' da dxulusédenē' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'.

<sup>51</sup> Nadxa gubáz ca' belexebibe' bxrte xu da zeajzría na zrele' da dxulé'e na zaj nabaga benne' ca' zria, na' xjaque' lu xezre Iconio.

<sup>52</sup> Gulebéle'e benne' zaj zre'e Antioquia na', benne' dxeléajle'e chee Jesús, zúale Be' Lá'azxa le'.

## 14

### *Da belún Pablo ne Bernabé lu xezre Iconio*

<sup>1</sup> Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío.

<sup>2</sup> Nadxa benne' judío ca', benne' quebe dxeléajle'e chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'.

<sup>3</sup> Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchué' ca da dxelenná benne' gubáz ca' ca naca xel-la' zri' lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'.

<sup>4</sup> Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús.

<sup>5</sup> Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj.

<sup>6</sup> Pablo ne Bernabé, gate belenne' ca', buluzrúnna' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé'e ca naca xézredu ca' chee xezre ca' zaj nababa na',

<sup>7</sup> na' buluchálaje' na' ca naca dizra' chawe' chee Jesús.

### *Dxuluzríe' Pablo xiaj lu xezre Listra*

<sup>8</sup> Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e.

<sup>9</sup> Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' nape' xel-la' dxeajlí lazre' chee xexaque'.

<sup>10</sup> Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'.

<sup>11</sup> Gate belélé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bénneache ba belélé'e naga zúadxu.

<sup>12</sup> Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo.

<sup>13</sup> Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútié' bejr ca' lau benne' gubáz ca' ca dxelúnqueze benne' xezre Listra na' chee dios chee'.

<sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na dxelezrebe' bi gun Dios, na' gulu'e lówela benne' ca', dxelenné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bénneache ca lé'equeze, ne za'ntu' nigá chee xentu' le'e dxal-la' gusanle québedxa gunle da

caní da quebe bi zaca na, ne chéajle chee Dios ban, Bénnea' bene' xabáa ne xezr la xu, ne nísadau', ne xúgute da de lu'ule na.

<sup>16</sup> Lu iza da ba guledé Dios be'e lataj xúgute bénneache guledé' lu xrneza cha chee', na' belune' ca da gulaca lazre',

<sup>17</sup> Lácala bl'equezne' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

<sup>18</sup> Lácala gulenná gubáz ca' da nigá, gúcale'e na stebe buluzague' benne' ca' chee quebe xelútie' bezr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquia, ne benne' Iconio, na' belegú'u xel-le' bénneache ca', na' buluzríe' Pablo xiaj. Guléquene' ba belutie' Pablo, na' gulezrube xue' le' belebéaje' le' xezre na'.

<sup>20</sup> Gate benne' ca' dxeléajle'e chee Jesús belezrague' zaj naxéchaje' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca gudé bchálaje' dizra' chawe' chee Jesús lu xezre Derbe, naga benne' zante gulezi' lu ne'e dizra' chee Dios, na' gubáz ca' belexedé'e xezre Listra, ne xezre Iconio, ne xezre Antioquia.

<sup>22</sup> Lu xezre caní belún chache' lázrdau benne' ca' dxeléajle'e chee Jesús, ne bulusizrene' le' chjácane' da naca chee Dios, dxelé'e le':

—Benne' xelu'e naga dxenná bea Dios, xel-la' zi' zrentę xeledé'e.

<sup>23</sup> La gázqueze buluzúe' benne' gula ca' chee xuluxúe' tu tu cue' benne' ca' dxeléajle'e chee Jesús, na' ca gudé na' buluzré'e benne' ca' lu na' Xránadxu, Bénnea' ba guléajle'e chee'.

### *Pablo ne Bernabé dxelexezrine' lu xezre Antioquia da nababa Siria*

<sup>24</sup> Ca gudé na' belexedé'e naga nababa Pisidia, na' belezrine' naga nababa Panfilia.

<sup>25</sup> Buluchálaje' dizra' chee Dios lu xezre Perge, na' ca gudé na' xjaque' xezre Atalia.

<sup>26</sup> Na' belexú'e da dxedá lawe' nísadau', na' belexezrine' xezre Antioquia, naga zaj zra' benne' belegu'e gubáz ca' lu na' Dios chee xelune' zrin na', da ba belezuene' na'a.

<sup>27</sup> Gate belezrine' Antioquia na', na' bulutupe' benne' ca' dxeléajle'e chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e chee Jesús.

<sup>28</sup> Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

## 15

### *Gubáz ca' chee Jesús dxelexezrague' Jerusalén*

<sup>1</sup> Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquia na', na' gulezú lawe' dxelé'e biche ljwézredxu ca' dxal-la' chugu late' weaj bēla' chee bel-la' dxen chee benne' biu ca' chee xelélé', ca gunná bea Moisés.

<sup>2</sup> Pablo ne Bernabé bulutíl-lale'e le' dizra', na' naga xejche'te na, biche ljwézredxu ca' buluzúe' Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

<sup>3</sup> Benne' dxeléajlë' chee Jesús, benne' zaj zřë' Antioquía, belexegu'e benne' caní neza, na' belexedé' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' chee Dios, na' xúgute biche ljwézredxu belebé'ëne' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxeléajlë' chee Jesús ne benne' gubáz ca', ne benne' gula ca' gulezí' lu ne'ë le', na' Pablo ne Bernabé buluzenne' le' ca naca da ben Dios lu na' le'.

<sup>5</sup> Bal-la benne' fariseo ca', benne' ba guléajlë' chee Jesús, gulezé' gulenné': —Dxun na ba xen chugu late' weaj belá' chee bel-la' dxen chee benne' biu ca', benne' ba guléajlë' chee Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

<sup>6</sup> Nadxa belezraga benne' gubáz ca' ne benne' gula ca', benne' dxeléajlë' chee Cristo, chee xulucá'ana chawe' da na' dxaca.

<sup>7</sup> Ca gudé buluchálajlë ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é' neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajlë benne' ca' chee Le'.

<sup>8</sup> Dios nézene' ca naca da xu'u lu xichaj lázxdau bénneache, na' blé'ëne' dxezí' lu ne'ë benne' ca', lawe' da bnézruje' benne' ca' Be' Lá'azxa ca bene' cheedxu dxi'u.

<sup>9</sup> Dios quebe dxuché'ë ca zrí'ing' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús.

<sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajlë' chee Jesús, da quebe gaca guádxu dxi'u, ne quebe guca xelúa xra xrtáudxu na?

<sup>11</sup> Na'a, dxéajlëdxu dxi'u bache naladxu ne chee xel-la' zri'i lazre' chee Xránadxu Jesús, ne cá'anqueze zaj nalá benne' ca'.

<sup>12</sup> Nadxa xúgute' gulezúa zrie', ne buluzé nague' dxácatë dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé láwela benne' ca' quebe zaj naque' judío.

<sup>13</sup> Gate bexuzre buluchálajë', na' gunná Jacobo:

—Biche ljwezra', le xene chia'.

<sup>14</sup> Simón Pedro bzenne' dxi'u ca ben Dios, be'ë lataj benne' ca' quebe zaj naca judío xelexexaque' chee' da nedxu lasa, bequ'é' ládujla benne' ca' bénneache xelexexaque' chee'.

<sup>15</sup> Da na' guca naca na tuzé nen da buluzúaj benne' ca' buluchálajë' waláz chee Dios, da na' naxúaj na lu xiche chee Dios, dxenné':

<sup>16</sup> Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana chee na,

na' xechísaqueza' na,

<sup>17</sup> chee xelexíaj xúgute' benne' xezica ca' Xranë' Dios,

ne cá'anqueze xelún xúgute' benne' zaj zra' xezr la xu ca',

benne' ca' xelenne' chee La' neda'.

<sup>18</sup> Ca' dxenná Xránadxu, blé'ëne' da nigá nédxudautë'.

<sup>19</sup> Chee le' na' dxapa' le'e quebe dxal-la' gunle zëde benne' quebe zaj naque' judío, benne' ca' dxelexexaque' chee Dios.



20 Dخال-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la chee da dxucá'ana sban bénneache, ne quebe dxal-la' xelawe' belá' chee be xixre', be quebe bdxuaj dxen, ne quebe dxal-la' xelawe' dxen cheeba'.

21 Caní dxal-la' xelune' lawe' da ca ni'i zaj zra' benne' tu tu xezre, benne' dxuluzenne' bénneache ca naca da bdxixruj bea Moisés, da na' dxululabe' lu xudau' ca' chee benne' judío ca' tu tu zra ca' dxulupá'ane'.

22 Nadxa benne' gubáz ca', ne benne' gula ca', ne xúgute benne' dxeléajle'e chee Jesús belune' tuze dizra' xelequé'e bal-la benne' ca' ládujla le' ne xeleselle' le' xezre Antioquía nen Pablo, ne Bernabé. Belequé'e Judas, bénnea' léqueze' Barsabás, ne Silas. Chupa benne' caní zaj naque' benne' blau ládujla biche ljwézredxu ca'.

23 Bulugúe'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío, zrale xezre Antioquía, ne le'e zrale xezre ca' zaj nababa Siria, ne xezre ca' zaj nababa Cilicia.

24 Ba bénentu' bal-la benne' ba besía'que' nigá, ne quebe nasél-lantu' netu' le', na' belune' le'e zeđe nen dizra' da buluchálaje', ne belún zréajene' le'e, dxelenné' dxal-la' chugu late' weaj belá' chee bel-la' dxen chee, benne' biu ca', ne chéajlele ca naca da bdxixruj be'e Moisés.

25 Chee le' na' dxéquentu' naca xrlátaje cá'antu' bal-la benne' ládujla netu' chee xelee'e xedajlenné'e le'e nen biche ljwézredxu Bernabé ne Pablo, benne' ca' nazrí'i lázrele'entu'.

26 Benne' caní belune' zrin chee Xránadxu Jesucristo, xjaque' lu da stebe naga gulaca lazre' bénneache xelútie' le'.

27 Ca' naca na, dxesél-lantu' naga zúale Judas ne Silas, na' benne' caní xuluchálajlene' le'e ca naca chee da nigá.

28 Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle.

29 Dخال-la' gusanle da naca chee bedáu' xaga, ne bedáu' xiaj ca', ne quebe dxal-la' gunle dul-la chee da dxucá'ana sban bénneache, ne quebe dxal-la' gágule belá' chee be xixre', be quebe bdxuaj dxen, ne quebe dxal-la' gágule dxen cheeba'. Che gunle ca naca da nadxixruj bea caní, gunle xrlátaje. Dxenábantu' lau Dios gaca chawe' chee.

30 Nadxa benne' ca' gulesel-le' xjaque' xezre Antioquía. Na' buluchague' benne' ca' zaj naque' chee Dios, ne bulunézruje' le' xiche na'.

31 Gate biche ljwézredxu ca' bululabe' na, na' gulebéle'enge' lawe' da dxue zren na le'.

32 Judas ne Silas zaj naque' benne' dxelenné' waláz chee Dios. Chee le' na' buluchálajlene' biche ljwézredxu ca', belúe zrene' le', ne bulutipe' lazre' le'.

33 Gate gudé guca tu chi'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', chee xesi'aque' xelexezi'ne' naga zaj zra' benne' ca' gulesel-le' le'.

34 Silas gúquene' xrlátaje xegá'ane' na'.

35 Cá'anqueze Pablo, ne Bernabé belexegá'ane' lu xezre Antioquía, na' tu zren nen benne' zandxa gulezúe' dxulusedené' bénneache, ne dxuluchálaje' ca naca dizra' chee Xránadxu.

*Dxezú lau Pablo zéaje' zitu' da gudxupe' lasa guchálaje' chee Jesús*

36 Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca' zaj zre'e xúgute xezre ca' naga xeajchálajdxu dizra' chee Xránadxu, chee cheajnnadxu aja dxaca zaj zre'e.

<sup>37</sup> Bernabé guca lazre' che'e Juan nen le', bi na' léquezebe' Marcos,

<sup>38</sup> san Pablo quebe guxáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee Xránadxu.

<sup>39</sup> Na' Pablo, ne Bernabé bulutil-la ljwezre' dizra'. Ca'an guca, belexela' cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre.

<sup>40</sup> Na' Pablo guqué'e Silas, na' ca' gudé biche ljwézredxu ca' belegü'e Pablo ne Silas lu na' Xránadxu chee gung' da chawe' chee benne' ca',

<sup>41</sup> na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

## 16

### *Timoteo dxéajlebe' Pablo ne Bernabé*

<sup>1</sup> Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee Jesús, lebe' Timoteo, zri'ine tu nu'ula judío dxéajle'e chee Jesús, san xrabe' naque' benne' griego.

<sup>2</sup> Bi bíchedxu zaj zre'e xezre Listra, ne xezre Iconio dxeleonné' xrlátaje dxgua dxunbe'.

<sup>3</sup> Pablo guca lazre' chéajle Timoteo le', na' guchugue' late' bela' chee bel-la' dxen chebe' ca' dxenná bea da bdxixruj be'e Moisés, chee quebe xelezrá'a benne' judío ca' zaj zre'e naga nababa na' lawe' da zaj neze xúgute benne' ca' naca xra Timoteo benne' griego.

<sup>4</sup> Lu xúgute xezre naga dxeledé'e buluzenne' benne' bíchedxu ca' ca' naca da zaj nadxixruj bea na' belún benne' gubáz ca', ne benne' gula ca' zaj zre'e Jerusalén.

<sup>5</sup> Ca'an guca bi bíchedxu ca' gulezúa chúchue' ca' dxeleajlí lazre' Jesús, na' benne' ca' dxeléajle'e chee', tu zra tu zra zeajte dxelane'.

### *Dxele'e Pablo tu da ble'e Dios le', dxelé'ene' tu benne' Macedonia*

<sup>6</sup> Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le' na' guledé'e naga nababa Frigia, ne xezre ca' zaj nababa Galacia.

<sup>7</sup> Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee Jesús quebe be'e le' lataj.

<sup>8</sup> Nadxa guledé'e naga nababa Misia, na' belezrine' xezre Troas.

<sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuené' Pablo, dxenné': "Gudá Macedonia nigá, gácalentu' netu'."

<sup>10</sup> Gate ble'e Pablo da nigá, na' benne' ca', ne neda', Lucas, la gudíajtentu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajlentu' benne' ca' dizra' chawe' ca' naca chee Jesús.

### *Pablo ne Silas dxelezrine' ciudad Filipos*

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis.

<sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzúantu' tu chupa zra.

<sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxe'ntu' na' ne bchálajlentu' nu'ula ca' zaj nazrague' na' ca naca dizra' chawe' ca naca chee Jesús.

<sup>14</sup> Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e lázrdawe' chee guzi' lu ne'e da dxuchalaj Pablo.

<sup>15</sup> Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

<sup>16</sup> Tu zra gate zéajntu' naga zeajchálajlentu' Dios, bezrágantu' tu bi nu'ula cuide' xu'ube' be' xriwe', ne dxenné xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezile'e dumí da dxezibe', dxenné xa'abe'.

<sup>17</sup> Bi nu'ula nigá guzú laube' za'be' cuzru Pablo ne netu', dxennabe' zizraj: —Benne' caní dxelune' zrin chee Dios szrente, ne dxuluzenne' le'e ájala gunle lale.

<sup>18</sup> Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

<sup>19</sup> Gate benne' ca' dxuluchínene'-be' xadía guleque bé'ene' québedxa bi xelexezi'e ne cheebe', na' gulel-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau.

<sup>20</sup> Na' buluzúe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zrējajene' benne' zaj zre'e xezre cheedxu,

<sup>21</sup> ne dxulusédené' ca naca da zjácálene', da quebe gaca sidxu, ne quebe gaca gundxu na lawe' da nábadaxu Roma.

<sup>22</sup> Nadxa benne' zaj zre'e xezre na' guledábague' Pablo ne Silas, na' benne' xu'u lawe' na' gulenná be'e xeledéchaje' zra lana Pablo ne Silas, ne xelu'e le' zrise.

<sup>23</sup> Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánne' benne' ca'.

<sup>24</sup> Gate benne' ca' gulenná be'e, na' bzre'e le' zane' léxzudxa ne bzre'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezícadxa benne' zaj zre'e lizre xia dxuluzé nague' chee'.

<sup>26</sup> La' na'te guzrú'le'e da bxrize na ca naca lizre xia, na' belexalaj xúguté dxa xu'u ca', ne belexexezre du xia da zaj nadxéaj ni'a xúguté benne' ca' zaj zre'e lizre xia.

<sup>27</sup> Na' benne' xu'u lu ne'e lizre xia na' bebange', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéquene' ba buluxzrúnaj benne' ca' zaj zre'e lizre xia.

<sup>28</sup> Pablo gudxezre xe'e, guzre' le':

—Quebe bi gune cuinu'. Xúgute'ntu' zúantu' nigá.

<sup>29</sup> Nadxa benne' na' xu'u lu ne'e lizre xia gunabe' tu xi', na' guxú'u chégü'e, dxezrízequeze' xel-la' dxezrebe, na' bzu zribe' lau Pablo ne Silas.

<sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechebe':

—Guxéajle' chee Xránadxu Jesucristo, na' lau', ne cá'anqueze benne' zaj zre'e lizru'.

<sup>32</sup> Na' buluchálajlene' le', ne xúgute' benne' zaj zre'e lizre' ca naca dizra' chee Xránadxu.

<sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gudé na', le' ne xúgute' benne' zaj zre'e lizre' guledxúe' nisa.

<sup>34</sup> Ca gudé na' beche'e Pablo ne Silas lizre', na' bnézuje' da gulawe', na' le' ne benne' zaj zre'e lizre' gulebéle'ene' lawe' da ba guléajle'e chee Dios.

<sup>35</sup> Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusané' Pablo ne Silas.

<sup>36</sup> Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup> Pablo guzre' bi xra'aga ca':

—Netu' nabáantu' Roma, na' belú'e netu' láwela benne' xezre ca', ne quebe ne xuluchí'e che'ntu', na' buluzré'e netu' lizre xia. Na'a ¿dxeléquene' xulusané' netu' bagácheze? Quebe gaca. Xelída léqueze' xelexebéaje' netu'.

<sup>38</sup> Bi xra'aga ca' xeajlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma.

<sup>39</sup> Na' xjaque' lizre xia na', ne gulenabe' Pablo ne Silas xelexí zrene' chee'. Nadxa belexebéaje' le', ne gulata' xuene' le' xelexedxúaje' xezre na'.

<sup>40</sup> Gate Pablo ne Silas belexedxúaje' lizre xia na', na' xjaque' lizre Lidia, na' ca gudé buluchálajlene' biche ljwézredxu ca', ne bulutipe' lazre', na' besía' que'.

## 17

### *Benne' zaj zre'e xezre Tesalónica dxeledábage' Pablo*

<sup>1</sup> Nadxa Pablo ne Silas guledé' xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'.

<sup>2</sup> Pablo guxíaje' xudau' na', na' ca dxúnqueze' bchálajlene' benne' ca' tu tu zra dxulupá'ane' du chunna da gazre zra.

<sup>3</sup> Ca da naxúaj na lu xiche chee Dios, bzéajni'ine' le' ben na ba xen Cristo guzí guzaque', ne gutie', na' ca gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bérnea' dxuzenda' le'e chee', naque' Cristo, Bérnea' guchebe lazre' Dios sel-le'.

<sup>4</sup> Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle benne' zan benne' griego, ne nu'ula zan zaj naque' nu'ula blau.

<sup>5</sup> Benne' judío ca', benne' quebe dxeléajle'e chee Jesús gulaque' xa lazre' chee Pablo, na' buluchague' bal-la benne' ca' dxelunge' da caléla dxeledaze', ne bulutupa ljwezre', na' buluzúe' stebe ca naca benne' xezre. Gulu'e xadía

lizre Jasón, dxelexíaję' Pablo ne Silas, cheę xelebéaję' lę', ne xuludę' lę' lu na' benne' xęzre ca'.

<sup>6</sup> Gate quebe belexzrelnę' Pablo ne Silas lu xu'u na', nadxa belechę'e xadía Jasón ne xebal-la biche ljwézredxu ca' lau benne' xu'u lawe' ca' cheę xęzre, na' dxelebezre xę'e, dxelennę':

—Benne' ca', benne' ba belún zréajęnę' ca naca benne' zaj zrę'e xęzr la xu, cá'anqueze ba belelé'e nigá.

<sup>7</sup> Jasón nigá ba gulu'e benne' ca' lizre'. Ca naca benne' ca' dxeledábague' da bdxixruj bea César lawe' da dxelennę' zua xetú wenná bea, tu benne' lę' Jesús.

<sup>8</sup> Gate belenne' da caní, na' benne' xęzre ca', ne benne' xu'u lawe' ca' gulezú'e stębe.

<sup>9</sup> Jasón, ne biche ljwézredxu ca' bulucá'ane' dumí cheę gulezí'e lataj, na' benne' xu'u lawe' ca' bulusanę' lę'.

### *Pablo ne Silas dxelezrine' xęzre Berea*

<sup>10</sup> Nadxa biche ljwézredxu gulę'e Pablo ne Silas cheę xesí'aque' chizrela, cheę chjaque' xęzre Berea. Gate belezrine' na', na' belú'e lu xudau' cheę judío ca'.

<sup>11</sup> Benne' judío caní zaj nácadxę' zren lazre' ca benne' Tesalónica ca' lawe' da du lazre' gulezí'e dizra' cheę Dios, na' tu zra tu zra dxululabe' lu xiche cheę Dios cheę xuluxú'e che naca da li da dxelę'e lę'.

<sup>12</sup> Ca'an guca, benne' zan benne' judío ca' guléajlę'e cheę Jesús, ne cá'anqueze benne' griego. Benne' zan guléajlę'e, nu'ula blau ca', ne benne' biu ca'.

<sup>13</sup> Gate benne' judío ca' zaj zrę'e xęzre Tesalónica guleque bé'ene' dxuchalaj Pablo dizra' cheę Dios lu xęzre Berea, na' belezrine' na', ne gulegú'u xel-lę' bęneache cheę xeledábague' Pablo ne Silas.

<sup>14</sup> Biche ljwézredxu ca' la gulesél-la'tę' Pablo chéaję' dxu'a nísadau', na' Silas ne Timoteo belexegá'ane' lu xęzre Berea.

<sup>15</sup> Benne' ca' zjácálnę' Pablo belechę'e lę' lu xęzre Atenas. Nadxa benne' ca' belexzrine' lazrie', ne gulę'e Silas, ne Timoteo chjácazęę' naga zua Pablo.

### *Da dxun Pablo lu xęzre Atenas*

<sup>16</sup> Dxácatę na' Pablo dxebeze' Silas ne Timoteo naga zuę' lu xęzre Atenas, na' guzúale'e stębe gate blé'ene' ca naca xęzre na', ni' naze nítale'e bedáu' xiaj.

<sup>17</sup> Cheę lę' na' bchálaję' lu xudau' cheę judío ca' nen benne' judío ca', ne xezícala benne' ca' zjácálnę' da naca cheę Dios, na' tu zra tu zra bchálajlęnę' benne' ca' zaj zrę'e lawe' xi'a.

<sup>18</sup> Bal-la benne' zjácálnę' ca naca da dxulusęde benne' ca' zaj lę' benne' epicureo, ne benne' estoico gulezú lawę' dxuluchálajlęnę' Pablo. Bal-lę' gulennę':

—¿Bizra xęga benne' wechalaj nigá dxi'u?

Na' xebal-lę' gulennę':

—Dxęquentu' naque' benne' dxuse dizra' cheę dios zitu' ca'.

Ca'an gulennę' lawe' da dxuchalaj Pablo dizra' chawe' ca naca cheę Jesús, ne ca naca cheę xel-la' dxexebán.

<sup>19</sup> Nadxa gulechę'e Pablo lu lataj nazí le na Areópago, naga dxelezrágaqueze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusędenu' bęneache?

<sup>20</sup> Lue' dxuchálaju' dizra' da quebe ne xénentu', na' dxaca lázrentu' nézentu' bi zéaję ca naca da caní.

<sup>21</sup> Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute benne' Atenas, ne benne' zitu' ca' zaj zře'ę xęzre na'.

<sup>22</sup> Nadxa Pablo guzė' laduj benne' ca' zaj zře'ę Areópago na', na' guzre' le':

—Le'e, benne' Atenas, ca naca xúgute da dxelé'eda', dxulé'e na dxápale'ęle ba lá'ana dios cheele ca',

<sup>23</sup> lawe' da gate gudá' neda' gunná'a ca zaj naca xudau' ca' naga dxue lá'anale dios cheele ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee Dios na' dxuchálajęna' le'e.

<sup>24</sup> Naque' Dios na' bene' xęzr la xu nigá, ne xúgute da de lawe na. Naque' Xrane xabáa, ne Xrane xęzr la xu nigá. Quebe zue' xudau' da nun ni'a na' bėneache.

<sup>25</sup> Quebe nachınene' bi da gaca xelún bėneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

<sup>26</sup> Tuze benne' bene' naque' xra xúgute cue' xęzr la xu ca' chee che'ę du gabí'i xęzr la xu, na' blé'ene' zra, ne lataj naga dxal-la' xelezre'ę,

<sup>27</sup> chee xellexilaje' Dios chee ajala xellexzrelne' Le' lácala quebe xelúnbea xánnie' Le', san da li Dios quebe zue' zitu' naga zua tu tudxu dx'i'u.

<sup>28</sup> Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wila cheele, gulenné': "Nácadxu xrtia Dios."

<sup>29</sup> Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bėneache cáteze dxululaba lázrequeze'.

<sup>30</sup> Dios bzue' chalá'ala da belún bėneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zře'ę xellexebí'i lazre'.

<sup>31</sup> Dios ba nuzúe' tu zra gate guchi'ę chee xúgute bėneache lu da xrlátaje chee' lu na' tu benne' ba gucá'a Le', na' chee da nigá bzue' tu da dxunna bea na gate bsebanę' bėneea' ládujla benne' gate.

<sup>32</sup> Gate benne' ca' belenne' dizra' nigá ca naca chee tu benne' bebane' ládujla benne' gate, na' bal-le' belún le' chee', ne xebal-le' gulenné':

—Waca guchálajęnu' netu' ca naca da nigá xetú zra.

<sup>33</sup> Nadxa Pablo bezé'ę naga zaj zra' benne' ca'.

<sup>34</sup> Bal-la benne' ca' gulájle'ę chee Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

## 18

### *Pablo dxezrine' xęzre Corinto*

<sup>1</sup> Gudé na' bezá' Pablo xęzre Atenas, bexíaje' xęzre Corinto.

<sup>2</sup> Lu xęzre na' xeajxraque' tu benne' judío le' Aquilo, naque' benne' nababe' tu xęzre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besiá'que' xęzr la xu Italia lawe' da gunná bea César Claudio xelixedxúaj xúgute benne' judío ca' xęzre Roma. Pablo guxíaje' xejjnné'ę Aquilo ne Priscila,

<sup>3</sup> na' lawe' da tuze ca naca zrin da dxelún Pablo ne Aquilo, dxelunę' xu'u xide zra be xixre' da dxelútię' chee benne' dxjaca wedil-la, na' begá'ana Pablo nen benne' caní chee xelunę' tu zren zrin.

<sup>4</sup> Tu zra tu zra gate naca zra dxulupá'ana judío ca', Pablo zéajé' lu xudáudau' chee judío ca' naga bchálajé', ne blé'eng' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios selé'.

<sup>5</sup> Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee Dios, ne dxulé'eng' benne' judío ca' da li Jesús naque' Cristo, bénnea' nasel-la Dios, bénnea' dxelebeza judío ca'.

<sup>6</sup> Benne' judío ca' gulezú lawe' dxeledábage' Pablo, ne dxelenné' schanni' chee'. Nadxa Pablo guzribe' gabán chee' da dxulé'e na dxebeáj xíchajé' benne' ca', dxenné':

—Le'e nabágale chee xel-la' gute chee bénne'du xu'ule. Québedxa nabaga' neda' chee na lawe' da ba bzenda' le'e dizra' chawe' chee Cristo. Ná'atela guchálajlëna' benne' quebe zaj naque' judío.

<sup>7</sup> Bezé'ë lu xudáudau' na', na' bezrine' lizre tu benne' lé' Justo, benne' dxucá'ana szrene' Dios ne zua lizre' cuita xudáudau' chee judío ca'.

<sup>8</sup> Na' Crispo, benne' xíchajé chee xudáudau' chee judío ca', ne ca naca benne' zaj zre'ë lizre' guléajlé'e chee Xránadxu. Cá'anqueze benne' zan benne' Corinto, gate belenne' dizra' chee Dios, guléajlé'ë ne guledxúé' nisa.

<sup>9</sup> Nadxa Xránadxu ble'e lawe' Pablo tu zre' tu lu da ble'e Dios lé', ne guzre' le':

—Quebe zrebu'. Bchálajteze, ne quebe sua zriu'.

<sup>10</sup> Neda' zúalëna' lue', na' quebe nu seque' bi gune lue' lawe' da zaj zrále'ë benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédené' benne' ca' dizra' chee Dios.

<sup>12</sup> Lu zra ca' gate naca Galión benne' xu'u lu ne'ë xezr la xu na' naga nababa Acaya, waláz chee Roma, na' benne' judío ca' guledábage' Pablo. Beleché'ë lé' xu'u lawe',

<sup>13</sup> ne gulé'ë benne' xu'u lu ne'ë xezr la xu na':

—Benne' nigá dxedé' dxegú'u xel-le' bénneache chee xelúe lá'ané' Dios, ne xeluné' tu da dxedábaga da nadxixruj bea cheentu'.

<sup>14</sup> Pablo ba zué' guchálajé' gate Galión guzre' benne' judío ca':

—Chela naca na chee tu da dxuzúa chalá'ala da bdxixruj bea César u chee tu da zrinnaj zren, na' gun na ba xen xenda' ca da dxennale le'e, benne' judío.

<sup>15</sup> Lawe' da naca na chee dízra'ze, ne chee la tu benne', ne chee da nadxixruj bea na cheézele, le gucá'ana chawe' na lé'equenze, lawe' da quebe dxaca lazra' neda' guchí'ë da dxaca chee da ca'.

<sup>16</sup> Nadxa bebéajé' benne' ca' lu xu'u lawe' na'.

<sup>17</sup> Nadxa xúgute benne' griego gulel-le' Sóstenes, benne' xíchajé chee xudáudau' chee judío ca', ne belú'ë lé' lau benne' xu'u lu ne'ë xezr la xu na', lé' Galión. Galión na' quebe be' lazre'e chee da na'.

*Pablo dxezrine' xezre Antioquia, na' dxezú lawe' zéajé' da guxunne' lasa zéajé' wen zrin chee Cristo*

<sup>18</sup> Pablo begá'ané' xezre na' xezane' zra. Gudé na' bze' biche ljwézredxu ca' dizra', na' guxú'ë tu lu da dxedá lawe' nísadau' zéajé' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'ë lu da dxedá lawe' nísadau', Pablo bzuaté' xídeze xíchajé', da dxunna bea na zua tu da nachebe lazre' gune' lau Dios.

19 Gate belezrine' lu xezre Efeso, Pablo bsang' Priscila ne Aquilo, na' guxíajé' lu xudáudau' chee judío ca', ne bchálajlene' judío ca' zaj nazrague' na'.

20 Benne' ca' gulata' xuene' le' xegá'anadxé' xetú chi'i, na' le' quebe guca lazre'.

21 Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'le lu da dxedá lawe' nísadau', ne bezé'e Efeso na'.

22 Gate bezrine' xezre Cesarea, Pablo guxíajé' Jerusalén xeajape' diuzre benne' ca' dxeléajle'e chee Jesús, na' gudé na' guxíajé' xezre Antioquia.

23 Ca gudé guzúe' na' tu chi'i, na' bezé'e na', gudé'e tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajle'e chee Jesús.

### *Apolos dxuchálaje' dizra' chee Dios lu xezre Efeso*

24 Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandria, lu xu Egipto. Naque' tu benne' nupá'ale'e xrtizre', ne núnbeale'e da naxúaj na lu xiche chee Dios.

25 Naxéajni'ile'ene' ca' naca chee Xránadxu, ne duté lázrdawe' dxuchálaje', dxusédené' cáteze naca chee Jesús, lácala dxusédezené' xel-la' dxuchúa nisa ca ben Juan.

26 Apolos guzú lawe' dxusédené' benne' ca' zaj zre'e xudáudau' chee judío ca' du lazre'. Gate belén Priscila, ne Aquilo chee', na' guleché'e le' chala'ala, ne buluzéajni'idxene' le' cáteze naca dizra' chee Dios.

27 Ca gudé na', gate guca lazre' Apolos chéajé' naga nababa Acaya, bi bíchexu ca' bulutipe' lazre', ne buluzuaje' tu xiche chee benne' ca' dxeléajle'e chee Jesús zaj zre'e xezre ca' zaj nababa Acaya na' chee xezezi' lu ne'e Apolos na'. Gate bzrin le' naga nababa Acaya, gúcalele'ene' benne' ca', na' Dios be'e le' lataj guléajle'e chee Jesús.

28 Apolos blé'ene' lau xúgute benne' ca' ca dxeleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

## 19

### *Pablo dxezrine' xezre Efeso*

1 Dxácaté zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxeléajle'e chee Jesús.

2 Na' bchebe' benne' ca':

—¿Guzi'le le'e Be' Lá'azxa gate guxéajle'e?

Belexechebe':

—Ne quebe xénetu' che zua Be' Lá'azxa.

3 Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

4 Na' gunná Pablo, guzre' benne' ca':

—Awe', Juan bchue' nisa benne' ca' belexebi' lazre', san guzre' benne' ca' dxal-la' xeléajle'e chee Bénnea' xide' ca te chee le', da zéaje na, chee Jesús, Bénnea' naque' Cristo, nase-la Dios.



<sup>5</sup> Gate belenne' da nigá, na' beledxúe' nisa lu La Xránadxu Jesús.

<sup>6</sup> Gate bze na' Pablo benne' ca', na' guzúale Be' Lá'azxa le', na' gulenné' dizra' chee benne' zitu' da quebe bulusede', ne buluchálaje' waláz chee Dios.

<sup>7</sup> Benne' caní zaj naca chazrínnué'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca naca xel-la' dxenná bea chee Dios.

<sup>9</sup> Bal-le' belún zide' lázrdawe', ne quebe gulaca lazre' xeléajle'e chee Jesús, na' gulenné' schanni' chee dizra' chawe' ca naca chee Jesús lávela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxeléajle'e chee Jesús lu xu'u ga dxusede tu benne' le' Tiranno, na' lu xu'u na' bchálajlene' benne' ca' tu zra tu zra.

<sup>10</sup> Ca' bene' lawe' chupa iza, na' ca'an guca xúgute benne' zaj zre'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío.

<sup>11</sup> Dios bene' xel-la' waca zri'a ca' lu na' Pablo lu zra ca'.

<sup>12</sup> Ca'an guca, gulequ'e ladxe' ca' da dxuchéaj xichaj Pablo, ne ladxe' ca' da bdé'e lachu'e, na' belú'e na naga zaj de benne' we' ca', na' benne' caní belexaqa'e ca naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dxelexebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelxebéaje' na, na' gulé'e be' xriwe' ca'.

—Dxenná bé'entu' le'e xedxúajle lu xichaj lázxdau benne' nigá lu La Jesu-cristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xichaje chee bxruze ca'.

<sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ζnuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzria che'e benne' ca', na' dute xel-la' wal-la chee' buculé' xúgute benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaque' dxen.

<sup>17</sup> Xúgute benne' zaj zre'e xezre Efeso, benne' judío ca', ne benne' quebe zaj naque' judío, belenne' ca guca da nigá, na' chee le' na' belezrébelé'e, ne bulucá'ana szrene' La Xránadxu Jesús.

<sup>18</sup> Cá'anqueze benne' zan lávela benne' ca' dxeléajle'e chee Jesús belelé'e dxelexrúalepe' da calela da belune',

<sup>19</sup> na' benne' zan, benne' belúne' xel-la' wazrá', zaj nu'e xiche chee wazrá', na' buluzexxe' na lau xúgute benne' ca'. Gate bululabe' ca gulezaca xiche ca', na' gulénézene' gulezaca na ca gazxu gaxúa cue' tu gaxúa dumí plata.

<sup>20</sup> Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

<sup>21</sup> Gudé na' Pablo guca lazre' té'e xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca te chéaje' Jerusalén, na' dxal-la' cheajte' xezre Roma.

<sup>22</sup> Nadxa gusel-le' chupa benne' dxelácale le', Timoteo ne Erasto, naga nababa Macedonia, dxácate begá'ana le' xetú chí'i naga nababa Asia.

*Benne' xezre Efeso dxeledábaque' Pablo*

<sup>23</sup> Ca lu zra na' benne' zan guledábaguē' dizra' chawe' ca naca cheē Jesús,

<sup>24</sup> da na' guca na ne cheē tu benne' lē' Demetrio, benne' gubizre plata. Benne' nigá dxunē' níchudu ca' da zaj naca plata ca xudau' cheē dios nu'ula lē' Diana, na' benne' ca' dxelúnłenē' lē' zrin nigá dxelezi'łē'e dumí.

<sup>25</sup> Demetrio na' bhaguē' benne' caní tu zren nen xezica benne' dxelunē' zrin caní, na' guzrē' benne' ca':

—Le'e, benne', nézquezle lu zrin nigá dxaca cheēdxu da cháwełē'e,

<sup>26</sup> na' ca dxelē'equezle le'e ne dxenle, Pablo nigá dxedé' dxenné' dios ca' da zaj nun bēnneache quebe zaj naca na dios, na' caní ba bsédene' benne' zan, quegá Efeso nigáze, san du ca nababa Asia.

<sup>27</sup> Da nigá nácale'e na stebe cheēdxu, lawe' da ca naca zrin cheēdxu nigá nazruzre cuía xi na, ne la gaze xudau' cheē dios nu'ula Diana nazruzre nite xel-la' nuzé cheē na, na' caní xegá'ana ditaj ca naca xel-la' szren cheē dios nu'ula, bēnnea' dxelúe lá'ana ca naca benne' zaj zrē'e ga nababa Asia, ne du ca naca bēnneache zaj zrē'e xēzr la xu.

<sup>28</sup> Gate belenne' da nigá, na' belezrá'ale'e benne' ca', ne gulebezre xē'e, dxelenné':

—jGa'ana szren Diana, dios cheēdxu, benne' Efeso!

<sup>29</sup> Na' ca naca benne' zaj zrē'e xezre na' guleque zréjenge'. Gulełē' Gayo, ne Aristarco, benne' Macedonia dxeledálene' Pablo, na' gulezrube xuē' benne' caní chale'aj xu'u lawe'.

<sup>30</sup> Pablo guca lazrē' chu'e na' cheē guchálajłenē' benne' ca', san bi bíchedxu ca' quebe gulegú'e lē' lataj.

<sup>31</sup> Cá'aqueze bal-la benne' xu'u lawe' cheē xezre ca' zaj nababa Asia gulesel-lē' benne' xeajezrē' Pablo quebe dxal-la' chu'e na'.

<sup>32</sup> Dxácatē na', naga zaj nazraga benne' ca', bal-lē' gulebezre xē'e, tu da dxelenné', na' xebal-lē' dxelebezre xē'e, dxelenné' da xula, lawe' da beledxé'ena zraga benne' zan, na' benne' zante quebe zaj nézenē' bizr chee na' zaj nazraguē' na'.

<sup>33</sup> Nadxa benne' judío ca' buluzúē' Alejandro lau benne' ca' cheē guzėjini'ine' lē' ca naca da nigá, na' lē' guchisa ne'e cheē xełezúa zri benne' ca' lawe' da guca lazrē' guchálajłenē' benne' zan ca' da gácale na judío ca'.

<sup>34</sup> Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—jGa'ana szren Diana, dios cheēdxu, benne' Efeso!

<sup>35</sup> Nadxa benne' dxuzúaje' ne cheē xezre na', gate ba bzua zriē' benne' zan ca', gunné':

—Le'e, benne' Efeso. Ca naca bēnneache zaj zra' xēzr la xu nigá zaj nézenē' benne' zaj zrē'e xēzre Efeso nigá zaj nabaguē' xuluxúē' xudau' cheē dios nu'ula Diana, ne bedáu' cheē' da bexruj na zran xabáa.

<sup>36</sup> Quebe nu seque' tábaga' da nigá. Cheē lē' na' le sua zrize, ne quebe bi gunle da quebe ne guxúe xánnele.

<sup>37</sup> Benne' caní nache'le nigá quebe bi da caleła ne xelunē', ne quebe bi schanni' ne xelenné' cheē dios nu'ula cheēle.

<sup>38</sup> Che Demetrio, ne benne' ca' dxelunē' zrin nen lē' dxelaca lazrē' xelagu zria cheē tu benne', zaj zra' benne' dxuluchí'e da dxaca, ne zaj zua xu'u lawe' ca' naga gaca xelawē' zría cheē benne' ca'.

<sup>39</sup> Na' che le'e bi xetú da ná bale, dxal-la' ná bale na naga zaj nazraga benne' xu'u lawe' ca dxenná bea da bdxixruj bea César.

<sup>40</sup> Na'a zúadxu štebe ga gaze nu gagu zria cheedxu ca naca da bendxu, xelenné' dxdéabagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

<sup>41</sup> Ca gudé gunné' da nigá, na' bze' benne' zan ca' dizra'.

## 20

### *Pablo dxedé' ga nababa Macedonia ne Grecia*

<sup>1</sup> Gate gudé guca da štebe na' lu xezre Efeso, na' Pablo btupe' benne' ca' dxelájle'e chee Jesús chee guzéajni'ing' le'. Nadxa bze' benne' ca' dizra', ne bnide' le', na' guzé'e zéajé' xezre ca' zaj nababa Macedonia.

<sup>2</sup> Xeajné'e bíchedxu ca' zaj zre'e xúgute xézredu ca', ne btípalé'e lazre' benne' ca' ne chee dizra' da bchálajlene' le'. Ca gudé na' bezrine' naga nababa Grecia.

<sup>3</sup> Begá'ane' na' chunna beu', na' gudé na' gate ba zuate' chu'e tu lu da dxedá lawe' nísadau' chéajé' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le na' gulú'u bi'e xezé'e ni'e téé' naga nababa Macedonia.

<sup>4</sup> Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia.

<sup>5</sup> Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas.

<sup>6</sup> Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzúantu' gazre zra.

### *Da ben Pablo lu xezre Troas*

<sup>7</sup> Zra nedxu chee da gazre zra bezrágantu' chee gáguntu' da dxusá lázredxu ca guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte dxela.

<sup>8</sup> Nazrágantu' tu xu'u da zua chunna cuía sibe, na' zaj zéle'e xi' da dxulusení na.

<sup>9</sup> Tu bi cuide' zriabe' ga dxu'u lení, na' gate Pablo bsetúnnadxe' xrtizre', na' guca wásele'e bi cuide' na', na' naga xeajcheté na, na' dxásetebe' gubixrebe' chunna cuía sibe, na' xeajlechise'-be' ba nátebe'.

<sup>10</sup> Nadxa betaj Pablo, na' gulégüe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüene' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa guxaní'te. Zra na' bezé'e na'.

<sup>12</sup> Nadxa bíchedxu ca' belexeché'e bi na' gubixrebe' ba bexaca banbe', na' xúgute' gulezúe' lu xel-la' dxelezhén lazre'.

### *Pablo dxexeze'e xezre Troas xezrine' xezre Mileto*

<sup>13</sup> Netu' guzríla launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca ba nun le' lawe' da guca lazre' zéajé' ní'aze'.

<sup>14</sup> Gate bezrágantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mítilene.

15 Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezi' lázrentu', na' zra xula bzrintu' xezre Mileto.

16 Ca' bentu' chee quebe guzré'tecantu' naga nababa Asia. Chee le na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

*Pablo dxuchálajlene' benne' gula dxeléajle'e chee Jesús, benne' zaj zre'e Efeso*

17 Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeléajle'e chee Jesús zaj zre'e xezre Efeso.

18 Gate belelá' benne' ca', Pablo guzre' le':

—Le'e nézquezle ca bēna' neda' xúgute zra ca gudé bla'a ga nababa Asia.

19 Xúgute zra guzúa' lávela le'e dxuna' zrin chee Xránadxu duté xel-la' dxexruj lazre', ne zane' lasa gudxezra', na' gudéa' lu zane' da guxzaca' ca naca da gulaca lazre' benne' judío ca' xelune' chia'.

20 Bchálajlene' le'e xúgute da naca na xrlátaje, ne bsédeda' le'e lávela benne' zan, ne lízrquezle.

21 Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i lazre' lau Dios, ne xeléajle'e chee Xránadxu Jesucristo.

22 Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'.

23 Tuze da nezda', lu xúgute xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'.

24 Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajlene' ca naca da dxuna', ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

25 'Nézquezda' netule le'e, ba bchálajlene' le'e ca dxenná bea Dios, québedxa lé'ele neda'.

26 Chee le na', dxaca lazra' xapa' le'e na'a, quebe nabaga' zria ne chee tule le'e,

27 lawe' da ba bzenda' le'e ca naca da dxaca lazre' Dios guné', ne quebe bi bcá'ana' da quebe bzéajni'ida' le'e.

28 Chee le na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla le' chee chu'u lu na'le guxuele benne' ca' zaj nazrague' chee Xránadxu, benne' ca' naxá'awené' nen dxen cheéqueze'.

29 Nezda' gate xezá'a neda' xeelé' bal-la benne' xelaca lazre' guzría xi'e benne' zaj nazragua chee Xránadxu ca dxelún becu' xi'a, be snia ca' dxuluzría xiba' zrlá' ca'.

30 Ládujla le'e welelá' bal-la benne' xulusédene' da wen lazre', ne quegá da li, chee chjácalé benne' ca' dxeléajle'e chee Jesús le'.

31 Chee le na', le guxúe cuínale. Le gusá' lázrele ca bēna' chun iza, te zra ne chizrela quebe bsana' bzéajni'ida' le'e tu tule le'e, ne gudxzrete'a'.

32 Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa' na le'e lávela xúgute benne' ca' ba guleaj Dios cheéqueze'.

33 Quebe guca lazra' neda' si'a chia' dumí ne zra lana nu benne'.

<sup>34</sup> Nézquezle le'e ca bēna', bēna' zrin nen ni'a ná'queza' chee guta' da guchinnedá' neda', ne da gulechinne benne' ca' gulaque' neda' tuze.

<sup>35</sup> Blé'equezda' le'e, ca'an dxal-la' gunle zrin chee séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunezruj, quézcala chee benne' si' lu ne'e."

<sup>36</sup> Ca gudé gunná Pablo da nigá, na' bzu zribe', ne bchálajlene' Dios nen xúgute' benne' ca'.

<sup>37</sup> Xúgute' gulebezre', na' bulunide', ne bulunupe' Pablo.

<sup>38</sup> Belexewí'inele'ene' lawe' da guzre' le' québedxa xeledé'ene' le'. Na' xjácalene' le' naga bexu'e lu da dxedá lawe' nísadau'.

## 21

### *Pablo dxezrine' xezre Jerusalén*

<sup>1</sup> Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajtezentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara.

<sup>2</sup> Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'.

<sup>3</sup> Gate gudentu' naga dxe' xezr la xu Chipre, blé'entu' na chala' a xéglala, na' bexíajtezentu', bzrintu' lu xezre ca' zaj nababa Siria. Lu xezre Tiro ben na ba xen xuluxulétaje' xua' da nua da dxedá lawe' nísadau' na', na' chee le' na' bzrintu' na'.

<sup>4</sup> Na' bezrágantu' benne' ca' dxeléajle'e chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéaje' Jerusalén.

<sup>5</sup> Gate gudé guca gazre zra ca', na' zua xeza'ntu' na'. Xúgute' benne' ca' dxeléajle'e chee Xránadxu, ne zru'ule' ca', ne bidu chee' ca' gusa'acalene' netu' bedxúajtentu' xezre na', na' dxu'a nísadau' na' bzu zribentu' bchálajlentu' Dios.

<sup>6</sup> Nadxa bze'ljwézrentu' dizra', ne bnídate'ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

<sup>7</sup> Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra.

<sup>8</sup> Zra xula Pablo, ne netu' zrálentu' le' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá.

<sup>9</sup> Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee Dios.

<sup>10</sup> Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios.

<sup>11</sup> Agabo na' bidé' bedajnné'e netu'. Guqué'e bazxu dxu'a le'e chee Pablo, na' bchéaje' na ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

<sup>12</sup> Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén.

<sup>13</sup> Pablo bechebe':

—¿Bizr chee na' dxebézele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' chee' gatia' lu xezre Jerusalén ne chee' Xránadxu Jesús.

14 Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

15 Gudé na' bsení'antu' cheentu', na' guxíajntu' Jerusalén.

16 Na' gusiá'acale bal-la benne' netu', benne' Cesarea dxeléajle'e chee' Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e chee' Jesús, na' lizre benne' nigá dxal-la' zrintu' súantu'.

### *Pablo zeajnné'e Jacobo*

17 Gate bzrintu' Jerusalén, bi bíchedxu ca' belezí' lu ne'e netu' duté xel-la' dxelebé.

18 Zra xula Pablo guxíajlene' netu' xejnná'ntu' Jacobo, na' zaj zrá'queze na' xúgute' benne' gula ca' dxeléajle'e chee' Jesús.

19 Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío.

20 Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee' Jesús, na' xúgute' dxelenné' dxun na ba xen chéajledxu da bdxixruj bea Moisés.

21 Zaj zra' benne' ba gulé'e benne' judío caní lue' dxusédenu' xúgute' benne' judío zaj zre'e zitu' québedxa xelune' ca da gunná be'e Moisés, ne quebe xelechugue' late' béla'dau' chee' bel-la' dxen chee' bidu chee' ca', ne quebe chjácalene' ca naca da zéajledxu dxi'u dxundxu.

22 ¿Ájala dxal-la' gundxu? Benne' judío caní welezrague' gate xelenne' ba bla'u.

23 Cháwedxa gunu' da caní: Zaj zra' tapa benne' láwela dxi'u dxal-la' xelune' tu da zaj nachébe lazre' lau Dios.

24 Guché benne' caní chjá'acalene' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute' benne' xeleque bé'ene' quebe naca da li ca da gulenné' chiu', san la gázqueze lue' dxunu' xúgute' ca da dxenná da nadxixruj bea na.

25 Ca naca chee' benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee' bedáu' xiaj xaga ca', ne quebe xelawe' dxen chee' be' xixre' ca', ne quebe xelawe' béla' chee' be' xixre', be' quebe bdxuaj dxen, ne quebe xelune' dul-la' chee' da dxucá'ana sban bénneache.

### *Dxeléle' Pablo lu xudau'*

26 Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee' buluzenne' bxruze ca' gate xexuzre zra ca' chee' da dxulucá'ana chawe' cuine' lau Dios, gate na' tu tute' dxal-la' xelegú'e guna'.

27 Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo.

28 Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédene' xúgute' bénneache xuluzúe' chala'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxcá'ana dítaje' lataj lá'axxa nigá.

<sup>29</sup> Caní gulenné' lawe' da ba belelé'ene' Pablo lu xezre na' nen Tróximo, tu benne' xezre Efeso, na' dxeléquene' gulú'u Pablo le' lu xudau'.

<sup>30</sup> Ca naca benne' zaj zre'e xezre na' beledxé'ena zrague', ne zá'aca chégüe'. Nadxa gulel-le' Pablo, ne gulezrube xue' le' chale'aj xudau' na', na' buluséxuje' dxa xu'u chee na.

<sup>31</sup> Ba zuate xelútie' Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén.

<sup>32</sup> Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégüe' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje' Pablo.

<sup>33</sup> Nadxa gubiga' benne' na' dxenná be'e lu wedil-la, na' gudel-le' Pablo, ne gunná bé'ene' xuluchéaje' le' chupa du xia. Gudé na' bchebe' benne' ca' nua' benne' nigá, ne bi ba bene'.

<sup>34</sup> Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'.

<sup>35</sup> Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúele'e benne' zan ca' Pablo,

<sup>36</sup> na' xúgute' zá'aque' cuzre na' dxeleenné' zizraj:

—Gate bénnea'.

*Pablo dxexechebe' lau benne' zan ca'*

<sup>37</sup> Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nniá'?

Na' bchebe bénnea' le':

—¿Waca nneu' dizra' griego?

<sup>38</sup> ¿Quebe nacu' lue' benne' Egipto na' ba zeaj tu chupa iza btupe' benne' ca' guledábage' xu'u lawe', na' guché'e tapa gaxúa benne' dxelutie' benne', xeajzré'e le' le'e xixre' lawe' lataj?

<sup>39</sup> Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlene' benne' zan caní.

<sup>40</sup> Benne' na' be'e le' lataj, na' Pablo guzé' lachila chee xu'u na', na' guchisa ne'e chee xelezúa zri benne' zan ca'. Gate gudxé' zri, na' bchálajlene' le' dizra' hebreo, dxenné':

## 22

<sup>1</sup>—Le'e, benne' gula, ne le'e, bi bicha', le xen ca da xapa' le'e da dxexecheba' chele.

<sup>2</sup> Gate belenne' dxuchálajle Pablo le' dizra' hebreo, na' gulezúadxé' zrize, na' Pablo guzre' le':

<sup>3</sup>—Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédene' neda' cáteze naca da nadxixruj bea na

chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a.

<sup>4</sup> Nédxutę gudáu zi' xuzra' benne' ca' dxelájle'e chee Jesús, ne bêtequeza' bal-le', ne guche'a benne' biu, ne nu'ula chee, na' bzra'a le' lizre xia.

<sup>5</sup> Bxruze blau, ne xúgute benne' gula sina wace xelexchébequeze' belunne' neda' xiche chee bi'a na lau bi bíchedxu judío ca' zaj zře'e xezre Damasco. Guxá'a na' xeajxedilja' naga zaj zra' benne' ca' dxelájle'e chee Jesús chee che'a benne' ca' Jerusalén nigá, chee xeledé'e ba xa'.

<sup>6</sup> 'Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa.

<sup>7</sup> Na' xeajchazia' lu xu, ne benda' chi'i tu benne' guzře' neda': "Saulo, Saulo, ¿bizr chee na' nau zi' xuzru' neda'?"

<sup>8</sup> Nadxa bcheba' le': ¿Núzraqueze lue', Xran? Na' guzře' neda': "Neda' naca' Jesús, benne' Nazaret, bénnea' nau zi' xuzru' lue'."

<sup>9</sup> Benne' ca' zralęne' neda' belelé'ene' xi' na', ne belezrebe', san quebe belenne' chi'i bénnea' gunné' neda'.

<sup>10</sup> Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxájteze Damasco, ga na' zua benne' xelé'e lue' ca da dxal-la' gunu'."

<sup>11</sup> Benne' ca' zjácáleňe' neda' belequé'e na'a zeajntu' Damasco lawe' da bca'ana xi' na' neda' la chul-la.

<sup>12</sup> 'Zua na' tu benne' le' Ananías, benne' dxunę' du lazre' ca naca da bdxixruj be'e Moisés, na' xúgute benne' judío zaj zře'e Damasco dxelenné' cháwele'e ca dxune'.

<sup>13</sup> Ananías na' ble'e naga zua' neda', na' guzře' neda': "Bicha' Saulo, na'a xe le'enu'." Lu zra ná'queze belé'etęda', ne ble'eda' benne' na'.

<sup>14</sup> Nadxa guzře' neda': "Dios chee xra xrtáudxu guqué'e lue' nédxutę chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bénnea'.

<sup>15</sup> Lue' guchálaju' da naca chee Le' lau ca naca bénneache zaj zře'e lu xęzr la xu, ne guzennu' benne' ca' ca naca da blé'enu', ne da bennu'.

<sup>16</sup> Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cue'e dul-la chiu'."

<sup>17</sup> 'Gate bezrina' Jerusalén, guxá'a lu xudau' xeajchálajęna' Dios, na' ble'eda' tu da ble'e Dios neda'.

<sup>18</sup> Ble'eda' Xránadxu, na' guzře' neda': "Bdxuajche Jerusalén nigá lawe' da quebe xelezí'e ca naca da guchálaju' chia'."

<sup>19</sup> Nadxa gucha' Le': Xran, zaj nézquezne' guxá'a neda' xúgute xu'u naga dxelezraga judío ca', ne xeajxri'a benne' ca' dxelájle'e chiu', na' bzra'a le' lizre xia, ne bzálajqueza' benne' ca',

<sup>20</sup> na' gate belútię' Esteban, benne' wen zrin chiu', na' zé'queza' neda' naca' tuze nen benne' ca' belútię' le'.

<sup>21</sup> Xránadxu guzře' neda': "Guxáj, lawe' da sel-la' lue' zitu' naga zaj zra' benne' quebe zaj naque' judío."

### *Da ben benne' dxenná be'e lu wedil-la*

<sup>22</sup> Dizra' caní belenne', san lu dizra' nigá gulezú lawe' dxelebezre xę'e, dxelenné':

—¡Gate benne' nigá! ¡Québedxa dxal-la' gaca banę'!

<sup>23</sup> Na' gulebezre xá'aqueze', ne buluzale' sibe zra lanę', ne belequé'e bxrte xu da buluzale' sibe.



24 Chee le na' benne' na' dxenná be'e lu wedil-la gunná bé'ene' xelegú'e Pablo lu xu'ula, ne xelu'e le' chee nne' da li, bizr chee na' gulebezre xa'a benne' zan ca' chee le'.

25 Gate bexuzre buluchéaje' na' Pablo, chee xelu'e le', Pablo guzre' tu benne' dxeaje' wedil-la zu'e na':

—¿Naca chee le'e güele tu benne' nababe' Roma, ne quebe ne guchí'ale aja naca chee'?

26 Gate ben benne' dxeaje' wedil-la da nigá, na' guxíaje' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

27 Nadxa benne' nigá gubigue' naga ze Pablo, na' bchebe' le':

—¿Da li na' nababu' Roma?

Pablo bechebe':

—Awe'.

28 Na' benne' dxenná be'e lu wedil-la gunné':

—Neda' da zrente gudízruja' chee gubaba' Roma.

Na' Pablo gunné':

—Neda' nabábaqueza' Roma gate gúlajtea'.

29 Gate belenne' da nigá, na' benne' ca' ba zaj ze' xelu'e Pablo belexecuase' cuita le', na' la gaze benne' na' dxenná be'e lu wedil-la, gate guque bé'ene' nababa Pablo Roma, bzrebe' lawe' da nuchéaje' le' du xia.

*Pablo dxezrine' lau benne' xu'u lawe' blau ca' chee judío ca'*

30 Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' beque'e du xia na' nadxéaj na' na' Pablo, na' gunná bé'ene' xelexraga benne' xichaje' ca' chee bxruze, ne xúgute benne' xu'u lawe' blau. Nadxa guléaje' Pablo, na' bze' le' lau benne' ca'.

## 23

1 Pablo gunné'e benne' xu'u lawe' blau ca', na' guzre' le':

—Le'e, bi bicha', ca naca xúgute da ba bena' neda', zua zri xichaj lázrdawa' lau Dios.

2 Nadxa Ananías, bxruze blau, gunná bé'ene' benne' zaj ze' na' xelegape' dxu'a Pablo.

3 Na' Pablo bechebe':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedábaga da bdxixruje', dxenná be'enu' xelu'e neda'?

4 Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

5 Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

6 Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nau'e fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

7 Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'.

<sup>8</sup> Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá' bènne'du xu'u bènneache, san benne' fariseo ca' dxeléajle'e dxata' xúgute da ca'.

<sup>9</sup> Xúgute' gulebezre xe'e, na' gulezé bal-la benne' dxuluxuzájle'e da nadxiruj bea na, benne' zaj naque' fariseo, na' gulenné':

—Benne' nigá quebe bi da calela ne gune'. Che nu bènnedu xu'u bènneache, u tu gubáz chee xabáa ba gunné' le', quebe dxal-la' nnédxu chee Dios.

<sup>10</sup> Na' bulutíl-lalé'e ljwezre' dizra', na' benne' na' dxenná be'e lu wedil-la bzrebe' xelél-le' Pablo xuluzúzruje' le'. Chee le' na' gunná bé'ene' benne' dxjaca wedil-la xelexebéaje' le' lówela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

<sup>11</sup> Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la' queze guchálaju' chia' lu xezre Roma.

### *Zaj nun benne' judío ca xelune' xelútié' Pablo*

<sup>12</sup> Zra xula bal-la benne' judío ca' belune' tuze dizra' xelútié' Pablo. Gulenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

<sup>13</sup> Nadé chua benne' biu ca' zaj nachebe lazre' xelune' da nigá.

<sup>14</sup> Benne' caní xjaque' lau benne' xíchaje' ca' chee bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'e netu' de' che bi gáguntu', ne quebe ne gútentu' Pablo.

<sup>15</sup> Na'a, le'e, ne xezícadxa benne' xu'u lawe' blau ca' dxal-la' nábale benne' dxenná be'e lu wedil-la xedajlegü'e Pablo wxre zila laule le'e, xe'le bènnea' dxaca lázrele guchébe xánnele Pablo, na' netu' se' cuásantu' gútentu' le' québela ne xidé' nigá.

<sup>16</sup> Zri'ine bi zan Pablo benbe' ca naca da nigá, na' guxíajbe' naga zua Pablo cheajézrebe' le'.

<sup>17</sup> Nadxa Pablo gunné' tu benne' xu'u lu ne'e benne' ca' dxjaque' wedil-la, na' guzre' le':

—Guché' bi cuide' nigá lau benne' xíchaje' chiu' lawe' da de' da dxal-la' xe'be' le'.

<sup>18</sup> Na' benne' na' xu'u lu ne'e benne' ca' dxjaque' wedil-la guché'e-be' lau xrane', na' guzre' le':

—Pablo, bènnea' nadxéaje' gunné' neda', na' gunabe' xedajgu'a bi cuide' nigá naga zu' lawe' da de' da dxal-la' xe'be' lue'.

<sup>19</sup> Benne' xíchaje' na' guqué'e na' bi cuide' na', na' guché'e-be' chalá'ala, ne bchebe'-be':

—¿Bi dxaca lazru' xu'u neda'?

<sup>20</sup> Na' gunná bi cuide' na', gúzrebe' le':

—Benne' judío ca' ba zaj nune' tuze dizra' xelenabe' lue' che'u Pablo wxre zila lau benne' xu'u lawe' blau ca', xelenné' dxelaca lazre' xuluchebe xánnie' le'.

<sup>21</sup> Quebe chéajle'u chee benne' ca' lawe' da nadé chua benne' ca' xebeze' le' bagácheze, ne ba gulechebe lazre' lau Dios Le' cu'e benne' ca' de' che bi xe'le'aj xelawe', ne quebe ne xelútié' Pablo. Na'a ba zaj zue' dxebeze' xrtizru'.

<sup>22</sup> Nadxa benne' xíchaję na' bze' bi cuide' na' dizra', na' guzre'-be' quebe nu xebe' ba xeajęzrebe' le' caní.

*Dxelesel-le' Pablo lau Félix, benne' xu'u lu ne'e xęzr la xu na'*

<sup>23</sup> Benne' xíchaję na' gunné' chupa benne' cheę, benne' xu'u lu ne'e benne' ca' dxjaque' wedil-la, na' gunná bé'ene' le' xulucueze' chupa gaxúa benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xelebía bzrina', ne chupa gaxúa benne' dxjaque' wedil-la, benne' xelu'e xia tunna, cheę chjaque' lu xęzre Cesarea dxedá' ga chizrela.

<sup>24</sup> La gázqueze gunná bé'ene' xulucueze' bzrina' cuía Pablo, ne gunná bé'ene' xeleché'e le' cháwedau' lau Félix, benne' xu'u lu ne'e xęzr la xu na' waláz cheę Roma.

<sup>25</sup> Gusel-le' tu xiche da belúa benne' dxjaque' wedil-la. Caní naxúaj na:

<sup>26</sup> Neda' Claudio, dxugapa' lue' diuzre Félix, benne' xu'u lu na'u xęzr la xu nigá.

<sup>27</sup> Benne' judío ca' gulel-le' benne' nigá ná'tega na'a cheę xelútię' le'. Gate gunezda' neda' nababe' Roma, na' guxiájlena' benne' chia' ca', benne' dxjaque' wedil-la, xeajselá' le'.

<sup>28</sup> Guca lazra' nezda' bi dxelagu zria le', na' guche'a le' lau benne' xu'u lawe' ca' cheę judío ca'.

<sup>29</sup> Na' gunezda' dxelagu zria le' da naca cheę da nadxixruj bea cheę judío ca', san quebe naca na cheę xelútię' le', ne cheę chu'e lizre xia.

<sup>30</sup> Gate benda' ca ba zaj nun judío ca' cheę xelútię' le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

<sup>31</sup> Nadxa benne' dxjaque' wedil-la belune' ca gunná be'e benne' xíchaję cheę, na' beleché'e Pablo chizrela, na' belezrine' xęzre Antípatris.

<sup>32</sup> Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrie' bzrina' beleché'e Pablo naga dxal-la' zrine'.

<sup>33</sup> Gate belexezrine' xęzre Cesarea, na' bulunézruje' benne' xu'u lu ne'e xęzr la xu na' xiche na', ne buludéę' Pablo lu ne'e.

<sup>34</sup> Ca bexuzre blabe' xiche na', na' benne' xu'u lu ne'e xęzr la xu na' bchebe' ga benne' Pablo. Gate benne' naque' benne' cheę xęzre nababa Cilicia,

<sup>35</sup> na' guzre' le':

—Guchi'a cheę da dxaca chiu' gate xelélá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' cheę Herodes.

## 24

*Pablo dxuzri'e dizra' da dxácale na le' lau Félix*

<sup>1</sup> Ca gudé gazxu' zra, Ananías, bxruze blau, bzrine' xęzre Cesarea nen bal-la benne' gula sina ca', ne tu benne' dxenné' waláz cheę benne' ca', le' Tértulo. Benne' caní belezrine' lau benne' xu'u lu ne'e xęzr la xu na' cheę xelagu zria Pablo.

<sup>2</sup> Gate xeajlexrí'e Pablo, na' guzú lau Tértulo dxawe' xria Pablo, dxę'e Félix:

—Xcalenu' lue', benne' xu'u lu na'u xęzr la xu nigá, lawe' da zúantu' xel-la' dxebeza zri lazre', na' da chawe' dxgwa dxaca na cheęntu', na' ca dxenná be'enu' netu' lu xel-la' sina chiu' dxexedxúaj na chawe'.

<sup>3</sup> Xúgute da nigá dxezi'queze lu na'ntu' gáteteze na', ne dxęntu' lue' xcalén cuinu', Félix.

<sup>4</sup> Chee québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'.

<sup>5</sup> Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne' ca' zaj da' tu benne' Nazaret.

<sup>6</sup> Benne' nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'.

<sup>7</sup> Na' Lisias, benne' dxenná be'e lu wedil-la, bequé'e le' lu na'ntu' xadía.

<sup>8</sup> Na' gunné' che zaj zra benne' xelagu zrie' Le', dxal-la' xelexé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

<sup>9</sup> Benne' judío ca' zaj zre'e na' gulenné' naca da li xúgute da ca'.

<sup>10</sup> Nadxa benne' xu'u lu ne'e xezr la xu na' guchisa ne'e chee guchalaj Pablo, na' gunná Pablo:

—Dxebéle'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee xezr la xu cheentu' ba zeaj zane' iza.

<sup>11</sup> Lu'é'queze waca chéajni'inu' ba zeaj chazrinnu zraze bla'a Jerusalén chee güe lá'ana' Dios.

<sup>12</sup> Quebe belelé'eng' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee xezre na'.

<sup>13</sup> Benne' caní quebe xelexé'quene' xululé'eng' naca da li ca zaj naca da dxelawe' neda' zria.

<sup>14</sup> Tu da dxexecheba', dxucá'ana szrena' Dios chee xra xrtáudxu ca', dxuna' ca da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee da nadxixruj bea na, ne chee benne' ca' buluchálaje' waláz chee Dios.

<sup>15</sup> Neda' dxebeza lázrqueza' ca da gun Dios, ca dxelebeza lazre' benne' caní, dxebeza lázrentu' Dios gusebané' benne' gate ca', benne' xrlátaje, ne benne' ca' dxelune' da calela.

<sup>16</sup> Chee le' na' dxue lazra' sua zri xichaj lázrdawa' lau Dios, ne lau bénneache ca'.

<sup>17</sup> 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios.

<sup>18</sup> Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bhaga', ne quebe nu benne' guché'ena' zraga.

<sup>19</sup> Benne' caní dxal-la' xelexé'e nigá chee xelawe' neda' zria che bi zua dxelaca chee' nen neda',

<sup>20</sup> san che quebe bi de, na' benne' caní zaj zre'e nigá dxal-la' xelenné' che bi belezrelene' da dxebaga' gate zua' lau benne' xu'u lawe' blau ca' chee judío ca'.

<sup>21</sup> Tuze da beña' gate zua' lau benne' ca', gunnéa' zizraj: Na'a dxuchi'ale chia' lawe' da dxéajlí lazra' xelexebán benne' gate.

<sup>22</sup> Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxada' chee da nigá dxaca cheele.

<sup>23</sup> Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi gune', ne xelu'e lataj benne' ljwezre Pablo cheajlenné'e le', ne bi xelune' chee'.

<sup>24</sup> Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzzin Pablo chee' guchálajlene' le' ca naca xel-la' dxeajli lazre' chee' chee' Jesucristo.

<sup>25</sup> Gate Pablo bchájlajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheedxu gate cheajsé chee' xezr la xu, na' bzrebe Félix, ne guzre' Pablo:

—Bexíaj ná'a. Gate nalátaja', na' nnéqueza' lue'.

<sup>26</sup> La gaze dxaca lazre' Félix gunezruj Pablo le' dumí chee' gusané' le'. Chee le' na' gunnéle'e Pablo chee' guchálajlene' le'.

<sup>27</sup> Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee' Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

## 25

### *Pablo dxexechebe' lau Festo*

<sup>1</sup> Nadxa Festo bzzine' xezre Cesarea chee' si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén.

<sup>2</sup> Lu xezre na' belezrin benne' xíchaje' ca' chee' bxruze ca', ne benne' judío blau ca' lau le', ne gulawe' zria Pablo.

<sup>3</sup> Gulata' xuene' benne' xu'u lu ne'e xezr la xu na' sel-le' benne' cheajlex-ezri'e Pablo chee' xezrine' Jerusalén. Benne' judío ca' ba zaj nune' xelútie' Pablo la neza gate zezé'e na'.

<sup>4</sup> Bechebe Festo ba xu'u Pablo lizre xia lu xezre Cesarea, na' léqueze' ba nune' chéaje' na' xetú chupa zra.

<sup>5</sup> Na' guzre' benne' ca':

—Benne' ca' zaj zre'e lówela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da caléla da bene', waca gágule le' zria.

<sup>6</sup> Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeajlexrí'e Pablo.

<sup>7</sup> Gate bzzin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li.

<sup>8</sup> Nadxa Pablo bechebe' waláz chee', gunné':

—Neda' quebe bi da calela ne guna', quegá chee' da nadxixruj bea chee' judío ca', ne quegá chee' xudau' chee', ne quegá chee' César.

<sup>9</sup> Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee' guchi'a neda' ca naca chiu' na'?

<sup>10</sup> Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinna' ne guna' chee' benne' judío ca'.

<sup>11</sup> Che ba bēna' tu da zrinna' da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé'e neda' lu na' benne' ca'. Dxenaba' zri'a chia' lau César.

<sup>12</sup> Ca gudé bchálajlene' benne' dxuluzéajni'i le', na' Festo guzre' Pablo:

—Ba ganabu' zri'a chiu' lau César. Chéaju' lau César.

*Pablo dxezrine' lau Agripa, benne' wenna' bea*

<sup>13</sup> Ca gudé zane' zra Agripa, benne' wenna' bea, ne bi zane' belezrine' Cesarea chee xulugape' Festo diuzre.

<sup>14</sup> Gulezúe' na' tu chupa zra, na' Festo bzenne' Agripa, benne' wenna' bea na' ca naca chee Pablo. Guzre' le':

—Zua tu benne' nigá, benne' bca'ana Félix lizre xia.

<sup>15</sup> Gate guzúa' xezre Jerusalén, na' benne' xíchaje' ca' chee bxruze ca', ne benne' gula sina ca' chee judío ca' gulenné' chee benne' nigá, ne gulenabe' neda' chuga' chee' gatié'.

<sup>16</sup> Neda' becheba' benne' ca', gunnía' benne' xu'u lawe' chee Roma quebe nu benne' dxelechugue' chee' gatié' che quebe zrine' lau benne' ca' dxelawe' le' zria chee xechebe' waláz chee'.

<sup>17</sup> Chee le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'.

<sup>18</sup> Benne' ca' gulawe' le' zria quebe bi gulenné' chee' ca da gúqueda' neda'.

<sup>19</sup> Laze láweze da gulenné' chee' naca na ca naca da dxeléajle'e chee Dios, ne chee tu benne' le' Jesús, benne' gute, san dxenna' Pablo naca bang'.

<sup>20</sup> Quebe bezréleda' ájala guna' chee da na', na' bcheba' Pablo che dxaca lazre' chéaje' Jerusalén chee zri'a ca naca chee' na'.

<sup>21</sup> Nadxa le' gunabe' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

<sup>22</sup> Nadxa gunná Agripa, dxé'e Festo:

—La gaze neda' dxaca lazra' xenda' chee benne' nigá.

Na' bechebe Festo:

—Wxre xennu' chee'.

<sup>23</sup> Zra xula, gate belezrin Agripa, ne Berenice ga na', belú'e lu dute xel-la' szren nen benne' dxenna' be'e lu wedil-la, ne benne' blau ca' chee xezre. Na' Festo gunná bé'ene' xejlexrí'e Pablo,

<sup>24</sup> na' gunné':

—Agripa, benne' wenna' bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee benne' nigá, na' tu gulézqueze' neda' dxal-la' gatié'.

<sup>25</sup> Neda' dxéqueda' quebe bi bene' da gudé na le' gatié', san léqueze' gunabe' zri'a chee' lau César. Chee le' na' ba nuna' chee' sel-la' le' lau César.

<sup>26</sup> Quebe bi de' da guzúaja' chee Xrana' César ca naca chee benne' nigá. Chee le' na' dxuzúa' benne' nigá laule le'e, ne da naca bláuqueze, dxuzúa' le' lau lue', wenna' bea Agripa, chee guchebu' le' chee gata' late' da guzúaja' ca naca chee'.

<sup>27</sup> Dxéqueda' quebe naca chawe' sel-la' tu benne' nadxéaje' du xia, ne quebe nnia' bi da zria nape'.

**26***Pablo dxexechebe' lau Agripa, benne' wenna' bea*

<sup>1</sup> Nadxa gunná wenna' bea Agripa, guzre' Pablo:

—Waca xechebu'.

Na' Pablo guchisa ne'e, ne guzú lawe' dxuchálaje', dxenné':

<sup>2</sup> —Dxebéle'eda' dxunu' neda' lataj dxuchálaja' lau lue', wenna' bea Agripa, chee xecheba' ca da gulenná benne' judío chia' neda',

<sup>3</sup> ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee lę na' dxenaba' lue' xennu' chia' dutę xel-la' zren lazre' chiu'.

<sup>4</sup> Xúgute benne' judío ca' zaj nézene' ca bęna' lazria', ne lu xęzre Jerusalén gate nácatea' bidau'te.

<sup>5</sup> Zaj nézqueze benne' ca', ne waca xelexechebe' che dxelaca lazre', ca nácatea' benne' cuide'te, naca' fariseo. Benne' fariseo ca' zjácaldęe' ca naca chee da dxelájle judío ca' chee Dios.

<sup>6</sup> Na'a lawe' da dxebeza lazra' gusebán Dios benne' gate ca', ca guchebe lazre' chee xra xrtáuntu' ca', benne' ca' buluzię' neda' lau xu'u lawe'.

<sup>7</sup> Dxelebeza lazre' chazrinnu cue' zri'ine zre sua Israel xelélé'eng' gaca ca naca da nigá guchebe lazre' Dios, na' chee lę na' dxulucá'ana szrene' Dios, ne dxelunę zrin chee' te zra ne chizrela. Na'a, wenná bea Agripa, benne' judío ca' dxelawe' neda' zria lawe' da dxebeza lazra' ca naca da caníqueze da nachebe lazre' Dios.

<sup>8</sup> ¿Quebe dxéajle'u gusebán Dios benne' gate ca'?

<sup>9</sup> 'Néda'queza' nédxute gúqueda' da zan da dxal-la' guna' chee benne' ca' dxelájle'e chee Jesús, benne' Nazaret.

<sup>10</sup> Caní bęna' lu xęzre Jerusalén. Lu xel-la' dxenná bea chee benne' xíchaje ca' chee bxruze ca', benne' zan bzra'a lizre xia, benne' dxelájle'e chee Jesús, na' gate belútię' benne' ca' neda' bęnqueza' tuze benne' ca' belútię' le'.

<sup>11</sup> Zane' lásate' bdea' benne' ca' ba xa' chee xulusanę' xel-la' dxelejli lazre' chee'. Caní bęna' xúgute lu xu'u ca' naga dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xęzre zitu' ca'.

<sup>12</sup> 'Chee guna' da nigá zexá'a xęzre Damasco, zaj nasel-la benne' xíchaje ca' chee bxruze ca' neda' nen xel-la' dxenná bea chee'.

<sup>13</sup> Ca zexá'a xu'a neza na', du wagubizra ble'eda' tu xi' da za' xabáa da nácadxa ca xel-la' dxenná' chee gubizra, na' gusení na naga zexá'a neda' nen benne' zjácaldęe' neda'.

<sup>14</sup> Nadxa xúgute'ntu' xejcházentu' lu xu, na' benda' chi'i tu benne' gunné' dizra' hebreo, guzre' neda': "Saulo, Saulo, ¿bizr chee na' nau zi' xuzru' neda'? Lue'ze dxun zi' cuinu' ca dxun bezre gate dxulíbeba' lawe' xágala da dxáduę'ba'."

<sup>15</sup> Nadxa gunnéa': ¿Nuzra Lue', Xran? na' Xránadxu guzre' neda': "Neda' naca Jesús, bęnnea' nau zi' xuzru'.

<sup>16</sup> Bexasa, guzę, lawe' da ble'e lawa' lue' chee gunu' zrin chia', ne chee xechębu' ca naca da ba blé'enu', ne ca naca da za le'enu' gate te na'a.

<sup>17</sup> Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a.

<sup>18</sup> Dxusel-la' lue' lau benne' ca' chee sálaju' xiaj lau benne' ca' chee xulusanę' da naca chee da chul-la, na' xelunę' da naca chee xel-la' naxaní', ne chee xelixedxúaje' lu na' da xriwę, ne xelxú'e lu na' Dios, ne chee xelájle'e chia' neda', na' xunite lau Dios ca naca dul-la chee', ne gaca chee' tu da xelape' lávela benne' ca' ba gucá'a Dios."

<sup>19</sup> 'Ca' guca, wenná bea Agripa. Bzua' dizra' ca naca da ble'e Dios neda' da naca chee xabáa.

<sup>20</sup> Nedxu bchálaja' dizra' chee Dios lau benne' zaj zre'e xęzre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexebi'i lazre', ne xelexexaque' chee Dios, na' xelunę' da xelunna bea na ca da ba zaj naque'.

<sup>21</sup> Chee le na' benne' judío ca' gulél-le' neda' lu xudau', ne gulaca lazre' xelúti'e' neda'.

<sup>22</sup> Dios dxácalne' neda', na' ze chúchuqueza' lu zra na'a zra, dxuchálajlena' xúgute' benne' ca' naca chee Dios, benne' cá'aze ca', ne benne' blau ca'. Dxapa' benne' ca' tuze ca' naca da gulenná benne' ca' buluchálaje' waláz chee Dios, ne da gunná Moisés dxal-la' gaca.

<sup>23</sup> Gulenné' Cristo dxal-la' si' saque', na' ca te gati'e' dxal-la' xebane' ládujla benne' gate nédxudxa ca' xúgute' benne' ca', na' gulenné' xelén benne' judío ca', ne benne' quebe zaj naque' judío ca' naca chee xel-la' naxani' chee Dios, da dxulé'e na le' ca' gaca xeelé'.

*Pablo dxaca lazre' guzėjni'ine' Agripa gaque' benne' chee Cristo*

<sup>24</sup> Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

<sup>25</sup> Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li.

<sup>26</sup> Nigá zua wenná bea Agripa. Nézele'ene' ca' naca chee da caní, na' chee le na' dxuchálaja' dut'e' xel-la' dxuxrén lazre' chia' lawe'. Nézquezda' le' nézene' ca' naca da nigá lawe' da dxuchálaja' ca' naca chee da quebe guca na bagácheze.

<sup>27</sup> ¿Dxéajle'u lue', wenná bea Agripa, ca' naca da gulenná benne' ca' buluchálaje' waláz chee Dios? Nezda' dxéajle'u.

<sup>28</sup> Nadxa gunná Agripa:

—Xeláteze guzėjni'inu' neda' gaca' chee Cristo.

<sup>29</sup> Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute' benne' dxelenne' chia' na'a, xelaque' ca' néda'queza', san quebe xeledxéaj'e' du xia.

<sup>30</sup> Ca gudé gunná Pablo da nigá, na' gulexasa wenná bea, ne benne' xu'u lu ne'e' xezr la xu na' tu zren nen Berenice, ne xúgute' benne' ca' zaj dx'e'e' na'.

<sup>31</sup> Belexedxúaj'e' cheeze' chee xuluchálajle ljwezre' ca' naca chee da nigá. Na' gulenné', dxelé ljwezre':

—Benne' nigá quebe bi da calela ne gun'e' da gudé na le' gati'e', ne quebe dxal-la' chu'e' lizre xia.

<sup>32</sup> Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

## 27

*Dxelesel-le' Pablo lu xezre Roma*

<sup>1</sup> Gate ba zaj nune' xelesel-le' netu' lu xezr la xu Italia, na' Pablo, ne xezícala benne' ca' zaj zre'e' lizre xia, buludé'e' le' lu na' tu benne' dxenná bé'ene' lu wedil-la le' Julio, benne' yu'u lu ne'e' tu cue' benne' dxjaque' wedil-la nazí le na' Benne' Chee Augusto Dxjaque' Wedil-la.

<sup>2</sup> Na' guxú'untu' tu lu da dxedá lawe' nísadau' chee xezre Adramitio, da ba zua te na' xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia.

<sup>3</sup> Zra xula bzrintu' xezre Sidón, naga Julio bēnle'e' da chawe' chee Pablo, na' be'e' le' lataj xeajnné'e' bi bíchedxu ca' chee bi belune' chee'.



<sup>4</sup> Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chala'ala xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'.

<sup>5</sup> Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licía.

<sup>6</sup> Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'.

<sup>7</sup> Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéajntu' naga dxe' xezr la xu Creta da naxechaj nísadau'.

<sup>8</sup> Stébele'e gudentu' chala'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

<sup>9</sup> Záne'te zra bnítentu' xu'untu' da dxedá lawe' nísadau' na', na' ba naca stebe zéajntu' lu nísadau' na' lawe' da ba dxexú'udxu beu' zaga. Chee le na' bzéajni' i Pablo benne' ca'.

<sup>10</sup> Dxenné':

—Le'e, benne', dxelé'eda' wácale'e stebe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzet'e cuía xidxu dxi'u.

<sup>11</sup> Benne' dxenná be'e lu wedil-la guxéajlédxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo.

<sup>12</sup> Na' lawe' da quebe naca lataj na' chawe' súadxu na' beu' zaga ca', na' xúgute' guléquene' nácadxa chawe' kezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chala'ala chee xezr la xu Creta naga dxebía gubizra, na' xegá'anadxu na' beu' zaga ca'.

### *Dxaca be' bdunu' lu nísadau'*

<sup>13</sup> Nadxa guzú lau dxaca lase be' da za' chala'ala naga dxedé gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'.

<sup>14</sup> Nadxa chíteze guca guzú lau dxácale'e be' bdunu' da za' chala'ala ga za' be' zaga.

<sup>15</sup> Be' na' guzú lau dxuzriga na chala'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bentu' lataj bzriga na da dxedá lawe' nísadau' na'.

<sup>16</sup> Na' gudentu' cúzrela tu xezr la xudau' naxechaj nísadau' da nazí le na Claudia, naga québedxa dxácat'e na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'.

<sup>17</sup> Ca gudé bulucuen'e da dau' na', na' buludé' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len.

<sup>18</sup> Zra xula, lawe' da ne dxácale'e be' bdunu', gulezú lawe' dxeledxú'une' xua ca' lu nísadau', da nua da dxedá lawe' nísadau' na'.

<sup>19</sup> Zra guxunne' zra nen ná'quezentu' gudxú'unantu' lu nísadau' da dxu-luchínene' chee da dxedá lawe' nísadau' na'.

<sup>20</sup> Zane' zra quebe blé'entu' gubizra ne belaj ca', ne ca naca be' bdunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

21 Zane' zra gudentu' quebe náguntu', na' guzé Pablo lávela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau' nigá, na' xua' da nua na quebe guzríá xi'.

22 Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá.

23 Ba dxele ble'e lau tu gubáz chee xabáa chee Dios neda'. Naca' chee Dios nigá ne dxuna' zrin chee'.

24 Gubáz na' guzre' neda': “Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xel-la' gute xúgute' benne' zaj zra' nen le' lu da dxedá lawe' nísadau' nigá.”

25 Chee le' na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz chee xabáa na' bchálajlene' neda'.

26 Na'a dxun na ba xen cheajchaze da dxedá lawe' nísadau' nigá tu lu xezr la xu da naxechaj nísadau'.

27 Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxela guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre.

28 Na' buludxixre' cáтите situj dxe' nisa na', na' dxe' na galaj esa. Na' xetu' chí'idau' gudé buludxixre' da xula, na' dxe' na chinu' ésaze.

29 Belezrebe' cheajtá da dxedá lawe' nísadau' na' xiaj, na' buluzale' tapa xia da nácale' e zi'i zran nisa zeaj zranla da dxedá lawe' nísadau' na', na' gulebeze' chani' dudxuze dxelezrebe'.

30 Nadxa benne' ca' dxulusá da dxedá lawe' nísadau' na' guléquene' xelexedxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelune' ca benne' xuluzáladxa xia da guxru na da dxedá lawe' nísadau' zren na' da zeaj laula na.

31 Pablo bzenne' benne' dxenná be'e lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lale le'e.

32 Nadxa benne' dxjaque' wedil-la gulechugue' du zri'a da nadxéaj da dau' na', na' belú'e na lataj bexruj na lu nísadau'.

33 Ca guxaní'sise' bzéajni'i Pablo xúgute' benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule.

34 Dxata' xueda' le'e gágule. Da nigá dxun na ba xen chee lale. Netudxu dxi'u quebe cuía xi' netú xicha xíchajdxu.

35 Ca gunné' caní, Pablo guqué'e tu xeta xtila, na' guzre' Dios: “Xcalenu”, lau xúgute' benne' ca'. Nadxa bzúzruje' na, na' guzú lawe' dxawe'.

36 Nadxa xúgute' belún dipa lazre', na' gulezú lau dxelawe'.

37 Cáтите netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'.

38 Ca gudé gulawe' cáтите guléljene', na' buluzale' zrua' xtila lu nísadau' chee bezrá' da dxedá lawe' nísadau' na'.

*Dxebía xi' da zren da dxedá lawe' nísadau'*

<sup>39</sup> Gate guxaní, benne' ca' dxulusá da dxedá lawe' nísadau' na' quebe belexúnbe'e xezr la xu na' da zua na le nna' naga zaj zre'e. Belelé'ene' naga dxexú'u nísadau' gachaj lálwela xezr la xu na', na' dxu'e na' naca lache'. Na' gulaca lazre' xuluxudé'e da dxedá lawe' nísadau' laduj na'.

<sup>40</sup> Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxeca'a be' da zeaj lálwela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'.

<sup>41</sup> Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lálwela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxeajéle'e xeajxruza chee nísadau' na' zran da dxedá lawe' nísadau' na'.

<sup>42</sup> Benne' dxjaque' wedil-la gulaca lazre' xelúti'e benne' zaj nadxéaj'e chee quebe xuluxuzrúnnuj'e xelezrú'e lawe' nisa na'.

<sup>43</sup> Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelúti'e benne' ca'. Na' gunná bé'ene' benne' ca' dxelaque' dxelezrú'e nisa cheajlexexrítie' lu nisa na' chee xelexezrine' lu xu bizre.

<sup>44</sup> Benne' ca' xezícala, bal-le' gulequé'e blaga', ne xebal-le' gulequé'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

## 28

### *Da ben Pablo lu xezr la xu na' nazí le na Malta*

<sup>1</sup> Ca gulá xúgute'ntu', na' gunézentu' xezr la xu na' da naxechaj nísadau' nazí le na Malta.

<sup>2</sup> Benne' zaj zre'e na' belúnle'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee xezré'entu'.

<sup>3</sup> Nadxa Pablo guqué'e tu xrunu zruze xaga, na' ca dxuzré'e na lu xi', bedxúaj tu bēla' da na' dxuzrúnnujba' lu da la na', na' gudagu xa'aba' na' Pablo.

<sup>4</sup> Gate belelé'e benne' ca' zaj zre'e lu xezr la xu na', nal-la' bēla' na' na' Pablo, na' gulé ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

<sup>5</sup> Pablo guzribe' bēla' na' lu xi', ne quebe bi gúquene'.

<sup>6</sup> Xúgute' gulebeze' chee gata' xi' na' Pablo u che'e gatie'. Ca gudé gulebeze' tu chi'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

<sup>7</sup> Gágute' naga zrantu' de xezr la xu chee benne' blau chee xezr la xu na', le' Publio. Benne' nigá guzú lu ne'e netu', ne bxúle'e netu' cháwedau' lawe' chunna zra.

<sup>8</sup> Xra Publio deze', quebe chawe' zue', na' xu'e da la, ne dxaque' xízrawe' dxen. Pablo guxíaje' xeajnné'e le', na' ca gudé bchálajlene' Dios, bze ne'e lawe' le', na' bexaque'.

<sup>9</sup> Gate belenné' da nigá, na' benne' ca' xezícadxa, benne' we' ca' zaj zre'e xezr la xu na', belezrine' lau Pablo, na' belexaque'.

<sup>10</sup> Gulápale'ē netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute da nachínnetu'.

*Pablo dxezrine' xezre Roma*

<sup>11</sup> Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' dxácatē naca beu' zaga ca'. Naca na tu da dxedá lawe' nísadau' chee xezre Alejandria, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux.

<sup>12</sup> Bzrintu' dxu'a xezre Siracusa naga begá'anantu' chunna zra.

<sup>13</sup> Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli.

<sup>14</sup> Lu xezre na' bezrágantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma.

<sup>15</sup> Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le na Xi'a Chee Apio, na' xebal-le' belezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne ben dipa lazre'.

<sup>16</sup> Gate bzrintu' Roma, benne' dxenná be'e lu wedil-la bdeē' benne' zaj nadxéaje' lu na' benne' xíchaje chee bi xra'aga ca', san be'e lataj Pablo suē' cheeze' nen tu benne' dxéaje' wedil-la, benne' guxúe' le' chee quebe xuzrúnnuje'.

*Pablo dxuchálaje' chee Jesús lu xezre Roma*

<sup>17</sup> Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale' xra xrtáudxu ca', san benne' judío ca' zaj zre'e Jerusalén buludée' neda' lu na' benne' Roma ca'.

<sup>18</sup> Gate benne' Roma zaj zre'e na' buluchēbe' neda', gulaca lazre' xulusane' neda' lawe' da quebe belezrelne' bi da bēna' da gun na xelechugue' chia' gatia'.

<sup>19</sup> Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu.

<sup>20</sup> Chee le' na' gunnéa' le'e chee le'eda' le'e, ne guchálajēna' le'e lawe' da naca ne chee da dxebeza lázredxu dxi'u, benne' Israel, zua' níga nadxéaja' xia.

<sup>21</sup> Nadxa gulé'ē le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e níga bezé'e Judea, quebe bi da calela dxenné' bēnu'.

<sup>22</sup> Dxaca lázrentu' xénentu' ca da dxéquenu' lue' lawe' da nézentu' gáteteze na' dxelenné' chee benne' ca' dxeléajle'ē dizra' cube níga.

<sup>23</sup> Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlēnē' benne' ca' ca naca xel-la' dxenná bea chee Dios che zílatēla guxrínnelete. Bēnē' ba xuzre guzējni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios.

<sup>24</sup> Bal-le' gulezí'ē xrtizra' Pablo, san xebal-le' quebe guléajle'ē.

<sup>25</sup> Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bénnea' bchalaje' waláz chee Dios, gunné':

<sup>26</sup> Guxíaj, xeajezre benne' ca':

Da li wenle le'e san quebe chéajni'ile.

Da li walé'ele, ne quebe gueque be'ele.

<sup>27</sup> Zaj naca zide' lázxdau benne' caní,

ne quebe dxelenne' chawe'.

Zaj naxezxuj xiaj lawe'

chee quebe xeelé'ene' nen xiaj lawe',

ne quebe xelénene' nen nague',

ne quebe xeléajni'ine' nen lázrdawe',

ne quebe xelexelé'e lawa' neda' chee xexuna' neda' le'.

<sup>28</sup> 'Dxal-la' nézele le'e, na'a ne da za za' xel-la' weselá chee Dios guchálajlentu' benne' quebe zaj naque' judío, na' benne' ca' xelezí'e na.

<sup>29</sup> Gate gunná Pablo da nigá, na' besiá'aca judío ca', dxuluchébele'e ljwezre'.

<sup>30</sup> Pablo guzúe' chupa iza lu xu'u da dxízruje', ne dxezí' lu ne'e xúgute' benne' dxedajlenné'e le'.

<sup>31</sup> Du lazre' bchálaje' ca naca xel-la' dxenná bea chee Dios, ne bsédené' ca naca chee Xránadxu Jesucristo, na' netú quebe nu blale' le'.

## DA BZUAJ SAN PABLO CHEE BI CHEE CRISTO ZAJ ZRABE' XEZRÉ ROMA

*Pablo dxugapę' diuzre bi cheę Cristo zaj zrabe' Roma*

<sup>1</sup> Neda', Pablo, naca' węn zrin cheę Jesucristo. Dios bláwizre' neda' cheę gaca' gubáz cheę', ne guquęę neda' cheę guzenda' bęnneache dizra' chawe' cheę'.

<sup>2</sup> Dios guchebe lazre' sel-le' dizra' chawe' nigá gate nate lu dizra' lá'azxa cheę' lu na' benne' ca' buluchálaje' waláz cheę'.

<sup>3</sup> Dizra' chawe' nigá dxulé'e na ca naca cheę Xránadxu Jesucristo, Zri'ine Dios. Lu bęla' dxen cheę' naquę' zri'ine zre sua wenná bea David.

<sup>4</sup> Lu be' nácaqueze' da naca na lá'azxa, naquę' Zri'ine Dios. Dios blé'eng' naca caní gate bsebane' Le' ládujla benne' gate ne cheę xel-la waca cheę'.

<sup>5</sup> Ne cheę Zrí'ing' Dios nunne' netu' lataj nácantu' gubáz cheę' cheę xelezrá' benne' ládujla xúgutę cue' xęzr la xu, benne' xelejli lazre' Cristo, ne xuluzú' dizra' cheę' cheę gaca ba La Le'.

<sup>6</sup> Ládujla benne' caní zrale le'e cheę gácale bi cheę Jesucristo.

<sup>7</sup> Dxuzúaja' cheę xúgutęle le'e dxéajlele cheę Cristo, zrale xęzre Roma. Dios nazrí'ing' le'e, ne bláwizre' le'e cheę gácale bi cheęqueze'. Dxenaba' Xradxu Dios, ne Xránadxu Jesucristo gunę' chawe' cheęle, ne gunne' le'e xel-la dxebeza zri lazre'.

*Pablo dxaca lazre' chęaje' xęzre Roma*

<sup>8</sup> Da naca blaudxa, ne cheę Jesucristo dxapa' Dios chia' xcalene' ca naca cheę xúgutęle lawe' da dxezralaj ca dxeajli lázrele Cristo du gabí'i xęzr la xu.

<sup>9</sup> Dutę lázrdawa' dxuna' zrin cheę Dios, dxuzenda' bęnneache dizra' chawe' cheę Zrí'ine'. Le' nézquezne' dxeajsá lázrqueza' le'e gate dxuchálajlena' Le'.

<sup>10</sup> Dxata' xúeda' Dios, che naca da dxaca lazre' Le', cheę ájala gunne' neda' lataj xedajnná'a le'e

<sup>11</sup> lawe' da dxaca lazra' le'eda' le'e ne gunna' le'e lataj si'le da naca cheę Be' Lá'azxa, cheę se cháchadxale.

<sup>12</sup> Caní gutipa lázredxu tudxu xetudxu lu xel-la dxeajli lazre' cheędxu.

<sup>13</sup> Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácatę ca' dxeuasa na. Dxaca lázrele'a xida' cheę guna' zrin gusédeda' da naca cheę Cristo ládujla le'e, cáteze ba bęna' ládujla xezícadxa bęnneache zaj zre'ę lu xęzr la xu nigá.

<sup>14</sup> Nabaga' guna' zrin caní ládujla xúgutę bęnneache, che zaj naquę' benne' blau u ca zaj naquę', u che zaj naquę' benne' zaj naxéajni' u ca zaj naquę'.

<sup>15</sup> Cheę le' na', neda' ba zúaqueza' guzenda' le'e zrale xęzre Roma dizra' chawe' cheę Cristo.

*Xel-la waca cheę dizra' chawe' cheę Cristo*

<sup>16</sup> Quebe dxedu'eda' cheę dizra' chawe' cheę Cristo lawe' da napa na xel-la waca cheę Dios cheę guselá na xúgutę benne' dxeajli lazre' le' na, nédxula benne' judío ca', san cá'aqueze benne' quebe zaj naquę' judío.

<sup>17</sup> Dizra' chawe' nigá dxulé'e na dxi'u nagá'anadxu chawe' lau Dios che dxeajli lázredxu le' na, cheę cheajli lázredxu Le' ca naxúaj na lu dizra' lá'azxa, da

dxenná na: Benne' nagá'ane' chawe' lau Dios gata' chee' xel-la nabán li lazre' che dxeajlí lazre' Le'.

*Dul-la da zaj nabaga bènneache*

<sup>18</sup> Ba ble'e Dios lu xabáa chee' ca gunē', gudéē' xel-la zi' xúgute benne' dxuluzúē' chalá'ala Dios, ne benne' wēn da caleļa, benne' dxuluzague' da li ne chee' da caleļa da dxelunē'.

<sup>19</sup> Zaj nézquezne' ca gaca xelúnbea bènneache da naca chee' Dios lawe' da Léqueze Dios na' bache blé'ene' na zaca ba lau.

<sup>20</sup> Da quebe gaca lé'edxu chee' Dios gaca gúnbeadxu na ne chee' da ca' da ben Dios. Gate bente' xēzr la xu dxunna bea na nácaqueze Dios, ne nápaqueze' xel-la waca. Chee' le' na' quebe bi de xuludé'ene'.

<sup>21</sup> Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé' lazre' da níteze, na' gulechul-la xichaj lázrdawe' lawe' da zaj naque' benne' zide'.

<sup>22</sup> Lácala dxeléquene' zaj naxéajni'ine', da li zaj naque' benne' xala,

<sup>23</sup> lawe' da buluzúē' chalá'ala Dios xabáa, Bènnea' quebe dxedé' chee', ne dxelúe' lá'ane' bedáu' xiaj xaga zaj naca na lu'a bènneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ní'a na'ba'.

<sup>24</sup> Chee' le' na' Dios ba guleaj xíchaje' benne' ca' chee' xelunē' xúgute da sban da dxelezá lazre', na' bulucá'ana ditaj cuine' tue' xetue',

<sup>25</sup> lawe' da buluzúē' chalá'ala xel-la li chee' Dios, na' gulezí' lu ne'e da wēn lazre', ne belúe' lá'ane', ne belecá'ana szrene' da ca' nun Dios, ne quegá Diosqueze, Bènnea' dxal-la' güe' lá'anaquezdxu. ¡Ca'an gaca na!

<sup>26</sup> Chee' le' na' Dios ba guleaj xíchaje' benne' ca' chee' xelunē' da dxelezá lazre' da ca' xedué'edxu. Cá'anqueze nu'ula buluzúē' chalá'ala xel-la zúale benne' chee', ne dxelunē' da quebe zaj naca chee' xelunē'.

<sup>27</sup> Cá'anqueze belún benne' biu, buluzúē' chalá'ala xel-la zúale zru'ule', ne dxelunē' da sban da dxelezá lazre' tue' xetue', ne dxelunē' da ca' xedué'edxu tue' xetue', na' dxeledéē' xel-la zī' lu bel-la' dxen chee' ne chee' da sban da dxelunē'.

<sup>28</sup> Lawe' da québedxa gulaca lazre' xelexúnbe'e Dios, Le' guleaj xíchaje' benne' ca' chee' xuludé' lazre' da caleļa, ne chee' xelunē' da quebe dxal-la' xelunē'.

<sup>29</sup> Dxelunē' xúgute da caleļa.

Dxulucá'ana ditje' bènneache.

Dxelunē' da quebe naca xrlátaje.

Zaj naque' benne' wecude'.

Dxelunē' da zrinnaj.

Zaj naque' benne' xa lazre'.

Dxelutiē' benne'.

Dxelílaje' da ba xa'.

Dxelezí' xē'e.

Dxeledanne' da xálaze.

Dxuluchálaje' dizra' bizruj.

<sup>30</sup> Dxeleonné' schanni' chee' ljwezre'.

Dxelecuídenē' Dios.

Zaj naque' benne' wenné' wal-la.

Dxulucá'ana szren cuine'.

Zaj naque' benne' wezé' cua.

Dxelalaj lazre' bícala da sban.

Quebe dxuluzúe' dizra' chee xra xrne'e.

<sup>31</sup> Zaj naque' benne' lázrdau zide'.

Dxulunitie' xrtizre'.

Quebe zaj naque' zri'i lazre'.

Quebe dxulunité lawe' chee ljwezre'.

Quebe dxelexache lazre' chee ljwezre'.

<sup>32</sup> Zaj nézene' Dios guzria xi'e bénneache,

na' benne' dxelune' da caní dxal-la' xelátie'.

Benne' caní tu dxelúnzqueze' na,

ne dxelexezaca ba lazre' nen benne' dxelune' da caníqueze.

## 2

### *Dios dxuchi'e chee bénneache cáteze da zaj nune'*

<sup>1</sup> Chee le na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'.

<sup>2</sup> Nézquezdxu dxuchi'a Dios cáteze da naca na gate dxenne' zaj nabaga zria benne' ca' dxelún da caní.

<sup>3</sup> ¿Dxéquenu' lue' wadé gun ca'aze chiu' gate Dios nne' zaj nabaga zria bénneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'?

<sup>4</sup> ¿Dxuzú' chalá'ala xel-la zri'i lazre', ne xel-la zren lazre' zren chee Dios, ne quebe nézenu' lu xel-la zri'i lazre' chee' dxunne' lue' lataj xebi'i lazru'?

<sup>5</sup> Nacu' lázrdau zide', ne quebe dxexebi'i lazru'. Chee le na' dxuzanu' da si sacu' lu zra na' gate Dios nne' zaj nabaga zria benne' ca' dxelune' da caléla. Naca xrlátaje guné' da caní.

<sup>6</sup> Lu zra na' gunne' ca da dxal-la' si' tu tudxu cáteze naca da bendxu.

<sup>7</sup> Xel-la nabán zeajlí canna gunna Le' xúgute benne' dxelaca lazre' xezezí'e lu na' Dios da xabáa, ne xel-la ba lá'ana, ne da zaj naca na da chadía chacanna ne chee da chawe' da tu dxelúnzqueze'.

<sup>8</sup> Lu xel-la dxezrá'a chee' nne' zaj nabaga zria xúgute benne' zre'e lazre' ca', benne' quebe dxuluzúe' dizra' da li, san dxuluzúe' dizra' da wen lazre'.

<sup>9</sup> Gusaca zi'e, ne gudé' lu da ba xa' xúgute benne' dxelune' da caléla. Ga su lau guné' caní chee benne' judío ca', ne cá'anqueze guné' chee benne' quebe zaj naque' judío.

<sup>10</sup> Da xabáa, ne da ba lá'ana, ne xel-la dxebeza zri lazre' gunne' xúgute benne' dxelune' da chawe'. Ga su lau guné' caní chee benne' judío ca', ne cá'anqueze guné' chee benne' quebe zaj naque' judío.

<sup>11</sup> Dios tuze ca dxuchi'e da dxelún xúgute bénneache,

<sup>12</sup> na' benne' dxelune' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxelune' dul-la lácala zaj núnbe'e da bdxixruj be'e Moisés welebía xi'e ne chee da nadxixruj bea na na'.

<sup>13</sup> Quebe zaj nagá'ana chawe' lau Dios benne' dxelénzene' da nadxixruj bea na, san zaj nagá'ana chawe' lau Dios benne' dxuluzúe' dizra' da nadxixruj bea na.

<sup>14</sup> Benne' zitu' ca', benne' quebe zaj núnbe'e da bdxixruj be'e Moisés, gate dxelune' ca dxenná da nadxixruj bea na na', lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xichaj lázrdawe'.



<sup>15</sup> Caní naquen lawe' da ca dxelunę' dxulé'e na zua xichaj lázrdawę' ca naca da nadxixruj bea na, na' naca na ca naca da bdxixruj be'e Moisés. Xichaj lázrdawę' dxunna bea na cheę da nigá, na' da dxelegú'u lazre' guzría xi na le', u xecá'a na le'

<sup>16</sup> lu zra na' gate Dios guchi'e xúgute da nagache' cheę xúgute bėnneache lu na' Jesucristo cáteze dxenná dizra' chawe' na' da dxuzenda' bėnneache.

### *Ca naca cheę benne' judío ca' ne da bdxixruj be'e Moisés*

<sup>17</sup> Dxennáu' nacu' judío, ne dxennėłenu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'.

<sup>18</sup> Nézenu' da dxaca lazre' Dios, na' da gunná bé'eng' dxulé'e na lue' gunu' da nácadxa chawe'.

<sup>19</sup> Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne gusení'u benne' zaj zra' lu da chul-la.

<sup>20</sup> Dxėquenu' waca guzėajni'inu' benne' quebe zaj naxėajni'e, ne gusėdenu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u cheę gúnbeadxu da li.

<sup>21</sup> Lue' dxusėdenu' benne' xula. ¿Bizr cheę na' quebe dxusėde cuinu'? Lue' dxuzennu' benne' quebe dxal-la' cuandxu. ¿Bizr cheę na' dxebanu' lue'?

<sup>22</sup> Lue' dxennáu' quebe dxal-la' súałėdxu zru'ula benne' xula. ¿Bizr cheę na' dxunu' lue' ca'? Lue' dxecuidenu' bedáu' xiaj xaga. ¿Bizr cheę na' dxebanu' lue' da gunní'a da de lu xudau' ca' cheę bedáu' xiaj xaga ca'?

<sup>23</sup> Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na.

<sup>24</sup> Naxúaj lu dizra' lá'azxa da dxenná na: Benne' quebe zaj naque' judío dxelennė' schanni' cheę Dios ne cheę da caleła da dxunle le'e.

<sup>25</sup> Da li da nadxugu lu bėła' chiu' da dxulé'e na nacu' bi cheę Dios, naca na tu da chawe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu bėła' cheę da na' dxulé'e na.

<sup>26</sup> Che benne' quebe nadxugu lu bėła' cheę' dxunę' ca nadxixruj bea na, naque' ca tu benne' nadxúguqueze lu bėła' cheę' da na', lácala quebe naca caní cheę'.

<sup>27</sup> Benne' quebe nadxugu lu bėła' cheę' da na' dxulé'e na, san dxunę' da nadxixruj bea na, da na' dxunę' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu bėła' chiu' da na'.

<sup>28</sup> Quebe naca xanne' judío bėnnea' naque' caní cúzreze, ne quebe naca xanne' da nadxugu na lu bėła' cheę benne' da naca na cúzreze, lu bėła'ze.

<sup>29</sup> Benne' naca xánnie' judío naque' bėnnea' naque' judío lu xichaj lázrdawę', ne da naca xanne' da nadxugu lu bėła' cheę benne' naca na da zua na lázrdawę'. Quebe nácaqueze na nen dízra'ze san naca na cheę be' cheę'. Benne' caní dxelezi'e xel-la ba lá'ana, quegá cheę bėnneache, san cheę Dios.

## 3

<sup>1</sup> ¿Bizra da ba neza naca na cheę benne' lawe' da nadxugu lu bėła' cheę' da na' dxulé'e na?

<sup>2</sup> Nácale'e na, ne zánete ca naca na. Da nédxute, Dios bdeę' dizra' cheę' lu na' benne' judío ca'.

<sup>3</sup> ¿Bizra xca'? Che bal-la benne' judío ca' quebe zaj naque' li lazre', ¿nnadxu chee da na' quebe naca Dios li lazre'?

<sup>4</sup> ¡Cabata! Dios dxúnqueze' ca naca da li lácala xúgute bénneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné': Nacu' xrlátaje ca da dxennáu', na' wegá'anaquezu' xrlátaje gate xuluchi'e ca da dxunu'.

<sup>5</sup> Che da calela da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bénneache.) ¿Naca Dios benne' quebe naca xrlátaje lawe' da dxudé' dxi'u xel-la zi'?

<sup>6</sup> ¡Cabata! Chela naca Dios Benne' quebe dxun da xrlátaje, ¿ájazra gun'e guchi'e ca da dxelún bénneache?

<sup>7</sup> Che da wen lazre' da dxuna' gun na chee xegá'ana zrendxa da li da dxun Dios, ¿bizr chee na' dxuchi'e chia' neda', dxenné' naca' benne' dul-la?

<sup>8</sup> Che naca na caní, ¿bizr chee na' quebe gundxu da calela chee gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da calela, ne dxelenné' schanni' cheedxu. Xrlátaje naca Dios nne' zaj nabaga zria benne' caní.

#### *Xúgutedxu nabágdaxu dul-la*

<sup>9</sup> ¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'aqueze xezícadxa benne' ca'.

<sup>10</sup> Naxúaj lu xiche lá'azxa da dxenná na: Quebe nu chilá' benne' xrlátaje, netú gue'.

<sup>11</sup> Quebe nu chilá' benne' dxéajni'ing'.

Quebe nu chilá' benne' dxexilaje' Dios.

<sup>12</sup> Xúgute' dxeledé' calela. Xúgute' zaj nanítie'.

Quebe nu chilá' benne' dxune' da xrlátaje, netú gue'.

<sup>13</sup> Da dxelenné'queze' naca na ca tu da sgute, ca tu ba da naxálaje.

Nen luzre' ca' dxelezí xe'e.

Xrtizre' zaj naca na ca nisa snia chee bela' da dxe na zran láxzaba'.

<sup>14</sup> Tu dxelenné'zqueze' dizra' schanni', ne dizra' zi'.

<sup>15</sup> Chadité dxelútie' bénneache.

<sup>16</sup> Gáteteze dxeledé' dxuluzría xi'e, ne dxulusaca zi'e.

<sup>17</sup> Quebe zaj nézene' ájala xelebeza zri lazre'.

<sup>18</sup> Quebe dxelezrebe' Dios.

<sup>19</sup> Nezdxu xúgute' ca da dxenná da nadxixruij bea gula na' da bzuaj Moisés, dxé na benne' ca' zaj xu'e lu na' da nadxixruij bea na na', chee xelezúa zri xúgute', ne chee xelxúnbea xúgute' bénneache zaj nabague' zria lau Dios.

<sup>20</sup> Netú benne' quebe xegá'ang' xrlátaje lau Dios lawe' da nunge' da dxenná bea da nadxixruij bea na, lawe' da dxulé'eze da nadxixruij bea na dxi'u nácadxu benne' dul-la.

#### *Xelélé bénneache che xeléajle'e chee Cristo*

<sup>21</sup> Na'a, dxunna bea na ca gaca xegá'anadxu xrlátaje lau Dios, da quebe naca na ne chee da nadxixruij bea na, lácala lu da nadxixruij bea na, ne lu da buluzúaj benne' ca' gulenné' waláz chee Dios dxuluchalaj na ca naca chee da nigá.

<sup>22</sup> Nagá'anadxu xrlátaje lau Dios caní che dxeajli lázredxu Jesucristo, ne cá'aqueze gaca chee xúgute' bénneache xeleajli lazre' Le'. Tuz ca naca chee bénneache

<sup>23</sup>lawe' da zaj nun xúgute bénneache dul-la, ne quebe zaj naca chee' xelexú'e lu xabáa chee Dios.

<sup>24</sup>Lu da chawe' chee Dios, cá'aze nune' chee xegá'anadxu xrlátaje lau Le' lawe' da bexa'u Jesucristo dxi'u lu dul-la da nabágadxu.

<sup>25</sup>Dios bzue' Jesucristo gutie' ne chee xtúl-ladxu chee xegá'anadxu xrlátaje lau Le' che dxeajlí lázredxu da ben Le'. Da nigá guca na chee ble'e Dios naque' xrlátaje lácala lu xel-la zren lazre' chee' bdee' cá'aze ca naca dul-la da bendxu nédxute.

<sup>26</sup>Gúcaqueze da nigá chee gulé'e lawe' naca Dios xrlátaje na'a, ne gácaqueze' xrlátaje gate gucá'ané' xrlátaje benne' ca' dxelejli lazre' Jesús.

<sup>27</sup>Na'a, ¿waca gucá'ana szren cuínadxu? ¡Cabata! ¿Bizr chee na'? Naca na lawe' da nagá'anadxu xrlátaje, quegá lawe' da bendxu ca nadxixruj bea na, san lawe' da guxeajli lázredxu Cristo.

<sup>28</sup>Ca'an naca, dxunna bea na nagá'ana xrlátaje tu benne' lau Dios lawe' da dxeajli lazre' Cristo, ne quegá lawe' da nune' ca da nadxixruj bea na.

<sup>29</sup>¿Naca Dios cheeze benne' judío ca'? ¿Quegá nácaqueze' Dios chee benne' ca' quebe zaj naque' judío? Da li nácaqueze' Dios chee benne' ca'

<sup>30</sup>lawe' da zua tuze Dios, na' Le' gucá'ané' xrlátaje benne' ca' zaj nadxugu lu belá' chee' da na' dxunna bea na che dxelejli lazre' Cristo, ne cá'anqueze gucá'ané' xrlátaje benne' ca' quebe zaj nadxugu lu belá' chee' da na', che dxelejli lazre' Cristo.

<sup>31</sup>Na'a che dxucá'ana Dios xrlátaje benne' dxelejli lázreze', ¿naca da nadxixruj bea na tu da québedxa zaca? ¡Cabata! Che dxéajledxu chee Cristo dxúnquezdxu ca dxenná da nadxixruj bea na.

## 4

### *Da dxulé'e da guca chee Abraham*

<sup>1</sup>¿Bízraqueze nnadxu chee da ba neza da guca na chee xra xrtáudxu Abraham?

<sup>2</sup>Che Abraham bega'ané' xrlátaje lau Dios ne chee tu da bene', waca gucá'ana szren cuine' san quegá lau Dios.

<sup>3</sup>¿Bízraqueze naxúaj na lu dízra' lá'azxa? Dxenná na: Abraham guxeajli lazre' Dios, na' Dios guz' lu ne'e le' ca tu benne' xrlátaje.

<sup>4</sup>Che nu benne' dxuné' zrin, lazruj da si'e quebe naca na tu da dxunézrujedxu, san naca na tu da nabágaquezdxu chee'.

<sup>5</sup>Che nu benne' quebe bi nune', san dxeajli lázreze' Dios, Bénnea' dxucá'ané' xrlátaje benne' dul-la, nacan lawe' da dxezí' lu na' Dios xel-la dxeajli lazre' chee' chee xuca'ané' le' xrlátaje.

<sup>6</sup>Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee xegá'ané' xrlátaje.

<sup>7</sup>Gunná David:

Ba neza zrente naca na chee benne' ca' ba bunité lau Dios chee' da zrinna' da zaj nune', ne gudé'e cá'aze dul-la da belún benne' ca'.

<sup>8</sup>Ba neza zrente naca na chee benne' ca' quebe dxusebaga Xránadxu le' dul-la da belune'.

<sup>9</sup>¿Naca ba neza nigá cheeze benne' ca' zaj nadxugu lu belá' chee' da na' dxulé'e na, u che nácaqueze na chee benne' ca' quebe zaj nadxugu lu belá'

chee' da na'? Bache blé'entu' bca'ana Dios Abraham xrlátaje lawe' da guxeajlí lazre' Le'.

<sup>10</sup> ¿Bátazra bca'ane' le' xrlátaje? ¿Guca na ca gudé gudxugu lu bela' chee Abraham da na' dxulé'e na, u che nédxula? Quebe guca na ca gudé na', san nédxula guca na.

<sup>11</sup> Gudxugu da na' lu bela' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu bela' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu bela' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'.

<sup>12</sup> Da li naca Abraham xra benne' ca' zaj nadxugu da na' lu bela' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu bela' chee' da na'.

### *Dxezidxu da guchebe lazre' Dios che dxeajlí lázredxu Cristo*

<sup>13</sup> Dios guchebe lazre' chee Abraham, ne chee zri'ine zre sue' gaca chee benne' ca' xezr la xu nigá. Quebe guchebe lazre' na chee' lawe' da nunge' ca dxenná bea da nadxixruj bea na, san lawe' da bega'ane' xrlátaje lau Dios gate guxeajlí lazre' Le'.

<sup>14</sup> Che xezr la xu nigá gaca na tuze chee benne' ca' dxelune' ca da dxenná bea da nadxixruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios.

<sup>15</sup> Lu da nadxixruj bea na xelebía xi' bénneache, san naga quebe ne zrin da nadxixruj bea na, quebe bi zaj nabaga bénneache chee da nadxixruj bea na na'.

<sup>16</sup> Ca' naca na, dxezí' lu nnadxu da guchebe lazre' Dios ne chee xel-la dxeajlí lazre' cheedxu Le', chee gaca na tu da sidxu cá'aze, ne chee gaca na tu da súatequeze chee xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxixruj bea na, san cá'anqueze naca na chee benne' ca' dxeleajlí lazre' Dios ca ben Abraham. Ca' naca na, le' naque' xra xúgutēdxu

<sup>17</sup> lau Dios, Bénnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bénneache zánete cue' xezr la xu.

Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

<sup>18</sup> Abraham guxeajlí lazre' Dios, ne guleza lazre' si'e da guchebe lazre' Dios, lácala ba gudé chee si'e da dxebeza lazre'. Ca'an guca, guque' xra bénneache zánete cue' xezr la xu cáteze ba guzre Dios le', gunné: "Canite chan zri'ine zre su'."

<sup>19</sup> Abraham ba zué' ca tu gaxúa iza, san quebe gute ni'a ne'e lu xel-la dxeajlí lazre' chee' gate xeaxsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre.

<sup>20</sup> Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajlí lazre', ne bxren lázredxe'. Bca'ana szrene' Dios,

<sup>21</sup> ne bentequeze' neza napa Dios xel-la waca guné' xúgute ca da guchebe lazre'.

<sup>22</sup> Chee le' na' Dios guzí' lu ne'e xel-la dxeajlí lazre' chee' chee bca'ane' le' xrlátaje.

<sup>23</sup> Gate dxenná na: "Dios guzí' lu ne'e xel-la dxeajlí lazre' chee'", quebe guxuaj na chee tuze Abraham

<sup>24</sup> san cá'anqueze cheedxu dxi'u lawe' da si' lu na' Dios xel-la dxeajlí lazre' cheedxu che dxeajlí lázredxu Bénnea' bsebanę' Xránadxu Jesucristo ládujla benne' gate,

<sup>25</sup> na' naca Jesús Bénnea' bde Dios Le' cheę gutię' ne cheę dul-la da nabágadxu dxi'u, ne bsebanę' Le' cheę xegá'anadxu xrlátaje lau Dios.

## 5

### *Da naca cheedxu lawe' da nagá'anadxu xrlátaje lau Dios*

<sup>1</sup> Che nagá'anadxu xrlátaje lau Dios lawe' da dxeajlí lázredxu Cristo zúadxu xrlátaje nen Dios ne cheę Xránadxu Jesucristo.

<sup>2</sup> Cá'anqueze lawe' da dxeajlí lázredxu Cristo, ne cheę Le' dxezidxu da xrlátaje cheę Dios da tu dxeajlęzquezdxu, ne dxebéłęđdxu lawe' da dxebeza lázredxu sidxu da xabáa cheę Dios.

<sup>3</sup> Quegaze da nigá, san cá'anqueze dxebéłęđdxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre',

<sup>4</sup> na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu.

<sup>5</sup> Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' cheę ne cheę Be' Lá'azxa, Bénnea' ba nunna Dios dxi'u.

<sup>6</sup> Gate na' quebe guzéquedxu guselá cuínadxu, lu zra blé'eqeze Dios, gute Cristo waláz cheę benne' węn da zrinnaj cá'.

<sup>7</sup> Stébełęę naca che nu benne' gatię' waláz cheę tu benne' xrlátaje, lácala wexázrelja tu benne' gatię' waláz cheę tu benne' naque' dutę' li lazre'.

<sup>8</sup> Dios dxulé'ene' dxi'u ca nazri'ile'ene' dxi'u lawe' da gute Cristo waláz cheędxu gate ne nácadxu benne' dul-la.

<sup>9</sup> Na'a nagá'anadxu xrlátaje lau Dios lawe' da gute Cristo waláz cheędxu, ne ba nácaqueze cheędxu ladxu ne cheę Le' lu da zi' da xa', da za za' lu zra ni'.

<sup>10</sup> Gate na' ne dxecuđedxu Dios, Le' bexunę' dxi'u tuze nen Le' lawe' da gute Cristo waláz cheędxu, na' na'a lawe' da nácadxu tuze nen Dios ba nácaqueze cheędxu ladxu ne cheę xel-la nabán cheę Cristo da zúalę na dxi'u.

<sup>11</sup> Quegá tuze da nigá, san cá'anqueze dxebéłęđdxu lu da naca cheę Dios ne cheę Xránadxu Jesucristo, ne ne cheę Le' nácadxu tuze nen Dios.

### *Da nun Adán, na' da nun Cristo*

<sup>12</sup> Ca guca, guxú'u dul-la lu xęzr la xu nigá ne cheę da bęn tuze benne', na' bla' xel-la gute ne cheę dul-la, ca'an guca gulú'u bęnneache lu na' xel-la gute lawe' da zaj nun xúgute' dul-la.

<sup>13</sup> Nédxula ca bla' da nadxixruj bea na, ba zaj nun bęnneache dul-la lu xęzr la xu nigá, lácala quebe dxusebaga Dios bęnneache dul-la gate quebe ne zrin da nadxixruj bea na.

<sup>14</sup> Ca guzú lau lu zra zua Adán ca bzrin zra zua Moisés, gulú'u bęnneache lu na' xel-la gute, benne' ca' zaj nune' dul-la, lácala quebe belunę' dul-la ca da bęn Adán, bęnnea' gudichję' da gunná be'e Dios, na' Adán na' naque' tu da dxulé'eze na ca naca Bénnea' dxal-la' xide', Le' Cristo.

<sup>15</sup> Da zrinnaj da bęn Adán quebe gaca díł-lálebe na ca da dxunna Dios dxi'u. Ne cheę da zrinnaj da bęn tuze benne', gulate benne' zante, san xel-la weselá da nunna Dios dxi'u cá'aze ne cheę xetuze benne', Jesucristo, naca na da zréndxaqueze, ne naca na da ba neza cheę benne' zante.

16 Da zrinnaj na' da ben tuze benne' quebe gaca dí-lalębe na ca da dxunna Dios dxi'u lawe' da ne cheę tuze da zrinnaj, zaj nabaga zria bęnneache, san da dxunna Dios dxi'u naca na cheę xelexegá'ana xrlátaje benne' zantę benne' zaj nune' da zrinnaj.

17 Ne cheę da zrinnaj da ben tuze benne' gulú'u bęnneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxelezęquene' xelenná be'e cuine' lu xel-la nabán cheę' ne cheę da nun xetuze benne', Jesucristo.

18 Ca guca zaj nabaga zria xúgute bęnneache ne cheę da zrinnaj da ben tuze benne', Adán, cá'anqueze ne cheę da xrlátaje da ben xetuze benne', Jesucristo, belexexaca bęnneache xrlátaje cheę xelaca banę'.

19 Ca guca belexexaca bęnneache zantę benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zantę xrlátaje lau Dios.

20 Bzua Dios da nadxixuj bea na cheę gunná bęadxa na da naca dul-la, na' gate dul-la guxánę'e na, ca' guzrendxa xel-la zri'i lazre' cheę Dios.

21 Ca naca zua lu na' dul-la gute na bęnneache, cá'anqueze zua lu na' xel-la zri'i lazre' cheę Dios gucá'ana na dxi'u xrlátaje lau Dios cheę gaca bandxu chadía chacanna ne cheę Xránadxu Jesucristo.

## 6

*Nácadxu ca benne' gate ca' cheę québedxa gundxu dul-la, na' naca bandxu nen Cristo*

1 ¿Bízraqueze nnadxu? ¿Gúndxadxu dul-la cheę gulé'e láwedxa xel-la zri'i lazre' cheę Dios?

2 ¡Cabata! Ba nácadxu ca benne' gate cheę québedxa gundxu dul-la. ¿Ájazra gúndxadxu dul-la?

3 ¿Quebe nézele le'e, xúgutedxu dxi'u ba nadxúadxu nisa cheę gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa?

4 Ca' naca na, ne cheę da nadxúadxu nisa naca ca bgáchedxu tu zren nen Le', ne nátedxu cheę xebandxu, ne súadxu tu lu xel-la nabán cube cáteze guca cheę Cristo, bebane' ládujla benne' gate ne cheę xel-la waca xabáa cheę Xre'.

5 Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán cheę'.

6 NezdXu da gúcadxu gate nate ba gudá na le'e xaga bęguaj tu zren nen Le' cheę cuía xi' benne' dul-la da gúcadxu cheę québedxa gundxu zrin cheę dul-la ca benne' zaj nada'u cheen.

7 Tu benne' ba nate, ba bedxúaje' lu na' dul-la.

8 Che ba gútedxu tu zren nen Cristo, dxuxrén lázredxu gaca bánquezdxu tu zren nen Le'

9 lawe' da nezdXu quebe gate Cristo da xula lawe' da ba bebane' ládujla benne' gate, na' québedxa xu'e lu na' xel-la gute.

10 Gate gute Cristo, tu lásaze gutię' ne cheę dul-la waláz cheę xúgute bęnneache, san na'a naca banę', na' lu na' Dios naca banę'.

11 Cá'anqueze le'e, le gueque nácale benne' gate cheę québedxa gunle dul-la, san naca banle lu na' Dios tu zren nen Xránadxu Jesucristo.

12 Cheę le' na' québedxa güele lataj nna be'e dul-la bela' dxen cheęle da dxal-la' gate, cheę québedxa gun na gunle da dxezá lazre' bela' dxen cheęle.

<sup>13</sup> Quebe guzúa cuínale lu na' dul-la chee guchine na le'e lu da caléla, san le guzúa cuínale lu na' Dios, gácale ca benne' belexebán ládujla benne' gate, chee guchínene' le'e lu da xrlátaje.

<sup>14</sup> Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' chee Dios.

*Tu da dxulé'e na ca naca chee benne' zaj nada'u*

<sup>15</sup> ¿Bizra xca'? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' chee Dios? ¡Cabata'!

<sup>16</sup> Ba nézquezle che guzúa cuínale lu na' tu xránale ca benne' zaj nada'u chee guzúale dizra' chee', nadxa nácale benne' zaj nada'u chee xránale, ne dxun na ba xen guzúale dizra' chee'. Cá'anqueze naca chee le'e che guzúale dizra' chee dul-la, da gunna na le'e xel-la gute, u che guzúale dizra' chee Dios, chee gácale xrlátaje.

<sup>17</sup> Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' chee dizra' li na', lu da na' bzua cuínale.

<sup>18</sup> Gate bedxúajle le'e lu na' dul-la, bexácale wen zrin chee da xrlátaje.

<sup>19</sup> (Dxuchálajlena' le'e ca dxuluchalaj bénneache lawe' da lu belá' dxen chee quebe gaca chéajni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinnaj chee gunle da zrinnaj, cá'anqueze le gun na'a, le guzúa cuínale lu na' da xrlátaje chee gácaquezle bi chee Dios.

<sup>20</sup> Gate ne nácale ca benne' zaj nada'u lu na' dul-la, quebe ben na ba xen gunle da xrlátaje.

<sup>21</sup> Na'a ¿bizra da ba neza guca chee da ca' dxexedué'ele chee na'a? Da ca' benle nédxutę guché na le'e lu xel-la gute.

<sup>22</sup> Na'a nadxúajle lu na' dul-la, ne ba nácale wen zrin chee Dios chee gácaquezle bi chee Dios da naché na le'e lu xel-la nabán da zeajlí canna.

<sup>23</sup> Benne' dxune' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xránadxu Jesucristo.

## 7

*Tu da dxulé'e na ca naca chee xel-la wechaga na'*

<sup>1</sup> Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bénneache tuze dxácatę ne zaj naca banę'.

<sup>2</sup> Ca naca da nigá, tu nu'ula nuchaga na' xu'e lu na' benne' chee' ne chee da nadxixruj bea na dxácatę zue' nabane', san che gate benne' chee', na' xedxúaj zru'ule' lu na' da nadxixruj bea na na'.

<sup>3</sup> Ca' naca na, che nu'ula na' súalene' benne' xula dxácatę ne nabán benne' chee', gunę' dul-la gáchajne' xrba chee xel-la nuchaga na', san che benne' chee' na' gatie', xedxúaj zru'ule' lu na' da nadxixruj bea na na', na' waca xuchaga ná'lene' benne' xula, ne quebe gunę' dul-la da gáchajne' xrba chee xel-la nuchaga na'.

<sup>4</sup> Cá'anqueze naca chee le'e, bi bícha'dau', le'e zrágale bel-la' dxen chee Cristo, ba nácale ca benne' gate, ne québedxa xu'ule lu na' da bdxixruj be'e Moisés, chee gácale ca zru'ula benne' xula. Na'a nácale ca zru'ula Cristo, Bénnea' bebane' ládujla benne' gate, chee gácadxu bi guchine Dios.

<sup>5</sup> Dxácatę na' bęndxu da naca chee belá' dxen cheedxu, da nadxixruj bea na ble'e na dxi'u naca dul-la da bęndxu ca da dxezá lazre' belá' dxen cheedxu, na' da na' guché na dxi'u lu xel-la gute.

6 Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee gaca gundxu zrin chee Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

*Dul-la da zúale neda'*

7 ¿Bizra nnadxu xca'? ¿Dxun da nadxixruj bea na nácadxu benne' dul-la? ¡Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxixruj bea na: Quebe sa lazru' da naca chee nu benne'.

8 Ble'e da nadxixruj bea na neda' da naca dul-la, na' guque be'eda' zúale'e zánete da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'.

9 Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bénbe'a da naca dul-la, na' guque be'eda' nabaga' zria, ne dxal-la' gatia'.

10 Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da bête neda'

11 lawe' da ble'e da nadxixruj bea na' neda' da naca na dul-la, da na' guzú xe na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

12 Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'.

13 ¿Ajazra naca da nigá? ¿Bête da nadxixruj bea xrlátaje na' neda'? ¡Cabata! Dul-la na' bête na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

14 NezdXu da nadxixruj bea na naca na da benna Be' Lá'azxa chee Dios dxi'u, san lu beła' dxen chia' naca' ca tu benne' nada'u, na' da naca' dxun na guna' dul-la.

15 Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuñeda' naca na da dxuna'.

16 Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na.

17 Ca' naca na, quegá neda' dxuna' da na', san dul-la da zúale neda', le na' dxun na ca'.

18 Nezda' quebe bi zúale beła' dxen chia' da naca xrlátaje, lawe' da dxezáz lazra' guna' da xrlátaje, san quebe dxezéqueda' guna' na.

19 Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'.

20 Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

21 Caní naca da dxaca chia': Gate dxaca lazra' guna' da xrlátaje, dxulé'e lawe zúale da calela neda'.

22 Lu xichaj lázrdawa' dxedáneda' da nadxixruj bea Dios,

23 san dxeque be'eda' lu beła' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale beła' dxen chia', na' dxenná be'e na neda'.

24 ¡Edxugúa neda'! ¿Nu guselá neda' lu beła' dxen chia' da naché na neda' lu xel-la gute?



<sup>25</sup> Xcalén Dios, Le' gunë' na ne cheë Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu belá' dxen chia' naca' ca tu benne' nada'u lu na' da nadxiruj bea dul-la.

## 8

### *Xel-la nabán da dxunna Be' Lá'azxa cheë Dios dxi'u*

<sup>1</sup> Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxelunë' da calela cáteze dxenná bea belá' dxen cheë', san dxelunë' da xrlátaje cáteze dxenná bea Be' Lá'azxa.

<sup>2</sup> Da nadxiruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxiruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'.

<sup>3</sup> Ba ben Dios da quebe guca gun da bdxiruj be'e Moisés, ba gudúe' dul-la da zaj nabaga bénneache. Da nadxiruj bea na quebe guca gun na gundxu da xrlátaje lawe' da nate ni'a na' belá' dxen cheëdxu. Cheë le' na' Dios gusel-le' Zrí'inequeze', na' guque' bénneache ca naca belá' dxen cheëdxu da xu'u na lu na' dul-la, cheë gutie' ne cheë dul-la cheëdxu, lawe' da nabágadxu zria gátedxu ne cheë dul-la da zúale belá' dxen cheëdxu.

<sup>4</sup> Caní bene' cheë gaca gundxu da nadxiruj bea na, dxi'u québedxa dxundxu ca dxenná bea belá' dxen cheëdxu, san dxundxu ca dxenná bea Be' Lá'azxa.

<sup>5</sup> Benne' dxelunë' ca dxenná bea belá' dxen cheë' zaj dxe'e gunne xue da naca cheë belá' dxen cheë', san benne' dxelunë' ca dxenná bea Be' Lá'azxa zaj dxe'e gunne xue da naca cheë Be' Lá'azxa.

<sup>6</sup> Benne' zaj dxe'e gunne xue da naca cheë belá' dxen cheë' welátequeze', san benne' ca' zaj dxe'e gunne xue da naca cheë Be' Lá'azxa xelaca banë', ne xelebeza zri lazre'.

<sup>7</sup> Benne' zaj dxe'e gunne xue cheë belá' dxen cheë' dxelecuídenë' Dios, lawe' da quebe dxelaca lazre', ne quebe gaca xuluzúa cuine' lu na' da nadxiruj bea Le'.

<sup>8</sup> Cheë le' na' benne' dxelunë' ca da dxezá lazre' belá' dxen cheë' quebe gaca xelunë' da dxezaca ba lazre' Dios.

<sup>9</sup> Le'e quebe dxunle ca dxenná bea belá' dxen cheële, san dxunle ca dxenná bea Be' Lá'azxa, lawe' da ba zúale Be' Lá'azxa cheë Dios le'e. Benne' quebe zúale Be' Lá'azxa le', Be' da nase-la Cristo, quebe naque' bi cheë Cristo.

<sup>10</sup> Lácala zua Cristo lu xichaj lázrdaule, lu belá' dxen cheële dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje.

<sup>11</sup> Che zúale Be' Lá'azxa le'e, Be' cheë Dios, Bénnea' bsebanë' Jesucristo ládujla benne' gate, Léqueze Dios na', Bénnea' bsebanë' Le', gunne' xel-la nabán cube cheë belá' dxen cheële da gátequeze na. Da nigá gunë' ne cheë Be' Lá'azxa cheë Dios, Bénnea' zue' xichaj lázrdaule.

<sup>12</sup> Ca' naca na, bi bícha'dau', nabágadxu tu da gundxu, san quegá cheë gundxu ca dxenná bea belá' dxen cheëdxu.

<sup>13</sup> Che gundxu ca dxenná bea belá' dxen cheëdxu, gátequezdxu, san che ne cheë Be' Lá'azxa guzúadxu chalá'ala da dxun belá' dxen cheëdxu, na' gaca bandxu.

<sup>14</sup> Xúgutë benne' ca' dxelún ca dxulé'e Be' Lá'azxa le', benne' caní zaj naque' bi cheë Dios.

15 Be' Lá'azxa da guzí' lu na'le quebe dxugu'e le'e lu xel-la dxezrebe ca benne' zaj nada'u, san dxunę' nácale bi cheę Dios. Ne cheę Be' Lá'azxa nigá dxennędxu: "Xrae", gate dxuláwizredxu Dios.

16 Léqueze Be' Lá'azxa nigá dxexechébelenę' be' nácadxu, dxennę' nácadxu bi cheę Dios.

17 Che nácadxu bi cheę' ca', gácaqueze cheędxu da naca cheę Dios. Gaca cheędxu da dxal-la' gaca cheę Cristo che guęedxu xel-la zi' tu zren nen Le', cheę xegá'ana szrendxu tu zren nen Le'.

18 Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'.

19 Da dxelezá lazre', ne da dxelebeza xúgutę da nun Dios naca na cheę gulé'e Dios bi zaj naca be' bi cheę' ca'.

20 Ca naca da nun Dios belexaca na dácheze, quegá ca gulaca lazre' le na, san lawe' da núnqueze Dios gaca na ca'. Bęne' zua da dxelebeza lazre na

21 lawe' da xeledxúaj ca da nun Dios lu na' da dxuzría xi' le na, cheę gaca ba neza cheę na tu zren nen bi ca' zaj naca bi ca' cheę Dios lu xel-la weselá cheebe' da naca xabáa.

22 Nézquezdxu, ca zrin na'a zra, xúgutę da nun Dios dxelebezre we' na, ne dxeledé na xel-la zi' ca tu nu'ula zuę' xel-la dxudía cheę sane' bidau'.

23 Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheędxu tu da dxunna bea na da dxal-la' sidxu. Cá'anqueze dxi'u dxebeza lázredxu dxácatę na' dxebézadxu zra gulé'e Dios nácadxu bi cheę' ca', gate na' gunnę' cheędxu tu belá' dxen cube.

24 Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza túzredxu na.

25 Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dutę xel-la zren lazre' cheędxu.

26 Cá'anqueze Be' Lá'azxa dxácalęne' dxi'u lu xel-la nate ni'a na' cheędxu. Quebe nezdXu guchálajędxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheędxu, ne dxebezre lazre' ca da quebe dx-ezeque' nu nņę.

27 Dios, Bénnea' dxennę'e da zua xichaj lázrdaudxu nézenę' da dxaca lazre' nņę Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz cheę bi zaj naca be' cheę'.

*Nácadxadxu wal-la ca tu benne' dxezrué'ene'*

28 NezdXu dxuchine Dios xúgutę da dxaca cheędxu cheę gucá'ana na dxi'u chawe', dxi'u na' nazri'idxu Le', na' Le' bláwizre' dxi'u ca naca da nunę' gunę'.

29 Benne' ca' bęnbea Dios nédxudaute, bęn Le' nédxudaute xelaque' ca naca Zrí'inequeze', cheę gaca Zrí'ing' na' Benne' blau ládujla zánete bi biche'.

30 Benne' ca' bęn Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'anę' le' xrlátaje, na' benne' ca' bca'anę' xrlátaje, cá'anqueze bca'ana szręnqueze' le'.

31 ¿Bizra nnadxu cheę da caní? Che caní dxácalę Dios dxi'u, ¿nuzra benne' seque' tábague' dxi'u?

32 Dios quebe bezúene' zi' gunnę' dxi'u Zrí'inequeze', san bdee' Le' cheę gútię' waláz cheędxu. ¿Quebe gunnę' cheędxu xúgutę da ca' tu zren nen Zrí'ing'?

33 ¿Nuzra seque' bi nņę cheę benne' ca' ba gucá'a Dios le'? Léqueze Dios na' bca'anę' benne' ca' xrlátaje.

34 ¿Nuzra benne' seque' nne' zaj nabaga zria benne' ca'? Léqueze Cristo gutie' waláz cheedxu, ne da naca na blaudxa, naque' Bénnea' bebán ládujla benne' gate, na' zue' chala'a xabela chee Dios, ga dxue lazre' lau Le' waláz cheedxu.

35 ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stebe, u xel-la gute?

36 Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgutę zra.

Dxelunę netu' ca zríla'dau' ba zaj zúaba' chee xelútię'-ba'.

37 Lu xúgutę da caní nácadxdu szren ca benne' dxelezué'ene', ne chee Bénnea' bzrí'ine' dxi'u.

38 Chee le' na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán,

ne gubáz chee xabáa ca', ne be' xriwe' dxeleenná bea,

ne xel-la waca chee be' xriwe' ca',

ne da dxaca na'a, ne da za za,

39 ne da zua xabáa, ne da zua lu xejr la xu,

ne xetú da nun Dios,

quebe seque' xecá'a na dxi'u lu xel-la zri'i lazre' chee Dios,

da blé'ene' dxi'u gate bdee' Xránadxu Jesucristo waláz cheedxu.

## 9

### *Dios guquęę benne' Israel ca'*

1 Dxennía' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxę na neda' naca na da li.

2 Dxexíaje lázrele'ęda', ne tu zúazqueze xel-la dxudía lu lázrdawa',

3 na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' walázr chia', benne' judío.

4 Benne' caní zaj naque' zri'ine zre sua Israel, na' Dios guzú' lu ne'e benne' caní ca bi chee' ca'. Dios guzúe' ládujla benne' ca' lu da xabáa chee', ne bene' tu xel-la wezría nen benne' ca', ne bnézruje' le' da nadxixruj bea na da bzuaj Moisés, ne xel-la wil-la chee xudau', ne da nachebe lazre'.

5 Zaj naque' zri'ine zre zua xra xrtáudxu ca', ná' ládujla benne' walázr chee' ca', lu beła' dxen chee' bla' Cristo, Bénnea' naque' Dios lawe' xúgutę da de, ne gaca báqueze' chadía chacanna. ¡Ca' gaca na!

6 Quebe nnadxu quebe dxun Dios da dxenná xrtizre', san da naca na, quegá xúgutę zri'ine zre sua Israel zaj nababa benne' Israel ca' chee Dios.

7 Quegá xúgutę zri'ine zre sua Abraham zaj naca xánnię' zrí'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su'."

8 Da nigá dxulé'e na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaję' ca naca da guchebe lazre' Dios.

9 Ca naca da guchebe lazre' Dios da gunné' chee Abraham naca na da nigá: Lu zra da ba gunnía' xida', na' Sara chiu' sanę' tu zrí'inu'.

10 Quegá tuze da nigá, san cá'aqueze gate Rebeca guzrá' chupa zrí'ine' naca tuze xrabe', Isáac, xra xrtáudxu,

11-13 ne gate bi ca' quebe ne xelálajbe', ne quebe ne xelunbe' da xrlátaje u da calela, Dios guzre' Rebeca: "Bi waca chiu' gácabe' wen zrin chee bi cuide'."

Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxé' ca naca da núnqueze', benne' ca' dxaca lazre' guláwizre', ne quebe dxuché'e ca da zaj nunge'.

<sup>14</sup> ¿Bízraqueze nnadxu? ¿Naca Dios Benne' quebe dxun da xrlátaje? ¿Cabata'!

<sup>15</sup> Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'."

<sup>16</sup> Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u.

<sup>17</sup> Lu dizra' lá'azxa Dios dxé'e wenná bea chee xezr la xu Egipto: "Bena' lue' wenná bea chee gulé'eda' ne' chiu' lue' xel-la waca chia', ne chee xelúnbea bèneache La neda' du gabí'i xezr la xu."

<sup>18</sup> Ca' naca na, Dios dxexache lazre' benne' dxaca lazre', ne cá'anqueze dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

<sup>19</sup> Na'a xi'u neda': Che caní naca na, ¿bizr chee na' dxugapa Dios bèneache dul-la? ¿Núzraqueze seque' tábaga ca da dxaca lazre' Le'?

<sup>20</sup> Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xe na benne' beñe' le na: ¿Bizr ché'e na' beñu' neda' caní?

<sup>21</sup> Benne' wën xesu' zruaga na' wazéquene' guné' chee guna' na' ca dxaca lazre'. Wazéquene' guné' chee guna' ná'queze tu xesu' da zácadxa, ne tu xesu' da xálaze.

<sup>22</sup> ¿Bizra nnáquezdxu che Dios guca lazre' gulé'ene' dxi'u ca dxuzría xi'e bèneache, ne ca naca xel-la waca chee', na' lu xel-la zren lazre' chee' bchaga lawe' chee benne' ca' lálala dxal-la' xeledé' le' xel-la zi', na' xelebía xí'tequeze'?

<sup>23</sup> Beñe' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequé'e dxi'u nédxute chee gaca cheedxu xabáa na' da nucueza Le'.

<sup>24</sup> Dios bláwizre' dxi'u ládujla benne' judío, ne ládujla benne' quebe zaj naque' judío.

<sup>25</sup> Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'ite' lazra'.

<sup>26</sup> Lu lataj naga gucha'-be': Quebe nácale bi chia', ná'queze xapa' le' bi chee Dios ban.

<sup>27</sup> Ca naca chee benne' Israel ca', Isaías dxenné': "Lálala zaj naxán zri'ine zre sua Israel ca naxán xuzre' dxe' dxu'a tu xegu zren, bábaze benne' ca' xelxegá'ane' chee xeledé'".

<sup>28</sup> lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite.

<sup>29</sup> Naca na ca gunná lé'queze Isaías na' gate nate, gunné':

Chela Xránadxu, Xrana zánete' gubáz chee xabáa, quebe bca'ane' zri'ine zre súadxu ca',

na' xenitedxu ca guca chee xezre Sodoma, ne chee xezre Gomorra.

### *Benne' judío ca', ne dizra' chawe'*

<sup>30</sup> ¿Bízraqueze nnadxu? Benne' quebe zaj naque' judío, ne quebe belexexílaj lazre' xelxegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo.

<sup>31</sup> Benne' Israel ca', benne' beluᅇ' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéqueᅇ' xelexegá'ane' xrlátaje lawe' Le'.

<sup>32</sup> ¿Bizr chee na? Naca na lawe' da quebe beluᅇ' ba xuzre xelexegá'ane' xrlátaje ne chee xel-la dxeajlí lazre' chee', san gulaca lazre' xelexegá'ane' xrlátaje ne chee da belúnqueze' le'. Chee le na' xeajlecházie' lawe' xiaj da dxelehegu bénneache, da na' naca Cristo

<sup>33</sup> ca da dxenná Dios lu dizra' lá'azxa chee', dxenné': Neda' dxuzúa' lu xezre Sión tu benne' naque' xiaj da dxelehegu bénneache. Nu benne' cheajlí lazre' Le' quebe xedué'equenze'.

## 10

<sup>1</sup> Le'e, bi bícha'dau', da dxezá lazra', ne da dxenaba' Dios guᅇ' chee benne' Israel ca' naca na chee xelélé'.

<sup>2</sup> Ca naca chee benne' ca', da li dxelebile lazre' da naca chee Dios, san quebe naca na chee xel-la sina li.

<sup>3</sup> Quebe zaj nézene' ca xrlátaje dxucá'ana Dios bénneache, san dxelaca lazre' xulucá'ana xrlátaje cuine', ne quebe dxelezí' lu ne'e ca xrlátaje dxucá'ana Dios bénneache.

<sup>4</sup> Cristo dxuᅇ' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúgute bénneache dxeajlí lazre' Le'.

<sup>5</sup> Ca naca chee da dxucá'ana xrlátaje bénneache lau Dios da naca na ne chee da nadxixruj bea na, bzuaj Moisés caní: Benne' dxuᅇ' ca naca da dxenná da nadxixruj bea na gaca bane' ne chee le na.

<sup>6</sup> Ca naca chee da dxucá'ana xrlátaje bénneache lau Dios da naca na ne chee xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéᅇ' xabáa?" (da naca na chee gulétaje' Cristo),

<sup>7</sup> ne quebe nnau': "¿Núzraqueze benne' xétaje' lataj chul-la chee benne' gate ca?" (da naca na chee xebéaje' Cristo ládujla benne' gate.)

<sup>8</sup> ¿Bizra da na' dxenná na: Dizra' na' zua na gágute naga zu', lu dxu'u ne lu lazrda'u? Dizra' nigá naca na dizra' chawe' da dxuzéñentu' bénneache chee xeléajle'e chee Cristo.

<sup>9</sup> Che nen dxu'u dxennáu' naca Cristo Xranu', ne che lu lazrda'u dxeajlí lazru' Dios bsebane' Le' ládujla benne' gate, nadxa lau'.

<sup>10</sup> Lu lázrdaudxu dxeajlí lázredxu chee xegá'anadxu xrlátaje lau Dios, ne nen dxú'adxu dxexechébedxu nácadxu chee Cristo chee ladxu.

<sup>11</sup> Lu dizra' lá'azxa dxenná na: Nu benne' dxeajlí lazre' Le' quebe xedué'eng'.

<sup>12</sup> Dios quebe dxebé'e benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúgute bénneache, na' dxunézrujle'e xúgute benne' ca' dxululáwizre' Le'.

<sup>13</sup> Naca na ca da dxenná na: Xúgute benne' dxululáwizre' La Xránadxu xelélé'.

<sup>14</sup> Na'a ¿ájazra xululáwizre' Le' che quebe ne xeléajle'e chee'? ¿Ájazra xeléajle'e chee' che quebe ne xelenne' nu dxuchalaj chee'? ¿Ájazra xelenne' che quebe nu chilá' benne' guzene' le'?

<sup>15</sup> ¿Ájazra xuluzenne' bénneache che quebe nu nasel-la le'? Naca na ca dxenná dizra' lá'azxa, dxenná na: Xrtante naca lau Dios da dxelún benne' dxeledé' dxuluzenne' bénneache dizra' chee xel-la dxebeza zri lazre', ne dizra' chawe'.

16 Quegá xúgute bèneache dxelezi' lu ne'e dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajle'e ca da dxuchálajntu'?"

17 Ca' naca na, dxéajledxu chee' gate dxénedxu, na' da dxal-la' xénedxu naca na da gunná Cristo.

18 Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bèneache du ca naca xezr la xu nigá.

Dizra' chee' benne' caní bache belén bèneache du gabí'i xezr la xu.

19 Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné':

Neda' guna' gácale benne' se lazre' chee' tu xezre benne' quebe ne xelaque' tu xezre.

Guna' zrá'ale tu xezre benne' quebe ne xeléajni'ine'.

20 Gudé na' bzuaj Isaías ca gunná Dios, gunné':

Benne' quebe belexílaje' neda' belexezrélené' neda'.

Ble'e lawa' benne' ca' quebe bululáwizre' neda'.

21 Ca naca chee' benne' Israel, gunná Dios: "Tu dxuláwizraxueza' benne' quebe dxuluzé' dizra', ne dxeledábague' xrtizra'."

## 11

### *Nu benne' Israel ca' zaj nalé'*

1 Na'a dxenaba': ¿Ba bzua Dios chalá'ala xezre chee', benne' Israel ca', tu chí'izqueze? ¿Cabata! Neda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín.

2 Gate nate Dios guzi' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee' Elías, bènea' bchálaje' waláz chee' Dios, gate na' gudawe' zria benne' Israel ca' lau Dios? Gunné':

3 "Xran, ba belútie' benne' buluchálaje' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútie'."

4 Dios bechebe', guzre' Elías: "Ba gucá'a chia' ga xun chi gaxúa benne' quebe ne xuluzúa zribe' lau bedáu' xiaj xaga le' na Baal."

5 Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'.

6 Na'a, che naca na ne chee' xel-la zri'i lazre' chee' Dios, quebe naca na ne chee' da gaca gun nu benne', lawe' da la guca na ca', na' xel-la zri'i lazre' chee' Dios quebe naca na xel-la zri'i lazre'.

7 ¿Bizra xca'? Benne' Israel ca' quebe belezrué'ene' da dxelexílaje', san benne' ca' gucá'a Dios le' belezrué'ene' na, san xezicadxa benne' ca' gulaque' benne' zide'.

8 Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a.

9 Cá'anqueze gunná Davíd, gunné':

Ca naca laní chee' benne' ca' ben xelaca na ca tu xralaj, u ca tu da que'la na le'

chee' cheajlecházie', na' gudé Dios le' lu da ba xa'.

10 Xiaj lawe' xelechul-la na chee' québedxa xelelé'ene',

na' xeledégüē' chadía chacanna zran xua da naca na dul-la chee'.

*Ca zaj nalá benne' quebe zaj naque' judío*

<sup>11</sup> Na'a dxenaba': ζTu chí'ize belenite benne' judío ca' gate xeajlecházie?' ¡Cabata!' Gate benne' judío ca' guledábage' xrtizra Dios, guta' lataj xeledá benne' quebe zaj naque' judío, chee' xelezúa benne' judío ca' lu xel-la dxezá lazre'.

<sup>12</sup> Na'a, che da zrinnaj da belún benne' judío ca' ben na guca tu da ba neza chee' xúgute' bēnneache, ne che gate belenitie' guca na tu da ba neza chee' benne' quebe zaj naque' judío, gaca na tu da ba neza zrendxa gate xelexú'u xúgute' benne' judío ca' lu na' Dios.

<sup>13</sup> De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee' guzenda' benne' quebe zaj naque' judío xrtizre', dxé'le'a gunne xue chee' zrin nabaga' guna'.

<sup>14</sup> Dxaca lazra' guna' xelezúa lu xel-la dxezá lazre' bal-la benne' walá'zr chia' chee' xeledé'.

<sup>15</sup> Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ζájazra gaca gate xelexaca benne' judío ca' tuze nen Dios? Gaca na ca xelexaca banē' ládujla benne' gate.

<sup>16</sup> Che guzúadxu lau Dios xeta nedxu chee' cua, na' nácaqueze chee' dutē' cua na'. Na' che naca chee' Dios lue xaga, zaj nácaqueze chee' ca naca zruze xaga na'.

<sup>17</sup> Benne' judío ca' zaj naque' ca zrúzequeze tu xaga olivo, san bal-la zruze guledxugu na, na' lue' beda'u waláz chee' zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee' xaga olivo na'.

<sup>18</sup> Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luequeze na' dxugagu' na lue'.

<sup>19</sup> Wannáu': Awe', guledxugu zruze ca' chee' cheajxedá'a neda' le'e xaga olivo na'.

<sup>20</sup> Ca'an naca, san guledxugu na lawe' da quebe guléajle'e chee' Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'.

<sup>21</sup> Che Dios quebe bnite lawe' chee' benne' ca' zaj naque' ca zrúzequeze xaga na', na' bebéajē' le', cá'anqueze quebe gunite lawe' chiu' lue', na' xebéajē' lue'.

<sup>22</sup> Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xeajlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee' tu sí'zquezu' da chawe' chee', lawe' da che quebe gunu' caní, cá'anqueze wegüē' lue'.

<sup>23</sup> Che benne' judío ca' xelexéaj lazre', na' xelexaque' tuze nen xaga olivo na', lawe' da napa Dios xel-la waca xunē' le' tuze.

<sup>24</sup> Lue' quebe nacu' judío, san guchugue' lue' le'e tu xaga olivo xixre', na' bexunē' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca zrúzequeze xaga olivo chawe' na', gácadxa chawe' xexunē' le' tuze nen xaga olivo cheéqueze' na'.

*Ca xelexú'u benne' judío lu na' Dios*

<sup>25</sup> Le'e, bi bícha'dau', dxaca lazra' chéajni'ile chee' da nagache nigá, chee' quebe guéquele nácale benne' sina. Benne' Israel ca' zaj naque' benne' lázrdau

zide' tu chí'idauze, ca zrin zra xelexú'u lu na' Dios xúgute benne' quebe zaj naque' judío.

<sup>26</sup> Gate gaca na, nadxa xelexá xúgute benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,  
na' cue' da calëla da zaj nabaga zri'ine zre sua Jacob.

<sup>27</sup> Da nigá gaca xel-la wezría guna' nen benne' ca', gate neda' cua' dul-la chee'.

<sup>28</sup> Ca naca chee dizra' chawe' chee Cristo, zaj naca benne' judío ca' ca benne' dxelecuídenë' Dios chee gaca da ba neza chee le'e, san Dios ne nazrí'ine' benne' ca' lawe' da guquë'e xra xrtawe' ca'.

<sup>29</sup> Ca da dxunna Dios, quebe xequë'e na, ne quebe dxuzúe' chalá'ala nu ba bláwizre'.

<sup>30</sup> Le'e nédxute gudábage xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e.

<sup>31</sup> Cá'anqueze na'a, benne' judío ca' dxeledábage' xrtizra Dios, san naca na chee xexache lazre' Dios le' ca dxexache lazre' le'e.

<sup>32</sup> Dios be' lataj xúgute' guledábage' xrtizre' chee gaca xexache lazre' xúgute'.

<sup>33</sup> Szrente naca xel-la gunní'a chee xel-la sina, ne xel-la dxéajni'i chee Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dxune'.

<sup>34</sup> ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i Le'?

<sup>35</sup> ¿Núzraqueze benne' bi bnézruje' chee Xránadxu, chee gun na ba xen bi xuzri'e chee bénnea'?

<sup>36</sup> Xúgute da dxelédxu zá'aca na lu na' Dios, na' Le' benë' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

## 12

### *Da dxal-la' gun benne' naque' bi chee Dios*

<sup>1</sup> Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle.

<sup>2</sup> Québedxa gunle ca dxelún bënneache chee xezr la xu nigá, san le guchá cuínale chee caní zra dutë ca naca lu xichaj lázrdau. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

<sup>3</sup> Ne chee da nusebaga Dios neda' lu da chawe' chee dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gunë', san dxal-la' guxúe' ca da naque' lu xel-la dxexruj lazre', cáteze naca xel-la dxéajlí lazre' da nunezruj Dios le'.

<sup>4</sup> Ca naca chee bël-la' dxen cheedxu, zánete da napa na, na' xúgute da ca' quebe dxelún na tuze zrin,

<sup>5</sup> cá'anqueze dxi'u, láqueze naxandxu, nácadxu ca tuze bël-la' dxen chee Cristo, ne nácadxu tuze tudxu xetudxu ca zaj naca da ca' napa tu bël-la' dxen chee nu benne'.

<sup>6</sup> Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u. Che nunne' dxi'u chee guchálajdxu waláz chee',



dxal-la' gundxu na dutę xel-la dxeajlí lazre' da nápadxu.

<sup>7</sup> Che nunne' dxi'u cheę gundxu zrin cheę ljwézredxu,  
dxal-la' gundxu na cháwe'dau'.

Che nunne' dxi'u cheę gusededxu bėnneache,  
dxal-la' gusede xánnedxu le'.

<sup>8</sup> Che nunne' dxi'u cheę gutípadxu lazre' bėnneache,  
dxal-la' gutípa xánnedxu lazre' le'.

Che nunne' dxi'u cheę bi gunézrujdxu,  
dxal-la' gundxu na du lázredxu.

Che nunne' dxi'u cheę nne xuedxu,  
dxal-la' guxúe xánnedxu ca dxundxu na.

Che nunne' dxi'u gácaleđxu benne' xache' ca',  
dxal-la' gundxu na dutę xel-la dxebé cheędxu.

<sup>9</sup> Le zri'i ljwézrele du lázrele tule xetule.

Le guzúa chalá'ala da caleļa, ne le gun da xrlátaje.

<sup>10</sup> Dخال-la' zri'i ljwézrele tule xetule ca nazri'ile bi bíchequezle.

Le gapa ba lá'ana ljwézrele, ne le güe lataj tule xetule.

<sup>11</sup> Le gun zi' lázrele, ne quebe gácale zrawęde,  
na' le gun zrin cheę Xránadxu dutę lázrdaule.

<sup>12</sup> Le sua xel-la dxebé lu da dxebeza lázrele.

Le gaca dxexruj lazre' gate dxedele xel-la zi'.

Le guchálajleze Xránadxu.

<sup>13</sup> Le gunezruj da dxelexazrje benne' ca' zaj naque' bi cheę Dios.

Le si' lu na'le du lázrele benne' ca' zá'aque' dxelenabe' le'e.

<sup>14</sup> Le naba da chawe' cheę benne' ca' zaj nau zi' xuzre' le'e.

Le naba da xrlátaje cheę, ne quebe nábale da caleļa cheę benne' ca'.

<sup>15</sup> Le be nen benne' dxelebé,  
ne le xexache lazre' benne' ca' dxelebezre xache'.

<sup>16</sup> Le gaca tuze nen ljwézrele tule xetule.

Quebe gucá'ana szren cuínale,  
san le gaca tuze nen benne' dxexruj lazre' ca'.

Quebe guéquele ba nápale dutę xel-la sina.

<sup>17</sup> Quebe xebi'ile da caleļa cheę benne' nune' cheęle da caleļa.

Le gun ba xuzre gunle da xrlátaje lau xúgute bėnneache.

<sup>18</sup> Be naca cheęle, le gun naga zę lau séquele cueza zri lázrele nen xúgute bėnneache.

<sup>19</sup> Bi bícha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj lu dizra' lá'azxa da dxenná na: Chia' neda' naca xebéaj lazra'. "Neda' xebi'a cheę bėnneache," dxenná Xránadxu.

<sup>20</sup> Cá'anqueze dxenná na: Che dxedún benne' dxecuídenę' lue', bnezruj da gawe', na' che dxebilene', bnezruj da xí'aje', lawe' da gate dxunle caní, xedué'e bėnnea'.

<sup>21</sup> Quebe gu'u lataj da caleļa nna be'e na lue', san gunná be'e da caleļa ne cheę da xrlátaje da dxunu'.

## 13

<sup>1</sup> Xúgutedxu dxal-la' guzúadxu dizra' cheę benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea cheę'. Benne' xu'u lawe' ca' zaj naque' benne' nuzúa Dios.

<sup>2</sup> Chee le na' nu benne' dxedábague' benne' xu'u lawe' dxedábague' ca da nun Dios. Benne' dxeledábague' caní zaj nabague' zria, na' Dios xuzri'e chee' da xexal-le'.

<sup>3</sup> Benne' ca' dxelenná be'e quebe nuzúa Dios le' chee xuluchebe' benne' dxelune' da xrlátaje, san chee xuluchebe' benne' dxelune' da calela. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lá'ana lue'

<sup>4</sup> lawe' da zaj naque' wen zrin chee Dios chee xelune' chiu' da xrlátaje. Che dxunu' da calela, dxal-la' zrebu' lawe' da quegá dácheze zaj nape' xel-la dxenná bea xelexebe'e chee bënneache lawe' da zaj naque' wen zrin chee Dios chee xuluzé' lu da ba xa' benne' ca' dxelune' da calela.

<sup>5</sup> Chee le na', dxun na ba xen guzúadxu dizra' chee benne' xu'u lawe', quegá tuze chee quebe xuluzé' dxi'u lu da ba xa', san lawe' da nezdxu naca na da nadxixruj bea Dios.

<sup>6</sup> Chee le na' dxízrujle da dxebágale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánne' zrin chee' na'.

<sup>7</sup> Le quizruj xúgute bënneache ca da nabágale chee'.

Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na.

Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ané' szren.

<sup>8</sup> Quebe dxal-la' cue zria chee nen nu benne' san tuze chee zri'ile le' ca dxal-la' gunle chee le sa' ljwézrele tule xetule. Che gunle da nigá, na' gunle da nadxixruj bea na.

<sup>9</sup> Naga zaj naxúaj da nadxixruj be'e Dios dxenná na:

Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun bënnea' dxuzé' dizra' da nadxixruj bea na' dxenná na: Bzri'i le sa' ljwezru' ca nazri'i cuinu'.

<sup>10</sup> Bënnea' nazri'ine' le sa' ljwezre' quebe dxune' da calela chee le sa' ljwezre' na'. Ca'an naca, bënnea' nazri'ine' le sa' ljwezre' dxuzé' dizra' chee da nadxixruj bea na.

<sup>11</sup> Ca naca da caní, le guxúe xanne' ca naca zra zúadxu na'a lawe' da ba bzrin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajledxu.

<sup>12</sup> Ba dxedé chee da chul-la, ne ba za te zra. Chee le na' dxal-la' gusandxu da dxelún bënneache lu da chul-la, na' gácadxu ca tu benne' zeje' wedil-la dxacu zra lané' xia, chee tadxu lu xel-la naxaní' chee Dios.

<sup>13</sup> Dخال-la' tadxu li lazre' ca dxal-la' tadxu te zra.

Quebe dxal-la' xí'ajdxu da dxuzuzre na bënneache,

ne quebe gagu xrátadxu.

Quebe gundxu da sban, ne da calela.

Quebe tíl-laledxu le sa' ljwézredxu,

ne quebe gácadxu xa lazre'.

<sup>14</sup> Xránadxu Jesucristo gácaqueze' ca zra lánadxu xia, na' quebe gundxu da dxezá lazre' belá' dxen cheedxu.

## 14

*Quebe si tizru' biche ljwezru'*

<sup>1</sup> Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá chee gutíl-lalele lebe' dizra' ca naca da quebe dxun na ba xen.

<sup>2</sup> Ca naca na, zaj zra' benne' dxeleajlí lazre' naca chee' xelawe' bal-la bi de, san zaj zra' benne' xezícadxa quebe ne xelezé chache' lu xel-la dxeajlí lazre', na' dxeléquene' waca xelawe' tuze xixre' cuan.

<sup>3</sup> Benne' dxawe' xúgutę da ca' quebe dxal-la' guzųe' chalá'ala bėnnea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bėnnea' dxawe' bal-la bi de, lawe' da nazí' lu na' Dios bėnnea'.

<sup>4</sup> ¿Nuzra nacu' lue' dxezí tizru' wen zrin chee Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca chee gucá'ane' le' xrlátaje.

<sup>5</sup> Caní naca xetú. Zaj zra' benne' dxulupá'anadxę' tu zra ca xetú zra, na' zaj zra' benne' dxeléquene' tuz ca zaj naca xúgutę zra. Tu tudxu dxal-la' se cháchadxu lu xichaj lázrdaudxu ca naca da caní.

<sup>6</sup> Benne' dxupá'ane' tu zra dxune' na chee gape' ba lá'ana Xránadxu, na' bėnnea' quebe dxupá'ane' zra na' dxune' ca' chee gape' ba lá'ana Xránadxu. Benne' dxawe' bal-la bi de dxune' na chee gape' ba lá'ana Xránadxu lawe' da dxe'e Dios: Xcalenu', na' bėnnea' nadxúaj nadxeze da dxawe' dxune' na chee gape' ba lá'ana Xránadxu, na' cá'anqueze dxę'e Dios: Xcalenu'.

<sup>7</sup> Netudxu dxi'u naca bandxu chee gundxu da naca cheézedxu, ne quegá gátedxu lu da naca cheézedxu.

<sup>8</sup> Che naca bandxu, naca na chee gaca ba Xránadxu. Ca' naca na, che gaca bandxu, u che gátedxu nácadxu bi chee Xránadxu.

<sup>9</sup> Cristo gutię, ne bebane' chee gaque' Xrana benne' gate ca', ne Xrana benne' ban ca'.

<sup>10</sup> Na'a lue', ¿bizr chee na' quebe dxelé'enu' chawe' ca da dxun le sa' ljwezru', bi bíchedxu? ¿Bizr chee na' dxuzú' le' chalá'ala? Xúgutędxu dxal-la' zrindxu lau Cristo chee guchi'e ca da nundxu tu tudxu.

<sup>11</sup> Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxennía':

Xúgutę bėnneache xuluzú zribe' lawa'.

Xúgutę' xelexechebe' lawe' lau naca' Dios."

<sup>12</sup> Ca'an naca, tu tudxu dxi'u dxun na ba xen gulé'edxu ca da nundxu lau Dios.

<sup>13</sup> Chee le na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bichele, u da gun na cheajcházie' lu dul-la.

<sup>14</sup> Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban.

<sup>15</sup> Che ne chee da dxagu' lue', dxunu' dxeajchaze bi bichu', quebe dxunu' da naca chee xel-la zri'i lazre'. Quebe gunu' cuía xi' tu benne', bėnnea' gute Cristo waláz chee', lawe' da dxaca lazru' lue' gagu' bi xel-la wagu.

<sup>16</sup> Quebe bi gunle da güe lataj nu nne schanní' chee da dxéquele naca na da xrlátaje.

<sup>17</sup> Chee súadxu naga dxenná be'e Dios dxi'u quebe naca na chee da dxágudxu, u chee da dxi'ajdxu, san naca na chee xegá'anadxu xrlátaje lau Dios,

ne chee gápadxu xel-la dxebeza zri lazre', ne chee súadxu xel-la dxebé, da ca' nápadxu ne chee Be' Lá'azxa.

<sup>18</sup> Nu benne' dxune' zrin chee Cristo caní dxune' da dzezaca ba lazre' Dios, na' dxelapa bénneache le' ba lá'ana.

<sup>19</sup> Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u.

<sup>20</sup> Quebe guzría xi'u da nun Dios lu xichaj lázrdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la.

<sup>21</sup> Xrlátaje naca quebe gágudxu belá', ne quebe xí'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzría xi na xel-la dxeajlí lazre' chee'.

<sup>22</sup> Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzría xi' cuine' ne chee da dxéquené' naca na da xrlátaje gune'.

<sup>23</sup> Bénnea' dxawé' da dxéquené' quebe dxal-la' gawé', nabague' zria gate dxawé' na lawe' da dxawé' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

## 15

### *Ben da dzezaca ba lazre' bi bichu', ne quegá da dzezaca ba lázrezu' lue'*

<sup>1</sup> Dxi'u ba ze cháchadxu lu xel-la dxeajlí lazre' dxal-la' gácaleđxu benne' quebe ne se chache' lu xel-la dxeajlí lazre', ne quebe gundxu da dzezaca ba lázredxu dxí'uze.

<sup>2</sup> Tu tudxu dxal-la' gundxu da dzezaca ba lazre' bi bíchedxu lu da gun na chawe' chee'be', ne lu da gusegula na lebe' lu xel-la dxeajlí lazre' chee'be'.

<sup>3</sup> Crístoqueze quebe bene' da dzezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'.

<sup>4</sup> Xúgute da naxúaj nédxudauté lu dizra' lá'azxa zaj naxúaj na chee guzéajni'i na dxi'u, chee gápadxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na.

<sup>5</sup> Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácale' le'e chee gácale tuze tule xetule ne chee Jesucristo,

<sup>6</sup> chee gunle xúgutele tu zren güe lá'anale Dios, Xra Xránadxu Jesucristo.

### *Dxelén benne' quebe zaj naque' judío dizra' chawe'*

<sup>7</sup> Ca'an naca, chee gaca ba Dios, le si' lu na'le ljwézrele tule xetule ca ben Cristo, guzi' lu ne'e dxi'u.

<sup>8</sup> Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchebe lazre' Dios lau xra xrtáudxu ca', ne caní blé'eng' naca Dios li lazre'.

<sup>9</sup> Cá'anqueze ble'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné':

Güe lá'ana' lue', Dios, lau benne' xezr la xu ca', ne tu gul-lazqueza' da xelapa ba lá'ana Lue'.

<sup>10</sup> Cá'anqueze dxenná na:

Le be, le'e, bénneache dute xezr la xu nen benne' zaj naque' bi chee Dios.

11 Cá'anqueze dxenná na:

Le güe lá'ana Xránadxu,  
le'e, bënneache chee xúgute xezr la xu,  
ne le guchalaj chee xel-la szren chee',  
le'e, xúgute bënneache.

12 Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,  
Bënnea' nna bé'ene' xúgute cue' xezr la xu,  
na' benne' ca' xelebeza lazre' Le'.

13 Dxenaba' Dios, Bënnea' dxunne' dxi'u xel-la dxebeza lazre', chee gúnna'le'e le'e xel-la dxebé, ne xel-la dxebeza zri lazre' lawe' da dxeajli lázrele Le', chee gápale'eqeuzle xel-la dxebeza lazre' ne chee xel-la waca chee Be' Lá'azxa.

14 Le'e, bi bícha'dau', dxuxrén lazra' nápalé'ele da chawe', ne núnbeale xúgute chee gaca guzėjni'ile ljwézrele tule xetule.

15 Lu xiche nigá bechugu lazra' guzúaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'.

16 Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bënneache dizra' chawe' chee Dios chee guzra'a benne' quebe zaj naque' judío lau Dios ca tu guna' da dxezaca ba lazre' Le'. Xelaque' benne' lá'azxa ne chee Be' Lá'azxa.

17 Lu da naca' chee Jesucristo waca xezaca ba lazra' lu zrin dxuna' chee Dios

18 lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá bēna' ne chee da bchálaja', ne da bēna',

19 ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico.

20 Caní naca, bēna' ba xuzre bchálaja' dizra' chawe' naga quebe ne xellené' La Cristo, chee quebe guna' zrin naga ba zaj nun zrin xezícadxa benne',

21 na', ca dxenná dizra' lá'azxa:  
Xeelé'e benne' ca' quebe ne zrin nu benne' guzenne' le' chee Cristo,  
na' benne' ca' quebe ne xelén chee Le' xelėjni'iné da naca chee'.

### *Pablo dxugú'u be'e chéje' xezre Roma*

22 Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'.

23 Na'a, ba bexuzre bēna' zrin nigá, ne lawe' da zánete iza ba guca lazra' xida' súalēna' le'e,

24 dxebeza lazra' tea' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala.

25 Na'a cha'a Jerusalén, gu'a late' da gácale na bi bíchedxu zaj zre'e na',

26 lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya guléquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén.

27 Guléquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxelėjle'e chee Cristo, bulunézruje' chee benne' quebe zaj naque' judío chee da zaj nape' chee

Dios, na' benne' caní dxal-la' xulunéruje' chee benne' judío ca' chee da zaj nape' chee xezr la xu nigá.

<sup>28</sup> Caní naca, gate xexuzre guna' da nigá, ne ba bnézuja' le' dumí nigá, na' cha'a lu xezr la xu España, na' ca teza' xedajnná'a le'e.

<sup>29</sup> Dxuxrén lazra' gate xida' naga zrle le'e, gúale'a da chawe' chee dizra' chawe' chee Cristo.

<sup>30</sup> Le'e, bi bícha'dau', dxata' xúeda' le'e ne chee Xránadxu Jesucristo, ne ne chee xel-la zri'i lazre' da dxunna Be' Lá'azxa dxi'u, chee gácale tuze nen neda' guchálajlëdxu Dios chee gácalëne' neda'.

<sup>31</sup> Le naba Dios chee guselé' neda' lu na' benne' quebe dxeléajlë' chee Cristo naga nababa Judea, ne chee xezezi' du lazre' bi bíchedxu zaj zre'e Jerusalén dumí nigá da nu'a,

<sup>32</sup> na' che naca da dxaca lazre' Dios, la'a lu dutë xel-la dxebé xedajnná'a le'e, ne chee xezí' lazra' naga zrle le'e.

<sup>33</sup> Dxenaba' Dios, Bénnea' dxunne' dxi'u xel-la dxebeza zri lazre', súalëne' xúgutële le'e. ¡Ca'an gaca na!

## 16

### *Pablo dxugape' diuzre bi bíchedxu ca'*

<sup>1</sup> Dxegu'a lu na'le nu'ula zandxu Febe, nu'ula na' ba bënë' zrin chee Cristo ládujla bi bíchedxu zaj zre'e xezre Cencrea.

<sup>2</sup> Le si' lu na'le le' cháwedau' lu La Xránadxu, ca dxal-la' gaca ládujla bi bíchedxu dxeléajlë' chee Cristo, na' le gácalëne' bítetëze da dxexájrjenë', lawe' da ba gúcale le' benne' zan, ne neda'queza'.

<sup>3</sup> Le gugapa diuzre Priscila ne Aquilo, benne' belún zrin chee Jesucristo tu zren nen neda'.

<sup>4</sup> Benne' caní buluzúë' xel-la nabán chee' lu da stëbe chee gúcalëne' neda'. Ca' naca na, dxapa' benne' ca' xcalenle, ne quegaze neda', san cá'anqueze dxelún xúgutë bi bíchedxu quebe zaj naque' judío.

<sup>5</sup> Le gugapa diuzre bi bíchedxu ca' dxelezárgabe' lizre Priscila, ne Aquilo. Le gugapa diuzre Epeneto, benne' ljwezra' nazri'itë lazra'. Le' guque' benne' nedxu naga nababa Acaya guxéajlë' chee Cristo.

<sup>6</sup> Le gugapa diuzre María, nu'ula na' ba benlë' zrin ládujla le'e.

<sup>7</sup> Le gugapa diuzre benne' waláwr chia', Andrónico, ne Junias, benne' ca' gulaque' ljwezra' lizre xia. Zaj naque' benne' blau ládujla benne' gubáz ca' chee Cristo, na' guléajlë' chee Cristo nédxudxa ca neda'.

<sup>8</sup> Le gugapa diuzre Amplias, benne' ljwezra' nazri'itë lazra' lu La Xránadxu.

<sup>9</sup> Le gugapa diuzre Urbano, benne' ljwezra' lu zrin chee Jesucristo, ne le gugapa diuzre Estaquis, benne' nazri'itë lazra'.

<sup>10</sup> Le gugapa diuzre Apeles, benne' blé'ene' da zan lasa ca dxeajlë' lazre' Cristo. Cá'anqueze le gugapa diuzre Aristóbulo, benne' xrtia'.

<sup>11</sup> Le gugapa diuzre Herodión, benne' waláwr chia', ne Narciso, benne' xrtia', benne' dxeléajlë' chee Xránadxu.

<sup>12</sup> Le gugapa diuzre Trifena ne Trifosa, nu'ula ca' dxelune' zrin chee Xránadxu, ne le gugapa diuzre Pérsida, bi zandxu nazri'itë lazrdxu, nu'ula na' ba benlë' zrin chee Xránadxu.

<sup>13</sup> Le gugapa diuzre Rufo, benne' blau dxéajlë' chee Xránadxu, ne xrne'e, nu'ula na' naque' ca xrnáqueza'.

<sup>14</sup> Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zráłeņ' le'.

<sup>15</sup> Cá'unqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute bi bíchedxu dxelejlı lazre' Cristo, benne' zráłeņ' benne' canı.

<sup>16</sup> Le gugapa diuzre lıwézrele tule xetule, gunıdate lıwézrele. Xúgute cue' bi bíchedxu dxulugape' le'e diuzre.

<sup>17</sup> Le'e, bi bícha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházıe' benne' ca', na' dxulusédeņ' da dxedábaga na ca da nusédele. Le cuasa naga zaj zra' benne' ca'

<sup>18</sup> lawe' da quebe dxelún benne' ca' zrin chee Xránadxu Jesucristo. Dxelune' ca da dxezaca ba lazre' beła' dxen cheequeze', ne dxelezı xe'e benneáchedu ca' quebe ne xeleneze xánne' ca naca dizra' chawe'. Benne' wen lazre' ca' cadite zaj nupé'e, ne zaj nézene' da dxuluchálaje'.

<sup>19</sup> Xúgute bėnneache zaj nézene' ca ba bzúale xtızra' Dios. Chee le na' dxebeda, ne dxaca lazra' gácale ban lazre' gunle da xrlátaje, na' quegá gunle da caleła.

<sup>20</sup> Dios, Bėnnea' dxunne' dxi'u xel-la dxebeza zri lazre' ba zúaqueze' gácaleņ' le'e, chee guchúchujle Satanás da xriwe'. Dxenaba' lau Xránadxu Jesucristo gune' gaca chawe' chee.

<sup>21</sup> Bi bíchedxu Tımoteo dxugápabe' le'e diuzre. Nácabe' lıwezra' lu zrin chee Cristo. Cá'unqueze dxulugape' le'e diuzre benne' waláZR chia' Lucio, ne Jasón, ne Sosıpater.

<sup>22</sup> Neda', Tercio, dxuzúaja' xtızra' Pablo canı, dxugapa' le'e diuzre lu La Xránadxu.

<sup>23</sup> Gayo dxugape' le'e diuzre, bėnnea' zua' lızre', na' dxunne' lızre' naga dxelezraga xúgute benne' bíchedxu canı. Cá'unqueze dxulugape' le'e diuzre Erasto, benne' xu'u lu ne'e dumı chee xezre, ne bi bíchedxu Cuarto.

<sup>24</sup> Dxenaba' Xránadxu Jesucristo gune' gaca chawe' chee xúgutele le'e. ¡Ca'an gaca na!

### *Pablo dxue lá'ane' Dios*

<sup>25</sup> Na'a, dxue lá'anantu' Dios, Bėnnea' séquene' guze' cháchadxe' le'e lu dizra' chawe' da dxuzenda' bėnneache, ne lu da dxusédeda' ca naca chee Jesucristo. Da nıgá naca na tuze nen da ble'e Dios chee da nagache da gulú'u chawe' bagácheze nédxudaute,

<sup>26</sup> san na'a ba ble'e lawe' na ne chee dizra' lá'azxa da buluzúaj benne' ca' buluchálaje' waláz chee Dios, ca da bdxıxruj be'e Dios chadıa chacanna. Ba ble'e lau dizra' chawe' nıgá na'a lau benne' xúgute xezr la xu chee xeléajle'e chee na, ne xuluzúe' dizra' chee na.

<sup>27</sup> Dios, Benne' tu licha', ne Benne' sina, gaca ba Le' chadıa chacanna ne chee Jesucristo. ¡Ca'an gaca na!

## DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

### *Pablo dxuzúaje' chee bíchedxu zaj zre'e xezre Corinto*

<sup>1</sup> Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes

<sup>2</sup> dxuzúaja' da nigá chee le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u.

<sup>3</sup> Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

### *Da chawe' da nápadxu ne chee Cristo*

<sup>4</sup> Dxápequeza' Dios: Xcalenu', ca naca chee ne chee da chawe' da benna Dios le'e ne chee Jesucristo.

<sup>5</sup> Lawe' da nácale tuze nen Cristo, Dios ba benne' le'e xel-la gunní'a zante da naca chee Be' Lá'azxa chee', lu da dxuchálajle, ne lu da nézele.

<sup>6</sup> Ca' naca na, da dxuchálajdxu ca naca chee Cristo ba guca na li chee le'e.

<sup>7</sup> Ca' naca na, quebe bi dxexájrjele ca da dxunna Dios dxi'u dxácate dxebézadxu zra xelá' Xránadxu Jesucristo.

<sup>8</sup> Le' guxru chache' le'e ca zrin zra bzébe, chee quebe nu benne' gaca gusebágu'e le'e zría gate xelá' Xránadxu Jesucristo.

<sup>9</sup> Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

### *Dxaca chupa la'a bi chee Cristo*

<sup>10</sup> Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle.

<sup>11</sup> Da nigá dxapa' le'e, bi bicha', lawe' da buluzén benne' xrtia Cloé neda' dxutíl-lale dizra'.

<sup>12</sup> Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale' dxennale: Netu' da'ntu' Pedro. Xezícale' dxennale: Netu' da'ntu' Cristo.

<sup>13</sup> ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee? ¿Bedxúale le'e nisa lu la Pablo?

<sup>14</sup> Xcalén Dios quebe núlale le'e bchua' nisa san tuze Crispo, ne Gayo

<sup>15</sup> lawe' da quebe nu gaca nna: Lu la Pablo gudxúa' nisa.

<sup>16</sup> Cá'anqueze bchua' nisa benne' xrtia Estéfanos, san quebe dxeajsá lazra' che nu xetú bchua' nisa.

<sup>17</sup> Cristo quebe gusel-le' neda' nu guchúa' nisa, san chee guzenda' bènneache dizra' chawe' chee', quegá nen dizra' sina, chee quebe gaca dácheze da ben Cristo gate gutié' le'e xaga béguaj.

*Cristo naque' xel-la waca, ne xel-la sina chee Dios*



<sup>18</sup> Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios.

<sup>19</sup> Naca na ca naxúaj na lu dizra' lá'azxa. Dxenná Dios:

Guzría xi'a xel-la sina chee benne' sina ca',  
ne guzúa' chala'ala xel-la naxéajni'i chee benne' dxeléajni'ine'.

<sup>20</sup> ¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédené' bèneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nuné' na tu da xálaze lawe' da tuze Le' gaca guselé' bèneache.

<sup>21</sup> Dios nézene' xúgute. Quebe be'e lataj bèneache xelúnbe'e Le' ne chee xel-la sina chee bèneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lálala zaj zra' benne' dxeléquene' naca dizra' nigá tu da xálaze.

<sup>22</sup> Benne' judío ca' dxelaca lazre' xeledé'eng' xel-la waca da za xabáa, na' benne' griego ca' dxelexilaje' xel-la sina,

<sup>23</sup> san dxi'u dxuzendxu bèneache ca naca chee Cristo, ca gutie' le'e xaga béguaj. Benne' judío dxelexedué'eng' chee dizra' nigá, na' benne' quebe zaj naque' judío dxeléquene' naca na tu da ca zeaje na.

<sup>24</sup> Na'a, benne' ca' ba bláwizra Dios, benne' judío ca', ne benne' quebe zaj naque' judío. Cristo nácaqueze' xel-la waca, ne xel-la sina chee Dios.

<sup>25</sup> Da dxeleque bèneache naca tu da xálaze chee Dios nácadxa na sina ca xel-la sina chee bèneache, na' da dxeleque bèneache naca na tu da naca bea nate ni'a na' Dios nápadxa na xel-la waca ca xel-la waca chee bèneache.

<sup>26</sup> Le'e, bi bicha', dxal-la' gueque be'ele ba bláwizra Dios le'e lálala bábaze le'e nácale sina lau bèneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau.

<sup>27</sup> Dios ba guqu'é' benne' ca' dxeleque bèneache zaj naque' benne' xálaze, chee xelexedué' benne' sina ca', ne ba guqu'é' benne' ca' dxeleque bèneache zaj nate ni'a ne'e, chee xelexedué' benne' wal-la ca'.

<sup>28</sup> Dios ba guqu'é' benne' ca' quebe zaj naque' blau, ne benne' ca' zaj nuzúa bèneache chala'ala, benne' ca' quebe nu zaj naque', chee guzague' naze benne' zaj naque' blau,

<sup>29</sup> chee quebe nu seque' gucá'ana szren cuina lau Dios.

<sup>30</sup> Diósqueze ba nuné' le'e tuze nen Jesucristo, ne nuné' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u.

<sup>31</sup> Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

## 2

### *Dizra' ca naca chee Cristo, gud'é' xaga béguaj*

<sup>1</sup> Na'a, bi bicha'dau', gate bedajchálajlęna' le'e da li chee Dios, quebe bhínedá' dizra' sina, ne dizra' zaca.

<sup>2</sup> Gate ne zúalęna' le'e quebe guca lazra' guchálaja' chee bila da xetú san tuze chee Jesucristo, Bènea' gud'é' xaga béguaj.

<sup>3</sup> Gate guzúalęna' le'e ne nátete' ni'a na'a, ne guzrízetea' lawe' da bzreba' quebe guca guna' da nusebaga' Cristo neda'.

4 Gate bchálajlëna' le'e, ne bzenda' le'e dizra' chawe', quebe guca lazra' guna' chéajle chee' nen dizra' sina chee' bënneache da guchálaja', san bena' guxéajle chee' ne chee Be' Lá'azxa, ne ne chee xel-la waca chee Dios

5 chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bënneache.

*Dios dxulé'e cuing' ne chee Be' Lá'azxa*

6 Dxuchálajntu' dizra' sina lau benne' ca' ba zaj zë chache' lu xel-la dxeajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé chie'.

7 Dxuchálajntu' xel-la sina nagache chee Dios, da na' bzua Dios nédxudaute ca bene' xezr la xu nigá, chee ladxu chadía chacanna.

8 Netú benne' ca', benne' dxelenná be'e lu xezr la xu nigá, quebe guléajni'ing' da nigá, lawe' da la guléajni'ing' na quebe buludé'e Xránadxu, Benne' xabáa, le'e xaga béguaj.

9 Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ing' Le'

da ca' quebe nu ne le'e, ne quebe nu ne xen,

ne da quebe nu ne cu'u lazre'.

10 Da caní zaj naca na da ble'e Dios dxi'u ne chee Be' Lá'azxa nase-la Le', lawe' da dxelé'e Be' Lá'azxa xúgute da de, ne duté da xu'u na lu xichaj lázrdau Díósqueze.

11 Ládújla bënneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Díos.

12 Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u.

13 Dxuchálajntu' ca naca da caní nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

14 Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ing' na lawe' da zaj naca na da dxéajni'idxu tuze ne chee Be' Lá'azxa.

15 Bénnea' nazi'e Be' Lá'azxa chee Dios dxezéquene' chéajni'ing' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ing' da dxuséde Be' Lá'azxa dxi'u.

16 Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séquene' guxéajni'ing' Dios? Dxi'u nazidxu ca da xu'u xichaj lázrdau Cristo.

### 3

*Benne' dxelung' tu zren Dios lu zrin chee'*

1 Na'a, le'e, bi bícha'dau', quebe guca guchálajlëna' le'e ca dxuchálajlëna' benne' ca' zúale Be' Lá'azxa chee Dios le', san bchálajlëna' le'e ca dxuchálajlëna' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo.

2 Bsédeda' le'e da quebe zaj naca na stebe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca

na zibaj, lawe' da quebe ne séquele chéajni'ile da zaj naca na stēbe. Cá'anqueze na'a quebe ne séquele chéajni'ile na

<sup>3</sup>lawe' da ne nácale ca zaj naca benne' cun ca nalaje'. Dxácate ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute bēnneache.

<sup>4</sup>Dxácate ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálaje'.

<sup>5</sup>Na'a, ¿nuzra na' Pablo? ¿Nuzra na' Apolos? Nácantu' wēn zrin chee Dios, na' ne chee netu' guxéajlele chee Xránadxu. Tu tuntu' bēntu' zrin chee Xránadxu da blé'enē' netu'.

<sup>6</sup>Neda' guza' bínnedu ca' lu xichaj lázrdaule, bchálajlēna' le'e xrtizra Dios, na' Apolos gudilē' na, san Dios bsegulē' na.

<sup>7</sup>Ca' naca na, ne benne' dxazē', ne benne' dxilē' na, quebe bi zaque', san Dios na' dxunē' xúgute, lawe' da dxusegulē' da du ca'.

<sup>8</sup>Benne' dxelazē', ne benne' dxelilē' zaj naque' lébete, san Dios quízruje' tu tu benne' caní ca naca zrin da belunē'.

<sup>9</sup>Nácantu' wēn zrin tu zren nen Dios, na' le'e nácale ca tu xēzr la xu naga dxun Dios zrin.

Cá'anqueze nácale ca tu xu'u da dxun Dios.

<sup>10</sup>Neda' naca' ca tu wēn xu'u blau, na' Dios benne' neda' lataj gulecha' lane na, na' benne' xula dxusegulē' ze'e na'. Tu tu benne' dxal-la' guxúe xánniē' ca dxusegulē' na.

<sup>11</sup>Québedxa nu seque' cueche' xetú lane ca da ba dxe', da na' naca na Jesucrístoqueze,

<sup>12</sup>san waca nu benne' gusegulē' lawe' na da zaca na ca oro, ne plata, ne xiaj da zaj zaca, u waca gusegulē' lawe' na da quebe zaca na ca blaga', ne xizre, ne luaj laga'.

<sup>13</sup>Zrin da nun tu tu benne' gulé'equeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu.

<sup>14</sup>Che nu benne' nunē' tu zrin da quebe chezxe na lu xi', na' wazi'e lazruj chee'.

<sup>15</sup>Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

<sup>16</sup>¿Quebe nézele le'e nácale xudau' chee Dios, na' Be' Lá'azxa chee Dios zue' lu xichaj lázrdaule?

<sup>17</sup>Che nu benne' gucá'ana dítajē' xudau' nigá chee Dios, Dios guzría xi'e bēnnea' lawe' da naca lá'azxa xudau' chee Dios, na' lé'equezle nácale xudau' na'.

<sup>18</sup>Quebe si xē cuínale. Che núlale dxéquele nácale benne' sina lu da naca chee xēzr la xu nigá, dxal-la' xun cuínale ca tu benne' quebe bi dxaque', chee gunna Dios le'e xel-la sina li.

<sup>19</sup>Xel-la sina chee xēzr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la sina da zaj nápaqueze'.

<sup>20</sup>Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'.

<sup>21</sup>Chee lē na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute da ca' dxechínnele.

<sup>22</sup> Pablo, ne Apolos, ne Pedro, ne xęzr la xu nigá, ne xel-la nabán, ne xel-la gute, ne na'a zra, ne da za za', ne xúgute da ca' zaj naca na cheę gaca da chawe' cheele,

<sup>23</sup> na' lé'equezle xu'ule lu na' Cristo, na' Cristo xu'e lu na' Xradxu Dios.

## 4

### *Zrin dxelún benne' gubáz cheę Cristo*

<sup>1</sup> Ca' naca na, dxal-la' guéquele nácazentu' węn zrin cheę Cristo, ne nabágantu' gusédentu' bęnneache da zaj nagache cheę Dios.

<sup>2</sup> Na'a, benne' nabague' tu zrin, dxun na ba xen gaque' li lazre'.

<sup>3</sup> Neda' quebe dxe'a gunne xue bi dxéquele naca' neda', u bi dxeleque bęnneache naca'. Quebe gaca nnia' xrlátaje u quegá cheę da nuna'

<sup>4</sup> lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'.

<sup>5</sup> Ca' naca na, quebe guchí'ale cheę da ca' che quebe ne zrin zra. Le cueza zra xelá' Xránadxu, na' xebéaje' lu xel-la naxani' ca naca da nagache lu da chul-la. Xránadxu gulé'ene' ca naca da dxulaba lázredxu, na' Dios gulé'ene' chawe' tu tudxu ca da dxal-la' sidxu.

<sup>6</sup> Le'e, bi bicha', dxuchálajęna' le'e da caní cheę gaca chawe' cheęle, dxuzúa' ca tu da gulé'e na le'e Apolos, ne néda'queza'. Dxennía' da nigá cheę gusédele ne cheę netu' cheę quebe gundxale ca da dxue lataj dizra' lá'azxa le'e, ne cheę quebe gucá'ana szren cuínale, ne cheę quebe guzúale chalá'ala le sa' ljwézrele.

<sup>7</sup> ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Lę' benne' chiu' da na', ¿bizr cheę na' dxucá'ana szren cuinu', dxéquenu' lue'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezle wenná bea cheę guntu' netu' le'e tu zren lu xel-la dxenná bea cheele.

<sup>9</sup> Dxéqueda' Dios nuzúe' netu', benne' gubáz cheę', lu lataj bzebe. Nácantu' ca benne' ba zaj nabía xi' cheę gátentu'. Nácantu' ca tu da dxuzę na lau bęnneache, na' dxelenná' gubáz cheę xabáa ca', ne bęnneache netu'.

<sup>10</sup> Dxeleque bęnneache nácantu' netu' tu da xálaze lawe' da dxuntu' zrin cheę Cristo, san le'e dxéquele dxéajni'i xánnele da zaj naca cheę Cristo. Dxeleque bęnneache nate ni'a na'ntu' netu' san le'e dxéquele nácale le'e benne' wal-la. Dxuluzá bęnneache netu' chalá'ala, san dxelape' le'e ba lá'ana.

<sup>11</sup> Ga bzrintę lu zra na'a zra dxeduntu', ne dxebilentu', ne nácantu' gala xídeze, na' bęnneache dxulucháchalęnę' netu', ne quebe zua lízrentu'.

<sup>12</sup> Dxexedú lázrentu' dxuntu' zrin. Dxelennę bęnneache schanni' cheęntu', san netu' dxexechębentu' dizra' chawe'. Zaj nau zi' xuzre' netu' san dxuchaga launtu' na.

<sup>13</sup> Dxelennę' schanni' cheęntu', san netu' dxuchálajęntu' le' da li dutę xel-la zren lazre' cheęntu'. Dxelunę' netu' ca tu xizre bębe, ne ca tu da ba guca ditaj cheę bęnneache ca lu zra na'a zra.

<sup>14</sup> Quegá dxuzúaja' cheęle da nigá cheę xedué'ele, san cheę guzéajni'ida' le'e, nácale ca bi chia' nazri'ite lazra'.

<sup>15</sup> Lácala zaj zúale le'e gaxúa gaxúane benne' dxulusédenę' le'e ca naca cheę Cristo, quebe nu zua xetú xrale. Néda'queza' naca' xrale lu xel-la dxejli lazre' cheęle Cristo lawe' da bzenda' le'e dizra' chawe' cheę Jesucristo.

<sup>16</sup> Ca' naca na, dxata' xúeda' le'e gunle ca dxuna' neda'.

17 Chee le na' dxusel-la' Timoteo xedajná'abe' le'e, nácabe' ca bi li lazre' chia' nazri'ite' lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bènneache gáteteze na', ne lau xúgute' cue' bi chee Cristo.

18 Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e,

19 san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'.

20 Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'.

21 ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

## 5

### *Pablo dxuchi'e chee tu da sban*

1 Ba benda' zua tu benne' ládujla le'e nune' ca zru'ule' xrna zię'. Da nigá naca na tu da sbánle'e da quebe ne xelún benne' quebe zaj núnbe'ene' Dios.

2 Ca naca da na' le'e ne dxucá'ana szren cuínale. Dxal-la' cuezre xáchele. Bénnea' nune' da nigá dxal-la' xebéajle le' ládujla le'e.

3 Quebe zua' neda' naga zúale lu beła' dxen chia', san naca cáteze zúalena' le'e lu be' nácaqueza', na' ba bchi'a chee bénnea' nune' dul-la nigá ca tu benne' zúalétequeze le'e.

4 Le zraga le'e lu La Xránadxu Jesucristo, na' gaca na cáteze neda' súalena' le'e lu be' nácaqueza', na' xel-la waca chee Xránadxu Jesús suale na le'e.

5 Nadxa dxal-la' xudele bénnea' lu na' Satanás da xriwe', na' lácala cuía xi' beła' dxen chee' na' be' nácaqueze' la na lu zra xelá' Xránadxu Jesús.

6 Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'?

7 Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutie' waláz cheedxu. Naque' cheedxu zriła', be dxelutie' laní pascua.

8 Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da caleła, ne lu da zrinnaj, da ca' zaj naca na ca cua zichaj gula na'.

9 Lu da bzujaja' cheele nédxudxa gucha' le'e quebe guchixre cheele nen benne' ca' dxelune' da sban.

10 Quebe gucha' le'e xecuásatequezele chee benne' zaj zre'e xezr la xu nigá, benne' dxelune' da sban, ne benne' wecude' ca', ne benne' gubán ca', ne benne' dxelúe lá'ané' bedáu' xiaj xaga ca', lawe' da chee quebe guchixre cheele nen benne' caní, dxun na ba xen xedxúajle xezr la xu nigá.

11 Da guca lazra' xapa' le'e naca na chee quebe guchixre cheele nen netú benne' dxenné' naque' bíchedxu, san dxune' da sban, u naque' benne' wecude', u dxue lá'ané' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní.

12-13 Quegá naca chia' guchi'a chee benne' dxeledá cúzrele. Dios guchi'e chee benne' ca'. Le'e dxal-la' guchi'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

## 6

### *Zria da dxelagu ljwezre bi ca' chee Cristo*

<sup>1</sup> Gate tule le'e zua da dxaca chee le nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bichele?

<sup>2</sup> ¿Quebe nézele le'e, benne' zaj naca bi chee Dios xuluchi'e ca da dxelún bèneache chee xezr la xu nigá? Che le'e guchi'ale chee bèneache lu xezr la xu nigá, ¿quebe naca chee guchi'ale chee tu da dauze?

<sup>3</sup> ¿Quebe nézele le'e guchi'adxu chee gubáz chee xabáa ca'? Cá'anqueze dxal-la' guchi'adxu da naca chee xezr la xu nigá.

<sup>4</sup> Che le'e zua da dxaca chee le lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchi'e chee da na'?

<sup>5</sup> Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ing' chee guchi'e tu da dxaca chee bi bíchedxu ca'?

<sup>6</sup> ¿Dxun na ba xen tu bi bíchedxu cheajtágube' zria da dxaca chee be' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

<sup>7</sup> Che zua da dxedíl-lalele biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuane' chee le?

<sup>8</sup> Le'e dxunle da quebe naca na xrlátaje, ne dxebanle, na' dxunle caní chee bi bichele.

<sup>9-10</sup> ¿Quebe nézele le'e, quebe xelexú'u benne' wen da calela naga dxenná bea Dios? Quebe güele lataj nu si xé le'e. Quebe xelexú'u naga dxenná bea Dios benne' ca' dxeluné' da sban, ne benne' ca' dxelúe lá'ane' bedáu' xiaj xaga, ne benne' ca' dxelezúalene' zru'ula benne' xula, ne benne' ca' dxeledálene' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dxulutupe' dizra' bizruj, ne benne' ca' dxulucache lane'.

<sup>11</sup> Caní gúcale bál-lale le'e, san na'a bache bexádxele lu xichaj lázrdaule, ne nuzúa cuinale lu na' Dios, na' nazi' lu ne'e le'e lu La Xránadxu Jesús ne chee Be' Lá'azxa chee Dios cheedxu.

### *Naca lá'azxa bēla' dxen cheedxu*

<sup>12</sup> Da li naca da dxelenné': Nápadxu lataj gundxu da dxaca lazre' tu tudxu. Quegá xúgutē na naca na da ba neza. Awe', napa tu benne' lataj gunē' da dxaca lazre', san quebe dxal-la' gu'e lataj bi da nna be'e na le'.

<sup>13</sup> Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpatē na. Quebe naca bēla' dxen cheedxu chee gun na da sban. Bēla' dxen cheedxu naca na da gunézrujdxu chee Xránadxu, na' Xránadxu naque' Bēne' guchínene' bēla' dxen cheedxu lu da xrlátaje.

<sup>14</sup> Ca ben Dios bsebanē' Xránadxu ládujla benne' gate ca', cá'anqueze gusebanē' dxi'u nen xel-la waca chee'.

<sup>15</sup> ¿Quebe nézele le'e bela' dxen chee naca na chee Cristo? ¿Wacá'a tu da naca na bela' dxen chee Cristo, ne guchaga' na nen bela' dxen chee tu nu'ula wen da sban? ¡Cabata'!

<sup>16</sup> ¿Quebe nézele le'e gate tu benne' biu dxuchague' tu nu'ula wen da sban dxúpatē' zaj naque' ca tuze bela' dxen? Naxúaj lu dizra' lá'azxa da dxenná na: Dxúpatē' xelexaque' tuze bela' dxen.

<sup>17</sup> Gate tu benne' dxuchague' Xránadxu, dxelexaque' tuze be'.

<sup>18</sup> Le guzrunnaj chee da sban. Zaj nita dul-la xula da dxun benne' da quebe dxulucá'ana ditaj na bela' dxen chee', san benne' dxuchague' nu'ula quebe naca zru'ule' dxune' dul-la lu bela' dxen cheequeze'.

<sup>19</sup> ¿Quebe nézele le'e naca bela' dxen cheele xudau' chee Be' Lá'azxa, Bénnea' nunna Dios le'e, na' Be' Lá'azxa zuē' xichaj lárdaule? Quebe nácale xrana bela' dxen chee,

<sup>20</sup> lawe' da guzi' Dios le' na nen tu lazruj zrentē. Chee le' na', dxal-la' gápale ba lá'ana Dios nen bela' dxen chee, ne nen be' nácaqueze, lawe' da dxúpatē na' zaj naca na chee Dios.

## 7

### *Ca naca chee xel-la dxuchaga na'*

<sup>1</sup> Na'a xechēba' ca zaj naca da bchébele neda'. Da li naca xrlátaje quebe guchaga na' tu benne'.

<sup>2</sup> Lawe' da dxácale'ē da sban naga zúale, tu tu benne' biu dxal-la' súalēne' nu'ula cheequeze', na' tu tu nu'ula dxal-la' súalēne' benne' biu cheequeze'.

<sup>3</sup> Benne' biu dxal-la' gune' nen zru'ule' da nabague' chee zru'ule', na' cá'anqueze nu'ula dxal-la' gune' nen benne' biu chee' da nabague' chee benne' chee'.

<sup>4</sup> Nu'ula na' quebe naque' xrana bela' dxen chee', san naca na chee benne' biu chee'. Cá'anqueze benne' biu quebe naque' xrana bela' dxen chee', san naca na chee zru'ule'.

<sup>5</sup> Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee xuluzúa cuine' lau Dios chee xuluchálajlēne' Le'. Te na' dxal-la' xuluchaga ljwezre' chee quebe seque' Satanás nna be'e na le' che quebe xelezéquene' xelenná be'e cuine'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na.

<sup>7</sup> Neda' dxezá lazra' súaale xúgutēle ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegu', ne nu'ula wezēbe, naca xrlátaje xelexegá'anē' cá'aze ca zua' neda'.

<sup>9</sup> Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu bela' dxen chee'.

<sup>10</sup> Benne' zaj nuchaga ne'e dxapa' nu'ula quebe gusanē' benne' biu chee'. Quebe naca cheeza' da nadxixruj bea nigá, san naca na da dxun Xránadxu.

<sup>11</sup> Che nu nu'ula gusanē' benne' biu chee', dxal-la' xegá'anē' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusanē' zru'ule'.

<sup>12</sup> Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'ē chee Xránadxu, dxéquene' xrlátaje zúalēne' benne' chee', bi bíchedxu na' quebe dxal-la' gusanē' le'.

13 Che benne' biu chee tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusané' benne' biu chee' na'.

14 Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zri'inele le'e xelácabe' ca zri'ine benne' quebe zaj naque' chee Dios, san da li zaj nácabe' ca bi chee Dios.

15 Che benne' biu na' u zru'ule', benne' quebe dxéajle'e chee Xránadxu, dxaca lázrtেকেze' gusané' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu.

16 Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

17 Ájatęze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute' cue' bi chee Cristo.

18 Che Dios dxenné' tu benne' biu nadxugu lu belá' chee' da dxulé'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu belá' chee' da na', quebe dxal-la' chugu lu belá' chee' da na'.

19 Quebe bi naca che nadxugu da na' lu belá' cheedxu, u quebe. Da dxun na ba xen naca gundxu da dxaca lazre' Dios.

20 Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'.

21 Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na.

22 Bénnea' guque' benne' nada'u gate gunné Xránadxu le' naque' ca benne' quebe nada'u chee guné' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu.

23 Dios ba ná'awe' le'e nen tu lazruj zrente. Quebe güele lataj nu benne' guné' le'e benne' zaj nada'u.

24 Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

25 Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'.

26 Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e.

27 Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u.

28 Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stébe lu zra caní, na' dxaca lazra' quebe súale stébe caní.

29 Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee Cristo ca dxelún benne' quebe zaj nuchaga ne'e.



<sup>30</sup> Benne' dxelebezre xache' dxal-la' xelunē' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelunē' da naca chee Cristo ca dxelún benne' quebe zaj zuē' xel-la dxebé, na' benne' dxelá'awe' dxal-la' xelunē' da naca chee Cristo ca dxelún benne' quebe zaj nape' da na' dxelá'awe'.

<sup>31</sup> Benne' dxelezi'e ba neza lu xezr la xu nigá dxal-la' xelunē' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabe' wegū' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu.

<sup>33</sup> Gate ba nuchaga ne'e, dxe'e gunne xue da naca chee xezr la xu nigá chee gunē' da dxezaca ba lazre' zru'ule'.

<sup>34</sup> Cá'anqueze dxaca chee nu'ula zua benne' biu chee', ne nu'ula wegū'. Nu'ula wegū' dxe'ebe' gunne xue da naca chee Xránadxu chee chu'ube' lu na' Dios dutē' bela' dxen cheebe', ne dutē' be' cheebe', san nu'ula zua benne' biu chee' dxe'e gunne xue da naca chee xezr la xu nigá chee gunē' da xezaca ba lazre' benne' chee'.

<sup>35</sup> Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

<sup>36</sup> Che nu benne' dxéquenē' nácadxa xrlátaje guchaga na' zrí'ine' nu'ula lawe' da ba dxedé xel-la cuide' cheebe', ne naca da dxal-la' gunbe', dxal-la' gunē' da dxéquenē' naca xrlátaje. Waca guchaga na'abe'. Quebe naca na dul-la.

<sup>37</sup> Che nu benne' quebe dxéquenē' dxun na ba xen, ne che nape' lataj gunē' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegū', dxunē' da xrlátaje.

<sup>38</sup> Ca' naca na, benne' dxu'e lataj guchaga na'abe' zrí'ine' nu'ula, dxunē' da xrlátaje, na' bénnea' quebe dxu'e lataj dxunē' da nácadxa xrlátaje.

<sup>39</sup> Nu'ula zua benne' biu chee' nuchague' bénnea' ne chee da nadxixruj bea na dxácatē' ne zuē' nabane', san che gate benne' chee', de' lataj nu'ula na' guchaga ne'e nen núteteze benne' biu, san dxun na ba xen dxéajle'e chee Xránadxu.

<sup>40</sup> Gácadxa chee' da ba neza che xegá'ang' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

## 8

### *Xel-la wagu da zaj nuzúa bénneache lau bedáu' xiaj xaga*

<sup>1</sup> Na'a guchálaja' ca naca chee xel-la wagu da zaj nuzúa bénneache lau bedáu' xiaj xaga. Da li xúgute' dxu nápaxu xel-la dxéajni'i' ca naca da nigá. Xel-la dxéajni'i' dxun na dxi'u benne' dxulucá'ana szren cuina, san xel-la zri'i' lazre' dxusegula na dxi'u lu xel-la dxeajlí lazre' cheedxu.

<sup>2</sup> Che nu benne' dxéquenē' nape' dutē' xel-la dxéajni'i', quebe ne chéajni'ine' ca dxal-la' chéajni'ine'.

<sup>3</sup> Che nu benne' nazrí'ine' Dios, Dios ba nazí' lu ne'e bénnea'.

<sup>4</sup> Na'a, ca naca chee xel-la wagu da zaj nuzúa bénneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bénnea' naque' Dios.

<sup>5</sup> Lácala zaj zra' xabáa, ne xezr la xu nigá da zante' da dxeleque bénneache zaj naca na dios, ne chee benne' caní zante' dios zaj zra na, ne zante' xrane' zaj zra na,

<sup>6</sup> cheꝑdxu dxi'u che nácadxu cheꝑ Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu cheꝑ guchíneꝑ dxi'u. Cá'anqueze tuze Bénnea' naque' Xránadxu, Jesucristo. Ne cheꝑ Le' guzrá' xúgute da de, na' zúadxu dxi'u ne cheꝑ Le'.

<sup>7</sup> Quegá xúgute bi cheꝑ Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na cheꝑ bedáu', na' lawe' da quebe zaj ze chache' lu xichaj lázrdawe', dxeléquene' zaj nabague' zria ne cheꝑ da dxelawe'.

<sup>8</sup> Da na' dxágudxu quebe dxucá'anadxa na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calela che quebe dxágudxu.

<sup>9</sup> Le guxúe xanne' cuínale ca naca lataj da nápaie bi gágue cheꝑ quebe guzría xile tu benne' quebe ze chache' lu xel-la dxeajlí lazre' cheꝑ.

<sup>10</sup> Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe ze chache' lu xel-la dxeajlí lazre' cheꝑ, lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bènneache lau tu dios quebe bi naca.

<sup>11</sup> Ca' naca na, lue', lawe' da napu' xel-la dxéajni'i, guzría xi'u tu bi bichu' quebe ze chache' lu xel-la dxeajlí lazre' cheꝑ, na' naque' benne' gute Cristo waláz cheꝑ.

<sup>12</sup> Ca' naca na, gate dxuzría xile bi bíchedxu quebe zaj ze chache' lu xel-la dxeajlí lazre' cheꝑ, dxunle dul-la da dxuzúa Cristoqueze chalá'ala.

<sup>13</sup> Cheꝑ le' na', che guzría xi'a tu bi bicha' ne cheꝑ da dxawa', nácadxa chawe' cabátadxa gawa' be'la cheꝑ quebe guzría xi'a le'.

## 9

### *Da naca cheꝑ tu benne' gubáz cheꝑ Cristo*

<sup>1</sup> Naca chia' naca' gubáz cheꝑ Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi cheꝑ Cristo ne cheꝑ zrin be'na' cheꝑ.

<sup>2</sup> Che dxeleque xezícadxa benne' quebe naca' gubáz cheꝑ Cristo, san dxun na ba xen guéquele le'e naca' gubáz cheꝑ lawe' da dxunna bea da nácale cheꝑ Xránadxu da li naca' gubáz cheꝑ.

<sup>3</sup> Da nigá naca na da dxapa' benne' ca' dxelezí tizre' neda':

<sup>4</sup> Naca chia' si' lu na'a da xi'aj gawa' ne cheꝑ zrin da dxuna'.

<sup>5</sup> Cá'anqueze naca chia' guchaga na'a tu nu'ula zandxu cheꝑ chéajleꝑ neda' ca dxelún xezícadxa benne' gubáz cheꝑ Cristo, ne benne' bíchequeze Xránadxu, ne Pedro.

<sup>6</sup> ¿Dxéquele tuze Bernabé, ne neda' dxal-la' guntu' zrin cheꝑ gata' da xi'aj gáguntu' gate dxuzénentu' bènneache dizra' chawe'?

<sup>7</sup> ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na? ¿Nuzra benne' gusegule' zrila' che quebe xequé'e xicha zraba'?

<sup>8</sup> Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés.

<sup>9</sup> Naxúaj lu da nadxixruj bea na da dxenná Dios: Quebe cu'ule xixruj dxu'a bezre, be dxíchuba' zrua' xtila. Quebe gunná Dios da nigá lawe' da dxue lazre' cheꝑ bezre cá'aze.

<sup>10</sup> Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' bezre, ne benne' dxine' dxal-la' xelebeza lazre' xelexezi'e ca naca da gunna lina da xelaze'.

<sup>11</sup> Na'a, che netu' ba gúzantu' lu xichaj lárdaule da naca na chee Be' Lá'azxa, ¿quebe dxal-la' si' lu na'ntu' látedauze da naca chee lu xezr la xu nigá?

<sup>12</sup> Che xezicadxa benne' naca chee' xelezi' lu ne'e da naca chee, ¿gázdaxa netu'?

Quebe ne guchínentu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo.

<sup>13</sup> Ba nézele benne' dxelune' zrin chee xudau' dxelawe' chee da xu'u lu xudau' na', na' benne' dxelune' zrin chee lu cugu naga dxeluti'e be xixre'du ca' lau Dios dxelawe' bela' chee béadu ca'.

<sup>14</sup> Cá'anqueze ba nun Xránadxu chee benne' dxuluchalaje' dizra' chawe', xelezi'e ba neza zrin da dxelune'.

<sup>15</sup> Cabata' guchíneda' netú da caní zaj naca na chia', ne quebe dxuzúaja' da nigá chee gúmale neda' late'. Gaca lázredxa' gatia' quézcala nu gucuasa da ba neza da napa'.

<sup>16</sup> Quebe dxal-la' gucá'ana szren cuina' lawe' da dxuzenda' bénneache dizra' chawe' chee Cristo, lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá.

<sup>17</sup> Chee le na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'.

<sup>18</sup> Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

<sup>19</sup> Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo.

<sup>20</sup> Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'.

<sup>21</sup> Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo.

<sup>22</sup> Gate zua' ládujla benne' ca' quebe zaj ze chache' lu xel-la dxeajli lazre' chee dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo.

<sup>23</sup> Dxuna' xúgute da nigá ne chee dizra' chawe' chee Cristo chee gapa' tu da ba neza chee na.

<sup>24</sup> Ba nézquezle le'e tu lu da huitaj benne' zan dxesi'aca chégüe' na tuze' dxezrué'ene' lataj blau. Le sa'aca chegu le'e chee zrué'ele da dxunna Cristo.

<sup>25</sup> Xúgute benne' ca' dxulupá'a cuine' chee xelu'e da huitaj, dxuluzúe' chalá'ala xúgute da dxun na caléla chee'. Benne' caní dxelune' da caní chee xelezi' lu ne'e tu da guzúe' xichaje' da naca na laga' da québequeze si bea, san dxi'u dxundxu zrin chee zrué'edxu da zeajli canna.

<sup>26</sup> Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'.

<sup>27</sup> Neda' dxudéa' xel-la zi' bēla' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

## 10

### *Da dxuzéajni' na dxi'u ca naca chee bedáu' xiaj xaga ca'*

<sup>1</sup> Dxaca lazra' nézele, bi bícha'dau', ca guca chee xra xrtáudxu ca' xjácalēng' Moisés. Dios guché'e xúgute benne' ca' ne chee beuj bza na', na' xúgute' guledé'e ládujla nísadau' da nazí le na Xrna.

<sup>2</sup> Ca' naca na, waca nnadxu xúgute' beledxúē' nisa lu nísadau' na', ne gulaque' tuze nen Moisés gate guledálēng' beuj bza na'.

<sup>3</sup> Cá' anqueze xúgute' gulawē' tuze xel-la wagu da bnezruj Dios le',

<sup>4</sup> ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Cristoqueze, Bénnea' guxéajlēng' benne' ca' le'e xixre' lawe' lataj na'.

<sup>5</sup> Benne' zan benne' ca' quebe belunē' da bezaca ba lazre' Dios, na' chee le na' gultatīē' le'e xixre' lawe' lataj.

<sup>6</sup> Xúgute' da caní guca na chee guzéajni' na dxi'u chee quebe sa lázredxu da calela ca', ca belún benne' ca'.

<sup>7</sup> Chee le na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawē' lau bedáu' xiaj xaga, na' belexase' chee buluxé'e.

<sup>8</sup> Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxuē'.

<sup>9</sup> Quebe dxal-la' guchínedxu xel-la zren lazre' chee Xránadxu chee gundxu da calela ca belún bal-la benne' ca', na' gultatīē', gate gulí'ina bēla' le'.

<sup>10</sup> Quebe nnele chee Dios ca gulennē bal-la benne' ca', na' gubáz chee xabáa chee xel-la gute bēte' benne' ca'.

<sup>11</sup> Xúgute' da caní gulezaca xra xrtáudxu, na' zaj naxúaj na lu dizra' lá'azxa chee guzéajni' na dxi'u, zúadxu lu zra bzebe caní.

<sup>12</sup> Ca' naca na, nu benne' dxéquēng' zē chache' lu da naca chee Dios dxal-la' guxúe xanne' cuīng' chee quebe cheajcházīē'.

<sup>13</sup> Da dxelún zréaje le'e naca na tuze ca da dxelún zréaje xúgute' bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

<sup>14</sup> Chee le na', bi bicha' nazri'ite lazra', québedxa gucá'ana szrenle bedáu' xiaj xaga ca'.

<sup>15</sup> Dxuchálajlēna' le'e ca dxuchálajlēna' benne' dxeléajni'ine', na' lé'eequeze waca guchí'ale chee da dxapa' le'e.

<sup>16</sup> Gate dxágadxu da dxucube na ca guca gate gute Xránadxu, dxápaxdu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga bégua. Xeta xtila na' da dxwázrujdxu dxulé'e na xezidxu ba neza bēla' dxen chee Cristo da bdeg' waláz cheedxu le'e xaga bégua.

<sup>17</sup> Lácala naxandxu, xúgutedxu dxágudxu tu xeta xtilaqueze da naca na tuze, da na' dxulé'e na nácadxu ca tuze bēla' dxen chee Cristo.

<sup>18</sup> Le nna'xque ca zaj naca benne' Israel ca'. Benne' caní, benne' dxelawē' da dxuluzré'e lu cugu chee Dios dxelezi'e ba neza lu cugu na'.

<sup>19</sup> Quebe dxennía' naca tu bedáu' xiaj xaga tu da zaca, na' belá' da dxuluzría bènneache lau bedáu' xiaj xaga quebe zácadxa ca bíteteze xetú belá'.

<sup>20</sup> Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzríe' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'.

<sup>21</sup> Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'.

<sup>22</sup> ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

*Da naca cheédxu gundxu, ne ca naca xel-la zri'i lazre'*

<sup>23</sup> Da li naca da na' dxelenná bènneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca chee nu benne' guné' ca dxaca lazre' san quegá xúgute gusegula na le' lu xel-la dxeajli lazre' chee'.

<sup>24</sup> Dخال-la' gundxu da gaca chawe' chee benne' xula, ne quegá da gaca na chawe' cheézedxu.

<sup>25</sup> Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stébe xichaj lázrdaule,

<sup>26</sup> lawe' da zaj naca chee Xránadxu xezr la xu nigá, ne xúgute da ca' zaj zra' lu xezr la xu.

<sup>27</sup> Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute da guzríe' laule, ne quebe naba xúzrele chee na chee quebe sua stébe xichaj lázrdaule.

<sup>28</sup> Che nna nu benne' zúalé le'e, na' xe'e le'e: "Belá' nigá bache guzría na lau bedáu' xiaj xaga", quebe gágule na, chee quebe guzúale stébe bènnea' gunné' ca', ne chee quebe sua stébe xichaj lázrdaule.

<sup>29</sup> Dxennía' da nigá chee xichaj lázrdau benne' zúalene' lue', ne quegá chee xichaj lázrdau' lué'queze.

Waca naba xuzre tu benne': "¿Bizr chee na' dxuchi'u da naca chia' lawe' da sua stébe xichaj lázrdau benne' xula?"

<sup>30</sup> Che dxapa' Dios: Xcalenu' chee da dxawa', ¿bizr chee na' xelezí tizre' neda' chee dá dxawa'?"

<sup>31</sup> Chee le' na', che dxágule u dxí'ajle, u bíteteze da dxunle, le gun xúgute chee gaca ba Dios.

<sup>32</sup> Quebe bi gunle da guzúa na stébe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios.

<sup>33</sup> Neda' dxuna' ba xuzre guna' da xelezaca ba lazre' xúgute bènneache ca naca xúgute da dxuna'. Quebe dxuna' da gaca chawe' cheeza' san da gaca chawe' chee xezícadxa bènneache chee xeelé'.

## 11

<sup>1</sup> Le gun ca dxuna' neda', ca neda' dxúnqueza' ca ben Cristo.

*Da dxelún nu'ula naga zaj nazraga bi chee Cristo*

<sup>2</sup> Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e.

<sup>3</sup> Na'a dxaca lazra' chéajini'ile naca Cristo xíchaję cheę tu tu benne' biu, na' benne' biu naque' xíchaję cheę zru'ule', ca naca Dios, naque' xíchaję cheę Cristo.

<sup>4</sup> Che tu benne' biu gugácųę' xíchaję' gate dxuchálajęne' Dios naga zaj nadupa bi cheę Cristo, u gate dxuchálaję' waláz cheę Dios, naca na tu xel-la stu' cheę Bénnea' naque' xíchaję'.

<sup>5</sup> Che tu nu'ula quebe gugácųę' xíchaję' gate dxuchálajęne' Dios, u gate dxuchálaję' waláz cheę Dios, naca na tu xel-la stu' cheę', lawe' da dxun cuinę' ca tu benne' biu. Lébezqueze naca na chugųę' xíchaję'.

<sup>6</sup> Che tu nu'ula quebe gugacu xíchaję', nácadxa xrlátaje chugųę' tu chi'ize ca naca xicha xíchaję'. Na' che naca na tu xel-la stu' cheę nu'ula che chugųę' xíchaję', u che guzųę' zrígaze xíchaję' ca dxun tu benne' biu, dxal-la' gugacu xíchaję' naga zaj nazraga bi cheę Cristo.

<sup>7</sup> Benne' biu quebe dxal-la' gugacu xíchaję' lawe' da naque' lu'a le saca Dios, na' da naque' dxulé'e na ca naca xel-la szren cheę Dios. Da naca nu'ula dxulé'e na ca naca xel-la szren cheę benne' biu.

<sup>8</sup> Gate ben Dios benne' biu, quebe bi guléaję' le' lu belá' dxen cheę nu'ula, san guléaję' lu belá' dxen cheę benne' biu da na' bexung'e nu'ula na'.

<sup>9</sup> Dios bene' nu'ula na' cheę nna be'e benne' biu le', ne quegá bene' benne' biu cheę nna be'e nu'ula le'.

<sup>10</sup> Cheę le' na' nu'ula dxal-la' guzųę' xíchaję' tu da dxulé'e na zua nu dxenná be'e le' cheę quebe gun zrėjene' gubáz cheę xabáa ca' cheę Dios.

<sup>11</sup> Lu da nácadxu cheę Cristo, benne' biu dxechinne' nu'ula, ne cá'anqueze dxechín nu'ula benne' biu.

<sup>12</sup> Da li Dios guléaję' nu'ula na' lu belá' dxen cheę benne' biu, na' cá'anqueze benne' biu dxálaję' cheę nu'ula, na' xúgųędxu zadxu lu na' Dios.

<sup>13</sup> Le nna'xque le'e che naca xrlátaje che tu nu'ula guchálajęne' Dios, ne quebe gugacu xíchaję'.

<sup>14</sup> Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaję',

<sup>15</sup> na' naca tu da ba lá'ana cheę nu'ula se na tunna, lawe' da nunna Dios le' xicha xíchaję' tunna cheę gugacu na xíchaję'.

<sup>16</sup> Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga cheę Cristo quebe núnbeadxu xetú da xula.

### *Da dxelún benne', gate dxelawe' da naca cheę Xránadxu*

<sup>17</sup> Ca naca cheę da nigá quebe dxapa' le'e ba lá'ana lawe' da dxaca da calela cheęle gate nazrágale, ne quegá da chawe'.

<sup>18</sup> Da nédxuteca, dxulé'e neda' gate dxezrágale cheę güe lá'anale Dios nácale chupa la'a. Dxéqueda' naca da li da dxelenné'.

<sup>19</sup> Dxál-la'queze gácale chupa la'a cheę gulé'e lawe' nu benne' ládujla le'e da li naque' bi cheę Cristo.

<sup>20</sup> Cheę le' na' gate dxezrágale le'e cheę gágule da naca cheę Xránadxu, da li québedxa naca na cheę Xránadxu.

<sup>21</sup> Gate dxezrín zra dxágule, tu tule le'e dxebía lau cheęle dxecá'ale xel-la wagu cha cheęle, na' bál-lale le'e dxegá'anale dxedunle, na' xezícadxale dxezúzrele.

<sup>22</sup> ¿Quebe bi de chee le naga xi'aj gágule? Ca'an dxunle, dxuzúale chala'ala bi ca' chee Dios, ne dxugu'ule xel-la stu'benne' ca' quebe bi de chee'. ¿Bízaqueze xapa' le'e? ¿Dxal-la' gapa' le'e ba lá'ana? ¡Cabata'!

*Da dxágudxu da naca chee Xránadxu*

(Mt. 26.26-29; Mr. 14.22-25; Lc. 22.14-20)

<sup>23</sup> Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdeé' Xránadxu Jesús lu na' benne' guledábague' Le', na' Jesús guqué'e xeta xtila,

<sup>24</sup> na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz cheele. Le gun da nigá chee cheajsá lázrele neda'."

<sup>25</sup> Cá'anqueze, gudé gulawe', guqué'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xi'ajle na, le gun na chee cheajsá lázrele neda'."

<sup>26</sup> Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xi'ajle xrisa uva nigá.

*Ca dxal-la' gágudxu da naca chee Xránadxu*

<sup>27</sup> Ca' naca na, nüteteze benne' gawe' xeta xtila nigá, u xi'aje' xrisa uva chee Xránadxu, ne quebe dxape' ba lá'ana na, na' dxuné' dul-la da dxuzúa bela' dxen chee Xránadxu chala'ala.

<sup>28</sup> Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xi'ajdxu xrisa uva nigá,

<sup>29</sup> lawe' da che xi'aj gágudxu, ne quebe dxéqedxu dxulé'e na ca naca bela' dxen chee Xránadxu, na' da xi'aj gágudxu gun na bágadxu zria.

<sup>30</sup> Chee le na' benne' zan ládujla le'e quebe chawe' zaj zue', ne zaj nate ni'a ne'e, na' bal-la benne' ládujla le'e ba gulatie'.

<sup>31</sup> Che guxúe xanne' cuínadxu, quebe gun na ba xen guchi'a Xránadxu cheedxu caní.

<sup>32</sup> Gate Xránadxu dxuchi'e cheedxu, dxudée' dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezragale chee gágule da naca chee Xránadxu, le cueza ljwézrele tule xetule chee bi gágule.

<sup>34</sup> Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazrágale. Xezícadxa da ca' dxelaca chee le gucá'ana' chawe' gate xida' xedajnná'a le'e.

## 12

*Xel-la waca ca' da dxunna Be' Lá'azxa tu tudxu dxi'u*

<sup>1</sup> Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézqueze gate na' quebe ne chéajlele chee Xránadxu, be'e le lataj gulezrube xue' le'e chee xeajé lá'anale bedáu' xiaj xaga ca', da quebe dxelenné na.

<sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin,

san tuze naca Xránadxu, Bénnea' dxundxu zrin chee'.

<sup>6</sup> Zaj nazrá' ca da gaca gundxu,

san tuze naca Dios, Bénnea' dxunne' dxi'u xel-la waca gundxu na.

<sup>7</sup> Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutedxu.

<sup>8</sup> Ne chee Be' Lá'azxa dxunne' bal-la benne' xel-la waca xuluchálaje' dutē xel-la sina,

na' xebal-le' ne chee Be' ná'queze dxunne' le' xel-la waca xuluchálaje' dutē xel-la naxéajni'.

<sup>9</sup> Xebal-le' dxelezi'e xel-la dxeajlí lazre' ne chee Be' ná'queze,

na' xebal-le' dxelezi'e xel-la waca chee xelexunē' benne' wē' ca'.

<sup>10</sup> Xebal-le' dxelezi'e xel-la waca xelunē' xel-la waca ca' chee xabáa,

na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézene' nu be' dxuchalaj na lu dxu'a bénneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtíizrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

<sup>11</sup> Xúgute' da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

### *Xúgutedxu nucháqadxu tuze bēla' dxen*

<sup>12</sup> Zua cheedxu tu bēla' dxen da napa na zánete' cue'. Dxi'u, dxéajledxu chee Cristo, nácadxu ca tuze bēla' dxen chee Cristo.

<sup>13</sup> Xúgutedxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bēla' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

<sup>14</sup> Tu bēla' dxen quebe naca na tu cue'ze, san naca na zane' cue'.

<sup>15</sup> Che ní'adxu nna na: Quebe naca' na'u, ne chee le' na' quebe naca' chee bēla' dxen chiu', quegá da ni gun na québedxa naca na chee bēla' dxen na'.

<sup>16</sup> Na' che náqadxu nna na: Quebe naca' lau', ne chee le' na' quebe naca' chee bēla' dxen chiu', quegá da ni gun na québedxa naca na chee bēla' dxen na'.

<sup>17</sup> Che dutē bēla' dxen cheedxu naca na laudxu, ¿ájazra gundxu xendxu? Che dutē bēla' dxen cheedxu naca na náqadxu, ¿ájazra gundxu lé'edxu?

<sup>18</sup> Dios nuzúe' cha chee cue' bēla' dxen na' naga dxaca lazre' Le'.

<sup>19</sup> Che dutē na' naca na tuze cue', ¿gazra zúaqueze bēla' dxen na'?

<sup>20</sup> Ca naca na, lácala naca na zane' cue', tuze bēla' dxen naca na.

<sup>21</sup> Xia laudxu quebe dxal-la' xē na nadxu: Quebe nachinda' lue', ne quebe dxal-la' nna xíchajdxu, xē na ní'adxu: Quebe nachinda' le'e.

<sup>22</sup> Da naca na, da zaj naca chee bēla' dxen cheedxu da dxéquedxu quebe zaj nácateca na blau, zaj naca na da dxechínedxadxu,

<sup>23</sup> Da zaj naca na chee bēla' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu,

<sup>24</sup> da quebe dxun na ba xen gundxu chee da ca' gaca gulé'edxu. Ca' naca na, Dios bene' bēla' dxen cheedxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana,



<sup>25</sup> chee quebe gaca chupa la'a bela' dxen cheedxu. Tu tu cue' chee bela' dxen cue' na gunne xue chee ljwezre na.

<sup>26</sup> Che dxedé xel-la zi' tu da naca na chee bela' dxen cheedxu, xúgute da ca' dxeledé na xel-la zi', na' che tu da na' gaca da ba neza chee na, na' xúgute da ca' dxelebé na tu zren.

<sup>27</sup> Ca' naca na, le'e nácale bela' dxen chee Cristo, na' tu tule nácale ca tu tu cue' chee bela' dxen chee' na'.

<sup>28</sup> Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédené' bi chee' ca', na' gudé na' nuzré'e benne' dxeluné' xel-la waca da za xabáa. Gudé na' nuzré'e benne' ca' dxelexuné' benne' we' ca', ne benne' ca' dxelácalené' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézené'.

<sup>29</sup> ¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxuluséde xúgute' bi chee' ca'? ¿Dxelún xúgute' xel-la waca chee xabáa?

<sup>30</sup> ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluxuzájla'a xúgute' dizra' nazrá' na'? ¡Cabi!

<sup>31</sup> Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

## 13

### *Xel-la zri'i lazre' li*

<sup>1</sup> Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na.

<sup>2</sup> Che dxuchálaja' waláz chee Dios, ne che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxeajli lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'.

<sup>3</sup> Che quísia' xúgute da de' chia', ne che guzúa' bela' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

<sup>4</sup> Bénnea' nape' xel-la zri'i lazre' li:  
Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzécu'e.

<sup>5</sup> Quebe dxuné' da caléla,  
ne quebe naque' zre'e lazre'.

Quebe dxezré'e, ne quebe dxu'u lazre'.

<sup>6</sup> Quebe dxebené' gate nu benne' dxeajcházie' lu dul-la,  
san dxebené' lu da li.

<sup>7</sup> Dxuchaga lawé' xúgute da dxaca nen duté xel-la dxeajli lazre' chee',  
ne duté xel-la dxebeza lazre' chee',  
ne duté xel-la zren lazre' chee'.

<sup>8</sup> Xel-la zri'i lazre' li quebe te chee na. Wazrín zra gate québedxa chinedxu nu benne' guchálajené' dxi'u waláz chee Dios, ne benne' dxéajni'ine' xúgute.

<sup>9</sup> Na'a dxéajni'idxu látedauze, ne látedauze dxuchálajdxu waláz chee Dios.

<sup>10</sup> Zrin zra gate na' chéajni'idxu duté ca naca, na' te chee da na' naca na látedauze.

<sup>11</sup> Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chálá'ala da zaj naca chee bidau'.

<sup>12</sup> Cá'anqueze na'a quebe dxelé'edxu cátequeze, ne da dxelé'edxu ze zrul-la, san lu zra na' lé'edxu cátequeze. Na'a látedauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'.

<sup>13</sup> Ca' naca na, xel-la dxeají lazre', ne xel-la dxebeza lazre', ne xel-la zri'i lazre' li xelezúaqueze na chadía chacanna, san da blaudxa chee da caní naca na xel-la zri'i lazre' li.

## 14

### *Ca naca chee nu benne' dxuchálaje' dizra' nazrá' da quebe naca na xrtizre'*

<sup>1</sup> Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios.

<sup>2</sup> Bénnea' dxuchálaje' dizra' nazrá' da quebe naca na xrtizre' dxuchálajlene' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache.

<sup>3</sup> Bénnea' dxuchálaje' waláz chee Dios dxuchálajlene' bénneache chee gusegule' benne' ca' lu da naca chee Dios, ne chee ne xúene'-be', ne chee xue zrene'-be'.

<sup>4</sup> Bénnea' dxuchálaje' dizra' nazrá' na' dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

<sup>5</sup> Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' chee xelegula bi chee Cristo lu da naca chee Dios.

<sup>6</sup> Chee le na', bi bícha'dau', che xida' xedajnná'a le'e, ne guchálajlena' le'e dizra' nazrá', ¿bizra da ba neza gaca na cheele che quebe guchálajlena' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

<sup>7</sup> Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na.

<sup>8</sup> Gate dxaca wedil-la, che quebe dxebezre luzu da dxulucuezre' cátequeze, quebe nu se lu wedil-la.

<sup>9</sup> Cá'anqueze dxaca cheele le'e. Che quebe guchálaja' dizra' da dxéajni'ile, ¿ájazra gaca nézele da dxennía'? Guchálaja' lu be'.

<sup>10</sup> Da zante dizra' nazrá' zaj de lu xezr la xu nigá, ne da li xúgute na zaj zéaje na.

<sup>11</sup> Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'.

<sup>12</sup> Chee le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

<sup>13</sup> Ca' naca na, bénnea' dxuchálaje' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'.

<sup>14</sup> Che guchálajlena' Dios tu dizra' nazrá'la, da li dxuchálajlena' Le' lu be' nácaqueza', san quebe bi da ba neza naca na chee xel-la dxéajni'i chia'.

15 ¿Bizra da dxal-la' guna' xca'? Dخال-la' guchálajlęna' Dios lu be' nácaqueza', ne cá'anqueze nen xel-la dxéajni'i chia'. Dخال-la' gul-la' cheę Dios lu be' nácaqueza', ne cá'anqueze nen xel-la dxéajni'i chia'.

16 Che dxue la'anu' Dios tuze lu be' nácaquezu', na' benne' ljwezru' dxenne' chiu' quebe gaca gunę' tu zren lue' gate dxu'u Dios: Xcalenu', lawe' da quebe dxéajni'ing' da dxennáu'.

17 Da dxuchálajlęnu' Dios nácalęę na chawe', san bęnnea' dxenne' quebe dxegule' lu da naca cheę Dios.

18 Dxapa' Dios: Xcalęne' lawe' da dxuchálajdxu' dizra' nazrá' ca xúgutele le'e,

19 san naga zaj nazraga bi cheę Cristo dxaca lázredxa' guchálaja' gáxzuze dizra' da xeléajni'ibe' cheę gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

20 Bi bícha'dau'. Quebe gulaba lázrele ca bidau'. Le gaca ca bidau' cheę quebe gunle da caleła, san le gaca benne' wal-la cheę gulaba lázrele cháwe'dau'.

21 Naxúaj lu xiche lá'azxa cheę da dxenná bea Dios, da dxenná na: Guchálajlęna' benne' xęzr la xu nigá nen dizra' nazrá', ne lu dxu'a benne' zitu' ca', san ne caní quebe xelennę' chia'. Caní dxenná Xránadxu.

22 Ca' naca na, xel-la waca cheę guchálajdxu dizra' nazrá' naca na tu da dxulé'e na lau benne' quebe dxeléajlęę cheę Dios, ne quegá lau benne' dxeléajlęę cheę'.

23 Na'a, gate nazrágale, che xúgutele dxuchálajle dizra' nazrá', na' che xelexú'u benne' quebe zaj nazédeneę, u benne' quebe dxeléajlęę cheę Dios, ¿quebe xelennę' zaj nadá xichaj lázrdaule?

24 Na'a che dxuchalaj xúgutele waláz cheę Dios, na' che chu'u tu benne' quebe dxéajlęę cheę Dios, u tu benne' quebe nazédeneę, na' guéqueneę nabague' dul-la, na' léqueze' guchi'a cuineę gate xenne' da dxennale xúgutele.

25 Ca' gaca na, da zaj nagache xichaj lázrdawę' xululę'e lau na, na' guzúa zribę', ne güe lá'aneę Dios, na' nne' da li zúalę Dios le'e.

26 Ca' naca na, bi bícha'dau', gate dxezrágale, bál-lale le'e nápale salmo ca', ne xebál-lale nápale da gusédele ljwézrele, ne xebál-lale nápale tu da ble'e Dios le'e, ne xebál-lale nápale tu dizra' nazrá' da guchálajle, ne xebál-lale nápale xel-la waca xuzájla'ale dizra' nazrá' na'. Cháwe'dau' naca na, san xúgute da ca dxal-la' xulusegula na bi ca' cheę Cristo lu da naca cheę Dios.

27 Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájlęę da dxennale.

28 Na'a che quebe nu chilá' benne' xuzájlęę dizra' nazrá' na', gácadxa chawe' quebe bi da nneę naga nazrágale. Tu tule dxal-la' nnale lé'equezele, ne nen Dios.

29 Cá'anqueze benne' dxuluchálaję' waláz cheę Dios waca xelennę' chupa chúnmaze', na' xezícadxale dxal-la' guchí'ale da na' dxennę'.

30 Che dxulé'e Dios xetú benne' dxeę na' tu dizra', na' bęnnea' dxuchálaję' dxal-la' gusanę' ca da dxuchálaję'.

31 Xúgutele le'e waca guchálajle waláz cheę Dios tuwéaj tuwéajle cheę chéajni'i xúgutele, ne sile da gun chacha na le'e.

32 Benne' ca' dxuluchálaję' waláz cheę Dios dxun na ba xen nna bé'eneę' be' nácaqueze',

33 lawe' da naca Dios Bęnnea' dxunneę' dxi'u xel-la dxebeza zri lazre', ne quebe dxun zréajeneę' bęnneache.

Ca zaj xu'u lau xúgute cue' bi bíchedxu, bi cheę Dios,

<sup>34</sup> dxal-la' xelezúa zrire nu'ula ca' naga nazrágale, lawe' da quebe naca chee' xuluchálaje'. Dخال-la' xuluzúe' dizra' ca naxúaj na lu da nadxixruj bea Dios.

<sup>35</sup> Che dxelaca lazre' bi xeléajni'ine', dxal-la' xuluchebe' benne' cha chee' lizre tu tūe' lawe' da quebe dxulé'e na chawe' tu nu'ula guchálaje' naga nazrágale.

<sup>36</sup> Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazi' lu na'le na.

<sup>37</sup> Che nu benne' dxéqueñe' naque' benne' dxuchálaje' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' chee'le naca na tu da gunná be'e Xránadxu.

<sup>38</sup> Che quebe dxaca lazre' gueque bé'ene' da nigá, quebe dxal-la' si' lu na'le bēnea'.

<sup>39</sup> Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bēnea' dxuchálaje' dizra' nazrá'la.

<sup>40</sup> Xúgute da caní dxal-la' gunle dutē ba lá'ana, ne ca dxal-la' gaca na.

## 15

### *Ca bebán Cristo ládujla benne' gate*

<sup>1</sup> Na'a, bi bícha'dau', dxuzenda' le'e dizra' chawe' da ba bzenda' le'e, da na' guzú' lu na'le, ne da da'le le'e.

<sup>2</sup> Ne chee dizra' chawe' nigá nalale che dxéajlele chee da bzenda' le'e, ne che quebe guca dácheze xel-la dxeajlí lazre' chee'le.

<sup>3</sup> Da naca blaudxa, bzéajni'ida' le'e da guzú' lu na'a, gute Cristo ne chee dul-la da nabágadxu ca naxúaj na lu dizra' lá'azxa,

<sup>4</sup> na' bulucache' Le', na' bebane' zra guxunne' zra ca naxúajqueze na lu dizra' lá'azxa,

<sup>5</sup> na' ble'e lawe' lau Pedro, na' gudé na' ble'e lawe' lau benne' gubáz chee' ca'.

<sup>6</sup> Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazraque' tu zren, na' benne' zan, benne' ca' ne zaj naca banē, láqueze benne' zan, benne' ca' ba gualatiē'.

<sup>7</sup> Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

<sup>8</sup> Bzēbedxa, ca gudé chee xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudé beu' chee'be'.

<sup>9</sup> Neda' naca' benne' bzēbedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios.

<sup>10</sup> Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'.

<sup>11</sup> Quebe zácadxa na che naca neda', u che naca benne' ca', da nigá naca na dizra' bzénentu' bēneache, ne naca na da guxéajlele.

### *Ca xelexebán benne' gate*

<sup>12</sup> Che da dxuzéentu' bēneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate?

<sup>13</sup> Che quebe xelexebán benne' gate, Cristoqueze quebe bebane' ládujla benne' gate,

14 na' che quebe bebán Cristo ládujla benne' gate, dácheze naca da dxuzéntu' bénneache, ne dácheze naca da dxejlí lázrele chee Cristo.

15 Che caní naca na dxexechéntu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo.

16 Che quebe xelexebán benne' gate, Crístoqueze quebe bebane',

17 na' che quebe bebán Cristo, dácheze naca da dxejlí lázrele chee', na' ne nabágale dul-la.

18 Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'.

19 Che da dxebeza lázrentu' da naca chee Cristo naca na cheeze xezr la xu nigá, nácadxu baxáchedxa ca xúgutę bénneache.

20 Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgutę benne' ca' dxal-la' xelexebane'.

21 Ca guca, bla' xel-la gute lu xezr la xu nigá ne chee tuze benne', cá'anqueze ne chee tuze benne' bla' xel-la dxexebán chee benne' gate.

22 Ca naca dxelate xúgutę bénneache lawe' da zaj naque' tuze nen Adán, cá'anqueze xúgutę benne' zaj naca tuze nen Cristo xelape' xel-la nabán li lazre'.

23 Xelexebán tu tue' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'.

24 Nadxa cheajsé chee xezr la xu nigá gate guzría xi' Cristo xúgutę da dxelenná bea, ne xúgutę da dxelixruj bea na, ne xúgutę da zaj napa xel-la waca, na' gudé' xel-la dxenná bea chee' lu na' Xradxu Dios.

25 Dxun na ba xen nna bea Cristo ca zrin zra ba nuzúa Dios zran ni'e xúgutę benne' guledábague' Le',

26 na' da bzébedxa da cuía xi' naca na xel-la gute.

27 Ba nuzúa Dios xúgutę zran ni'a Cristo, san gate dxenná na nuzúe' xúgutę zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzué' xúgutę zran ni'a Cristo.

28 Gate ba zua xúgutę lu na' Cristo, nadxa Crístoqueze, Bénnea' naque' Zrí'inequeze Dios guzúa cuíne' lu na' Dios, Bénnea' bdeé' xúgutę lu na' Le'. Ca naca na, Dios gaque' blau lawe' xúgutę da de.

29 Xetú da dxaca, zaj zua benne' dxeledxúe' nisa waláz chee benne' zaj nate. ¿Bizr chee na' dxeluné' caní che quebe xelexebán benne' gate? ¿Bizr chee na' dxeledxúe' nisa waláz chee benne' gate?

30 Cá'anqueze, ¿bizr chee na' zúatequezdxu dxi'u lu da stebe?

31 Xúgutę zra zua' lu da stebe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee lu da nácadxu nen Xránadxu Jesucristo.

32 Che ca tu bénneacheze gudíl-lalęna' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bénneache, dxelenné': "Xi'aj gágudxu lawe' da wxre gátedxu."

33 Quebe güele lataj nu si xę le'e. Naca cáteze dxenná na:

Che gácadxu tuze benne' ca' dxeluné' da calęla,  
tu zrénqueze gundxu da calęla.

34 Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

<sup>35</sup> Guchebe nu benne' neda': Ájazra xelexebán benne' gate? ¿Ájazra gaca bela' dxen chee'?

<sup>36</sup> Da nigá naca na tu da xálaze, lawe' da gate dxázadxu tu binne, dxun na ba xen cuía xi' bínnedu na' chee' gaca na tu xágadau'.

<sup>37</sup> Da na' dxázadxu quebe naca na da xelá', san tu bínnedauze naca na, che naca na zrua' xtila u xetú bínnedau'.

<sup>38</sup> Te na' gun Dios chee' bínnedu na' tu xágadau' cáteze dxaca lázrequeze', na' chee' tu tu bínnedau' dxune' tu tu xágadau' cáteze zaj naca bínnedu ca'.

<sup>39</sup> Quegá xúgute' bela' dxen tuz ca zaj naca na. Tuze ca naca bela' dxen chee' bénneache, ne xetuze ca naca bela' dxen chee' be' xixre' ca', na' xetuze ca naca bela' dxen chee' bxínnedu ca', ne xetuze bela' dxen chee' bela ca'.

<sup>40</sup> Cá'anqueze zaj naca bela' dxen chee' xabáa, ne bela' dxen da zaj naca na chee' xezr la xu nigá. Xel-la xrtan chee' da zaj naca chee' xabáa nazrá' ca xel-la xrtan chee' da zaj naca chee' xezr la xu.

<sup>41</sup> Xel-la naxaní' chee' gubizra nazrá' ca xel-la naxaní' chee' beu', ne cá'anqueze nazrá' ca xel-la naxaní' chee' belaj ca', na' ládujla belaj ca', xel-la naxaní' chee' tu belaj nazrá' ca xel-la naxaní' chee' xetú belaj.

<sup>42</sup> Cá'anqueze dxaca chee' benne' ca' xelexebanē' ládujla benne' gate. Dxucáchedxu lu ba tu da guzru', na' xebán tu da québedxa gate.

<sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lalē'e.

<sup>44</sup> Dxucáchedxu tu bela' dxen chee' beniácheze, na' xebán tu bela' dxen da naca na chee' be' nácaquezdxu. Che zua tu bela' dxen da naca na bénneacheze, cá'anqueze zua tu bela' dxen da naca na chee' be' nácaquezdxu.

<sup>45</sup> Cá'anqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzebe, naque' Be' da dxunna xel-la nabán.

<sup>46</sup> Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'.

<sup>47</sup> Benne' nedxu guque' xu bxrte, ne guque' chee' xezr la xu nigá, na' Benne' gudxupe' naque' Xránadxu, Benne' chee' xabáa.

<sup>48</sup> Bela' dxen ca' chee' xezr la xu nigá zaj naca na ca guca bénnea' guque' xu bxrte, na' bela' dxen ca' da zaj naca na chee' xabáa zaj naca na ca Bénnea' naque' chee' xabáa.

<sup>49</sup> Ca naca, nácadxu ca bénnea' guque' xu bxrte, cá'anqueze gácadxu ca Bénnea' naque' chee' xabáa.

<sup>50</sup> Dxaca lazra' xapa' le'e, bi bícha'dau', bela' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna.

<sup>51</sup> Dxapa' le'e tu da nagache nédxute: Quegá xúgute'dxu gátedxu, san xúgute'dxu sidxu tu bela' dxen cube.

<sup>52</sup> Chadite' gaca na, ca dxun benne' guchudie' xexrate' lawe', gate xendxu chi'i luzu da dxulucuezre' da bzebe. Cuézrequeze luzu da dxulucuezre', na' xelexebán benne' gate naga cabátadxa xelatie', na' dxi'u sidxu tu bela' dxen cube.

<sup>53</sup> Bela' dxen cheedxu da guzru dxal-la' xexaca na tu da québedxa guzru, na' bela' dxen cheedxu da gate dxal-la' xexaca na tu bela' dxen da québedxa gate.

<sup>54</sup> Gate bela' dxen cheedxu da guzru ba bexaca na da québedxa guzru, ne bela' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

<sup>55</sup> Lue', xel-la gute, ¿ga na' xel-la waca chiu' chee gunu' netu' we'?  
Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na da nadxixruj bea da gula na' naca na da dxunna na dul-la xel-la waca chee gudé na dxi'u lu xel-la gute.

<sup>57</sup> Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bicha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

## 16

### *Dumí da gutúpale chee gácalele bíchedxu ca'*

<sup>1</sup> Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgutę cue' bi chee Cristo zaj zra' xezre ca' zaj nababa Galacia.

<sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'.

<sup>3</sup> Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'.

<sup>4</sup> Che gata' lataj cha'a, na' sá'acalequeze' neda'.

### *Da dxugú'u bea Pablo gune'*

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'.

<sup>6</sup> Wegá'analja' nen le'e tu chi'i, u che ba guca, na' sua' nen le'e dutę beu' zaga ca', na' le'e waca gácalele neda' lu neza chia' naga dxal-la' cha'a.

<sup>7</sup> Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj.

<sup>8</sup> Na'a xegá'ana' lu xezre Efeso nigá ca zrin zra Pentecostés,

<sup>9</sup> lawe' da napa' lataj guna' tu zrin zren chee Xránadxu da gulé'etę lawe na, lácala naxán benne' ca' dxeledábague'.

<sup>10</sup> Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'.

<sup>11</sup> Chee le na' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúele'eda' le' chee chéajlene' bi bíchedxu ca' xedajlenné'e le'e, san quebe guca lazre' se'e na'a. Wide' gate gape' lataj.

### *Dxulugapa ljwezre' diuzre*

<sup>13</sup> Le sua ban lazre'. Le se chacha lu xel-la dxeajlí lazre' chee. Le se ca ze benne' biu. Le gaca benne' wal-la.

<sup>14</sup> Dutę xel-la zri'i lazre' le gun xúgutę da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanas benne' nedxu naga nababa Acaya gulezí' lu ne'e dizra' chawe' chee Cristo, na' buluzúa cuine' chee xelácalene' bi bíchedxu ca', bi chee Cristo.

<sup>16</sup> Dxaca lazra' guzúa cuínale lu na' benne' caní, ne lu na' xúgutę benne' dxelácale ljwézredxu, ne dxelún zrin chee Cristo.

<sup>17</sup> Zua' xel-la dxebé lawe' da belelá' Estéfnas, ne Fortunato, ne Acaico, lawe' da beluné' chia' da quebe guzéquele gunle le'e lawe' da zrale zitu'.

<sup>18</sup> Belún chúchue' be' nácaqueza', ne be' nácaquezele le'e. Dxun na ba xen si' lu na'le benne' caní.

<sup>19</sup> Xúgute cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápale'e le'e diuzre lu La Xránadxu.

<sup>20</sup> Xúgute bíchedxu nigá dxulugape' le'e diuzre. Le gugapa diuzre ljuwézrele tule xetule, ne le gunida ljuwézrele.

<sup>21</sup> Neda', Pablo, dxuzúaja' da dxugapa' le'e diuzre nen ná'aqueza'.

<sup>22</sup> Che nu benne' quebe nazrí'ine' Xránadxu Jesucristo, cuía xi' bènnea'. ¡Gudá Xránantu'!

<sup>23</sup> Dxenaba' Xránadxu Jesucristo gun cháwe'e le'e.

<sup>24</sup> Dxusel-la' chee xúgutele xel-la nazrí'i chia' lu La Jesucristo. ¡Ca'an gaca na!



## DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

### *Pablo dxuzúaj'e chee bi bíchedxu zaj zre'e xezre Corinto*

<sup>1</sup> Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá cheele le'e, bi bícha'dau', zrágale chee Dios lu xezre Corinto. Cá'anqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya.

<sup>2</sup> Dxenaba' Xradxu Dios, ne Xránadxu Jesucristo gun chawé'e le'e, ne gunne' le'e xel-la dxebeza zri lazre'.

### *Da ca' guzi guzaca' Pablo*

<sup>3</sup> Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u.

<sup>4</sup> Dios dxexúe zrénqueze' dxi'u ca naca xúgute xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé' xel-la zi', na' xue zrendxu le' cáteze da ba nun Dios cheedxu dxi'u.

<sup>5</sup> Lawe' da dxededxu xel-la zi' zren ca da gúde Cristo, cá'anqueze ne chee Cristo zua Nu dxexúe zrénqueze dxi'u, Léqueze Dios.

<sup>6</sup> Chee le na', che dxedentu' netu' xel-la zi', naca na chee sua Nu xexúe zren le'e, ne chee lala, na' caní gaca guchaga laule lu duté xel-la zren lazre' cheele xel-la zi' ca' da dxededxu dxi'u.

<sup>7</sup> Dxuxrén lázrelé'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup> Bi bícha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'.

<sup>9</sup> Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuínantu'.

<sup>10</sup> Dios bselé' netu', na' ne dxuselé' netu' lu da štebe zren nigá chee xel-la gute, na' dxebeza lázrentu' Le' guseláqueze' netu'

<sup>11</sup> che le'e gácalele netu', nábadxu Dios gácalene' netu'. Che benne' zan xelenabe' Dios gácalene' netu', na' benne' zan xel'é Dios: Xcalenu', chee da chawe' ca' da gun Dios cheentu'.

### *Bizr chee na' Pablo guzrene' chéaj'e Corinto*

<sup>12</sup> Naca tu da ba neza da nápantu' da zua na lawe' da dxé xichaj lázrauntu' netu' ba gudantu' lu da lá'azxa, ne du lázrentu', lu xezr la xu nigá, ne ládujla le'e. Dios lu xel-la zri'i lazre' chee' gúcalene' netu' chee bentu' caní, ne quebe bentu' na lu xel-la sina cheézquezentu'.

<sup>13</sup> Lu da dxuzúajntu' cheele quebe bi de da quebe gaca gulábale, ne chéajni'ile, na' dxaca lazra' chéajni'i xánnele

<sup>14</sup> ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza cheele le'e, ca le'e gácale tu da ba neza cheentu'.

<sup>15</sup> Lawe' da dxuxrén lazra' gaca caní, bechugu lazra' xida' nédxula xeda-jnná'a le'e chee gaca tu da ba neza cheele, na' xedajnná'a le'e chupa lasa,

<sup>16</sup> lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia,

xedajnná'a le'e xetú. Ca' gaca na, le'e gaca gácalele neda' cha'a xezre ca' zaj nababa Judea.

<sup>17</sup> ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxennía': Awe', cabí, gate dxechugu lazra' da guna'?

<sup>18</sup> Dios nézquezne' neda', ne Silvano, ne Timoteo, quebe dxentu' le'e: Awe', cabí.

<sup>19</sup> Naca na caní lawe' da Jesucristo, Zri'ine Dios, Bénnea' bzénentu' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios,

<sup>20</sup> lawe' da ne chee Le' dxelaca li xúgutę da guchebe lazre' Dios. Chee le na', gate dxue lá'anantu' Dios, dxennantu': ¡Ca'an naca na! ne chee Jesucristo.

<sup>21</sup> Dios naque' Bénnea' ba nuzé chúchue' netu', ne le'e lu da naca chee Cristo, ne ba guquęęe dxi'u,

<sup>22</sup> ne ba nuzé' cheedxu tu da dxulé'e na nácadxu bi chee Le', lawe' da ba nuzé' Be' Lá'azxa lu xíchaj lázrdaudxu, da dxunna bea na sidxu da naca chee'.

<sup>23</sup> Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xequęęe xel-la nabán chia'.

<sup>24</sup> Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba ze cháchale lu da dxéajlele. Dxaca lázrentu' bédxale lu da naca chee Cristo.

## 2

<sup>1</sup> Chee le na' bechugu lazra' quebe xida' xedajnná'a le'e lu da baxache'.

<sup>2</sup> Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'.

<sup>3</sup> Chee le na' bzujaja' chee ca da bęna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súa'le lu xel-la dxebé.

<sup>4</sup> Gate bzujaja' chee da na' guzéle'ęda' gunne xue, ne guzúa' lu da zi' da xa', ne cá'anqueze gudxézrele'ęqueza', san quebe bzujaja' da na' chee guzúa' le'e lu da baxache', san chee nézele nazrí'ile'ęda' le'e.

### *Ca dxal-la' xulunite lawe' chee bénnea' bęne' da calela*

<sup>5</sup> Che nu benne' ba bzue' neda' lu da baxache', quegá chia' néda'ze bęne' na, san cá'anqueze waca nnadxu, bzue' xúgutęle lu da baxache'. Dxennía': Waca nnadxu, chee quebe gácateca' snia.

<sup>6</sup> Ca xel-la zi' da bdele bénnea' gate na' bzrágale, ba nácale'ęqueze da na'.

<sup>7</sup> Ca' naca na, na'a dxal-la' gunite laule chee bénnea', ne xue zrenle le', chee quebe gunitię' xel-la dxebeza lazre' chee' ne chee da baxache' zren da dxedéę'.

<sup>8</sup> Chee le na' dxata' xueda' le'e gulé'ele le' xecha lasa ca nazrí'ile'ęle le'.

<sup>9</sup> Bzujaja' nédxula chee ca naca da nigá chee gulé'e lawe' che nácale wezúe dizra' lu xúgutę da dxaca.

<sup>10</sup> Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunite lawa', ba bnite lawa' na ne chee le'e lau Cristo

<sup>11</sup> chee quebe seque' Satanás nna be'e na dxi'u, na' ba nézquezdxu ca da dxun na.

*Pablo dxézé' gunne xue lu xezre Troas*

12 Gate bzrina' xezre Troas chee guzenda' bènneache dizra' chawe' chee Cristo, gutá'le'e lataj chia' guna' zrin chee Xránadxu.

13 Guzúale'a gunne xue lawe' da quebe bezrelda' bi bíchedxu Tito ga na'. Chee le na' bzea' dizra' benne' ca' zaj zre'e na', na' guxá'a xezr la xu Macedonia.

### *Dxezrué'edxu ne chee Cristo*

14 Xcalén Dios, Bénnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na.

15 Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xelexé', ne ládujla benne' ca' xelebía xi'e.

16 Lau benne' ca' xelebía xi'e da dxelá nigá naca na ca tu da dxute bènneache, san lau benne' ca' xelexé' naca na tu da dxunezruj na bènneache xel-la nabán. ¿Nu benne' naca chee' gaque' caní?

17 Netu' quebe dxedantu' dxútentu' dizra' chee Dios, ne quebe dxuchantu' na ca dxelún benne' zante. Lawe' da dxen Dios, dxucháajntu' du lázrentu', ca benne' nase-la Dios, ne ca wen zrin chee Cristo.

## 3

### *Dizra' chee xel-la wezría cube*

1 Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábant'u' chee le tu xiche caní, ca dxelún bal-la benne'?

2 ¡Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bènneache gaca xelexúnbe'e na, ne xululabe' na.

3 Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdaudxu.

4 Ne chee Cristo dxuxrén lázrentu' Dios,

5 quegá chee bi gaca guntu' da naca cheézquezentu', san, ca naca da gaca guntu' naca na chee Dios.

6 Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

7 Da bdxixruj be'e Moisés na' bxuaj na le'e xiaj blaga', ne bla' nen tu da bseni'le'e, na' québedxa belezúe benne' Israel ca' xelené'e lau Moisés, lawe' da gúcatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u,

8 da zrénle'edxa naca xel-la naxaní' chee dizra' chawe' na' da nusá Be' Lá'azxa cheedxu.

9 Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zrénle'edxa naca dizra' chawe' na' da dxucá'ana na dxi'u xrlátaje lau Dios.

10 Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zrénle'edxa.

11 Che guca tu da xabáa chee da na' guzí bea na tu chí'idauze, napa na tu da xabáa zréñle'edxa da na' si bea na chadía chacanna.

12 Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'.

13 Quebe dxuntu' ca ben Moisés, bgacu lawe' tu ladxe' chee quebe xeelé'e benne' Israel ca' xexul-la xel-la naxaní' na' da quebe guzí bea na.

14 Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee Cristo.

15 Na'a zra, gate dxululabe' dizra' chee Moisés, zua ca tu ladxe' da dxucache na xichaj lázrdawe'.

16 Gate tu benne' xexaque' chee Xránadxu, xedúa ladxe' na' lu xichaj lázrdawe'.

17 lawe' da naca Xránadxu Be' na', na' naga zua Be' chee Xránadxu, na' de xel-la weselá lu na' da nadxixruj bea na chee Moisés na'.

18 Chee le' na' xúgute'dxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxi'ukeze, tu tu lasa gate dxelé'dxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

## 4

1 Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'.

2 Ba nuzúantu' chalá'ala da dxelún bènneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na' caní dxuzúa cuínantu' lu na' xichaj lázrdau xúgute' bènneache lau Dios.

3 Che dizra' chawe' da dxuzénentu' bènneache ne nagache na, naca na caní tuze lau benne' ca' xelebía xi'e.

4 Lawe' da quebe dxeléajle' chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawe' chee quebe xeelé'eng' xel-la naxaní' chee dizra' chawe' chee xabáa chee Cristo, Bénnea' naque' lu'a lesaca Dios.

5 Quebe dxuzénentu' bènneache ca naca cheézquezentu', san ca naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin cheele lawe' da nazrí'intu' Jesús.

6 Dios ná'queze, Bénnea' gunná be'e guxaní' xi' na' lu da chul-la, naque' Benne' ba bène' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácatite legala na dxu'a lau Jesucristo.

### *Dxundxu xúgute ne chee xel-la dxejlí lazre' cheedxu*

7 Da xabáa nigá nápantu' lu belá' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'.

8 Chee le' na':

Láqueze zúantu' lu da stébelé'e, quebe dxezentu' gunne xue.

Láqueze dxezentu' gunne xue, tu dxebeza lázrezquezentu' gácale Dios netu'.

9 Láqueze zaj nau zí' xuzre' netu', quebe dxusan Dios netu'.

Láqueze dxeline' netu' xu, quebe dxebía xintu'.

10 Gáteteze dxéajntu' naca tuze belá' dxen cheentu' nen xel-la gute chee Jesús chee gulé'e lau lu belá' dxen cheentu' xel-la nabán chee Jesús.

11 Dxácate naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu belá' dxen cheentu' da gate.

12 Ca' naca na, lácala tu zúazquezentu' lu da stebe chee xel-la gute da nigá, dxun na sua tu xel-la nabán cube chee.

13 Naxúaj lu dizra' lá'azxa da dxenná na: Guxéajle'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu',

14 lawe' da nézentu' Dios, Bénnea' bsebané' Xránadxu Jesús ládujla benne' gate, cá'anqueze gusebané' dxi'u tu zren nen Jesús, na' tu zren nen le'e, xeché'e dxi'u lau Le'.

15 Xúgute da nigá guzaca zintu' chee gaca tu da ba neza chee, chee gaca na, gate xelezi' benne' zante xel-la xrlátaje chee Dios, cá'anqueze benne' zante xelé'e Le': Xcalenu', chee gaca ba chee Dios.

16 Chee le na', cabata' dxate ni'a nadxu. Láqueze dxexru belá' dxen cheedxu, Dios dxuxucube' be' nácaquezdxu tu zra tu zra.

17 Da dxezácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadía chacanna da szrente, ne da cháwedxa.

18 Quebe nná'adxu ca da dxelé'edxu, san nná'adxu da quebe nalá', lawe' da quebe dxelezi' bea da ca' dxelé'edxu, san da ca' quebe dxelé'edxu dxelezi' bea na chadía chacanna.

## 5

1 Belá' dxen cheedxu naca na ca tu xu'u lizre be' nácaquezdxu. Belá' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jlí canna, da nun Díósqueze, ne quegá bñneache.

2 Da li dxácate naca bandxu lu belá' dxen nigá dxebezre we'dxu lawe' da dxaca lázredxu cheajchú'udxu belá' dxen cube na' da gunna Dios dxi'u xabáa.

3 Quebe xegá'ana cá'aze be' nácaquezdxu xabáa. Cheajchú'u na belá' dxen cube na'.

4 Dxácate ne naca bandxu lu xu'u nigá da naca na belá' dxen cheedxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gusandxu belá' dxen gula cheedxu nigá. Dxaca lázredxu cheajchú'udxu belá' dxen cube, na' ca'an gaca xenite belá' dxen cheedxu da dxal-la' gate, na' la' belá' dxen cube cheedxu da gaca ban na chadía chacanna.

5 Bénnea' ba nuné' dxi'u chee gaca cheedxu caní naque' Dios, Bénnea' ba nunne' dxi'u Be' Lá'azxa ca tu da dxunna bea na dxal-la' sidxu tu belá' dxen cube xabáa.

6 Ca' naca na, dxuxrén lázretequezdxu Dios. Ba nezdXu dxácate naca bandxu lu belá' dxen nigá zúadxu zítu'la naga zua lízredxu, da naca na, quebe zúaledxu Xránadxu,

7 na' dxedadxu ne chee xel-la dxeajlí lazre' cheedxu, quegá ne chee da dxelé'edxu.

8 Dxuxrén lázredxu Dios, ne dxaca lázredxadxu gusandxu xel-la nabán cheedxu lu belá' dxen nigá chee chéajdxu cheajsúaledxu Xránadxu.

9 Chee le na' dxundxu ba xuzre gúntéquezdxu da xezaca ba lazre' Xránadxu, che nagá'anadxu lu belá' dxen cheedxu nigá, u che cheajchú'udxu belá' dxen cube, da zua na xabáa,

10 lawe' da xúgute dxun na ba xen xezrindxu lau Cristo chee guchi'e ca da nundxu tu tudxu, chee si' lu nadxu ca da xáladxu, cáteze naca da xrlátaje, u da caléla da ba bendxu gate ne zúadxu lu belá' dxen cheedxu nigá.

*Dizra' da dxexún dxi'u tuze nen Dios*

<sup>11</sup> Chee lē na', lawe' da núnbeantu' ca dxal-la' zrēbedxu Xránadxu, dxuntu' ba xuzre guntu' xelélé bēnneache. Dios ba nézeng' da nácantu', na' dxebeza lazra' cá'anqueze le'e nézele na.

<sup>12</sup> Quegá dxennentu' xrlátaje cheézquezentu', san dxúnnantu' le'e lataj gápale netu' ba lá'ana, chee gaca xechébele chee benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawe'.

<sup>13</sup> Che dxeleque bēnneache nadá xichaj lázrdauntu' naca na chee guntu' zrin chee Dios, na' che quebe nadá xichaj lázrdauntu' naca na chee gaca tu da ba neza cheele le'e.

<sup>14</sup> Xel-la zri'i lazre' chee Cristo dxusebaga na netu' lawe' da nézentu' che tu benne' gutiē' waláz chee xúgute bēnneache, na' ba gulate xúgute'.

<sup>15</sup> Cristo gutiē' waláz chee xúgute bēnneache, chee benne' ca' zaj naca bang' québedxa xelaca bang' cheézqueze', san chee Le', Bēnea' gutiē', ne bebang' waláz chee benne' ca'.

<sup>16</sup> Chee lē na', québedxa nna'ntu' ca naca da nácaqueze tu benne' lu xezr la xu nigá, na' láqueze nédxula gunna'ntu' Cristo cáteze gúcaqueze' lu xezr la xu nigá, na' a québedxa nna'ntu' Le' caní.

<sup>17</sup> Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledé chee na, na' xúgute na zaj naca na cube.

<sup>18</sup> Xúgute da caní dxun Dios, Bēnea' bexune' dxi'u tuze nen Léqueze' ne chee Cristo, na' bsebague' dxi'u guzendxu bēnneache ca gaca xelexaque' tuze nen Dios.

<sup>19</sup> Gate gute Cristo, Dios guzúalequeze' Le', ne bexunē' bēnneache chee xezr la xu nigá tuze nen Le', ne quebe gunné'e ca zaj naca dul-la zaj nabaga bēnneache ca', na' bsebague' dxi'u guzendxu bēnneache dizra' da dxexún dxi'u tuze nen Dios.

<sup>20</sup> Ca' naca na, nácantu' gubáz chee Dios ne chee Cristo, na' naca na cáteze Díosqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios.

<sup>21</sup> Naca netú dul-la ca beng', san ne cheedxu dxi'u, Dios bdeē' Le' chee gutiē' lē'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

**6**

<sup>1</sup> Ca' naca na, ca wēn zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios,

<sup>2</sup> lawe' da lu dizra' lá'azxa dxenné':  
Tu zra dzezaca ba lazra' benda' chiú',  
na' lu zra chee xel-la weselá gúcalēna' lue'.

Na'a naca na zra dzezaca ba lazre' xenne' cheele, ne guselé' le'e.

<sup>3</sup> Quebe bi dxuntu' da gun na quebe xelájle bēnneache chee Cristo, chee quebe nu nne calela chee zrin dxuntu'.

<sup>4</sup> Ca naca xúgute da dxuntu', dxaca lázrentu' gulé'entu' bēnneache nácantu' wēn zrin chee Dios,

ne chee xel-la dxebeza zren lazre' cheentu' gate dxuchaga launtu' da dx-ezácantu',  
ne da dxexá'zrentu', ne da zaj naca stēbe cheentu',

<sup>5</sup> ca buluzálaje' netu', ne gulegu'e netu' lizre xia.

Guledábague' netu' san bēnle'entu' zrin.

Zane' lasa quebe gúsentu', ne quebe bi gudáguntu'.

<sup>6</sup> Cá'anqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bénnea' zúalene' netu',

ne ne chee xel-la nazri'i cheentu' da naca na du lazre',

<sup>7</sup> ne ne chee dizra' li da dxuzénetu' bénneache,

ne ne chee xel-la waca chee Dios da zúale na netu'.

Bchínentu' da zaj naca ca xia chee wedil-la chee da xrlátaje chee gudíl-lantu',

ne chee gudentu' chalá'ala da zaj naca ca xia chee wedil-la chee benne' ca dxeledábage' netu'.

<sup>8</sup> Zua gate dxelape' netu' ba lá'ana',

ne zua gate dxuluzúe' netu' chalá'ala.

Zua gate dxelenné' cheentu' da xrlátaje,

ne zua gate dxelenné' cheentu' da caléla.

Zua gate dxelenné' nácantu' wen lazre',

ne zua gate dxelenné' dxennentu' da li.

<sup>9</sup> Zua gate quebe nu dxuzé naga netu',

ne zua gate dxuluzé naga xánnie' netu'.

Zua gate zúantu' lu da stebe chee xel-la gute, san ne naca bantu'.

Zua gate dxuludé' netu' xel-la zi', san quebe ne xelutie' netu'.

<sup>10</sup> Láqueze zúantu' lu da baxache', zúatequezentu' lu xel-la dxebe.

Lácala nácantu' benne' xache', ba nuntu' benne' zan benne' gunní'a.

Láqueze quebe bi núantu', xúgute nápantu'.

<sup>11</sup> Bi bíchentü', benne' Corinto, ba bcháajntu' du lázrentu'. Ba blé'entu' le'e ca nazri'i lázrentu' le'e.

<sup>12</sup> Tu zúazqueze xel-la zri'i lazre' cheentu', na' le'e na' quebe nazri'ile netu' du lázrele.

<sup>13</sup> Dxata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazri'i da zua na lu xichaj lázrdaule cáteze bēna' neda'.

*Nácadxu xudau' chee Dios ban*

<sup>14</sup> Quebe gunle tuze nen benne' quebe dxeléajle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ájazra gun da xrlátaje gaca na tuze nen da caléla?

¿Ájazra gun xel-la naxaní' gaca na tuze nen da chul-la?

<sup>15</sup> ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo gaque' tuze nen benne' quebe dxéajle'e chee'?

<sup>16</sup> ¿Ájazra gun xudau' chee Dios gaca na tuze nen bedáu' xiaj xaga?

Lé'equeze nácale xudau' chee Dios ban cáteze gunná Díósqueze:

Súalēna' le', ne tálēna' benne' ca'.

Gaca' Dios chee benne' ca', na' le' xelaque' benne' xezre chia'.

<sup>17</sup> Chee le na', cá'anqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e

<sup>18</sup> ne gaca' Xrale le'e,  
na' le'e gácale zri'ina' bi biu, ne zri'ina' bi nu'ula.  
Caní dxenná Xránadxu, Bénnea' nape' dutę xel-la waca.

## 7

<sup>1</sup> Ca' naca na, bi bícha'dau' nazri'ite lazra', da caní zaj naca na da guchebe lazre' Dios cheędxu. Cheę ę na' dxal-la' guxúe xanne' cuínadxu cheę quebe güedxu lataj netú da sban gudxén na dxi'u lu bela' dxen cheędxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios dutę ca nácadxu.

### *Ca belexebí'i lazre' benne' Corinto*

<sup>2</sup> Le si' lu na'le netu'. Quebe bi da calęla ne guntu' cheę nu benne' ládujla le'e, ne quebe nu ne guchántu', ne quebe nu ne si xęntu'.

<sup>3</sup> Quebe dxennía' da nigá cheę gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrentę nen le'e.

<sup>4</sup> Du lazra' dxuchálajęna' le'e, ne zua' lu da ba neza ne cheęle le'e. Lu xúgute da dxezácantu' zua da dxexúe zréne'ę neda', na' dxebéle'ęda'.

<sup>5</sup> Da li, gate bzrintu' naga nababa Macedonia, quebe bezí' lázrentu'. Guzúantu' lu da stebe gáteteze, lawe' da gáteteze gudentu' guledábaga béneache netu', na' lu lázrdautu' bezrébentu'.

<sup>6</sup> Nadxa Dios, Bénnea' dxexúe zrenę' benne' zaj nate ni'a ne'ę, bexúe zrenę' netu' ne cheę Tito lawe' da bezrinbe' naga zúantu',

<sup>7</sup> ne quegá tuze lawe' da bla'be', san cá' anqueze lawe' da bexúe zrenle ębe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxeęle neda', na' cheę ę na' gubélę'ędxeda'.

<sup>8</sup> Láqueze da bzuaja' cheęle bzua na le'e lu da baxache', quebe dxebezre lazra' cheę da na'. Láqueze gudxezre lazra' nédxula gate guęue be'eda' bzua na le'e lu da baxache' tu chí'idau',

<sup>9</sup> na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' cheęle quebe bi da calęla ben na cheęle.

<sup>10</sup> Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu cheę ladxu, na' quebe dxal-la' cuezre lázredxu cheę na. Che xegá'anadxu lu da baxache' ca dxelún bénneache cheę xęzr la xu nigá, na' tu chí'ize gátędxu.

<sup>11</sup> Le'e bchaga laule da baxache' da guca na cheęle ne cheę da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,  
ne ben na blé'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',

ne guzúale gudele xel-la zi' bénnea' ben da calęla na'.

Ca naca xúgute da nigá blé'ele quebe nabágale zria cheę dul-la nigá.

<sup>12</sup> Ca' naca na, gate bzuaja' cheęle da na', quebe guca na lawe' da gudxe'a gunne xue cheę bénnea' bene' da calęla na', ne quegá lawe' da gudxe'a gunne xue cheę bénnea' guca na cheę', san bena' na cheę gueque be'ele lau Dios ca dxele gunne xue cheęntu'.

<sup>13</sup> Cheę ę na' guca da bexúe zren na netu'.



Da naca tu da zrendxa, gubéle'entu' gate blé'entu' zúale Tito xel-la dxebé, lawe' da xúgutele le'e bexúe zrenle-be'.

<sup>14</sup> Láqueze bca'ana szrena' le'e lau Tito, quebe dxedué'eda', lawe' da cáteze naca da li ca naca xúgute da bchálajlena' le'e, cá'anqueze guca da li da bēna' gate bca'ana szrena' le'e lau Tito.

<sup>15</sup> Nazrí'idxabe' le'e gate dxajsá lázrebe' ca benle xúgutele le'e, benle cáteze gunábabe' le'e, ne ca guzi' lu na'le lebe' lu dutę xel-la dxexrui lazre', ne lu xel-la dxezrebe.

<sup>16</sup> Dxebeda' lawe' da dxuxrén lazre' xánnia' le'e.

## 8

### *Da dxunézrujdxu du lázredxu*

<sup>1</sup> Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nnita' lu xęzr la xu Macedonia.

<sup>2</sup> Láqueze guledé' tu xel-la zi' zren gulebéle'ęquezę', na' láqueze zaj nácalę benne' xache', du lazre' bulunézruje' da zaj de chee', na' belunę' ca benne' gunní'a ca'.

<sup>3</sup> Dxexcheba' du lazre' bulunézruje' xúgute da gulezéquene', ne da zrendxa ca da gulezéquene'.

<sup>4</sup> Gulata' xuene' netu' güentu' le' lataj xelunę' tu zren bēnneache dxelácalęne' bi bichedxu ca' dxelaxárzjene'.

<sup>5</sup> Belundxę' ca da guleza lázrentu', lawe' da belunna cuínaqueze', nédxula chee Xránadxu, na' gudé na' cheentu' netu', cáteze dxaca lazre' Dios.

<sup>6</sup> Ca' naca na, guta' xúentu' Tito gusexuzre' gutupe' da gunézruje le'e, da na' guzú lawe' dxutupe' gate nate.

<sup>7</sup> Le'e dxúnle'le ca naca da dxunle, ca dxeajlí lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'anqueze dxal-la' gúnle'le ca gunle zrin chawe' nigá.

<sup>8</sup> Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezicadxa bēnneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' chee.

<sup>9</sup> Ba nézquezele ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee gácale le'e benne' gunní'a lu da naca chee Cristo lawe' da gudé Le' lu xel-la xache'.

<sup>10</sup> Chee gaca da ba neza chee dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézruje dumí.

<sup>11</sup> Na'a, le gúnteze na chee xexuzrte gunle na, gunle na du lázrele cáteze guzú laule dxunle nédxute, gunézruje ca da du de chee.

<sup>12</sup> Che da li dxaca lazre' tu benne' gunézruje', Dios xezaca ba lazre' na che gunézruje' ca da nape', ne quegá dxenabe' da quebe napa bēnea'.

<sup>13</sup> Quebe dxennía' da nigá chee xexácale le'e xache' chee gácalele benne' xula.

<sup>14</sup> Naca na chee gápale lébete. Na'a nápale chee gunézruje ca da dxelaxarje benne' xula ca', na' xetú lasa xelapa benne' ca' da xelunne' chee gate bi xárjele le'e. Caní gápale lébete

15 cáteze naxúaj na lu dizra' lá'azxa, dxenná na: Bénnea' nápalë'e quebe bi begá'ana chee', na' bénnea' nape' láteze quebe bi bexáizrjeng'.

*Tito ne bi ljwezre' ca'*

16 Xcalén Dios, Bénnea' bzue' lu lázrdau Tito sue' gunne xue chee'le le'e ca zua' neda'.

17 Guzí' lu ne'e da bsebaga' le', na' lawe' da zúaquezë' gunne xue chee'le le'e, ba bezë'e chee' xidë' xedajnnë'e le'e lawe' da dxaca lázrequeze le'.

18 Tu zren nen Tito nasél-lantu' tu bi bíchedxu, tu benne' dxelennë' chawe' chee' xúgute' cue' bi chee' Cristo, ca naca zrin xrlátaje da nune' chee' dizra' chawe' chee' Cristo.

19 Quegá tuze da nigá, san xúgute' cue' bi chee' Cristo gulequé'e bi bíchedxu níqueze chee' sálengë' netu' chee' gácalengë' netu' lu zrin nigá da dxuntu' dxutúbentu' dumí da gácale' na benne' xache' ca' chee' gaca ba Xránadxu, ne chee' gulé'e lau du lázrele dxunle zrin chawe' nigá.

20 Caní dxuntu' chee' quebe nu benne' si tizre' netu' ca dxuchínentu' dumí zrentë' nigá da dxulunezruj bi bíchedxu ca'.

21 Dxuntu' ba xuzre guntu' zrin nigá lu dutë' xel-la li lazre' cheentu', quegá tuze lau Xránadxu, san cá'anqueze lau xúgute' bénneache.

22 Tu zren nen benne' caní nasél-lantu' xetú bi bíchedxu, tu benne' da zánete' lasa ba blé'engë' netu' du lazre' dxunë' zrin chee' Cristo, na' na'a du lázredxe' dxunë' zrin nigá lawe' da dxuxrén lazre' le'e.

23 Che nu benne' guchëbe le'e ca naca chee' Tito, le xe'e nácabe' bi ljwezra', ne dxunbe' zrin tu zren nen neda' chee' gunbe' zrin chee'le. Che nu guchëbe le'e ca naca chee' xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgute' cue' bi chee' Cristo, ne dxelape' ba lá'ana Cristo.

24 Chee' le' na', chee' xeleneze xúgute' cue' bi chee' Cristo, le gulé'e le' nazri'ile le', na' naca cheentu' xucá'ana szrentu' le'e.

## 9

*Da dxulunézruje' chee' bi bíchedxu ca'*

1 Ca naca chee' dumí da gunézrujle chee' bi ca' chee' Cristo, quebe dxun na ba xen guzúaja' chee'le,

2 lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'ë' xezre ca' zaj nababa xezr la xu Macedonia, le'e zrle xezre ca' zaj nababa Acaya, gudú iza ba zúatequezle bi gunézrujle, na' benne' zante' benne' Macedonia du lazre' dxulunézruje' lawe' da dxunézrujle le'e du lázrele.

3 Dxusel-la' bi bíchedxu caní chee' quebe gaca tu da wen lazre' ca da chawe' da ba gunnía' ca dxunle le'e da nigá, ne chee' súatezle bi gunézrujle, ca ba gucha' benne' caní,

4 ne che sa'aca bal-la benne' Macedonia tu zren nen neda' chee' quebe xe'lelé'engë' quebe zúatequezle le'e bi gunézrujle. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e.

5 Chee' le' na' gúqueda' dxun na ba xen naba' bi bíchedxu ca' xelidë' xedajlennabe' le'e nédxula, ne chee' xelácalengë' le'e gutúpale da guchëbe lázrele nédxula gunézrujle. Ca' gaca na, dumí da gutúpale watá'queze na chee' gulé'e na naca tu da dxaca lázrele gunle, ne quegá tu da gunne xúentu' le'e.

6 Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezí'ile'e.

<sup>7</sup> Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dzezaca ba lazre', u xadíaze, lawe' da nazrí'i Dios benne' dxunézruje' dutę xel-la dxebe.

<sup>8</sup> Wazeque' Dios gúnnale' le'e ca naca xúgute' da chawe', cheę gata' cheęle xúgute' da nachínele, ne gápale bi gunézruje cheę gunle xúgute' zrin xrlátaje.

<sup>9</sup> Naxúaj lu dizra' lá'azxa da dxenná na:

Du lazre' bnézruje' cheę benne' xache' ca'.

Ca zaj naca zrin xrlátaje nune' xelegá'anatequeze na.

<sup>10</sup> Dios, Bénnea' dxunézruje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute' da nachínele cheę gázale, na' gusegule' na cheę gúnnale'equeze na lina cheę zrin chawe' da gunle.

<sup>11</sup> Ca' gaca na, gáta'le'e cheęle xel-la gunní'a ca' cheę séquele gunézruje du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'.

<sup>12</sup> Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechínnene' san cá'anqueze dxundxu xelé'e Dios: Xcalenu'.

<sup>13</sup> Xelúe lá'ane' Dios lawe' da da nigá dxunézruje gulé'e na dxuzúale dizra' cheę dizra' chawe' cheę Cristo. Cá'anqueze xelúe lá'ane' Dios ne cheę da gunézruje du lázrele da gácale na le', ne xúgute' cue' bi cheę Cristo.

<sup>14</sup> Cheę le na' benne' ca' xelenabe' cheęle lau Dios, ne xelezrí'ile'ene' le'e ne cheę xel-la zri'i lazre' zren da gulé'e lau Dios ne cheęle le'e.

<sup>15</sup> Xcalén Dios lawe' da nunne' dxi'u tu da zrente da quebe séquedxu xuzájla'adxu.

## 10

### *Xel-la dxenná bea napa Pablo lawe' da naque' gubáz cheę Cristo*

<sup>1</sup> Neda', Pablo, dxuzenda' le'e da nigá ne cheę xel-la dxexruj lazre', ne xel-la zri'i lazre' cheę Cristo. Dxeleonné' naca' benne' zren lazre' gate zúalena' le'e, na' gate zua' zitu' nácale'a benne' snia.

<sup>2</sup> Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxeleonné' dxuntu' zrin cheę Cristo lu beła dxenze cheęntu', na' zúaqueza' tıl-laqueza' benne' ca'.

<sup>3</sup> Láqueze nácantu' beła' dxen quebe dxedıl-lantu' lu beła' dxenze cheęntu',

<sup>4</sup> lawe' da quebe zaj naca cheę beła' dxenze da dxuchínentu' lu wedıl-la cheęntu', san zaj napa na xel-la waca cheę Dios cheę séquentu' guzría xintu' da wal-la ca' cheę nu na' dxedábaga' netu'.

<sup>5</sup> Ca'an naca, dxuzría xintu' da dxusebaga bénnea' dxi'u, ne da dxuzúe' lu xel-la dxucá'ana szren cuina cheę quebe xelúnbea bénneache Dios. Xúgute' da zaj xu'u lu xichaj bénneache dxuzúantu' lu na' Cristo cheę xuluzúe' dizra' cheę'.

<sup>6</sup> Zúátequezentu' gudentu' xel-la zi' xúgute' benne' ca' quebe dxuluzúe' dizra' cheę' gate na' ba dxuzúale dizra' cheę' du lázrele.

<sup>7</sup> Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi cheę Cristo, dxal-la' gueque bé'ene' cáteze na' naca le' bi cheę Cristo, cá'anqueze nácantu' netu' bi cheę Cristo.

<sup>8</sup> Láqueze dxuchínedxada' ca dxal-la' guna' xel-la dxenná bea cheęntu', quebe dxedué'eda' lawe' da nunna Cristo netu' xel-la dxenná bea na' cheę séquentu' gusegúlantu' le'e lu da naca cheę Dios, ne quegá cheę guzría xintu' le'e.

<sup>9</sup> Quebe dxaca lazra' guéquele le'e dxaca lazra' gucheba' le'e ne chee da dxuzúaja' chee.

<sup>10</sup> Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca.

<sup>11</sup> Bénnea' dxenné' da nigá dxal-la' gueque bé'engé' cáteze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súalena' le'e.

<sup>12</sup> Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuiné'. Dxeluné' tu da xálaze gate dxelenné'e ca da zaj nácaqueze', ne dxulutil-le lebe ljwezre'.

<sup>13</sup> Quebe gucá'ana szren cuínantu' lu da quebe naca cheentu'. Dios naque' Bénnea' gulé'engé' netu' naga ze lau guntu' zrin, na' Le' benne' netu' lataj blantu' naga zrале le'e lu xezre Corinto.

<sup>14</sup> Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrале le'e nédxute. Netu' nácantu' benne' nedxu blantu' naga zrале le'e núantu' dizra' chawe' chee Cristo.

<sup>15</sup> Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxejlí lazre' chee, waca gúndxantu' zrin láduja le'e gusegúlantu' xel-la dxejlí lazre' chee, san guntu' na lu'ule da naca cheentu'.

<sup>16</sup> Te na' dxebeza lázrentu' tédxantu' ca naga zrале chee guzénentu' bénneache zaj zré'e ga na' dizra' chawe' chee Cristo, ne quebe chú'untu' naga ba zaj nun zrin xezicadxa benne' ca', chee quebe gucá'ana szren cuínantu' lu da ba zaj nune'.

<sup>17</sup> Che nu benne' dxaca lazre' nu gucá'ana szrené', dxal-la' gucá'ana szrené' Xránadxu.

<sup>18</sup> Bénnea' dxexedxúaj xrlátaje, quebe naque' benne' dxucá'ana szren cuiné', san naque' bénnea' dxucá'ana szren Xránadxu le'.

## 11

### *Ca naca chee Pablo, ne benne' gubáz ca' quebe nase-la Cristo le'*

<sup>1</sup> Le guchaga lau neda' chee nnia' late' da ca zeaje na. Ájatéze naca na, le guchaga lau neda',

<sup>2</sup> lawe' da dxé'le'a gunne xue chee le'e lu da nusebaga Dios neda', ne lawe' da ba nachébe lazra' chee gácale zru'ula Cristo, dxaca lazra' gudéa' le'e lau Le' ca tu nu'ula cuíde'dau' du lazre' súalebe' benne' cheebe'.

<sup>3</sup> Ca ben béla' gula na' guzi xéba' Eva nen xel-la neze cheéba', dxezreba' güele lataj nu si xé le'e, na' cuásale lu xichaj lázrdaule chee québedxa gácale du lázrele chee Cristo.

<sup>4</sup> Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxezi' lu na'le tu be' da nazrá' ca Be' na' da ba guzi' lu na'le, ne dxezi' lu na'le tu dizra' da nazrá' ca naca dizra' chawe' da ba guzi' lu na'le.

<sup>5</sup> Dxéqueda' quebe zaca' neda' látezdxca ca benne' gubáz zren ca', benne' ca' zéajlele le'e.

<sup>6</sup> Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúguté da ba bentu'.

<sup>7</sup> ¿Bena' tu da caléla gate bzenda' le'e dizra' chawe' chee Cristo, ne quebe bi bchízruja' le'e, na' ben cuina' dxexruj lazre' chee xegá'ana szrenle le'e?

<sup>8</sup> Guca na ca gudawa' dumí chee xezícadxa cue' bi chee Cristo gate guzi'a da belunne' neda' chee ßena' zrin ga zúale le'e.

<sup>9</sup> Gate na' guzúalena' le'e, ne bxáxrjeda', quebe bi guzi' lu na'a da naca chee, san bi bíchedxu zá'aque' xezr la xu Macedonia belunne' neda' ca da guchínneda'. ßena' ba xuzre quebe bi gunábeda' le'e, na' cá'anqueze guna'.

<sup>10</sup> Lawe' da núnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'.

<sup>11</sup> ¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

<sup>12</sup> Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelunne' zrin cáteze dxuntu' netu'.

<sup>13</sup> Benne' caní zaj naque' gubáz quebe nasel-la Cristo. Dxelezí xe'e bénneache, ne dxululé'e cuine' ca gubáz chee Cristo.

<sup>14</sup> Quebe naca da nigá da xebánedxu lawe' da Satanásqueze dxulé'e cuina na ca tu gubáz chee xabáa zue' lu xel-la naxaní' chee Dios,

<sup>15</sup> Na' chee le na' dxululé'e cuine' ca benne' dxelún da xrlátaje. Benne' caní xelebía xí'e ca ba naca chee benne' dxelún da caní.

### *Da guzaca Pablo lawe' da naque' gubáz chee Cristo*

<sup>16</sup> Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'.

<sup>17</sup> Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nni'a tu da gucá'ana szren cuina'.

<sup>18</sup> Lawe' da zaj zra' benne' zante dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'.

<sup>19</sup> Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'.

<sup>20</sup> Dxuchaga laule benne' ca' dxelexune' le'e ca benne' zaj nada'u, ne benne' ca' dxuluchínene' le'e, ne benne' ca' dxeleenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule.

<sup>21</sup> Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca

tu da ca zeaje da dxennía'.

<sup>22</sup> ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

<sup>23</sup> ¿Zaj naque' wen zrin chee Cristo?

Nácaxa' neda' wen zrin chee' ca benne' ca', lácala dxuchálaja' ca tu benne' nadá xichaj lázrdawe' gate dxennía' da nigá.

Ba ßendxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.

Ba gulegu'udxa bénneache neda' lizre xia ca belune' chee benne' ca',

na' zane' lásate ba guzúa' lu da stebe chee xel-la gute.

<sup>24</sup> Gazzu' lasa ba belúe benne' judío ca' neda' xide chennu dxua weaj.

<sup>25</sup> Chunna lasa beline' neda' xaga. Tu lasa belú'e neda' xiaj.

Chunna lasa guxaze da dxedá lawe' nísadau' da xu'a lu nisa.

Tu lasa, tu zra tu xela guxu'a lu nísadau'.

<sup>26</sup> Zane' lásate guxu'a neza, ne guzúa' lu da stebe:

Chee xegu ca', ne chee gubán ca'.

Chee benne' waláxr chia' ca', ne chee benne' zitu' ca'.

Guzúa' lu da stebe lu xezre, ne le'e xixre', ne lu nísadau',  
ne ládujla benne' wen lazre' dxelenné' zaj naque' bi bíchedxu.

<sup>27</sup> Benle'a zrin, ne guzúa' lu da zi' da xa'.

Zane' lásate quebe gusia' dxela.

Gudúnle'a, ne gubílele'eda', na' zane' lásate bena' gubasa.

Catite hexaga', ne bexáxrjeda' zra lana' gacua'.

<sup>28</sup> Da zrendxa ca da caní, ne xezícadxa da guzraca'.

Xúgute zra dxéqueda' zi' lawe' da zua' gunne xue chee

xúgute cue' bi chee Cristo.

<sup>29</sup> Che nu benne' nate ni'a ne'e lu xel-la dxejli lazre' chee',

ca'anqueze neda' dxéqueda' nate ni'a ná'aqueza'.

Che nu benne' dxelune' dxejchaze', néda'queze dxaca' tul-la.

<sup>30</sup> Che dxun na ba xen gucá'ana szren cuina',

gucá'ana szren cuina' chee da ca' dxululé'e na nate ni'a na'a.

<sup>31</sup> Dios, Xra Xránadxu Jesucristo, Bénnea' naca chee' güe lá'anatequezdxu Le',  
nézene' dxennía' da li.

<sup>32</sup> Gate guzúa' xezre Damasco, benne' wnná bea na' dxune' zrin chee wenna'  
bea Aretas bzre'e benne' dxuluxúe' dxa xu'u chee xezre na', chee xel-le'  
neda'.

<sup>33</sup> Na' bi bíchedxu ca' bululetje' neda' tu lu xcuite xia ga dxu'u lení' chee xu'u  
lu ze'e da naxechaj na xezre na'. Ca' guca na, gulá' lu na' benne' ca'.

## 12

### *Da ca' Dios blé'ene' Pablo*

<sup>1</sup> Da li quebe dxal-la' gucá'ana szren cuina', san guchálaja' chee da ca' ble'e  
Xránadxu neda', ne da ca' ble'eda' ca naca chee'.

<sup>2</sup> Neda', ca tu benne' dxéajle chee Cristo, ba zej chidá' iza guché Dios neda'  
xabáa guxunne'. Quebe nezda' che guxá'a na' duté bēla' dxen chia', u che cabí.  
Dios nézene'.

<sup>3</sup> Nezda' néda'queza', che zua' lu bēla' dxen chia', u che cabí, quebe nezda',  
tuzé Dios nézene'.

<sup>4</sup> Guché Dios neda' tu xabáa chee', naga benda' dizra' bagache da quebe  
naca chee bénneache xelenné' ca zaj naca na.

<sup>5</sup> Waca gucá'ana szrena' tu benne' caní, san quebe gucá'ana szren  
cuínaqueza', che quebe naca na chee xel-la nate ni'a na' chia'.

<sup>6</sup> Láqueze che gaca lazra' gucá'ana szren cuina' quebe gaca na tu da xálaze,  
lawe' da gaca na tu da li. Quebe guna' na chee quebe nu guéquene' nácadxa'  
ca da gaca lé'ene' naca', u ca da gaca xenne' da dxennía'.

<sup>7</sup> Da caní ble'e Xránadxu neda' gulaca na da xebánele'edxu, na' chee quebe  
gucá'ana szren cuina', guca chia' ca tu xeche' naxaze lu bēla' dxen chia' da  
dxuchine Satanás chee guzalaj na neda'.

<sup>8</sup> Chunna lasa guta' xueda' Xránadxu gucuase' da dxezaca'.

<sup>9</sup> Xránadxu guzre' neda': "Xela zri'i lazre' chia' naca na dutę da dxechínenu' lawe' da dxulé'edxa lau xel-la waca chia' nen benne' nate ni'a ne'e." Ca' naca, dxebeda' lawe' da nate ni'a na'a cheę gulé'e lau lu beła' dxen chia' xel-la waca cheę Cristo.

<sup>10</sup> Cheę le na' dxebeda' ca naca xel-la nate ni'a na' chia', ne ca naca dizra' schanni' ca' dxelenná bėnneache chia', ne ca naca da ca' dxexárzjeda', ne gate zaj nau zi' xuzre' bėnneache neda', ne ca naca da ba xa' ca' da dxedéa' ne cheę Cristo, lawe' da gate nátedxa ni'a na'a, dxéqueda' nácadxa' benne' wal-la.

### *Pablo dxe'e gunne xue cheę bi cheę Cristo zaj zre'e Corinto*

<sup>11</sup> Guca' ca tu benne' nadá xichaj lázrdawe' gate bca'ana szren cuina' caní, san le'e bėnle bėna' na. Le'e na' dxal-la' gucá' anale neda' szren lawe' da quebe zaca' látedzxa ca benne' gubáz zren ca', benne' ca' dxéajle, láqueze quebe bi zaca' neda'.

<sup>12</sup> Zrin bėna' ládujla le'e lu dutę xel-la zren lazre' chia' ble'e na da li naca' gubáz cheę Cristo ne cheę da dxelunna bea na, ne xel-la waca ca' cheę xabáa, ne da ca' dxexabánedxu.

<sup>13</sup> ¿Dxéquele le'e nácale látedzxa blau ca xezícadxa cue' bi cheę Cristo lawe' da guzi' lu na'a da belunne' chia', na' quebe guzi' lu na'a da zaj naca cheęle? Le gunite lau neda' che naca tu da calęla quebe bėnna' le'e lataj bi gúnnale chia'.

<sup>14</sup> Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na cheęle. Quebe dxexíajaja' da nápaie, san lé'eqeaze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézrujbe' xra xrnabe'.

<sup>15</sup> Du lazra' guchíneda' dumí chia' cheę gaca chawe' cheę bėnne'du xu'ule, láqueze dxéqueda' gate nazrí'idxada' le'e, látedzxa nazrí'ile le'e neda'.

<sup>16</sup> Bal-la benne', láqueze zaj nézene' quebe bi guzi' lu na'a da zaj naca na cheęle, dxelenné' gudęl-la' le'e lu da wen lazre'.

<sup>17</sup> ¿Guzi' xe'a le'e lu na' tu benne' gusel-la' cheęle?

<sup>18</sup> Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guzi' xe Tito le'e? ¿Quebe bėntu' tuze ca bėntu' ládujla le'e neda', ne Tito, na' nen tuze Be' Lá'azxa?

<sup>19</sup> Bi bicha' nazrí'ite lazra', ¿dxéquele dxucá'ana cuínantu' xrlátaje laule le'e? Dxuchálajęntu' le'e lau Dios, ne lu La Xránadxu Jesucristo. Xúgutę da caní dxennantu' cheę gúlaie lu da naca cheę Dios.

<sup>20</sup> Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxezí tízrale ljwézrele, ne dxucá'ana szren cuínale, ne dxunle da calęla.

<sup>21</sup> Dxezreba' gate xida' xedajnná'a le'e, Dios gunę' xedué'eda' ne cheęle le'e, da gucuezre na neda' ne cheę zánele le'e, benne' ca' dxelúnteqezezę' dul-la, ne quebe dxulusanę' dxelunę' da sban, ne da dxulucá'ana sban ljwezre', ne da calęla da tu dxelúnzqueze'.

<sup>1</sup> Da nigá naca na da guxunne' lasa xida' xedajnná'a le'e. Xúgute dxulé'e lawe na naca na da li ne chee dizra' chee chupa u chunna benne' xelexechebe'.

<sup>2</sup> Benne' ca' belune' dul-la nédxula, ne xúgutele le'e, dxácaté ne zua' zitu' naga zrale, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudé'a cá'aze ca da ba nunle.

<sup>3</sup> Nadxa lé'ele da gulé'e na dxenné Cristo lu dxu'a neda', na Le' quebe nate ni'a ne'e lu da guné' chee, san naque' benne' wal-la ládujla le'e.

<sup>4</sup> Da li gudé'e xaga béguaj ca tu benne' nate ni'a ne'e, san naca bané' ne chee xel-la waca chee Dios. Cá'anqueze netu' nate ni'a nantu' ca da guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin chee le'e.

<sup>5</sup> Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'?

<sup>6</sup> Dxebeza lazra' gueque be'ele quebe naca' neda' benne' wen lazre' lu da naca' chee Cristo.

<sup>7</sup> Dxenábantu' lau Dios chee quebe bi da calela gunle, quegá chee gulé'entu' dxennantu' da li, san chee gunle le'e da xrlátaje, láqueze dxéquele le'e quebe dxennantu' da li.

<sup>8</sup> Quebe bi gaca guntu' da dxedábaga na da li, san tuze da dxácale na da li.

<sup>9</sup> Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gácale duté da dxal-la' xelaca bi chee Dios.

<sup>10</sup> Dxuzúaja' chee da nigá nédxula ca xida' xedajnná'a le'e, chee quebe gun na ba xen gate xida', gácale'a benne' snia ca guchíneda' xel-la dxenná' bea chia', da benna Xránadxu neda' chee séqueda' gusegula' le'e lu da naca chee Dios, ne quegá chee guzría xi'a le'e.

<sup>11</sup> Na'a, bi bicha', le sua xel-la dxebé. Le gaca duté da dxal-la' xelaca bi chee Dios. Le xue zren ljwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre', ne nazrí'ine' dxi'u súalene' le'e.

<sup>12</sup> Le gugapa diuzre ljwézrele tule xetule, ne le gunida ljwézrele.

<sup>13</sup> Xúgute bi bíchedxu, bi chee Cristo dxulugape' le'e diuzre.

<sup>14</sup> Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!



## DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

### *Dizra' da bzuaj Pablo chee bi chee Cristo zaj zre'e xezr la xu Galacia*

<sup>1</sup> Neda', Pablo, naca' gubáz chee Cristo. Quebe gulesel-la bènneache neda', ne quegá buluzúa bènneache neda' gaca' gubáz. Caní bènqueze Jesucristo chia', ne Xradxu Dios, Bènnea' bsebane' Jesús ládujla benne' gate.

<sup>2</sup> Xúgute benne' bíchedxu zrálene' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'e xezre ca' zaj nnita' xezr la xu Galacia.

<sup>3</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

<sup>4</sup> Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calela. Bene' da guca lazre' Xradxu Dios.

<sup>5</sup> ¡Gaca báqueze Dios chadía chacanna! ¡Ca'an gaca na!

### *Quebe de xetú dizra' chawe' chee Dios*

<sup>6</sup> Dxexebánele'eda' cheele le'e lawe' da dxebéaj xíchajtele Dios, Bènnea' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo.

<sup>7</sup> Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo.

<sup>8</sup> Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bènnea' de', lácala naca neda', u naca tu gubáz chee xabáa.

<sup>9</sup> Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzi' lu na'le, dxenaba' lau Dios cue'e bènnea' de'.

<sup>10</sup> Gate dxennia' da nigá, ¿Dxaca lazra' xegá'ana' xrlátaje lau bènneache, u che lau Dios? ¿Dxaca lazra' guna' da xelezaca ba lazre' bènneache? Che ca'an dxaca lazra' guna' da dxelezaca ba lazre' bènneache, quebe naca' wen zrin chee Cristo.

### *Ca bexaca Pablo gubáz chee Cristo*

<sup>11</sup> Dxuzéajni'ida' le'e, bi bicha', dizra' chawe' da dxuzenda' bènneache, na' quebe naca na tu da gulaj na lu xichaj lázrdau bènneache.

<sup>12</sup> Quebe nu benne' benne' na neda', ne quegá nu benne' bsédene' neda' le na, san Léqueze Jesucristo bzenne' na neda'.

<sup>13</sup> Ba bènqueze ca bəna' neda' nédxula gate na' nazi' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzría xi'a-be'.

<sup>14</sup> Lu xel-la benne' xudau' chee judío ca', neda' ba bzrué'edxeda' ca xúgute bi waláxr chia', bi ljwezra' ca', lawe' da be lázredxa' gapa' ca da xjácale xra xrtawa' ca'.

<sup>15</sup> Dios guqu'e neda' nédxula gate za gálaja', na' lu xel-la zri'i lazre' chee gunné' neda'. Nadxa gate guca lazre' Le',

<sup>16</sup> blé'ene' neda' Zri'ine', chee guzenda' benne' ca' quebe zaj naque' judío ca naca chee Zri'ine'. Gate guca da nigá, quebe nu benne' gunábeda',

17 ne quebe guxá'a Jerusalén cheajnábeda' benne' zaj naqueḡ gubáz chee Cristo nédxudxa ca neda'. Guxá'a naga nababa xęzr la xu Arabia, na' gudé na' bezrina' xęzre Damasco.

18 Gudé chun iza guxá'a Jerusalén, cheeḡ xeajchálajlena' Pedro, na' begá'analeḡa' le' xta' gubizra.

19 Quebe nu ble'eda' xetú benne' gubáz cheeḡ Cristo, san tuze Jacobo, bi biche Xránadxu.

20 Ne cheeḡ La Dios dxapa' le'e, da li naca da nigá dxuzúaja' cheeḡ le'e.

21 Ca gudé na' guxá'a xęzre ca' zaj nababa xęzr la xu Siria, ne xęzre ca' zaj nababa xęzr la xu Cilicia.

22 Benne' bíchedxu ca', bi cheeḡ Cristo zaj zre'e xęzr la xu Judea quebe zaj nunbe'e neda'.

23 Belénzeneḡ nu dxenná: "Bénnea' nédxula gudáu zi' xuzreḡ dxi'u, na'a dxuchálajeḡ dizra' chawe' cheeḡ xel-la dxeajlí lazre' Cristo, da na' guca lazreḡ guzria xi'e nédxute."

24 Na'a dxelúe lá'anęḡ Dios ca da belenne' ca naca chia'.

## 2

### *Benne' gubáz ca' dxelezi' lu ne'e Pablo*

1 Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren.

2 Guxá'a na' lawe' da ble'e Dios neda' dxal-la' cha'a na'. Na' cheézela bchálajlena' benne' ca' zaj naqueḡ blau ládujla bi cheeḡ Cristo, ne bzenda' le' dizra' chawe' da dxuchálaja' ládujla benne' ca' quebe zaj naqueḡ judío. Bena' caní cheeḡ nezda' quebe guca dácheze zrin da ba bęna', ne da dxuna'.

3 Gulezi' lu ne'e zrin nuna', na' quebe nu gunná be'e Tito, bi zálębe' neda', chugu lu bęla' cheeḡbe' da gulé'e na nácabe' bi cheeḡ Dios, lácala quebe nácabe' judío.

4 Bal-la benne' quebe zaj naqueḡ du lazre' benne' bíchedxu, benne' gulu'e ládujla dxi'u lu da wen lazre', gulaca lazreḡ chugu da gulé'e na lu bęla' cheeḡ Tito. Benne' caní gulu'e ládujla dxi'u cheeḡ xelenézeneḡ ájala xelegúeḡ lataj da nazidxu lu na' Jesucristo, cheeḡ xuluxuzúeḡ dxi'u ca benne' zaj nada'u lu da bdxixruj bea Moisés.

5 Ne chíteze quebe bentu' le' lataj xelegú'u xel-leḡ netu' lawe' da guca lázrentu' xegá'analeḡ le'e da li dizra' chawe' cheeḡ Cristo.

6 Benne' ca' zaj naqueḡ blau quebe bi da cube bulusebagueḡ netu'. Da zaj naqueḡ quebe bi naca na chia' lawe' da quebe xuchí'a Dios ca da nalá' láweze cheeḡ bęnneache.

7 Quebe bi bulusebagueḡ neda', lawe' da belexúnbe'e Diósqueze bsebageḡ neda' guzenda' benne' ca' quebe zaj naqueḡ judío dizra' chawe', cáteze bsebageḡ Pedro guzenneḡ benne' judío ca' dizra' chawe'.

8 Léqueze Dios na', Bénnea' bzuęḡ Pedro gubáz cheeḡ ládujla benne' judío ca', cá'anqueze bzuęḡ neda' gaca' gubáz cheeḡ ládujla benne' quebe zaj naqueḡ judío.

9 Cheeḡ leḡ na', Jacobo, ne Pedro, ne Juan, benne' zaj naqueḡ blaudxa, belexúnbe'eḡ ben Dios neda' culuén nigá, na' gulezi' lu ne'e neda', ne Bernabé, na' beluneḡ tuze dizra' cheajzentu' netu' benne' ca' quebe zaj naqueḡ judío dizra' chawe', dxácateḡ na' leḡ xuluzenneḡ na benne' judío ca'.

10 Túteze da gulenábeneḡ netu' xexache lázrentu' benne' xache' ca', da na' dxue lazra' dxuna'.

*Pablo dxedil-leḡ Pedro lu xęzre Antioquia*

11 Gate bla' Pedro xezre Antioquia gudil-la' le' caniqueze lawe' da gunegue lazre'.

12 Nédxute gudágulene' benne' ca' quebe zaj naque' judío cadxa belelá' bal-la benne' gusel-la Jacobo. Nadxa bebigue'e chala'ala, ne bsane' québedxa gudágulene' benne' ca' lawe' da bzrebe' judío ca', benne' ca' zaj nadxugu lu be'la' chee' da dxul'e na.

13 Nadxa xezicadxa judío ca' zaj naque' bi chee Cristo belune' tu zren Pedro lu da dxune' láweze. Caní belune', na' ca' bente Bernabé tu zren benne' ca' lu da na' dxelune' láweze.

14 Gate ble'eda' neda' quebe dxelune' cáteze naca chee da li chee dizra' chawe' chee Cristo, na' gucha' Pedro lau xúgute benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. ¿Bizr chee na' dxenná be'enu' benne' quebe zaj naque' judío xelune' ca dxelún benne' judío?

*Benne' judío xelelé' che dxeajlí lazre' Cristo ca dxaca chee xezicadxa benne'*

15 Cá'anqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezicadxa xezr la xu ca'.

16 Nézedxu netú benne' quebe xegá'ane' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee le na' cá'anqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bendxu ca nadxixruj bea na. Netú benne' quebe xegá'ane' xrlátaje lau Dios lawe' da nune' da nadxixruj bea na.

17 Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxul'e na ne nácadxu benne' dul-la, ¿nnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¡Cabata'!

18 Che dxuchínnaja' tu, na' che te na' xexuna' na, na' nabaga' zria.

19 Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee da nun Dios.

20 Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le na', québedxa naca bana' neda'. Cristo naca bané' lu xichaj lázrdawa'. Xel-la nabán da napa' lu be'la' dxen chia', napa' na ne chee xel-la dxeajlí lazre' chia' Zri'ine Dios, Bénnea' bzri'ine' neda', ne bzane cuine', gutié' waláz chia' neda'.

21 Quebe dxaca lazra' guzúa' chala'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nune' da nadxixruj bea na, na' dácheze guca da ben Cristo gate gutié'.

### 3

*Dxezidxu Be' Lá'azxa ne chee xel-la dxeajlí lazre'*

1 Bi bicha', zrale Galacia, nácale le'e benne' xala ca'. ¿Zua nu benne' dxezi xe'e le'e chee québedxa guzúala dizra' chee da li? Ba blé'entu' le'e caniqueze Jesucristo, ca gudé'e le'e xaga béguaj.

2 Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxéajlele chee da bennele?

3 ¿Ájala chee na' nácale benne' xala? ¿Dxéquele gunle gácale dute da na' guzú laule gácale ne chee Be' Lá'azxa?

4 ¿Dácheze gudele záneteḡ xel-la zi' ca'? Dxaca lazra' quebe guca na níteze.

5 Gate Dios dxunne' le'e Be' Lá'azxa chee', ne dxunē' xel-la waca ca' chee xabáa ládujla le'e, ¿dxunē' na lawe' da dxunle ca nadxixruj bea na, u lawe' da guxéajlele chee dizra' chawe' da bénnele?

6 Abraham guxeajlí lazre' Dios, na' Dios guzi' lu ne'e da nigá ca tu da bca'ana le' xlátaje.

7 Chee le na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxeleajlí lazre' Dios.

8 Naxúaj na lu dizra' lá'azxa ca naca da nigá. Lawe' da neze Dios nédxute gucá'ane' xlátaje benne' quebe zaj naque' judío, benne' xeleajlí lazre' Le', na' guzre' Abraham nédxute dizra' chawe' nigá, gunné': "Gaca chawe' chee benne' duté xezr la xu ne' chiu' lue'."

9 Ca'an naca, dxaca chawe' chee benne' dxeleajlí lazre' Dios tu zren nen Abraham, bénnea' guxeajlí lazre' Dios.

10 Benne' ca' dxuluxrén lazre' zaj nagá'ane' xrlátaje lau Dios lawe' da zaj nunē' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúgute benne' quebe dxelúnqueze' xúgute da nadxixruj bea na, da na' naxúaj na lu xiche lá'azxa.

11 Dxunna bea na netú benne' quebe xegá'ane' xrlátaje lau Dios lawe' da nunē' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios.

12 Bénnea' dxunē' ca bdxixruj be'e Moisés quebe dxunē' na ne' chee xel-la dxeajlí lazre' chee' lawe' da naxúaj da dxenná na: Benne' dxunē' xúgute da caní gaca banē' ne' chee le na.

13 Cristo bselé' dxi'u lu de' da xu'u nu quebe dxun da nadxixruj bea na lawe' da guxú'ukeze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga.

14 Da nigá guca na chee gaca gun Dios xrlátaje benne' ca' quebe zaj naque' benne' judío, da na' guchebe lazre' gunē' lau Abraham ne' chee Jesucristo, na' chee si' lu nnadxu xúgute dxu Be' Lá'azxa ne' chee xel-la dxeajlí lazre' cheedxu ca da guchebe lazre' Dios.

### *Da naca chee da nadxixruj bea na, ne da naca chee da guchebe lazre' Dios*

15 Bi bicha', dxulé'eda' le'e ca da dxaca chee bénneache. Gate tu benne' dxunē' tu xel-la wezria, ne ba bzujaje' láqueze' lawe na, netú benne' quebe gaca guchinnaje' na, ne quebe bi gaca gudé'e chee na.

16 Dios guchebe lazre' da gunē' chee Abraham, ne chee zri'ine zre sue'. Quebe dxenná na: Chee zri'ine zre sue' ca', da naca na chee benne' zan, san dxenná na: Chee zri'ine zre su', da naca na chee tuze benne', bénnea' naque' Cristo.

17 Da dxennia' naca na da nigá: Dios bene' tu xel-la wezria nen Abraham, ne bca'ana chawe' na. Chee le na', da bdxixruj be'e Moisés da bla' na ca gudé tapa gaxúa chi dxua iza quebe gaca guchinnaj na xel-la wezria na', u xucá'ana na dácheze da guchebe lazre' Dios.

18 Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' gunézruje' na cá'aze chee Abraham.

19 Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee gulé'e na ca naca xtul-la bénneache cadxa xelá' zri'ine zre sua

Abraham na', Bénnea' guchebe lazre' Dios gune' da xrlátaje chee'. Dios gusel-  
le' da gunná bé'ene' lu na' gubáz chee xabáa chee', na' Moisés guque' benne'  
dxudé dizra' cheen.

<sup>20</sup> Quebe dxun na ba xen nu benne' gudé dizra' gate naca na chee tuze  
benne', na' Dios naque' tuze, Bénnea' guchebe lazre' chee Abraham ca da  
gune'.

### *Da dxun da bdxixruj be'e Moisés*

<sup>21</sup> ¿Nnadxu dxedábaga da bdxixruj be'e Moisés da na' guchebe lazre' Dios?  
¡Cabata'! Che da nadxixruj bea na da bnezruj Dios gaca gunna na xel-la nabán  
chee bénneache, na' gaca xegá'ana xrlátaje lau Dios tu benne' che gune' ca da  
nadxixruj bea na na'.

<sup>22</sup> Dxenná na lu dizra' lá'azxa, xúgute bénneache zaj nabague' dul-la chee  
gaca xezezí' lu ne'e da guchebe lazre' Dios gunne' benne' ca' xeleajlí lazre'  
Jesucristo.

<sup>23</sup> Nédxudxa ca bzrin zra gaca nu cheajlí lazre' Cristo, ne chee da nadxixruj  
bea na, xúgutedxu, benne' judío, gúcadxu ca benne' zaj xu'e lizre xia, lawe' da  
xadíaze bendxu ca dxenná da nadxixruj bea na, na' guléxadxu ca bzrin zra  
guca cheajlí lázredxu Cristo.

<sup>24</sup> Da nadxixruj bea na gunná be'e na dxi'u, ca dxun tu benne' dxusegule'  
bidau' chee benne' xula cadxa bzrin zra bla' Cristo, chee xegá'anadxu xrlátaje  
lau Dios gate guxeajlí lázredxu Cristo.

<sup>25</sup> Na'a lawe' da ba bzrin zra gaca cheajlí lázredxu Cristo, québedxa xú'udxu  
lu na' da nadxixruj bea na da naca na cheedxu ca tu benne' dxusegule' bidau'.

<sup>26</sup> Xúgutele na' dxeajlí lázrele Jesucristo nácale tuze nen Le'. Chee le na'  
nácale bi chee Dios.

<sup>27</sup> Xúgutele le'e na' gudxúale nisa chee gácale tuze nen Cristo, Le' naque'  
chee ca tu ladxé nácale.

<sup>28</sup> Québedxa dxelé'e Dios le'e ca benne' judío, u benne' quebe naque' judío, u  
ca benne' nada'u, u benne' quebe nada'u, u ca benne' biu, u nu'ula. Dxelé'eng'  
le'e, naca xúgutele ca tuze bel-la' dxen lawe' da nácale tuze nen Jesucristo.

<sup>29</sup> Che nácale bi chee Cristo, da li nácale zre sua Abraham, na' gaca chee da  
guchebe lazre' Dios gune'.

## 4

<sup>1</sup> Da dxaca lazra' nnia' naca na da nigá: Dxácaté ne naca bidau' bi na' gaca  
cheebe' da naca chee xrabe', nácabé' ca bi nada'u xu'ube' lu na' xránabe', lácala  
da lí gácabe' xrane xúgute da de lizre xrabe'.

<sup>2</sup> Xu'ube' lu na' benne' dxulusédene'-be', ne lu na' benne' ca' xu'u lu ne'e da  
naca cheebe', cadxa zrin zra gulé'e xrabe' da li nácabé' zrí'ine'.

<sup>3</sup> Cá'anqueze dxaca cheedxu. Gate ne nácadxu ca bidau', xú'udxu lu na' xúgute  
da dxelenná bea na lu xezr la xu nigá.

<sup>4</sup> Gate bzrin zra ba ble'e lau Dios, na' gusel-le' Zrí'ine', gúlajbe' ne chee tu  
nu'ula, na' guxú'e lu na' da bdxixruj be'e Moisés.

<sup>5</sup> Blé'e bselé' benne' zaj xu'e lu na' da nadxixruj bea na, chee gaca si' lu na'  
Dios dxi'u ca zrí'inequeze'.

<sup>6</sup> Lawe' da ba nácale bi chee Dios, Le' gusel-le' Be' Lá'azxa chee Zrí'ine' lu  
xichaj lázrdaule, na' dxenná Be' na': "Abba", da zéaje na: Xrae.

<sup>7</sup> Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de cheen'. Caní naca lawe' da nácadxu Cristo tuze.

*Pablo dxe'e gunne xue chee bi ca' chee Cristo*

<sup>8</sup> Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios.

<sup>9</sup> Na'a gate ba núnbeale Dios, u nnadxu, Dios na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xezr la xu nigá, da ca' quebe zaj zaca?

<sup>10</sup> Le'e ne dxapa ba lá'anale bal-la zra ca', ne bal-la beu' ca', ne tu tu iza ca'.

<sup>11</sup> Dxezrébele'a beña' zrin níteze ládujla le'e gate bzenda' le'e dizra' chawe' chee Cristo.

<sup>12</sup> Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calela benle chia' neda'.

<sup>13</sup> Ba nézquezle gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'.

<sup>14</sup> Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guzú' lu na'le neda' ca tu gubáz chee xabáa chee Dios, u ca náqueza' Jesucristo.

<sup>15</sup> ¿Bizra guca chee xel-la dxebé da guzúale? Waca nnia' tu da xecá'ana le'e chawe', la naca da guzéquele gunle, bebéajtele xiaj láuqueze, chee gúnnale na neda'.

<sup>16</sup> Na'a, ¿bexaca' ca tu benne' dxeçuídenē' le'e lawe' da gucha' le'e da li?

<sup>17</sup> Benne' ca' dxelaca lazre' chugu lu beła' chee da na' dxulé'e na, dxe'e gunne xue chee le'e, san quegá chee xegá'anale chawe'. Da dxelaca lazre' naca na xulucuase' le'e nen netu' chee cuele gunne xue chee le'.

<sup>18</sup> Naca chawe' cuedxu gunne xue chee benne' xula chee xegá'ane' chawe', ne quegaze gate zúalēna' le'e.

<sup>19</sup> Zrí'ina'dau', naca chia' ca zua' lu xel-la dxudía ne chee ca dxaca chee tu nu'ula ba zua sanē' bidau', ne wabédxequeza' gunne xue chee cadxa gulé'e lau da li dxenná bea Cristo lu xichaj lázrdaule.

<sup>20</sup> Dxezé lazra' súalēna' le'e ná'aqueze chee gaca guchálajlēna' le'e xezícadxa dizra' lawe' da dxezí'ale'a gunne xue.

*Da dxusede dxi'u ca guca chee Sara, ne chee Agar*

<sup>21</sup> Le'e na', dxaca lázrele chu'ule lu na' da bdxixruj be'e Moisés, le xechébxexque da nigá: ¿Quebe ne xénnele ca dxenná da nadxixruj bea na?

<sup>22</sup> Dxenná na gulezrá' chupa zrí'ine Abraham. Tube' gúcabe' zrí'ine zrí'ulaqueze', nu'ula quebe nada'u.

<sup>23</sup> Zrí'ine nu'ula nada'u gúlajbe' cáteze dxelalaj xúgute bidau', na' zrí'ine nu'ula quebe nada'u gúlajbe' chee guca li ca da guchebe lazre' Dios.

<sup>24</sup> Da nigá naca na ca tu da dxulé'e na. Dxúpatē nu'ula caní dxululé'eng' ca zaj naca chupa xel-la wezrí'a. Tu xel-la wezrí'a nigá naca na da bnezruj Dios Moisés lu xi'a Sinaí, da na' dxulé'e Agar. Benne' ca' zaj xu'e lu na' xel-la wezrí'a nigá dxelálajē' ca benne' zaj nada'u.

<sup>25</sup> Cá'anqueze dxulé'e Agar da naca chee xi'a Sinaí da zua na ga nababa Arabia, Cá'anqueze xi'a nigá dxulé'e na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zrí'ing' ca'.

26 Benne' zaj nababe' Jerusalén chee xabáa quebe zaj naque' benne' zaj nada'u, na' dxi'u nácadxu ca zri'ine benne' ca'.

27 Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na:

Gubé lue', nu'ula wizre, lue' quebe nu chilá' zri'inu'.

Gudxezre xa'a lu xel-la dxebé, lue' quebe númbe'u xel-la dxudía

chee xel-la dxezán bidau'.

Nu'ula quebe guzán bidau' gate guque' cuide' waxandxa zri'ine'

quézcala zri'ine nu'ula zúalene' benne' chee'.

28 Le'e, bi bícha'dau', nácadxu ca Isaac. Nácadxu zri'ine Abraham, bi ca guchebe lazre' Dios gunézuje' le'.

29 Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute' bidau', gudáu zi' xúzrebe' Isaac, zri'ine Abraham na', bi gúlajbe' ne chee Be' chee Dios, cá'anqueze dxaca na na'a.

30 Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zri'ine' lawe' da quebe gaca chee zri'ine nu'ula nada'u sibe' da dxal-la' si' zri'ine nu'ula quebe nada'u.

31 Ca' naca na, bi bícha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

## 5

### *Le sua chuchu lu xel-la weselá*

1 Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

2 Le xene da dxapa' le'e. Neda', Pablo, dxapa' le'e, che güele lataj chugu lu belá' chee da na' dxulé'e na, quebe bi da ba neza gaca chee da naca chee Cristo.

3 Dxaca lazra' xapa' le'e xecha lasa, che nu benne' chugu lu belá' chee' da na' dxulé'e na, dxun na ba xen gun bénnea' xúgute' da bdxixruj be'e Moisés.

4 Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee Cristo, ne dxexebéaj cuínale lu xel-la zri'i lazre' chee Dios.

5 Dxi'u, ne chee Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios.

6 Che nácadxu tuze nen Cristo, quebe bi da ba neza gaca na cheedxu che chugu lu belá' cheedxu da na' dxulé'e na, u che quebe chugu na. Da ba neza naca na cheedxu che dxeajlí lázredxu Cristo, na' xel-la dxeajlí lazre' cheedxu dxuzúa na dxi'u lu xel-la zri'i lazre'.

7 Da xrlátaje bénquezele. ¿Nuzra gulú'u xel-la le'e chee québedxa guzúale dizra' da li?

8 Quegá Dios bene' da na'. Nácaqueze Le' Bénnea' bláwizre' le'e.

9 Quebe gal-la lázrele da dxenná na: Láteze cua zichaj dxuchazra na ca naca cua.

10 Dxuxrén lazra' Xránadxu ca naca chee le'e, quebe guzúale chalá'ala da nigá dxuchálaja'. Dios gudé' lu da ba xa' bénnea' dxun zrējene' le'e, nüteteze naque'.

11 Da naca chia', bi bícha', la xapa' neda' bénmeache dxal-la' chugu lu belá' chee' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo.

12 Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu beła' chee da na' dxulé'e na, dxaca lazra' chugu ca da zaj naca benne' ca' chee québedxa xelún zréajene' le'e.

13 Bi bícha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' chee.

14 Xúgutę da nadxixruj bea na dxun bénnea' dxuzúe' dizra' da na' dxenná na: Bzri'i le sa' ljwezru' cáteze nazri'i cuínu'.

15 Che dxunle ca dxelún be xixre' ca', ne dxun zi' ljwézrele, ne dxasa ljwézrele tule xetule, le guxúe ga guzría xi' cuínale.

*Da dxundxu cáteze dxezá lazre' beła' dxen cheedxu, ne da dxundxu cáteze dxezá lazre' Be' Lá'azxa*

16 Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' beła' dxen chee.

17 Da dxezá lazre' beła' dxen cheedxu dxedíl-lale na da dxezá lazre' Be' Lá'azxa, na' da dxezá lazre' Be' Lá'azxa dxedíl-lale na da dxezá lazre' beła' dxen cheedxu. Dxúpatę da caní dxeledíl-lale ljwezre na, na' chee le na' quebe gaca gunle da dxaca lázrele gunle.

18 Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

19 Zaj nulé'e láuqueze da dxelún benne' ca' dxelune' cáteze da dxezá lazre' beła' dxen chee':

Deledálenę' nu'ula xula.

Dulucá'ana dítaje' le sa' ljwezre'

Dxelune' da sban, ne da schanni'.

20 Dxelúe szrene' bedau' xiaj xaga, ne dxelune' xel-la wazrá'.

Dxelecuídenę' le sa' ljwezre', ne dxelezzré'e.

Dxelaque' wide', ne dxelezzrá'a xíchaje'.

Dxelenné' chee ljwezre'.

Dxelebáj xichaj ljwezre' tue' xetue', ne dxelaque' chupa la'a.

21 Dxeleque' xa lazre', ne dxelutie' benne'.

Dxelezúzrene', ne dxeledanne' da calela da dxelune' lu laní ca'.

Zánetę da dxelundxe' bi chee da caní. Che le na' dxapa' le'e ca bénqueza' nédxute, benne' dxelune' da caní quebe xelexú'e naga dxenná bea Dios.

22 Da dxelún benne' ca' dxelune' cáteze da dxulé'e Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebé.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelune' da zri'a chawe'.

Zaj naque' li lazre'.

23 Zaj naque' dxexruj lazre', ne dxelenná be'e cuine'.

Quebe de da nadxixruj bea na da dxę na dxi'u quebe gundxu da caní.

24 Benne' ca' zaj naque' bi chee Cristo ba buludé'e le'e xaga béguaj beła' dxen chee' nen xúgutę da dxezá lazre na.

25 Che naca bandxu ne chee Be' Lá'azxa, dxal-la' gundxu ca da dxulé'e Be' Lá'azxa dxi'u.

26 Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.



## 6

*Le gácale le sa' ljwézrele tule xetule*

<sup>1</sup> Bi bícha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bénnea' chee xezé chúchue'. Dخال-la' gácale dxexruj lazre' gunle da nigá chee quebe güele lataj da xriwe' cu'u xel-la na le'e.

<sup>2</sup> Le gácale le sa' ljwézrele tule xetule lu da naca xua chee, na' caní gunle ca nadxiruj be'e Cristo.

<sup>3</sup> Che nu benne' dxéqueñe' naque' benne' blau, ne quebe nu naque', dxezi xézqueze cuine'.

<sup>4</sup> Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'.

<sup>5</sup> De tu xua da nabágadxu chee Cristo, da dxal-la' gua tu tu benne'.

<sup>6</sup> Benne' zua nu dxusede le' ca naca xrtizra Dios dxal-la' gunézruje' late' da naca chee' chee bénnea'.

<sup>7</sup> Quebe si xé cuínale: Netú benne' gaca quítajlene' Dios. Da dxaza bénneache, léqueze na xelape'.

<sup>8</sup> Che dxune' da dxezá lazre' be'la' dxen chee', da xezi'e naca na xel-la gute, na' che dxune' da dxezá lazre' Be' Lá'azxa, da xezi'e naca na xel-la nabán zeajlí canna.

<sup>9</sup> Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Dios dxi'u, na' xezidxu lazruj cheedxu.

<sup>10</sup> Chee le na', gate nazidxu lataj, dxal-la' gundxu da xrlátaje chee le sa' ljwézredxu, ne da dxundxa na ba xen, gundxu da xrlátaje chee le sa' ljwézredxu dxeleajlí lazre' Cristo.

*Da bzuaj Pablo nen ná'queze'*

<sup>11</sup> Le nna'xque cadite da zri'a naca da nigá dxuzúaja' chee le nen ná'queza'.

<sup>12</sup> Benne' ca' dxelaca lazre' chugu lu be'la' chee le da na' dxulé'e na, dxelune' na chee xelaxegá'ane' chawe' lau bénneache, ne chee quebe xeláu zi' xuzre' le' lawe' da dxuluchálaje' dizra' chee da ben Cristo le'e xaga béguaj.

<sup>13</sup> Benne' caní, benne' zaj nadxugu lu be'la' chee' da na' dxulé'e na quebe dxelune' xúgute' ca da nadxiruj bea na. Dxelaca lazre' chugu lu be'la' chee le da na' dxulé'e na chee gaca xulucá'ana szren cuine' ca naca da belune' chee le.

<sup>14</sup> Quebe dxaca lazra' xucá'ana szren cuina' chee tu da bena', san tuze chee da ben Xránadxu Jesucristo le'e xaga béguaj. Ne chee Le' naca xezr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu.

<sup>15</sup> Che nácadxu tuze nen Cristo, quebe bi da ba neza gaca na cheedxu che nadxugu lu be'la' cheedxu da na' dxulé'e na, u che quebe nadxugu na. Da ba neza naca na cheedxu che nácadxu benne' cube lu xichaj lázrdaudxu.

<sup>16</sup> Dxenaba' lau Dios gunézruje' xel-la dxebeza zri lazre' chee xúgute' benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

<sup>17</sup> Lawe' da zaj zria lu be'la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

<sup>18</sup> Le'e, bi bícha'dau', dxenaba' lau Xránadxu Jesucristo guné' chawe' chee xúgutele. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE EFESO

*Pablo dxugape' diuzre bi chee Cristo zaj zre'e xezre Efeso*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá cheele le'e, nácale bi chee Dios, ne dxeajlí lázrele Jesucristo, na' zrale xezre Éfeso.

<sup>2</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

*Ca naca da chawe' da dxezi' lu nnadxu ne chee Cristo*

<sup>3</sup> Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo.

<sup>4</sup> Dios guqué'e dxi'u chee gácadxu bi chee Cristo gate quebe ne gunte' xezre la xu, chee gácadxu benne' lá'azxa, ne du lazre' lau Lē'.

<sup>5</sup> Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' gunē'.

<sup>6</sup> Chee lē na', tu dxue lá'anazquezdxu Dios ne chee xel-la xrlátaje chee' da naca na szrentē. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'.

<sup>7</sup> Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu.

<sup>8</sup> Dios nazri'ile'ene' dxi'u, ne dxunne' dxi'u xel-la sina, ne xel-la dxéajni'i,

<sup>9</sup> na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' gunē' ne chee Cristo.

<sup>10</sup> Nuchague' xúgute da zaj zua na xabáa, ne xezre la xu, chee xelú'u na lu na' Cristo, da gusexúzre' gunē' gate zrin zra chee na.

<sup>11</sup> Ne chee Cristo Dios guqué'e dxi'u chee' gate nate, chee si' lu nnadxu da xáladxu da gunna Lē', ca da ba núnqueze Dios, Bénnea' dxunne' xúgute da dxeque Lē' xrlátaje.

<sup>12</sup> Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo.

<sup>13</sup> Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Lē', na' Dios bzuē' Be' Lá'azxa lu xichaj lázrdaule ca tu da dxunna bea na nácale bi chee', ca guchebe lazre' gunē'.

<sup>14</sup> Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lá'anaquezdxu Lē' ca naca xel-la szren chee'.

*Dxenaba Pablo gunezruj Dios xel-la sina chee bi ca' chee Cristo*

<sup>15</sup> Chee lē na' gate benda' ca dxeajlí lázrele Cristo, ne ca nazri'ile xúgute bi ca' chee Dios,

<sup>16</sup> dxápaqueza' Dios; Xcalenu', ca naca cheele le'e gate dxuchálajlęna' Dios, ne dxeajsá lázrqueza' le'e.

<sup>17</sup> Dxenaba' Dios chee Xránadxu Jesucristo, naque' Xradxu zuē' xabáa, gunne' le'e xel-la sina lu be' nácaqueze da gulé'e na le'e gúnbea xámele Lē'.

<sup>18</sup> Dxenaba' lau Dios guzéajni'ine xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a chee xel-la szren da gunezruj Dios bi chee ca',

<sup>19</sup> ne ca naca xel-la waca zrente chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu dutę xel-la dxenná bea zren chee'

<sup>20</sup> gate bsebanę' Cristo ládujla benne' gate ca', ne guleche' Le' chalá'a xabela chee' xabáa,

<sup>21</sup> ne bzue' Le' chee nna bé'ene' xúgute benne' blau xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'.

<sup>22</sup> Bzue' xúgute da zaj zua lu na' Cristo, ne bzue' Le' gaque' benne' xíchaje chee bi chee ca' ca naca xúgute da dxelune'.

<sup>23</sup> Benne' caní zaj naque' ca bela' dxen chee Cristo, da dxulé'e na dutę ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

## 2

### *Naca bandxu lawe' da nazrí'i Dios dxi'u*

<sup>1</sup> Gate nate gúcale ca benne' gate lu xichaj lázrdaule ne chee da calęla ca', ne dul-la ca'

<sup>2</sup> da benle gate ne dxunle ca dxelún bénneache zaj zre'e xęzr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios.

<sup>3</sup> Cá'anqueze dxi'u, xúgutedxu bendxu caní gate nate, gate bendxu cáteze da guzá lázredxu, ne bendxu ca da gunná bela' dxen cheedxu, ne ca da gunná xichaj lázrdaudxu. Chee le' na' guca na cheedxu sidxu da zi' da xa' chee Dios ca gune' chee xezícadxa benne' ca',

<sup>4</sup> san Dios bexache lázrele'e dxi'u, ne bzri'ile'ene' dxi'u,

<sup>5</sup> na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios.

<sup>6</sup> Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa.

<sup>7</sup> Beņe' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e beņe' cheedxu ne chee Jesucristo.

<sup>8</sup> Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da beņ Dios cá'aze ne chee.

<sup>9</sup> Quebe nalá nu benne' ne chee bi da dxúnqueze', chee quebe nu benne' gucá'ana szren cuine'.

<sup>10</sup> Dios beņe' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

### *Nácadxu tuze ne chee Cristo*

<sup>11</sup> Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu beł-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee le nácale benne' quebe zaj nadxugu.

<sup>12</sup> Lu zra ca' quebe guzúale Cristo le'e. Quebe benle tuze benne' Israel ca', ne quebe bęnbeale ca naca xel-la wezrí'a da beņ Dios, ne ca naca da guchebe

lazre' Dios. Guzúale lu xęzr la xu nigá, ne quebe bi guleza lázrele, ne quebe bęnbeale Dios. Gate nate guzrale zítu'la naga zua Dios.

<sup>13</sup> Na'a nę cheę Cristo Dios ba bzuę' le'e gágutę lawe' da gute Cristo waláz cheęle.

<sup>14</sup> Léqueze Cristo benne' dxi'u xel-la dxebeza zri lazre', ne bexunę' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e.

<sup>15</sup> Gate gute Jesús waláz cheędxu guchugue' da nadxixruj bea na da naca na da gunná Dios gundxu, ne da ca' dxeleńná bea na, na' bexunę' dxúpatę xęzre ca' tuze xęzre cube da nababa na cheę'. Caní gudíxruj'e' xel-la dxebeza zri lazre' cheędxu.

<sup>16</sup> Caní guca nę cheę xel-la gute cheę Cristo le'e xaga béguaj, guchugue' naze xel-la dxezrá'a ljwezre cheę dxúpatę xęzr ca', na' bexunę' dxúpatę tuze beł-la' dxen, ne bexunę' le' tuze nęn Dios.

<sup>17</sup> Bla' Cristo, ne bzenne' le'e dizra' chawe' cheę', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios,

<sup>18</sup> na' nę cheę Cristo, xúgutedxu, benne' judío ca', ne benne' quebe zaj naque' judío, dxeбіgadxu lau Xradxu Dios nę cheę Be' Lá'azxa.

<sup>19</sup> Cheę le' na' le'e, benne' quebe nácale judío, quębedxa nácale ca benne' zitu' tu lu xęzr la xu da quebe naca na cheęle, san nácale benne' walazre' ca xúgute benne' ca' zaj nababa cheę Dios. Nabábale Zri'ine Dios.

<sup>20</sup> Nácale ca tu xu'u zren da zria na lawe' lane da gulixruj benne' gubáz ca' cheę Cristo, ne benne' ca' buluchálaje' waláz cheę Dios, na' Jesucristo nácaqueze' xiaj blau cheę lane xu'u na'.

<sup>21</sup> Lawe' lane nigá da naca Cristo, dutę xu'u na' dxegula na tu li cheę gaca na tu xudau' lá'azxa cheę Xránadxu.

<sup>22</sup> Cá'anqueze le'e, lawe' da nácale Cristo tuze, xu'ule lu xu'u na' naga zua Dios nę cheę Be' Lá'azxa cheę'.

### 3

#### *Pablo dxuzennę' benne' quebe zaj naque' judío dizra' chawe'*

<sup>1</sup> Cheę le' na' neda', Pablo, dxuzú zriba' lau Dios. Xu'a lizre xia lawe' da dxuna' zrin cheę Jesucristo cheę gaca chawe' cheęle le'e, quebe nácale judío.

<sup>2</sup> Ba nézele ca ben Dios lu xel-la xrlátaje cheę', bsebage' neda' guchálaje' dizra' chawe' cheę Cristo ládujla le'e.

<sup>3</sup> Lu da ble'e Dios neda' bzéajni'ine' neda' tu da nagache cheę' ca da bzuaja' cheęle nedxu.

<sup>4</sup> Gate gulábale na weque bé'equezele núnbe'a da nagache ca naca cheę Cristo.

<sup>5</sup> Guca na tu da nagache gate nate. Dios quebe bzéajni'ine' na bęnneache, san na'a nę cheę Be' Lá'azxa cheę' ba blé'ene' na benne' gubáz lá'azxa ca', na' benne' ca' dxuluchálaje' waláz cheę'.

<sup>6</sup> Caní naca da nagache na': Nę cheę dizra' chawe' cheę Cristo benne' quebe zaj naque' judío welezi'queze' da gunezruj Dios le' ca da xelezi' benne' judío ca', ne zaj naque' tuze beł-la' dxen, ne xelezi'queze' tu zren da nachebe lazre' Dios nę cheę Jesucristo.

<sup>7</sup> Dios bęne' neda' wen zrin cheę dizra' chawe' na' nę cheę tu da bęnnaze' neda', bchínene' xel-la waca zren cheę'.

8 Neda' nácadxa' benne' baxáche ca xúgute benne' zaj naca bi cheę Dios. Beņe' neda' tu culuén zren cheę guzenda' benne' quebe zaj naque' judío dízra' chawe' ca naca xel-la gunní'a zrentę cheę Cristo.

9 Bsebage' neda' guzėjájni'ida' xúgute bėnneache ca da nun Dios gunę' da bgache gate nate, na' naca Dios Bėnnea' beņe' xúgute da zaj zua,

10 cheę xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrentę cheę Dios. Xelúnbe'e na ne cheę benne' ca' zaj naca bi cheę Cristo.

11 Da nigá beņ Dios ca da nune' gate nate gusexuzre' ne cheę Xránadxu Jesucristo.

12 Ne cheę Cristo waca bígadxu lau Dios du lázredxu, ne dutę xel-la dxuxrén lazre' cheędxu lawe' da dxeajlí lázredxu Le'.

13 Cheę le na' dxata' xúeda' le'e quebe gate ni'a na'le lawe' da dxedéa' xel-la zi' ne cheęle le'e. Xel-la zi' da dxedéa' neda' gaca na cheęle tu da ba neza.

### *Xel-la zri'i lazre' cheę Cristo*

14 Cheę le na' dxuzú zriba' lau Xra Xránadxu Jesucristo,

15 Bėnnea' dxuzúę' la cha cheę benne' zaj zre'e xabáa, ne xezr la xu.

16 Dxenaba' lau Xradxu, ca naca xel-la gunní'a zrentę cheę' guzė tipe' le'e nen xel-la waca cheę' lu xichaj lázrdaule ne cheę Be' Lá'azxa cheę',

17 cheę sua Cristo lázrdaule ne cheę xel-la dxeajlí lazre' cheęle, ne se cháchale lu xel-la zri'i lazre', ca tu xaga da nudé lue na sítujla,

18 cheę seque' chėjni'ile tu zren nen xúgute bi cheę' ca nazriluj, ne ca natunna, ne ca nasituj, ne ca nasibe xel-la zri'i lazre' cheę Cristo.

19 Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu dutę ca naca na. Caní dxenaba' Le' cheę suale le'e dutę da nácaqueze Dios.

20 Na'a, gaca báqueze Dios, Bėnnea' nape' xel-la waca gúnle'ęqueze' da zrendxa ca da dxenábadxu, u ca da dxéquedxu, ne cheę xel-la waca cheę' da dxun na zrin lu xichaj lázrdaudxu.

21 Gaca ba Dios ládujla benne' zaj naque' bi cheę Cristo ne cheę Jesucristo xúgute iza chadía chacanna. ¡Ca'an gaca na!

## 4

### *Nácadxu tuze ne cheę Be' Lá'azxa*

1 Cheę le na' dxata' xúeda' le'e, neda', xu'a lizre xia lawe' da dxuna' zrin cheę Xránadxu, cheę gunle da xrlátaje ca dxal-la' xelún bėnneache ba gucá'a Dios le', ca gucá'aqueze' le'e.

2 Le gaca dxexruj lazre', ne zri'i lazre'. Le cueza lazre', ne le cue' gunne xue cheę tule xetule lu xel-la zri'i lazre' cheęle.

3 Le gun ba xuzre gácaquezle tuze, guchínele xel-la waca cheę Be' Lá'azxa lu xel-la dxebeza zri lazre' da na' dxun na le'e tuze.

4 Tuze naca beła' dxen cheę Cristo da nácadxu.

Tuze naca Be' Lá'azxa, Nu na' zúalęne' tu tudxu.

Tuze da dxuxrén lázredxu, da na' sidxu lu na' Dios.

5 Tuze Bėnnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

6 Tuze Bėnnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaquezē' lu xichaj lázrdau xúguteḁdxu.

<sup>7</sup> Tu tudxu nasidxu tu xel-la waca cha cheḁdxu  
ca da nunna Cristo dxi'u.

<sup>8</sup> Naca na ca naxúaj na lu dizra' lá'azxa, dxenná na:  
Begüéne' xabáa, gate gudé bzétaje' benne' guledábague' Le'.

Na' bnézruje' bēnneache xel-la waca ca'.

<sup>9</sup> ¿Bi zéaje' na, dxenná na: Begüéne'? Zéaje' na nédxula bétaje' lu xēzr la xu nigá.

<sup>10</sup> Bēnnea' bétaje' nácaqueze' Bēnnea' begüéne' lu da blaudxa lu xabáa chee  
gaca bea na xu'u lu ne'e xúgute da de,

<sup>11</sup> na' benne' cha cheḁdxu xel-la waca cheḁ:

Gaca bál-ladxu benne' gubáz cheḁ'.

Gaca guzendxu xezícadxu bēnneache dizra' chawe' cheḁ'.

Gácadxu xezícadxu benne' dxuxúedxu bi cheḁ' ca'.

Na' gusédedxu-be' xezícadxu.

<sup>12</sup> Ca'an bene' cheḁ bpa'adxe' bi cheḁ' ca' cheḁ xelunbe' zrin xulucá'anabe'  
xrlátaje bēnneache ca' zaj naque' zruza ni'a na' Cristo:

<sup>13</sup> Cheḁ gácadxu tuze ca dxéajledxu,

ne ca núnbeadxu Zri'ine Dios,

cheḁ gácadxu benne' du lazre',

cheḁ gácadxu cáteze nácaqueze Cristo.

<sup>14</sup> Caní nacan cheḁ québedxa gácadxu ca bidu ca', bi ca' dxelezibe' bíteteze  
dizra' da zaj naca na ca tu be' da zeaj na nila na'la, ne québedxa güedxu lataj  
xelún zréaje benne' wen da zrinna' ca' dxi'u, cheḁ quebe xelezí xē'e dxi'u cheḁ  
gundxu da calela.

<sup>15</sup> Lu xel-la zri'i lazre' dxal-la' guchálajdxu da li cheḁ gácadxu cáteze nácaqueze  
Cristo, Bēnnea' naque' xichaj bel-la' dxen da nácadxu dxi'u.

<sup>16</sup> Le' dxune' tuze xúgute ni'a na' zaj zria bel-la' dxen cheḁ' cheḁ gaca na tu  
bel-la' dxen nazá'atē cheḁ na, ne cheḁ xelún zrin xúgute ni'a na' ca' cheḁ gula  
bel-la' dxen na', ne gaca na chawe' lu xel-la zri'i lazre'.

### *Xel-la nabán cube da dxunna Cristo dxi'u*

<sup>17</sup> Da nigá dxapa' le'e, ne dxusebaga' le'e waláz cheḁ Xránadxu cheḁ  
québedxa gunle ca dxelún bēnneache quebe zaj núnbe'e Dios, benne' ca'  
dxelune' cáteze dxeléquene' xrlátaje,

<sup>18</sup> benne' ca' zaj nachul-la xichaj lázrdawe'. Benne' caní quebe zaj nape' xel-  
la nabán li lazre' da dxunna Dios bēnneache:

Zaj nachul-la naniteng', ne zaj naca zide' lázrdawe'.

<sup>19</sup> Québedxa dxelexedué'eng'.

Belezanne cuine' dxelune' da schanni'.

Du lazre' dxelune' xúgute da sban.

<sup>20</sup> Quegá caní nazédele le'e cheḁ Cristo,

<sup>21</sup> che da li xca' bēnnele da dxuchalaj Le', ne nusédenē' le'e ca naca da li da  
zúalē Jesús.

<sup>22</sup> Ca naca da bēnle nédxula, le guzúa chalá'ala da gúcale lawe' da guzrínna'je  
lu da sban da guzá lázrele.

<sup>23</sup> Dخال-la' gácale benne' cube lu xichaj lázrdaule.

<sup>24</sup> Dخال-la' gunle da naca cheḁ benne' cube na' da bēn Dios le'e  
cheḁ gunle da naca na xlátaje, ne da li da naca na lá'azxa.

<sup>25</sup> Cheḁ le' na' québedxa gun lázrele.

Le nne da li tule xetule lawe' da nácadxu ni'a na tuze  
bêl-la' dxen chee Cristo.

<sup>26</sup> Che dxezrá'ale, quebe dxal-la' gunle dul-la, ne quebe zrá'ale scha'.

<sup>27</sup> Quebe güele da xriwe' lataj guchixre chee na le'e.

<sup>28</sup> Bénnea' guquë' gubán québedxa dxal-la' cuane'. Dxal-la' gunë' tu zrin chawe' nen ni'a ná'queze' chee gape' da gunézruje' benne' dxelexázrjene'.

<sup>29</sup> Quebe nnele dizra' calëla. Le guchalaj da naca na xrlátaje chee xezezé tipa benne' xelenne', ne xezezí'e na ba neza.

<sup>30</sup> Quebe guzúa xáchele Be' Lá'azxa chee Dios, lawe' da zúale Be' le'e chee gaca bea na nácale bi chee Dios ca zrindxa zra xezi' lu ne'e dxi'u.

<sup>31</sup> Le guzúa chalá'ala:

Xel-la dxecuide', ne xel-la dxezrá'a, ne xel-la xichaj zra'a,  
ne xel-la wetil-la dizra', ne xel-la wechacha, ne xúgute da zrinnaj.

<sup>32</sup> Dخال-la' gácale du lazre', ne xache lázrele tule xetule,  
ne gunite laule chee tule xetule ca ben Dios,  
bnite lawe' chee le'e lawe' da nácale bi chee Cristo.

## 5

### *Ca dxal-la' xelaca bi ca' chee Dios*

<sup>1</sup> Lawe' da nácale bi cheéqueze Dios, bi nazri'ine', le gun ba xuzre gácale cáteze nácaqueze Le'.

<sup>2</sup> Le zri'i le sa' ljwézrele tule xetule cáteze ben Cristo, bzri'ine' dxi'u, ne bzanne cuine' waláz cheedxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'e xaga béguaj, guca ca tu da dxelá zixre lau Dios da dxelegú'u bénneache lau Le'.

<sup>3</sup> Lawe' da nácale bi chee Dios, québedxa dxal-la' guchálajle chee da dxucá'ana dítaj na bénneache, ne chee da sban ca', ne chee xel-la wecude' da de.

<sup>4</sup> Quebe guchálajle dízra' schanni', ne dízra' bize, ne dízra' calëla, da quebe dxulucá'ana na chawe' bénneache, san dxal-la' xéquezele Dios: "Xcalenu'."

<sup>5</sup> Ba nézquezele quebe chu'u naga dxenná bea Cristo nen Dios netú benne' dxucá'ana dítajë' bénneache, u tu benne' dxune' da sban, u tu benne' dxucúdie' da de, da naca na ca dxucá'ana szrene' bedau' xiaj xaga.

<sup>6</sup> Quebe güele lataj nu si xe le'e nen dízra' xala, lawe' da ne chee da nigá dxesel-la Dios da dxusaca zi na benne' ca' quebe dxuluzúe' dízra' chee'.

<sup>7</sup> Quebe gunle tu zren benne' dxelune' da caní.

<sup>8</sup> Nédxute guzúale lu da chul-la, na' na'a zrágale xel-la naxaní' lawe' da nácale bi chee Xránadxu. Chee le na', le gun da naca na chee xel-la naxaní',

<sup>9</sup> da na' naca xel-la dxucá'ana chawe' ljwézredxu, ne da xlátaje, ne da li.

<sup>10</sup> Le gun zi' lázrele nézele gunle da dxezaca ba lazre' Xránadxu.

<sup>11</sup> Quebe gunle tu zren benne' dxelune' da calëla, da ca' naca chee da chul-la, san le til-la da ca'

<sup>12</sup> lawe' da naca na tu da xedué'edxu guchálajzedxu chee da dxelún benne' ca' bagácheze.

<sup>13</sup> Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúgute da caní, lawe' da dxulé'e lawe' xel-la naxaní' xúgute.

<sup>14</sup> Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazrda'u.

<sup>15</sup> Chee le na', le guxúe xanne' ca da dxunle. Quebe gunle ca dxelún benne' zaj nachul-la nanítene', san le gun ca dxelún benne' zaj naxéajni'ine'.

<sup>16</sup> Le guchine chawe' zra caní lawe' da dxácale'e da zrinnaj lu zra na'a zra.

<sup>17</sup> Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu.

<sup>18</sup> Quebe súzrele, da na' dxuxrinnaj na bénneache, san du lázrele le si' Be' Lá'azxa.

<sup>19</sup> Le guchálajle le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu.

<sup>20</sup> Le xéqueze Xradxu Dios: "Xcalenu", chee xúgutę lu La Xránadxu Jesu-cristo.

*Ca dxal-la' xelún bi chee Cristo nen lwézrebe'*

<sup>21</sup> Le gaca dxexruij lazre' tule xetule, ne le gapa ba lá'ana Dios.

<sup>22</sup> Nu'ula dxal-la' gaque' dxexruij lazre' lau benne' chee', cáteze dxal-la' gaque' lau Xránadxu,

<sup>23</sup> lawe' da naca benne' biu xíchaje chee zru'ule', cáteze naca Cristo xíchaje chee bi chee' ca'. Cristo naque' Benne' weselá chee bi chee' ca', bi zaj naca be' ca bel-la' dxen cheéqueze'.

<sup>24</sup> Cáteze zaj naca dxexruij lazre' bi chee' ca' lau Cristo, cá'anqueze nu'ula dxal-la' gaque' dxexruij lazre' lau benne' chee' lu xúgutę.

<sup>25</sup> Benne' biu dxal-la' zrí'ine' zru'ule' cáteze ben Cristo, bzri'ine' bi chee' ca', ne bzánene' xel-la nabán chee' ne chee'be'.

<sup>26</sup> Caní bene' chee' bebéaje'-be' cheéqueze', ne ben chi'e-be' ne chee dizra' chee', da guca na ca dxun benne' dxexibe' bi chee' nen nisa,

<sup>27</sup> chee guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'.

<sup>28</sup> Cá'anqueze benne' biu dxal-la' zrí'ine' zru'ule' cáteze nazri'ine' bel-la' dxen cheéqueze'. Benne' nazri'ine' zru'ule' nazrí'i cuine'.

<sup>29</sup> Netú benne' quebe dxecuídene' bel-la' dxen cheéqueze', san dxugawe' na, ne dxuxúe' na, ca dxúnqueze Cristo chee bi chee' ca'

<sup>30</sup> lawe' da zaj nácabe' ca bel-la' dxen cheéqueze', na' dxi'u nácadxu ca ni'a na' bel-la' dxen chee', ne nácadxu ca bel-la' dxen chee', ne zrita chee'.

<sup>31</sup> Chee le na' tu benne' biu dxal-la' gusanę xra xrne'e chee gaque' tuze nen zru'ule', na' dxúpate' xelaque' ca tuze benne'.

<sup>32</sup> Da nigá naca na tu da zren da nagache, na' dxennía' da caní ca naca chee Cristo nen bi chee' ca'.

<sup>33</sup> Cá'anqueze tú tule le'e dxal-la' zri'ile zru'ulale cáteze nazrí'i cuinale, na' nu'ula dxal-la' gape' ba lá'ana benne' chee'.

## 6

<sup>1</sup> Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee, da naca na xlátaje.

<sup>2</sup> Da nadxixruij bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u,

<sup>3</sup> chee gaca chawe' chiu', ne chee su' scha' lu xęzr la xu.

<sup>4</sup> Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.



<sup>5</sup> Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzúale dizra' chee Cristo.

<sup>6</sup> Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bénneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios.

<sup>7</sup> Le gun zrin chee xránale du lázrele, cáteze dxunle zrin chee Xránadxu, ne quegaze chee bénneache.

<sup>8</sup> Ba nézquezele tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nuné'.

<sup>9</sup> Le'e, xrana benne' ca', cá'anqueze le gun le'e nen benne' wen zrin chee ca', ne quebe guzálajle le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bénneache.

### *Zra lana bi chee Cristo da dxácale lebe' lu wedil-la*

<sup>10</sup> Na'a, bi bícha'dau', le gaca chuchu ne chee Xránadxu nen xel-la wala zren chee'.

<sup>11</sup> Le gaca ca benne' zjaque' wedil-la zaj nácu'e' zra lané' xia da na' dxunna Dios le'e, chee gaca se chúchule lau xúgute' da dxuzé da xriwe' laule chee si xe na le'e.

<sup>12</sup> Quegá dxedíl-lalédxu bénneache zaj naque' belá' dxen. Dxedíl-lalédxu xel-la dxenná bea chee da xriwe' da dxeledá na lu be', ne dxedíl-lalédxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá.

<sup>13</sup> Chee le' na', le gaca ca benne' zjaque' wedil-la zaj nacue' zra lané' xia da dxunna Dios le'e, chee séquele súale wedil-la lu zra che da xriwe', na' ca te na' xegá'ana chúchule.

<sup>14</sup> Le se chuchu xca', suale le'e da li ca tu bazxu da nacá'a na le'e, ne suale le'e da xlátaje ca tu xia da da' lachu'le.

<sup>15</sup> Le gaca sina chee guchálajle dizra' chawe' chee xel-la dxebeza zri lazre', da gaca na chee ca tu cue' zrelale.

<sup>16</sup> Da dxun na ba xen, le gapa xel-la dxeajlí lazre', da gaca na chee ca tu da xegapa na, da xusula na xúgute' da zaj nalá na zaj zua na xi' da dxuzala da xriwe'.

<sup>17</sup> Xel-la weselá gaca na chee ca tu lapa xia da gucache xíchajle, na' xrtizra Dios gaca na chee ca tu xia da gunna Be' Lá'azxa le'e.

<sup>18</sup> Gate ne dxunle da caní dxal-la' guchálajlele Dios, gata' xúele, ne nábale lau Le' ne chee Be' Lá'azxa. Chee gaca gunle da caní dxal-la' súale ban lazre', ne quebe gate ni'a na'le, na' nábale Dios chee gácalene' xúgute' bi chee' ca'.

<sup>19</sup> Cá'anqueze le naba Le' waláz chia' neda' chee gunne' neda' dizra' da guchálaja', chee xazrda' guzenda' bénneache dizra' chawe' chee'.

<sup>20</sup> Dios bene' neda' gubáz chee dizra' chawe' chee', na' chee le' na' xu'a lizre xia na'a. Le naba Le' gácalene' neda' chee xazrda' guchálaja' dizra' chawe' chee' ca dxal-la' guna'.

### *Pablo dxugape' diuzre le sa' ljwezre'*

<sup>21</sup> Tíquico, bi bíchedxu nazri'ite lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'.

<sup>22</sup> Chee le' na' dxusel-la'-be' lau le'e chee guzenbe' le'e ca zúantu', ne chee gutípabe' lázrele.

<sup>23</sup> Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'ę na' xel-la dxebeza zri lazre', ne xel-la zri'i lazre', ne xel-la dxeajli lazre',

<sup>24</sup> na' gunę' chawe' xúgute benne' ca' du lazre' zaj nazri'ine' Xránadxu Jesucristo. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS

### *Pablo dxugape' diuzre bi bíchedxu ca' zaj zre'ë xezre Filipos*

<sup>1</sup> Neda' Pablo, ne Timoteo nácantu' wen zrin chee Jesucristo. Dxuzúaja' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo.

<sup>2</sup> Dxenábantu' lau Xradxu Dios, ne lau Xránadxu Jesucristo gunë' chee da xrlátaje, ne gunne' le'e xel-la dxebeza zri lazre'.

### *Da dxenaba Pablo gun Dios chee bi ca' chee Cristo*

<sup>3</sup> Tu tu lasa dxajsá lazra' le'e dxapa' Dios chia': Xcalenu'.

<sup>4</sup> Gate dxuchálajlëna' Dios, dutë xel-la dxebé dxenábaqueza' bi gun Lë' chee xúgutële le'e.

<sup>5</sup> Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrintë lu zra na'a zra.

<sup>6</sup> Dxuxrén lazra' Dios, Bénnea' guzú lawe' dxunë' tu zrin chawe' lu xichaj lázrdaule le'e, gúnqueze' na ca zrintë zra xelá' Jesucristo.

<sup>7</sup> Naca xrlátaje dxéqueda' neda' caní chee xúgutële le'e, lawe' da nazrí'ile'ëda' le'e, ne dxezidxu tu zren da chawe' ca' dxunna Dios dxi'u. Dxácatë ne xu'a lizre xia nigá, ne gate na' gudíl-lalëna' bénneache ca' dizra', benne' ca' guleđabague' dizra' chawe' chee Cristo, ba ble'eda' benne' ca' naca na da li.

<sup>8</sup> Dios nézquezene' nazrí'ile'ëda' le'e, lu dutë xel-la zri'i lazre' da dxunna Jesucristo neda'.

<sup>9</sup> Dxenaba' lau Dios gunë' zrí'idxa ljwézrele, ne gápale'ëquezle xel-la sina, ne xel-la dxéajni'i lu xúgutë da dxunle,

<sup>10</sup> chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo.

<sup>11</sup> Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

### *Dxenná Pablo: Che naca bana', Cristo dxuchínene' neda'*

<sup>12</sup> Le'e, bi bícha'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo.

<sup>13</sup> Caní guca, xúgutë benne' xra'aga xu'u lawe', ne xezícadxa benne' ca' zaj zre'ë xu'u lawe' na' zaj nézene' xu'a lizre xia lawe' da dxuna' zrin chee Cristo.

<sup>14</sup> Lawe' da xu'a neda' lizre xia nigá, chaze xúgutë bi bíchedxu ca' dxuluxrén lázredxe' Xránadxu, na' dxuluchálajë' du lazre' dizra' chee Dios, ne quebe dxelezrebe'.

<sup>15</sup> Da li bal-la benne' ca' dxuluchálajë' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálajë' na dutë xel-la li lazre' chee'.

<sup>16</sup> Benne' nedxu ca' dxuluchálajë' da naca chee Cristo chee xulucá'ana szren cuine', ne quegá du lazre', lawe' da dxelaca lazre' súadxa da guzúa na neda' stebe dxácatë xu'a lizre xia nigá.

17 Xezícadxa benne' ca' dxelunę' na dutę xel-la zri'i lazre' cheę', lawe' da zaj nézengę' nuzúa cuina' guzėjajni'ida' benne' ca' dxeledábague' dizra' chawe' cheę Cristo.

18 ¿Bizra xca'? Ájatezla dxelunę', che dxuluchálaje' du lazre', u quebe dxuluchálaje' du lazre', dxuluchálaje' cheę Cristo, na' dxebeda', ne wabéquezda'

19 lawe' da nezda' lu xúgutę da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheędxu.

20 Dxaca lazra', ne dxuxrén lazra' quebe xedué'eda' neda', séqueda' guchálaja' du lazra' cheę xeled'e bénneache zúalędxa xel-la szren cheę Cristo neda' na'a, ca zúalęqueze na neda', che gaca bana', u che gatia'.

21 Chia' neda', che naca bana', Cristo dxuchínengę' neda', ne che gatia' wazrue'eda' da cháwedxa.

22 Che xedxúaj na chawe' cheę zrin cheę Xránadxu che naca bana', quebe nezda' bila na ca'a.

23 Naca na stebe chia' neda' bila da caní ca'a. Dxaca lazra' gatia' cheę cheajsálęna' Cristo, da gácadxa chawe' chia' neda',

24 san che naca bana' nácadxa chawe' cheęle le'e.

25 Lawe' da nuxrén lazra' naca caní, nezda' wazúalędxa' le'e cheę se cháchadxale lu da naca cheę Cristo, ne cheę béquezdxale.

26 Cheę le na' bédxale lu da naca cheę Cristo ne chia' neda' gate súalęna' le'e.

27 Dxun na ba xen gunle da dxuzėjajni' dizra' chawe' cheę Cristo le'e, na' che xedajnná'a le'e, u che sua' zitu', wenda' zę cháchale, ne nácale tuze, dxunle tu zren zrin cheę Cristo cheę xelejli lazre' bénneache dizra' chawe' cheę'.

28 Quebe zrębele benne' ca' dxeledábague' le'e. Ca dxunle gul'e na le' xelebía xi'e, na' nalale le'e lawe' da bselá Dios le'e.

29 Tu da zrentę naca da dxunna Dios le'e gate gunle zrin cheę Cristo, quegaze chėjale cheę', na' cá'aqueze che tele xel-la zi' ne cheę Le'.

30 Le'e dxunle neda' tu zren dxedíl-lalędxu da zaj naca da calęla. Blé'eqezle gate nate ca gudíl-lalęna' na, na' na'a dxenle ca dxedíl-lalęna' na.

## 2

### *Xel-la dxexruj lazre', ne xel-la szren cheę Cristo*

1 Cristo dxutipe' lázrele, na' xel-la zri'i lazre' cheę' dxuzúa na le'e lu da ba neza, na' Be' Lá'azxa cheę' zúalęngę' le'e, na' nápalę xel-la zri'i lazre', ne xel-la dxexache lazre' cheę'.

2 Cheę le na' le gun ga bélé'ęda', gaca tuze ca da dxéquele, ne gácale tuze lu xel-la zri'i lazre' cheęle, ne gunle tuze lu xichaj lázrdaule.

3 Quebe bi gunle cheę xulucá'ana szren bénneache le'e, ne cheę gaca gucá'ana szren cuínale, san dutę xel-la dxexruj lazre' cheęle dxal-la' guéquele nácadxa blau le sa' lįwézrele ca le'e.

4 Netule le'e quebe dxal-la' gunle ca da gácalęn le'eze. Le gun da gácalęn na xezícadxa bénneache.

5 Dخال-la' si' lu na'le da gaca na cheęle ca ben Jesucristo.

6 Lácala naque' ca náaqueze Dios, quebe gúquengę' dxal-la' gunę' ba xuzre xegá'anaqueze' ca Dios.

7 Bzue' chalá'ala da nápaqueze', ne ben cuinę' ca tu benne' nada'u, guque' bénneache.

8 Gate ba naque' bénneache, guque' dxexruj lazre', na' bzue' dizra' cheę Dios ca bzrintę gutię', lálcala gutię' ca tu benne' wen da calęla le'e xaga béguaj.

<sup>9</sup> Chee le na' Dios bca'ana szrénle'e Le', ne bzue' tu Le' da naca szrendxa ca xúgute la xezícadxa,

<sup>10</sup> chee gate xelenne' La Jesús, na' xuluzú zribe lau Le' xúgute benne' zaj zre'e xabáa, ne xezr la xu nigá, ne zran xezr la xu nigá,

<sup>11</sup> ne chee xelexechebe xúgute' naca Jesucristo Xránadxu, chee gaca ba lá'ana Xradxu Dios.

### *Bi chee Cristo zaj nácabe' ca xi' da dxulusení na*

<sup>12</sup> Chee le na', le'e, bi bicha' nazri'ite lazra', ca na' benle le'e, bzúaquezle dizra' chee Dios gate na' zúalena' le'e, le guzúadxa dizra' chee Dios na'a gate zra' zitu'. Dute xel-la dxexruj lazre', ne dute xel-la dxezrebe le gun zrin chee zru'é'ele dute ca naca xel-la weselá chee le,

<sup>13</sup> lawe' da dxun Dios zrin lu xichaj lázrdaule chee sa lázrele gunle da xrlátaje da dxaca lazre' Le', ne chee séquele gunle na.

<sup>14</sup> Le gun xúgute da dxunle, ne quebe gáchajele, ne quebe gutil-la dizra' ljwézrele

<sup>15</sup> chee gácale li lazre', ne quebe nu nne chee le. Gácale bi chee Dios du lazre' ládujla bénneache zaj naque' benne' dxelún da calēla, ne gácale ca belaj ca' dxulusení na lu xezr la xu naga nachul-la na,

<sup>16</sup> ne guchálajle benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze.

<sup>17</sup> Béle'eda' lálaca gun na ba xen gatia' chee gaca li lazre' xel-la dxeajli lazre' chee lau Dios. Bzua cuínale lu na' Dios ca tu guna' da gúnnale chee', na' chee le na' béle'eqezda' tu zren nen xúgute le'e.

<sup>18</sup> Le béquezle le'e, ne le gun tuze neda' lu xel-la dxebe' chia'.

### *Ca naca chee Timoteo, ne Epafrodito*

<sup>19</sup> Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee beda' gate xelabe', ne guzenbe' neda' chee le'e.

<sup>20</sup> Quebe nu chilá' xetú benne' guéqueng' chee le ca da dxéqueda' neda'. Tuze Timoteo dxe'ebe' gunne xue chee gaca chawe' chee le'e.

<sup>21</sup> Xúgute benne' ca' xezícala zaj dxe'e' gunne xue da zaj naca chee'ze', ne quebe zaj dxe'e' gunne xue da naca chee Jesucristo.

<sup>22</sup> Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácalebe' xrabe'.

<sup>23</sup> Caní naca, dxebeza lazra' sel-la'-be' gate nezda' ca gaca chia'.

<sup>24</sup> Dxuxrén lazra' Xránadxu, néda'queza' xida' xedajnná'a le'e.

<sup>25</sup> Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedíl-lalēntu' da calēla. Lé'eqezle gusél-lale bi nigá chee gácalēnbe' neda', ne xu'a lizre xia nigá.

<sup>26</sup> Dxezá lázrele'ebe' xedajnná'abe' le'e, ne zúale'ebe' stebe lawe' da nézebe' bénele quebe chawe' guzúabe'.

<sup>27</sup> Da li quebe chawe' guzúabe', ne bache gátebe', san Dios bexache lazre' lebe', ne quegá tuze lebe', cá'anqueze neda' chee quebe xewine lázredxa' ca da dxaca chá' na'a.

<sup>28</sup> Chee le na' dxezá lázredxa' sel-la' lebe' chee bele le'e gate xelé'ele lebe', ne chee québedxa xewine lazra' neda'.

<sup>29</sup> Le xezí' lu na'le lebe' dutë xel-la dxebé, ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe',

<sup>30</sup> lawe' da guzúja gátebe' dxunbe' zrin chee Cristo. Bzuabe' lu da stebe xel-la nabán cheebe' chee gunbe' zrin chia' da quebe guzéquele le'e gunle.

### 3

#### *Da naca chawe' da naca na du lazre'*

<sup>1</sup> Na'a, bi bicha', le be lu da naca chee Xránadxu. Quebe naca na zeđe chia' neda' guzúaja' chee le xecha lasa ca da ba bzúajqueza', lawe' da dxun na ba xen guna' da nigá cheele.

<sup>2</sup> Le guxúe cuínale chee benne' ca' dxelune' da calela, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios.

<sup>3</sup> Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu,

<sup>4</sup> lácala neda' wazéqueda' guxrén lazra' da ca' nuna'. Che nu benne' dxéqueñe' waca guxrén lazre' ca da ba nune', wazéquedxa' neda'.

<sup>5</sup> Gate gúqueda' xrunu' zra gulechugue' lu bel-la' dxen chia' da na' dxulé'e na naca' chee Dios lawe' da naca' benne' Israel, ne xrtia Benjamín. Naca' da li benne' hebreo. Guca' benne' fariseo ca buzájla'a da bdxixruj be'e Moisés.

<sup>6</sup> Gudxélé'a gunne xue da naca chee Dios ca bzrinte gudáu zi' xuzra' benne' ca' zaj nácabe' bi chee Jesús. Ca naca da xlátaje da napa tu benne' dxune' ca dxenná da nadxixruj bea na, quebe nu benne' guzéqueñe' bi nnië' chia'.

<sup>7</sup> Xúgute da ca' gúqueda' gate nate zaj zácale'e na, na'a dxéqueda' da ca' quebe bi zaj zaca na, lawe' da nazrí'idxeda' Cristo.

<sup>8</sup> Da li dxéqueda' xúgute da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúgute da gudapa', ne dxéqueda' da ca' ca tu da níteze chee si'a da ba neza da dxunna Cristo,

<sup>9</sup> chee gaca' tuze nen Le', quegá lawe' da guca' xlátaje ne chee da nadxixruj bea na na', san lawe' da ble'e Dios neda' xlátaje lawe' da dxeajlí lazra' Cristo, na' Dios dxelé'ene' xlátaje xúgute benne' dxeleajlí lazre' Cristo.

<sup>10</sup> Da dxaca lazra' naca na gúnbeadxá' Cristo, ne súale xel-la waca neda' da bsebán na Le', ne tea' xel-la zi' ca da gudé'e Le', ne gudé' cuina' lu na' Dios lácala dxal-la' gatia' ca gute Cristo,

<sup>11</sup> na' dxebeza lazra' xebana' ládujla benne' gate ca'.

#### *Pablo dxun zi' lazre' gusexuzre' gune' zrin chee Cristo*

<sup>12</sup> Quebe dxennía' ba bzrué'eda' xúgute da caní, u ba naca' dutë xlátaje, san dxun zi' lazra' chee zrué'eda' da na' bláwizra Jesucristo neda' chee zrué'eda'.

<sup>13</sup> Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za',

<sup>14</sup> chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee' lawe' da nácadxu bi chee Jesucristo.

<sup>15</sup> Caní dxal-la' guéquedxu dxi'u, ze cháchadxu ca naca da dxeajlí lázredxu. Che quebe dxéquele caní chee bíteteze da caní, Dios guzéajni'ing' le'e ca naca chee na.

<sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bícha'dau', le gun ca dxuna' neda', ne le nna' ca dxelún benne' ca', dxelunę' ca da blé'entu' le'e.

<sup>18</sup> Zane' lasa ba gucha' le'e, ne na'a dxebéztea' dxapa' le'e, zrále'ę bi bíchedxu dxelunę' ca dxelún benne' dxuluzúę' chalá'ala da bęn Cristo le'ę xaga béguaj.

<sup>19</sup> Ca gaca cheę benne' ca' lu zra bzebe, xelebía xi'ę. Zaj nune' dios cheę da dxelé'aj dxelawę', ne dxulucá'ana szren cuinę' cheę da na' dxal-la' xelapa stu'ę. Zaj dxe'e gunne xue da naca cheę xęzr la xu nigaze.

<sup>20</sup> Dxi'u nácadxu benne' zaj nababe' xabáa, ne dxebézadxu zra xelá' benne' weselá cheędxu, Xránadxu Jesucristo, zę'ę xabáa.

<sup>21</sup> Le' xegüę' bel-la' dxen cheędxu da dxeledé cheę na, ne gunę' na ca naca bel-la' dxen xabáa cheę', guchínene' xel-la waca cheę' da nape' cheę nna bé'ene' xúguęę da zaj zua.

## 4

### *Dxal-la' béquezdxu lu da naca cheę Xránadxu*

<sup>1</sup> Cheę le na' le'e, bi nazri'ite lazra', le se chacha lu da naca cheę Xránadxu. Le'e, bi bícha'dau' nazri'ite lazra', dxezá lázrele'a le'eda' le'e, lawe' da dxebeda' ca nácale le'e, na' lawe' da bęna' neda' nácale bi cheę Cristo dxal-la' si'a tu da gunna Dios neda'.

<sup>2</sup> Dxata' xueda' Evodia, ne Síntique xelaque' tuze, lawe' da zaj naque' bila ne cheę Xránadxu.

<sup>3</sup> Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnleņę' neda' zrin cheę dizra' chawe' cheę Cristo. Belunę' zrin na' tu zren nen Clemente, ne xezícadxa benne' ca' belúnleņę' neda' zrin. La benne' caní zaj naxúaj na lu xiche cheę xel-la nabán zeajlí canna.

<sup>4</sup> Le béqueze lu da naca cheę Xránadxu. Xecha lasa dxennía': Le be.

<sup>5</sup> Dxaca lazra' xeleque be'e xúguęę bęnneache nácale zren lazre'. Ba zua bagu zra xelá' Xránadxu.

<sup>6</sup> Quebe bi cuele gunne xue, san le guchálajlequeze Dios ca naca cheę da ca'. Le naba na lau Dios, na' le xę'ę: Xcalenu'.

<sup>7</sup> Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bęnneache, na' guzúa chuchu na xichaj lázrdaule ne cheę Jesucristo.

### *Le gulaba lazre' ca naca da xrlátaje*

<sup>8</sup> Na'a, bi bicha', le gulaba lazre' ca naca

xúguęę da zaj naca lí, ne

xúguęę da zaj napa na ba lá'ana, ne

xúguęę da zaj naca na li lazre', ne

xúguęę da zaj naca na du lazre', ne

xúguęę da dxezaca ba lazre' Dios, ne

xúguęę da dxulucá'ana na bęnneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

<sup>9</sup> Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale Dios le'e, Bęnnea' dxunne' dxi'u xel-la dxebeza zri lazre'.

### *Da gulesel-la benne' Filipos ca' cheę Pablo*

<sup>10</sup> Dxebéle'eda' ne cheę Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'.

11 Quebe dxennía' da nigá lawe' da bi dxexáxrjeda', lawe' da ba bsēde Xránadxu neda' sua' xel-la dxebé ájateze dxaca chia'.

12 Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgute da dxaca chia', che néljada', u che dxeduna', che nápalé'a, u che quebe bi napa'.

13 Xúgute wazéqueda' guchaga lawa' lawe' da dxuzé tipa Cristo neda'.

14 Benle da xrlátaje, gúcalele neda' ne chee da gusél-lale chia'.

15 Ba nézquezle le'e, benne' Filipos, ca guca gate guzú lawa' dxuchálaja' dizra' chawe' chee Cristo nigá. Gate bezá'a xezre ca' zaj nababa xezr la xu Macedonia, le'eze gusél-lale chia' dumí chee da guzú' lu na'le.

16 Gate guzúa' xezre Tesalónica, chupa chunna lasa gusél-lale dumí chia' chee quebe bi xáxrjeda'.

17 Quebe dxennía' da nigá lawe' da dxaca lazra' bi gúnnale chia', san dxaca lazra' gácadxa da ba neza cheele le'e lau Dios.

18 Ba guzi'a xúgute da gusél-lale, na' dele'e chia'. Ca naca da gusélal-le chia' lu na' Epafrodito, da zrendxa guca na ca da bexáxrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dzezaca ba lazre'.

19 Dios chia' gunne' le'e xúgute da dxexáxrjele, chee xel-la gunní'a chee xabáa chee' ne chee Jesucristo.

20 Gaca ba Xradxu Dios chadía chacanna. ¡Ca'an gaca na!

*Pablo dxuzé dizra' benne' Filipos ca'*

21 Waláz chia' neda' le gugapa diuzre lu La Jesucristo xúgute benne' zaj nababé' chee Dios. Bi bíchedxu ca' zaj zúale neda' dxulugape' le'e diuzre.

22 Xúgute bi bíchedxu zaj zre'e nigá, benne' zaj nababé' chee Dios, ne bi bíchedxu zaj zre'e lizre bénnea' dxenná bé'ene' xezr la xu Roma, dxulugape' le'e diuzre.

23 Dxenaba' lau Xránadxu Jesucristo guné' da chawe' chee xúgutele le'e. Ca'an gaca na.



## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

### *Pablo dxugape' diuzre bi bíchedxu zaj zre'e xezre Colosas*

<sup>1</sup> Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'.

<sup>2</sup> Dxuzúaja' da nigá chee le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne gunné' le'e xel-la dxebeza zri lazre'.

### *Da dxenaba Pablo lau Dios chee bi bíchedxu ca'*

<sup>3</sup> Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajlentu' Lẹ'.

<sup>4</sup> Ba bémentu' ca dxeajlí lázrele Cristo, ne ca nazri'ile xúgute bi ca' chee Dios.

<sup>5</sup> Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li.

<sup>6</sup> Dizra' chawe' nigá bla na ládujla le'e ca bla na duté xezr la xu nigá, na' dxezriluj na, ne dxun na zrin duté xezr la xu ca dxun na ládujla le'e, gate béntele ca nazri'i Dios bénneache, ne gunézele naca na da li.

<sup>7</sup> Da nigá ble'e Epafras le'e. Naque' bi bíchedxu nazri'i lázredxu, ne ba bénqueze' zrin nen netu', ne naque' chee le'e tu benne' wen zrin li lazre' chee Cristo.

<sup>8</sup> Epafras nigá bzenne' netu' ca dxaca chee le'e, ne ca nazri'i ljwézrele ne chee Be' Lá'azxa.

<sup>9</sup> Chee le na', zra gunézentu' da nigá, dxuchálajlequezentu' Dios chee le'e, ne dxenábantu' Lẹ' guzėjajni'ine' le'e ca naca da dxaca lazre', ne gunné' le'e duté xel-la sina, ne duté xel-la dxėjajni' da dxunna Be' Lá'azxa dxi'u.

<sup>10</sup> Caní dxenábantu' Lẹ' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Lẹ', gunle xúgute da naca da xrlátaje, ne gúnbeadxaquezle Dios.

<sup>11</sup> Dxenábantu' Lẹ' guzúa chache' le'e lu xel-la waca da naca chee xel-la szren chee' chee séquele guchaga laule xúgute da dxaca chee lu duté xel-la zren lazre' chee, ne duté xel-la dxebé.

<sup>12</sup> Dخال-la' xele Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxaní' chee', lawe' da nácadxu bi chee Lẹ'.

<sup>13</sup> Dios bselé' dxi'u lu xel-la dxenná bea chee da chul-la, na' bzue' dxi'u naga dxenná bea Zrí'ine' nazri'ite lazre'.

<sup>14</sup> Zrí'ine' nácaqueze' Bénnea' bselé' dxi'u gate gutie' waláz cheedxu, chee bnite lau Dios dul-la gubágadxu.

### *Bexácadxu tuze nen Dios lawe' da gute Cristo*

<sup>15</sup> Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácadxabe' blau ca xúgute da ben Dios.

<sup>16</sup> Ne chee Lẹ' ben Dios xúgute da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u

be' ca' zaj napa na xel-la waca, xúgute na ben Dios ne chee Le', na' chee Le' zaj naca na.

<sup>17</sup> Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na.

<sup>18</sup> Xúgute benne' zaj naque' bi chee Cristo zaj naque' ca tuze bel-la' dxen, na' Crístoqueze naque' xichaj bel-la' dxen na' da nácadxu. Le' bzué' bel-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua.

<sup>19</sup> Caní naca na lawe' da guca lazre' Dios súale Cristo duté da nácaqueze Dios.

<sup>20</sup> Cá'anqueze guca lazre' Dios ne chee Cristo xexune' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

<sup>21</sup> Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute da calela, san na'a Dios ba bexune' le'e tuze nen Le'.

<sup>22</sup> ne chee da ben Cristo gate gutié' le'e xaga béguaj lu bela' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela.

<sup>23</sup> Chee gaca caní dxal-la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' chee Cristo. Dizra' chawe' nigá nene na duté xezr la xu, na' nuzúa Dios neda', Pablo, benne' wen zrin chee', chee guchálaja' dizra' chawe' nigá.

### *Zrin dxun Pablo chee bi ca' chee Cristo*

<sup>24</sup> Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'.

<sup>25</sup> Bzua Cristo neda' ca benne' wen zrin chee bi chee' ca', ne chee da bláwizra Dios neda' guna, gácale'na' le'e, na' guchálaja' dutequeze da naca dizra' chee Dios,

<sup>26</sup> ne chee guzéajni'ida' bénneache ca da nagache, da na' nagache nédxute, san na'a Dios ba blé'eng' bi chee' ca' ca naca na.

<sup>27</sup> Guca lazre' Dios gulé'eng' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee le' na' dxebeza lázredxu súadxu xabáa chee'.

<sup>28</sup> Netu' dxuchálajntu' ca naca chee Cristo. Dxuzéajni'intu' xúgute bénneache, ne dxusédentu' xúgute', chee xeleajni'i xánnene' chee xelaca xúgute bénneache du lazre' lau Dios ne chee Jesucristo.

<sup>29</sup> Chee gaca caní dxuna' neda' zrin, dxuchíneda' duté xel-la waca chee Cristo, da dxun na zrin lu xichaj lázrdawa'.

## 2

<sup>1</sup> Dxaca lazra' nézele le'e dxúnle'a zrin, dxe'a gunne xue len Dios da naca chee le'e, ne da naca chee bi bíchedxu ca' ca' zaj zre'e Laodicea, ne da naca chee xúgute bi bíchedxu ca' quebe ne xelélé'eng' neda' caníqueze.

<sup>2</sup> Dxaca lazra' xeledípa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', chee xelúnbe'e da nagache chee Xradxu Dios da nácaqueze Cristo.

<sup>3</sup> Lu na' Le' zaj de ca naca xel-la gunní'a chee xel-la sina, ne xel-la dxéajni'i.

4 Dxapa' le'e da nigá chee quebe xelezí xę le'e benne' ca' zaj neze xrgúę' ca dxuluchálaje'.

5 Lácala quebe zúáletea' le'e caníqueze, naca na cáteze zúáleña' le'e lu be nácaqueza', na' dxebéle'eda' dxenda' dxunle da xlátaje, ne ze cháchale ca dxeajlí lázrele Cristo.

6 Chee le na', ca benle, guzí' lu na'le Xránadxu Jesucristo, cá'anqueze dxal-la' gunle súalele Le'.

7 Dخال-la' gácale ca tu xaga da dxudé lue na sítujla lu da naca chee Cristo. Cá'anqueze dxal-la' gácale ca tu xu'u da dxe' lane lu da naca chee' Le', chee se cháchale ca dxeajlí lázrele Le', ca blé'entu' le'e, na' dxál-la'queze xele Dios: Xcalenu'.

### *Xel-la nabán cube da dxunna Cristo dxí'u*

8 Le guxúe cuínale. Quebe güele lataj xelezí xę benne' ca' le'e, xuluchínenę' xel-la sina chee bėnneache, ne dizra' caleła, ca naca da dxulusėdequeze bėnneache, ne ca zaj naca da ca' dxácaqueze lu xęzr la xu nigá, ne quegá ca naca chee Cristo.

9 Dute ca naca Dios nácaqueze Cristo.

10 Nápale le'e xúgutę da naca chee'

lawe' da nácaquezle beł-la' dxen chee Le'.

Le' dxenná be'enę' xúgutę be' da dxelenná bea na,

ne xúgutę be' da zaj napa na xel-la waca.

11 Cá'anqueze, lawe' da nácale tuze nen Cristo nácale bi chee Dios. Quebe guca chee le ca da na' belúnqueze benne' judío ca', gulechuge' late' beł-la' dxen chee bi biu chee' ca', da na' dxulé'e na zaj nácabę' chee Dios. Bedúa dute da naca chee bełla' dxen chee le da naca sban, da guca na ne chee da beł Cristo lu xichaj lázrdaule. Bęne' nácale bi chee Dios.

12 Gate gudxúale nisa guca chee le ca guca chee Cristo gate bgache' lu xędxu ba, na' cá'anqueze guca chee le ca guca chee Le' gate bebane' lądujla benne' gate. Caní guca chee le lawe' da guxeajlí lázrele xel-la waca chee Dios, Bėnnea' bsebane' Cristo lądujla benne' gate ca'.

13 Gate nate gúcale le'e ca benne' gate lu dul-la da gubágale, ne lu bełla' dxen sban chee le da quebe ne xedúa na. Na'a Dios ba nunę' le'e xel-la nabán tu zren nen Cristo, ne ba bnite lawe' xúgutę dul-la da gubágale.

14 Dios bzria xi'e ca naca da nabágadxu chee xúgutę da nadxixruj bea na da gula da buluzría xi na dxí'u. Bebėaje' na chalá'ala, ne bde'e na le'e xaga bėguaj ca tu da gubaga' Cristo.

15 Gate gute Cristo le'e xaga bėguaj begüe' ca naca xel-la dxenná bea, ne xel-la waca chee be' xriwe' ca', na' blé'enę' da ca' lávela gubáz chee xabáa ca' lawe' da gunná be'enę' na.

### *Le sa lazre' da ca' zaj dę na xabáa*

16 Chee le na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee beu' dxe'ene, ne ca zaj naca zra dxupá'anale.

17 Xúgutę da caní zaj naca na ca tu zrúl-laze chee da zaj zėaje da ca'.

18 Quebe güele lataj nu cua da nucueza Dios chee le le'e, ne chee da dxululé'e benne' ca', benne' dxelėquene' zaj naque' dxexruj lazre' lawe' da dxulucá'ana szrenę' gubáz chee xabáa ca', ne dxuluchálaje' chee da quebe ne xełelė'enę', ne dxulucá'ana szren cuine' ca naca xel-la sina chee bėnneacheze da zaj nape'.

<sup>19</sup> Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' dute' bel-la' dxen na', ne dxugawe' na, ne dxune' na tuze du ca naca na, chee gaca na ca dxaca lazre' Dios.

<sup>20</sup> Naca chee ca naca chee tu benne' ba nate lawe' da nácale bel-la' dxen chee Cristo, chee québedxa gunle ca zaj naca da ca' dxácaqueze lu xezr la xu nigá. Na'a, ¿bizr chee na' dxedale ca benne' ne zaj nácaqueze' chee xezr la xu nigá, ne dxunle ca da dxelenná bea bénneache.

<sup>21</sup> Dxelenné': Quebe guchínenu' da nigá. Quebe gagu' da ca'. Quebe chajtáu' da na'.

<sup>22</sup> Xúgute' da nadxixruj bea caní dxuluchalaj na chee da ca' dxeledé chee na gate dxuchínedxu na, ne zaj nácaze na da dxelenná bea bénneache, ne da dxulusede bénneache.

<sup>23</sup> Da li dxeleque bénneache zaj naca na sina da nadxixruj bea caní, lawe' da dxulusede na bénneache xelúe lá'ané' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

### 3

<sup>1</sup> Le'e nácale ca benne' ba belexebán tu zren nen Cristo. Chee le' na' le sa lazre' da zaj zua xabáa, naga dxe' Cristo chalá'a xabéla chee Dios.

<sup>2</sup> Le gulaba lazre' chee da zaj de xabáa, quegá chee da zaj de lu xezr la xu.

<sup>3</sup> Nácale ca benne' ba zaj nate, na' xel-la nabán chee le nuzúa chawe' Dios naga zua Cristo.

<sup>4</sup> Cristo nácaqueze xel-la nabán chee dxu, na' gate xelá' Le', cá'anqueze le'e gunle tu zren Le' lu xel-la szren chee'.

#### *Xel-la nabán gula ne xel-la nabán cube*

<sup>5</sup> Chee le' na', le xebéaj ca tu da nate xúgute' da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da caleja ca', ne xel-la dxucude', lawe' da naca da dxucude' bénneache ca dios cheequeze'.

<sup>6</sup> Xúgute' da caní dxelún benne' quebe dxuluzúe' dizra' chee Dios, na' chee le' na' gudé Dios benne' ca' lu da ba xa'.

<sup>7</sup> Cá'anqueze le'e benle xúgute' da caní gate nate.

<sup>8</sup> Na'a, québedxa gunle xúgute' da caní:

Xel-la dxezrá'a, ne xel-la xichaj zra'a, ne xel-la dxecuide ljwezre.

Québedxa nnele dizra' schanni'.

Québedxa gucháchale ljwézrele.

<sup>9</sup> Quebe si xé ljwézrele tule xetule, lawe' da ba bzúale chalá'ala da gúcale nédxute, ne ca naca da benle.

<sup>10</sup> Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bene' le'e, ca zrindxa gúnbea xánnele Le'.

<sup>11</sup> Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

<sup>12</sup> Dios nazri'ine' le'e, ne guqué'e le'e chee gácale bi chee' ca'. Chee le' na' le gaca:

Benne' dhexache lazre', ne benne' zri'i lazre',

ne benne' dxexruj lazre', ne benne' chawe' lazre',  
ne benne' zren lazre'.

<sup>13</sup> Le gácale ljawézele tule xetule,  
ne le gunite lau cheęle tule xetule,  
che núlale dxezrá'a ljawézele.

Ca ben Cristo, bnite lawe' cheęle,  
cá'anqueze le gun le'e cheę ljawézele.

<sup>14</sup> Da dxundxa na ba xen, le zri'i ljawézele lawe' da naca xel-la zri'i lazre' da dxun na dxi'u tuze, ne li lazre'.

<sup>15</sup> Xel-la dxebeza zri lazre' da dxunna Dios dxi'u dxal-la' nna bea na lu xichaj lárdaudxu, lawe' da bláwizra Dios le'e cheę súale lu xel-la dxebeza zri lazre' cheę', ne gácale ca tuze bel-la' dxen. Cá'anqueze dxal-la' xęle Dios: Xcalenu'.

<sup>16</sup> Dizra' cheę Cristo dxal-la' guzúa xánnele lu xichaj lárdaule cheę séquele guzėjni'ile, ne guszre ljawézele nen dutę xel-la sina cheę Dios. Lu dutę xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'axxa xichaj lárdaule.

<sup>17</sup> Bíteteze da gunle, u da nnale, le gun xúgutę na lu La Xránadxu Jesús, ne xęle Xradxu Dios: Xcalenu', ne cheę Le'.

### *Ca dxal-la' xelún benne' ca' zaj naque' bi cheę Cristo*

<sup>18</sup> Le'e, nu'ula, le guzúa dizra' cheę benne' cheę cheę, lawe' da naca na da dxal-la' xelún benne' dxeajlí lazre' Xránadxu.

<sup>19</sup> Le'e, benne' biu, le zri'i zrú'ulale, ne quebe xexitaj lázrele le'.

<sup>20</sup> Le'e, bi cuide', le guzúa dizra' cheę xra xrnale lu xúgutę da dxelenné', cheę gunle da dxezaca ba lazre' Xránadxu.

<sup>21</sup> Le'e, xruze xrna', quebe tételale xel-la snia nen zrí'inele, cheę quebe xelate ni'a na'be'.

<sup>22</sup> Le'e, benne' zaj nada'u, le guzúa dizra' xúgutę da xelenná xránale lu xęzr la xu nigá, quegaze gate dxelenná'teę', cheę xeléqueņę' le'e xrlátaje, san le gun da ca' du lázrele, ne le zrebe Dios.

<sup>23</sup> Bíteteze da gunle, le gun na du lázrele, ca nu benne' dxunę' zrin cheę Xránadxu, ne quegá zrin cheę beniácheze.

<sup>24</sup> Lácala dxunle zrin nigá cheę bėnneache, nézele gunna Xránadxu lazruj cheęle da dxal-la' sile lu zra na', lawe' da dxunle zrin cheę Cristo, Bėnnea' nácaqueze' Xránale.

<sup>25</sup> Nu benne' dxunę' da calęla, wazi'e lazruj cheę da calęla nunę' lawe' da quebe dxuchá Dios ca da dxunę' cheę tu xetú benne'.

## 4

<sup>1</sup> Le'e, benne' nácale xrane bėnneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

<sup>2</sup> Le'e, bi bícha'dau', le guchálajlequeze Dios, súale ban lazre', ne xęle Dios: Xcalenu'.

<sup>3</sup> Cá'anqueze, le naba lau Dios waláz cheęntu', cheę gácale Xránadxu netu' cheę séquentu' guchálajntu' xrtizre', ne guzėjni'intu' bėnneache ca naca da nagache ca naca cheę Cristo. Lawe' da dxuna' da caní ne xu'a lizre xia nigá.

<sup>4</sup> Le naba lau Dios cheę séqueda' guzėjni'i xánnea' bėnneache ca dxal-la' guna'.

<sup>5</sup> Le gaca sina ca dxunle cheę benne' ca' quebe dxelejli lazre' Cristo, guchine xánnele zra ca' dxunna Dios le'e.

<sup>6</sup> Dizra' dxuchálajle dxal-la' gaca na xrlátaje, ne da xelexezaca ba lazre' bènneache, na' dxal-la' nézele ca xechébele cheę tu tu benne' ca' gate bi dxelenábene' le'e.

*Dxulugapa diuzre bi bíchedxu ca' ljwezre'*

<sup>7</sup> Tíquico, bi bíchedxu nazrí'i lázredxu guzenbe' le'e ca naca da dxaca chia'. Nácabe' tu bi li lazre' dxácalenbe' neda', ne dxunbe' zrin cheę Xránadxu tu zren nen neda'.

<sup>8</sup> Cheę le' na', dxusel-la'-be' naga zúale, cheę guzenbe' le'e ca dxaca cheętu', ne cheę gutípabe' lázrele.

<sup>9</sup> Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' walázzr cheęle. Benne' caní xuluzenne' le'e ca naca da dxaca nigá.

<sup>10</sup> Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'.

<sup>11</sup> Cá'anqueze bènnea' le' Jesús dxugape' le'e diuzre, bènnea' léqueze' Justo. Benne' zan benne' judío dxeleajli lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzénentu' bènneache ca xelexéqueñe' xelu'e naga dxenná bea Dios, na' dxuluzúe' neda' tu lu da ba neza zrente.

<sup>12</sup> Dxugapa Epafras le'e diuzre. Naque' wen zrin cheę Cristo, ne benne' walázzr cheęquezle. Dxenábaqueze' lau Dios cheęle le'e cheę se' cháchale, ne guzúa cuínale du lázrele cheę gunle da dxaca lazre' Dios.

<sup>13</sup> Neda' dxexecheba' cheę Epafras, dxe'e gunne xue cheęle le'e, ne cheę bi bíchedxu zaj zre'e xezre Laodicea, ne xezre Hierápolis.

<sup>14</sup> Dxugapa le'e diuzre Lucas, bènnea' dxexune' benne' we' ca', ne naque' benne' nazrí'i lazra'. Cá'anqueze dxugapa Demas le'e diuzre.

<sup>15</sup> Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'.

<sup>16</sup> Ca te gulábale le'e xiche nigá, le sel-la na cheę xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea.

<sup>17</sup> Le xę Arquipo da nigá: Bxue xanne' gunu' cháwe'dau' ca naca zrin cheę Xránadxu da bzue' lu na'u.

<sup>18</sup> Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gunę' cheęle da chawe'. ¡Ca' na gaca na!

## DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

### *Pablo dxugape' diuzre bi bíchedxu ca'*

<sup>1</sup> Neda', Pablo, ne Silvano, ne Timoteo dxugá pantu' le'e diuzre. Dxuzú aja' da nigá cheele le'e, bi bicha', nazrágale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo gunē' cheele da xrlátaje, ne gunne' le'e xel-la dxebeza zri lazre'.

### *Ca dxelejli lazre' benne' Tesalónica Cristo*

<sup>2</sup> Dxequezentu' Dios xcalenu' ca naca chee xúgutele le'e, ne dxenábantu' gaca da chawe' cheele le'e gate dxuchálajntu' Le'.

<sup>3</sup> Lau Xradxu Dios dxeajsá lázrentu' ca benle zrin dutē lu xel-la dxeajli lazre' cheele, ne ca benle zrin chee Cristo lu dutē xel-la zri'i lazre' cheele, ne ca zē cháchale ca dxebeza lázrele súalele Xránadxu Jesucristo.

<sup>4</sup> Le'e, bi bicha', Dios nazri'ine' le'e, na' nézentu' gucá'a Lē' le'e.

<sup>5</sup> Gate bchálajntu' dizra' chawe' chee Cristo naga zúale, quebe bentu' na nen dízra'ze, san nen dutē xel-la waca chee Be' Lá'azxa bchálajntu', ne lu dutē xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazri'ilē'entu' le'e.

<sup>6</sup> Le'e bēnquezle ca bentu' netu', ne ca ben Xránadxu, na' guzile dizra' na' lu dutē xel-la dxebé cheele da benna Be' Lá'azxa le'e, lácala gudéle'ele xel-la zi'.

<sup>7</sup> Caní guca, nácale tu da dxulé'e na ca dxal-la' xelaca xúgute benne' dxelejli lazre' Cristo naga nababa Macedonia, ne naga nababa Acaya.

<sup>8</sup> Caní guca, bzenle le'e benne' ca' dízra' chee Xránadxu. Na'a quegá tuze benne' zaj zre'e Macedonia, ne Acaya, san cá'anqueze benne' ca' zaj zre'e xúgute xezre zaj nézene' ca dxeajli lázrele Dios, na' québedxa dxun na ba xen guzēntu' le'.

<sup>9</sup> Benne' caníqueze dxuluchálaje' ca guca gate bedajnná'antu' le'e ne ca guzí' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li.

<sup>10</sup> Cá'anqueze dxuluchálaje' ca dxebézale zra xelá' Jesús, ze'e xabáa. Lē' naque' Zri'ine Dios, na' Dios bsebane' Lē' ládujla benne' gate ca'. Léqueze' guselē' dxi'u lu da ba xa' zrentē da za za' da sel-la Dios lu dutē xel-la dxezrá'a chee'.

## 2

### *Zrin ben Pablo lu xezre Tesalónica*

<sup>1</sup> Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite.

<sup>2</sup> Nézquezle ca belún benne' zaj zre'e xezre Filipos, buluchálajne' netu', ne buluzaljē' netu' gate na' za xedajnná'antu' le'e, na' Dios bexru chache' netu' chee bchálajntu' dízra' chawe' chee Cristo naga zúale, lácala buluzaga benne' zan netu'.

<sup>3</sup> Quebe guque zréajntu' ca bchálajntu', ne quegá bi da calēla guca lázrentu' guntu', ne quegá guca lázrentu' si xentu' le'e.

<sup>4</sup> Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bénneache san chee xezaca ba lazre' Dios, Bénnea' dxenná'teę da zua xichaj lázrdaudxu.

<sup>5</sup> Nézquezle le'e cabata' ne xentu' le'e dizra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezeņe' naca na da li.

<sup>6</sup> Cabata' ne gaca lázrentu' xelapa bénneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo.

<sup>7</sup> Bentu' le'e xrtandau' ca dxun tu nu'ula dxusegule' zrí'ine'.

<sup>8</sup> Nazrí'ile'entu' le'e, la guzréntu' gúnnatentu' le'e, quegaze dizra' chee Dios, san cá'anqueze xel-la nabán cheentu'. Caní nazrí'ile'entu' le'e.

<sup>9</sup> Le'e, bi bicha', nézquezle ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca zi'ntu' le'e dxácatę bchálajntu' le'e dizra' chee Dios.

<sup>10</sup> Le'e dxexechębequezle, ne cá'anqueze Dios nézene' ca bentu' gate na' zúalęntu' le'e, gúcantu' li lazre', ne xlátaje, na' quebe nu guzeque' nu nne cheentu'.

<sup>11</sup> Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'.

<sup>12</sup> Gunná bé'entu' le'e gunle ca dxal-la' xelún benne' zaj naque' bi chee Dios, Bénnea' dxuláwizre' le'e chee chu'ule naga dxenná be'ę lu dutę xel-la szren chee'.

<sup>13</sup> Chee le' na' dxéquezentu' Dios xcalenu' lawe' da benle ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajlí lázrele Le' chee gácale chee Dios dutę ca nácale.

<sup>14</sup> Le'e, bi bicha', gate gudele xel-la zi' chee da belún benne' waláwr chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'anqueze guledéę' xel-la zi' chee da belún benne' waláwr chee' ca', benne' judío.

<sup>15</sup> Benne' judío caní belutię' Xránadxu Jesús, ca belún benne' judío ca' gate nate, belutię' benne' ca' gulenné' waláz chee Dios, na' benne' caní gulebeaje' netu' lázrentu'. Quebe dxelunę' da dxezaca ba lazre' Dios, ne dxeledábague' xúgutę bénneache,

<sup>16</sup> na' gate dxaca lázrentu' guchálajntu' benne' quebe zaj naque' judío chee xeelé', quebe dxelunne' netu' lataj. Caní dxelunę', dxuluzandxe' dul-la da zaj nabague'. Na'a, ba be' Dios lataj dxaca da ba xa' zrentę chee benne' ca'.

### *Pablo dxezá lazre' cheajnné'ę bíchedxu zaj zre'ę xezre Tesalónica*

<sup>17</sup> Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xeda-jnná'antu' le'e.

<sup>18</sup> Guca lázrentu' xídantu', na' neda', Pablo, guca lazra' xida' tu chupa lasa, na' bzaga Satanás neda'.

<sup>19</sup> ;Bizra da na' dxunna na netu' xel-la dxebeza lazre', ne xel-la dxebe', ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'eequeze gácale da caní lu zra xelá' Xránadxu Jesucristo.



<sup>20</sup> Awe'. Da nácale le'e gun na si'ntu' da xabáa lau Dios, ne súantu' lu da ba neza.

### 3

<sup>1</sup> Nadxa gate québedxa guca guchaga launtu' lawe' da quebe bi bémentu' ca dxaca cheeḷe, na' gúquentu' xegá'ana chúpantu' lu xezre Atenas,

<sup>2</sup> na' sél-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzé cháchabe' le'e, ne gutípabe' lázrele ca dxeajlí lázrele Cristo,

<sup>3</sup> chee quebe gate ni'a na'le lawe' da dxedentu' lu da stebe caní. Le'e nézquezle dxal-la' tedxu xel-la zi' caní.

<sup>4</sup> Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca, ca ba nézquezle.

<sup>5</sup> Chee le na', gate québedxa bzúeda' guchaga lawa' lawe' da quebe bi benda' cheeḷe, na' gusel-la' nu bedajnába le'e ájala dxaca cheeḷe lu xel-la dxeajlí lazre' cheeḷe Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

<sup>6</sup> Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' cheeḷe. Dxebe' netu' dxeajsa' lázrquezle le'e netu' nen dutę xel-la zri'i lazre', ne dxezá lázrele'ele le'e netu', ca netu' dxaca lázrentu' le'entu' le'e.

<sup>7</sup> Chee le na', bi bicha', dxácatę dxedentu' lu da stebe caní, ne lu da zi' da xa', zúantu' xel-la dxebe' lawe' da nézentu' zę cháchale ca dxeajlí lázrele Cristo.

<sup>8</sup> Na'a naca cheentu' ca naca chee tu benne' bezúateę' chawe' lawe' da nézentu' zę cháchale lu da naca chee Xránadxu.

<sup>9</sup> Ájazra guntu' xéle'entu' Dios: Xcalenu' ca dxal-la' guntu' waláz cheeḷe le'e, ne ca naca xel-la dxebe' nápantu' lau Dios ne chee le'e?

<sup>10</sup> Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

<sup>11</sup> Dxenábantu' lau Xradxu Dios, ne lau Xránadxu Jesucristo gácalęę' netu' chee séquentu' xedajnná'antu' le'e.

<sup>12</sup> Dxenábantu' Le' chee zri'idxa ljwézrele tule xetule, ne chee zri'idxale xúgute bénneache ca nazrí'intu' netu' le'e.

<sup>13</sup> Dxenábantu' Le' guzúa chúchue' lázrdaule, chee gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgute bi chee Le'.

### 4

#### *Dxal-la' gundxu da dzezaca ba lazre' Dios*

<sup>1</sup> Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dzezaca ba lazre' Dios.

<sup>2</sup> Nézquezle le'e da bzéajni'intu' le'e ne chee Xránadxu Jesús.

<sup>3</sup> Da dxaca lazre' Dios naca na guzúa cuínale lu na' Le', ne québedxa gunle da sban,

<sup>4</sup> na' súalele zrú'ulaquezele tu tule le'e lu xel-la lá'azxa chee Xránadxu, ne gápale le' ba lá'ana,

<sup>5</sup> ne quebe súale lu xel-la dxezá lazre' chee da sban ca dxelún benne' quebe zaj nunbe'e Dios.

<sup>6</sup> Ca naca chee da nigá, netule le'e quebe dxal-la' si xeje bi bíchele, quebe gunle da sban chee', lawe' da xebéaj lazre' Xránadxu chee xúgute benne' dxelune' da caní, ca ba bzéajni'intu' le'e.

<sup>7</sup> Dios bláwizre' dxi'u chee gundxu da xrlátaje, ne quegá gundxu da sban.

<sup>8</sup> Caní naca, che nu benne' dxuzúe' chalá'ala ca naca da nigá, quegá tuze bèneache dxuzúe' chalá'ala, san Díósqueze dxuzúe' chalá'ala, Bénnea' nunne' dxi'u Be' Lá'azxa.

<sup>9</sup> Ca dxal-la' zri'i ljwézrele quebe dxun na ba xen guzúaja' cheeje, lawe' da ba blé'equeze Dios le'e chee zri'i ljwézrele tule xetule.

<sup>10</sup> Caníqueze dxal-la' zri'ile xúgute bi bíchedxu zaj zre'e xezre ca' zaj nababa xezr la xu Macedonia. Dxata' xuentu' le'e, bi bicha', chee zri'idxa ljwézrele.

<sup>11</sup> Le gun ba xuzre súale lu xel-la dxebeza zri lazre', ne gunle da naca cheézqueze, ne gunle zrin nen ni'a na'le ca ba guzrentu' le'e,

<sup>12</sup> Chee xelapa benne' xula le'e ba lá'ana, ne chee quebe bi xáizrjele le'e.

### *Ca gaca zra xelá' Xránadxu*

<sup>13</sup> Le'e, bi bicha', dxaca lázrentu' nézele ca naca chee bi bíchele zaj nate, chee quebe xewine lázrele ca dxelún xezícadxa benne' ca' quebe bi dxelebeza lazre'.

<sup>14</sup> Dxéajlëdxu gute Jesús, ne bebang' ládujla benne' gate, ne cá'anqueze dxéajlëdxu Dios gusebang' benne' gate ca' guleajlí lazre' Jesús, chee xelezúalene' Le'.

<sup>15</sup> Chee le na' dxentu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúalëdxu Le' nédxula ca benne' ca' zaj nate.

<sup>16</sup> Xránaquezdxu ze'e xabáa, na' cuezre xe'e nen dute xel-la dxenná bea chee', na' xendxu chi'i gubáz blau chee xabáa, ne chi'i luzu da dxulucuezre' waláz chee Dios. Nadxa benne' gate ca', benne' guléajle'e chee Cristo xelexebánqueze' za'a le'.

<sup>17</sup> Te na', dxi'u na' naca bandxu xeché'e dxi'u tu zren nen benne' ca' ládujla beuj chee xezrágadxu Xránadxu lu be'. Ca'an gaca súalëdxu Xránadxu chadía chacanna.

<sup>18</sup> Chee le na' le gutipa lázrele tule xetule nen dizra' caní.

## 5

<sup>1</sup> Na'a, ca naca chee bi zra, u bi iza xelá' Xránadxu, quebe dxun na ba xen guzúaja' cheeje, bi bicha'.

<sup>2</sup> Ba nézquezele le'e zrin zra xelá' Xránadxu gate québela nu dxebeza Le', ca za tu benne' gubán chizrela.

<sup>3</sup> Gate dxelenná bèneache: Cháwele'e dxaca cheedxu, ne quebe bi dx-uchixre chee, nadxa za da guzría xi na benne' ca', ca za xel-la dxudía chee tu nu'ula gate zue' zi'i, ne quebe xeelé' lu da na'.

<sup>4</sup> Le'e, bi bicha', quebe zúale lu da chul-la, chee quebe gaca cheeje lu zra na' xelá' Xránadxu ca dxaca chee tu benne' dxu'u gubán lizre'.

<sup>5</sup> Xúgutele le'e dxunle xrlátaje, da naca chee xel-la naxaní', ne chee te zra. Quebe dxunxu da calëla, da naca chee chizrela, ne chee da chul-la.

<sup>6</sup> Chee le na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu.

<sup>7</sup> Benne' dxelase, chizrela dxelásië', ne benne' dxelezuzre, chizrela dx-elezúzrequeze'.

<sup>8</sup> Nácadxu dxi'u chee te zra, na' dxal-la' guzéajni'i cuínaquezdXu. Che dxeajl'í lázredxu Xránadxu, ne zri'idxu Lẹ', da nigá gaca na cheedxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheedxu ca tu lapa xia ca da dxuzúa tu benne' zeje' wedil-la xíchaje'.

<sup>9</sup> Dios quebe bene' cheedxu tedxu lu da ba xa' da sel-le' lu xel-la dxezrá'a chee. Bene' cheedxu zrué'edxu xel-la weselá ne chee Xránadxu Jesucristo.

<sup>10</sup> Jesucristo gutie' waláz cheedxu chee gaca bandxu tu zren nen Lẹ', che naca bandxu, u che ba nátedxu gate zrin zra na'.

<sup>11</sup> Chee le na' le gutipa lázrele, ne le guzé chacha ljwézrele tule xetule, ca ba dxúnquezle.

*Pablo dxuzéajni'ing' bi bíchedxu ca'*

<sup>12</sup> Le'e, bi bicha', dxata' xúentu' le'e gápale ba lá'ana benne' dxelunę' zrin ládujla le'e, benne' ca' gucá'a Xránadxu chee xelenná be'ene' le'e, ne xulusédenę' le'e.

<sup>13</sup> Dxal-la' gápale benne' ca' ba lá'ana, ne zri'ile le' lawe' da dxelunę' zrin chee Dios. Le sua lu xel-la dxebeza zri lazre' tule xetule.

<sup>14</sup> Cá'anqueze dxusebágantu' le'e, bi bicha', gusízrele benne' ca' quebe dxelaca lazre' xelunę' zrin, ne gutipa lázrele benne' ca' dxelate ni'a ne'e, ne gácalele benne' quebe zaj zę' chacha, ne gácale zren lazre' nen xúgute bėnneache.

<sup>15</sup> Le guxúe xanne' cuínale chee quebe gunle da calęla chee nu benne' dxunę' cheęle da calęla, san le gun ba xuzre gúnquezle da xrlátaje, tule xetule, ne chee xúgute bėnneache.

<sup>16</sup> Le béquezle.

<sup>17</sup> Le guchálajlequezle Dios.

<sup>18</sup> Le xę Dios: Xcalenu' ca naca xúgute da dxaca cheęle.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi chee Jesucristo.

<sup>19</sup> Quebe guzágale da dxun Be' Lá'azxa.

<sup>20</sup> Quebe guzúale chalá'ala dizra' da nunezruj Be' Lá'azxa nu bi bíchedxu ca'.

<sup>21</sup> Le guchi'a xanne' xúgute da ca', na' le si' da naca na xrlátaje.

<sup>22</sup> Le cuasa lu xúgute da quebe naca na xrlátaje.

<sup>23</sup> Dios dxunne' dxi'u xel-la dxebeza zri lazre'. Dxenaba' lau Lẹ' gunę' le'e benne' lá'azxaqueze, ne guxúe' be' nácaquezle, ne bėnne'du xu'ule, ne beł-la' dxen cheęle chee gácale du lazre' lu zra na' xelá' Xránadxu Jesucristo.

<sup>24</sup> Bėnnea' bláwizre' le'e naque' li lazre', na' Lẹ' gunę' xúgute da caní.

*Pablo dxuzé dizra' bi bíchedxu ca'*

<sup>25</sup> Le'e, bi bicha', le naba lau Dios gácal-lene' netu'.

<sup>26</sup> Le gugapa diuzre xúgute bi bíchedxu ca', ne gunídale le'.

<sup>27</sup> Lau Xránadxu dxusebaga' le'e gulábale xiche nigá lówela xúgute bi bíchedxu ca'.

<sup>28</sup> Dxenaba' lau Xránadxu Jesucristo gunę' cheęle da chawe'. ¡Ca'an gaca na!

## DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

*Pablo dxugape' diuzre bi bíchedxu ca'*

<sup>1</sup> Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá cheele le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo.

<sup>2</sup> Dxenaba' lau Xradxu Dios, ne lau Xránadxu Jesucristo guné' cheele da chawe', ne gunné' le'e xel-la dxebeza zri lazre'.

*Dios guchi'e da belún benne' dul-la ca' gate xelá' Cristo*

<sup>3</sup> Le'e, bi bícha'dau', dxal-la' xéquezentu' Dios: Xcalenu' ca naca cheele, da dxal-la' guntu' lawe' da ba dxegula xel-la dxeajlí lazre' cheele, ne ba zúadxá xel-la nazrí'i lazre' len ljjwézerele tule xetule.

<sup>4</sup> Chee le na' dxuchálajntu' ca naca cheele le'e lálwela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios.

<sup>5</sup> Da nigá dxulé'e na xlátaje naca Dios ca dxuchi'e da dxelún bénneache, dxenné' naca cheele chu'ule naga dxenná bea Le' lawe' da dxedele xel-la zi' chee la' xel-la dxenná bea chee'.

<sup>6</sup> Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a,

<sup>7</sup> na' guzúe' le'e naga xezí' lázrele chee xel-la zi' da dxedele na'a. Xezí' lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'.

<sup>8</sup> Ze'e nu'e xi' chee gudé' lu da ba xa' benne' ca' quebe dxelexúnbe'e Dios, ne quebe dxuluzúe' dizra' ca dxenná dizra' chawe' chee Xránadxu Jesucristo.

<sup>9</sup> Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee' da ba xa' chadía chacanna.

<sup>10</sup> Caní gaca gate xelá' Xránadxu lu zra na' chee xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba lál'ana. Le'e gunle benne' ca' tu zren lawe' da guxéajlele chee' da bechébentu'.

<sup>11</sup> Chee le na' tu dxuchálajlequezentu' Dios ca naca cheele, ne dxenábantu' Le' gaca cheele sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee' gaca gunle ca naca xúguté' da xrlátaje da dxezá lázrele, ne xúguté' zrin dxunle ne chee xel-la dxeajlí lazre' cheele.

<sup>12</sup> Caní gunle, gucá'ana szrenle La Xránadxu Jesucristo, na' Le' gape' le'e ba lál'ana ne chee xel-la xrlátaje chee Dios cheedxu, ne chee Xránadxu Jesucristo.

## 2

*Benne' xriwe'*

<sup>1</sup> Le'e, bi bícha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e

<sup>2</sup> chee quebe guchale ca dxéquele, ne quebe súale stébe chee bi dizra' xuluchalaj bénneache lácala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusél-lantu' netu', che dxenná na ba belá' Xránadxu.

<sup>3</sup> Quebe güele lataj nu si xe le'e, lawe' da xelexá' bënneache xelexéaj xíchaje' Dios, ne la' bënnea' dxedábague' Dios nédxula gate zrin zra xelá' Xránadxu. Bënnea' dxedábague' Dios, na' ba naca chee' cuía xíqueze',

<sup>4</sup> na' tábague' xúgutę da naca chee' Dios, ne xúgutę da dxulucá'ana szren bënneache. Gucá'ana szren cuine' ca zrintę cheajché'e lu xudau' chee' Dios, ne gun cuine' ca Diósqueze.

<sup>5</sup> ¿Quebe dxeajsá lázrele gúchequeza' le'e da nigá gate na' zúalena' le'e?

<sup>6</sup> Le'e ba nézele Nu Benne' nuzague' bënnea' dxedábague' Dios chee' quebe le'e gate quebe ne zrin zra le'e.

<sup>7</sup> Ba dxun zrin xel-la waca da nagache chee' da caleļa, san zua Nu Benne' nuzague' le' na' na'a, ca zrin zra xecuasa Bënnea' nuzague' le' na.

<sup>8</sup> Nadxa la' bënnea' dxedábague' Dios, na' Xránadxu Jesús gutie' le', guchínene' be' da dxuaj na dxu'e, ne guzria xi'e le', guchínene' xel-la naxani' chee' za ze'e.

<sup>9</sup> Benne' xriwe' na' ze'e ne chee' xel-la dxenná bea chee' Satanás, na' lu dute' xel-la waca chee' na gunę' da ca' xelunna bea na, ne xel-la waca ca' da zaj naca na wen lazre',

<sup>10</sup> ne guchínene' xúgutę da caleļa ca' chee' si xe'e benne' ca' xelexía xi'e, benne' ca' quebe gulaca lazre' xelexi'e da li chee' xelexé'.

<sup>11</sup> Chee' le' na' Dios dxu'e lataj si xe' da caleļa benne' ca' chee' xelexajle'e chee' da wen lazre',

<sup>12</sup> chee' xelexía xi' xúgutę benne' ca' quebe gulaca lazre' xelexajle'e chee' da li, san dxeledánedxene' da naca da caleļa.

### *Dios guqu'e dxi'u chee' ladxu*

<sup>13</sup> Netu' tu dxál-la'queze xentu' Dios: Xcalenu' ca naca chee' le'e, bi bícha'dau', nazri'i Xránadxu le'e, lawe' da gucá'a Dios le'e nédxute' chee' lale. Be' Lá'azxa ba nune' le'e chee' Dios lawe' da dxéajlele chee' da li.

<sup>14</sup> Chee' gaca chee' da nigá Dios ba bláwizre' le'e ne chee' dizra' chawe' da dxuchálajntu', chee' zrué'ele xel-la szren chee' Xránadxu Jesucristo.

<sup>15</sup> Chee' le' na', bi bícha'dau', le' se' chacha, ne quebe gal-la lázrele da ca' bzéajni'intu' le'e caniqueze, ne cá'anqueze lu xiche.

<sup>16</sup> Dxenaba' lau Xránadxu Jesucristo, ne lau Xradxu Dios, Bënnea' lu dute' xel-la xrlátaje chee' bzri'ine' dxi'u, ne ba benne' dxi'u xel-la dxexúe zren chee' tu chi'i gaze, ne tu xel-la dxebeza lazre' li.

<sup>17</sup> Dxenaba' Le' gutipe' lázrele, ne guzé chúchuę' le'e chee' nnale, ne gunle xúgutę da xrlátaje.

## 3

### *Pablo dxenné xúene' bíchedxu ca' xelenabe' Dios gácalene' le'*

<sup>1</sup> Na'a, bi bícha'dau', le' naba Dios gácalene' netu', chee' zrinzega dizra' chee' Xránadxu xúgutę xezre ca', ne chee' xelexi'e na dute' lu xel-la ba lá'ana, ca guca ládujla le'e.

<sup>2</sup> Le nábaquezle chee' ladxu lu na' benne' ca' dxelune' da caleļa, ne lu na' benne' sban ca', lawe' da quegá xúgutę benne' dxeleajli lazre' Cristo.

<sup>3</sup> Xránadxu naque' li lazre', na' Le' guzē chache' le'e, ne guxúe' le'e chee' quebe bi da caleļa gaca na chee'le.

<sup>4</sup> Dxuxrén lázrentu' Xránadxu gácalene' le'e chee' gunle ca da dxénentu' le'e, ca ba dxúnquezle.

<sup>5</sup> Dxenábantu' lau Xránadxu gácalene' le'e chee' gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

*Dxal-la' gundxu zrin*

<sup>6</sup> Le'e, bi bícha'dau', lu La Xránadxu Jesucristo dxéntenú' le'e quebe gunle tuze núteteze bi bíchedxu quebe dxaca lazre' guné' zrin, ne quebe dxuné' ca da bsédentu' le'e.

<sup>7</sup> Ba nézele dxal-la' gunle zrin ca bentu' netu' gate na' zúalentu' le'e.

<sup>8</sup> Quebe nu chee gudáguntu' cá'aze che nadxu quebe gudízrujntu' na. Bénle'equezentu' zrin te zra, ne chizrela chee quebe bsaca zi'ntu' le'e da gáguntu'.

<sup>9</sup> Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bénquezentu' netu'.

<sup>10</sup> Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' guné' zrin ca'an guné' quebe gawe'.

<sup>11</sup> Ba bénentu' bál-lale le'e quebe dxunle zrin, na' dxedázele dxuchixre chee da dxaca chee benne' xula.

<sup>12</sup> Benne' caní dxixruj be'entu', ne dxusebágantu' le' lau Xránadxu Jesucristo chee xeluné' zrin du lazre' chee gata' da xele'aj xelawe'.

<sup>13</sup> Le'e, bi bícha', le gun da xrlátaje, ne quebe cheajtá lázrele.

<sup>14</sup> Che nu benne' quebe dxuzúe' dizra' ca da dxennantu' lu xiche nigá, le nna' nu bénnea', ne quebe gunle le' tuze, chee gapa stué'.

<sup>15</sup> Quebe zrá'ale le', san le guzéajni'i le' ca bi bíchele.

*Pablo dxuzé' dizra' bi bíchedxu ca'*

<sup>16</sup> Xránadxu naque' Bénnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgute da dxunle, ne sáalene' xúgutele le'e.

<sup>17</sup> Neda', Pablo nen ná'aqueza' dxuzúaja' chee da nigá. Da nigá dxunna bea na xúgute xiche da dxuzúajqueza' neda'. Caní dxuzúaja'.

<sup>18</sup> Dxenaba' lau Xránadxu Jesucristo guné' da chawe' chee xúgutele le'e. Ca'an gaca na.

## DIZRA' NEDXU BZUAJ SAN PABLO CHEE TIMOTEO

### *Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'.

<sup>2</sup> Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gune' chiu' da chawe', ne xexache lazre' lue', ne gunne' lue' xel-la dxebeza zri lazre'.

### *Pablo dxusízrene' Timoteo ca naca chee benne' ca' dxulusédenē' da wen lazre'*

<sup>3</sup> Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédenē' da wen lazre',

<sup>4</sup> ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutil-la na bénneache. Quebe naca na da xelácale na bénneache chee xelezé chache' ca dxelejli lazre' Dios. Caní dxenné xúeda' lue' xecha lasa.

<sup>5</sup> Dxenné xúeda' lue' gunu' caní chee xelezrí'i ljwezre' dutē lázrdawē', chee quebe bi sua da gagu na zria lázrdawē' ca', ne gaca du lazre' ca dxelejli lazre' Cristo.

<sup>6</sup> Bal-la benne' ca' belexecuase' lu da caní, na' ba zaj nazi'e dizra' xálaze.

<sup>7</sup> Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

<sup>8</sup> Nezdxu da nadxixruj bea na naca na xrlátaje che nu benne' dxuchínene' na ca naca chee na.

<sup>9</sup> Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelune' da calela, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutie' benne',

<sup>10</sup> ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da lí.

<sup>11</sup> Caní naca da dxulé'e dizra' chawe' da bsebagá Dios neda'. Naque' Dios xabáa, Benne' szrente.

### *Pablo dxē'e Dios: Xcalenu'*

<sup>12</sup> Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'.

<sup>13</sup> Xúgute' da caní ba bene' chia' lácala gunnía' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajli lazra' Cristo, ne quebe guxéajni'ida' da na' bene'.

<sup>14</sup> Chee le na' Xránadxu, dutē lu xel-la zri'i lazre' zren chee' bnite lawe' chia', ne bēnne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi chee' Jesucristo.

<sup>15</sup> Da nigá naca na da li, na' xúgute bēnneache dxal-la' xeléajle'e chee' na. Caní dxenná na: Jesucristo ble'e lu xezr la xu nigá chee' guselé' benne' dul-la ca', na' neda' nácadxa' benne' dul-la ca xúgute benne' ca'.

<sup>16</sup> Chee le na' Dios bexache lazre' neda' chee' gulé'e Cristo ca szren naca xel-la zren lazre' chee' nen neda', nácale'a benne' dul-la, chee' gaca' neda' tu da gulé'e na lau xúgute benne' ca' xeleajlí lazre' Cristo, na' xelape' xel-la nabán chadía chacanna.

<sup>17</sup> Chee le na' dxal-la' gápadxu ba lá'ana, ne güe lá'anadxu Bēnnea' nna béaqueze' chadía chacanna. ¡Cabata' gatie', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

<sup>18</sup> Lue', bi chia', Timoteo, dxusebaga' lue' su' wedil-la chee' tíl-lalenu' da naca chee' da calela, ca da buluchalaj nédxute benne' ca', benne' gulenné' waláz chee' Dios ca dxal-la' gunu' lue'.

<sup>19</sup> Bexru tipa xel-la dxeajlí lazre' chiu', chee' quebe bi sua da gulale na lu xichaj lazrda'u. Bal-la benne' ca' quebe beluné' caní, na' buluzúe' chalá'ala xel-la dxeajlí lazre' chee'.

<sup>20</sup> Caní guca chee' Himeneo, ne chee' Alejandro, benne' ca' bdea' neda' lu na' Satanás chee' xulusédie' quebe xelenné' schanni' chee' Dios.

## 2

### *Ca dxal-la' guchálajle dxu Dios*

<sup>1</sup> Da dxundxa na ba xen dxenné xúeda' lue', dxal-la' ná bale lau Dios gácaleñe' bēnneache, ne guchálajlele Dios, ne gucá'ana szrenle Le', ne ná bale Dios gunne' le'e da dxexáxrjele, ne xe le Dios: Xcalenu'. Dخال-la' gunle caní, guchálajlele Dios da naca na chee' xúgute bēnneache.

<sup>2</sup> Cá'anqueze dxal-la' ná bale Le' gácaleñe' benne' xichje ca', benne' dxelenná be'ene' bēnneache, ne benne' xu'u lawe' ca' chee' chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bēnneache.

<sup>3</sup> Da nigá naca na xrlátaje, ne da dxezaca ba lazre' Dios, weselá cheedxu,

<sup>4</sup> lawe' da dxaca lazre' Le' xelélé xúgute bēnneache, ne xelúnbe'e da li.

<sup>5</sup> Zua tuze Dios, ne zua tuze wenaba chee' bēnneache lau Dios, Bēnnea' naque' Jesucristo, ne cá'anqueze ben cuine' bēnneache.

<sup>6</sup> Jesucristo bzua cuine' lu xel-la gute chee' bexá'awe' xúgute bēnneache, na' blé'ene' da na' ca bzinr zra chee' na.

<sup>7</sup> Chee le na' bzuē' neda' gubáz chee' chee' cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xeluné' ca naca da li. Lau Cristo dxexecheba', ne quebe dxun lazra'.

<sup>8</sup> Chee le na' dxaca lazra' xuluchálajle xúgute bēnneache Dios gáteteze na', ne xelechisa ne'e dutē xel-la li lazre' chee' lau Dios, ne quebe xelezre'e ljwezre', ne quebe xeledíl-lalene' ljwezre' ca'.

<sup>9</sup> Nu'ula ca' dxal-la' léacue' da naca xlátaje, ne ca naca chee' da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lane' da zácale'e na.



<sup>10</sup> Dخال-la' xeluné' da gácale na bénneache, ca dxal-la' xelún nu'ula ca' ba zaj nuzúa cuine' lu na' Dios.

<sup>11</sup> Nu'ula ca' duté lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee' na.

<sup>12</sup> Quebe dxunna' lataj nu'ula gusédene' benne' biu ca', ne quebe nna be'ene' le', san dxal-la' sue' zrize.

<sup>13</sup> Cani naca na lawe' da ben Dios teca Adán, na' gudé na' bene' Eva, nu'ula chee Adán na'.

<sup>14</sup> Adán, quebe guzi xe da xriwe' le', san guzi xe na Eva, nu'ula na', na' gudé guzi xe na le', na' bene' dul-la.

<sup>15</sup> Tu nu'ula gape' xel-la weselá che dxezané' bidu ca', ne cheajli lazre' Dios, ne nazri'ine' Le', ne nuzúa cuine' lu na' Dios, ne gague' dxexruj lazre'.

### 3

#### *Ca dxal-la' xelaca benne' ca' dxulusédene' bi ca' chee Cristo*

<sup>1</sup> Da líqueze naca da nigá: Che nu benne' dxezá lazre' gague' benne' gusédene' bi ca' chee Cristo, tu zrin xrlátaje dxaca lazre' gune'.

<sup>2</sup> Tu benne' dxusédene' bi ca' chee Cristo:

Dخال-la' gague' benne' quebe bi zua da dxunite na le'.

Dخال-la' s'ualéne' tuze nu'ula.

Dخال-la' gague' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dخال-la' si' lu ne'e benne' xelezrine' lizre'.

Dخال-la' gague' benne' dxaca dxusédene' bénneache.

<sup>3</sup> Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dخال-la' gague' benne' dxexruj lazre', ne zren lazre'.

<sup>4</sup> Dخال-la' nézene' nna be'ene' benne' zaj zre'e lizre',

ne gulé'ene' zrí'ine' ca' xelácabe' wezúa dizra',

ne xelápabe' ba lá'ana xra xrnabe'.

<sup>5</sup> Che nu benne' quebe nézene' ájala nna be'ene' benne' zaj zre'e lizre', z'ájazra gune' gusédene' bi ca' chee Dios?

<sup>6</sup> Benne' dxusédene' bi ca' chee Cristo quebe dxal-la' gague' benne' za dxúnbeate dizra' chee Cristo, chee quebe gucá'ana szren cuine', chee quebe cuía xi'e ca guzría xi' da xriwe'.

<sup>7</sup> Cá'anqueze dxal-la' gague' benne' nape' ba lá'ana lávela benne' quebe zaj nague' chee Cristo, chee quebe gata' lataj nu guzúa le' chalá'ala, na' chee quebe chu'e lu na' da xriwe'.

#### *Ca dxal-la' xelaca benne' dxelácaléne' bi ca' chee Cristo*

<sup>8</sup> Cá'anqueze benne' ca' dxelácaléne' bi ca' chee Cristo:

Dخال-la' xelaque' benne' zaj nape' ba lá'ana, ne benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

<sup>9</sup> Dخال-la' xelapa xánnie' da zácale'e chee da dxeajli lázredxu,

ne quebe bi xua da gagu na zría chee' lu xichaj lázrdawe'.

<sup>10</sup> Dخال-la' guxúe xánnele ca dxeledé'.

Te na', che quebe bi zua da dxagu na zria chee', waca xelácaléne' bi ca' chee Cristo.

<sup>11</sup> Zru'ula benne' caní:

Dxal-la' xelaque' benne' zaj nape' ba lá'ana,  
ne quebe xelaque' wetupa dizra' bizruj.

Dxal-la' xelaque' du lazre', ne li lazre' ca naca xúgute da dxelune'.

<sup>12</sup> Tu benne' dxácalene' bi ca' chee Cristo dxal-la' súalene' tuze nu'ula, ne dxal-la' nézene' nna be'ene' zri'ine' ca', ne benne' zaj zre'e lizre'.

<sup>13</sup> Benne' ca' dxelácalene' bi ca' chee Cristo, che dxelune' cháwedau' zrin chee', welezrué'ene' xel-la ba lá'ana, na' xezezéquedxene' xuluchálaje' du lazre' ca dxeajlí lázredxu Jesucristo.

*Tu da ble'e Dios dxi'u ca naca da zéajlédxu*

<sup>14</sup> Dxebeza lazra' xídazequeza' xedajnná'a lue', na' dxuzúaja' chiu' da nigá

<sup>15</sup> chee chéajni'inu' che dxezreda', ca dxal-la' gunu' ládujla benne' ca' zaj nababe' chee Dios, benne' ca' ba bláwizra Dios ban, ne zaj nuxru chache' da li, ne dxuluxúe xánne' na.

<sup>16</sup> Da li tu da zrenté naca da nigá ble'e Dios dxi'u ca naca da zéajlédxu:

Dios ble'e nigá, ne guque' bénneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' duté xezr la xu belenne' ca naca chee'.

Guleajlí lazre' benne' zaj zre'e duté xezr la xu nigá Le'.

Dios bezi'e Le' xabáa.

## 4

*Ca naca chee benne' ca' dxuluzúe' chalá'ala xel-la dxeajlí lazre' chee'*

<sup>1</sup> Be' Lá'azxa ba bdxixruj lie' wazrín zra xulusán bal-la benne' xel-la dxeajlí lazre' chee', na' chjácalene' be' ca' xezezí xé na le', ne xezezí'e ca da xululé'e be' xriwe' ca'.

<sup>2</sup> Xuluzé nague' ca da xulusede benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la stu' gate dxelún lazre'.

<sup>3</sup> Benne' caní quebe dxelu'e latja nu guchaga na', ne cá'anqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxeajlí lazre' Le', ne benne' ca' zaj núnbe'e da li, ne xel'é Le'; Xcalenu'.

<sup>4</sup> Xúgute da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xedxu Dios; Xcalenu',

<sup>5</sup> lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' guné' gaca na da chawe'.

*Benne' wen zrin xrlátaje chee Jesucristo*

<sup>6</sup> Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazi lu na'u dizra' chee Dios, ne ca naca da dxusédedxu, da na' zéajlenu'.

<sup>7</sup> Quebe gulapa na'u da dxuluzaze bénneache, ne dizra' xálaze. Bzazraj cuinu' lu da naca chee Dios.

<sup>8</sup> Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute da dxunu', na' naca na da sidxu ba neza lu xezr la xu nigá, ne cá'anqueze lu xezr la xu da za za'.

<sup>9</sup> Da li naca da nigá, na' xúgute bénneache dxal-la' xeléajle' chee na.

<sup>10</sup> Chee le na' dxudé xel-la zi' cuínadxu dxundxu zrin lawe' da dxebeza lázredxu Dios ban, Bénnea' naque' weselá chee xúgute bénneache, na' dxuselé' benne' ca' dxeajli lazre' Le'.

<sup>11</sup> Da caní dxal-la' gusédenú' bénneache, ne nne xuenu' le' xelune' na.

<sup>12</sup> Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeleajli lazre' Cristo ca dxal-la' xelune'. Gulé'e na le':

Ne chee da dxuchálaju',

ne ne chee da dxunu',

ne ca nazri'inu' le sa' ljwezru',

ne ca naca Be' Lá'azxa zúalene' lue',

ne ca dxeajli lazru' Cristo,

ne ca nacu' du lazre'.

<sup>13</sup> Dxácate xida' neda', ben zi' lazru' gulabu' xiche lá'azxa lávela bénneache, ne gutipu' lazre' bi bíchedxu ca', ne guzéajni'inu' le'.

<sup>14</sup> Quebe gusanu' xel-la waca da benna Dios lue' gate buluzé na' benne' gula ca' xichju', ne gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

<sup>15</sup> Ben da caní du lazru' chee xelelé'e xúgute bénneache nápaquezu' da naca chee Dios.

<sup>16</sup> Bxue xanne' cuinu', ne ca da dxusédenú', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

## 5

### *Ca dxal-la' xelaca benne' ca' dxeleajli lazre' Cristo*

<sup>1</sup> Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'.

<sup>2</sup> Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', dute lu xel-la dxapa ba lá'ana chiu'.

<sup>3</sup> Gúcale nu'ula ba nate benne' chee', nu'ula' quebe nu xrtie' zradxa.

<sup>4</sup> Che tu nu'ula ba gute benne' chee' ne zaj zra' zrí'ine', u zre sue', lebe' dxal-la' xelunbe' ca da zaj nabágabe' chee' xelácalebe' benne' zaj naca xrtíaquezbe', ne xelunbe' ca da zaj nabágabe' chee' xra xrnabe', lawe' da naca na xrlátaje, ne da dxezaca ba lazre' Dios.

<sup>5</sup> Nu'ula da li québedxa nu chilá' chee' dxebeza lazre' Dios, ne dxuchálajlene' Dios te zra, ne chizrela.

<sup>6</sup> Nu'ula caní, che dxune' ca da dxezaca ba lazre' léqueze', naque' ca benne' ba nate.

<sup>7</sup> Bdxixruj be'e benne' ca' xelune' caní, chee' quebe gun na ba xen nu til-la le'.

<sup>8</sup> Che nu benne' quebe dxebé'e gunne xue chee' benne' ca' zaj naque' tuze, ne da dxun na ba xen che quebe dxácalene' xrtíaqueze', ba bsane' xel-la dxeajli lazre' chee', ne nácadxe' benne' wen da zrinnaj ca tu benne' quebe ne chéajle' chee' Dios.

<sup>9</sup> Lu xiche naga zria la nu'ula ca' quebe nu chilá' chee', benne' dxácale, dxal-la' guzúajle la nu'ula caní, nu'ula na' ba gudé'e ga xun iza, ne guzúa tuze benne' chee'.

<sup>10</sup> Dxal-la' gaque' nu'ula ba bénle'e da xrlátaje ca da caní: Che ba bsegule' zrí'ine' ca'.

Che ba guzí' lu ne'e benne' bíchedxu belezrín lizre'.

Che ba gúcalene' benne' caní dutę lu xel-la dxexruj lazre' cheę'.

Che ba gúcalene' benne' dxedęę' xel-la zi'.

Che bi xetú da xrlátaje ba bene'.

11 Quebe guzriale lu xiche na' nu'ula caní che quebe ne xelezrię' ga xun iza lawe' da gagaze xucuasa xel-la dxelezá lazre' cheę' le' lu da naca cheę Cristo, na' xelaca lazre' xuluchaga ne'e xecha lasa,

12 na' xelebague' zria lawe' da bulusane' ca da gulechebe lazre' cheę Cristo.

13 Cá'anqueze che dxeledé' tu tu xu'u, xelaque' zrawęde, ne quegaze zrawęde, san cá'anqueze xelaque' wetupa dizra' bizruj, na' xuluchixre cheę' lu xúgute da xelenne', ne xelenné' da quebe dxal-la' xelenné'.

14 Cheę le' na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxúę' lizre', cheę quebe xelezí lataj xelezí tizra benne' ca' dxelezre'e dxi'u.

15 Bal-la nu'ula caní ba belexecuase' cheę Cristo, ne zjácalene' da xriwe'.

16 Che nu benne' dxeajlí lazre' Cristo, benne' biu, u nu'ula, che zua xrtię' naque' nu'ula ba gute benne' cheę', dxal-la' gácalene' le' cheę quebe xelebaga bi ca' cheę Cristo da nigá, na' benne' caní welezeque' xelácalene' nu'ula caní québedxa nu chilá' cheę'.

17 Che zaj zra' benne' gula ca' dxulusédenę' cháwedau' bi ca' cheę Cristo, dxal-la' gápale'ele benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' cheę Dios, ne dxulusédenę' le'e.

18 Lu xiche lá'azxa dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

19 Quebe guzė' nagu' che nu gagu zria cheę tu benne' gula cheę xudau' che quebe xelexá' chupa u chunna benne' xelexechebe'.

20 Benne' ca' dxelúnqueze' dul-la, dxal-la' til-lu' benne' ca' lávela xúgute bi ca' cheę Cristo, cheę xelezrebe xezícadxa benne' ca'.

21 Lau Dios, ne lau Xránadxu Jesucristo, ne lau gubáz blau ca' cheę xabáa cheę', dxusebaga' lue' cheę gunu' da caní. Dxenné xueda' lue' quebe cueu' ca zaj naca benne', ne quebe gucha'u ca gunu' cheę tu tu benne'.

22 Quebe xexúbenu' nu la guzúateu' lu zrin cheę Cristo cheę quebe bagu' dul-la cheę benne' xula. Quebe gulapa na'u ne tu da calęla.

23 Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

24 Zaj nalá' dul-la cheę bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululé'e lawe na te na'.

25 Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

## 6

1 Benne' zaj nada'u dxal-la' xelápale'e ba lá'ana xrane' ca' cheę quebe nu nne schanni' cheę Dios, ne cheę da dxusédedxu.

2 Che benne' zaj nada'u, zaj zra' xrane' ca' dxelejli lazre' Cristo, quebe dxal-la' xuluzúę' le' chalá'ala lawe' da zaj naque' benne' biche', san dxal-la' xelune' zrin da nácadxa xrlátaje cheę xrane' ca' dxelezi'e ba neza zrin na', lawe' da dxelejli lazre' Cristo, ne zaj naque' benne' biche' zaj nazri'ine'. Bzėjni'i benne' ca' da nigá ne bsizre le'.

*Da calela da dxulusede benne', ne xel-la gunní'a li*

<sup>3</sup> Che nu benne' dxusédene' da zaj naca calela da quebe zaj naca na tuze ca da bsede Xránadxu Jesucristo, ne ca da dxusede da dxéajledxu chee Dios,

<sup>4</sup> benne' nigá dxucá'ana szren cuine', ne quebe bi nézene'. Dxezá lázrele'ę gutil-le' benne' dizra' ca naca chee tu tu dizra' ca'. Benne' dxelún caní:

Dxelaque' benne' xre lazre', ne dxeledil-le',

ne dxulucháchale ljwezre',

ne dxeléquene' dxun le sa' ljwezre' da calela,

<sup>5</sup> ne tu lize dxulutil-la dizra' ljwezre',

ne zaj naque' benne' zaj nazrinnaj lu xichaj lázrdawe',

ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní.

<sup>6</sup> Da li da zéajledxu chee Cristo naca na tu da gunní'a zren, na' caní nácaqueze chee tuze bénnea' dxezaca ba lazre' ca da nape'.

<sup>7</sup> Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá,

<sup>8</sup> san che de da gágudxu, ne zra lánadxu, dxal-la' xezaca ba lázredxu nen da ca'.

<sup>9</sup> Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le na, chee xelezá lazre' da xálaze, da dxulucá'ana ditaj na bénneache, ne dxelegú'u na bénneache lu da ba xa' naga xelebia xí'e.

<sup>10</sup> Benne' nazri'ing' dumí dxune' xúgute da calela, na' zaj zra' bal-la benne' gulezá lazre' na, na' bulusané' xel-la dxelejli lazre' chee', na' ba gulezi' lataj xel-la dxudía lu lázrdawe'.

*Da dxusizre Pablo Timoteo*

<sup>11</sup> Lue', wen zrin chee Dios, gucuasa lu da caní. Ben da naca xlátaje, ne bzua cuinu' lu na' Dios, ne guxeajli lazre' Cristo, ne bzri'i Le', ne guca zren lazre', ne dxexruj lazre'.

<sup>12</sup> Gudíl-lale da xriwe', guchínenu' xel-la dxeajli lazre' chiu'. Bexru tipa xel-la nabán da chadía chacanna lawe' da bláwizra Dios lue' chee gapu' da nigá, na' ba blé'enu' ca dxeajli lazru' Cristo lávela zane' benne' dxelexechebe' chee na.

<sup>13</sup> Na'a, lau Dios, Bénnea' nuzúe' xel-la nabán chee xúgute da naca ban, ne lau Jesucristo, Bénnea' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'.

<sup>14</sup> Guzú' dizra' ca da dxapa' lue', ne quebe gucha'u na. Dxal-la' gunu' na chee quebe nu seque' bi nne chiu' ca zrin zra xelá' Xránadxu Jesucristo.

<sup>15</sup> Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bénneache.

<sup>16</sup> Tuze Dios quebe gatie', ne zue' lu xel-la naxaní' naga quebe nu seque' cheaj. Netú bénneache quebe ne lé'ene' Le', ne quebe nu gaca le'e Le'. Chee Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

<sup>17</sup> Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dxal-la' xuluxrén lazre' Dios ban, Bénnea' dxúnnale'ę dxi'u xúgute da dxechínedxu chee sidxu da ba neza.

<sup>18</sup> Gunné xue benne' caní xelunę' da xrlátaje, ne xelaque' benne' gunnı́'a lu da xrlátaje da xelunę', ne bi xulunézruje' benne' xache' ca', ne xulunézruje' na.

<sup>19</sup> Canı́ gaca, xelezrué'ene' xel-la gunnı́'a da gaca na tu da guzúa chacha na le' lu zra da za za', ne xelape' xel-la nabán da zeajlı́ canna.

<sup>20</sup> Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze cheę xęzr la xu nigá, da na' dxeleenná bal-la benne' naca na xel-la sina. Da nigá naca na da wen lazre'.

<sup>21</sup> Bal-la benne' gulezí'e na, na' bulusane' xel-la dxeleajlı́ lazre' cheę'. Dxenábeda' Dios gunę' da chawe' chiu'. ¡Ca'an gaca na!

## DIZRA' GUDXUPE' DA BZUAJ SAN PABLO CHEE TIMOTEO

### *Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo.

<sup>2</sup> Dxuzúaja' da nigá chiu' lue' Timoteo, bi chia' nazrí'i lazra', na' dxenaba' Xradxu Dios, ne Xránadxu Jesucristo guné' da chawe' chiu', ne xexache lazre' lue', ne gunne' chiu' xel-la dxebeza zri lazre'.

### *Pablo dxusízrene' Timoteo chee gunbe' zrin chee Cristo*

<sup>3</sup> Te zra ne chizrela gate dxuchálajena' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'.

<sup>4</sup> Dxeajsá lázrqueza' ca gudxezru' gate na' bezá'a naga zu', ne dxaca lázrele'a xel'éda' lue' chee gápale'a xel-la dxebé.

<sup>5</sup> Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

<sup>6</sup> Chee le' na' dxuzéajni'ida' lue' guchínenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'.

<sup>7</sup> Be' Lá'azxa benna Dios dxi'u quebe dxune' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxune' dxi'u benne' dxenná be'e cuina.

<sup>8</sup> Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálaje' dizra' chawe' chee Jesús, na' Dios gutípaqueze' lazru'.

<sup>9</sup> Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bēndxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr la xu nigá,

<sup>10</sup> na' blé'ene' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la gute, ne blé'ene' bēneache ca gaca xezezi' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

<sup>11</sup> Dios bzue' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusédeda' benne' quebe zaj naque' judío.

<sup>12</sup> Chee le' na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' nape' xel-la waca cu'u chawe' da nuzú'a lu ne'e ca zrindxa zra na'.

<sup>13</sup> Bexru típa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

<sup>14</sup> Ne chee xel-la waca chee Be' Lá'azxa, Bénnea' zue' xichaj lázrdaudxu, bexru típa da na' nuzú'a Dios lu na'u.

15 Ba nézenu' ca belún xúgute bi bíchedxu zaj zře'ę naga nababa Asia. Gulebéaj xíchaję' neda'. Cá'anqueze Figelo, ne Hermógenes belune' tu zren benne' ca'.

16 Dxenaba' Xránadxu xexache lazre' benne' zaj zře'ę lizre Onesíforo. Gúcale le' neda' zane' lásaqueze, ne quebe gudapa stuę' chia' neda', xu'a lizre xia.

17 Gate blę'ę xezre Roma, bexilaję' neda', na' bezrélene' neda'.

18 Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'ęne' dxi'u lu xezre Efeso.

## 2

### *Benne' węn zrin du lazre' cheę Jesucristo*

1 Lue', zri'ina', guzę' tipa ne cheę da xrlátaje da nápadxu lawe' da nácadxu bi cheę Jesucristo.

2 Ca da bennu' bchálaja' lówela benne' zan, benne' belexechebę' naca na da li, bzua na lu na' benne' zaj naque' li lazre', benne' xelezéquene' xulusédenę' na benne' xula.

3 Lue' dxal-la' gacu' benne' węn zrin du lazre' cheę Jesucristo, guchaga lau' xel-la zi' ca tu benne' zeje' wedil-la.

4 Netú benne' zeje' wedil-la, benne' xu'ę lu zrin cheę xrane', quebe dxunę' zrin xula, lawe' da dxaca lazre' xezaca ba lazre' xranę' chię'.

5 Cá'anqueze, benne' xu'ę lu witaj quebe zrue'ęne' da xexale' che quebe quítaje' ca naca cheę na.

6 Cá'anqueze benne' dxaza dxa'ana, benne' dxúnle'ę zrin, dxal-la' xezí' lu ne'ę lina cheę'.

7 Blaba lazre' ca da dxapa' lue', na' Xránadxu guzėjajni'ine' lue' xúgute na.

8 Bsa lazre' ca naca cheę Jesucristo, guquę' xrtia David, ne bebane' ládujla benne' gate, ca dxenná dizra' chawe' da dxuchálaja' neda'.

9 Ne cheę dizra' chawe' nigá dxedéa' xel-la zi', ne xu'a lizre xia nigá ca tu benne' węn da zrinna, san dizra' cheę Dios quebe nu seque' cu'u le' na lizre xia.

10 Cheę le' na' xúgute da ca' dxuchaga lawa' ne cheę benne' ca' ba gucá'a Dios le', cheę cá'anqueze benne' ca' xelelé' ne cheę Jesucristo, ne xellexú'ę lu xabáa chadía chacanna.

11 Da nigá naca na da li:

Che nuzúa cuínadxu gátedxu ca bzua cuina Le', cá'anqueze waca bandxu nen Le'.

12 Che dxededxu xel-la zi', na' nna béaquezdxu tu zren nen Le'.

Che quebe xechébedxu nácadxu bi cheę Le', cá'anqueze Le' quebe xechębę' nácadxu bi cheę'.

13 Che dxi'u quebe nácadxu li lazre', Le' nácaqueze' li lazre'.

Dios québequeze guchę'ę ca naque'.

### *Tu benne' węn zrin du lazre'*

14 Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra ljwezre quebe bi culuén napa na, san dxuxrinna na xichaj lázrdau benne' ca' dxelénne' na.

15 Ben ba xuzre gacu' węn zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li.



<sup>16</sup> Quebe gulapa na'u dizra' xálaze, ne dizra' sban da dxuluchálaje bénneache, da ca' dxulucuasa na bénneache lu da naca chee Dios.

<sup>17</sup> Dizra' sban caní dxuluxrinnaj na xichaj lázrdau bénneache ca dxun tu we' da dxuzru na lu bel-la' dxen cheedxu. Caní guca chee Himeneo, ne Fileto,

<sup>18</sup> benne' ca' gulecuase' lu xel-la li, na' dxelenné' ba belexebán benne' gate, na' dxuluxrinnaje' xel-la dxeajlí lazre' chee bal-la benne'.

<sup>19</sup> Dios ba gudixruij bi'e xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'e bi chie' ca' Cá'aqueze dxenná na: Xúgute bi ca' chee Cristo queébedxa dxal-la' xelune' da calela.

<sup>20</sup> Tu lu xu'u zaca, quegá zra' tuze zriga xé'ena da zaj naca na oro ne plata, san ca'aqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' zezícadxa da ca' dxuluchínene' ájateze.

<sup>21</sup> Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxe' ca naca da calela ca'.

<sup>22</sup> Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'ínu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu.

<sup>23</sup> Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

<sup>24</sup> Benne' wen zrin chee Xránadxu:

Quebe dxal-la' tíl-lalene' benne'.

Dxal-la' gaque' zri'i lazre' nen xúgute bénneache.

Dxal-la' gaque' benne' dxezeque' gusédené' bénneache.

Dxal-la' gaque' zren lazre',

<sup>25</sup> ne duté xel-la dxexruij lazre' gusízreng' benne' dxelune' da calela.

Caní dxal-la' gungé' che ba benla Dios xelexexéaje lazre' benne' ca chee xelúnbe'e da li,

<sup>26</sup> na' xelexé' lu xralaj chee da xriwe', naga nuzrá na le', na' dxelune' ca da dxenná le' na.

### 3

#### *Ca xelaca bénneache lu zra bzebe*

<sup>1</sup> Cá'aqueze dxal-la' nézele lu zra bzebe ni' gaca na stebe chee bénneache.

<sup>2</sup> Bénneache ca' xelaque':

Benne' xelexrí'ize cuina, ne xelexrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelenné' schanni' chee Dios,

ne quebe xuluzúe' dizra' chee xra xrne'e.

Xelaque' benne' quebe dxelezí le,

ne benne' quebe dxelapa ba lá'ana Dios.

<sup>3</sup> Quebe xelaque' zri'i lazre',

ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da naca xrlátaje.

<sup>4</sup> Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrente.

Xelexezaca ba lázredxenę' da ca' dxeledánenę' quézcala da naca cheę Dios.

<sup>5</sup> Lácala xululé'e cuinę' ca benne' zaj naque' cheę Dios, quebe súalę le' xel-la waca cheę Dios.

Quebe gunu' tu zrén benne' ca'.

<sup>6</sup> Ca zaj naca benne' caní zaj naca benne' ca' zjaque' tu tu xu'u, ne dxelezi xę'e nu'ula quebe zaj zie' du lazre', ne zaj zua da dxagu na zria lázrdawe' da naca cheę xtul-le'. Xel-la dxelezá lazre' cheę nu'ula caní nazrube xu na le'.

<sup>7</sup> Lácala tu dxulusédezqueze' cheę xel-la li, cabata' dxelėjni'iquezne' na.

<sup>8</sup> Ca belún Janes ne Jambres, benne' wazrá' ca', benne' ca' guledábague' Moisés, cá'aqueze dxelún benne' caní, dxeledábague' xel-la li. Zaj nazrinnaj xichaj lázrdawe', ne belexeuase' lu xel-la dxeajli lazre' cheę Dios.

<sup>9</sup> Quebe bi xelezre'e benne' caní, lawe' da xelexe bé'equeze xúgute bėneache zaj naque' benne' xálaze, ca gulaca benne' chupa ca' guledábague' Moisés.

### *Da bęębe da dxusebaga Pablo Timoteo*

<sup>10</sup> Ba benu':

Ca da bzėjni'ida' bėneache, ne blé'equeznu' ca bėnqueza'.

Nėzenu' da dxaca lazra' guna', ne ca dxeajli lazra' Cristo.

Bchaga lawa' da guxzaca', ne nazrí'ida' xúgute bėneache.

Nėzenu' ca naca xel-la zren lazre' chia'.

<sup>11</sup> Blé'enu' ca guláu zi' xuzre' neda', ne ca gudéa' xel-la zi'.

Nėzenu' xúgute da guzraca' lu xęzre Antioquía, ne xęzre Iconio, ne xęzre Listra.

Guláu zi' xuzre benne' ca' neda', na' Xránadxu bselé' neda' lu xúgute da ca'.

<sup>12</sup> Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bėneache le'.

<sup>13</sup> Benne' ca' dxelunę' da caleła, ne benne' dxelezi xę'e welúndxaqueze' da caleła. Xelezi xę'e bėneache, na' benne' xula xelezi xę'e benne' caní.

<sup>14</sup> Lue', guzė chacha ca da ba naxėjni'inu', da na' nuxrén lazru'. Nėzqueznu' nu bşęde lue',

<sup>15</sup> na' ne nácateu' bídau'tę ba núnbe'u da dxenná lu xiche lá'azxa, da dxęzeque na guzėjni'i na lue', cheę lau' lawe' da dxeajli lazru' Jesucristo.

<sup>16</sup> Xúgute da naxúaj na lu xiche lá'azxa naca na da bzėjni'i Dios benne' ca' zaj naque' bi cheę Le', ne naca na da dxuzėjni'i na dxi'u, ne da dxedil-la na benne' dxelunę' da caleła, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje,

<sup>17</sup> cheę gaca du lazre' bi cheę Dios, na' gácabe' bi nazeđe xanne cheę gunbe' xúgute da xrlátaje.

## 4

<sup>1</sup> Lau Dios, ne lau Xránadxu Jesucristo, Bėneea' guchi'e cheę benne' ban ca', ne cheę benne' gate ca' gate zę'e xedajnná be'e, dxusebaga' lue'

<sup>2</sup> guchálaju' dizra' cheę Dios, ne gunu' ba xuzre guchálaju' che xuluzé naga bėneache, ca xuluzé nague'. Bzėjni'i benne' ca' dute xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'.

<sup>3</sup> Caní dxal-la' gunu' lawe' da wazrín zra quėbedxa xuluzé naga bėneache cheę xel-la li da dxusėdędxu. Ca dxelezá lázrqueze le', xulunné' zane' benne' xulusėdene' le' ca da dxelaca lázreze le' xellenę'.

<sup>4</sup> Quėbedxa xuluzé nague' da li. Wuluzé nague' dizra' da dxuluzaze bėneache.

<sup>5</sup> Na' lue', bzeajni'i cuinu' lu xúgute da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

<sup>6</sup> Ba bzrin zra guzúa' xel-la nabán chia' lu na' Dios, lawe' da ba zua bagu xelutie' neda'.

<sup>7</sup> Du lazra' gudábaga' benne' ca' guledábague' da naca chee Cristo. Tu bénzqueza' ca naca da li chee', ne ba bexuzre bēna' da bsebaga Cristo neda' guna'.

<sup>8</sup> Lawe' da bēna' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunézruje' na chee benne' ca' dute xel-la zri'i lazre' chee' dxelebeze' zra xelé'e.

*Pablo dxulé'ene' Timoteo ca dxal-la' gunbe'*

<sup>9</sup> Ben ba xuzre xídazeu' xedajnná'u neda'.

<sup>10</sup> Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia.

<sup>11</sup> Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo.

<sup>12</sup> Tíquico gusel-la'-be' lu xezre Efeso.

<sup>13</sup> Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

<sup>14</sup> Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'.

<sup>15</sup> Bxue xanne cuinu' chee benne' nigá lawe' da ba gudábagale'e dizra' da dxuchálajdxu.

<sup>16</sup> Da nedxu lasa gate becheba' ca naca chia' lau benne' xu'u lawe' ca', netú benne' quebe gúcalene' neda'. Xúgute' buluzá' xíchaje' neda'.

<sup>17</sup> Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a beze xixre',

<sup>18</sup> na' guseláqueze' neda' lu xúgute da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

*Benne' chee Cristo dxulugapa diuzre ljwezre'*

<sup>19</sup> Dxugapa' diuzre Priscila, ne Aquilo, ne benne' zaj zra' lizre Onesíforo.

<sup>20</sup> Erasto begá'anabe' xezre Corinto, na' bcá'ana' Tróximo lu xezre Mileto lawe' da quebe chawe' zúabe'.

<sup>21</sup> Ben ba xuzre xidu' nigá dxácaté quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute bi bíchedxu zaj zre'e nigá dxulugape' lue' diuzre.

<sup>22</sup> Dxenaba' Xránadxu Jesucristo súalene' lue', ne dxenaba' Dios guné' da chawe' chee xúgutele le'e. ¡Ca'an gaca na!

## DIZRA' DA BZUAJ SAN PABLO CHEE TITO

### *Pablo dxugape' Tito diuzre*

<sup>1</sup> Neda', Pablo, naca' wen zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xeleajlí lazre' Cristo, ne xelúnbe' e da naca li lazre' chee da naca chee Dios,

<sup>2</sup> ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre',

<sup>3</sup> na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaquezé' weselá cheedxu.

<sup>4</sup> Dxuzúaja' da nigá chiu', Tito. Nacu' ca zrí'inequeza' lawe' da dxeajlí lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, guné' chiu' da cháwedau', ne xexache lazre' lue', ne gunne' lue' xel-la dxebeza zrí lazre'.

### *Zrin da dxun Tito lu xezr la xu Creta*

<sup>5</sup> Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xézredu ca', cáteze bxríseda' lue' gunu'.

<sup>6</sup> Tu benne' gula chee xudau':

Dxal-la' gaque' benne' quebe bi zua da gagu na chie'.

Dxal-la' súalene' tuze nu'ula.

Zrí'ine' dxal-la' xelácabe' bi ba dxéajlí lázrebe' Cristo.

Quebe bi da zrinnaj dxelún zrí'ine' ca',

ne quebe gaca nu gagu zria chee da dxelunbe'.

<sup>7</sup> Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bèneache.

Quebe dxal-la' gaque' benne' dxucúdee'.

<sup>8</sup> Dxal-la' súateze' si' lu ne'e benne' zjaque' lizre'.

Dxal-la' guné' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzéajni'i cuine'.

<sup>9</sup> Dxal-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' gusízreng' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

<sup>10</sup> Caní dxal-la' guné' lawe' da zrále'e benne' dxelenné' chee dizra' li, benne' dxelezi xé'e benne' xubla lu da xala da dxlenné'. Zane' benne' Israel dxelune' caní.

<sup>11</sup> Dxal-la' guzúa zriu' benne' dxelune' da caní lawe' da dxuluxrinnaje' xichaj lázxdau xúgute benne' zaj zra' tu tu xu'u naga dxelú'e chee xulusédene'

da quebe naca xrlátaje. Dxelunę' caní cheę xezezí' lu ne'e dumí. Da nigá da dxelunę' naca na da caleła.

<sup>12</sup> Tu benne' Creta naga zu', benne' gunné' waláz cheę xudau' cheę benne' ca', gunné': "Benne' Creta zaj nácaqueze' węn lazre', ne zaj naque' ca be snia ca', ne zaj naque' benne' wagu xrata', ne zrawęde."

<sup>13</sup> Da li gunné'. Cheę le' na' gudíl-laqueze benne' ca' cheę xelaque' li lazre' ca dxelejli lazre' Cristo,

<sup>14</sup> ne cheę quebe xuluzé nague' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzúe' chalá'ala dizra' li.

<sup>15</sup> Xúgute naca na xrlátaje cheę benne' ca' zaj naca xrlátaje xichaj lázrdawe', san cheę benne' ca' dxelunę' da sban, ne québedxa dxeléajle'e cheę Cristo, quebe bi de da naca xrlátaje. Zaj nazrinnaj xichaj lázrdawe'.

<sup>16</sup> Benne' caní dxeleńné' zaj núnbe'eng' Dios, san da dxelunę' dxulé'e na quebe naca da li da dxeleńné'. Zaj naque' benne' węn da sban, ne benne' węn da caleła, ne quebe xezezequene' xelunę' tu da xrlátaje.

## 2

<sup>1</sup> Dخال-la' guchálaju' da ca' dxusęde na dxi'u da naca li.

<sup>2</sup> Benne' gula cheę xudau':

Dخال-la' xelaque' benne' dxeleńná bé'e cuine'.

Dخال-la' xelaque' benne' du lazre'.

Dخال-la' xelaque' benne' dxuluzéajni'i cuine'.

Dخال-la' xelaque' li lazre' ca dxelejli lazre' Cristo,

ne ca zaj nazrí'ine' Le',

ne ca naca xel-la zren lazre' cheę'.

<sup>3</sup> Cá'anqueze nu'ula gula ca' cheę xudau':

Dخال-la' dxelapa ba lá'ana Dios ca naca xúgute da dxelunę'.

Quebe dخال-la' xelaque' benne' dxulutupe' dizra' bizruj.

Quebe dخال-la' xelaque' benne' dxele'aje' da xuzuzre na le'.

Dخال-la' xulusédenę' da naca xrlataje

<sup>4</sup> cheę gaca xulusédenę' nu'ula cuide' ca'

cheę xezezí'ine' benne' cheę' ca', ne zrí'ine' ca',

<sup>5</sup> ne cheę xelenná be'e cuine',

ne xelaque' du lazre',

ne xulupe'e lizre',

ne xuluzúe' dizra' cheę benne' cheę'.

Caní dخال-la' xelunę' cheę quebe nu nne' schanní' cheę xrtizra' Dios.

<sup>6</sup> Cá'anqueze bsizre bi cuide' ca' cheę xelenná be'e cuínabe'.

<sup>7</sup> Ca naca da xrlátaje dxunu' lue' dخال-la' gulé'e na benne' ca' ca dخال-la' xelunę'. Gate dxusédenu' benne' ca' dخال-la' gacu' li lazre', ne du lazre'.

<sup>8</sup> Dخال-la' guchálaju' da naca li lazre' cheę quebe nu seque' si tizra le' na. Che gunu' caní, na' che nu benne' nnie' cheęle, wedué'equenezę', lawe' da quebe sua tu da caleła da dxunle.

<sup>9</sup> Bzėjajni'i benne' ca' zaj nada'u cheę xuluzúe' dizra' cheę xranę' ca naca xúgute da xelé xranę' le'. Dخال-la' xelunę' da xelexezaca ba lazre' xranę', ne quebe xelexenné' lau xranę'.

<sup>10</sup> Quebe dخال-la' xelebane' da naca cheę xranę', san dخال-la' xelaque' li lazre', cheę xelelé'e benne' ca da dxelún benne' caní, na' xelenné' chawe' cheę xrtizra' Dios, Benne' weselá cheędxu.

<sup>11</sup> Dios ba blé'eng' ca naca da chawe' cheę' cheę xelelá xúgute bėnneache.

12 Da xrlátaje chee Dios dxusede na dxi'u chee québedxa gundxu da calela, ne ca naca xel-la dxezá lazre' da calela, san chee nna be'e cuinadxu, ne gácadxu du lazre', ne gápadxu ba lá'ana Dios lu xezr la xu nigá

13 dxácate ne dxebézadxu zra xelá' Dios szren, ne weselá cheedxu Jesucristo nen xel-la szren chee', da na' dxebeza lázredxu.

14 Le' bzua cuine' lu na' benne' ca' belútie' Le' waláz cheedxu dxi'u chee bselé' dxi'u lu xúgute da zrinnaj, na' bca'ana chawe' dxi'u chee gácadxu bi cheéqueze', ne chee gundxu da xrlátaje du lázredxu.

15 Da caní dxal-la' gusédenú' benne' ca'. Gudil-la benne' ca', ne bsizre-ne' duté xel-la dxenná bea chiu'. Quebe bi da calela gunu' chee quebe nu si tizra lue'.

### 3

#### *Da dxal-la' xelún benne' zaj nababe' chee Cristo*

1 Bsa lazre' benne' bíchedxu ca' chee xeluné' ca dxuluchixruij benne' ca' dxelenná bé'ene', ne benne' xu'u lawe', ne chee xuluzúe' dizra' chee benne' ca', ne chee xelezúe' xeluné' xúgute da xrlátaje.

2 Quebe dxal-la' xelenné chee nu benne', san dxal-la' xelaque' zren lazre', ne zri'i lazre', ne dxexruij lazre' lau xúgute bénneache.

3 Cá'unqueze dxi'u gate nate gúcadxu benne' xala, ne quebe bzúadxu dizra' chee Dios. Gudadxu calela, na' gunná be'e belá' dxen cheedxu dxi'u, chee bendxu ca naca xúgute da guzá lázredxu, ne da bezaca ba lázredxu. Bendxu da zrinnaj, ne gúcadxu xa lazre'. Belecuide bénneache dxi'u, na' bzrá'adxu ljuwézredxu tudxu xetudxu.

4 Gate Dios, weselá cheedxu, blé'ene' da naca chawe' chee', ne xel-la zri'i lazre' chee',

5 na' bselé' dxi'u, quegá lawe' da bendxu dxi'u tu da xrlátaje, san lawe' da bexache lazre' dxi'u. Bselé' dxi'u ne chee da gudibe na dxi'u gate na' bexálajdxu, na' bucube Be' Lá'azxa chee' dxi'u.

6 Ne chee Jesucristo, weselá cheedxu, Dios ba núnnalé'e dxi'u Be' Lá'azxa chee',

7 chee ne chee da naca chawe' chee' gácadxu xrlátaje lau Le', ne zrué'edxu xel-la nabán chadía chacanna da dxebeza lázredxu.

8 Da caní zaj naca na da li. Dxaca lazra' guszrequeznú' benne' ca' ca naca da caní chee xelebé' gunne xue xelún benne' ca' da chawe', benne' ca' dxelájle'e chee Dios. Da caní zaj naca na da xrlátaje, ne da gaca xuluchine xúgute bénneache.

9 Quebe gulapa na'u dizra' xala ca', ne dizra' dxuluzaze bénneache ca naca chee zra xrtawe', ne dizra' da dxun na bénneache chupa la'a, ne da dxulutil-la bénneache da naca chee da bchixruij be'e Moisés. Da caní quebe culuén zaj napa na. Dácheze naca na.

10 Che nu benne' dxuné' le'e chupa la'a, bsizre-ne' tu chupa lasa, ne che quebe dxenne' ca dxu'u le', bebéaje' ládujla le'e

11 lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzríá xi na le'.

#### *Da dxal-la' gun Tito*

12 Gate sel-la' Artemas u Tíquico naga zu', ben baxuzre xidu' xedajna'u neda' lu xezre Nicopolis lawe' da bache nuna' sua' nigá beu' zaga ca'.

<sup>13</sup> Gúcalē Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachínenē' cheē chjaque' lu neza cheē', na' quebe bi xelexázejene'.

<sup>14</sup> Cá'anqueze benne' zaj nabábalenē' dxi'u dxal-la' xulusédie' xelunē' da chawe', cheē xelácalenē' benne' dxelexázejene', cheē xelaque' benne' guchine Cristo.

*Pablo dxuzé' Tito dizra'*

<sup>15</sup> Xúgutē benne' zrálenē' neda' dxulugapē' lue' diuzre. Bgape diuzre benne' ca' zaj nazrí'ine' dxi'u lu da naca cheē Cristo. Dxenaba' Dios gun chawē'e xúgutēle le'e. ¡Ca'an gaca na!

## DIZRA' BZUAJ SAN PABLO CHEE FILEMÓN

### *Pablo dxugape' diuzre Filemón*

<sup>1</sup> Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'itē lázrentu'. Nacu' bi ljwézrentu' lu zrin chee Cristo.

<sup>2</sup> Dxugapa' diuzre benne' bíchedxu ca' dxelezrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo.

<sup>3</sup> Dxenaba' Xradxu Dios ne Xránadxu Jesucristo gune' da chawe' chee, ne gunne' le'e xel-la' dxebeza zri lazre'.

### *Ca naca chee Filemón*

<sup>4</sup> Dxápequeza' Dios xcalenu' gate dxuchálajlena' Le' ne dxeajsá lázrqueza' lue',

<sup>5</sup> lawe' da ba benda' ca nazrí'inu' Xránadxu Jesucristo ne ca dxeajlí lazru' Le', ne ca nazrí'inu' xúgutē bi ca' chee Dios.

<sup>6</sup> Dxenaba' lau Dios guzējajni'ine' benne' ca' dxelejálí lazre' Le' ne chee xel-la' dxeajlí lazre' chiu', ca naca xúgutē da chawe' ca' da nápadxu ne chee Jesucristo.

<sup>7</sup> Xel-la' zri'i lazre' chiu', bi bicha', dxúnna'le'ē na neda' xel-la' dxebé, ne dxutipá na lazra', ca dxutipá na lazre' xúgutē bi chee Dios.

### *Pablo dxenabe' Filemón tu da gune' chee Onésimo, bi na'u Filemón*

<sup>8</sup> Chee le' na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo,

<sup>9</sup> dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo.

<sup>10</sup> Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

<sup>11</sup> Gate nate Onésimo, bi na'u lue' gúcabe' tu bi wen' da calela, san na'a nácabe' wen' zrin li lazre' chiu' lue', ne chia' neda'.

<sup>12</sup> Dxesel-la'-be' naga zu'. Bezí' lu na'u-be', nácabe' bi nazrí'itē lazra'.

<sup>13</sup> Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatē ne xu'a lizre xia lawe' da dxuna' zrin chee dizra' chawe'.

<sup>14</sup> Quebe dxaca lazra' bi guna' che quebe naca na da nnau' lue', chee gácalenu' neda' lawe' da naca na ca dxaca lazru' lue', ne quegá lawe' da dxenná be'eda' lue'.

<sup>15</sup> Becuasa Onésimo nen lue' tu chí'idau', san na'a súaletequezebe' lue',

<sup>16</sup> quegá ca tu bi na'u lue', san gácabe' tu bi cháwedxa ca tu bi na'u lue', da zéaje na, gácabe' tu bi bichu' nazrí'itē lazru'. Neda' nazrí'ilē'ēda'-be', san lue' dxal-la' zrí'idxenu'-be', quegaze ca bēnneacheze, san cá'anqueze ca bi bíchedxu, bi chee Cristo.

<sup>17</sup> Chee le' na', che dxéquenu' neda' ca bi ljwezru', bezí' lu na'u-be' ca dxezí' lu na'u neda'.

<sup>18</sup> Che bi da calela ba benbe' chiu', u che bi dxál-labe' chiu', neda' quízruja' na.

<sup>19</sup> Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'.



<sup>20</sup>Lue', bi bicha', dxata' xúeda' lue' lu La Xránadxu, bēn da guzúa na neda' lu da ba neza.

<sup>21</sup>Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'.

<sup>22</sup>Cá'unqueze bcueza latja naga sua' neda' lawe' da dxebeza lazra' gun Dios da dxenábale Le', gunne' neda' lataj xida' xedajnná'a le'e.

*Bi cheę Cristo dxulugápabe' diuzre Filemón*

<sup>23</sup>Epafras, bi ljwezra', xú'ulebe' neda' lizre xia lawe' da dxunbe' zrin cheę Jesucristo,

<sup>24</sup>ne Marcos, ne Aristarco, ne Demas, ne Lucas, bi ca' dxelácalebe' neda' lu zrin cheę Cristo dxulugápabe' lue' diuzre.

<sup>25</sup>Dxenaba' lau Xránadxu Jesucristo gunę' da chawe' cheęle le'e. Ca'an gaca na.

## DIZRA' DA NAZÚAJ CHEE BENNE' HEBREO CA'

*Dios ba bchálajleñe' dxi'u lu dxu'a Zrí'inequeze'*

<sup>1</sup> Dios bchálajleñe' xra xrtáudxu ca' gate nate zane' lasa, ne zane' ca bchálaje' lu dxu'a benne' ca' buluchálaje' waláz chee'.

<sup>2</sup> Na'a, lu zra caní, Dios ba bchálajleñe' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute da ca' bene'.

<sup>3</sup> Zrí'ine Dios nigá naque' Benne' dxulé'ene' ca naca xel-la' szren chee Dios, ne naque' ca da nácaqueze Dios, na' nuxre' xúgute da ca' nune', dxuchínene' dizra' chee' da nápale'e na xel-la' waca. Gate ba gudúe' dul-la da nabágadxu xeajxedxe'e chalá'a xabêla chee lataj blau chee Dios xabáa.

*Zrí'ine Dios nácadxe' blau ca gubáz chee xabáa ca'*

<sup>4</sup> Zrí'ine Dios nácadxe' blau ca gubáz chee xabáa ca' chee Dios, ca naca La Cristo da bzua Dios, nácadxa na blau ca la gubáz chee xabáa ca'.

<sup>5</sup> Dios cabata' guzre' tu gubáz chee xabáa ca guzre' Cristo, gunné': Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee xabáa ca gunné' chee Cristo:

Neda' gaca' Xre',

na' Le' gaque' Zrí'ina'.

<sup>6</sup> Gate bzue' Zrí'ine' lu xezr la xu nigá, gunné':

Xúgute gubáz chee xabáa ca' xelue lá'ane' Le'.

<sup>7</sup> Ca naca chee gubáz chee xabáa ca', Dios gunné':

Dsesel-le' gubáz chee' ca' ca tu be' da dxaca,

ne dxuchínene' gubáz wen zrin chee' ca' ca tu xi'.

<sup>8</sup> Ca naca chee Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaje.

<sup>9</sup> Nazri'inu' da xlátaje, ne dxezra'u da calela.

Chee le na' Dios chiu' ba bennadxe' Lue'

xel-la dxebe' ca da bnézruje' bi ljwezru' ca'.

<sup>10</sup> Cá'anqueze guzre' Le':

Lue', Xran, nédxudaute' benu' xezr la xu.

Nen xel-la' waca chiu' benu' xabáa.

<sup>11</sup> Da caní weledé chee na, san Lue' súatequezu'.

Xúgute da caní welaca gula ca zra lana bénneache.

<sup>12</sup> Na' xutubu' na ca tu ladxe',

ne gucha'u na ca dxun tu benne' dxuché'e zra lané'.

Lue' zúaquezu' chadía chacanna,

na' xel-la' nabán chiu' quebe téqueze chee na.

<sup>13</sup> Dios cabata' guzre' tu gubáz chee xabáa ca guzre' Zrí'ine', gunné':

Gudxe'e chalá'a xabêla chia',

cadxa guzúa' benne' ca' dxeledábage' Lue' zran ni'u.

<sup>14</sup> Xúgute gubáz chee xabáa ca' zaj naque' be' ca' dxelún zrin chee Dios, na' dxesel-le' gubáz chee xabáa ca' chee xelácalene' benne' ca' dxelezi'e xel-la' weselá.

## 2

*Quebe dxal-la' guzúadxu chala'ala xel-la' weselá*

<sup>1</sup> Chee le na' dxal-la' nna' xánnedxu dizra' da ba bendxu chee quebe cuásadxu lu neza chee xel-la' li.

<sup>2</sup> Dizra' dá gusel-la Dios gate nate lu na' gubáz chee xabáa ca' guca na li lazre', na' xúgute benne' ca' buluzúe' na chala'ala, ne quebe buluzúe' dizra' ca da gunná Dios, Dios bde'e' le' xel-la' zi' ca da dxal-la' xezezi'e.

<sup>3</sup> ¿Ájazra gaca ladxu che guzúadxu chala'ala tu xel-la' weselá zren caní? Xránaquezdxu bchálej' chee xel-la' weselá nigá nédxute, na' gudé na' buluchálaj benne' ca' belenne' na, na' gulenné' naca na da li laudxu dxi'u.

<sup>4</sup> Cá'anqueze ba bzua chacha Dios na ne chee da dxelunna bea na, ne ne chee da zren ca' ben Dios, ne ne chee xel-la' waca zan ca', ne ne chee Be' Lá'azxa, Bénnea' benne' dxi'u xel-la' waca ca', ca da guca lázrequeze Le'.

*Jesucristo ben cuine' ca nácadxu dxi'u*

<sup>5</sup> Dios quebe bzue' lu na' gubáz chee xabáa ca' xezr la xu da za za', chee da na' dxuchálajdxu na'a.

<sup>6</sup> Naca na ca naxúaj na lu xiche lá'azxa, ca da gunná tu benne':

¿Ájazra naca bénneache che Lue', Dios, dxeajsá lazru' chee'?

¿Ájazra naca bénneache, che Lue' dxe'u gunne xue chee le'?

<sup>7</sup> Tu chí'idau'ze bzu' bénneache látezdxa ca gubáz chee xabáa ca'.

Nunu' chee' si'e xel-la' szren, ne xel-la' ba lá'ana, ne bzu' lu ne'e xúgute da benu'.

<sup>8</sup> Xúgute ba bzu' na zran ni'a le'.

Caní naca, gate Dios bzue' xúgute zran ni'a bénneache, quebe bi de da quebe guzúa na dizra' chee bénneache, na' quebe ne xuluzúa ca naca da ca' dizra' chee'.

<sup>9</sup> Na'a dxelé'edxu Jesús, Bénnea' bzua Dios guque' tu chí'idau' látezdxa ca gubáz chee xabáa ca'. Dios gúne'e' gate Jesús waláz chee xúgute bénneache lawe' da nazri'ine' bénneache, na' na'a nunézruje' Le' xel-la' szren, ne xel-la' ba lá'ana lawe' da gudé' lu xel-la' gute zi xa'.

<sup>10</sup> Dios bene' xúgute da zaj zua, na' zaj zua na chee gaca ba Le'. Le' dxaca lazre' xezezi' xúgute bi chee' ca naca xel-la' szren chee'. Chee le na' ben na ba xen ben Dios naca Jesucristo duté weselá cheedxu, ne chee da zi' da xa' da gudé' chee séquene' guselé' bénneache chadí chacanna.

<sup>11</sup> Benne' caní dxe'gúa Jesús dul-la da zaj nabague', na' benne' caní, ne Léqueze' zaj naque' bi ca' chee tuze Xradxu. Chee le na' quebe dxedu'e Jesús nne' chee benne' ca', zaj naque' bi biche'.

<sup>12</sup> Naca na ca dxenná lu xiche lá'azxa:

Guchálajqueza' da naca chiu' Lue' lávela bicha' ca',

na' gúl-laqueza' da gie lá'ana' Lue' ládujla benne' ca' zaj nazrague' lau Lue'.

<sup>13</sup> Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

<sup>14</sup> Lawe' da zaj naca be'la' dxen benne' ca' zaj naque' bi chee', Le' ben cuine' be'la' dxen chee guzéquene' gutié', ne caní bene' chee séquene' guzríá xi'e da xriwe', da na' napa na xel-la' dxenná bea gute na bénneache.

<sup>15</sup> Caní guca bselé' xúgute benne' gulaque' ca benne' zaj nada'u xúgute iza zaj naca bane' lawe' da belezrebe' xel-la' gute.

16 Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham.

17 Chee le na' ben na ba xen guque' dute ca zaj naca bi biche' ca', chee séquene' gaque' lau Dios tu bxruze blau naque' li lazre', ne dxexache lazre' bèneache, ne chee séquene' gun cuine' tu da dxegúa na dul-la zaj nabaga bèneache.

18 Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na'a gácalene' benne' ca' dxun zréaje da xriwe' le'.

### 3

#### *Jesús nácadxe' blau ca Moisés*

1 Le'e, benne' bícha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bénnea' gusel-la Dios chee gaque' bxruze blau chee da dxéajledxu.

2 Jesús nigá guque' li lazre' lau Dios, Bénnea' bzue' Le' lu zrin na' da ba bene', ca guca Moisés, guque' li lazre' lu zrin na' bene' lau benne' ca' gulaque' bi chee Dios.

3 Jesús dxal-la' sidxe' xel-la' ba lá'ana ca da si' Moisés, ca dxaca chee benne' dxune' tu xu'u, dxezidxe' xel-la' ba lá'ana ca da dxezí' xu'u ná'queze.

4 Tu tu xu'u naca na da ben benne', san Dios nuné' xúgute da zaj zua.

5 Ca wen zrin chee Dios guca Moisés li lazre' lu zrin na' bene' lau benne' ca' gulaque' bi chee Dios, na' bchálaje' ca naca da nne Dios ca te na'.

6 Cristo naque' li lazre' ca Zrí'inequeze Dios laudxu dxi'u. Nácadxu ca lizre Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

#### *Bi ca' chee Dios xelexezí' lazre' naga zua Dios*

7 Caní naca, naca na ca da dxenná Be' Lá'azxa lu xiche lá'azxa, dxenné': Na'a, che le'e dxenle ca da dxenná Dios,

8 quebe gácale lázrdau zide' ca gulaca benne' ca' guledábague' Dios, na' belune' Dios zede le'e xixre' lawe' lataj.

9 Belún xra xrtaule ca' neda' zede chee guna' ca gunnía', lácala belelé'ene' da bēna' lávela chua iza.

10 Chee le na' bzra'a xichja' benne' ca', na' gunnía': Tu dxelebéaj xíchajzqueze benne' caní neda', ne dxeledábague' ca naca da bdxíruja'.

11 Chee le na' bzra'a xichja' benne' ca', ne bzua chúchua' da gucha' benne' ca', gunnía' quebe xelexú'e naga xelexezí' lazre' naga zúaqueza' neda'.

12 Le'e, benne' bícha'dau', le guxúe cuínale chee quebe gaca lázrdau zide' netule le'e, quebe cuásale lau Dios ban lawe' da quebe dxéajle chee Le'.

13 Le gutipa lázrele tule xetule tu zra tu zra, dxácaté ne zúadxu lu zra da nunna Dios dxi'u, chee quebe si xé dul-la netule le'e, na' gácale lázrdau zide'.

14 Che se cháchadxu ca zrin zra cheajsé cheedxu ca naca da dxuxrén lázrequezdxu nédxute, na'a nácadxu bi chee Cristo.

15 Naca na ca dxenná na lu xiche lá'azxa:

Na'a, che le'e dxenle ca da dxenná Dios, quebe gácale lázrdau zide' ca gulaca benne' ca' guledábague' Dios.

16 ¿Nuzra benne' ca' belenne' dizra' chee Dios, na' ca gudé na' guledábague' Dios? Zaj naca xúgute benne' ca' bebéaj Moisés lu xezr la xu Egipto.

17 ¿Nuzra benne' ca' bzra'a Dios le' lávela chua iza? Zaj naca benne' ca' belún dul-la, na' gulátie' le'e xixre' lawe' lataj.

18 ¿Nuzra benne' ca' bzua chuchu Dios xrtizre' gate guzre' le' quebe xelexú'e naga xelexezí' lazre' naga zua Le'? Zaj naca benne' ca' guledábage' xrtizra Dios.

19 Na'a dxelé'edxu quebe guca xelexú'e lawe' da quebe guléajle'e chee Le'.

## 4

1 Caní naca, dxácatę ne zua cheędxu da nachębe lazre' Dios cheę xexú'udxu naga xezí' lázredxu naga zua Dios, dxal-la' guxúe cuínadxu gagáze nule le'e quebe xexú'ule.

2 Cá'anqueze dxi'u ba bendxu dizra' chawe' cheę Dios ca da belén benne' ca', san benne' ca' quebe bi da ba neza gulezí'e cheę dizra' da belenne' lawe' da quebe guléajle'e cheę na.

3 Dxi'u ba guxéajleđdxu, na' chú'udxu naga xezí' lázredxu, ca da gunná Dios gate gunné':

Cheę le' na' bzra'a xichja' benne' ca',

na' bzua chúchua' da gucha' benne' ca', gunná':

Quebe xelexú'e naga xelexezí' lazre' naga zua neda'.

Caní gunná Dios lácala ba bsexuzre' zrin cheę' gate na' bęte' xęzr la xu,

4 lawe' da naxúaj na lu xiche lá'azxa ca naca cheę zra gazre', dxenná na:

Lu zra gazre bezí' lazre' Dios lu zrin da bęne'.

5 Xetú dizra' da naxúaj na lu xiche lá'azxa dxenná na:

Quebe xelexú'e naga xelexezí' lazre' naga zua neda'.

6 Benne' ca' belenne' dizra' chawe' níga cheę Dios nédxute quebe belexú'e lawe' da quebe buluzú'e dizra' ca naca da gunná Dios. Na'a ne zaj zra' benne' dxal-la' xelexú'ueze' naga xelexezí' lazre'.

7 Cheę le' na' Dios ba guléajle' xetú zra, gunné': Na'a zra. Caní naca lawe' da dxuchálajle' Dios dxi'u dxuchínene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios,

quebe gácale lázrdau zide'.

8 Chela belexezí' lazre' benne' ca' bę Josué lataj gulu'e xęzr la xu na', quegá guchálajdxu Dios cheę xetú zra.

9 Caní naca na, de' lataj xelú'u bi ca' cheę Dios naga xelexezí' lazre' naga zua Dios,

10 lawe' da xezí' lazre' lu zrin dxun nu benne' chu'e naga xezí' lazre' naga zua Dios, ca bęn Dios, bezí' lazre' lu zrin bęn Le'.

11 Dخال-la' gun zi lázredxu séquedxu chú'udxu naga xezí' lázredxu gagáze nu benne' gunę' ca belún benne' ca' quebe guléajle'e.

12 Dizra' cheę Dios naca na da bane, ne napa na xel-la' waca. Naládxu na ca tu xia da nalá na dxupa la'ate, ne dxaze na naga dxelezraga bęnne' du xú'udxu, ne be' nácaquezdxu, ne dxaze na lu xichaj lázrdau bęnneache, na' dxuchi'a na ca naca da dxugú'u bea bęnneache ne ca da dxéquene' gunę'.

13 Quebe bi de' da bęn Dios da seque' gucache cuina na lau Dios. Xúgutę zaj nalá' na, ne zaj naxalaj na lau Bęnnea' dxal-la' xulé'edxu Le' ca da bęndxu.

### *Jesús naque' bxruze blau zrentę*

14 Jesús, Zri'ine Dios naque' bxruze blau zrentę cheędxu, Bęnnea' ba bexu'e lau Dios. Cheę le' na' dxal-la' se' típadxu lu da dxéajleđdxu cheę Dios.

<sup>15</sup> Bxruze blau cheędxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheędxu, lawe' da gudéqueze Le' lu xel-la' zi' ca' gate guca lazre da xriwe' gun zrėjae na Le', ca da dxededxu dxi'u na'a, na' Le' quebe bene' dul-la.

<sup>16</sup> Cheę le' na' dxal-la' bígadxu du lázredxu lu lataj blau cheę Dios cheędxu, Bénnea' nazri'ine' dxi'u, cheę xexache lazre' dxi'u, ne dutę xel-la' xrlátaje cheę gácalęne' dxi'u gate nachínedxu nu gácalę dxi'u.

## 5

<sup>1</sup> Tu tu bxruze blau dxecá'a Dios ládujla bénneache, ne dxuzúę' le' cheę gunę' zrin lau Dios waláz cheę bénneache ca', ne cu'e guna' lau Dios, ne gutię' béadu ca' ne cheę dul-la zaj nabaga' bénneache.

<sup>2</sup> Cá'anqueze bxruze blau nigá dxate ni'a ne'e lu da ca' dxune' ca da dxaca cheędxu dxi'u. Cheę le' na' wape' xel-la' zren lazre' cheę benne' ca' quebe dxelėjni'ine', ne dxelunę' da calęla,

<sup>3</sup> na' lawe' da dxate ni'a ne'e, dxal-la' gutię' béadu ca' ne cheę dul-la da nabáaqueze', cáteze dxune' ne cheę dul-la da zaj nabaga xezícadxa bénneache.

<sup>4</sup> Quebe nu gaca gun cuina bxruze blau, san Diósqueze dxenné' bénnea', ne dxunézruje' le' xel-la' szren na', ca bene' cheę Aarón.

<sup>5</sup> Cá'anqueze naca na cheę Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le':

Lue' nacu' Zri'ina'.

Neda' nácaqueza' Xrau' na'a.

<sup>6</sup> Cá'anqueze naxúaj na lu xiche lá'azxa ca guzre' Le':

Lue' nacu' bxruze blau chadía chacanna

ca gúcaqueze Melquisedec.

<sup>7</sup> Gate zua Cristo lu xęzr la xu nigá, bchálajlene' Dios, ne guta' xuene' Dios nen chi'e zizraj, ne gudxézrele'e, lawe' da napa Dios xel-la' waca guselé' Le' lu xel-la' gute, na' Dios benne' cheę' lawe' da gudape' Xre' ba lá'ana.

<sup>8</sup> Ca'an guca, lálaca naca Cristo Zri'ine Dios, bsédię' guquę' wezúa dizra' ne cheę xel-la' zi' da gudéę',

<sup>9</sup> na' gate guquę' dutę Weselá cheędxu ne cheę da caní, nadxa guzéquene' bselé' bénneache chadía chacanna, benne' ca' dxuluzúę' dizra' cheę',

<sup>10</sup> na' Dios bzue' Le' bxruze blau ca gúcaqueze Melquisedec.

### *Quebe dxal-la' gusandxu xel-la' dxeajlí lazre' cheędxu*

<sup>11</sup> Déle'e da dxal-la' guchálaja' ca naca cheę da nigá, san naca na stębe guzėjni'ida' le'e na'a, lawe' da quebe ne gaca chėjni'ile na.

<sup>12</sup> Zane' iza ba guca dxėjlele cheę Cristo, na' ba gul-la' gusédele benne' xula ca naca cheę Le', san dxun na ba xen nu guzėjni'i le'e da xula da quebe nácateca stębe ca naca dizra' cheę Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu cheę benne' waca.

<sup>13</sup> Benne' ca' zaj naca ca bidau' ne dxázrebe' nizre' zaj naquę' benne' ca' quebe ne xuluchínene' dizra' cheę xel-la' li.

<sup>14</sup> Xel-la' wagu cheę benne' waca naca na cheę benne' ca' ba zaj nézene' xelexúnbe'e da naca da xrlátaje, ne da naca da calęla.

## 6

<sup>1</sup> Cheę le' na' québedxa dxal-la' gusédedxu ca da bsédedxu nédxute ca naca cheę Cristo, san chėjtezedxu gusédedxu da naca cheę cheę gácadxu benne'

waca. Québedxa bi dxal-la' guchálajdxu chee da du ca' da bsédedxu nédxutę, ca dxal-la' xexéaje lázredxu chee da ca' bendxu da zaj nua na xel-la' gute, ne ca dxal-la' chéajędxu chee Dios,

<sup>2</sup> ne ca dxal-la' xedxúadxu nisa, ne ca dxal-la' xuluzę ne'e xíchajdxu, ne ca xelexebán benne' gate, ne ca gun Dios, guchi'e da nun tu tu bénneache chee gude'e benne' ca' dxelunę da calela lu lataj ba xa' chadía chacanna.

<sup>3</sup> Chee le na' chéajędxu lu da naca chee Cristo, che Dios gunne' dxi'u lataj.

<sup>4</sup> Benne' ca' ba gulezí'e ca naca xel-la' naxaní' chee Dios, ne ba gulezú lawe' xelúnbe'e da dxunna Dios, ne ba gulezí'e Be' Lá'azxa,

<sup>5</sup> ne ba gulezú lawe' xelúnbe'e da xrlátaje ca' chee Dios ca naca da xelezí'e lu xęzr la xu da za za',

<sup>6</sup> na' te na' che xuluzę' Dios chalá'ala, québedxa gaca xelexexéaje lazre' lawe' da gaca na ca xuludę' Cristo le'e xaga begúaj da xula, ne dxelún le' chee' lávela xúgutę bénneache.

<sup>7</sup> Zaj naque' ca xęzr la xu da dxezí na nisa xiuj. Che xęzr la xu na' dxunna lina chawe' chee benne' dxelunę' na zrin, naca na da dxun chawe' Dios,

<sup>8</sup> san che dxachuj na xeche', ne xixre' da quebe bi culuén napa na, quebe bi zaca xęzr la xu na', san naca na tu da xu'u de', na' naga chéajsetę chezxe na.

### *Xel-la' dxebeza lazre' da nápadxu*

<sup>9</sup> Le'e, benne' bícha'dau', lálaca dxuchálajntu' caní, dxuxrén lázrentu' ca naca chee le'e wazile le'e da chawe' chee xel-la' weselá.

<sup>10</sup> Dios dxunę' da xlátaje, ne quebe gal-la lazre' ca naca zrin da ba benle, ne ca bzri'ile Le' gate gúcalęle benne' bíchedxu ca', ne ca da tu dxúnzquezle.

<sup>11</sup> Dxaca lázrentu' chéajęze tu tule gunle da caní dutę lázrdaule ca zrin zra cheajsę cheele, chee zrué'ele da dxebeza lázrele.

<sup>12</sup> Quebe dxaca lázrentu' xewédele. Dxaca lázrentu' gunle le'e ca belún benne' ca' guleajl lazre' Dios, ne gulaque' zren lazre', na' gulezí'e ca da guchebe lazre' Dios gunęzruje' chee'.

<sup>13</sup> Gate guchebe lazre' Dios bi gunęzruje' chee Abraham, na' bzétajqueze cuine' lawe' da québedxa nu zua nácadxa szren ca Le', nu guzétaje',

<sup>14</sup> gunné': "Da li gúnqueza' da chawe' chiu' lue', ne guzánqueza' zri'ine zre su'."

<sup>15</sup> Abraham guleze' dutę xel-la' zren lazre', na' chee le na' guzi'e da guchebe lazre' Dios gunęzruje' chee'.

<sup>16</sup> Gate nu dxuluzetaj bénneache, dxuluzétaje' benne' nácadxę' szren ca léqueze', ne gate bi dxuluzúa chúchuę', ne dxuluzétaje' Dios, québedxa bi de da bi xelenné'.

<sup>17</sup> Chee le na' Dios bzua chúchuę' da guchebe lazre', ne bzetaj cuine', lawe' da guca lazre' gulé'ene' benne' ca' xelezí'e da guchebe lazre', Le' gunę' ca naca da guchebe lazre', ne quebe guchę'e ca gunę'.

<sup>18</sup> Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee da ca' Dios ba nunne' dxi'u tu da gun na dxi'u dipa lazre', dxi'u na' ba nézedxu dxuxúę Le' dxi'u, ne nuxrén lázredxu si' lu nnadxu da dxebeza lázredxu ca naca da gunne' dxi'u.

<sup>19</sup> Da nigá dxebeza lázredxu nuxru xacha na bénne'du xú'udxu ca dxun tu xia da dxuxru xacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúalę na Cristo cuzru ladxe' da zę lu xudau' da zua xabáa,

<sup>20</sup> naga guxú'u Jesús waláz cheedxu chee gusalaje' neza naga tedxu, na' Le' naque' tu bxruze blau chadía chacanna ca guca Melquisedec.

## 7

### *Jesús naque' bxruze blau ca guca Melquisedec*

<sup>1</sup> Melquisedec nigá guque' wenná bea chee xezre Salem, ne bxruze chee Dios szrentę. Gate ze za' Abraham lu wedil-la gate bzétaje' benne' wenná bea ca', na' Melquisedec nigá xeajchague' le', ne gunabe' lau Dios gunę' da chawe' chee Abraham,

<sup>2</sup> na' Abraham bnéruje' chee le' tu cue' chee da chi cue' ca' ca naca da bzrué'eng' lu wedil-la na'. La Melquisedec zéaje na wenná bea xlátaje, ne lawe' da guque' benne' wenná bea chee xezre Salem, da zéaje na xel-la' dxebeza zri lazre', le' zéajequeze na wenná bea chee xel-la' dxebeza zri lazre'.

<sup>3</sup> Quebe naxúaj na zua xre', ne xrnę'e, ne xra xrtawę', ne quebe naxúaj na che gúlaje', ne che gutię'. Caní naca na, da guca Melquisedec dxulé'e na ca naca chee Zri'ine Dios, naque' bxruze blau chadía chacanna.

<sup>4</sup> Le na' xque na'a ca szren guca Melquisedec, che bnezruj xra xrtáudxu Abraham chee le' tu cue' chee da chi cue' chee da guquę'e lu na' wenná bea ca' lu wedil-la na'.

<sup>5</sup> Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xelezí'e tu cue' chee da chi cue' ca' da xelizruj benne' Israel ca', benne' zaj naque' xrtia ljwezre', lácala zaj naque' zri'ine zre sua Abraham ca zaj nácaqueze benne' ca'.

<sup>6</sup> Melquisedec, benne' quebe naque' xrtia Leví guzi'e tu cue' chee da chi cue' ca' da gudizruj Abraham, bėnnea' dxal-la' si'e da guchebe lazre' Dios. Cá'anqueze Melquisedec gunabe' lau Dios gunę' da chawe' chee Abraham,

<sup>7</sup> na' dxelenná xúgutę bėnneache nácadxa blau bėnnea' dxenabe' lau Dios gunę' chawe' chee benne' xula ca' quézcala bėnnea' si'e da chawe' na' dxenabe'.

<sup>8</sup> Na'a benne' ca' dxelezi'e tu cue' chee da chi cue' ca' zaj naque' benne' dxelate, san ca naca chee Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutię'.

<sup>9</sup> Ca naca chee Leví, ne ca naca chee xúgutę bxruze ca' zaj naque' zri'ine zre sua Leví na', benne' ca' dxelezi'e na'a tu cue' chee da chi cue' ca', wácaqueze nnadxu cá'anqueze benne' caní gulízruje' chee Melquisedec tu cue' chee da chi cue' gate na' bezrague' Abraham,

<sup>10</sup> lawe' da wazeque' nnadxu ne zaj zua zri'ine zre sua Abraham lu bęl-la' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

<sup>11</sup> Benne' Israel ca' gulezí' lu ne'e da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzúe' dizra' chee da bdxixruj bea Dios na', na' quebe ben na ba xen la' xetú bxruze ca guca Melquisedec, ne quegá ca guca Aarón.

<sup>12</sup> Che xezrá' ca dxal-la' gaca bxruze na', na' dxál-la'queze xezrá' da nadxixruj bea na'.

<sup>13</sup> Xránadxu, Bėnnea' naxúaj na chee' gaque' bxruze ca guca Melquisedec, nababe' xetú cue' xrtia Israel ca', benne' ca' netue' quebe ne gaque' bxruze.

<sup>14</sup> Naca bea na nababa Xránadxu xrtia Judá, na' Moisés quebe gunnę' xelaca benne' caní bxruze.



15 Da nigá naca béadxá na che bxrúze cube na' dxal-la' gaque' ca guca Melquisedec,

16 ne bxrúze cube nigá quebe gaque' bxrúze ne chee' tu da nadxiruj bea da dxenná na nu xrtia dxal-la' gaque'. Gaque' bxrúze lawe' da nape' xel-la' waca chee' tu xel-la' nabán da quebe te chee' na.

17 Naca chee' ca da dxenná Dios:  
Lue' nacu' bxrúze chadíá chacanna  
ca da guca Melquisedec.

18 Caní guca, bedxúaj chala'ala da bdxiruj bea Dios gate nate lawe' da quebe guzeque' bi gun na, ne quebe bi culuén gudapa na,

19 lawe' da quebe guca da gunná bea Moisés gun na bènneache li lazre'. Na'a nápadxu tu xel-la' dxebeza lazre' da cháwedxa, na' ne chee' na dxebigadxu lau Dios.

20 Gate Dios bene' Jesús bxrúze, bzetaj cuine'.

21 Quebe bzetaj cuine' gate bzué' xezícadxa bxrúze ca'. Gate bene' Jesús bxrúze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxrúze chadíá chacanna  
ca da guca Melquisedec."

22 Chee' le' na' Jesús dxun chúchue' tu xel-la' wezría da nácadxa chawe' ca da nedxu.

23 Xezícadxa bxrúze ca', benne' gulezrá' nédxula ben na ba xen gulaque' benne' zan lawe' da gulate tu tué', na' quebe guca xeledié'.

24 Jesús naque' tu bxrúze chadíá chacanna lawe' da quebe gatie'.

25 Chee' le' na' dxezéquene' guselé' chadíá chacanna benne' ca' xelegibe' lau Dios ne chee' Le', lawe' da naca ban Le' chadíá chacanna chee' gudé' dizra' chee' benne' ca' lau Dios.

26 Jesús naque' bxrúze blau, bxrúze na' dxechínedxu. Naque' lá'azxa, ne quebe bi da caléla bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute da zaj zua xabáa.

27 Quebe naque' ca xezícadxa bxrúze ca', benne' ca' ben na ba xen belutie' béadu ca' tu zra tu zra, béadu ca' buluzúé' nedxu ne chee' xtúl-laqueze', na' ca gudé na' buluzúé' béadu xula ca' ne chee' xtul-la bènneache. Jesús tu lásaze bzua cuine' ne chee' dul-la zaj nabaga xúgute bènneache.

28 Da bdxiruj bea Moisés dxuzúa na bxrúze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé bla' da nadxiruj bea na', bzué' tu bxrúze blau naque' Zrí'inequeze', Bènnea' ben Dios naque' tu bxrúze blau li lazre' chadíá chacanna.

## 8

### *Jesús naque' bxrúze blau cheedxu*

1 Da naca blaudxa chee' da caní dxennantu' naca na da nigá: Zua tu bxrúze blau cheedxu caní, Bènnea' dxe'e chala'a xabéla chee' lataj blau chee' Dios xabáa,

2 ne naque' bxrúze blau dxune' zrin lu lataj lá'azxa li, da ben Xránadxu, quegá bènneache.

3 Xúgute bxrúze blau nuzúa Dios le' chee' xelegú'e guna' lau Dios, ne xelutie' béadu ca' lau Dios. Chee' le' na' dxun na ba xen bí guzúa Cristo lau Dios.

<sup>4</sup> La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'ē guna' ca nadxixruj bea da bde Moisés.

<sup>5</sup> Zrin dxelún bxruze caní naca na ca tu da dxulé'eze na, ne ca tu zrúlaze chee' da na' zua xabáa. Nezdxcu naca na tu da dxulé'eze lawe' da gunná Dios, guzre' Moisés gate ba zue' gune' lataj lá'azxa: "Bxue xanne' gunu' xúgute' na cáteze naca da ble'eda' lue' lu xi'a na'."

<sup>6</sup> Na'a bxruze blau cheedxcu nigá dxune' tu zrin zácadxa lawe' da naque' wedé dizra' chee' tu xel-la' wezría cháwedxa, da nun Dios ne chee' da ca' guchebe lazre' dá zaj naca na cháwedxa.

<sup>7</sup> La guca li lazre' xel-la' wezría da bene' nedxu, quebe ben na ba xen gune' xel-la' wezría gudxupe' na'.

<sup>8</sup> Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

<sup>9</sup> Quebe gaca na ca guca xel-la' wezría da beña' nen xra xrtaule ca' gate beca'a ne'e, ne bebéaja' benne' ca' lu xezr la xu Egipto. Caní guna' lawe' da quebe buluzúe' dizra' xel-la' wezría da nuna', na' chee' le' na' guleaj xichja' benne' ca'. Da ni dxenná Xránale.

<sup>10</sup> Xel-la' wezría guna' nen benne' Israel ca' ca te chee' lu zra caní gaca na caní, dxenná Xránale: Guzúa' da gudxixruj be'a lu xichaj lázrdau benne' ca', ne guzúaja' na lu lázrdawe'. Nadxa gaca' neda' Dios chee' benne' ca', na' le' xelaque' bi chia' ca'.

<sup>11</sup> Quebe gun na ba xen xulusede ljwezre', ne quegá nu benne' xe'e bi biche': Benbea Xránadxu. Xúgute' xelúnbe'e neda', benne' cá'aze, ne benne' blau.

<sup>12</sup> Gunite lawa' chee' benne' ca' ca naca da calela da zaj nune', ne québedxa cheajsá lazra' chee' dul-la da zaj nune'.

<sup>13</sup> Gate dxuchalaj Dios chee' tu xel-la' wezría cube, naca na lawe' da ba gunné' chee' da nedxu naca na da gula, na' da ba dxaca na da gula, ne da gulasa la xenítete' na.

## 9

### *Lataj lá'azxa da zua lu xezr la xu, ne da zua xabáa*

<sup>1</sup> Gate ne zua xel-la' wezría nedxu, zaj de' da nadxixruj bea ca dxal-la' xelún bxruze ca' tu lu xudau' da zua xezr la xu nigá.

<sup>2</sup> Xudau' nedxu caní guca na tu xu'u xide zren. Lu lataj nedxu chee' xudau' na' da nazí le na Lataj Lá'azxa zaj zua da dxusa'ní', ne tu ta'a naga zria xeta xtila lá'azxa.

<sup>3</sup> Cuzre naga ze' ladxe' gudxupe' zua xetú lataj da nazí le na Lataj Lá'azxa Blau.

<sup>4</sup> Lu lataj nigá zaj zua tu tá'adau' naga xezxe xala, ne tu xi'ina chee' xel-la' wezría da nun Dios, da nacu na oro du ca nácaqueze na. Lu'ule xi'ina na' xu'u

tu zruágadau' xu'u na xeta maná. Cá'anqueze lu'u'le na xu'u xágadau' da bexru Aarón da na' bezría na, ne zaj xu'u na xiaj ca' naga zaj naxúaj dizra' chee xel-la' wezría.

<sup>5</sup> Lawe' xi'ina nigá zaj zua gubáz chee xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bénneache. Québedxa séquentu' guchálajntu' ca naca chee da caní na'a.

<sup>6</sup> Gate ba nagá'ana chawe' da caní, na' bxruze ca' dxelú'queze' lu lataj nedxu chee lataj lá'azxa chee xelune' zrin chee xel-la' bxruze chee'.

<sup>7</sup> Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bénneache ca'.

<sup>8</sup> Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácate' dxelune' zrin chee xel-la' bxruze chee' lu lataj nedxu chee lataj lá'azxa na'.

<sup>9</sup> Xúguté da caní zaj naca na da dxululé'eze, da dxaca lu zra na'a zra, lawe' da guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bénneache duté li lazre'.

<sup>10</sup> Da caní zaj naca na chee da dxelé'aj dxelawe', ne chee da dxulucá'ana chawe' cuine', ne chee da nadxiruj bea ca naca chee bela' dxen chee bénneache, da ca' bzua Dios ca zrindxa zra guché'e da ca'.

<sup>11</sup> Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lázredxa. Quebe naca na tu da zaj nun bénneache, da zéaje na, quebe naca na chee xezr la xu nigá.

<sup>12</sup> Cristo ba guxú'e Lataj Lá'azxa Blau, quegá chee guzúe' dxen chee béadu ca', ne chee među ca', san chee guzúe' dxen cheéqueze', na' guxú'e ga na' tu lásaze lawe' da ba bene' xel-la' weselá chadía chacanna cheedxu dxi'u.

<sup>13</sup> Da li dxen chee bezre, ne chee béadu ca', ne de chee bézredu ca', bea ca' dxuluzexé' lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios.

<sup>14</sup> Che caní naca na, wazéquedxa dxen chee Cristo, Bénnea' bzua cuine' lau Dios ne chee Be' Lá'azxa duté xel-la' li lazre' chee', na' dxen chee' na' dxibe na xichaj lázrdaudxu chee da bændxu da nua na xel-la' gute, chee séquedxu gundxu zrin chee Dios ban.

<sup>15</sup> Chee le' na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunite lau Dios cheedxu ca naca dul-la da bændxu gate ne zúadxu lu xel-la' wezría nedxu, na' na'a benne' ca' ba gunné Dios waca xelezí'e ca naca da ca' guchébe lazre' Dios, da zaj naca na chadía chacanna.

<sup>16</sup> Gate tu benne' dxune' tu xiche da dxelá'a na da de chee', dxun na ba xen gulé'edxu ba nate bénnea' chee gundxu ca dxenná xiche na'.

<sup>17</sup> Xiche na' quebe bi seque na dxácate' ne naca ban benne' bene' na, san gate ba gute bénnea', na' seque na.

<sup>18</sup> Chee le' na', xel-la' wezría nedxu na' guzúa chuchu na ne chee dxen da buluzríe' na.

<sup>19</sup> Moisés blabe' xúguté da nadxiruj bea da zaj naxúaj na lu dizra' chee Dios lau xúguté bénneache, na' ca gudé na' guqué'e zrila' da nadxé na da xrna, ne tu zruze xaga hisopo, na' gusebise' na dxen chee među ca', ne dxen chee béadu

ca', ne nisa, na' bzre'e na lawe' xiche naga naxúaj xtizra Dios, ne bzre'e na bènneache ca'.

<sup>20</sup> Nadxa guzre' benne' ca': "Dxen nigá naca na da dxuzúa chuchu na xel-la' wezría da nun Dios nen le'e."

<sup>21</sup> Cá'anqueze bzra Moisés dxen lu lataj lá'azxa, ne lu xúgutę da dxuluchínene' lu zrin da dxelún bxruze ca'.

<sup>22</sup> Ca naca da bdxixruj bea Dios, dxal-la' xulucá'ana chawe' xúgutę da ca' nen dxen, na' che quebe nu gulalaj dxen, Dios quebe gunite lawe' chee bènneache ca naca dul-la da zaj nabague'.

### *Dxen chee Jesucristo dxegúa na dul-la*

<sup>23</sup> Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa.

<sup>24</sup> Cristo quebe guxú'e lu lataj lá'azxa da zaj nun bènneache, da na' naca na tu da dxulé'eze ca naca lataj lá'azxa li da zua xabáa, san guxú'e xabáqueze, naga zue' na'a lau Dios, dxudé' dizra' cheędxu dxi'u.

<sup>25</sup> Bxruze blau chee benne' judío ca' dxu'e lu lataj lá'azxa blau tu iza tu iza chee guzúe' ga na' dxen da quebe naca cheęqueze'. Na'a Cristo quebe dxuzúa cuine' zane' lasa.

<sup>26</sup> La ben na ba xen guzúa cuine' zane' lasa, cá'anqueze zane' lasa gatie' ca gudé beñe' xezr la xu nigá. Na'a, gate ba bzin zra dxaca li ca da guchebe lazre' Dios, Cristo ba ble'e tu lásaze, na' bzua cuine' chee cue' dul-la zaj nabaga bènneache.

<sup>27</sup> Ca dxun na ba xen xelate xúgutę bènneache tu lásaze, na' te na' Dios guchi'e da zaj nun tu tue'.

<sup>28</sup> cá'anqueze Cristo bzua cuine' chee gutie' tu lásaze chee gudúe' dul-la zaj nabaga' benne' zante. Te nigá xelé'e da gudxupe', quegádxa chee cue' dul-la, san chee xedajselé' xúgutę benne' dxelebeze' Le'.

## 10

<sup>1</sup> Da nadxixruj bea da bde Moisés guca na ca tu zrúl-laze chee da chawe' ca' da dxal-la' xelexá', ne quegá naca na léqueze na. Chee le na' da ca' buluzúa bxruze ca' lau Dios ca nadxixruj bea na', da ca' buluzúe' tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios.

<sup>2</sup> La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladxe benne' ca' lu dul-la zaj nabague', québedxa zaj nabague' dul-la.

<sup>3</sup> Na'a da ca' buluzúe' lau Dios tu iza tu iza bulusá na lazre' chee dul-la da zaj nabague',

<sup>4</sup> lawe' da quebe guzeque' dxen chee bezre ca', ne dxen chee béadu ca' cua na dul-la zaj nabaga bènneache.

<sup>5</sup> Chee le na', gate bla' Cristo lu xezr la xu nigá, guzre' Dios:

Quebe dxaca lazru' guna, ne béadu ca' nu gute leba' lau'.

Na'a ba beñu' bel-la' dxen chia' nigá.

<sup>6</sup> Quebe dxezaca ba lazru' béadu ca' dxuluzezxe' lau',

ne béadu ca' dxelutie' lau' chee cua na dul-la zaj nabague'.

<sup>7</sup> Nadxa gunnía': "Nigá za'a neda' chee guna' ca da nnau' Lue', Dios, ca naxúaj na chia' neda' lu xiche lá'azxa."

<sup>8</sup> Nédxula gunné': "Quebe dxaca lazru', ne quebe dxezaca ba lazru' guna, ne béadu ca' nu gute leba' lau', ne béadu ca' dxuluzezxe' lau', ne béadu ca' dxelutie' lau'."

lau' cheē cua na dul-la zaj nabaga bēnneache." Caní gunné' lácala zaj naca na da nadxixruj bea na xuluzúe' na lau Dios.

<sup>9</sup> Ca gudé na' gunné': "Nigá za'a neda' cheē guna' ca da nnau' Lue', Dios." Da nigá zéaje na gudé' lu waláz cheē da ca' buluzúa bxruze ca' lau Dios, gate bzua cuine' lau Dios ne cheē dul-la zaj nabaga bēnneache.

<sup>10</sup> Dios ba bca'ana chawe' dxi'u lu dul-la nabágadxu lawe' da ben Cristo ca da gunná Dios gate bde cuine' lau Dios tu lászaze gate gutie' le'e xaga begúaj.

<sup>11</sup> Xúgutē bxruze judío dxelune' zrin lau Dios tu zra tu zra, ne zane' lasa dxuluzríe' lau Dios da cá'anqueze lácala da ca' cabata' xezezeque na xelegúa na dul-la cheē bēnneache.

<sup>12</sup> Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabēla cheē Dios.

<sup>13</sup> Zue' na'a dxebeze' zra gate guzúa Dios benne' ca' dxeledábage' chee' zran ni'e.

<sup>14</sup> Caní dxune' lawe' da bca'ana chawe' chadía chacanna benne' ca' zaj naque' bi cheē Dios. Caní bene' gate bzua cuine' lau Dios tu lászaze.

<sup>15</sup> Caníqueze dxenná Be' Lá'azxa lawe' da gunné' nédxula:

<sup>16</sup> Caní naca xel-la' wezría guna' nen benne' Israel ca'

ca te cheē lu zra caní, dxenná Xránale:

Guzúa' da nadxixruj bea na' lu xichaj lázrdau benne' ca',

ne guzúaja' na lu lázrdawe'.

<sup>17</sup> Ca gudé na' dxenné':

Cabátadxu cheajsá lazra' cheē dul-la da zaj nabague',

ne cheē da calēla ca' da zaj nune'.

<sup>18</sup> Ca'an naca, gate Dios ba bnite lawe' cheē bēnneache ca naca dul-la da zaj nabague', québedxa dxun na ba xen bi xuluzúe' lau Dios cheē cua na dul-la ca'.

### *Dxal-la' bígadxu lau Dios*

<sup>19</sup> Cheē le na', benne' bícha'dau', waca chú'udxu lu lataj lá'azxa blau dutē lázrdaudxu ne cheē dxen cheē Jesucristo da bláje'.

<sup>20</sup> Dxezrindxu lau Dios, dxededxu tu neza cube, da quebe naca na ca da xjácalē bxruze ca' lu lataj lá'azxa. Dxededxu neza da naca Crístoqueze, Bēnea' zúalē Dios xabáa.

<sup>21</sup> Jesús naque' bxruze blau cheedxu, ne zaj xu'u lu ne'e bēnneache cheē Dios.

<sup>22</sup> Cheē le na' dxal-la' bígadxu lau Dios dutē lázrdaudxu ne dutē xel-la' dxeajlí lazre' li, lawe' da bca'ana chawe' Le' lázrdaudxu cheē québedxa sua da stebe lu xichaj lázrdaudxu ca naca cheē dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'.

<sup>23</sup> Dxal-la' sua cháchadxu ca naca da dxebeza lázredxu cheē da dxéajledxu, ne quebe guchadxu ca dxundxu, lawe' da gun Dios ca da guchebe lazre' gune' cheedxu.

<sup>24</sup> Dxal-la' quilaj lázredxu ca gundxu gácalē ljwézredxu tudxu xetudxu cheē zri'i ljwézredxu, ne gundxu da xrlátaje.

<sup>25</sup> Quebe dxal-la' gusandxu xezrágadxu lau Dios ca dxelún bal-la benne'. Dxal-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

<sup>26</sup> Che núnbeadxu ca naca xel-la' li cheē Dios, ne chéajdxadxu gundxu dul-la, québedxa bi de da cua na dul-la bágadxu.

27 Lu xel-la' dxezrebe súadxu da naca chee zra guchi'a Dios, ne chee xi' da guzría xi na benne' ca' dxeledábague' chee Dios.

28 Gate nu benne' bzue' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bènea', na' belutië' bènea', ne quebe belexache lazre' le'.

29 Tu da stebe zrendxa dxal-la' xezezi' benne' ca' dxuluzúe' chalá'ala Zri'ine Dios, ne dxulucá'ana dítajë' dxen chee', da blaljë', dxen na' dxuzúa chuchu na xel-la' wezría chee Dios, ne dxucá'ana chawe na benne' ca', na' dxeleñné' schanni' chee Be' Lá'azxa chee Dios, Bènea' nazri'ine' le'.

30 Ba núnbeadxu Xránadxu, Bènea' gunnáqueze': "Neda' xebéaj lazra' bèneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bèneache chee'."

31 Da dxal-la' xezezebe bèneache naca da stebe da gun Dios benne' ca'.

32 Le gusá lázrele le'e iza da ba guledé, gate za guzítele xel-la' naxaní' chee Dios, na' dutë xel-la' zren lazre' bhaga laule xel-la' zi' da gudele.

33 Bál-lale le'e bulucháchalëne', ne belú'e le'e lówela bèneache, na' xebál-lale le'e guzáca'le gate guná'ale benne' ca' guledéë' xel-la' zi' caní.

34 Bexache lázrele benne' gulezrá' lizre xia, ne dutë xel-la' dxebé bhaga laule da belunë' gate gulequë'e ca da nápaie, lawe' da nézele nápaie xabáa da zácaxa na, ne da naca na da chadía chacanna.

35 Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da si'le.

36 Le'e dxal-la' gácale zren lazre' chee gunle ca da nna Dios, na' sile ca da guchebe lazre' Dios gunnë' chee.

37 Naca na ca dxenná xiche lá'azxa:

Xátëdauze ðe,

na' xelá' Bènea' dxal-la' xelá', ne quebe chene'.

38 Benne' naque' xlátajë lawa' neda',

gata' chee' xel-la' nabán li lazre' lawe' da dxéajlë'e chia',

na' che cueaj xichajë' neda' quebe xezaca ba lazra' nen bènea'.

39 Na'a dxi'u quebe nácadxu tuze nen benne' ca' dxelebéaj xíchajë' Dios, ne xelebíá xi'e. Nácadxu tuze nen benne' dxeléajlë'e chee Dios, na' xelélé bène'du zaj xu'e.

## 11

### *Xel-la' dxeajlí lazre'*

1 Che nápadxu xel-la' dxeajlí lazre' dxuxrén lazrdxu sidxu da dxebézadxu, ne nézquezdxu naca da li da quebe dxelé'edxu.

2 Xra xrtáudxu ca' belexegá'ang' xrlátajë lau Dios lawe' da guléajlë'e chee'.

3 Lu xel-la' dxeajlí lazre' cheedxu nezdXu ben Dios xezr la xu nigá, bhínene' dizra' chee', na' ca naca da dxelé'edxu na'a ben Dios le' na nen da quebe nalá' gate nate.

4 Abel, lu xel-la' dxeajlí lazre' chee', bzue' lau Dios tu guna' da zácaxa na ca da bzua Caín, na' chee le' na' Dios gunné' naca xlátajë Abel, ne guzi'e guna' chee'. Ca'an naca, lácala ba gute Abel, ne dxusédene' dxi'u ne chee da benë' lawe' da gudapë' xel-la' dxeajlí lazre'.

5 Enoc, lu xel-la' dxeajlí lazre' chee', Dios beche'e le'. Quebe gutie', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios.

<sup>6</sup> Quebe gaca nu gun da xezaca ba lazre' Dios che quebe dxeajlí lazre' Le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexilaje' Le'.

<sup>7</sup> Noé, lu xel-la' dxeajlí lazre' chee', gate Dios guzre' le' nédxula ca da dxal-la' gaca, bzue' dizra' chee Dios, ne bene' tu da zren da dxedá lawe' nísadau' chee xeledá xrtie' ca'. Guxeajlí lazre' Noé Dios, san gulebía xi' bénneache zaj zre'e xezr la xu na', lawe' da quebe guleajlí lazre' Dios. Dios bca'ane' Noé xrlátaje lawe' da guxeajlí lazre' Le'.

<sup>8</sup> Abraham, lu xel-la' dxeajlí lazre' chee', gate Dios gunné' le', bzue' dizra', ne guz'e zéaje' tu lu xezr la xu da guchebe lazre' Dios gunézruje' chee'. Bdxuaje' lázrie', ne quebe nézene' naga zéaje'.

<sup>9</sup> Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee benne' zitu' ca'. Guzúe' tu lu xu'u ladxe', ne cá'anqueze ben Isaac, ne Jacob, benne' ca', cá'anqueze Dios guchebe lazre' xezezi'e da na' gunezruj Dios le'.

<sup>10</sup> Caní ben Abraham lawe' da guleza lazre' chu'e lu xezre na' da quebe te chee na, da na' guleche Dios, ne da ben Léqueze'.

<sup>11</sup> Cá'anqueze Sara, lácala ba nácale'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios guné' ca da guchebe lazre'.

<sup>12</sup> Caní guca, Abraham, lácala ba gúxrulé'e, guxánle'e zri'ine zre sue' ca naxán uzre' da zaj dxe' dxu'a tu yegu zren, da quebe nazeque' gulábadxu.

<sup>13</sup> Xúgute benne' caní gulatie', ne quebe ne xezezi'e da ca' nachebe lazre' Dios, san lawe' da guleajlí lazre' Dios, belelé'eng' na zítu'la, na' belexezaca ba lázrele' na. Caní bululé'eng' gulaque' ca benne' zitu', benne' guledeze lu xezr la xu nigá.

<sup>14</sup> Benne' dxuluchálaje' caní dxululé'eng' dxeledé' dxelexilaje' tu lazrie'.

<sup>15</sup> La buluwía lazre' ca naca xezr la xu naga gúsá'aque', na' waca xelexzrine' na'.

<sup>16</sup> Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee le' na' Dios quebe dxexedué'eng' gate dxelenná benne' ca' naque' Dios chee', na' nucueze' tu xezre naga xezezi'e benne' ca'.

<sup>17</sup> Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'e Isaac chee' gutie'-be' lau Dios. Ba zue' gutie' bi tu licha' chee' lácala ba nachebe lazre' Dios, gunné'.

<sup>18</sup> "Ne chee Isaac wazrále'e zri'ine zre su'."

<sup>19</sup> Abraham bxren lazre' Dios wazéquene' gusebane' benne' gate, na' waca nnadxu bezí' lu ne'e zri'ine' Isaac ládujla benne' gate.

<sup>20</sup> Isaac, lu xel-la' dxeajlí lazre' chee', guchebe lazre' xezezi' zri'ine' Jacob, ne Esaú da xrlátaje ca'.

<sup>21</sup> Jacob, lu xel-la' dxeajlí lazre' chee', gate zua gatie', guchebe lazre' xezezi' tu tu zri'ine José da xrlátaje ca', ne be' lá'ane' Dios, nuchiche tipe' xágradu nuxre'.

<sup>22</sup> José, lu xel-la' dxeajlí lazre' chee', gate ba zua gatie' gunné' welixedxúaj benne' Israel ca' lu xezr la xu Egipto, ne bdxixruj be'e ca dxal-la' xelune' chee zrita xu'e.

<sup>23</sup> Gate gulaj Moisés, xra xrne'e, lu xel-la' dxeleajlí lazre' chee' bulucache' lebe' lawe' chunna beu', lawe' da belelé'eng' naca bidu na' xrtanle'e, ne quebe belezrebe' benne' wenná bea, bénnea' bdxixruj be'e xelate bidu ca'.

24 Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee xezr la xu Egipto,

25 san guca lázredxe' té'e xel-la' zi' nen bi ca' chee Dios quézcala sue' tu chí'idau' lu da ba neza chee da naca dul-la.

26 Gúquene' nácadxa chawe' gate belún lala bèneache chee' ca da guca chee Cristo, quézcala gape' ca naca da gunní'a chee xezr la xu Egipto, lawe' da dxenné'e da gunezruj Dios le'.

27 Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee benne' wenná bea, na' guzúa chúchue' ca tu benne' dxelé'ene' Dios, Bénnea' quebe gaca nu le'e.

28 Moisés, lu xel-la' dxeajlí lazre' chee', bene' Laní Pascua gate na' bdxixruj be'e xuluzrá benne' Israel ca' dxen le'e xaga dxa xu'u chee quebe gute gubáz chee xabáa chee xel-la' gute netú zri'ine benne' Israel ca', bi biu nedxu.

29 Benne' Israel ca', lu xel-la' dxeleajlí lazre' chee', beledé'e lu Nísadau' Xrna ca benne' dxeledé lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chi'i benne' Egipto ca', na' gultatie'.

30 Benne' Israel ca', lu xel-la' dxeleajlí lazre' chee', guzré'e ze'e da naxečaj na xezre Jericó ca' gudé guledé benne' Israel ca' bezúate xezre na' tu tu lasa du gazre zra.

31 Rahab, nu'ula dxezí' lu ne'e benne' zaj xu'e neza, lu xel-la' dxeajlí lazre' chee', quebe gutie' tu zren nen benne' Jericó ca', benne' quebe buluzúa dizra' chee Dios, lawe' da gudapa le' ba lá'ana benne' Israel ca', benne' xeajlenná' lane' xezre na'.

32 ¿Bíradxa nnia'? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefte, ne ca ben David, ne ca ben Samuel, ne ca belún benne' ca' gulenné' waláz chee Dios.

33 Benne' ca' lu xel-la' dxeleajlí lazre' chee' gulezí'e xezr la xu ca' chee benne' xula, ne gulenná be'ene' cháwe'dau' benne' waláZR chee' ca', na' gulezí'e da guchebe lazre' Dios, lawe' da gúcalene' le'.

Belelé' lu dxu'a bezre xixre' ca'.

34 Buluxusulé' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulaca lu ne'e

da guta' chee benne' ca' guledábague' le'.

35 Nu'ula ca' belezí' lu ne'e benne' gate chee' ca', benne' belexebáng'.

Xebal-le' gulátie' gate buludé'e le' ba xa',

lawe' da quebe belú'e lataj nu gusán le',

chee xelezrué'ene' xel-la' dxexebán

chee xelezí'e xetú xel-la' nabán da naca na da li.

36 Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

37 Belutie' xebal-le' nen xiaj,

na' xebal-le' gulecheze' le' nen xia.

Xebal-le' buludé'e le' lu da stebe ca',

na' xebal-le' belutie' nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.



Baxache' gulaque', na' guledé' lu da zi' da xa',  
na' buluzalje' le'.

<sup>38</sup> Bénneache zaj zra' lu xęzr la xu nigá quebe zaj naca chee' xezezí'e ba neza chee' benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'.

<sup>39</sup> Xúgutę benne' ca' bca'ana chawe' Dios le' lawe' da guleajlí lazre' Le', san quebe ne xezezí'e ca naca da guchebe lazre' Dios,

<sup>40</sup> lawe' da nucueza Dios tu da nácadxa chawe' cheędxu dxi'u, chee' xelexaca benne' ca' li lazre' tu zren nen dxi'u.

## 12

### *Dxal-la' nna'dxu Jesús*

<sup>1</sup> Lawe' da zaj naxéčaj benne' zantę dxi'u, benne' ca' ba bululé'eng' ca guléajle'e chee' Dios, dxal-la' guzúadxu chalá'ala xúgutę da dxululale na dxi'u, ne dul-la da naxel-la na dxi'u, na' lu dutę xel-la' zren lazre' cheędxu gundxu zrin chee' Dios, da naca na ca dxezá' chęgudxu chee' zrué'eledxu da dxelé'edxu tu chi na'.

<sup>2</sup> Dxal-la' nna'dxu Jesús, Bénnea' dxunę' nápadxu xel-la' dxeajlí lazre', ne dxunę' li lazre' xel-la' dxeajlí lazre' na'. Jesús gudé'ę xel-la' zi' le'e xaga begúaj, ne quebe bedué'eng' lawe' da guné'ę xel-la' dxebé na' da dxebeza na Le', na' gudxé'ę chalá'a xabela chee' lataj blau chee' Dios.

<sup>3</sup> Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee' le' na' quebe chajxréquele gunle zrin chee', ne quebe gute lázrele.

<sup>4</sup> Ba gudíl-lalęle dul-la, na' quebe ne gátele lu wedil-la na'.

<sup>5</sup> Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízrenę' lue', ne quebe gate lazru' gate dxedil-le' lue'.

<sup>6</sup> Xránadxu dxusízrenę' bi ca' nazrí'ine',

na' xúgutę bi dxezí' lu ne'e ca zrí'inequeze' dxudé'ę-be' xel-la' zi'.

<sup>7</sup> Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusízre xrabe' lebe'?

<sup>8</sup> Che Dios quebe dxusízrenę' le'e ca dxusízrenę' xúgutę bi chee' ca', quebe nácale zrí'inequeze Le'. Nácale ca bi lan ca'.

<sup>9</sup> Gate ne nácadxu bidau', bulusízre xra xrnadxu dxi'u, na' gudápadxu le' ba lá'ana. Dxal-la' guzúadxadxu dizra' Xradxu zuę' xabáa, na' gaca bandxu.

<sup>10</sup> Xra xrnadxu bulusízrenę' dxi'u tu chí'idauze ca da guléqueng' chawe', san Dios dxusízrenę' dxi'u chee' gaca tu da ba neza cheędxu da naca na li lazre', chee' gácadxu lá'azxa ca naca lá'azxa Léqueze'.

<sup>11</sup> Da li quebe dxedánnedxu da dxusízre xradxu dxi'u, san dxéquedxu zi', na' dxedé na', che dxéajni'idxu ca da dxusízrenę' dxi'u, na' gundxu da xrlátaje ca', ne cueza zri lázredxu lau Dios.

### *Quebe dxal-la' guzúadxu chalá'ala da dxenná Dios*

<sup>12</sup> Chee' le' na' le guzazraj na'le, ne zríbele da ba dxelate ni'a na',

<sup>13</sup> ne le sa' lu neza da zaj naca na li, chee' quebe chegu ní'ale da quebe zaj zua chacha, ne chee' xelexaca chacha na.

14 Le gun ba xuzre suale lu xel-la' dxebeza zri lazre' nen xúgute bēnneache, ne le gaca li lazre' lau Dios. Che quebe gunle caní, quebe gaca lé'elele Xránadxu.

15 Le guxúe xanne' chee quebe gusanle da chawe' ca' dxunna Dios le'e, ne chee quebe gaca netule le'e ca tu xixre' sla' da dxulala na, ne dxurrinaj na da xezícala.

16 Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bēnnea' bsane' xúgute da gunezruj xre' le' chee guzi'e tu cueze xel-la' wagu.

17 Ba nézele ca da guca gudé na', gate guca lazre' Esaú na' si'e da chawe' da naba xre' lau Dios, na' xre' bzué' le' chalá'ala, ne lácala gudxzézele'e, quebe guca xuché'e ca da ba bene'.

18 Quebe dxaca cheele ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bduu'.

19 Belenne' gudxzere luzu da dxulucuezre', ne chi'i Dios bchálajlene' le'. Benne' ca' belenne' chi'i Dios na' gulata' xúene' québedxa guchálajlene' le'.

20 Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelútie'-ba' nen xiaj u nen tu xia nalá xéche'ze."

21 Da na' belelé'ene' bchébele'e na le', na' Moisés gunné': "Dxezrízetea' xel-la' dxezrebe."

22 Na'a le'e ba nabígale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gázxue gázxue gubáz chee xabáa,

23 ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bēnnea' guchi'e chee xúgute bēnneache, ne naga zaj zra' be' gulácaqueze benne' ca' ba nun Dios le' li lazre',

24 ne lau Jesús, Benne' wedé dizra' chee xel-la' wézria cube, ne naga bzre'e dxen da dxuchalaj na da cháwedxa ca da bchalaj dxen chee Abel.

25 Chee le' na', le guxúe xanne' cuínale chee quebe guzúale chalá'ala Bēnnea' dxuchálajlene' dxi'u. Quebe belegache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bēnnea' dxuchálajlene' dxi'u, zue' xabáa.

26 Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'anqueze xabáa."

27 Gate gunné': "Xetú lásaze", zéaje na xecá'a Dios ca naca da dxeledá, da ca' bene', na' xegá'ana da quebe seque' nu gutá.

28 Dخال-la' xedxu Dios: Xcalenu' lawe' da gunne' dxi'u tu lataj naga dxenná bea le' da quebe seque' nu gutá. Dخال-la' güe lá'anadxu Dios du lázredxu ne dute xel-la' ba lá'ana, ca da dxezaca ba lazre',

29 lawe' da naca Dios cheedxu ca tu xi' da guzria xi na da sban.

## 13

### *Da dxezaca ba lazre' Dios*

1 Quebe gusanle ca nazrí'i ljwézzele tule xetule ca bíchequezele.

2 Le gusá lázzele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí' lu ne'e gubáz chee xabáa ca', ne quebe guleque be'ene'.

<sup>3</sup> Le gusá lázrele gácalele benne' zaj xu'e lizre xia, gun cuinale ca benne' xú'uqueze lizre xia nen benne' ca'. Le gusá lázrele gácalele benne' ca' dxeledéé' xel-la' zi', gun cuinale ca benne' dxeledéqueze' xel-la' zi'.

<sup>4</sup> Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' cheele, lawe' da guchi'a Dios chee benne' ca' dxuluzúé' chalá'ala xel-la' wechaga na' chee', ne chee benne' ca' dxelune' da sban.

<sup>5</sup> Quebe sa lázrele xel-la' gunní'a. Le xezaca ba lázrele ca da nápale lawe' da ba gunná Dios: "Cabata' gusana' lue', ne quebe cueaj xíchajqueza' lue'."

<sup>6</sup> Caní naca, du lázredxu waca nnadxu:

Xrana' Dios dxácalene' neda'.

Quebe zreba' bi da gusaca bénneache neda'.

<sup>7</sup> Le gusá lázrele gácalele benne' ca' dxuluxúé' le'e, ne dxuluchálajne' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

<sup>8</sup> Túzqueze ca naca Jesucristo neaje, ne na'a zra, ne chadía chacanna.

<sup>9</sup> Quebe sile ca da dxuluchalaj benne' dxulusédené' da quebe naca na ca da naxúaj na lu xiche lá'azxa chee Dios. Cháwedxa naca guzúa chuchu lázraudxu lu xel-la' zri' ilazre' chee Dios, ne quebe chéajledxu da dxeledxirruj bea benne' ca naca da dxal-la' xi'aj gágudxu, lawe' da benne' ca' zjácálene' da ca' cabata' ne xelezi' ba neza ne chee da ca'.

<sup>10</sup> Bxruze judío ca' gulawe' béadu ca' belutié' lataj lá'azxa. Quebe zaj naca chee' xelawe' guna' da dxugú'udxu dxi'u chee Dios.

<sup>11</sup> Bxruze blau judío bzrié' dxen chee béadu ca' lu lataj lá'azxa blau ca tu guna' da dxegúa na dul-la. Buluzexxe' da nagá'ana chee béadu ca' cúzrela xezre.

<sup>12</sup> Cá'anqueze gute Jesús cúzrela xezre na' chee bca'ana chawe' bénneache ne chee dxen cheéqueze'.

<sup>13</sup> Le dxuaj, gundxu tu zren Cristo, lácala xuluzúa bénneache dxi'u chalá'ala ca belune' chee Le'.

<sup>14</sup> Lu xezr la xu nigá quebe de cheedxu tu xezre da súatequeze. Dxebéxadxu tu da za za'.

<sup>15</sup> Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios.

<sup>16</sup> Dخال-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj nape', lawe' da dxezaca ba lazre' Dios le na.

<sup>17</sup> Le guzúa dizra' chee benne' ca' dxuluxúé' le'e, ne le gun ca da dxelenné'. Benne' caní dxuluxúé' bénne' du xu'ule, ne xuluxudé' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xelezúa xache', lawe' da che quebe gunle caní, quebe bi da ba neza gaca na cheele.

<sup>18</sup> Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgute' da dxuntu'.

<sup>19</sup> Dxenaba' le'e nábale lau Dios gunne' neda' lataj xídazega' súalena' le'e naga zúale.

<sup>20</sup> Dxenaba' lau Dios, Bénnea' dxunne' dxi'u xel-la' dxebeza zri lazre', ne bsebané' Xránadxu Jesucristo ládujla benne' gate. Léqueze' naque' Benne' Blau Dxuxúé' Dxi'u, nácadxu zrila' chee', na' caní naque' lawe' da blalje' dxen chee' da bzua chuchu na xel-la' wezríá chadía chacanna da bene'.

<sup>21</sup> Dxenaba' Dios gunę' le'e li lazre' cheę séquele gunle da xrlátaje ca da dxaca lazre' Le', ne gunę' cheęntu' ca da dxaca lazre' ne cheę Jesucristo. ¡Gaca ba Cristo chadia chacanna! ¡Ca'an gaca na!

<sup>22</sup> Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látęga da du nigá dxuzúaja' cheęle.

<sup>23</sup> Dxuzenda' le'e ba bedxúaj bi bíchedxu Timoteo lizre xia, ne che xelá' zé'ębe', na' che'a-be' gate xedajnná'a le'e.

<sup>24</sup> Le gugapa diuzre xúgute benne' ca' dxuluchálajęne' le'e dizra' cheę Dios, ne le gugapa diuzre xúgute benne' bíchedxu ca'. Benne' zaj zre'ę xęzr la xu Italia nigá dxulugape' le'e diuzre.

<sup>25</sup> Dxenaba' lau Dios gunę' da chawe' cheę xúgutele le'e. ¡Ca'an gaca na!

## DIZRA' CHEĒ DIOS DA BZUAJ SANTIAGO

*Santiago dxuzuaje' cheē benne' ca' zaj nadxúaje' lazrie'*

<sup>1</sup> Neda', Jacobo, naca' wen zrin cheē Dios, ne cheē Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnaje du gabí'i xezr la xu nigá.

*Xel-la' sina da za lu na' Dios*

<sup>2</sup> Benne' bícha'dau', dxal-la' béle'ele gate dxedele zane cue' da stębe ca',

<sup>3</sup> lawe' da nézele gate dxedé xel-la' dxeajlí lazre' cheēle lu da stębe, da nigá dxundxa na le'e zren lazre'.

<sup>4</sup> Le gun ba xuzre gaca li lazre' xel-la' zren lazre' cheēle cheē gácale benne' xrlátaje ne li lazre', ne quebe bi xázrjele.

<sup>5</sup> Che núlale le'e dxexázrjele xel-la' sina, le naba na lau Dios, na' Le' gunņe' na le'e, lawe' da dxunézrjle'ę Dios cheē xúgutę Bénneache, ne quebe dxexezúene' zi'.

<sup>6</sup> Dخال-la' ná bale nen dutę xel-la' dxeajlí lazre' cheēle, ne quebe gun chupa lázrele. Benne' dxun chupa lazre' naque' ca xeajxruza cheē nísadau' da dxua be' nıla na'la.

<sup>7-8</sup> Benne' dxunę' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéqueņe' bi da xunezruj Xránadxu cheē'.

<sup>9</sup> Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca.

<sup>10</sup> Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezi béateca na.

<sup>11</sup> Gate dxalaj gubizra, ne dxennále'ę na, na' dxebizre xixre' na', na' dxexruj xiaj cheē na, na' dxedé xel-la' xrtan cheē na. Cá'anqueze gaca cheē benne' gunní'a, xenitię' dxácate' na' dxezi' lu ne'ę xel-la' gunní'a.

*Ca naca cheē da stębe ca' da dxededxu*

<sup>12</sup> Ba neza naca na cheē benne' dxuchaga lawe' da stębe ca' dutę xel-la' zren lazre' cheē', lawe' da che ba bedxúaje' chawe' lu da stębe da dxedéę', na' si' lu ne'ę da nachebe lazre' Dios gunézrjje' cheē benne' ca' zaj nazri'ine' Le'.

<sup>13</sup> Gate nu benne' zua da dxegú'u xel-la' na le' cheē gunę' da caleļa, quebe dxal-la' guéqueņe' dxuzúa Dios da na' dxegú'u xel-la' na le', lawe' da quebe bi dę da seque' xegú'u xel-la' na Dios cheē gunę' da caleļa, ne quebe bi guzúa Dios da xegú'u xel-la' na dxi'u cheē gundxu da caleļa.

<sup>14</sup> Tu benne' zua da dxegú'u xel-la' na le' cheē gunę' da caleļa gate xel-la' dxezá lazre' da caleļa cheē dxecá'a na le', ne dxenná be'e na le'.

<sup>15</sup> Nadxa ca naca xel-la' dxezá lazre' da caleļa caní dxuluzán na dul-la, na' gate ba guzeque' zua dul-la na', na' dxute na Bénnea'.

<sup>16</sup> Benne' bícha'dau' nazri'ite' lazra', quebe güele lataj nu si xe le'e.

<sup>17</sup> Xúgutę da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bénnea' bene' da ca' dxulusení na zran xabáa. Dios quegá dxuchá cuine', ne quebe dxuché'ę ca dxunę'.

<sup>18</sup> Ca naca da guca lazre' Dios, ba benne' dxi'u xel-la' nabán. Bchínene' dizra' li cheē', cheē gácadxu ca tu lina nedxu cheē', cheē da ba ben Le'.

*Xel-la' dxucá'ana szren Dios da naca na li lazre'*

19 Chee le na', benne' bícha'dau' nazri'ite lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrá'atele.

20 Tu benne' xichaj zra'a quebe dxune' da dzezaca ba lazre' Dios.

21 Chee le na', le gusán xúgutē da sban ne ca naca da calela da dxanle'e na, na' dutē xel-la' dxexruj lazre' chee le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bēnne'du xu'ule.

22 Le gun ca da dxulé'e dizra' na' le'e, ne quegá xénezele na. Benne' dxénzene' na dxezí xeze cuine'.

23 Bēnnea' dxénzene' dizra' na', ne quebe dxune' ca dxenná na, naque' ca tu benne' dxenné'e lawe' tu lu wana'.

24 Dxenné'e ca naque', na' gate ze xeaže' na', na' dxal-la lazre' ca naque'.

25 Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazrte' na. Che dxune' ca naca na, benne' nigá gaca tu da ba neza chee' lu xúgutē da dxune'.

26 Che nu benne' dxéquene' naque' benne' dxucá'ana szren Dios, ne quebe dxezéquene' nna be'ene' luzre', benne' nigá dxezí xeze cuine', na' ca naca xel-la' dxucá'ana szren Dios chee' dácheze naca na.

27 Xel-la' dxucá'ana szren Dios da naca na du lazre', ne da naca na da dzezaca ba lazre' Xradxu Dios naca na caní: Gácale dxu bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee' xezr la xu nigá.

## 2

### *Quebe guchale ca gunle chee tu tu benne'*

1 Benne' bícha'dau', le'e dxéajlele chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'.

2 Che chu'u tu benne' naga nazrágale, ne nácuē' zra lanē' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácuē' zra lanē' tuzruj,

3 na' che dxelé'ele cháwedau' bēnnea' nácuē' zra lanē' da zaca, ne dxele le': "Gudxe'e nigala naga nácadxa na chawe'", na' dxele benne' xache' na: "Xeajsé na'la, u gudxe'e lu xu ná'teze."

4 Che dxunle caní, dxuchale ca dxunle chee tu tu benne', ne dxuchí'ale ca zaj naca bēnneache, quebe naca xrlátaje xichaj lázrdaule.

5 Benne' bícha'dau' nazri'ite lazra', le xen da nigá: Dios ba guqué'e benne' ca' zaj naque' benne' xache' lu xezr la xu nigá chee xelaque' benne' gunní'a lu xel-la' dxeajlí lazre', ne chee xezezí' lu ne'e da nucueza Dios naga dxenná bea Le', da na' guchebe lazre' Le' gunéruje' chee benne' ca' zaj nazri'ine' Le'.

6 Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxeleché'e le'e lau benne' xulawe' ca'?

7 ¿Quegá benne' gunní'a ca' benne' dxelenné' schanni' chee da xrlátaje ca nazi' lale, dxennale nácale bi chee Cristo?

8 Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazrí'i cuinu', xrlátaje dxunle.

9 Na'a che dxuchale ca dxunle chee tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios.

10 Che tu benne' dxunę' ca zaj naca da nadxixruj be'e Dios, san che dxenęuęe' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios.

11 Léqueze Dios gunné': "Quebe gunle dul-la da dxichaj na xrba cheę xel-la' wechaga na", cá'aqueze gunné': "Quebe gútele benne'." Caní naca, che tu benne' quebe dxunę' dul-la da dxichaj na xrba cheę xel-la' wechaga na, san che dxutie' benne', ba gunęuęe' ca da nadxixruj be'e Dios.

12 Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxelunę, benne' ca' zaj nalá lu na' da gunná bea Le'.

13 Benne' ca' quebe dxellexache lazre' cheę benne' xula, Dios guchi'e ca da dxelún benne' ca', ne quebe xexache lazre' cheę benne' ca', san benne' ca' dxellexache lazre' cheę benne' xula quebe bi zria xeľbague' gate Dios guchi'e ca da zaj nun benne' caní.

### *Ca naca cheę xel-la' dxeajlí lazre', ne cheę zrin dxundxu*

14 Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxunę' da dxácalę nu benne' dxexázejne'?' ¿Wazeque' xel-la' dxeajlí lazre' na' guselá na le'?

15 Che zra' benne' bíchedxu u nu'ula zandxu, benne' quebe bi zaj de zra lanę' u da xelawe'.

16 na' che núlate le'e xeľe benne' ca': "Bexiajzė cháwedau'. Nazre'enu', ne gágugu' szri", san che quebe bi gunęrujle ca da dxexázejne', ¿bizra culuén gapa da na' gunnále?

17 Caní naca na cheę xel-la' dxeajlí lazre'. Che quebe bi zaj de da chawe' da xululé'e na che dxeajlí lazre' bėnnea' Cristo, xel-la' dxeajlí lazre' cheę' naca na ca tu da gate.

18 Wannalja nu benne': Lue' dxennáu' dxéajle'u cheę Cristo, na' neda' dxuna' da chawe' ca'. Ble'e neda' dxéajle'u cheę Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne cheę da chawe' ca' da dxuna'.

19 Dxéajle'u lue' zua tuze Dios. Nácaqueze na ca'. Cá'aqueze da xriwe' ca' dxeléajle na, ne dxelezrize na lu xel-la' dxelezrebe.

20 Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na?

21 ¿Ajzra guca cheę xra xrtáudxu Abraham guque' benne' xrlátaje lau Dios? Guca na ne cheę da bęne' gate guxúe' zri'ing' Isaac lu bdupa xiaj cheę guzeze'-be'.

22 ¿Quebe dxele'enu'? Ca da bęn Abraham dxulé'e na guxeajlí lazre' Dios, na' xel-la' dxeajlí lazre' cheę' guca na du lazre' ne cheę da bęne'.

23 Caní guca li ca da dxenná na lu xiche lá'azxa: Abraham guxéajle'e cheę Dios, na' Dios blé'ene' le' benne' xrlátaje. Na' bchálaje' ca naca cheę Abraham, gunné': "Bi zrágaqueza', Abraham."

24 Na'a dxelé'ele Dios dxezí' lu ne'e tu benne' ne cheę da chawe' da dxunę', ne quegá tuze lawe' da dxeajlí lazre' Le'.

25 Cá'aqueze guca cheę Rahab, nu'ula węn da sban. Nu'ula nigá gulu'e lizre' benne' ca' gusel-la Josue, na' bsi'e benne' ca' neza xula cheę belelé' lu na' benne' ca' dxjaque' wedil-la, na' ne cheę da bęne', Dios guzı' lu ne'e nu'ula na'.

<sup>26</sup> Ca naca cheē bēla' dxen cheed̄xu, che ba bedxúaj be' cheē na, ba nate na, cá'anqueze naca cheē xel-la' dxeajlí lazre' cheed̄xu. Che quebe bi zaj dē da chawe' da xululé'e na dxeajlí lazrd̄xu Cristo, naca na ca tu da gate.

### 3

#### *Ca naca cheē lúzred̄xu*

<sup>1</sup> Benne' bícha'dau', quebe dxal-la' gun cuínale benne' dxulusede dizra' cheē Dios, lawe' da nézele ca gun Dios, guchi'a xánned̄xē' cheē da dxund̄xu dxi'u, dxuchálajdxu xrtizre'.

<sup>2</sup> Xúgutēdxu dxúnle'ed̄xu da calēla. Che nu benne' quebe bi da calēla dxunē' ca naca da dxuchálajē', naquē' benne' li lazre', na' wazéquenē' nna be'enē' ca nácaqueze bēla' dxen cheē'.

<sup>3</sup> Gate dxugú'udxu xia dxu'a bzrina' cheē gunba' da dxaca lazrd̄xu, wazéqued̄xu nna be'ed̄xu dutēba'.

<sup>4</sup> Le na' xque ca naca cheē da ca' dxeledán lawe' nísadau'. Lácala zaj naca na da zri'a, na' be' da dxuzriga na lē na dxácalē'e na, benne' dxusé'e na dxuchínenē' tu xágadauze, na' dxenná be'enē' na cheē cheaj na naga dxaca lazre' le'.

<sup>5</sup> Cá'anqueze naca cheē lúzred̄xu. Naca na tu da dauze da naca cheē bēla' dxen cheed̄xu, na' da zrentē da dxenná na. Tu xí'dauze waca guzezxe na tu xi'a zren.

<sup>6</sup> Lúzred̄xu naca na ca tu xi'. Lúzred̄xu naca na ca tu xezr la xu sban da zua lu bēla' dxen cheed̄xu, ne dxuxrinnaj na du ca nácad̄xu. Zúalē ca tu xi' lúzred̄xu da za' lataj ba xa', ne naca na ca tu da dxegú'u na xi' ca naca xúgutē da dxund̄xu.

<sup>7</sup> Wazeque' nu benne' nna bé'enē' xúgutē bē xixre' ca', ne bē zaj zua xrila, ne bē snia ca', ne bē zaj zra' lu nísadau', ne ba gunná bé'enē'-ba'.

<sup>8</sup> Quebe nu benne' dxezéquenē' nna bé'enē' dutē da dxenná luzre'. Naca na tu da calēla da quebe dxue na lataj nu nna be'e lē na, ne naca na ca tu bē snia, bē dxúteba' bēneache ca'.

<sup>9</sup> Nen lúzred̄xu níqueze dxue lá'anadxu Xrad̄xu Dios, ne nen lē na dxennéquezdxu da calēla cheē bēneache, benne' ca' nun Dios na' lu'a le saca Léqueze'.

<sup>10</sup> Lu dxú'adxu ná'queze dxeledxúaj da xrlátaje ne da calēla. Benne' bícha'dau', da nigá quebe dxal-la' gaca na ca'.

<sup>11</sup> ¿Waca galaj nisa chawe' ne nisa sla' lu tuze beaj?

<sup>12</sup> Benne' bícha'dau', ¿waca tu xaga higo cuía na da zixre cheē xaga olivo? ¿Waca tu lba uva cuía na da zixre cheē xaga higo? Cá'anqueze, tu beaj quebe gaca gunna na nisa xene', ne nisa zri lazre'.

#### *Xel-la' sina da naca li lazre'*

<sup>13</sup> Che zua tu benne' ládujla le'e naquē' benne' sina, ne dxéajni'ingē', dxal-la' gulé'enē' na ne cheē da chawe' da dxunē' dutē xel-la' dxexruj lazre' cheē' da dxunezruj xel-la' sina le'.

<sup>14</sup> Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina cheēle lawe' da caní nnēle da wen lazre' cheē da naca da li.

<sup>15</sup> Xel-la' sina caní quebe naca na cheē Dios. Naca na cheē xezr la xu nigá, ne cheē bēneache, ne za na lu na' da xriwe'.

<sup>16</sup> Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelunē' xúgutē da calēla.



<sup>17</sup> Benne' zaj nape' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxelunę' da chawe'. Zaj naque' li lazre' ne quebe dxelunę' cúzreze da chawe'.

<sup>18</sup> Benne' dxelebeche zrię' da ba xa' dxelunę' tu zrin da naca ca tu binne da dxunna na da chawe'.

## 4

### *Ca naca cheę benne' zaj nazri'ine' da zaj naca cheę xęzr la xu nigá*

<sup>1</sup> ¿Bizr cheę na' dxedíl-lale ne dxe' da ba xa' ládujla le'e'? Dxaca caní lawe' da dxezá lázrele da zaj naca cheę da caleła, da dxuluzúa na le'e lu da ba xa'.

<sup>2</sup> Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedíl-lalę ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios.

<sup>3</sup> Che dxenábale na, quebe dxezile na lawe' da dxenábale na caleła, lawe' da dxedánele na cheę guchínele na ca da dxaca lázrele.

<sup>4</sup> Le'e, benne' quebe nácale li lazre', ¿quebe nézele che nu benne' dxedánnene' da caleła da dę lu xęzr la xu nigá, benne' nigá dxecuídene' Dios? Núteteze benne' dxaca lazre' si'e' ba neza ca da dxaca lu xęzr la xu nigá naque' benne' dxecuídene' Dios.

<sup>5</sup> Cheę lę na' dxenná xiche lá'azxa: Be' da nuzúa Dios lázrdaudxu cadite dxe'e gunne xuę cheędxu.

<sup>6</sup> Dios dxácalędxene' dxi'u lu xel-la' xrlátaje cheę', ca dxenná xiche lá'azxa: Dios dxezrę'ę benne' ca' dxulucá'ana szren cuína, na' dutę xel-la' xrlátaje cheę' dxácalęne' benne' dxexruj lazre' ca'.

<sup>7</sup> Le guzúa dizra' cheę Dios.

Le til-la da xriwę', na' lę na xuzrunnuj na naga zrale.

<sup>8</sup> Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale cheę dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

<sup>9</sup> Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

<sup>10</sup> Le gaca dxexruj lazre' lau Xránadxu, na' Le' gucá'ana szrene' le'e.

### *Quebe dxal-la' guchí'adxu ca da dxun tu benne' bíchedxu*

<sup>11</sup> Le'e, benne' bícha'dau', quebe nnele cheę ljwézrele tule xetule. Benne' dxennę' cheę tu benne' bíchedxu, u dxuchi'ę ca da dxun bėnnea', naque' benne' dxennę' caleła cheę da bdxixruj be'e Dios, ne dxebéę' ca zaj naca da bdxixruj be'e Dios. Che dxebéu' ca zaj naca da bdxixruj be'e Dios, dxun cuínu' ca benne' dxuchi'ę da dxaca, ne quebe dxuzú' dizra' da bdxixruj be'ę.

<sup>12</sup> Zua tuze Dios, Bėnnea' bdxixruj be'ę da ca', ne dxuchi'ę da dxaca, na' Léqueze' wazéqueņę' guselé' dxi'u, ne guzría xi'e' dxi'u. Lue', ¿núzraqueze nacu', dxuchi'u da dxun benne' xula?

### *Quebe nezdxu bi gaca wxre*

<sup>13</sup> Na'a, le xene da nigá, le'e dxennale: Na'a u wxre chéajdxu tu xęzre ne cheajsúadxu na' tu iza. Gá'udxu, ne gútedxu cheę gucúdedxu dumí.

<sup>14</sup> Quebe nézele ca da gaca wxre. ¿Ájazra naca cheę xel-la' nabán cheędxu? Naca na ca tu beuj da dxebé' tu chi'i, na' chadí dxenite na.

<sup>15</sup> Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'.

<sup>16</sup> Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calela.

<sup>17</sup> Che nu benne' ba nézene' ca da chawe' da dxal-la' guné', na' quebe dxuné' na, na' bágale'e dul-la.

## 5

### *Santiago dxusízrene' benne' gunní'a ca'*

<sup>1</sup> Le xene da nigá, le'e, benne' gunní'a. Le cuzre ne le xewine lazre' ca naca da zi' da xa' da lé'ele.

<sup>2</sup> Ca naca xel-la' gunní'a chee le ba zaj nuzru na, na' zra lánale zaca ba zaj nagu béadu ca' le na.

<sup>3</sup> Ca naca oro chee le ne plata chee le, ba gulezén xrche'e na, na' lawe' da quebe bchínele da gunní'a chee le lu da xrlátaje, da caní dxululé'e na nabágale zria lau Dios, na' Le' gudé'e le'e lu da ba xa'. Caní gaca chee le lawe' da btúbele xel-la' gunní'a chee gápale na gate ba dxéxrule.

<sup>4</sup> Quebe gudízrujle ca naca chee na benne' ca' belexelape' lina chee le, na' dxelawe' zria chee da quebe gudízrujle, na' Xránadxu, Bénnea' nape' duté xel-la' dxenná bea, ba benne' ca naca zria da dxelagu benne' ca' chee le'e.

<sup>5</sup> Lu xezr la xu nigá ba guzile ba neza xel-la' gunní'a chee le ne xúguté da zaca ca', ne guzrenle ca tu bezre dxánnele'e, na' ba dxezrín zra xelútié'-ba'.

<sup>6</sup> Le'e ba bzria xile, ne ba bétele benne' quebe bi da calela zaj nune', na' benne' ca' quebe guledábague' le'e.

### *Dxal-la' gácadxu benne' zren lazre' ne guchálajledxu Dios*

<sup>7</sup> Chee le na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' duté xel-la' zren lazre' chee' ca zrindxa zra xelá' xiuj ba ne xiuj lina, chee xezi' lu ne'e lina chawe' chee'.

<sup>8</sup> Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu.

<sup>9</sup> Le'e, benne' bícha'dau', quebe gágule zria chee ljwézrele, chee quebe guchi'a Dios chee da dxunle, lawe' da zua gáguté zra xelá' Dios, Bénnea' dxuchi'e da dxaca.

<sup>10</sup> Le'e, benne' bícha'dau', le gusa lázrele ca guca chee benne' ca' gulenné' waláz chee Dios, gulaque' zren lazre' lácala guledé'e xel-la' zi'.

<sup>11</sup> Dxennadxu guca da ba neza zren chee benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca gudé na'. Xránadxu naque' zri'i lazre', ne dxexache lazre' dxi'u.

<sup>12</sup> Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzría xi' Dios le'e.

<sup>13</sup> Che núale dxedele lu da zi' da xa', dxal-la' guchálajlenle Dios. Che nu benne' zue' xel-la' dxebe, dxal-la' gul-le' da güe lá'ane' Dios.

<sup>14</sup> Che nu benne' quebe chawe' zue', dxal-la' nne' benne' gula ca' dxuluxúe' bi chee Cristo, chee xelenabe' lau Dios xexuné' benne' we' na', ne xelegú'e le' da za lu La Xránadxu.

<sup>15</sup> Gate dxuluchálajłene' Dios dutę xel-la' dxeleajlı lazre' cheę', na' xexaca benne' wę' na', na' Xránadxu xechise' le', ne che bi dul-la nune', na' gunitę lau Dios cheę bėnnea'.

<sup>16</sup> Cheę le' na', le xrúalepe lau lįwėzrele tule xetule dul-la da nunle, ne le guchálajłę Dios cheę tule xetule, cheę xexune' le'e. Da dxenaba benne' xrlátaję du lazre' lau Dios wazrué'ene' na.

<sup>17</sup> Elías, bėnnea' gunné' waláz cheę Dios, guęę' tu bėnneache ca dxi'u, na' gate gunabe' lau Dios cheę quebe gaca xiuj, na' quebe guca xiuj lu xęzr la xu dutę chun iza xugachaj.

<sup>18</sup> Gudé na', gate gunabe' lau Dios da xula, na' belá' xiuj, na' xęzr la xu na' benna na lina.

<sup>19</sup> Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li,

<sup>20</sup> dxal-la' nézele, nútetęze benne' xucuase' tu benne' dul-la lu neza caleła da zeajłene', guselé' bėnne'du xu'u benne' dul-la na' lu xel-la' gute, na' xunite lau Dios dul-la zan da nabaga bėnnea'.

## DÍZRA 'DAU' NEDXU DA BZUAJ SAN PEDRO

*Dizra' gusel-la Pedro chee benne' ca' gucá'a Jesús, ne zaj nase dínnaje'*

1 Neda', Pedro, naca' benne' gubáz chee Jesucristo. Dxuzúaja' da nigá cheele le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia.

2 Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnale'e le'e da chawe', ne xel-la' dxebeza zri lazre'.

*Ca da dxebeza lázredxu*

3 Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu,

4 ne gun na sile ca da nucueza Dios cheele xabáa, da na' quebe cuia xi na, ne quebe xexúe na, ne quebe te chee na.

5 Lawe' da dxéajlele chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

6 Chee le na' dxebéle'ele lácala dxun na ba xen tele xel-la' zi' tu chí'idau'.

7 Xel-la' dxeajlí lazre' cheele gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' cheele, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

8 Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xelé'ele Le', dxebéle'ele. Ca naca xel-la' dxebé cheele naca na da zrente da quebe séquentu' xuzájla'antu'

9 lawe' da nalá bénne'du xu'ule lawe' da dxéajlele chee Dios.

10 Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e.

11 Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexilaje' nuzra benne' nigá, ne bátala gaca da dxenná Be' Lá'azxa, Bénnea' zúale le'.

12 Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dízra' chawe' da ba bénquezle, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

*Dios dxenné' dxi'u chee gácadxu bi lá'azxa chee'*

13 Chee le na', le guxúe xanne' ca da gunle. Tu dxál-lazqueze gunle da xrlátaje. Duté lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo.

14 Lawe' da nácale bi chee Dios, le guzúa dízra' chee', ne québedxa gunle ca da guzá lázrele gate quebe ne gúnbeale Dios.

<sup>15</sup> Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e.

<sup>16</sup> Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca neda' lá'azxa."

<sup>17</sup> Che dxennale le'e naca Dios Xrale, na' Le' dxuchi'e ca da dxelún bénneache, dxal-la' zrêbele Le' dxácatę ne zúale lu xęzr la xu nigá.

<sup>18</sup> Dios ba bselé' le'e lu da benle gate na' guxíajle ca da belún xra xrtaule, da caleła, na' ba nézqueze quebe guca na ne chee' tu da dxuzru na ca oro, ne plata.

<sup>19</sup> Bselé' le'e ne chee' dxen zácale'e chee' Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', be dxelutię' chee' xunite lau Dios dul-la zaj nabague'.

<sup>20</sup> Cristo ba nácaqueze chee' gate nate saque' da nigá, na' blę'e lu zra caní chee' gaca chawe' chee'.

<sup>21</sup> Ne chee' Cristo dxéajle chee' Dios, Bénnea' bsebanę' Le' ládujla benne' gate, ne bca'anę' Le' szren. Chee' le na' dxéajle chee' Dios, ne dxuxrén lázrele Le'.

<sup>22</sup> Na'a, ba bzúale dizra' chee' xel-la' li ne chee' Be' Lá'azxa, chee' zri'ile dutę lázrdaule benne' zaj nababe' dxi'u. Chee' le na' dxal-la' zri'ile ljwézrele tule xetule dutę lázrdaule, ne dutę xel-la' wala chee'.

<sup>23</sup> Caní naca na lawe' da ba bexálajle, quegá chee' bénneache, benne' dxelate. Nálajle ne chee' dizra' chee' Dios, da naca ban na, ne da zua na chadía chacanna.

<sup>24</sup> Caní naca na lawe' da naxúaj na lu xiche lá'azxa, da dxenná na: Xúgutę bénneache zaj naque' ca xixre', na' xel-la' szren chee' naca na ca xiaj chee' xixre'du ca'. Xixre' na' dxebizre na, na' xiaj chee' na dxexruj na.

<sup>25</sup> Dizra' chee' Xránadxu zúatequeze na chadía chacanna. Dizra' nigá ba benle le'e ne chee' dizra' chawe' da dxuchálajntu'.

## 2

<sup>1</sup> Chee' le na', québedxa gunle da caleła. Québedxa nu si xele, ne quebe gunle láweze da xrlátaje. Québedxa gácale xa lazre', ne quebe bi nnele chee' ljwézrele.

<sup>2</sup> Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee' gun na se cháchale, ne lale lu na' dul-la.

<sup>3</sup> Che da li ba guzú laule nézele naca Xránadxu chawe', na' gaca lázrele sídxale xrtizre'.

### *Cristo naque' ca xiaj xre ban*

<sup>4</sup> Le biga lau Xránadxu, Bénnea' naque' ca xiaj xre ban. Bénneache buluzię' Le' chalá'ala, san lau Dios naque' tu xiaj chawe' da zácale'e na.

<sup>5</sup> Cá'anqueze le'e nácale ca xiaj ban ca'. Le güe Dios lataj guchínene' le'e chee' gunę' tu xudau' chee' Be' Lá'azxa chee', gácale bxruze chee' Dios chee' guzúale lau Dios ca da dxunna Be' Lá'azxa le'e. Da nigá waca gunle ne chee' Jesucristo, da xezaca ba lazre' Dios.

<sup>6</sup> Chee' le na' lu xiche lá'azxa dxenná Dios: Neda' nuzúa' lu xęzre lá'azxa tu benne' naque' ca tu xiaj blau chee' xu'u, da naca na tu xiaj du lazre', ne da zácale'e na, na' nu benne' chéajle'e chee' Le' quebe gaca xel-la' stu chee'.

7 Cheęle le'e dxéajle cheę', xiaj nigá zácale'e na, san cheę benne' ca' quebe dxéajle'e naca na ca da dxenná xiche lá'azxa: Xiaj na' buluzúa benne' wen xu'u ca' chalá'ala, le na' naca na xiaj blau.

8 Cá'anqueze naca na ca dxenná xiche lá'azxa:

Naque' tu xiaj da dxehegu bénneache, na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' cheę Dios. Dios ba núnqueze' gaca caní cheę benne' ca'.

### *Benne' zaj naque' bi cheę Dios*

9 Le'e nácale benne' ba gucá'a Dios. Nácale bxuze lu zrin cheę Benne' Wenná Bea, Jesús. Nácale tu xezre lá'azxa cheę Dios, na' Le' naxá'awene' le'e cheę guzenle bénneache ca naca xel-la' szren cheę Dios. Le' gunné' le'e cheę xedxúajle lu da chul-la, na' súale lu xel-la' naxaní' li lazre' cheę'.

10 Gate nate quebe nu bexache lazre' le'e, san na'a Diósqueze' dxexache lazre' le'e.

### *Zúale cheę gunle zrin cheę Dios*

11 Bi bicha' nazri'ite lazra', dxata' xueda' le'e, nácale ca benne' zaj zre'e zitu' naga zua lazre', cheę quebe gunle ca da dxenná beła' dxen cheęle, da dxedíl-lale na bénne'du xu'ule.

12 Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lácala na'a dxelenné' cheęle, dxelenné' nácale benne' ca' dxeluné' da zrinnaj, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

13 Lawe' da nácale bi cheę Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre ca'. Le guzúa dizra' cheę benne' napé' xel-la' dxenná bea zren,

14 ne cheę benne' dxelenná bea, benne' ca' nasel-la le' cheę xuludé' xel-la' zi' benne' ca' dxeluné' da zrinnaj, ne xelu'e ba lá'ana benne' ca' dxeluné' da xrlátaje.

15 Dios dxaca lazre' gunle le'e da xrlátaje cheę guzúa zrile benne' ca' quebe zaj naxéajni'ine', gate dxelenné' caleła cheę dizra' chawe' da nazile.

16 Le gaca ca benne' quebe zaj nada'u, san quebe guchínele da na' nazile, quebe gunle da caleła. Le gaca ca benne' ca' dxenná be'e Dios.

17 Le gapa ba lá'ana xúgute' bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

### *Ca da guzaca zi' Cristo dxuzéajni' na dxi'u*

18 Le'e, bi wen zrin, le guzúa dizra' cheę xránale dutę xel-la' ba lá'ana, quegaze cheę benne' zaj naque' zri'i lazre', ne dxelebé'e gunne xue cheęle, san cá'anqueze gunle cheę benne' snia ca' zaj naque' xránale.

19 Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdxu naca na da dzezaca ba lazre' Dios.

20 Che dxunle tu da caleła, na' dxulusaca zi'e le'e, ¿bizra da ba neza gaca na cheęle? Na'a, che dxedele xel-la' zi' lawe' da dxunle da xrlátaje, ne dxuchaga laule na dutę xel-la' zren lazre' cheęle, da nigá naca na xrlátaje lau Dios.

21 Dios gunné' le'e cheę tele xel-la' zi' caní, lawe' da gudé Cristo xel-la' zi' waláz cheęle le'e, da dxuzéajni' na le'e gunle ca da ben Le'.

22 Le' quebe bene' dul-la, ne quebe nu guzí xe'e.

23 Gate bulucháchaləne' Le', quebe bi dizra' schanni' bechebe'.

Gate buludé' Le' xel-la' zi', Le' quebe bexéčaje'.

Bzua cuine' lu na' Dios, Bénnea' dxuchi'e ca da naca na.

24 Biá'queze Cristo na' lu belá' dxen chee' ca naca dul-la cheedxu gate gude'e le'e xaga begúaj, chee' gácadxu ca benne' gate, québedxa gundxu dul-la, na' gaca bandxu chee' gundxu da xrlátaje.

Le' guzríe' we' chee' xexácale le'e chawe'.

25 Le'e gudale gate nate ca zrila' zaj naníteba'.

Na'a ba belá'le lau Cristo, Bénnea' dxuxúe' le'e ca dxun tu benne' dxuxúe' zrila'du ca', ne dxé'e gunne xue chee' benne'du xú'ule.

### 3

#### *Ca dxal-la' xelún benne' zaj nuchaga na'*

1 Cá'anqueze le'e, nu'ula nuchaga na'le, le guzúa dizra' chee' benne' cheele, na' che núlale zua benne' biu cheele quebe dxéajle'e xrtizra Dios, xexúnbe'e naca na da li gate lé'enge' da xrlátaje da dxun zru'ule', ne quebe gun na ba xen bi guchalaj zru'ule',

2 lawe' da lé'ezené' da xrlátaje dxune' lawe' da naque' xrlátaje, ne dxape' le' ba lá'ana.

3 Ca lechítaje chee' tu nu'ula quebe dxal-la' gaca na cúzreze ca xel-la' dxupá'a xicha xíčaje', ne lechítaje da naca na oro, ne zra lané' da zácále'e.

4 Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee' na. Da xrtan nigá naca na tu be' dxexruj lazre', ne zren lazre', da na' zácále'e na lau Dios.

5 Cá'anqueze guca lechítaje chee' nu'ula ca' gulaque' bi chee' Dios gate nate. Nu'ula ca' buluxrén lazre' Dios, ne buluzúe' dizra' chee' benne' chee'.

6 Cá'anqueze guca Sara, bzue' dizra' chee' Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

7 Cá'anqueze le'e, benne' biu, zúalele nu'ula, le gaca dxexruj lazre' nen zru'ulale. Le gapa ba lá'ana zru'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e duté xel-la' chawe' chee'. Dخال-la' gunle caní chee' quebe bi guzaga na le'e gate guchálajlele Dios.

#### *Benne' dxeledé' xel-la' zi' lawe' da dxelune' da chawe'*

8 Na'a:

Le gaca tuze

Le xexache lazre' ljwézrele, ne le zri'i ljwézrele.

Le gaca benne' zri'i lazre', ne zren lazre'.

9 Quebe gunle da caləla chee' benne' dxune' cheele da caləla, ne quebe gucháchaləle benne' dxulucháchaləne' le'e. Le gun da chawe' chee' benne' ca' lawe' da gunné' Dios le'e chee' sile da chawe'.

10 Caní naca na lawe' da dxenná xiche lá'azxa:

Benne' dxaca lazre' gaca tu da ba neza chee', ne sue' xel-la' dxebe'

dxal-la' guxúe' luzre' chee' quebe nne' dizra' schanni', ne guxúe' dxu'e chee' quebe nne' na da wen lazre'.

11 Dخال-la' gusané' ca da caləla bene',

ne québedxa guné' na, chee' guné' da chawe'.

Dxal-la' cueche zriq' da ba xa',  
ne gaque' benne' zren lazre'.

<sup>12</sup> Xránadxu dxuxúe' benne' chawe' ca',  
ne dxenne' ca da dxelenaba benne' ca'.  
Dxuzúe' chalá'ala benne' wën da zrinnaj ca'.

<sup>13</sup> ¿Núzraqueze benne' guné' cheeḷe da zrinnaj che le'e cuele gunne xue  
gunle da chawe'?

<sup>14</sup> Lácala tele xel-la' zi' lawe' da dxunle da chawe', gaca na da ba neza cheeḷe.  
Quebe nu zrêbele, ne quebe xrúsale.

<sup>15</sup> Le gapa ba lá'ana Cristo ca Xránale lu xichaj lázrdaule. Le súateze ban lazre'  
xechébele lau benne' ca' dxelenabe' le'e bizr chee na' dxuxrén lázrele Le'. Le  
gun na lu xel-la' dxexruij lazre', ne le gapa ba lá'ana benne' ca'.

<sup>16</sup> Le gun da chawe' cheeḷe quebe bi sua da gagu na zria lu xichaj lázrdaule, na'  
benne' ca' dxelenné' schanni' cheeḷe da chawe' da dxunle lawe' da dxéajlê-le  
cheeḷe Cristo, xelapa stu'e ca dizra' da dxelenné'.

<sup>17</sup> Zácadxa tele xel-la' zi' lawe' da dxunle da chawe' cáteze dxaca lazre Dios,  
ne quegá tele xel-la' zi' lawe' da dxunle da caleḷa.

<sup>18</sup> Caní naca na lawe' da gudé Cristo tu lászaze lu xel-la' gute zi xa' ne chee  
dul-la da nabágdaxu. Le' guque' benne' xrlátaje, na' gudé' xel-la' zi' waláz  
cheeḷdxu dxi'u, benne' wën da zrinnaj, cheeḷe gaca xeché'ē dxi'u lau Dios. Gute  
Cristo lu beḷ-la' dxen chee', san bebánqueze' lu be' nácaqueze'.

<sup>19</sup> Cá'anqueze lu be' nácaqueze' guxiáje' lataj chul-la naga xeajchálajlêne' be'  
zaj nácaqueze benne' ca' nuzaga xel-la' gute lu lataj na'.

<sup>20</sup> Benne' caní quebe buluzúe' dizra' ca da bchalaj Noé gate nate, gate na'  
guleza Dios duté xel-la' zren lazre' chee' dxácatē na' ben Noé da zren na' da  
dxedá lawe' nisadau'. Lu da dxedá lawe' nisadau' gulelá xrúnuze benne' ne  
cheeḷe nisa xiuj da na' bzria xi na ca naca bēnneache.

<sup>21</sup> Nisa xiuj na' dxulé'e na ca naca nisa naga dxelexedxúa benne' nisa, na'  
lu lē na' naladxu na'a. Nisa nigá quegá lē na' quibe na dxi'u, san dxulé'e na  
dxaca lázredxu cháxdedxu lau Dios, na' ladxu lawe' da bebán Jesucristo ládujla  
benne' gate,

<sup>22</sup> ne begüene' xabáa, ne zue' chalá'a xabeḷa cheeḷe Dios, na' dizra' cheeḷe Le'  
dxuluzúa gubáz cheeḷe xabáa, gubáz ca' zaj nape' xel-la' dxenná bea, ne gubáz  
blau ca'.

## 4

### *Dxal-la' gundxu zrin cheeḷe Dios guchínedxu ca da ba nunna Dios dxi'u*

<sup>1</sup> Cheeḷe lē na', ca ben Cristo, gudé' xel-la' zi' lu beḷa' dxen chee', cá'anqueze  
le'e dxal-la' si lu nale tele xel-la' zi' lawe' da che tu benne' ba gudé' xel-la' zi'  
lu beḷa' dxen chee', ba bzua bēnnea' chalá'ala da naca dul-la,

<sup>2</sup> cheeḷe guné' ca da dxaca lazre' Dios dxácatē naca bané', ne quebe guné' ca  
da dxenná beḷa' dxen chee'.

<sup>3</sup> Naze cáтите da ba benle gate nate da dxeledanne benne' quebe zaj núnbe'ē  
Dios. Ca lu iza da ba guledé benle da sban ca', ne da zrinnaj ca' da guzá lázrele,  
ne guzúzrele, ne benle laní sban ca'. Güé'elē'ele, ne bca'ana szrenle bedau'  
xiaj xaga ca' da na' dxecuide Dios.

<sup>4</sup> Benne' ca' quebe zaj núnbe'ē Dios dxelexebánene' lawe' da québedxa  
dxunle lē' tuze ca naca da sban da dxelune', na' cheeḷe lē na' dxelenné' schanni'  
cheeḷe.



<sup>5</sup> Benne' ca', dxun na ba xen xululé'eng' ca da zaj nune' lau Bénnea' naca chee' guchi'e chee' benne' ban ca', ne chee' benne' gate ca'.

<sup>6</sup> Benne' ca' zaj nate belenne' ca naca dizra' chee' Dios chee' xelexaca banē' lu be' zaj nácaqueze' ca naca ban Dios, lácala lu xēzr la xu nigá Dios bchi'e ca da belune' ca guchi'e chee' xúgutē' bēnneache.

<sup>7</sup> Ba za cheajsé' chee' xúgutē' da dxelé'edxu. Chee' lē' na', le sua ban lazre', ne le guchálajlequeze Dios.

<sup>8</sup> Da nácadxa blau, le zrí'ile'e ljawézrele. Che nazrí'idxu benne' bíchedxu ca', na' gunite laudxu da calela da belune' cheedxu.

<sup>9</sup> Le guzúa lízrele ljawézrele tule xetule, ne quebe nnele chee' ljawézrele.

<sup>10</sup> Tu tule le'e dxal-la' gunle zrin chee' ljawézrele ca da nunna Dios chee', ca benne' dxuluchínene' chawe' ca da chawe' da dxunezruj Dios chee'.

<sup>11</sup> Che nu benne' dxuchálaje', dxal-la' guchálaje' da gunezruj Dios lē'. Che nu benne' gunē' zrin chee', dxal-la' gunē' na guchínene' xel-la' waca chee' da nunezruj Dios lē'. Ca naca xúgutē' da dxunle, dxal-la' gaca ba Dios lawe' da nácale bi chee' Jesucristo, na' chee' Lē' gaca xel-la' szren, ne xel-la' dxenná bea chadía chacanna. ¡Ca'an gaca na!

### *Wadedxu xel-la' zi' lawe' da nácadxu bi chee' Cristo*

<sup>12</sup> Benne' bícha'dau' nazrí'ite' lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca.

<sup>13</sup> Le be lawe' da tele xel-la' zi' ca xel-la' zi' da gudé Cristo chee' cá'anqueze béle'ele gate lé'ele xel-la' szren chee' Cristo gate zezé'e.

<sup>14</sup> Che dxulugazja' benne' le'e dizra' lawe' da nácale bi chee' Cristo, ba neza zren naca na chee', lawe' da zúale Be' Lá'azxa chee' Dios le'e, Bénnea' zē'e xabáa. Dxelenné' bēnneache schanni' chee' Lē', san le'e dxápale Lē' ba lá'ana.

<sup>15</sup> Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee' benne', u bi da zrinnaj bēnle, u lawe' da guchixre chee' da naca chee' benne' xula.

<sup>16</sup> Che nu benne' dxedé'e' xel-la' zi' lawe' da naque' bi chee' Cristo, quebe dxal-la' xedué'eng', san dxal-la' güe lá'ang' Dios lawe' da nazí lē' bi chee' Cristo.

<sup>17</sup> Ba bzrin zra su lau Dios guchi'e ca da zaj nun tu tu bi nácabē' chee' Lē'. Che Dios su lawe' guchi'e ca da nundxu dxí'u, ¿ájjala gaca chee' benne' ca' quebe dxelune' ca dxenná dizra' chawe' chee' Dios?

<sup>18</sup> Che benne' xrlátaje ca' cánnaze xelelé' ¿ájjazraqueze gaca chee' benne' wēn da zrinnaj ca', ne chee' benne' wēn dul-la ca'?

<sup>19</sup> Caní naca, benne' dxeledé'e' xel-la' zi' lawe' da dxelune' da xrlátaje da dxaca lazre' Dios, dxal-la' xelúnqueze' da xrlátaje, ne xuluzú'e' bēnne'du zaj xu'e' lu na' Dios, Bénnea' bēnē' le', lawe' da naca Lē' li lazre'.

## 5

### *Pedro dxuzéajni'ing' bi ca' chee' Cristo*

<sup>1</sup> Dxuzéajni'ida' le'e, benne' gula dxuxúele tu tu cue' bi ca' chee' Cristo lawe' da naca' neda' benne' gula ca le'e, ne dxexechēba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee' sidxu da xabáa chee' da gulé'eng' te chee' zra caní.

<sup>2</sup> Ca dxelún benne' dxuluxú'e' zrila' ca', le guxúe' bídu ca' chee' Dios, bēnne'du ca' nabágale. Le gun na dutē' lázrdaule ca dxaca lazre' Dios, quebe gun na ba xen nu benne' nna bé'eng' le'e, ne quebe gunle ba chee' dumí. Le gun zrin du lázrele,

<sup>3</sup> ne quebe gun cuínale ca xrane bénne'du ca' nabágale. Le gun ba xuzre gácale tu da gulé'e na ca dxal-la' xelún bénne'du ca'.

<sup>4</sup> Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na.

<sup>5</sup> Cá'anqueze le'e, benne' cuide', le gun ca da dxelenná benne' gula ca'. Xúgutele dxal-la' guzúale dizra' chee ljuwézrele tule xetule lu xel-la' dxexruj lazre' chee leawe' da dxenná xiche lá'azxa:

Dios dxezré'e benne' ca' dxulucá'ana szren cuine'.

Dute xel-la' chawe' chee' dxácalene' benne' dxexruj lazre' ca'.

<sup>6</sup> Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na.

<sup>7</sup> Le guzúa lu na' Dios xúgute da dxele gunne xue, lawe' da dxe' Le' gunne xue da naca cheele.

<sup>8</sup> Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu beze xixre', dxebezre xa'aba', dxiljaba' nu guébeba'.

<sup>9</sup> Le til-lalé da xriwe', ne le se chacha lu xel-la' dxeajli lazre' chee leawe' da nézquezele dxeledéqueze xúgute bíchele zaj zre'e lu xezr la xu nigá xel-la' zi' ca da dxedele le'e.

<sup>10</sup> Gate bache gudele xel-la' zi' tu chi'i, Dios guné' le'e li lazre', ne guzúa chawe'e le'e. Dios ná'queze dxunne' dxi'u xúgute da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo.

<sup>11</sup> Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

*Pedro dxugape' diuzre bi bíchedxu ca'*

<sup>12</sup> Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

<sup>13</sup> Bi chee Cristo zaj zre'e Babilonia nigá, benne' ca' gucá'a Dios ca guqué'e le'e, dxulugape' le'e diuzre. Cá'anqueze Marcos, bi na' nácabé' ca bi cheéqueza' dxugápabe' le'e diuzre.

<sup>14</sup> Le gugapa diuzre ljuwézrele tule xetule, ne le gunida' ljuwézrele lu xel-la' zri'i lazre'.

Dxenaba' lau Dios gunné' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

## DIZRA' GUDXUPE' DA BZUAJ SAN PEDRO

### *Dizra' da gusel-la San Pedro chee bi ca' chee Jesús*

<sup>1</sup> Neda', Simón Pedro, naca' wen zrin chee Jesucristo, ne benne' gubáz chee'. Dxuzúaja' da nigá chee le'e, ba nápa le-xel-la' dxeajli lazre' da zácale'e, ne naca tuze ca da nápanu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo.

<sup>2</sup> Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

### *Ca dxal-la' gaca bi chee Cristo*

<sup>3</sup> Dios lu xel-la' waca chee' ba nunne' dxi'u xúgute da nachinedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gunné' dxi'u chee gápadxu da xabáa chee Le', ne xel-la' szren chee'.

<sup>4</sup> Caní naca na, ba nunne' dxi'u ca da nachebe lazre', da zaj naca na szrénle'e, ne da zaj zácale'e na, chee ne chee da guchebe lazre' wazrué'ele le'e gácale ca nácaqueze Dios, ne chee lale lu da sban da dxaca lu xezr la xu nigá ne chee da dxezá lazre' belá' dxen chee benneache.

<sup>5</sup> Chee le na' dxal-la' cue'le gunne xue gun xel-la' dxeajli lazre' chee le gunle da xrlátaje, ne chee gun da xrlátaje da dxunle gácale benne' sina.

<sup>6</sup> Xel-la' sina chee le dxal-la' gun na nna be'e cuínale, na' xel-la' dxenná be'e cuina chee le dxal-la' gun na gácale benne' zren lazre', na' xel-la' zren lazre' chee le dxal-la' gun na zri'ile Dios.

<sup>7</sup> Xel-la' zri'i lazre' chee le nen Dios dxal-la' gun na zri'ile benne' bíchedxu ca', na' xel-la' zri'i lazre' chee le nen bíchele ca' dxal-la' gun na gácale zri'i lazre'.

<sup>8</sup> Che le'e dxunle da caní, ne dxelepe ban na, quebe xegá'ana cá'aze xel-la' nabán chee le, ne quebe naca na níteze núnbeale Xránadxu Jesucristo.

<sup>9</sup> Benne' quebe dxune' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dul-la ca' da bene' gate nate.

<sup>10</sup> Chee le na', benne' bícha'dau', le gun ba xuzre nézele Dios gunné' le'e, ne ba guqué'e le'e, na' che gunle da nigá, cabata' cheajcházele.

<sup>11</sup> Caní gun Dios, gúnnale'e le'e lataj chu'ule naga nna bea Xránadxu, ne weselá cheedxu Jesucristo chadia chacanna.

<sup>12</sup> Chee le na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápa.

<sup>13</sup> Dxácate naca bana' dxéqueda' dxun na ba xen gusá'a lázrele chee da caní

<sup>14</sup> lawe' da ba nezda' wátezea' ca ba gunná Xránadxu Jesucristo, guzre' neda'.

<sup>15</sup> Na'a guna' ca da séqueda' chee gate te gatia' neda', cheajsá lázrquezele chee da caní.

### *Benne' belelé'eng' xel-la' szren chee Cristo*

<sup>16</sup> Da bsédentu' le'e ca naca chee xel-la' szren chee Xránadxu Jesucristo, ne ca xel'é xecha lasa quebe naca na ca da dxenná xichaj lázrdau benneache. Netu' blé'equzentu' ca naca xel-la' szren chee Xránadxu.

<sup>17</sup> Blé'entu' Le' gate Xradxu Dios be'e Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite lazra', ne dxezaca ba lazra' nen Le'."

<sup>18</sup> Nétu'queze bémentu' chi'i na' da za na xabáa gate zúantu' nen Xránadxu lu xi'a lá'azxa na'.

<sup>19</sup> Chee lē na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxusení na tu lataj naga naca chul-la ca zrin zra chaní', na' Cristo, Bénnea' naque' ca belaj zila súalēne' le'e chee gusení'ē lu xichaj lázrdaule.

<sup>20</sup> Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'ē na lu xel-la' dxéajni'i cheeze'.

<sup>21</sup> Benne' ca' buluchálaje' waláz chee Dios quebe buluchálaje' ca da gulaca lázrequeze lē'. Gulaque' benne' chee Dios, na' gulenné' waláz chee' ca da bnezruj Be' Lá'azxa lē'.

## 2

### *Ca naca chee benne' ca' dxulusédene' da wen lazre' (Judás 4-13)*

<sup>1</sup> Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédene' bēnneache dizra' chee Dios. Benne' caní wuluzéajni'ing' bēnneache bagácheze ca naca dizra' wen lazre' da guxrinnaj na, na' caní xeledábague' Xránadxu, Bénnea' bselé' dxi'u, na' lawe' da dxulusédene' da caní xelebía xi' zéqueze'.

<sup>2</sup> Benne' zan chjácālēne' ca da sban dxuluséde benne' ca', na' ne chee benne' caní xelenné bēnneache schanni' chee dizra' li chee xel-la' weselá.

<sup>3</sup> Lawe' da dxelezá lazre' xelezí'ē dumí, xelebéaje' le'e dumí ne chee da wen lazre' da dxuluzéajni'ing' le'e. Dios ba nucueze' da guzríā xi na benne' caní, lawe' da ba guchugue' gate nate ca da gaca chee benne' ca'.

<sup>4</sup> Dios quebe bnite lawe' chee gubáz chee xabáa ca' belún dul-la. Bdeē' gubáz chee xabáa ca' lu lataj ba xa', ne bzre'ē lē' lu da chul-la, ne bcheajē' lē' du xia naga zaj nadxéaje' ca zrin zra chugu Dios ca da gaca chee gubáz chee xabáa ca'.

<sup>5</sup> Cá'anqueze Dios quebe bnite lawe' chee benne' ca' gulezrá' gate nate. Gusel-lē' nisa xiuj da bzria xi na benne' ca' belunē' da calēla. Bselé' Noé, bēnnea' bchálaje' ca naca da xrlátaje da dxal-la' xelún bēnneache. Bselé' gázreze benne'.

<sup>6</sup> Cá'anqueze guchugu Dios chee xezre Sodoma, ne xezre Gomorra chee xelebía xi na. Bzézxiē' dxúpatē xezre ca', na' belexegá'anatē na de. Caní dxuluzéajni'i na benne' ca' xelunē' da calēla, benne' xelezrē'ē te na'.

<sup>7</sup> Dios bselé' Lot lu xezre Sodoma na' lawe' da guque' tu benne' xrlátaje, ne bexíajele'ēne' gate blé'ēne' ca naca da sban da dxelún benne' ca' dxelunē' da calēla.

<sup>8</sup> Benne' xrlátaje nigá guzúē' ládujla benne' ca', na' tu zra tu zra guzúā ba xa' lázrdawē' ca dxenné'ē, ne dxenne' ca da calēla da dxelún benne' ca'.

<sup>9</sup> Nézqueze Xránadxu guselé' benne' zaj naca bi chee' che bi da dxusaca zi na lē', na' guzráqueze' benne' ca' dxelunē' da calēla, ca tu lizre xia, ca zrin zra chugue' chee' chjaque' lataj ba xa'.

<sup>10</sup> Dios xudé' xel-la' zi' zrendxa benne' ca' dxelunē' cáteze da sban da dxelezá lazre', ne dxuluzúē' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelunē' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'.

11 Gubáz ca' zaj nápadxë' xel-la' dxenná bea, ne xel-la' szren ca benne' caní, quebe dxelenné' da calëla cheë benne' ca' gate dxelawë' zria cheë' lau Xránadxu.

12 Benne' caní zaj naquë' ca bea ca' quebe zaj naxéajni'iba', be dxelunba' ca da zaj nézezeba', ne zra'ba' cheë xelél-le'-ba', ne xelutië'-ba'. Benne' caní dxelenné' schanni' cheë da quebe dxeléajni'ingë', na' xelátequeze' ca dxelate bea ca',

13 ne xeledéë' xel-la' zi' ca xel-la' zi' buludéë' benne' xula. Dxeléquene' zaj zre'ë lu da ba neza gate dxelebene' ca da dxaca tu zra tu zra. Zaj naquë' ca tu da sban da dxusi'i na le'e xel-la' stu' gate zaj zre'ë nen le'e lu laní cheële, dxácatë ne dxelezúë' lu xel-la' dxebé lu da calëla da dxelunë'.

14 Dxelezá lazre' xúgute nu'ula dxelelé'engë', ne quebe dxelálenë' dxelunë' dul-la. Dxulusi'ë neza xula benne' bíchedxu quebe zaj zë chache'. Dxulucúdequeze', ne zaj naquë' benne' zaj xu'ë de'.

15 Zaj nanítie' lawe' da gulecuase' lu neza li cheë Dios. Dxelunë' ca da ben Balaam, zri'ine Beor. Balaam nigá beñë' ba cheë dumí, ne gudë' dxunë' da calëla,

16 na' bea na', be dxua xua', gunñëba' ca benne', ne gudíl-laba' Balaam ca naca dul-la da dxunë', na' guchúguba' da xala da dxun Balaam.

17 Benne' caní zaj naquë' ca tu beaj bizre, ne ca tu beuj da dxua be' bdunu'. Ba zaj naca cheë benne' ca' xelexegá'angë' chadía chacanna lu da chul-la.

18 Dxelenné' dizra' da dxulucá'ana szren na le', ne da zaj naca na dácheze. Dxuluchínengë' da sban ca', ne da dxezá lazre' belá' dxen cheë bénneache cheë dxulusi'ë chalá'ala benne' ca' za dxelexedxúajtequë' ládujla benne' ca' dxelunë' da calëla.

19 Dxelechebe lazre' xulunézruje' benne' ca' tu xel-la' weselá, san léqueze benne' ca' zaj naquë' wën zrin cheë da sban. Tu tu bénneache naquë' benne' nada'u cheë da dxenná be'e na le'.

20 Benne' ba zaj núnbe'e Xránadxu, ne Weselá cheëdxu Jesucristo, ne ba gulelé' lu da sban cheë xëzr la xu nigá, na' te na' che xelexexu'ë xecha lasa lu da sban na', ne xelu'ë lataj xenná be'e na le', na' gácadxa da ba xa' cheë benne' ca' ca da guca cheë' gate nate.

21 Cháwe' dxela gaca na cheë benne' caní la quebe zaj núnbe'e Cristo, quegala gate ba belúnbe'e Le', na' xelexecuase' ca naca xel-la' dxixruj bea lá'azxa da guzre Dios le' xelunë'.

22 Ca da guca cheë benne' caní dxulé'e na naca da li dizra' nigá da dxenná na:

Becu' dxexáguba' ca da ba bexébeba',

na' cuche za bexíbeba' bexú'uba' xecha lasa lu guzra' cheëba'.

### 3

#### *Ca naca cheë zra xelá' Xránadxu*

1 Benne' bícha'dau' nazri'ítë lazra', da nigá naca na dizra' gudxupe' da dxuzúaja' cheële. Lu dxúpatë xiche caní guca lazra' guzéajni'ida' le'e cheë gulaba lázrele cheë da caní.

2 Le gusá lazre' ca da gulenná benne' lá'azxa ca', benne' buluchálaje' waláz cheë Dios, ne ca naca da gudixruj be'e Xránadxu, Benne' Weselá cheëdxu, da na' bulusëde benne' gubáz cheë' ca' le'e.

3 Dxunna ba xen gúnbeale, lu zra da za zá'aca welelá' benne' xelún le' cheë da zaj naca na da lá'azxa, ne xelunë' cáteze da dxelezá lazre',

<sup>4</sup> ne xuluchebe' bénneache: ¿Bizra guca chee da guchebe lazre' Cristo, gunné': Welá'a? Xra xrtáudxu ca' ba gulatie', na' túzqueze ca guca, gaca na gate guzrete xezr la xu.

<sup>5</sup> Benne' caní quebe dxeleque be'ene' gulezúa xabáa, ne xezr la xu gate nate, Dios gunné' bedxúaj na lu nisa, na' guzúa chacha na lu nisa,

<sup>6</sup> na' xezr la xu da zua gate nate guzría xi na ne chee nisa xiuj,

<sup>7</sup> na' xabáa, ne xezr la xu da zaj zua na na'a, ba naca chee na xelezxe na ca ba núnqueze Dios chee na. Xi' na' guzezxe na da caní lu zra guchi'a Dios, gate xelebía xi' benne' ca' dxelune' da calela.

<sup>8</sup> Benne' bícha'dau' nazri'ite lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na ca tu zraze.

<sup>9</sup> Quebe dxezré Xránadxu guné' da nachebe lazre' ca dxeleque bénneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexéxaje lazre' xúgute' bénneache.

<sup>10</sup> Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelé'edxu, na' gunle'e na schaga, ne ca naca da dxelé'edxu zran xabáa xelebía xi na lu xi', na' xezr la xu nigá chezxe na tu zren nen da de lawe na.

<sup>11</sup> Che ba nézele xelebía xi' xúgute' da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios

<sup>12</sup> dxácaté ne dxebézale zra na', ne dxal-la' gunle ca da séquele zrinte zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'.

<sup>13</sup> Dxi'u dxebézadxu tu xabáa cube, ne tu xezr la xu cube da ba guchebe lazre' Dios naga gaca xlátaje xúgute'.

<sup>14</sup> Chee le na', benne' bícha'dau' nazri'ite lazra', dxácaté dxebézale da caní, le gun ca da séquele chee quebe bi bágale, ne quebe bi nadxenle chee dul-la lau Dios, ne suale lu xel-la' dxebeza zri lazre'.

<sup>15</sup> Le gusá lázrele naca Xránadxu zren lazre' nen dxi'u chee ladxu. Cá'anqueze Pablo, benne' bíchedxu nazri'ite lázredxu, bzuaje' cheele, bchínene' ca naca xel-la' sina da bnezrui Dios le'.

<sup>16</sup> Lu xúgute' xiche da ba bzuaje', ba bchálajlene' le'e ca naca chee da caní, lácala bal-la na nácale'e na stebe chéajni'idxu na, na' benne' ca' quebe dxeléajni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' chee le na' Dios guzría xi'e benne' ca'.

<sup>17</sup> Chee le na', benne' bícha'dau' nazri'ite lazra', che le'e ba nézele da nigá nédxula, le guxúe cuínale chee da wen lazre' chee benne' ca' dxelune' da calela chee quebe xeleché le'e chalá'ala, ne quebe nite xel-la' li lazre' cheele lau Dios.

<sup>18</sup> Le gúnbea xanne' Xránadxu, Benne' Weselá cheedxu, Jesucristo, ne le gula lu xel-la' zri'i lazre' chee'. ¡Gaca ba Le' na'a, ne chadía chacanna! ¡Ca'an gaca na!

## DIZRA' NÉDXUDAU' DA BZUAJ SAN JUAN

### *Xtizra Dios da dxunna na xel-la' nabán li lazre'*

<sup>1</sup> Dxuzúaja' cheeḷe da nigá ca naca chee Bénnea' zúaqueze' gate guzú lau zua xúgute da dxelé'edxu. Dxuzúaja' ca naca chee Bénnea' ba bémentu' chee', ne ca naca da ba blé'equezentu' bene', neda' ne xezícadxa benne' ca' bseḷe Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'.

<sup>2</sup> Bénnea' dxunne' xel-la' nabán zeajlí canna ba blé'e, na' netu' blé'entu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúaleḅe' Xradxu Dios, na' blé'e naga zúadxu.

<sup>3</sup> Da blé'entu', ne da bémentu' dxuzentu' le'e chee gácale tuze nen netu'. Da lítegage, nácadxu tuze nen Xradxu Dios, ne nen Jesucristo, Zri'ine Dios.

<sup>4</sup> Ca naca da caní dxuzúaja' cheeḷe chee gaca du lazre' xel-la' dxebe' cheeḷe.

### *Dios naque' lení' chee xichaj lázrdau bēnneache*

<sup>5</sup> Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca chee da chul-la.

<sup>6</sup> Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li.

<sup>7</sup> Che dxundxu da li da naca chee xel-la' naxaní', ca naca Dios, Bénnea' naque' li lazre', ne zue' lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágdaxu.

<sup>8</sup> Che dxennadxu quebe nabágdaxu dul-la, dxezi xéqueze cuínadxu, na' da li quebe zúale na dxi'u.

<sup>9</sup> Che xrúalepedxu ca naca dul-la da nabágdaxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágdaxu, ne quibe' dxi'u ca naca xúgute da sban da ba bendxu.

<sup>10</sup> Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' chee'.

## 2

<sup>1</sup> Le'e, bi nazri'ite lazra', dxuzúaja' da nigá cheeḷe chee quebe gunle dul-la. Che nu benne' guné' dul-la, zua wenaba cheedxu lau Dios, Jesucristo, Benne' xlátaje.

<sup>2</sup> Le' gutie' waláz cheedxu chee gudúe' da nabágdaxu lau Dios ca naca dul-la cheedxu, ne quegaze da nabágdaxu dxi'u, san gudúe' da zaj nabaga xúgute bēnneache.

<sup>3</sup> Che dxuzúadxu dizra' ca naca da bdxixruj be'e Dios, nezdaxu ba núnbeadxu Le'.

<sup>4</sup> Che nu dxenná: Neda' núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li.

<sup>5</sup> Che nu benne' dxuzúe' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdaxu ba zúadxu tuze nen Le'.

<sup>6</sup> Bénnea' dxenné' naque' tuze nen Dios dxal-la' gaque' ca guca Jesús.

*Tu da cube da bdxixruj be'e Jesús*

<sup>7</sup> Le'e, bi nazri'ite lazra', dxuzúaja' cheeḷe ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudaute. Da gula da bdxixruj bea Dios naca na dizra' da ba bénequezle.

<sup>8</sup> Naca na ca dxuzúaja' cheeḷe tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li chee xel-la' zri'i lazre' lu xichaj lázrdaudxu, da dxegúa na da naca na chee da chul-la.

<sup>9</sup> Che nu benne' dxenné' dxuné' da naca na chee xel-la' naxaní', ne che dxecuidené' le sa' ljwezre', benne' nigá ne dxedé' lu da naca na chee da chul-la.

<sup>10</sup> Benne' nazri'ine' le sa' ljwezre' dxuné' da naca chee xel-la' naxaní', ne quebe dxuné' da guzria xi na le sa' ljwezre'.

<sup>11</sup> Bénnea' quebe chawe' dxelé'eng' le sa' ljwezre', lu da naca na chee da chul-la zua bénnea', ne lu da na' dxedé', ne quebe nézené' ga zéaje' lawe' da dxucá'ana da chul-la le' ca tu benne' la chul-la.

<sup>12</sup> Le'e, bi nazri'ite lazra', dxuzúaja' cheeḷe lawe' da ba bnite lau Dios cheeḷe ca naca dul-la cheeḷe, lawe' da gute Jesucristo waláz cheedxu.

<sup>13</sup> Le'e, benne' nazri'ite lazra', dxuzúaja' cheeḷe lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḷe lawe' da ba bsanle da dxenná da xriwe'.

Le'e, bi nazri'ite lazra', dxuzúaja' cheeḷe lawe' da ba núnbeale Xradxu Dios.

<sup>14</sup> Le'e, xruze xrna', dxuzúaja' cheeḷe lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḷe lawe' da nácale benne' wal-la, ne dizra' chee Dios nápane, ne bsanle da dxenná da xriwe'.

<sup>15</sup> Quebe sa lázrele da calela ca' da zaj naca na chee xezr la xu nigá, ne quegá da zaj de lu xezr la xu nigá. Che nu benne' dxezá lazre' da zaj de lu xezr la xu nigá, quebe nazri'ine' Xradxu Dios.

<sup>16</sup> Da caní zaj naca na chee xezr la xu nigá, da dxezá lázredxu da dxezaca ba lazre' bela' dxen cheedxu, ne da dxezaca ba lazre' xiaj laudxu, ne ca naca xel-la' dxucá'ana szren cuina chee da nápadxu. Xúguté da caní quebe zaj naca na da dxunna Dios, san zaj naca na chee xezr la xu nigá.

<sup>17</sup> Ba za zra xuzre lazre' xezr la xu nigá, ne ca naca da dxezá lázredxu da naca na chee xezr la xu nigá. Bénnea' dxuné' da dxaca lazre' Dios wazúatecaze'.

*Ca naca da li, ne da wen lazre'*

<sup>18</sup> Le'e, bi nazri'ite lazra', zra caní zaj naca na zra bzebe. Ba bénele gulé'e lawe' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Chee le na' nezdXu ba zúadxu zra bzebe.

<sup>19</sup> Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'analéqueze' dxi'u. Caní guca chee nezdXu quebe zaj naca xúguté' tuze nen dxi'u.

<sup>20</sup> Ca naca cheeḷe le'e, ba zúale Be' Lá'azxa le'e, Bénnea' gusel-la Xradxu Lá'azxa. Chee le na' ba nézele xúguté da caní.

<sup>21</sup> Dxuzúaja' cheeḷe da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naque' da li.



22 ¿Nuzra' naca benne' wɛn lazre'? Naca bɛnnea' dxenné' Jesús quebe naque' Cristo, Benne' nase-la Dios. Benne' wɛn lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios.

23 Xúgute benne' dxelenné' Jesús quebe naque' Zri'ine Dios, Dios quebe zúaleɛ' benne' ca'. Bɛnnea' dxexechɛɛ' Jesús naque' Zri'ine Dios, Dios zúalequeze' bɛnnea'.

24 Cheɛ lɛ na', le cu'u lu xichaj lázrdaule dizra' da ba bɛnele nédxudaute. Che da ba bɛnele nédxudaute zua na lu xichaj lázrdaule, le'e súatequezle tuze nen Zri'ine Dios, ne nen Xradxu Dios.

25 Da nigá naca na da nachebe lazre' Dios, gunne' dxi'u xel-la' nabán zeajli canna.

26 Ba bzuaaja' cheɛle da nigá ca naca cheɛ benne' ca' dxelezí xɛ'e le'e.

27 Na'a zúale Be' Lá'azxa le'e, Bɛnnea' gusel-la Jesucristo cheɛle, na' Be' Lá'azxa nigá zue' xichaj lázrdaule. Cheɛ lɛ na' quebe nachínele nu gusede le'e lawe' da dxusede Be' Lá'azxa le'e ca naca xúgute da caní, na' da dxusédenɛ' le'e naca na da li, ne quebe naca na da wɛn lazre'. Cheɛ lɛ na', le súatequeze tuze nen Cristo ca naca da ba bsede Be' Lá'azxa le'e.

### *Ca naca cheɛ benne' zaj naque' zri'ine Dios*

28 Na'a, bi nazrí'ite lazra', le súatequeze tuze nen Cristo, cheɛ súadxu li lazre' gate xelá' Lɛ', ne quebe xedué'edxu lau Lɛ' gate xelé'ɛ.

29 Ba nézele naca xlátaje Dios. Cheɛ lɛ na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

## 3

1 Le nna' xque ca nazrí'ile'ɛ Dios dxi'u lawe' da nazí ladxu bi cheɛ Dios, ne caní nácadxu. Cheɛ lɛ na' quebe zaj neze bɛnneache lu xɛzr la xu nigá da nácadxu lawe' da quebe belúnbe'ɛ Jesús.

2 Le'e, bi nazrí'ite lazra', na'a nácadxu bi cheɛ Dios. Quebe ne gul'e lawe' da gácadxu. NezdXu gate xelá' Lɛ', gácadxu ca naca Lɛ' lawe' da lé'edxu Lɛ' ca nácaqueze Lɛ'.

3 Nu benne' dxebeza lazre' gaque' ca naca Jesús dxuel lazre' gaque' du lazre' ca naca Jesús, naque' du lazre'.

4 Nu benne' dxunɛ' dul-la quebe dxuzúɛ' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios.

5 Ba nézele bla' Jesucristo cheɛ gudúɛ' dul-la nabágadxu, ne Lɛ' quebe bi dul-la bene'.

6 Xúgute benne' zaj zúatequeze' tuze nen Jesús quebe dxelunɛ' dul-la, na' xúgute benne' dxelunɛ' dul-la quebe ne xeelé'engɛ' Cristo, ne quebe ne xelúnbe'ɛ Lɛ'.

7 Le'e, zrí'ina'dau', quebe güele lataj nu si xɛ le'e. Bɛnnea' dxunɛ' da xlátaje, xlátaje naque', ca naca Dios, naque' xlátaje.

8 Benne' dxunɛ' dul-la naque' cheɛ da xriwe' lawe' da dxun da xriwe' dul-la nédxudaute. Cheɛ lɛ na' bla' Zri'ine Dios, cheɛ bzria xi'e xúgute da nun da xriwe' lu xɛzr la xu nigá.

9 Xúgute benne' zaj naca bi cheɛ Dios quebe dxelunɛ' dul-la lawe' da zúaletequeze Be' cheɛ Dios benne' ca'. Cheɛ lɛ na' québedxa gaca xelezúɛ' xelunɛ' dul-la lawe' da zaj naque' bi cheɛ Dios.

<sup>10</sup> Naca bea nu naca bi cheē Dios ne nu naca bi cheē da xriwē'. Bénnea' quebe dxunē' da xrlátaje ne quebe nazri'inē' le sa' ljwezrē' quebe naquē' bi cheē Dios.

### *Dxal-la' zri'idxu tu xetudxu*

<sup>11</sup> Da nigá naca na dizra' da ba bénequezle nédxudautē, da dxenná na: Dxal-la' zri'idxu tudxu xetudxu.

<sup>12</sup> Quebe gundxu ca ben Caín, bi na' gúcabe' cheē da xriwē', na' bétebe' bi bíchebe'. ¿Bizr cheē na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

<sup>13</sup> Le'e, benne' bícha'dau', quebe xebánele che béneache lu xezr la xu nigá dxuluzúē' le'e chalá'ala.

<sup>14</sup> Nezdxu ba bdxúajdxu lu na' xel-la' gute, ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'inē' bíchedxu ca' zúaquezē' lu xel-la' gute.

<sup>15</sup> Bénnea' dxuzúē' chalá'ala bíchedxu ca' naquē' ca tu benne' dxute benne', na' ba nézquezele le'e nu benne' dxute benne' quebe napē' xel-la' nabán zeajlí canna.

<sup>16</sup> Ba nezdxu da naca xel-la' zri'i lazre' lawe' da bzanne Jesucristo xel-la' nabán cheē', na' gutiē' waláz cheedxu. Cá'anqueze dxi'u dxal-la' guzúadxu xel-la' nabán cheedxu cheē gácalēdxu bíchedxu ca'.

<sup>17</sup> Che tu benne' napē' xel-la' gunní'a da naca na cheē xezr la xu nigá, ne che dxelé'enē' le sa' ljwezrē' dxexázejnē', na' che quebe xexache lazre' lē', benne' nigá quebe nazri'inē' Dios.

<sup>18</sup> Le'e, zri'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dxal-la' gúntequezdxu na, na' gaca bea na da li nazri'idxu bíchedxu ca'.

### *Zua zri lárzraudxu lau Dios*

<sup>19</sup> Che gundxu caní ba nezdxu nácadxu cheē da li, na' sua zri lárzraudxu lau Dios,

<sup>20</sup> gate zua tu da dxagu na zria lu lárzraudxu, lawe' da nezdxu naca Dios zrendxa ca lárzraudxu. Le' nézqueznē' ca naca da dxundxu.

<sup>21</sup> Ca'an naca, bi nazri'itē lazra', che quebe zua tu da dxagu na zria lu lárzraudxu, waca sua zrize lárzraudxu lau Dios,

<sup>22</sup> na' Le' gunnē' dxi'u xúgutē da nábadxu lawē'. Ca'an gaca lawe' da dxuzúadxu dizra' da bdxixruj be'e Dios, ne dxundxu da dxezaca ba lazre' Lē'.

<sup>23</sup> Da bdxixruj be'enē' dxi'u naca na chéajlēdxu cheē Jesucristo, Zri'ine Dios, ne zri'idxu tudxu xetudxu ca bdxixruj be'e Lē'.

<sup>24</sup> Bénnea' dxuzúē' dizra' da bdxixruj be'e Lē' zúalēquezē' Dios, na' Dios zúalēquezē' bénnea'. Ba nezdxu Lē' zúalēquezē' dxi'u lawe' da bache bennē' dxi'u Be' cheē'.

## 4

### *Naca bea Be' cheē Dios*

<sup>1</sup> Le'e, bi nazri'itē lazra', quebe chéajlē cheē xúgutē benne' dxelenné' zúalē Be' cheē Dios lē'. Le nna' xque ca naca da dxulusédené' cheē nézele che zúalē Be' cheē Dios lē'. Caní dxal-la' gunle lawe' da ba belelá' benne' zantē, benne' wen lazre', dxelenné' dxuluchálaje' waláz cheē Dios.

<sup>2</sup> Caní gaca nézele che zúalē Be' cheē Dios tu benne'. Xúgutē benne' dxelexechēbē' ba bla' Jesucristo, ne guquē' bénneache, benne' caní zaj naquē' cheē Dios.

<sup>3</sup> Xúgute benne' quebe dxelexechebe' ca guca Jesucristo quebe zaj naque' chee Dios. Zaj naque' chee bénnea' dxedábague' Jesucristo. Ba bénele gul'é lawe' bénnea', na' na' a ba zue' lu xezr la xu nigá.

<sup>4</sup> Le'e, bi nazrí'ite lazra', nácale chee Dios, ne bache bzúale chalá'ala benne' ca' dxelezí x'e' lawe' da szrendxa naca Be' zúale na le'e ca be' zua na lu xezr la xu nigá.

<sup>5</sup> Benne' ca' zaj naque' chee xezr la xu nigá. Chee le' na' dxuluchálaje' chee da naca na chee xezr la xu nigá, na' benne' zaj zre'e xezr la xu nigá dxellenne' da dxuluchalaj benne' ca'.

<sup>6</sup> Dxi'u nácadxu chee Dios. Benne' zaj núnbe'e Dios dxuluzé nague' cheedxu. Benne' quebe zaj naque' chee Dios quebe dxuluzé nague' cheedxu. Chee le' na' nezdXu nu benne' zúale Be' chee xel-la' li le', ne nu benne' zúale be' chee da dxezí x'e' na le'.

### *Tu dxúnzqueze Dios da naca chee xel-la nazrí'i lazre'*

<sup>7</sup> Le'e, bi nazrí'ite lazra', dxal-la' zri'idxu tudxu xetudxu lawe' da dxunna Dios dxi'u xel-la' nazrí'i lazre' na'. Xúgute benne' zaj naque' zri'i lazre' caní zaj naque' zri'ine Dios ne zaj núnbe'e Dios.

<sup>8</sup> Bénnea' quebe naque' zri'i lazre' caní quebe núnbe'e Dios lawe' da tu dxúnzqueze Dios da naca chee xel-la nazrí'i lázre'.

<sup>9</sup> Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xezr la xu nigá chee zrué'edxu xel-la' nabán da naca na chee Zrí'ine' na'.

<sup>10</sup> Xel-la' zri'i lazre' li naca na caní: Quegá dxi'u na' bzri'idxu Dios. Le' bzri'ine' dxi'u, ne gusel-le' Zrí'ine' chee guque' da gudúa na da nabágadxu lau Dios lawe' da nabágadxu dul-la.

<sup>11</sup> Le'e, bi nazrí'ite lazra', che Dios bzri'ine' dxi'u caní, dxi'u dxal-la' zri'idxu tudxu xetudxu.

<sup>12</sup> Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' cheedxu.

<sup>13</sup> NezdXu nácadxu tuze nen Dios, na' Dios naque' tuze nen dxi'u lawe' da bzue' Be' chee' lu lázrdaudxu.

<sup>14</sup> Ba blé'entu', ne dxumentu' le'e ca naca da ben Xradxu Dios, gusel-le' Zrí'ine' chee bedajselé' bénneache chee xezr la xu nigá.

<sup>15</sup> Bénnea' dxexechébe' naca Jesús Zrí'ine Dios, Dios zúalequeze' bénnea', na' le' zúalequeze' Dios.

<sup>16</sup> Ba núnbeadxu ca nazrí'i Dios dxi'u, ne ba guxéajlédxu nazri'ine' dxi'u. Tu dxúnzqueze Dios da naca chee xel-la nazrí'i lazre', na' bénnea' naque' zri'i lazre' caní zúalequeze' Dios, na' Dios zúalequeze' le'.

<sup>17</sup> Caní dxaca li xel-la' zri'i lazre' cheedxu, chee sua zrize lázrdaudxu lu zra guzrí'a xi' Dios bénneache, benne' ca' dxelune' da caléla, lawe' da nácadxu lu xezr la xu nigá ca náaqueze Jesucristo.

<sup>18</sup> Bénnea' naque' zri'i lazre' caní quebe dxezrebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zri'i lazre' chee'.

<sup>19</sup> Dxi'u nazrí'idxu Dios lawe' da bzri'i Dios dxi'u nédxudaute.

<sup>20</sup> Che nu benne' dxenné': Nazrí'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazri'ine' le sa' ljwezre', bi dxelé'etene', ¿ájazra guné', zri'ine' Dios, ne quebe dxelé'ene' Le'?

<sup>21</sup> Dios ba bdxixruj be'enge' dxi'u caní, gunné': Bénnea' nazri'ine' Dios, zrí'iquezne' le sa' ljwezre'.

## 5

### *Ca bdxúajdxu chawe' lu xezr la xu nigá*

<sup>1</sup> Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios.

<sup>2</sup> NezdXu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u.

<sup>3</sup> Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe.

<sup>4</sup> Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da dxéajle'dxu da naca na chee Jesucristo.

<sup>5</sup> Benne' dxedxuaje' chawe' lau da calela da dxaca na lu xezr la xu nigá naque' bénnea' dxéajle'e naca Jesús Zri'ine Dios.

### *Da dxenná Dios ca naca chee Zrí'ine'*

<sup>6</sup> Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li.

<sup>7</sup> Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze.

<sup>8</sup> Cá'aqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na.

<sup>9</sup> Dxéajle'dxu da dxelixruj li bénneache, san da nadxixruj li Dios zácadxa na, na' Le' nadxixruj lie' naca Jesús Zrí'inequeze'.

<sup>10</sup> Bénnea' dxéajle'e naca Jesús Zri'ine Dios ba guzi'e xichaj lázrdawe' da ba gudxixruj li Dios, san bénnea' quebe dxéajle'e chee Dios dxucá'ang' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'.

<sup>11</sup> Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo.

<sup>12</sup> Bénnea' zua Zri'ine Dios na' lu xichaj lázrdawe' zúale xel-la nabán nigá le', san bénnea' quebe zua Zrí'ine' lu xichaj lázrdawe' quebe zúale xel-la' nabán nigá le'.

### *Ca gaca nezdxu nápadxu xel-la' nabán zeajlí canna*

<sup>13</sup> Da nigá dxuzúaja' chee dxéajle chee Zri'ine Dios chee nézele zúale xel-la' nabán zeajlí canna le'e.

<sup>14</sup> Dxuxrén lázredxu Dios lawe' da nezdxu che bi nábadxu lau Le' ca naca da dxaca lazre' Le', Léqueze' wenne' cheedxu.

<sup>15</sup> Lawe' da nezdxu Dios dxenne' cheedxu, cá'aqueze ba nezdxu gunna Le' da ba gunábadxu lau Le'.

<sup>16</sup> Che tu benne' dxelé'enge' dxun bíchedxu dul-la da quebe nua na xel-la' gute, dxal-la' nabe' lau Dios ne chee bíchedxu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da

nua na xel-la' gute, na' quebe dxennía' nábale lau Dios ne chee bénnea' dxunē' dul-la nigá.

<sup>17</sup> Xúgute da calela naca na dul-la, na' de dul-la da quebe nua na xel-la' gute.

<sup>18</sup> NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zri'ine Dios le', na' da xriwe' quebe bi dxezeque gunē na le'.

<sup>19</sup> NezdXu nácadXu bi chee Dios, na' xúgute benne' zaj naca chee xezr la Xu nigá zaj xu'e lu na' da xriwe'.

<sup>20</sup> NezdXu ba bla' Zri'ine Dios, ne ba bzéajni'ing' dxi'u chee gúnbeadXu Dios li. NácadXu tuze nen Bénnea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u.

<sup>21</sup> Le'e, zri'ina'dau', le guxúe xanne' cuínale chee quebe gucá'ana szrenle bedau' xiaj xaga ca'.

## DIZRA'DAU' GUDXUPE' DA BZUAJ SAN JUAN

### *Da naca li, ne xel-la' zri'i lazre'*

<sup>1</sup> Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e.

<sup>2</sup> Nazrí'ida' le'e lawe' da ba núnbeadxu da li, da súatequeze na xichaj lázrdaudxu.

<sup>3</sup> Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

<sup>4</sup> Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios.

<sup>5</sup> Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute'.

<sup>6</sup> Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute', chee zri'idxu tudxu xetudxu.

### *Benne' dxelezi xe'e*

<sup>7</sup> Ba belelá' benne' zante, benne' dxelezi xe'e. Benne' caní quebe dxelex-echébe' guca Jesús bela' dxen. Benne' caní zaj naque' benne' dxelezi xe'e, ne dxeledábage' Cristo.

<sup>8</sup> Le guxúe xanne' cuínale chee quebe gunítele da dxal-la sile du naxá'.

<sup>9</sup> Nu benne' dxedé' nagá xula chee da nigá quebe dxezilene' ca naca da bsede Cristo, ne quebe zúale Dios le'. Bénnea' dxezilene' ca naca da bsede Cristo, da li Dios zúalene' Le', na' cá'anquez zúale Cristo Le'.

<sup>10</sup> Che nu benne' xide' naga zúale le'e, ne quebe dxusédené' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana.

<sup>11</sup> Nu benne' gape' bénnea' ba lá'ana, dxun benne' nigá tuze ca da calēla da dxun bénnea'.

### *Dizra' bzebe*

<sup>12</sup> Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

<sup>13</sup> Bidu ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

## DIZRA'DAU' GUXUNNE' DA BZUAJ SAN JUAN

### *San Juan dxenné' da chawe' chee benne' le' Gayo*

<sup>1</sup> Neda', benne' gula wen zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

<sup>2</sup> Lue', bi nazrí'ite lazra', dxenaba' lau Dios gaca da chawe' chiu', ne su chawe', ca dxaca chee bènne'du xu'u.

<sup>3</sup> Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li.

<sup>4</sup> Québequeze bi de da gundxa na neda' súale'a xel-la' dxebe', ca xel-la' dxebe' da zua' gate dxenda' dxelún benne' zaj naque' ca zrí'inequeza' ca naca da li.

<sup>5</sup> Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula.

<sup>6</sup> Lau benne' zaj nazrague' chee Dios nigá dxuluchalaj bi bíchedxu caní ca nazrí'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dxezaca ba lazre' Dios.

<sup>7</sup> Benne' caní zjaque' dxelune' zrin nigá lawe' da zaj nazrí'ine' Cristo, ne quebe bi dxelezi'e da xelunna benne' quebe zaj núnbe'e Dios.

<sup>8</sup> Chee le' na' dxal-la' gápadxu ba lá'ana benne' caní chee gúnledxu le' zrin chee da li.

### *Da calëla da dxun benne' le' Diótréfes*

<sup>9</sup> Ba bzuaia' chee benne' zaj nazrague' chee Dios naga zu', na' bènnea' le' Diótréfes quebe dxape' netu' ba lá'ana lawe' da dxaca lazre' gaque' blau lówela benne' ca'.

<sup>10</sup> Chee le' na', che xida' naga zu', guzéajni'ida' benne' ca' ca naca da dxun bènnea', dxezí tizre' netu', ne dxennéle'e cheentu'. Quegá da nigáze dxune', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezí' lu ne'e benne' caní, ne dxexebéaje' le' ládujla benne' ca' zaj nazrague' chee Dios.

<sup>11</sup> Lue', bi nazrí'ite lazra', quebe gunu' lue' ca naca da calëla da dxelún benne' caní. Ben ca naca da xrlátaje. Bènnea' dxune' da xrlátaje naque' chee Dios, san nu benne' dxune' da calëla, quebe ne gúnbeaqueze' Dios.

### *Da xrlátaje da dxun benne' le' Demetrio*

<sup>12</sup> Xúgute' benne' dxeleñé' da chawe' ca naca da dxun Demetrio, na' da líqueze naca bea na ca dxune'. Cá'anqueze netu' dxixruj beantu' ca naca da dxune', na' lue' nézqueznu' dxuchálajntu' da li.

### *Dizra' bzebe*

<sup>13</sup> Délé'e da dxal-la' guchálajlena' lue', san quebe dxaca lazra' guzúaja' na lu xícheze,

<sup>14</sup> lawe' da dxebeza lazra' lé'etequezda' lue'. Nadxa guchálajdxu caníqueze.

<sup>15</sup> Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

## XTIZRA DIOS DA BZUAJ SAN JUDAS

### *Dizra' da gusel-la San Judas cheę bi ca' cheę Dios*

<sup>1</sup> Neda', Judas, wën zrin cheę Jesucristo, naca' benne' biche Jacobo, na' dxešel-la' dizra' nigá cheęle le'e, nácale benne' ca' ba gunné Xradxu Dios, ne ba guqué'e le'e cheę gácale bi cheę', ne dxuxú'e le'e lawe' da nácale tuze nen Jesucristo.

<sup>2</sup> Dxenaba' lau Dios xache lázrele'e le'e, ne gúnnale'e cheęle xel-la' dxebeza zri lazre', ne xel-la' zri' lazre'.

### *Ca naca cheę benne' ca' dxulusédene' da wën lazre' (2 Pedro 2.1-17)*

<sup>3</sup> Benne' bícha'dau' nazri'ite' lazra', ba guca lázreli'a guchálajlena' le'e ca naca cheę xel-la' weselá da ba nazile le'e, ne cá'anqueze neda', san na'a dxun na ba xen guchálajlena' le'e, ne gata' xueda' le'e gapa típale da naca cheę xel-la' dxeajlí lazre' da ba benna Dios chalásaze cheę bi cheę' ca'.

<sup>4</sup> Caní naca lawe' da ba gulú'u benne' wën lazre' ca' ládujla dxi'u, benne' ca' ba gunná Dios gate nate dxal-la' xelebíá xi'e. Zaj naque' benne' dxelune' da sban, na' lawe' da dxunite lau Dios cheę benne' dul-la, dxeléquene' zaj nápaqueze' lataj xelune' cáteze da dxelaca lazre', ne dxuluzú'e' chalá'ala Dios tu licha', Bénnea' dxenná bea, ne Xránadxu Jesucristo.

<sup>5</sup> Lácala ba nézquezle le'e da nigá, dxaca lazra' gusá'a lázrele ca ben Xradxu Dios gate bebéajé' benne' Israel ca' ládujla benne' Egípto, na' gudé na' bzria xi'e benne' Israel ca', benne' quebe guléajlé'e cheę'.

<sup>6</sup> Cá'anqueze gubáz cheę xabáa, gubáz ca' cheę Dios, quebe belune' ca da guzre Dios le', san bulucá'ane' lataj cheę'. Dios nuzague' le' lu da chul-la, ne nuchéajé' gubáz ca' chalásaze nen du xia, cheę guzríá xi'e le' lu zra bzebe ni'.

<sup>7</sup> Cá'anqueze guca cheę xezre Sodoma, ne xezre Gomorra ne cheę xezre walízredu ca'. Ca belún gubáz cheę xabáa ca', cá'anqueze belún bënneache cheę xezre caní. Buluzúa cuine' lu da sban, ne belune' cáteze da gulaca lazre', ne buluzú'e' chalá'ala ca da bdxixruj bea Dios cheę xel-la' zúale nu'ula. Na'a, lawe' da bzria xi' Dios benne' ca', bdeę' le' tu lu xi' da québedxa xexula na, na' da na' guca cheę benne' caní dxuzéajni' na dxi'u cheę quebe gúnquezdxa ca'.

<sup>8</sup> Láqueze gulaca caní cheę benne' ca', cá'anqueze dxelún benne' caní, zjácálene' xel-la' bchigala, ne dxuluca'ane' sban bęla' dxen cheę', ne dxuluzú'e' chalá'ala xel-la' dxenná bea cheę Xránadxu, ne dxelenné' schanni' cheę gubáz cheę xabáa, gubáz ca' cheę Dios.

<sup>9</sup> Léqueze Miguel, gubáz blau cheę xabáa cheę Dios gate gudíl-lalene' da xriwe', ne btil-le' dizra' nen le' na cheę guca bexu'e bęl-la' dxen cheę Moisés, quebe bexázrjene' nnabe' da ba xa', san guzre' na: "Xránadxu Dios tıl-laqueze' lue'."

<sup>10</sup> Na'a benne' caní dxelenné' schanni' cheę da quebe zaj núnbe'e, na' da ba zaj núnbeaqueze', ca da zaj neze bę xixre', bę quebe zaj naxéajni'iba', da caní dxuluchínene' cheę xuluzríá xi' cuine'.

<sup>11</sup> Edxugua benne' caní lawe' da dxelune' ca da ben Caín, cheę gulezí' lu ne'e dumí, buluzú'e' chalá'ala da dxenná Dios ca ben Balaam, na' welexenite' ca guca cheę Coré, bënnea' bzria xi' Dios lawe' da gudábage' xrtizra Dios.



12 Benne' caní, gate dxelágulñe' le'e lu laní chee dxelunę' cheajlechaze bénneache. Dxelé'aj dxelawę' nen le'e, ne quebe dxelape' ba lá'ana Dios. Dxelún cuine' ca benne' dxuluxúę' zřila', san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebia na da zixre chee na, ne zaj nabizre na du lue na, ne ba zaj zua na chee lepe na.

13 Zaj naque' ca xeajxruza chee nísadau' da dxedxú'u na bzřina' sğute, da dxulé'e na ca da sban da dxelunę'. Zaj naque' ca belaj ca' dxelecuasa na lu xrneze na, ne zaj nabía xi na chee cheajsúa na chadía chacanna lu da chul-la.

14 Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca'

15 chee guchi'e ca da zaj nun xúgute Bénneache. Gulezřía xi' xúgute benne' wen da sban ne chee da calela da belunę' lu xel-la' calela chee', nen benne' dul-la ca' ne chee xúgute dizra' schanni' da gulennę chee Dios."

16 Zaj naque' benne' wagu zřia, ne benne' wezí tizra', benne' dxelunę' cáteze dxelezaca ba lazre'. Dxuluchálaje' dizra' da dxucá'ana szren na le', ne dxelennáze' da chawe' chee Bénneache chee xelezí'e da zaj de chee benne' ca'.

### *San Judas dxennę xuene' bi ca' chee Xránadxu*

17 Le'e, benne' bícha'dau' nazri'ite lazra', le gusá lázrele ca zánete iza gulenná benne' gubáz chee Xránadxu Jesucristo,

18 gulé'e le'e: Lu zra bzebe welezřá' benne' xelún le' chee da ca' zaj naca lá'azxa, ne xelunę' cáteze zaj naca da sban da dxelezá lazre'.

19 Benne' caní dxelunę' chupa la'a Bénneache. Zaj naque' benne' chee xęzř la xu nigá, ne quebe zúale Be' Lá'azxa chee Dios le'.

20 Le'e, benne' nazri'ite lazra', le se chacha ca naca lu xel-la' dxeajlí lazre' lá'azxa da nápane. Le guchálajle Dios, zúale xel-la' waca chee Be' Lá'azxa le'e.

21 Le cha' lu xel-la' zři'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zři'i lazre' chee'.

22 Le gácale benne' ca' dxelaca chupa lazre' ca naca chee Cristo.

23 Le gun xeelá benne' xula chee quebe chjaque' lu xi' chee lataj ba xa', ne le xexache lazre' xezícala Bénneache. Le guxúe xanne' ca naca da sban da dxelún benne' ca' chee quebe ca'a le na le'e.

### *San Judas dxue lá'ane' Dios*

24-25 Dios tu licha', Benne' naque' sina, ne naque' Weselá cheedxu, wazéquene' guxúę' le'e chee quebe cuásale Le', ne chee guzúę' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebe le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

## DIZRA' DA BLE'E JESUCRISTO JUAN

### *Da ble'e Jesucristo Juan*

<sup>1</sup> Da nigá naca tu da bnezruj Dios Jesucristo da gulé'ene' wen zrin chee' ca' ca naca da dxal-la' gácatę. Jesucristo gusel-le' gubáz chee' xabáa chee', na' le' bzejani'ine' neda', Juan, naca' wen zrin chee' Jesús.

<sup>2</sup> Neda' dxulé'eda' le'e da li ca naca xúgutę da ble'eda', ne dxexecheba' ca naca dizra' chee' Dios, ne ca naca da gunná Jesucristo.

<sup>3</sup> Ba neza zrente naca na chee' benne' gulabe', ne cá'anqueze ba neza zrente naca na chee' benne' ca' dxuluzé nague' chee' bënnea' gulabe' dizra' nigá da benna Dios, ne xelunę' ca naca da naxúaj nigá, lawe' da ba za gáguze zra gaca na.

### *Juan dxuzuaje' chee' gazre cue' benne' dxelėjle'e chee' Jesús*

<sup>4</sup> Neda', Juan, dxuzúaja' chee' gazre cue' benne' dxelėjle'e chee' Jesús, zaj zře'e naga nababa Asia. Dxenaba' lau Dios gaca chawe' chee'e, ne gunne' le'e xel-la' dxebeza zri lazre'. Le' guzúaqueze' nédxudaute, ne zúaqueze' na'a, ne tu súazqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze,

<sup>5</sup> ne cá'anqueze Jesucristo naque' Le' tuze ca naca da chawe' da dxun Dios chee'e. Jesucristo naque' benne' li lazre' dxexechebe' ca da zaj naca chee' Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lávela xúgutę wenna' bea zaj zře'e xęzr la xu nigá. Cristo nazri'ine' dxi'u, ne ba gudibe' xichaj lázrdaudxu. Begü'e' dul-la cheedxu gate blálaje' dxen cheéqueze' le'e xaga begúaj.

<sup>6</sup> Bene' dxi'u ca benne' wenna' bea ca', ne bxruze ca' chee' gundxu zrin chee' Dios chee', Bënnea' naque' Xře'. ¡Gaca ba Le', ne gape' xel-la' dxenná bea chadía chacanna! ¡Ca'an gaca na!

<sup>7</sup> Le na' xque. Cristo ze'e lu beuj bza. Xúgutę bënneache xeledé'ene' Le', ne cá'anqueze benne' ca' belunę' Le' we', na' ca naca bënneache zaj zra' lu xęzr la xu xebeze xache'e ca xeledé'ene' Le'. ¡Awe', ca'an gaca na!

<sup>8</sup> Le' dxenné': "Neda' zúaqueza' nédxudaute, ne zúaqueza' bzébedxa. Dxuna' su lau sua xúgutę ne guna' xexuzre na." Caní dxenná Xránadxu, nape' dute xel-la' dxenná bea, naque' Bënnea' guzúaqueze', ne zúaqueze', ne tu súazqueze'.

### *Juan dxelé'ene' tu da ble'e Dios le' da naca na da xabáa chee' Cristo*

<sup>9</sup> Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'e lize xia guzúa' lu xęzr la xu Patmos da naxechaj nísadau', lawe' da bchálaja' dizra' chee' Dios ne dxuna' ba nalí ca naca chee' Jesucristo.

<sup>10</sup> Guzúale Be' Lá'azxa neda' lu zra chee' Xránadxu, na' benda' cúzrula' chí'i tu benne' dxenné' zizraj ca chí'i luzu da dxulucueze'.

<sup>11</sup> Gunné':

—Neda' naca' nedxu, ne bzębe ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na chee' gazre cue' bënneache dxelėjle'e chia', zaj zře'e naga nababa Asia, benne' ca' zaj zře'e xęzre Efeso, ne xęzre Esmirna, ne xęzre Pérgamo, ne xęzre Tiatira, ne xęzre Sardis, ne xęzre Filadelfia, ne xęzre Laodicea.

<sup>12</sup> Bexéchaja' chee le'eda' nu chi'i na' gunné neda', na' ca bexéchaja' na', ble'eda' gazre da zua na xi' da' zaj naca na oro.

<sup>13</sup> Laduj da zaj zua na xi' ca' ble'eda' tu benne' naque' ca Bénnea' gulje' bénneache, nácuē' zra lanē' da dxezrintē lu ni'e dxē'ela, na' xu'u tu bazxu oro lachu'e.

<sup>14</sup> Xícha xíchajē' zaj naca na chiche ca zrila' chiche, u ca bezxe', na' xiaj lawē' dxelácatite legala na ca xi'.

<sup>15</sup> Ni'e dxelácatite na ca xia da gudete' bea guxú'u na lu xi', na' chi'e naca na zizraj ca naca chi'i zane' xegu zri'a ca'.

<sup>16</sup> Lu ne'e da zua xabēla nuxre' da ca' zaj naca ca gazre belaj xabáa, na' dxu'e dxedxuj da naca na ca tu xia da nalá dxupa la'ate. Dxu'a lawē' dxácatite na ca gubizra gate dxennále'e na.

<sup>17</sup> Ca ble'eda' Le', xeajchazia' zran ni'e ca tu benne' gate. Na' Le' guxrúa ne'e xabēla neda', na' gunné':

—Quebe zrebu'. Neda' zúaqueza' nédxudaute, ne zúaqueza' bzébedxa.

<sup>18</sup> Naca bánqueza'. Gutia', na' na'a nabánqueza' chadía chacanna. Neda' nuxra' zren xia chee xel-la' gute, ne chee lataj ba xa'.

<sup>19</sup> Bzuaj da ba blé'enu' ne da dxaca na'a, ne da gaca te nigá.

<sup>20</sup> Caní naca da zéaje ca gazre belaj ca' blé'enu' nuxra' na'a xabēla, ne ca naca chee gazre da zua na xi' da' zaj naca na oro. Gazre da zaj naca ca belaj ca' zéaje na gubáz ca' nassel-la' chee gazre cue' bénneache chia' ca', na' gazre da zua na xi' zéaje na gazre cue' bénneache chia' ca'.

## 2

*Dizra' gusel-la Cristo chee gazre cue' bénneache chee'*

*Dizra' gusel-le' chee bi chee' zaj zre'e xezre Efeso*

<sup>1</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Efeso. Bzuaj da nigá: Caní dxenná Jesús, Bénnea' nuxre' gazre belaj ne'e xabēla, ne dxedé' laduj gazre da zua na xi' da' zaj naca na oro.

<sup>2</sup> Neda' nezda' xúgute' da dxunle. Nezda' dxúnle'ele zrin ne nácale zren lazre', ne quebe dxuele lataj benne' wen da zrinnaj ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'ele zaj naque' benne' wen lazre'.

<sup>3</sup> Gúcale zren lazre', ne gudele xel-la' zi', na' bēnle'ele zrin chia', ne quebe gute ni'a na'le.

<sup>4</sup> Na'a zua tu da dxagu na zria chee,le, québedxa nazri'ile neda' ca bzri'ile neda' nédxute.

<sup>5</sup> Chee le' na', le gusá lazre' ca bzri'ile neda' nédxute, ne le xexíaje lazre', na' le gun ca da benle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' chee québedxa gácale ca da zua na xi' chia'. Caní guna' che quebe xexíaje lázrele.

<sup>6</sup> Zua tu da dxexecá'a na le'e, dxecuídele da dxelún benne' ca' zaj nazí le' nicolaíta ca', benne' ca' dxulucá'ana szrene' bedau' xiaj xaga ca', da na' dxecuídequeza' neda'.

<sup>7</sup> Benne' zua nague' dxal-la' xenne' da nigá dxē Be' Lá'azxa bi chia' ca'. Benne' ca' xeledxúaje' xrlátaje lawe' da zrinnaj, neda' gunézruja' da xelawē' da dxebía xaga da dxunna na xel-la' nabán, ne zua na lu lataj xrlátaje chee Dios.

*Dizra' gusel-łe' cheę bi cheę' zaj zře'ę xezre Esmirna*

<sup>8</sup> Guzre Jesús neda':

—Bzuaj cheę gubáz chia' zúalęę' bi chia' zaj zře'ę xezre Esmirna. Bzuaj da nigá: Caní dxenná Jesús, Bénnea' zúaqueze' nédxudaute, ne zúaqueze' bzé'bedxa, Bénnea' gutię', ne bebánqueze'.

<sup>9</sup> Neda' nezda' xúgute' da dxunu'. Nezda' gudele xel-la' zi', ne nácale benne' xache'. Da li nácale benne' gunní'a. Nezda' ca dxelenné schanni' cheęle benne' ca' dxelenné' zaj naque' judío, san zaj naque' tu cue' benne' dxulucá'ana szreńę' da xriwe'.

<sup>10</sup> Quebe zřebele ca naca xel-la' zi' da tele, lawe' da guzrá' da xriwe' bál-lale le'e lizre xia cheę gulé'e lau da nácale, na' tele xel-la' zi' lawe' chi zra. Le gaca li lazre' lácala xelutię' le'e, na' neda' gunna' le'e xel-la' nabán ca tu da dxunna bea na bedxuajle chawe'.

<sup>11</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaję' chawe' lawe' da zrinnaj, quebe bi gune da zi' da xa' da zeajlı canna cheę benne' ca'.

*Dizra' gusel-łe' cheę bi cheę' zaj zře'ę xezre Pérgamo*

<sup>12</sup> Guzre Jesús neda':

—Bzuaj cheę gubáz chia' zúalęę' bi chia' zaj zře'ę xezre Pérgamo. Bzuaj da nigá: Caní dxenná Jesús, Bénnea' nuxre' xia da nalá dxupa la'a.

<sup>13</sup> Neda' nezda' xúgute' da dxunle. Nezda' zúale naga dxenná bea da xriwe'. Quebe nusanle da naca chia'. Quebe bsanle dxexechębele chia', ne lu zra ca' gate belutię' Antipas, benne' bechebę' du lazre' da naca chia' ládujla le'e, naga zua da xriwe'.

<sup>14</sup> Na'a, zua tu da dxagu na zria cheęle, dxuele lataj zaj zra' ládujla le'e benne' ca' ne zjácáleńę' da bęęde Balaam, bénnea' gulú'u xel-łe' Balac, bennen' beńę' belún benne' Israel ca' dul-la, na' gulawe' da buluzríę' lau bedau' xiaj xaga ca', ne belunę' da sban.

<sup>15</sup> Cá'anqueze zaj zra' ládujla le'e bal-la benne' ne zjácáleńę' da dxulusęde benne' zaj nazı' le' nicolaíta, da na' dxecuıdequeza' neda'.

<sup>16</sup> Cheę ęe' na' le xexıaje lázrele lawe' da che quebe xexıaje lázrele xida' naga zúale, na' tıl-lalęna' benne' ca' nen xia nalá da dxdexuaj na dxu'a.

<sup>17</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuaję' chawe' lawe' da zrinnaj, neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'ę xiaj na' naxúaj tu la cube cheę bénnea', da quebe nu neze, san tuze bénnea' si'ę na.

*Dizra' gusel-łe' cheę bi cheę' zaj zře'ę xezre Tiatira*

<sup>18</sup> Guzre Jesús neda':

—Bzuaj cheę gubáz chia' zúalęę' bi chia' zaj zře'ę xezre Tiatira. Bzuaj da nigá: Caní dxenná Jesús, Bénnea' zaj zra xiaj lawe' da dxelácátite na ca xi', na' ní'ę zaj naca na ca xia gache da nabá'ale'ę na.

<sup>19</sup> Neda' nezda' xúgute' da dxunle. Nezda' ca nazri'ile neda', ne ca dxęajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da beńle nédxute.

<sup>20</sup> Na'a, zua tu da dxagu na zria cheęle, dxuele lataj nu'ula na' le' Jezabel, nu'ula na' dxenné' dxuchálaje' waláz cheę Dios, na' dxęzi xę'e benne' wen zrin chia' ca' ca naca da dxusędene' cheę xelunę' da sban, ne xelawe' da dxuluzríę' lau bedau' xiaj xaga ca'.

<sup>21</sup> Neda' ba be'a nu'ula na' lataj xexíaje lazre', na' quebe guca lazre'. Quebe dxusane' ca naca da sban da dxune'.

<sup>22</sup> Na'a, che benne' ca' quebe xulusane' ca da dxelune' ca dxun nu'ula na', neda' cu'a le' xel-la' we' da quixruj na le', na' weledéle'e xel-la' zi' benne' ca' dxelune' dul-la nen nu'ula na',

<sup>23</sup> na' gútequeza' benne' ca' zaj de'e nu'ula na'. Caní gaca, xúgutę cue' bi chia' ca' xeleque be'ene' neda' nezda' ca naca dute da zua lu xichaj lázrdau bénneache, na' tu tule le'e gunna' le'e cáteze naca da benle.

<sup>24</sup> Xezícadxale le'e zrale xezre Tiatira, quebe zéajle da na' dxusede nu'ula na', ne quebe ne sile da dxenné' naca na da nagache cheę da xriwe', neda' dxapa' le'e, quebe bi xetú da gucha' le'e gunle.

<sup>25</sup> Le gapa chi'i xel-la' dxixruj be'e da ba gucha' le'e gunle ca zrindxa zra xelá'a neda'.

<sup>26</sup> Benne' ca' xeledxúaje' chawe' lawe' da zrinnaj, ne xelune' ca dxaca lazra' neda' ca zrindxa zra bzębe ni', neda' gunézruja' cheę benne' ca' xel-la' dxenná bea lawe' xezre ca',

<sup>27</sup> ca ben Xra', benne' neda' xel-la' dxenná bea, na' xelenná be'ene' benne' xezre ca' nen tu var xia, na' xuluzría xi'e xezre ca' ca dxun tu benne' dxelę'e tu xesu' xu.

<sup>28</sup> Cá'anqueze gu'a benne' ca' lataj xelezúalęe' neda', naca' ca belaj zila.

<sup>29</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

### 3

#### *Dizra' gusel-le' cheę bi cheę' ca' zaj zre'e xezre Sardis*

<sup>1</sup> Guzre Jesús neda':

—Bzuaj cheę gubáz chia' zúalęe' bi chia' zaj zre'e xezre Sardis. Bzuaj da nigá: Caní dxenná Jesús, Bénnea' zaj zúalę gazre Be' cheę Dios Le', ne nuxre' da gazre ca' zaj naca ca belaj ca'. Neda' nezda' xúgutę da dxunle. Nezda' ba nácale ca benne' gate ca' lau Dios lácala dxeleque bénneache naca banle.

<sup>2</sup> Le guxúe, ne le sua chacha cheę québedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'.

<sup>3</sup> Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'.

<sup>4</sup> Zaj zra' ládujla le'e bábaze benne' quebe ne xelune' da sban, na' benne' caní xeledalęe' neda', ne xelácue' zra lanę' chiche lawe' da caní dxal-la' gaca cheę'.

<sup>5</sup> Benne' ca' xeledxúaje' chawe' lawe' da zrinnaj xelácue' zra lanę' chiche ne quebe xusula' la benne' ca' lu xiche naga zaj naxúaj la benne' ca' zúalę xel-la' nabán le', na' xechęba' cheę benne' ca' lau Xra' ne lau gubáz cheę xabáa cheę' ca'.

<sup>6</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

#### *Dizra' gusel-le' cheę bi cheę' zaj zre'e xezre Filadelfia*

<sup>7</sup> Guzre Jesús neda':

—Bzuaj cheę gubáz chia' zúalęe' bi chia' zaj zre'e xezre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da gudapa wenná bea David, na' gate salje', netú quebe nu gaca xusezxuj, na' gate xusézxuje' netú quebe nu gaca salaj.

<sup>8</sup> Neda' nezda' xúgute da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatecale, zéajlele dizra' chia', ne quebe ne gusan lázrele da naca chia'.

<sup>9</sup> Benne' ca' dxulucá'ana szrene' da xriwe', benne' wen lazre' ca', benne' dxelenné' zaj naque' judío ne quebe zaj naque', neda' guna' xuluzú zribe' zran ní'ale chee xelenézeñ' neda' nazrí'ida' le'e.

<sup>10</sup> Ba benle ca da gucha' le'e gunle chee gácale zren lazre', na' chee le na' guxúequeza' le'e lawe' xel-la' zi' da xeledé xúgute benmeache zaj zre'e lu xezr la xu, chee gul'e lau da zaj naque'.

<sup>11</sup> Wídazequeza'. Le gapa chi'i da nápaie chee quebe nu ca'a ca da dxal-la' si'le.

<sup>12</sup> Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabátaquezdxa xeledxúaje' na', na' lu lázrdawe' guzúaja' La Xra', ne la xezre chee Dios chia' da naca na Jerusalén cube da za' xabáa, ne La' cube.

<sup>13</sup> Benne' zua nague' dxal-la' xenne' da nigá dxé Be' Lá'azxa bi chia' ca'.

#### *Dizra' gusel-le' chee bi chee' zaj zre'e xezre Laodicea*

<sup>14</sup> Guzre Jesús neda':

—Bzuaj chee gubáz chia' zúaleñe' bi chia' zaj zre'e xezre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexechebe' da li, Bénnea' naque' naga guzú lau xúgute da ben Dios.

<sup>15</sup> Neda' nezda' xúgute da dxunle. Nezda' quebe nácale zaga ca dxunle da naca chia', ne quebe nácale látela. Dxaca lazra' la gácale zaga u la.

<sup>16</sup> Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexebe' nisa bate.

<sup>17</sup> Le'e dxennale nácale gunní'a, ne dxaca chawe' chee ne quebe bi dxexájrjele, na' quebe dxéquebe'ele' dxaca ba xa' chee ne dxezaca zi'le, ne nácale xache', ne nácale la chul-la, ne nácale gala xide.

<sup>18</sup> Chee le na' dxuzéajni'ida' le'e si'le lu na' neda' da naca ca oro da nabá'a na lu xi', chee gápale xel-la' gunní'a li lazre', ne si'le zra lánale chiche chee gáculé, da gunna' le'e, na' xenite xel-la' stu' chee da gúcale gala xide, ne si'le da cu'ule xiaj laule chee xelé'ele.

<sup>19</sup> Neda' dxusízreda', ne dxudéa' xel-la' zi' xúgute benne' ca' nazrí'ida'. Chee le na' dxal-la' xexíaje lázrele ne gunle zrin chia' du lázrele.

<sup>20</sup> Le na' xque. Neda' zea' dxa xu'u dxennia'. Che nu benne' xenne' chi'a, ne salje' xu'u, na' chu'a gágulena' le', na' le' gágulene' neda'.

<sup>21</sup> Benne' ca' xeledxúaje' chawe' lawe' da zrinnaj, neda' gunézruja' le' lataj xeledé'lene' neda' naga dxenná be'a, ca neda' bedxúaja' chawe', ne dxé'lena' Xra' naga dxenná bea Le'.

<sup>22</sup> Benne' zua nague' dxal-la' xenne' da nigá dxé Be' Lá'azxa bi chia' ca'.

## 4

#### *Dxulucá'ana szrene' Dios lu xabáa*

<sup>1</sup> Ca gudé na' gunná'a, na' ble'eda' tu dxa xu'u da naxalaj na xabáa, na' benda' chi'i Bénnea' benda' chee' nédxute da naca na ca chi'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te chee da nigá.

<sup>2</sup> Ca gunné' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxé'e lataj blau na'.

<sup>3</sup> Bénnea' dxe'e lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda.

<sup>4</sup> Dxu'a lataj blau na' zaj zua tape dxua lataj naga zaj dxe' tape dxua benne' gula ca', zaj nacue' zra lané' chiche, ne zaj zria xíchaje' da zaj naca na oro.

<sup>5</sup> Lu lataj blau na' dxeledxúaj xesa, ne dxaca nine, ne dxelenné guziu', na' lau lataj blau na' zaj zua gazre xi' dxelala na, da zaj naca na gazre Be' chee Dios.

<sup>6</sup> Le na' lau lataj blau na' de ca tu nísadau' da naca na ca xiaj esa' xaní'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'.

<sup>7</sup> Benne' nedxu nalé'e ca tu bezre xixre', na' benne' gudxupe' nalé'e ca tu bezre, na' benne' guxunne' naca lawe' ca lau bénneache, na' benne' gudape' nalé'e ca tu bsia nachiluj xílabá'.

<sup>8</sup> Dápaté benne' caní zaj zua xrupa xrile' tu tue', na' dxupa la'a le'e xrila benne' caní zaj zria zane' xiaj lawe'. Te zra ne chizrela quebe dxulusane' dxelenné':

Lá'azxa, lá'azxa, lá'azxa naca

Xránadxu Dios nape' duté xel-la' dxenná bea,

Bénnea' guzúaqueze', ne zúaqueze', ne tu súaqueze'.

<sup>9</sup> Tu tu lasa gate dápaté benne' ban caní dxelegú'e ba Dios, ne dxulucá'ana szrene' Le', ne dxel'é Le': Xcalenu', Bénnea' zúaqueze' chadíá chacanna,

<sup>10</sup> na' dape dxuaté benne' gula ca' dxuluzú zribe' lau Le', ne dxulucá'ana szrene' Bénnea' zúaqueze' chadíá chacanna, ne dxuluzú'e da ca' zaj zría xíchaje' ca' lau lataj blau na', dxelenné':

<sup>11</sup> Xránantu' Dios, Lue' naca chiu' si' lu na'u xel-la' szren,

ne xel-la' ba lá'ana, ne xel-la' dxenná bea,

lawe' da benu' Lue' xúguté da de,

na' ca dxaca lazru' Lue' zaj zua na, ne gulá gulebinna na.

## 5

### *Tu xiche nadube, ne Bénnea' naque' Zríla'dau'*

<sup>1</sup> Lu na' xabéla chee Dios, Bénnea' dxe'e lataj blau na', ble'eda' tu xiche nadube, da naxúaj dxupa la'ate na, na' nazriche na gazre da dxelunna bea na.

<sup>2</sup> Ble'eda' tu gubáz chee xabáa nápalé'e xel-la' waca, na' gunné' zizraj:

—¿Nuzra naca chee' chíluje' xiche na', ne cheze' da ca' dxelunna bea na?

<sup>3</sup> Queba nu chilá' xabáa, ne lu xezr la xu, ne zranla xezr la xu naca chee' chíluje' xiche na', ne quebe nu gaca nne'e na chee lé'ene' ca naca na.

<sup>4</sup> Neda' gudxézreli'a lawe' da quebe nu chilá' benne' naca chee' chíluje' xiche na', ne gulabe' na, ne quebe gaca nne'e na.

<sup>5</sup> Nadxa tu benne' ládujla benne' gula ca' guzre' neda':

—Québedxa cuesru' lawe' da ba bzué'e Jesús, Bénnea' nazi'i le' Bezre Xixre' chee xrtia Judá lawe' da nape' xel-la' dxenná bea zrente, ne naque' zri'ine zre sua David, na' Le' naca chee' chíluje' xiche na', ne cheze' da gazre ca' dxelunna bea na.

<sup>6</sup> Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zríla'dau' chee Dios. Ze'e na', lácala zrié' we' lawe' da belutie' Le'. Zria gazre lúzuba' ne gazre xiaj

lauba', na' xiaj lauba' ca' zaj naca na gazre Be' cheę Dios da ca' nase-la Dios du ca naca xęzr la xu.

<sup>7</sup> Bėnnea' naque' Zrila'dau' guxıaje' guquęe' xiche na' lu na' xabeła Bėnnea' dxe'e' lataj blau na'.

<sup>8</sup> Ca guquęe' xiche na', na' tapa benne' ban ca', ne tape dxua benne' gula ca' buluzú zribe' lau Bėnnea' naque' Zrila'dau'. Tu tu benne' gula ca' zaj nuxre' tu da dxełul-lalęne' da can zrıadi'i na du, nazı le na ırpa, ne zaj nu'e xé'ena bzri da naca na oro zaj xu'u na xala zixre, da zęaje na xel-la' dxulawızra Dios da dxełun bi ca' cheę Dios.

<sup>9</sup> Dxelul-le' tu da cube canı: Lue' naca chiu' ca'u xiche na', ne chezu' da ca' dxełunna bea na, lawe' da belutie' Lue', na' nen dxen chiu' bexa'u bėnneache cheę xelaque' cheę Dios, Zaj naque' benne' xúgute cue' bėnneache, ne dxełenné' xúgute dizra' walazre', ne zaj naque' benne' xúgute xęzre ne xúgute cue' xęzr la xu.

<sup>10</sup> Benu' le' benne' wenná bea ca', ne bxruze ca' lau Dios cheędxu, na' xelenná be'e lu xęzr la xu.

<sup>11</sup> Nadxa gunná'a, na' benda' chi'i zane' gubáz ca' cheę xabáa zaj naxéchaje' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca',

<sup>12</sup> na' dxełenné' zizraj: Bėnnea' naque' Zrila'dau' belutie', naca chee' si'e xel-la' dxenná bea, ne xel-la' gunná'a, ne xel-la' sina, ne xel-la' waca, ne xel-la' ba lá'ana, ne xel-la' szren, ne xel-la' dxue lá'ana.

<sup>13</sup> Cá'anqueze benda' dxełenná xúgute da ca' ben Dios, da ca' zaj zra' xabáa, ne da ca' zaj zra' xęzr la xu, ne da ca' zaj zra' lu nısadau', ne xúgute da ca' zaj nıta xúgute lataj ca', dxełenná na: Xel-la' dxue lá'ana, ne xel-la' ba lá'ana, ne xel-la' szren, ne xel-la' dxenná bea zaj naca na cheę Bėnnea' dxe'e' lataj blau na', ne cheę bėnnea' naque' Zrila'dau', gaxúane gaxúane iza.

<sup>14</sup> Dápatę benne' ban ca' gulenné':

—ıCa'an gaca na!

Na' dape dxuate benne' gula ca' buluzú zribe', ne bulucá'ana szrene' Bėnnea' naca banę' gaxúane gaxúane iza.

## 6

### *Dxecheze' xrupa da gazre ca' da dxełunna bea na*

<sup>1</sup> Nadxa ble'eda' gate Bėnnea' naque' Zrila'dau' gucheze' da nedxu da gazre ca' dxełunna bea na. Na' benda' dxenná tu benne' tapa ca' zaj naca banę', na' chi'e ben na ca guziu', dxenné':

—Gudá, le'enu'.

<sup>2</sup> Gunná'a, na' ble'eda' tu bzrina' chiche, na' benne' zrie'-ba' nuxre' tu da dxedxú'una na xágadau' nalá xéche'ze. Bulunézruje' le' tu da naquen oro da



guzúe' xíchajé', na' nen dutę xel-la' dxenná bea bdxuaję' cheę zrué'ene' lu wedil-la.

<sup>3</sup> Gate Bénnea' naque' Zríla'dau' gucheze' da gudxupe' da dxunna bea na, na' benda' benne' gudxupe' cheę benne' tapa ca' zaj naca bane', dxenné':  
—Gudá, le'enu'.

<sup>4</sup> Na' bdxuaj xetú bzrina', nácaba' bę xrna, na' bénnea' zrię'-ba' guzi'e' xel-la' dxenná bea cheę cuę' xel-la' dxebeza zri lazre' lu xęzr la xu, ne cheę gunę' xelute bénneache ljwezre' ca', na' bulunézruje' lę' tu xia tunna da nalá.

<sup>5</sup> Gate Bénnea' naque' Zríla'dau' gucheze' da guxunne' da dxunna bea na, na' benda' benne' guxunne' cheę benne' tapa ca' zaj naca bane', gunné':  
—Gudá, le'enu'.

Gunná'a, ne ble'eda' tu bzrina' gasaj, na' benne' zrię'-ba' nuxre' zrgú'unsa.

<sup>6</sup> Benda' tu chí'i dxenné' na ládujla tapa benne' ban ca', gunná na:

—Chupa xia zrua' xtila saca na lazruj cheę tu zra, ne xrupa xia zrua' cebada saca na lazruj cheę tu zra, san quebe cu' za xel-la' wagu, ne quebe cu' xrise uva wal-la.

<sup>7</sup> Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' cheę benne' ban ca', gunné':  
—Gudá, le'enu'.

<sup>8</sup> Gunná'a, ne ble'eda' tu bzrina' gache, na' benne' zrię'-ba' lę' Xel-la' Gute, na' cuzru bénnea' za tu benne' ze'e' waláz cheę lataj chul-la ga nnita benne' gate ca'. Bénnea' lę' Xel-la' Gute guzi'e' xel-la' dxenná bea cheę gutię' tu cue' cheę tapa cue' ca' naca bénneache zaj zře'e' xęzr la xu. Gutię' benne' ca' lu wedil-la, ne lu xel-la' dxedún, ne lu xízrawę' ca', ne lu na' bę snia zaj zraba' lu xęzr la xu.

<sup>9</sup> Gate Bénnea' naque' Zríla'dau' gucheze' da gázxue da dxunna bea na, na' ble'eda' zran cugu bénne'du ca' gulú'u benne' ca' belute bénneache lę' lawe' da buluchálaję' dizra' cheę Dios, ne belexechebę' ca' naca cheę'.

<sup>10</sup> Bénne'du ca' gulú'u benne' ca' gulenné' zizraj:

—Xran lá'axza, ne li lazre', ¿xeajáte chenu' cheę guchi'u cheęntu', ne xebéaj lazru' benne' ca' belutię' netu', benne' ca' zaj zře'e' lu xęzr la xu?

<sup>11</sup> Nadxa bénne'du ca' gulú'u benne' ca' gulezí'e' zra lanę' chiche, na' guzre' lę' xelebeze' xetú chí'idau', cadxa cha benne' biche' ca' dxelune' zrin cheę Cristo, xelute bénneache lę' ca' belutię' benne' ca'.

<sup>12</sup> Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'lę'e' lu xęzr la xu. Gubizra bexaca na da chul-la ca' ladxe' gasaj, na' beu' bexaca na xrna ca' dxen,

<sup>13</sup> na' belaj zaj zria xabáa belexruj na lu xęzr la xu, ca' dxelexruj higo dxe'ene ca' gate dxácale'e' be' dxunibe na xaga higo na'.

<sup>14</sup> Xabáa benite na ca' tu xiche da dxexedube, na' xúgute' xi'a ca', ne xęzr la xu ca' da zaj naxechaj nísadau' gulecuasa na naga zaj zua na.

<sup>15</sup> Benne' wenná bea ca' zaj zře'e' lu xęzr la xu bulucache cuinę' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunní'a ca', ne benne' xíchaję ca' cheę benne' dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúaję' lu na' xranę' ca',

<sup>16</sup> na' benne' caní gulę' xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e' lataj blau, ne lu xel-la' zi' zren da gunna Bénnea' naque' Zríla'dau'.

<sup>17</sup> Ba bzrin zra cheę xel-la' zi' zren. ¿Núzraqueze sue lę na?

## 7

*Benne' Israel ca' gucá'a Dios*

<sup>1</sup> Ca gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'.

<sup>2</sup> Cá'anqueze ble'eda' xetú gubáz chee xabáa ze'e naga dxalaj gubizra, na' nuxre' da gunna bea na nu benne' naque' chee Dios ban. Gubáz nigá gunné' zizraj, dxé'e dápaté gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

<sup>3</sup> —Quebe guzría xile xezr la xu, ne nísadau', ne xaga ca', dxácaté quebe ne guchícentu' luzrgá benne' ca' tu da gunna bea na zaj naque' chee Dios cheedxu.

<sup>4</sup> Benda' cátite zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj láwela xúgute' cue' benne' Israel.

<sup>5</sup> Gulezriche luzrgue' da na':

Chazrinnu cue' benne' xrtia Judá, ne  
chazrinnu cue' benne' xrtia Rubén, ne  
chazrinnu cue' benne' xrtia Gad, ne

<sup>6</sup> chazrinnu cue' benne' xrtia Aser, ne  
chazrinnu cue' benne' xrtia Neftalí, ne  
chazrinnu cue' benne' xrtia Manasés, ne

<sup>7</sup> chazrinnu cue' benne' xrtia Simeón, ne  
chazrinnu cue' benne' xrtia Leví, ne  
chazrinnu cue' benne' xrtia Isacar, ne

<sup>8</sup> chazrinnu cue' benne' xrtia Zabulón, ne  
chazrinnu cue' benne' xrtia José, ne  
chazrinnu cue' benne' xrtia Benjamín.

*Benne' zan zaj nacu zra lané' chiche*

<sup>9</sup> Gudé na' gunná'a ne ble'eda' benne' zan chee xúgute' cue' bèneache:

Benne' xúgute' cue' xezr la xu,  
ne benne' dxelenné' xúgute' dizra' walazre' cha chee',  
ne benne' xúgute' xezre ca'.

Zaj ze' le na' naga zua lataj blau na', ne naga ze' Bénnea' naque' Zrila'dau'.  
Benne' caní zaj nacue' zra lané' chiche, ne zaj nuxre' zina'.

<sup>10</sup> Xúgute' dxelenné' zizraj:

Xel-la' weselá za na lu na' Dios cheedxu,  
Bénnea' dxé'e lataj blau,  
ne lu na' Bénnea' naque' Zrila'dau'.

<sup>11</sup> Xúgute' gubáz chee xabáa ca' zaj ze' zaj naxéchaje' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belíxrujte' lawe' zran ni'e, na' bulucá'ana szrené' Dios.

<sup>12</sup> Dxelenné':

¡Ca'an gaca na!

¡Xel-la' dxue lá'ana, ne da xabáa,  
ne xel-la' sina, ne xel-la' dxezaca ba lazre',  
ne xel-la' ba lá'ana, ne xel-la' dxenná bea,  
ne xel-la' szren,

zaj naca na chee Dios cheedxu chadía chacanna!

¡Ca'an gaca na!

13 Nadxa tu benne' gula ca' bchebe' neda':

—¿Nuzra benne' caní zaj nacue' zra lané' chiche, ne gazra zesi'aque'?

14 Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledéé' lu xel-la' zi' zren na', na' benne' caní ba zaj nacue' zra lané' chiche lawe' da Bénnea' naque' Zríla'dau' ba gudibe' xichaj lázrdawe' nen dxen chee'.

15 Chee le' na' zaj zre'e dxu'a lataj blau naga dxe' Dios, ne dxelúe lá'ane' Le' te zra ne chizrela lu xudau' chee', na' Bénnea' dxe'e lataj blau na' guxúequeze' benne' ca', ne súaletcaze' le'.

16 Québedxa xeleduné' ne québedxa xelebílené', ne québedxa guzezxe gubizra benne' ca', ne québedxa xeléquené' da la,

17 lawe' da zua Bénnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'e benne' ca' naga dxelalaj nisa da dxunna na xel-la' nabán, na' Diósqueze tu súalezqueze' benne' ca' chee' québedxa xelebezre'.

## 8

### *Dxecheze' da gazre da ca' dxelunna bea na*

1 Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chí'i zrénqueze.

2 Nadxa ble'eda' gazre gubáz chee xabáa ca' zaj ze' lau Dios, na' bulunézruje' gubáz chee xabáa ca' gazre luzu da xulucueze'.

3 Gudé na' bla' xetú gubáz chee xabáa nuxre' tu xé'ena bzri da naca na oro ne guzé' dxu'a cugu, na' bulunézrujle'e le' xala zixre chee guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' chee Dios. Bzue' na lu cugu naca na oro, da zua na lau lataj blau na'.

4 Zren chee xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' chee Dios.

5 Nadxa tu gubáz chee xabáa guqué'e xé'ena bzri na', na' bzre'e na xi' da guqué'e lu cugu na', na' gudxú'une' xi' na' lu xezr la xu, na' gulenné' guziu, ne gulenínele'e, ne gulépele'e xesa, ne guzrú' xezr la xu.

### *Dxuluchine gubáz ca' da dxulucueze'*

6 Nadxa gázrete' gubáz chee xabáa ca' zaj nuxre' gazre luzu da dxulucueze' gulezé' chawe' xuluchínene' na.

7 Gubáz nedxu na' bchínene' da dxucueze', na' gulinnaj xiaj bezxe, ne xi' da zaj nachixre na dxen da belexruij na lu xezr la xu. Xáteze quebe bedú gachaj xezr la xu guzezxe na late weaj du ca naca lu xezr la xu. Xáteze quebe gudache gáchajte xaga ca' zaj ze' lu xezr la xu gulezxe na, ne cá'anqueze guca chee xixre' xa'a ca'.

8 Gubáz chee xabáa gudxupe' bchínene' da dxucueze', na' bexruij da naca na ca tu xi'a zren da dxala na xi' lu nísadau', na' xáteze quebe guca gáchajte nísadau' na' bexaca na dxen.

9 Xáteze quebe guca gáchajte bea zaj zra'ba' lu nísadau' guláteba', na' xáteze quebe guca gáchajte da ca' dxeledán lawe' nísadau' gulebía xi na.

10 Gubáz chee xabáa guxunne' bchínene' da dxucueze', na' bexruij tu belaj zrente zran xabáa, da dxala na ca tu xi' xedxe. Naga bexruij na, xáteze quebe gudache gáchajte xegu ca', ne beaj ca' gulebía xi na.

11 Belaj na' lę na Ajenjo, da zęaję na da naca na sla', na' xáteze quebe guca gáchaję nisa da dę lu xęzr la xu bexaca na ajenjo, na' benne' zantę gulatię' ne cheę nisa na' lawe' da bexaca na sla'.

12 Gubáz cheę xabáa gudape' bchínenę' da dxucuezre', na' xáteze quebe bedú gachaj xel-la' naxani' cheę gubizra, ne xel-la' naxani' cheę beu', ne xel-la' naxani' cheę belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'anqueze che zrela.

13 Nadxa gunná'a, ne benda' chi'i tu gubáz cheę xabáa dxedé' lu be', dxennę' zizraj:

—Edxugua bęnneache zaj zra' xęzr la xu gate xebezre luzu da xuluchine xechunna gubáz cheę xabáa ca'.

## 9

1 Gubáz cheę xabáa gázxue bchínenę' da dxucuezre', na' ble'eda' tu benne' naque' ca tu belaj bexruj na lu xęzr la xu, na' bulunęzruje' lę' zren xia cheę lataj chul-la cheę benne' gate ca'.

2 Gusálaję' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'.

3 Lu zren na' beledxúaj biche zu. Guledaba' du ca naca xęzr la xu, na' biche zu ca' guleziba' lataj xeláduba' bęnneache ca da dxelún bęxrujni.

4 Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bęnneache quebe nazriche luzrgue' da dxunna bea na benne' ca' zaj naque' cheę Dios.

5 Quebe zaj naziba' lataj xelúteba' bęnneache, san xuludęzeba' bęnneache ba xa' lawe' gazxu' beu', na' xel-la' dxelá cheę naga dxeláduba' naca na ca naca da dxun bęxrujni, bę dxelúteba' bęnneache.

6 Lu zra ca' xelaca lazre' bęnneache xelexute cuinę', ne quebe xelexęquenę'. Xelaca lazre' xelatię' ne quebe xelatię'.

7 Biche zu ca' zaj nácabá' ca bzrina' ca' ba zaj nabęzaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bęnneache.

8 Xicha xíchajba' zaj naca na ca xicha xichaj nu'ula ca', na' lázxaba' zaj naca na ca lazxa bezure xixre'.

9 Lachu'uba' xu'u na ca zraba' xia, na' xrílaba' dxeleninne na ca dxeleninne da dxelecá'a bzrina' ca' zjaca chęguba' lu wedil-la.

10 Zaj zua xrbamba' ca xrbán bęxrujni, zaj zua na liba'. Zaj nazi'ba' lataj xeláduba' bęnneache lawe' gazxu' beu'.

11 Zua tu xrane biche zu ca' naca gubáz cheę lataj chul-la, ne lę na Abadón nen dizra' hebreo, ne nen dizra' griego lę na Apolión, da zęaję na da dxuzría xi na.

12 Caní guca da nedxu da ba xa' da xeledé bęnneache, na' da' zí'aca xechupan ca'.

13 Nadxa gubáz cheę xabáa xrupe bchínenę' da dxucuezre', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios.

14 Chi'i na' guzre na gubáz cheę xabáa xrupe na' nuxre' luzu da dxucuezre': —Bsan dápatę gubáz ca' zaj nadxęaję' dxu'a xęgu zren lę na Eufrates.

15 Ca' guca na, na' gulelá gubáz ca' cheę xelutie' xáteze ca gaca gáchaję bęnneache lawe' da ba zaj nabeza gubáz ca' cheę zra na', ne beu' na', ne íza na'.

16 Benda' cáтите zaj naca benne' dxjaca wedil-la ca' zaj zrię' bzrina' zráłęne' gubáz ca'. Zaj naque' chupa cue' gaxua da zaj naca gaxúane gaxúane.

17 Lu da ble'e Dios neda' ble'eda' ca' zaj naca bzrina' ca', ne ca' zaj naca benne' dxjaca wedil-la ca' zaj zrię' -ba'. Zaj xu'u lachu'e zře' xrna da naca na xia, ne da nalá' ca' zran xabáa, ne da gache. Xichaj bzrina' ca' zaj naca na ca' xichaj bezre xixre', na' dxú'aba' ca' beledxúaj xi', ne zren, ne tu da gache da dxuzézxelę'e na.

18 Xáteze quebe gudache gáchajte bėnneache gulatię' lu da ca' beledxúaj na dxu'a bzrina' ca', xi', ne zren, ne da gache na'.

19 Xel-la' snia cheę bzrina' ca' zua na dxú'aba', ne xrbnba' lawe' da zaj naca xrbnba' ca' bęla' ca' zaj zua xíchajba', na' nen da ca' dxuluzría xiba' bėnneache.

20 Benne' ca' xezica, benne' quebe belúteba', belúnqueze' da zrinnaj ca' da dxelúnqueze', ne bulucá'ana szrėnqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelélé'e na, ne quebe dxaca xelén na, ne quebe dxaca si'aca na.

21 Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

## 10

### *Tu gubáz cheę xabáa nuxre' tu xíchedau' nazriluj na*

1 Nadxa ble'eda' xetú gubáz cheę xabáa nápalę'e xel-la' dxenná bea. Bėtaję' xabáa, xu'e tu lu beuj, ne zua tu bchita' xíchaję'. Dxu'a lawe' dxácátite na ca' gubızra, na' ni'e zaj naca na ca' xi'.

2 Nuxre' tu xíchedau' da nazriluj na, na' bzue' ni'e zua xabęla lawe' nísadau', ne ni'e zua xęglala lawe' xęzr la xu bizre.

3 Nadxa gudxezre xę'e ca' dxun bezre xixre' dxebezre xa'aba', na' ca' gudxezre xę'e gulennę gazre guziu'.

4 Ca' gudę gulennę gazre guziu' ca', ba zúate guzúaja', na' benda' tu chi'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

5 Nadxa gubáz cheę xabáa na' ble'eda' ze' lawe' nísadau', ne lawe' xęzr la xu bizre guchisa ne'e da zua xabęla zran xabáa,

6 na' bzėtaję' La Bėnnea' zue' chadía chacanna, ne bęne' xabáa, ne xęzr la xu, ne nísadau', ne xúgute' da zaj de' lawe' da ca' bęne', na' gunné':

—Québedxa che na,

7 lawe' da gate su lau gubáz cheę xabáa gazre guchínene' luzu da xulu-cuezre', ba gaca li ca' naca da nun Dios dxal-la' gaca ca' bzenne' benne' wen zrin cheę' ca', benne' gulennę' waláz cheę'.

8 Ca' naca chi'e da benda', da za xabáa, bchálajłene' neda' xetú, gunné':

—Guxíaj xeajcá'a xíchedu na' nuxru gubáz cheę xabáa na' ze' lawe' nísadau', ne lawe' xęzr la xu bizre.

9 Nadxa guxá'a lau gubáz cheę xabáa na', na' gunaba' gunné' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca' bzrina'dau', na' lu le'u xexaca na da sla'.

10 Nadxa gucá'a xíchedu na' lu na' gubáz cheę xabáa na', na' gudawa' na, na' lu dxu'a guca na zixre ca' bzrina'dau'. Ca' gudę gudawa' na, bexaca na sla' lu le'a.

11 Nadxa gulę'e neda':

—Dxun na ba xen guchálaju' waláz chee Dios lau benne' zaj zře'ę zane cue' xęzr la xu, ne lau benne' zaj zře'ę xęzre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

## 11

### *Chupa benne' dxelexechebe'*

<sup>1</sup> Nadxa belunne' neda' tu xia xtiladau' da naca na ca tu xaga da dxudxíxredxu, na' gulé'ę neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zře'ę na' dxulucá'ana szrene' Dios.

<sup>2</sup> Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululáję' xęzre lá'azxa lawe' chupe xun beu'.

<sup>3</sup> Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

<sup>4</sup> Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xęzr la xu.

<sup>5</sup> Che nu benne' dxaca lazre' guzría xi'ę benne' caní, na' le' xululube' xi' da dxuaj lu dxu'ę ca', na' guzézxetę na benne' ca' dxeledábague' le'. Caní gate nütetęze benne' tábague' benne' chupa caní.

<sup>6</sup> Benne' chupa caní zaj nape' xel-la' dxenná bea xelunę' ga quebe gaca xiuj dxácatę na' dxelenné' waláz chee Dios. Cá'anqueze zaj nape' xel-la' dxenná bea xelunę' xaca nisa dxen, ne chee xulusaca zi'ę bėnneache nen xúgute xízrawę' ca', bátatezla dxelaca lazre'.

<sup>7</sup> Gate bache belexuzre belunę' zrin chee', na' bę xixre' snia, bę dxedxúajba' lataj chul-la, tíl-lalęba' benne' chupa ca', na' quél-laba' le', ne gúteba' le'.

<sup>8</sup> Bėla' dxen gate chee benne' caní xelxegá'ana na la neza chee xęzre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto.

<sup>9</sup> Lawe' chunna zra xugachaj, bėnneache chee xúgute cue' benne', ne benne' xęzre ca', ne benne' zra du gabí'i xęzr la xu, ne benne' dxelenné' dizra' walazre' cha chee' xelélé'ęne' bėla' dxen gate chee benne' caní, ne quebe xelu'ę lataj nu benne' gucache' le'.

<sup>10</sup> Benne' zaj zře'ę lu xęzr la xu xelebenę' lawe' da zaj nate benne' caní, na' xelxezaca ba lázrele'ę, ne xelesel-le' da xulunezruj ljwezre' tue' xetue' lawe' da bulusaca zi' benne' caní gulenné' waláz chee Dios bėnneache ca'.

<sup>11</sup> Gate guca chunna zra xugachaj, na' Dios bsebanę' benne' caní, na' belexasę', na' xúgute benne' ca' belelé'ęne' le' belezrébele'ę.

<sup>12</sup> Nadxa dxúpatę benne' ca' dxelexechebe belenne' chí'i tu benne' dxenné' zizraj xabáa, dxę'ę benne' ca':

—Le xegüén nigá.

Na' belexegüęne', na' belelé'e benne' ca' dxeledábague' le' ca guca.

<sup>13</sup> Ca'an gúcate guzrú'le'ę xęzr la xu, na' xu'u zaj nita na lu xęzre na' gulebía xi na, na' gulate gazre cue' da nacan chi gaxúa bėnneache weaj nę chee da guzrú'. Benne' ca', benne' quebe gulate lu xęzre na', nen dute xel-la' dxelezrebe belúe lá'ane' Dios zuę' xabáa.

<sup>14</sup> Ba gudé da gudxupe' da ba xa' da xeledé bėnneache, na' la za'tę da guxunne'.

*Gubáz gazre dxuchínęne' da dxucuezre'*

<sup>15</sup> Gubáz gazre bchínene' da dxucuezeṛe', na' ben chi'i benne' zan xabáa dxelenné' zizraj:

Naga dxelenná bea bénneache lu xezr la xu ba guledé na lu na' Xránadxu Dios, ne lu na' Cristo cheḡ', na' Le' nna be'ene' lataj ca' chadia chacanna.

<sup>16</sup> Nadxa tape dxua benne' gula ca' zaj dxe'e dxu'a lataj blau naga dxe' Dios buluzú zribe' zaj nuzuate lawe' zran ni'e, dxulucá'ana szrene' Dios,

<sup>17</sup> dxelenné':

Xcalenu', Xran.

Dios, napu' duté xel-la' dxenná bea.

Guzúaquezu', ne zúaquezu', ne tu súazquezu',

lawe' da ba guzi'u xel-la' dxenná bea zrente chiu', ne ba guzú lau' dxenná be'u.

<sup>18</sup> Bénneache xúgute xezre ca' dxelezeṛé'e

san ba bzrin zra gudéu' benne' ca' ba xa', zra na' guchi'u cheḡ benne' gate ca'.

Xunézruju' da naca cheḡ benne' ca' gulenné' waláz chiu',

ne da naca cheḡ benne' ca' zaj naque' chiu',

ne da naca cheḡ benne' ca' beluné' Lue' ba lá'ana,

benne' blau ca', ne benne' quebe nu zaj naca.

Ba bzrin zra guzría xi'u benne' ca' buluzría xi'e xezr la xu.

<sup>19</sup> Nadxa bxalaj xudau' cheḡ Dios da zua xabáa, na' ble'e lau xi'ina naga xu'u xel-la' wezría xrlátaje cheḡ', da zua na lu xudau' na'. Gulepe xesa, ne guleninne na, ne gulenné guzi'u, ne guzrú' xezr la xu, na' bxínnajlé'e xiaj bezxe'.

## 12

### *Tu nu'ula ne be snia schanni' zrente*

<sup>1</sup> Nadxa ble'e lau tu da zrente xabáa. Zua tu nu'ula naca zra lane' ca gubizra, na' zran ni'e zua da naca ca beu', na' xíchajé' zria tu da zaca zaj zria na chazrinnu belaj.

<sup>2</sup> Nu'ula nigá zué' zi'i, ne dxebezre xe'e xel-la' dxudi'a sane' tu bidau', dxedéle'e xel-la' zi' cheḡ galaj bidu na'.

<sup>3</sup> Nadxa ble'e lau xabáa xetú da zrente, zua tu be snia schanni', be xrna, zua gazre xíchajba' ne chi lúzuba', na' zria tu da zaca tu tu xíchajba' ca'.

<sup>4</sup> Nen xrbanba' gucá'a dxéguba' xáteze quebe guca gáchajte belaj zaj zria zran xabáa, na' bzálaba' na lu xezr la xu. Be snia schanni' na' guzeba' lau nu'ula na' sane' bidau' cheḡ gáguba' bidu na' gate ze gálajbe'.

<sup>5</sup> Nu'ula na' guzane' tu bi biudau', bi na' nna be'ebe' duté xezr la xu nen tu var xia. Nadxa bi biu cheḡ nu'ula na' gucá'a Dios lebe', na' bexu'e-be' lataj blau cheḡ naga dxe'e.

<sup>6</sup> Na' nu'ula na' bzrúnnuje' zéaje' le'e xixre' lawe' lataj naga nucueza Dios tu lataj naga sua nu'ula na', naga xulugawe' le' lawe' chazrinnu gaxúa ga xun zra.

<sup>7</sup> Gudé na' guxú'u wedil-la xabáa gate gubáz cheḡ xabáa blau le' Miguel nen gubáz cheḡ xabáa zaj da' le' guledíl-lalene' be snia schanni' zrente. Be snia schanni' na', ne gubáz zaj de'e-ba' beluné' wedil-la.

<sup>8</sup> Quebe bi gulezéquene' lu wedil-la na', na' québedxa guta' lataj cheḡ gubáz ca' lu xabáa.

<sup>9</sup> Ca'an guca gulebéaje' be snia schanni' na' xabáa, be snia na' zúaba' nédxute, na' nazí laba' da xriwe', ne Satanás, da na' dxezí xe na xúgute bèneache. Da xriwe' na', ne gubáz ca' zaj de'e na guledxú'umē' na lu xezr la xu.

<sup>10</sup> Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea chee Dios cheedxu, ne xel-la' dxenná bea chee Cristo chee', lawe' da ba guledxú'umē' da na' gudagu zria na chee benne' bíchedxu, da na' dxagu zria na chee benne' ca' te zra, ne chizrela lau Dios cheedxu.

<sup>11</sup> Benne' bíchedxu ca' beledxúaje' chawe' ne chee dxen chee Bénnea' naque' Zríla'dau', ne ne chee da belexechebe' ca naca chee dizra' chee Cristo, ne quebe belezrebe' nu benne' gutiē' le'.

<sup>12</sup> Chee le' na' gata' xel-la' dxebe' xabáa.

¡Le be le'e zrale xabáa!

¡Edxugua benne' ca' zaj zre'e xezr la xu, ne lawe' nísadau'

lawe' da ba bla' da xriwe' naga zúale,

dute xel-la' dxezrá'a chee na,

lawe' da neze na xáte'ga ne de chee na!

<sup>13</sup> Gate guque be'e da xriwe' ba buluzale' na lu xezr la xu, na' gudxé' nau na nu'ula na' guzane' bi biudu na'.

<sup>14</sup> Nu'ula na' bulunézruje' le' chupa xrile' zren ca xrila bsia chee gaca xexiaje' xezue' le'e xixre' lawe' lataj, zitu' naga zua be snia schanni' na', na' bulugawe' le' lawe' chun iza xugachaj.

<sup>15</sup> Be snia schanni' na' bexébeba' nisa chee benba' tu xegu chee gua na nu'ula na'.

<sup>16</sup> Gúcale' xezr la xu nu'ula na'. Bzra xezr la xu, na' gudebe na xegu na' bexebē be snia schanni' na'.

<sup>17</sup> Chee le' na' bzrá'le'e da xriwe' nu'ula na', na' guxiáj na xeajtíl-lale' na xrtia nu'ula na' zaj zre'e xezr la xu, benne' ca' dxuluzúe' dizra' da bdxixruj be'e Dios, ne dxelexechebe' ca naca chee Jesucristo.

## 13

### *Chupa be xixre' snia ca'*

<sup>1</sup> Nadxa guzéa' dxu'a nísadau', ne ble'eda' bdxuaj tu be xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecude Dios.

<sup>2</sup> Be xixre' snia nigá nácaba' ca tu bezrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bezre xixre'. Be snia schanni' bnézrujba' xel-la' dxenná bea cheeba', ne lataj blau cheeba', ne xel-la' waca cheeba' lu na' be snia na' nácaba' ca bezrtau'.

<sup>3</sup> Zua tu we' tu xichaj be xixre' snia na' nácaba' ca bezrtau' da gute na leba', na' we' na' bexaca na, na' ca naca bèneache ca' zaj zre'e lu xezr la xu belexebánele'ene', ne zjácale'ne' be xixre' snia na'.

<sup>4</sup> Bulucá'ana szrene' be snia schanni' na' lawe' da bnézrujba' xel-la' dxenná bea chee be xixre' na' nácaba' ca bezrtau', ne cá'anqueze bulucá'ana szrene' be xixre' snia na', dxelenné':

—¿Núzraqueze naca ca be xixre' nigá, ne nu seque' tíl-lale' leba'?

<sup>5</sup> Nadxa da xriwe' be na leba' lataj gunneba' dizra' zri'a, na' gunneba' da calela chee Dios, ne gudápaba' xel-la' dxenná bea lawe' chupe xun beu'.

<sup>6</sup> Gunneba' da calela chee Dios, ne chee La Dios, ne chee lataj lá'azxa chee', ne chee benne' ca' zaj zre'e xabáa.



<sup>7</sup> Cá'anqueze guziba' xel-la' dxenná bea tíl-lalə́ba' benne' ca' zaj naque' chee' Dios, ne gútetə́ba' benne' ca', na' guziba' xel-la' dxenná bea lu xúgute' cue' bə́nneache, ne benne' zaj zre'ə' xúgute' xezre ca', ne xúgute' cue' xezr la xu ca', ne benne' dxelenné' dizra' walazre' cha chee'.

<sup>8</sup> Xúgute' benne' zaj zre'ə' xezr la xu bulucá'ana szrene' bə' xixre' snia na', benne' ca' quebe zaj naxúaj le' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bə́nnea' naque' Zríla'dau' belutie'-ba'.

<sup>9</sup> Che nu benne' zua nague', dxal-la' xenne' dizra' nigá.

<sup>10</sup> Benne' ca' dxelegú'ə' bə́nneache lizre xia, cá'anqueze xelú'u benne' ca' lizre xia, na' benne' ca' dxelutie' benne' nen xia nalá, cá'anqueze xelatie' lu xia nalá. Chee le' na' benne' zaj naque' chee' Dios dxal-la' xelaque' zren lazre', ne xelə́ajle'ə' chee' Dios.

<sup>11</sup> Gudé na' ble'eda' xetú bə' xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zrila'. Bea nigá gunneba' ca bə' snia schanni' na'.

<sup>12</sup> Bea nigá nápaba' dutə' xel-la' dxenná bea da napa bə' nedxu na', gate zúaba' lau bə' nedxu na', na' gunná be'eba' ca naca bə́nneache zaj zre'ə' dutə' xezr la xu xulucá'ana szrene' bə' nedxu na', bea na' bexaca we' cheeba' da na' naca gute lə́ba'.

<sup>13</sup> Bə' gudxupe' na' bənba' xel-la' waca zri'a ca', ne bənba' bexrui xi' zran xabáa lu xezr la xu lau bə́nneache ca'.

<sup>14</sup> Nə' chee' xel-la' waca ca' da bənba' lau bə' nedxu na', guzí xə́ba' benne' zaj zre'ə' xezr la xu, na' gunná be'eba' benne' ca' xelunə' tu bedau' ca naca bə' nedxu na', bea na' guzúa we' chee' xia nalá, na' naca bánquezeba'.

<sup>15</sup> Bə' gudxupe' na' guziba' xel-la' dxenná bea gunézruijba' xel-la' nabán bedau' na' naca na ca bə' nedxu na', chee' nnə' bedau' na', ne gute na' xúgute' benne' quebe xulucá'ana szrene' na.

<sup>16</sup> Cá'anqueze bedau' na' gunná be'e na' zriche tu da gunna bea na luzrgá u lu na' zua xabə́la chee' xúgute' bə́nneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zre'ə' cá'aze.

<sup>17</sup> Netú benne' quebe gaca ga' uwe' ne gutie' che quebe zriche da na' dxunna bea na le', u la bə' xixre' snia na', u xrbaba ca naca laba'.

<sup>18</sup> Nu benne' gulabə' da nigá dxal-la' gaque' sina. Benne' dxə́ajni'ine' waca gulabə' ca naca xrbaba chee' laba'. Naca na tuze ca naca xrbaba chee' bə́nneache, na' xrbaba nigá naca na xrupa gaxúa ga xun xrupa.

## 14

### *Da dxelul-la tu gaxúa tape xun cue' chi gaxúa weaj benne'*

<sup>1</sup> Gudé na' gunná'a, na' ble'eda' Bə́nnea' naque' Zríla'dau' zə' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bə́nnea' naque' Zríla'dau', ne La Xre'.

<sup>2</sup> Nadxa bənda' tu da dxeninne na da za' xabáa, da dxeninne na ca schaga' da dxelún zánete' xegu ca', ne ca schaga' da dxun guziu' gate dxennéle'ə' na, ne ca dxeninne naga zaj zra' zánete' benne' dxelinnie' da ca' cun zriadi'i na du.

<sup>3</sup> Belul-lə' tu da cube dxu'a lataj blau naga dxe' Dios, ne lau tapa benne' ca' zaj zua nabancze', ne lau tape dxua benne' gula ca'. Netú benne' xezica quebe guca gul-lə' ca naca da na' belul-lə'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulelé' lə́wela benne' zaj zre'ə' xezr la xu.

<sup>4</sup> Benne' caní quebe gulezúalene' nu'ula chee benne' xula, san belexegá'ana chawe', na' zjácálene' Bénnea' naque' Zríla'dau' gáteteze zéaje'. Benne' caní gulelé' lávela bénneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'.

<sup>5</sup> Cabata' dxelún lazre', na' zaj naque' du lazre' dxu'a lataj blau naga dxe' Dios.

*Dizra' da dxuluzén chunna gubáz chee xabáa bénneache*

<sup>6</sup> Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bénneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'.

<sup>7</sup> Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzrin zra guchi'a Le' chee bénneache. Le gucá'ana szren Bénnea' bene' xabáa, ne xezr la xu, ne nísadau', ne beaj ca'.

<sup>8</sup> Xetú gubáz chee xabáa zéaje' cuzru gubáz chee xabáa nedxu na', dxenné':

—¡Ba guzría xi! ¡Ba guzría xi' xezre Babilonia, xezre zren na', lawe' da buluszre' benne' xezre ca', ne benne' duté xezr la xu nen da naca ca' xrise uva wal-la chee da sban da dxelune'!

<sup>9</sup> Xetú gubáz chee xabáa zéaje' cuzru gubáz chupa ca', dxenné' zizraj:

—¡Che nu benne' dxucá'ana szrene' be snia na', ne bedau' cheeba', ne gu'e lataj zriche luzrgue' u ne'e laba',

<sup>10</sup> benne' nigá té'e lu da ba xa' da nucueza Dios lu xel-la' dxezrá'a chee', na' saca zi'e lu xi' chee' da dxuzéxle'e na lau gubáz chee xabáa ca' chee Dios, ne lau Bénnea' naque' Zríla'dau'!

<sup>11</sup> ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrene' be snia na', ne bedau' cheeba', ne dxelu'e lataj zriche laba' luzrgue'!

<sup>12</sup> ¡Chee le na', benne' ca' zaj naque' chee Dios, ne dxuluzúe' dizra' ca nadxiruj be'ene', ne zjácálene' da naca chee Jesús, dxal-la' xelaque' zren lazre'!

<sup>13</sup> Nadxa benda' chi'i tu benne' da za xabáa. Dxe'e neda':

—Bzuaj da nigá: Na'a, ne lu da za za' ba neza zrente naca na chee benne' gate ca' xelute bénneache le' lawe' da dxeléajle'e chee Xránadxu. Be' Lá'azxa dxenné': “¡Ca' naca na, lawe' da xelezezi' lazre' ca naca lu zrin da beluné', na' da xrlátaje da beluné' zeajle na benne' ca'!”

*Lina chee xezr la xu*

<sup>14</sup> Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bénneache. Zria tu da naca na oro xíchaje', ne nuxre' tu xia nalá.

<sup>15</sup> Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bénnea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzrin zra, na' lina chee xezr la xu ba guca na!

<sup>16</sup> Nadxa bénnea' dxe'e lawe' beuj na' gudine' xia nalá chee' na', na' bequ'é'e lina chee xezr la xu.

<sup>17</sup> Nadxa xetú gubáz chee xabáa bdxuajé' xudau' da zua xabáa, nuxre' tu xia nalá.

<sup>18</sup> Xetú gubáz chee xabáa bdxuajé' lu cugu, gubáz chee xabáa na' napé' xel-la' dxenná bea lu xi', na' gunné' zizraj. Dxe'e gubáz chee xabáa na' nuxre' xia nalá:

—jBchine xia nalá chiu' na', ne becá'a uva ca' da zaj den lu xezr la xu lawe' da ba güe na!

<sup>19</sup> Na' gubáz chee xabáa na' gudine' xia nalá chee' lawe' xezr la xu, ne bequ'é uva ca' da zaj de lu xezr la xu da zéaje na benne' ca' dxelune' da zrinnaj, na' bzre'e na naga xelesie' na, da na' zéaje na da ba xa' da nucueza Dios chee benne' ca' dxelune' da zrinnaj.

<sup>20</sup> Uva ca' gulesie' na naga dxedxuaj xezre, na' naga dxelesie' na bdxuaj dxen chee benne' ca' dxelune' da zrinnaj da gulén na cáтите sibe zua dxu'a bzrina', na' guzá' dxen na' cáтите sadxu du gazre zra.

## 15

### *Gubáz chee xabáa ca' zaj nuxre' gazre da ba xa' da xuluzále' xezr la xu*

<sup>1</sup> Ble'eda' xabáa xetú da zrente' da xebánedxu, belelá' gazre gubáz chee xabáa zaj nuxre' gazre da ba xa' bzebe, da zaj naca na naga cheajsete xel-la' dxezrá'a chee Dios.

<sup>2</sup> Cá'anqueze ble'eda' tu da naca na ca nísadau' da naca na ca xiaj esa', ne nachixe na xi', na' benne' ca' quebe gulezí lu ne'e da naca na chee be snia na', ne da nacan chee bedau' cheeba', ne xrbaba chee laba', zaj ze' lu nísadau' na' da naca na ca xiaj esa', zaj nuxre' da ca' con zríadi'i na du da ba bnezruj Dios le'.

<sup>3</sup> Dxelul-le' da bil-la Moisés, benne' wen zrin chee Dios, ne da dxul-la Bénnea' naque' Zríla'dau', da dxenná na:

Da zrente, ne da dxebánedxu zaj naca xúgute da ba benu' Lue'.

Xran, nacu' Dios napu' duté xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee duté xezr la xu.

<sup>4</sup> ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelelá' benne' duté xezr la xu, na' xulucá'ana szrene' Lue', lawe' da ba belelé'eng' da xrlátaje da nunu'.

<sup>5</sup> Gudé na' gunná'a ne ble'eda' bخالaj xudau' da zua na xabáa, naga zua lataj naga zaj naxúaj da ca' bdxixruj be'e Dios.

<sup>6</sup> Lu xudau' na' beledxúaj gazre gubáz chee xabáa ca' zaj nuxre' gazre da ba xa'. Zra lane' zaj nacue' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro.

<sup>7</sup> Nadxa tu benne' laduj tapa benne' zaj naca bánqueze' bnézuje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zué' chadía chacanna.

<sup>8</sup> Guzrate xudau' na' nen zren chee xi' da dxulé'e na ca zaj naca xel-la' szren, ne xel-la' dxenná bea chee Dios, na' netú benne' quebe guca chu'e ga na' cadxa gudé chee da gazre da ba xa' ca' da zaj nuxru gazre gubáz chee xabáa ca'.

## 16

### *Da gazre da ba xa' ca'*

1 Nadxa benda' chi'i tu benne' gunné' zizraj lu xudau'. Dxe'e gazre gubáz chee xabáa ca':

—Le chjaca, le cheajzala da ba xa' ca' lu xezr la xu, da ca' nucueza Dios.

2 Na' guxéaj gubáz chee xabáa nedxu, xeajlatje' xé'ena bzri chee' lawe' xezr la xu, na' xúgute' bènneache, benne' zaj nazriche luzrgue' la be snia na', ne dxulucá'ana szrene' bedau' cheeba', gulebia we' lu be'la' dxen chee benne' ca' da gulále'e na.

3 Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee benne' gate, na' gulate xúgute' bea zaj naca banba' lu nísadau' na'.

4 Gubáz guxunne' xeajlatje' xé'ena bzri chee' lu xegu nisa ca', ne lu beaj ca', na' belexaca na dxen.

5 Na' benda' chi'i tu gubáz chee xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje' nacu' lawe' da guchugu' chee benne' ca' guca caní,

6 lawe' da bululalje' dxen chee benne' chiu' ca', ne chee benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

7 Cá'aqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' dute' xel-la' dxenná bea. Ba bchi'u chee bènneache ca' ca naca da li, ne da xrlátaje.

8 Gubáz gudape' xeajlatje' xé'ena bzri chee' lau gubizra, na' gubizra guzí na lataj guzezxex na bènneache ca' nen xi' chee na.

9 Xúgute' bènneache guléxzele'e, ne quebe belexebí'i lazre', ne quebe belúe lá'ane' Dios, na gulenné' da calela chee Bènnea' nucueze' da ba xa' na'.

10 Gubáz gázxue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bènneache ca' gulagu xa'a luzre' lu xel-la' dxudia chee',

11 ne quebe bulusané' da zrinnaj da dxeluné'. Gulenné' da calela chee Dios zue' xabáa, lawe' da dxelezaque' caní ne chee we' da zaj zria be'la' dxen chee' ca'.

12 Gubáz xrupe xeajlatje' xé'ena bzri chee' lawe' xegu zren le na Eufrates, na' nisa xegu na' bebizre na, chee xalaj tu neza naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

13 Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'.

14 Be' xriwe' caní belún na xel-la' waca zri'a ca', na' beledxúaj na chee xulutupa na xúgute' benne' wenná bea chee xezr la xu, chee chjaque' lu wedil-la chee zra zren chee Dios, Bènnea' nape' dute' xel-la' dxenná bea.

15 Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté' naca na chee bènnea' zue' ban lazre' ne nupé'e lázrdawe' ca tu benne' dxuxúe' zra lané' chee quebe te' gala xídeze, ne quebe xedué'ene' lau bènneache.

16 Nadxa beledube' benne' wenná bea ca' lu lataj naga le na Armagedón nen dizra' hebreo.

17 Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

<sup>18</sup> Nadxa gulepe xesa, ne guleninne na, ne gulenné guziu', na' lu xęzr la xu guzru'le'e ca netú lasa quebe ne xru', na' gulálate zaj zra' bėnneache lu xęzr la xu.

<sup>19</sup> Xęzre zrentau' na' guzrá na chunna cue', na' xęzre ca' zaj nita lu xęzr la xu gulebía xi na, na' xeajsá lazre' Dios benne' ca' cheę xęzre zrentau' na' le na Babilonia cheę xeledé' lu da ba xa' zren da nucueza Dios lu xel-la' dxezrá'a cheę'.

<sup>20</sup> Xúgute xęzr la xu ca' da naxechaj nísadau', ne xúgute xi'a ca' belexenite na.

<sup>21</sup> Cá'anqueze belexrux zran xabáa xiaj bezxe' zri'a lawe' bėnneache ca', da dxelá'a na ca tu gaxúa xia weaj, na' bėnneache ca' gulenné' da calela cheę Dios ne cheę da ba xa' da gulezaque', lawe' da guca na tu da ba xa' zrente.

## 17

### *Dios dxuzría xi'e nu'ula dxúnle'e da sban*

<sup>1</sup> Nadxa bla' tu gubáz cheę gazre gubáz cheę xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'.

<sup>2</sup> Benne' wenna' bea ca' zaj zre'e xęzr la xu dxelune' da sban nen nu'ula na', na' benne' zaj zre'e xęzr la xu zaj naque' ca benne' dxelezuzre' lawe' da dxelune' da sban nen nu'ula na'.

<sup>3</sup> Nadxa, lu da ble'e Be' Lá'azxa neda', gubáz cheę xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrie' cuzru tu be xixre' schanni' xrna, na' zaj naxúaj lu bela' dxen cheęba' laba' schanni' ca', da ca' dxecuide Dios, na' zaj naca gazre xíchajba', ne chi lúzuba'.

<sup>4</sup> Nu'ula nigá nacuę' zra lane' bzawe, ne da xrna, na' lechítaje cheę' zaj naca na oro, ne xiaj xrtante, ne bga ca'. Nuxre' tu xé'ena bzri da naca na oro da nazratę na da sgute ca', ne da sban da dxune'.

<sup>5</sup> Naxúaj luzrgue' ca le', da dxenná na: Babilonia, Xęzre Szrentau', Xrna' Xúgute Nu'ula Ca' Dxelune' Da Sban, ne Xúgute Da Sgute Da De Xęzr La Xu.

<sup>6</sup> Nadxa ble'eda' nu'ula na' dxezúrene' nen dxen cheę benne' ca' zaj naque' cheę Dios, ne cheę benne' ca' belute bėnneache le' lawe' da belexecheębe' cheę Jesús. Gate ble'eda' da na', bebánele'eda'.

<sup>7</sup> Nadxa gubáz cheę xabáa na' guzre' neda':

—¿Bizr cheę na' dxebánenu'? Gulé'eda' lue' ca naca da nagache cheę nu'ula nigá, ne cheę be xixre' schanni' na' núaba' le', bea na' zaj napa gazre xíchajba', ne chi lúzuba'.

<sup>8</sup> Be xixre' schanni' na' blé'enu', nácaba' tu be zúaba' nédxute, na na'a québedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xęzr la xu, ne quebe zaj naxúaj le' lu xiche cheę xel-la' nabán ca bęnte Dios xęzr la xu, xelexebánele'ęne' gate xeledé'ęne' bea nigá, be zúaqueze nédxute, na' na'a québedxa zúaba', na' wela'ba'.

<sup>9</sup> Nigá de late' da gulé'eda' benne' xelėjni'ing' na. Gazre xíchajba' caní zaj zéaje na gazre xi'a naga dxenná bea nu'ula na'.

<sup>10</sup> Cá'anqueze xíchajba' ca' zaj zéaje na gazre benne' wenna' bea. Gazzu' benne' wenna' bea caní ba gultatie'. Tu benne' ca' dxenná be'e na'a, na' xetue' quebe ne xidę'. Gate la' benne' bzebe nigá, québedxa súateque' scha'.

11 Bę xixre' schanni' na', bę zúaba' nédxute, na' na'a québedxa zúaba', zéaję na benne' xrunu' naque' benne' wenná bea. Naque' tu benne' ládujla benne' gazre ca', na' te na' gatię' tu chí'izqueze.

12 'Chi lúzu bę xixre' snia na' da blé'enu' zaj naca na chi benne' wenná bea ca', benne' quebe ne xelexú lawę' xelenná be'e, na' xelexí'e xel-la' dxenná bea xelaque' wenná bea tu chí'idau'ze tu zren nen bę xixre' schanni' na'.

13 Benne' chi wenná bea caní zaj nunę' tuze dizra', na' xulunęruje' xel-la' szren cheę', ne xel-la' dxenná bea cheę' lu na' bęnnea' naque' bę xixre' schanni' na'.

14 Benne' caní xeledíl-lalęne' Bęnnea' naque' Zríla'dau', na' Benne' nigá guzría xi'e benne' wenná bea ca', lawe' da naca Lę' Benne' Wenná Bea cheę benne' wenná bea ca', ne Xrane benne' zaj naque' xrane bęnneache, na' benne' ca' zralęnę' Lę', gunnę Dios lę', ne guquę'e lę', na' zaj naque' li lazre'.

15 Cá'anqueze gubáz cheę xabáa na' guzre' neda':

—Nísadau' ca' blé'enu', naga dxe' nu'ula na' dxúnle'e da sban, zaj naca na xęzre bęnneache ca', ne benne' dxelennę' dizra' walazre' cha cheę', ne benne' zane cue' xęzr la xu.

16 Chi lúzuba' na' blé'enu' xichaj bę xixre' schanni' na', da zaj naca na chi benne' wenná bea ca', xelexúdenę' nu'ula na' dxúnle'e da sban, na' xelexéaj xíchaję' lę', ne xulucá'ang' lę' gala xídeze. Xelawę' bęla' dxen cheę', ne xuluzezxe' lę' lu xi'.

17 Dios bzuę' lu lázrdau benne' wenná bea ca' xelunę' ca da dxaca lazre' Lę', gate belunę' tuze dizra', ne bulunęruje' xel-la' dxenná bea cheę' lu na' bęnnea' naque' bę xixre' schanni' na', cadxa gaca ca da ba gunná Dios.

18 Nu'ula na' blé'enu' naque' Babilonia, xęzre zrentau' na' dxenná be'e na benne' wenná bea ca' zaj zre'e xęzr la xu.

## 18

### *Dxebía xi' xęzre Babilonia*

1 Gudé na' ble'eda' betaj xetú gubáz cheę xabáa, nápalę'e xel-la' dxenná bea, na' bsení' xel-la' szren cheę' lu xęzr la xu.

2 Na' gunnę' zizraj:

—Ba guzría xi'. Ba guzría xi' Babilonia, xęzre zrentau' na', ne ba bexaca na lataj naga zaj zra' da xriwe' ca', ne lataj naga zaj zra' xúgute cue' be' xriwe' ca', ne lataj naga zaj zra' bę zua xrila, bę schanni' ca', ne bę gúte ca'.

3 Xúgute bęnneache zaj zre'e tu tu cue' xęzr la xu zaj naque' ca benne' dxelezuzre', lawe' da dxelunę' da sban da dxaca xęzre na', na' benne' wenná bea ca' zaj zre'e xęzr la xu belunę' da sban da dxaca xęzre na', na' benne' ca' dxelúti'e gulaque' benne' gunní'a nę cheę da zante da gulezá lazre' benne' ca' zaj zre'e xęzre na'.

4 Nadxa benda' chi'i xetú benne' da za xabáa, dxennę':

—Le dxuaj xęzre na', le'e, nácale chia', cheę quebe gácale benne' ca' tuze lu dul-la da dxelunę', ne cheę quebe tele lu da ba xa' da xelezaca benne' ca'.

5 Dul-la cheę benne' ca' ba guxán na, na' zaj naca na ca tu da ba bgula, da ba bzrintę na zran xabáa, na' Dios ba xeajsá lazre' ca naca da zrinnaj da dxelún benne' ca'.

6 Dios gunęruje' cheę benne' ca' cáteze da bulunęruje' cheę benne' xula, ne xunęruje' lę' chupa cuenla ca da zrinnaj da belunę'. Ba nucueze' da xelexaque' da nácale'edxa zi' ca da bulusaque' benne' xula.

<sup>7</sup> Gudéé' benne' ca' lu da ba xa', ne gudéé' lē' xel-la' zi' cáteze na' beluné'. Buluzúa cuine' lu xel-la' szren, ne gulezúé' lu xel-la' dxelexezaca ba lazre' chee', lawe' da dxeleonné' lu lázrdawe': Dxé'entu' nigá dxenná béantu'. Quebe nácantu' wēzēbe, ne quebe bi sácantu'.

<sup>8</sup> Chee lē na', tuze zra xelezrín da ba xa' ca' da xelezaque', xel-la' gute, ne xel-la' zi', ne xel-la' dxedún, na' xelezxe' lu xi', lawe' da napa Xránadxu Dios dutē xel-la' dxenná bea, na' naque' Bémea' guchugue' chee' benne' ca' xelezaque' caní.

<sup>9</sup> Benne' wenná bea ca' zaj zre'ē xezr la xu, ne belúnleñē' benne' ca' da sban ne da belexezaca ba lazre', xebezre xache' gate xelélé'ene' ca naca zren chee xezre na', da dxezxe na.

<sup>10</sup> Welezé' zítu'la lawe' da xelezrebe' xelezaque' ca da dxelezaca benne' ca', na' xelenné':

—Baxache' nácale le'e, benne' zaj zre'ē xezre zrentau', Babilonia, lawe' da chadité bla' da ba xa' da dxezácale.

<sup>11</sup> Cá'anqueze benne' ca' dxelúti'e, benne' zaj zre'ē xezr la xu, webezre', ne webezre xáchequeze' ca naca da dxaca chee xezre na', lawe' da québedxa nu chilá' benne' si'ē da dxeluti'e,

<sup>12</sup> da zaj naca oro, ne plata,  
ne xiaj xrtante ca', ne bga ca',  
ne ladxe' zaca ca', ne ladxe' bzawe ne da xrna,  
ne xúgute cue' xaga ca' dxelelálē'e na zixre,  
ne zrita xrtante, ne xaga xrtante,  
ne xia gache, ne xia, ne xiaj esa',

<sup>13</sup> ne lacu zixre, ne xíxre'dau' dxelálē'e na zixre,  
ne xala, ne da ca' dxelelálē'e na zixre,  
ne xrise uva wala, ne za xel-la' wagu,  
ne xrte xezaj, ne zrua' xtila,  
ne bē xixre', bē dxelúia xua',  
ne zrila' ca', ne bzrina' ca',  
ne da ca' dxudé xua,  
ne benne' ca' dxelúti'e lē' lu na' benne' gunní'a ca'.

<sup>14</sup> Benne' caní xelē'e benne' zaj zre'ē xezre na':

—Na'a québedxa gápale da zixre ca' da zácale'e na da bdánnele'ele, ne ba bnítele tu chí'izqueze xúgute xel-la' gunní'a chee, ne da xrtante chee.

<sup>15</sup> Benne' ca' belúti'e da ca' xelezé' zítu'la lawe' da dxelezrebe' xelezaque' ca da dxelezaca benne' zaj zre'ē xezre na', na' xebezre', ne xebezre xáchequeze',

<sup>16</sup> na' xelenné':

—Baxache' zaj naca benne' ca' zaj zre'ē xezre zrentau' na'. Gulaque' ca tu nu'ula nacuē' ladxe' zácale'e da bzawe, ne da xrna, ne nazi'ē lechítajē da naca na oro, ne xiaj xrtante, ne bga ca'.

<sup>17</sup> Chadité benite xel-la' gunní'a na', ne gugezxe na.

Xúgute benne' xrane da ca' dxeledán lawe' nísadau', ne benne' zaj zre'ē lu'ule na, ne benne' dxulusé'e da ca' dxeledán lawe' nísadau', ne benne' dxeluné' zrin lu nísadau' belezé' zítu'la,

<sup>18</sup> na' gate belelé'ene' zren chee xezre na' dxezxe na, na' gulenné' zizraj:

—¿Bízraqueze xetú xezre naca na da zren ca xezre zrentau' nigá?

<sup>19</sup> Dutē xel-la' dxelexewí'ine lazre' xuluzré'e xu xíchajē' ca', ne xebezre', ne xebezre xáchequeze', xelenné':

—Baxache' zaj naca benne' ca' zaj zre'e xezre zrentau' na'. Nen xel-la' gunní'a chee benne' ca' gulenni'a xúgute benne' ca' zaj nape' da ca' dxeledán lawe' nísadau'. Chadite guzría xi' xezre zrentau' na'.

<sup>20</sup> Ca guca chee xezre na', le be, le'e zrale xabáa, ne le'e, gubáz chee Cristo, ne le'e bchálajle waláz chee Dios, ne xúgutele le'e nácale bi chee Dios, lawe' da gate bzria xi' Dios xezre na', bebéaj lazre' da naca chee le'e.

<sup>21</sup> Nadxa tu gubáz chee xabáa, gubáz nápal'e xel-la' dxenná bea guchise' tu xiaj zren da naca na ca xiaj xiche, na' bzale' na lu nísadau', gunné':

—Cá'ante cuía xi' Babilonia, xezre zrentau' na', na' québedxa nu lé'equezdxa le' na,

<sup>22</sup> ne québedxa nu xen la neza chee xezre na' da ca' dxulugul-la bénneache, da can zriadi'i na du, ne bchiuj, ne luzu da dxulucuezre', ne québedxa nu chilá' gun zrin lu xezre na', ne québedxa xen schaga da dxun da dxutu na.

<sup>23</sup> Québedxa gusení' netú xi' lu xezre na', ne québedxa xen laní chee wechaga na' ga na', lácala benne' ca' belúti'e lu xezre na' gulenná be'e lawe' xúgute benne' zaj zre'e xezr la xu, ne gulezí xe'e xúgute cue' xezr la xu nen xel-la' wazrá' chee'.

<sup>24</sup> Caní guca lawe' da lu xezre na' gulalaj dxen chee benne' ca' gulenné' waláz chee Dios, ne dxen chee benne' ca' zaj naque' bi chee Dios, ne dxen chee benne' ca' belute bénneache le' du da naca xezr la xu.

## 19

<sup>1</sup> Gudé na' benda' chi'i benne' zan zaj zre'e xabáa, dxelenné' zizraj: ¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

<sup>2</sup> Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban, nu'ula na' bxrínnaje' bénneache zaj zre'e duté xezr la xu lu da sban da bene'! ¡Dios ba bebéaj lazre' nu'ula na' lawe' da betie' wen zrin ca' chee Dios!

<sup>3</sup> Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

<sup>4</sup> Nadxa tape dxua benne' gula ca' ne tapa benne' ban ca' buluzú zribe', na' bulucá'ana szrene' Dios, Bénnea' dxe'e lataj blau na', dxelenné':

—¡Ca' naca na! ¡Gaca ba Dios!

<sup>5</sup> Nadxa ben tu chi'i benne' lu lataj blau na', dxenné':

¡Le güe lá'ana Dios cheedxu, xúgutele le'e dxunle zrin chee', ne dxezrebele Le', le'e benne' blau, ne benne' quebe nu nácale!

*Laní chee wechaga na' chee Bénnea' naque' Zríla'dau'*

<sup>6</sup> Cá'anqueze benda' tu da naca ca chi'i benne' zan, ca dxeleninne zánete xegu, ne ca dxelennéle'e guziu' ca', dxelenné':

¡Gaca ba Dios lawe' da ba guzú lau dxenná bea Xránadxu Dios, Benne' nape' duté xel-la' dxenná bea!

<sup>7</sup> ¡Du be! ¡Béle'equezdxa, ne güe lá'anadxu Le'!

¡Ba bzrin zra chee laní wechaga na' chee Bénnea' naque' Zríla'dau'!

Nu'ula na' si'e ba nupá'a cuínabe',

<sup>8</sup> nu'ula na' nazi'ibe' lataj nácube' ladxe' zaca, da quebe nadxén na, ne dxácátite na.

Ladxe' zaca na' zéaje na da xrlátaje da zaj nun benne' ca' zaj naque' bi chee Dios.

<sup>9</sup> Nadxa guzre gubáz chee xabáa neda':



—Bzuaj caní: Ba neza zren naca na chee benne' ca' gunné Dios xelélé'e laní wechaga na' chee Bénnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

<sup>10</sup> Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wən zrin chee Dios ca lue', ne ca benne' bichu' ca' zéajlele da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

### *Benne' zrië' bzrina' chiche*

<sup>11</sup> Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrië'-ba' le' Du Lazre', ne Li Lazre', lawe' da dxenná be'e, ne dxune' wedil-la lu da xrlátaje.

<sup>12</sup> Xíaj lawe' dxelácatite na ca xi' ca, na' xíchaje' zaj zria zánete da zaca ca', na' naxúaj tu le' lawe', da nézene' tuze Le'.

<sup>13</sup> Nacue' tu zre' da nazaj na dxen, na' La Le' naca na Xrtizra Dios.

<sup>14</sup> Xúgute benne' ca' zaj zre'e xabáa zjácáleñe' Le', zaj nacue' ladxe' zaca ca', ladxe' chiche zrladau', ne zaj zrië' bzrina' chiche ca'.

<sup>15</sup> Dxu'a Bénnea' zua tu da naca na ca tu xia nalále'e da quine' benne' xezre ca', na' nna be'ene' benne' ca' nen tu bar xia. Le' guzríá xi'e benne' ca' ca tu benne' dxesie' uva ca', ne dxuléaje' na, da zéaje na da ba xa' da nucueza Dios lu xel-la' dxezrá'a chee', ca da xelezaca bénneache ca'.

<sup>16</sup> Naxúaj le'e zre', ne zríchuje' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

<sup>17</sup> Nadxa ble'eda' tu gubáz chee xabáa ze' lu gubizra, na' gunné' zizraj xúgute be' zua xrila, be' dxeledá zran xabáa, dxenné':

—Le da. Le zraga gágule da dxúnna'e Dios le'e,

<sup>18</sup> chee gágule be'la dxen chee benne' wenná bea ca', ne chee benne' dxelenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zrië'-ba', ne chee xúgute bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

<sup>19</sup> Nadxa ble'eda' be' xixre' schanni', ne ca naca benne' wenná bea zaj zre'e xezr la xu nen benne' dxjaca wedil-la chee' ca', ba nazrague' chee xeledí-lalene' Bénnea' zrië' bzrina' chiche na', ne nen benne' ca' zaj de'e Le'.

<sup>20</sup> Gulel-le' be' xixre' schanni' na' tu zren nen bénnea' gunné' waláz cheeba', bénnea' bēnle'e xel-la' waca zren lauba'. Ne chee xel-la' waca caní da bene', benne' nígá guz'í xē'e benne' ca' belú'e lataj guzriche luzrgue' laba', ne bulucá'ana szrene' bedau' cheeba'. Nadxa beleché'e be' xixre' schanni' na', ne bénnea' gunné' waláz cheeba', na' belegu'e le' zaj nabante' lu xi' chee da dxuzézele'e na da dxe' ca tu nísadau'.

<sup>21</sup> Nadxa Bénnea' zrië' bzrina' chiche be'tie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' be'la dxen chee benne' ca'.

## 20

### *Chi gaxúa iza*

<sup>1</sup> Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren.

<sup>2</sup> Gubáz nigá gudel-le' bę snia schanni', nácaba' bęla' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza.

<sup>3</sup> Na' gudxú'üne'-ba' lataj chul-la na' naga bsézxuje'-ba', na' bde'e le'e dxa xu'u na' tu da gunna bea na, cheę québedxa si xę na bęnneache cheę xęzr la xu ca' cadxa te chi gaxúa iza. Te cheę chi gaxúa iza, dxal-la' xelá' na tu chí'idau'.

<sup>4</sup> Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea cheę xuluchi'e ca da zaj nun bęnneache. Cá'anqueze ble'eda' bęnne'du ca' gulexú'u bęnneache ca' gulechugu bęnneache xíchaje' lawe' da belexechebe' cheę Jesús, ne buluchálaje' xrtizra Dios. Benne' caní quebe bulucá'ana szrenę' bę xixre' schanni' na', ne bedau' cheęba', ne quebe belú'e lataj zriche laba' luzrgue', u ne'e.

<sup>5</sup> Benne' gate ca' xezícala quebe xelexebanę' ca tedxa cheę chi gaxúa iza ca'. Da nigá guca naca na xel-la' dxexebán nedxu.

<sup>6</sup> Ba neza zrentę naca na cheę benne' ca' zaj naque' bi cheę Dios, benne' ca' xelexebanę' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze cheę Dios, ne cheę Cristo, na' xelenná be'e tu zren nen Le' chi gaxúa iza.

<sup>7</sup> La te cheę chi gaxúa iza ca', na' la' Satanás naga nadxéaj na,

<sup>8</sup> na' xedxúaj na cheę cheajxri xę na bęnneache zaj zre'e xúgute cue' xęzr la xu ca'. Si xę na bęnneache xęzre Gog, ne xęzre Magog, na' guchaga na benne' dxjaque' wedil-la cheę xúgute cue' xęzr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xęgu zren.

<sup>9</sup> Ca' guca, beledxúaje' du ca naca lu xęzr la xu, na' guléchaje' naga zaj zra' benne' zaj naque' cheę Dios, ne xęzre na' da nazrí'i Dios. Nadxa Dios gusel-le' xi' da za' xabáa, na' bzezze xi' na' ca naca benne' ca'.

<sup>10</sup> Nadxa gulęl-le' da xriwe', da guzí xę na bęnneache ca', na' guledxú'üne' na lu xi' cheę da dxuzézrele'e na da dxe' ca tu nísadau', naga zaj zra' bę xixre' schanni', ne bęnnea' gunnę' waláz cheęba'. Lu xi' na' xeledęe' lu da ba xa' te zra, ne chizrela chadía chacanna.

### *Dios dxe'e lataj blau chiche, dxuchi'e cheę benne' ca' dxelune' da zrinnaj*

<sup>11</sup> Nadxa ble'eda' tu lataj blau chiche, ne Bęnnea' dxe'e lataj na'. Lau Le' belexenite xęzr la xu, ne xabáa, na' québedxa nu benne' lé'ene' da ca'.

<sup>12</sup> Nadxa ble'eda' benne' gate ca', benne' blau, ne benne' quebe nu zaj naque', zaj zę' lau Dios, na' belexalaj xiche ca', ne cá'anqueze xetú xiche naga zaj naxúaj la benne' ca' zaj nape' xel-la' nabán. Dios bchi'e cheę benne' ca' cáteze da belún tu tue', da ca' zaj naxúaj na lu xiche ca'.

<sup>13</sup> Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la cheę benne' gate, na' Dios bchi'e cheę xúgute' cáteze da belún tu tue'.

<sup>14</sup> Nadxa guledxú'üne' benne' gate ca' gulezúe' lataj chul-la naga zra' benne' gate lu xi' cheę da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna,

<sup>15</sup> na' lu xi' nigá guledxú'üne' xúgute' benne' ca' quebe zaj naxúaj le' lu xiche cheę xel-la' nabán.

## 21

### *Tu xabáa cube ne tu xęzr la xu cube*

<sup>1</sup> Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' québedxa de nísadau'.

<sup>2</sup> Neda', Juan, ble'eda' xezre lá'azxa, da naca na Jerusalén cube, dxetaj na xabáa, za na naga zua Dios. Xezre na' nabeza na ca tu nu'ula wechaga na' nupá'a cuínabe' chee gácabe' tuze nen benne' cheebe'.

<sup>3</sup> Benda' chi'i tu benne' da za' xabáa, dxenné':

—Gunná'xque, Dios zué' ládujla Bénneache, na' xelaque' xezre chee', na' Dios súaqueze' nen benne' ca', ne gaque' Dios chee'.

<sup>4</sup> Dios tu súalezqueze' benne' ca' chee québedxa xelebezre', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee xúgute da gulaca nédxute.

<sup>5</sup> Nadxa Dios, Bénnea' dxe'e lataj blau na' gunné':

—Gunná'xque, neda' dxuna' cube xúgute da ca'.

Cá'anqueze gunné':

—Bzujaj dizra' caní lawe' da naca li lazre', na' waca guxrén lázrele le na.

<sup>6</sup> Gudé na' guzre' neda':

—Ba bena' xúgute da ba gunnía' guna'. Neda' naca' Benne' zúaqueze' nédxudate, ne Benne' zúaqueze' bzébedxa. Naca' Bénnea' dxuna' su lau sua xúgute, ne dxuna' xexuzre na. Nu benne' dxebílené', neda' gunézruja' nisa beaj xí'aje' da gunezruj na le' xel-la' nabán, ne quebe bi quízruje'.

<sup>7</sup> Nu benne' zrue'ene' sí'e xúgute da caní, neda' gaca' Dios chee', na' le' gaque' zri'ina'.

<sup>8</sup> Benne' ca' zaj naque' zra' chebe, ne benne' ca' quebe dxelájle'e chia', ne benne' ca' dxelune' da zrinnaj, ne benne' ca' dxelutíe' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute benne' dxelún lazre', gudéa' le' lu xi' chee' da dxuzézrele'e na da dxe' ca' nísadau', da naca na da zi' da xa' da zeajlí canna.

### *Jerusalén cube*

<sup>9</sup> Nadxa bla' tu gubáz chee gazre gubáz chee xabáa ca' belúxrué' gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bénnea' naque' Zríla'dau'.

<sup>10</sup> Lu da ble'e Be' Lá'azxa neda', gubáz chee xabáa na' guché'e neda' tu xi'a zren, ne sibe, na' blé'ene' neda' ca naca xezre lá'azxa zren na', Jerusalén cube. Dxetaj na xabáa naga zua Dios.

<sup>11</sup> Xezre nigá dxácatite na nen da xabáa chee Dios, na' xel-la' dxácatite chee na naca na ca dxácatite tu xiaj xrtante, ca tu xiaj jaspe, da naca na ca xiaj esa' xrtante.

<sup>12</sup> Dxu'a xezre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj ze tu weaj gubáz chee xabáa, na' le'e dxa xu'u ca' zaj naxúaj la chazrinnu cue' benne' Israel.

<sup>13</sup> Zaj zua chunna dxa xu'u weaj dapa sácate.

<sup>14</sup> Lu lane ze'e da naxechaj na xezre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee Bénnea' naque' Zríla'dau'.

<sup>15</sup> Gubáz chee xabáa na' dxuchálajlene' neda' nuxre' tu da naca na ca tu xia xtila da naca na oro chee gudxixre' xezre na', ne dxa xu'u chee na ca', ne ze'e da naxechaj na.

<sup>16</sup> Xezre na' naca na lébete dapa saca. Lébete naca na xel-la' tunna, ne xel-la' laga chee na. Gubáz na' bdxixre' xezre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee na zaj naca na lébete.

17 Gudé na' bdxixre' xel-la' sibe chee ze'e na' naxechaj na. Naca na tu gaxúa tape xun zrita, na' chazrita chee gubáz chee xabáa na' naca na lēbetē ca chee bēneache.

18 Ze'e na' da naxechaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'.

19 Xiaj lane ze'e na' zaj naca na xiaj xrtantē ca':

Xiaj nedxu naca na xiaj jaspe,  
na' xiaj gudxupe' naca na xiaj zafiro,  
na' xiaj guxunne' naca na xiaj ágata,  
na' xiaj gudape' naca na xiaj esmeralda,

20 na' xiaj gázxue naca na xiaj ónice,  
na' xiaj xrupe naca na xiaj cornalina,  
na' xiaj gazre naca na xiaj crisólito,  
na' xiaj xrunu' naca na xiaj berilo,  
na' xiaj ga naca na xiaj topacio,  
na' xiaj chi naca na xiaj crisoprasa,  
na' xiaj chinéaj naca na xiaj jacinto,  
na' xiaj chazrinnu naca na xiaj amatista.

21 Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

22 Quebe ble'eda' netú xudau' xezre na', lawe' da Xránadxu Dios, Bēneae' nape' dute' xel-la' dxenná bea, nácaqueze' xudau' chee xezre na', ne cá'aqueze naca Bēneae' naque' Zríla'dau'.

23 Xezre na' quebe nachine na gusení' gubizra na', ne beu', lawe' da dxusení'queze da xabáa chee Dios ga na', na' Bēneae' naque' Zríla'dau' naque' xel-la' naxani' chee na.

24 Bēneache chee xúgutē cue' xezr la xu, bēneache gulelé', xeledé' lu xel-la' naxani' chee xezre na', na' benne' wenná bea ca' chee xezr la xu xelu'ē da gunni'a chee' lu xezre na'.

25 Dxa xu'u chee xezre na' quebe xelexuj na te zra, na' québedxa gata' chizrela.

26 Xelu'ē xel-la' szren, ne xel-la' ba lá'ana chee xúgutē cue' xezr la xu lu xezre na'.

27 Cabata' chu'u da sban ga na', ne netú benne' dxunē' da zrinnaaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bēneae' naque' Zríla'dau'.

## 22

1 Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xani' ca xiaj esa', na' dxedxuaj na lataj blau naga zaj dxe' Dios, ne Bēneae' naque' Zríla'dau'.

2 Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní' zaj naca na da dxunna na xel-la' nabán, ne dxebía na da zixre chazrinnu lasa tu tu iza. Dxebía na da zixre chee na tu tu beu', na' xrlegue xaga na' naca na da dxexún na benne' zaj zre'ē du gabí'i xezr la xu.

3 Québedxa bi gata' da xu'u de'. Lataj blau naga zaj dxe' Dios, ne Bēneae' naque' Zríla'dau' sua na lu xezre na', na' benne' wen zrin chee' ca' xulucá'ana szreñe' Le'.

4 Xelelé'ene' Le' caníqueze, na' La Dios zriche na luzrgá benne' ca'.

<sup>5</sup> Québedxa gata' chizrela ga na', na' benne' zaj zre'ę na' quebe xelexchinę' xi', ne xel-la' naxanı' cheę gubizra, lawe' da Xránadxu Dios gusenı'ę benne' ca', na' benne' ca' xelenná be'ę chadıa chacanna.

*Ba zua gagu zra xelá' Cristo*

<sup>6</sup> Nadxa gubáz cheę xabáa na' guzre' neda':

—Dizra' canı' zaj naca na li lazre', ne waca guxrén lázrele le na. Xránadxu Dios, Bénnea' dxuzúę' Be' cheę' xichaj lázrdau benne' ca' dxelenné' waláz cheę' ba gusel-le' gubáz cheę xabáa cheę' cheę gulé'ene' benne' wen zrin cheę' da ba zua gaca,

<sup>7</sup> dxenné': "La zátequeza'. Ba neza zrente naca na cheę zéajlene' dizra' cheę Dios da naxúaj na lu xiche nigá."

<sup>8</sup> Neda', Juan, benda', ne ble'eda' da canı'. Ca gudé benda' na, na' bzu zriba' zran ni'a gubáz cheę xabáa na', gubáz blé'ene' neda' da canı' cheę gucá'ana szrena' le'.

<sup>9</sup> Na' le' guzre' neda':

—Quebe gunu' ca' lawe' da naca' wen zrin cheę Dios ca nacu' lue', ne ca zaj naca benne' bichu' ca' dxelenné' waláz cheę Dios, ne ca zaj naca xúgute benne' ca' zjácálene' ca da naxúaj na lu xiche nigá. Bca'ana szren Dios.

<sup>10</sup> Cá'anqueze guzre' neda':

—Quebe guchachu' ca naca dizra' cheę Dios da naxúaj na lu xiche nigá lawe' da ba zua gaca da naxúaj na.

<sup>11</sup> Dxácatę na', be' lataj benne' dxelune' da zrinnaj xelúnqueze' da zrinnaj dxelune', ne benne' ca' dxelune' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi cheę Dios chjácálequeze' da naca na cheę'.

<sup>12</sup> Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tuę'.

<sup>13</sup> Neda' naca' benne' zúaqueza' nédxudaute, ne benne' zúaqueza' bzébedxa, bénnea' dxuna' su lau sua xúgute, ne dxuna' xexuzre na.

<sup>14</sup> Ba neza zrente naca na cheę benne' ca' dxulupé'ę xichaj lázrdawę' ca tu benne' dxibe' zra lane', cheę xelape' lataj xelawe' da zixre cheę xaga da dxunna na xel-la' nabán, na' canı' xelezéquene' xelu'ę lu dxa xu'u cheę xęzre na'.

<sup>15</sup> Benne' ca' dxelune' da zrinnaj quebe xelu'ę ga na', ne québequeze xelú'u benne' wazrá' ca', ne benne' dxelune' da sban ca', ne benne' wete benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'.

<sup>16</sup> Neda', Jesús, ba gusel-la' gubáz cheę xabáa chia' cheę xuluzenne' tu tu cue' bënneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácatitele'ę na.

<sup>17</sup> Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebilene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

<sup>18</sup> Xúgutele le'e dxulábale dizra' chee Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'e chee da caní, Dios gudé'e chee bénnea' da ba xa' ca' da zaj naxúaj na lu xiche nigá.

<sup>19</sup> Cá'anqueze che nu benne' bi xequé'e chee da zaj naxúaj na lu xiche nigá, Dios wecá'aqueze' da naca chee bénnea' lu xiche chee xel-la' nabán, ne lu xezre lá'azxa chee', cáteze naxúaj na lu xiche nigá.

<sup>20</sup> Xránadxu, Bénnea' dxulé'ene' da nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

<sup>21</sup> Dxenaba' Xránadxu Jesucristo guné' da chawe' cheele le'e, xúgutele. ¡Ca'an gaca na!